


Chyoiyúng
chyumlaiká:
dangshikaq asik; Zaiwa



New Testament in Zaiwa

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

23f9fc55-a8a4-59ef-9513-707ec336b0ee

Contents

Mahte	1
Markuq	81
Lukaq	132
Yohan	219
Lago	285
Romaq	363
1 Korinhtuq	399
2 Korinhtuq	434
Galatiq	457
Ehpesu	470
Hpilipi	482
Kolose	491
1 Htesaloni	499
2 Htesaloni	507
1 Timohti	511
2 Timohti	520
Tituq	527
Hpilemon	531
Hebre	533
Yakuq	560
1 Petruq	569
2 Petruq	579
1 Yohan	585
2 Yohan	595
3 Yohan	597
Yude	599
Shing-rán	602

MAHTE
é Gabú Danglù
Laiká
(The Gospel of
Matthew)

Yesuq É Byùxik Shap Kyô É Hkyô

Luk 3:23-38

¹ Abraham é awut ashín, Dawiq é yhangzo yhangshu,* Yesuq Hkrisduq é byùxik labaù gi, a-ô mâ é eq rajung za nghut lhê.

² Abraham gi, Isak lé hkû; Isak gi, Yakup lé hkû; Yakup gi, Yudaq eq yhanggu yhangmâng pé lé hku é nghut lhê;

³ Yudaq gi, Hparet eq Zera lé hkû, haú nhik é yhângnu gi, Tamar nghut ri.

Hparet gi, Hesrun lé hkû; Hesrun gi, Ram lé hkû;

⁴ Ram gi, Aminada lé hkû;

Aminada gi, Nashon lé hkû;

Nashon gi, Salamun lé hkû;

⁵ Salamun gi, Buaq lé hkû;

Buaq é yhângnu gi, Rahap nghut ri.

Buaq gi, Obet lé hkû;

Obet é yhângnu gi, Ruh-taq nghut ri.

Obet gi, Yese lé hkû;

⁶ Yese gi, Hkohlâm Dawiq lé hkû;

Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

⁷ Sholumon gi, Rehoboam lé hkû; Rehoboam gi, Abiyaq lé hkû;

Abiyaq gi, Asa lé hkû;

⁸ Asa gi, Yehoshaphat lé hkû;

Yehoshaphat gi, Yoram lé hkû;

Yoram gi, Uzi-aq lé hkû;

⁹ Uzi-aq gi, Yohtam lé hkû;

Yohtam gi, Ahaza lé hkû; Ahaza gi, Hezekiaq lé hkû;

¹⁰ Hezekiaq gi, Manase lé hkû;

Manase gi, Amon lé hkû;

Amon gi, Yosiaq lé hkû;

¹¹ Yosiaq gi, Babelon má shúm dut huí é hkûn, Yehkoniah eq yhanggu yhangmâng pé lé hku é nghut ri.

¹² Babelon má shúm dut huí é htâng má,

Yehkoniah gi, Shalahtila lé hkû;

Shalahtila gi, Zerubabelaq lé hkû;

¹³ Zerubabelaq gi, Abiut lé hkû;

Abiut gi, Eliakim lé hkû;

Eliakim gi, Azor lé hkû;

¹⁴ Azor gi, Zaduk lé hkû;

Zaduk gi, Ahkim lé hkû;

Ahkim gi, Eliut lé hkû;

¹⁵ Eliut gi, Eliaza lé hkû;

Eliaza gi, Mahtan lé hkû;

Mahtan gi, Yakup lé hkû;

* **1:1** Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tô lhê.

16 Yakup gi, Mariq é yhanglâng Yosep lé hku é nghut ri;

Mariq gi, Hkrisduq gâ é Yesuq lé hku é sù nghut ri.

17 Haû mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

*Yesuq Hku Lé Lo É Hkyô
Luk 2:1-7*

18 Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhangnu Mariq gi, Yosep èq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woi-nyí mai zogúng dut bê nghut ri.

19 Yhâng é yhumsing hpó Yosep gi, dingmán sù nghut luí, yhang lé byu pé hí má hoq a kâm lhoq hpu nau é yanmai, tsik za lhoq kâng pyám râ dâ ri.

20 Nghut kôlhang, yhang haû su myit nyi é hkûn, yhupmoq má, haû Yhumsing é maumang lagyo gi, yhang lé, lé htoq shit luí, "Dawiq é yhangzo yhangshu Yosep é, haû náng é yhumsing myhí Mariq lé hâng yù râ hkyô lé, hkâ-myit chiq; haí mù gâ le, yhang wun tô é zoshâng gùng

gi, Chyoiyúng Woi-nyí dông lo é nghut lhê.

21 Yhang gi, yuqzo rayuq hkû râ nghut luí, nàng gi, zoshâng haú lé, Yesuq nghù mying myhíng byi ra râ nghut lhê; hkâsu mù gâ le, Yhang gi, Yhâng é byu pé lé, yhangmoq é yubak mara mai hkyi yù râ sù nghut lhê." ga taí ri.

22 Shí hkyô banshoq gi, Garai Gasâng èq, haû myiqh-toi dông taí é dang lé lhoq dik é nghut ri.

23 Myiqh-toi dang haû gi, "Haû zomyi gyíng gi, zogúng dut luí, yuqzo rayuq hkû râ nghut lhê; Yhâng é mying lé gi, Emanuelaq ga kó râ nghut lhê."* gâ ri. Hau é lichyúm gi, "Garai Gasang gi, nga-nhúng eq rahá nghut nyi lhê." gâ é nghut lhê.

24 Yosep gi, yhup bûn lo é hkûn, haû Yhumsing é maumang lagyo taí é eq rajung za, Mariq lé, yhangmyi dông yhûm má shuí yù bê nghut ri.

25 Nghut kôlhang, yhang gi, yuqzo haû hku é hkûn jé shoq, Mariq eq gungsho a zùm nghut ri. Yuqzo haú lé, yhang gi, Yesuq ga myhíng byi ri.

2

*Buihtoq Hkyam Mâ É
Hpaqchyî Bò Bang*

1 Herut hkohkâm up nyi é u lé, Yuda mau mâ é Betlehem wà má Yesuq lé hku é nghut ri. Hau htâng, buihtoq hkyam mâ é hpaqchyî bò bang gi,

† 1:17 Grik dong *Hkrisduq* gâ é gi, xù but hui Sù gâ é lichyúm nghut mù, Hebre dong *Mesaia* gâ é eq rajung za nghut lhê. * 1:23 Esai 7:14

Yerusalem wà mó má jé lé kômù,

² "Haù hku lé lô bê Yudaq byu pé é Hkohkâm gi, hkâmá nghut lhê lhu? Yhâng é kyî lé, buihtoq hkyam má ngamoq myàng luí, Yhang lé noq râ matú jé lé é nghut lhê." ga luí, myí akô nghut ri.

³ Herut hkohkâm gi, haù hkyô lé wó gyo jáng myit myô nyi ri; hau htoq agó, Yerusalem wà mó mâ é lhunglhâng bang le, myit myô bum akô nghut ri.

⁴ Haù mù luí, yhang gi, byu pé é hkyangjong agyi pé eq tarâ sará pé banshoq lé, jì tsíng yù mù, haù Hkrisduq hkâmá hku lé lô râ nghut é hkyô lé myí ri.

⁵ Haù hkûn, yhangmoq gi, "Yuda mau Betlehem wà má nghut lhê. Hkâsu mù gâ le, shí hkyô eq séng luí, haù myiqh-toi kâ tô é má,

⁶ 'Yudaq mau mâ é Betlehem wà ê, nàng gi, Yudaq mau mâ é wà pé má, je tiq sù a nghut;

hkâsu mù gâ le, ngá é Israelaq byu pé lé upzúng râ Zau gi, nàng chyáng mai htoq lô râ nghut lhê.[✱]

ga bo tô ri." ga tù taí akô.

⁷ Hau htâng, Herut gi, haù hpaqchyí bò bang lé haq jì yù mù, kyî lé htoq shit é ahkyíng lé, yhangmoq chyáng mai hkyak wó myí sê yù bê nghut ri.

⁸ Haù mù, yhang gi, "Nungmoq, zoshâng haù lé rago é

ho wú keq. Ngò le, Yhang lé ê wó noq râ matú, Yhang lé nungmoq é myâng eq yhang, ngo lé lo shit kyo keq." ga taí luí, haù bang lé Betlehem wà shut nhang kat bê nghut ri.

⁹ Yhangmoq gi, haù hkohkam é dang lé gyô yu é htâng má, htoq e ló bekô nghut ri. Haù buihtoq hkyam má yhangmoq myang é kyî gi, haù zonú nyi é ahtoq ang ang má ló nô é jé shoq, yhangmoq é hí má e ló byí ri.

¹⁰ Yhangmoq gi, kyî haù lé myàng jáng, gyai yhang gabú bum akô nghut ri.

¹¹ Yhangmoq gi, haù yhûm má wang e ló kô é hkûn, zonú eq yhângnu Mariq lé myàng kômù, hkyihput htuq luí, haù zonú lé noqkuq akô; hau htâng, yhangmoq é sutdek pé lé le hpóng luí, hîng, namngón jung loban eq mura* pé lé yù mù, Yhang lé chyunghuq byí akô nghut ri.

¹² Yhangmoq gi, Herut chyáng a dum taù ló râ matú, yhupmoq má, yhangmoq lé sidiq byí é hui kômù, hkyô gó hkat dông yhangmoq é mau shut taù ló bekô nghut ri.

Egutuq Ming Shut Hpany E Hkyô

¹³ Yhangmoq ló byuq é htâng má, haù Yhumsing é maumang lagyo rayuq gi, Yosep lé yhupmoq má htoq shit mù, "Toq aq! Haù zoshâng eq yhângnu lé, Egutuq ming shut shuí hpany é aq. Ngò, nang lé dum jì yu

✱ 2:6 Mihka 5:2 * 2:11 Mura gi, chi wó kut jung xù nghut lhê.

é ahkyíng jé shoq, haú má nyi nyi keq. Haí mù gâ le, Herut gi, zoshâng haú lé sat râ matú, ho nyi bê nghut ri." ga tâ ri.

14 Haú mù, yhang gi, toq luí, myín lé yhang, zôshang me lé shuí chûng mù, Egotuq ming shut e ló bê nghut ri.

15 Yhangmoq gi, Herut shi é jé shoq, haú má nyi nyi akô. Haú gi, "Ngá zo lé, ngò, Egotuq ming mai wut htoq yú bê nghut lhê."* ga, haú Yhumsing eq myiqhtoi dông taí é dang lé lhoq dik é ru nghut lhê.

16 Herut gi, yhang lé, hpaqchyí bò bâng eq mhaú pyâm tô é lé sé jáng, nhikmo-yo bê nghut ri; haú mù, yhang gi, haú hpaqchyí bò bâng chyáng mai wó sê yu é ahkyíng lé sôn wú mù, Betlehem wà eq hau é awui ayàm mâ é wà pé má nyi é, í zân mai a-ô mâ é yuqzo pé banshoq lé, sat pyám nhang ri.

17 Haú gi, "Ramaq gâ é jowò má, yón kuq é eq ngau garú é htê lé wó gyô ri;

Rahkelaq gi, yhang zô pé a nyi byuq lo kô é yan-mai, ngau nyi é eq nhik a wó tîng dut ri."*

ga luí,
18 myiqhtoi Yeremiaq dông taí tô é dang lé lhoq dik é nghut ri.

Nazaret Wà Má Dum Taú Lo É Hkyô

19 Herut shi byuq é htâng, Egotuq ming má, haú Yhumsing é maumang lagyo gi, Yosep chyáng yhupmoq dông lé htoq shit mù,

20 "Toq aq, haú zôshang me lé shuí chûng mù, Israelaq ming má taú ló aq; hkâsu mù gâ le, haú zoshâng lé sat naú bang shi byuq bekô nghut ri." ga tâ ri.

21 Haú mù, Yosep gi, zôshang me lé shuí chûng mù, Israelaq ming shut taú ló bê nghut ri.

22 Nghut kôhang, yhang gi, Yuda mau má, Arhkela-uq, yhângwa Herut é hkó má xoq up nyi é hkyô lé wó gyo jáng, haú má a wám ló lo nghut ri. Yhupmoq má sidiq byí é huí é eq rajung za, yhang gi, Galile mau shut e ló mù,

23 Nazaret gâ é wà má ló nyi nyi bê nghut ri. Haú mù, "Yhang lé, Nazaret wà byù ga râ nghut lhê." ga luí, haú myiqhtoi pé dông taí tô é dang lé lhoq dik é nghut ri.

3

Wui-myhup Sará Yohan Shui Hen É Hkyô

Mrk 1:1-8; Luk 3:1-18; Yhn 1:19-28

1 Haú yoq má, Wui-myhup Sará Yohan htoq lô mù, Yuda mau mâ é yoso má hko kyô é gi,

2 "Myit lhîng keq; hkâsu mù gâ le, mauhkûng mingdán gi, chyâng lò bê* nghut ri." gâ ri.

3 Haú yuq gi,

* 2:15 Hos 11:1 * 2:17 Yer 31:15 * 3:2 Mauhkûng mingdán gi, chyâng lò bê gâ é lichyúm gi, Garai up râ ahkyíng chyâng lò bê gâ é nghut lhê.

"Haû yoso má, byù rayuq garû taí é htê gi,

'Haû Yhumsing é matú, hkyô hen to keq; Yhâng é matú, hkyô lhoq nyhang to keq.' gâ ri."*

ga myiqhtoi Esai-aq taí tô é sù yuq nghut ri.

⁴Yohan gi, gola-uq shomaú èq saí é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dinggám eq yosô byo-î pé nghut ri.

⁵Yerusalem wà mó má é bang, Yuda mau banshoq má é bang eq Yodan làng awui ayàm lhunglháng má é bang gi, yhâng chyáng htoq e bum akô.

⁶Yhangmoq gi, yhumsing é mara lé yín yù kôluí, yhâng chyáng mai Yodan làng má wui-myhup hkâm yu bum akô nghut ri.

⁷Nghut kôlhang, yhang gi, yhang wui-myhup hkâm byí é jang má, Hparishe pé eq Saduke pé myo myo lé lo nyí kô é lé myàng jáng, yhangmoq lé taí é gi, "Duq htân lhangmuí amyú pé ê, jé lô râ yubak dam mai wó hfang lut kó sháng gaq ga, nungmoq lé ó yuq taí pûn é lúhú?"

⁸Myit lhîng hkyô eq gingdán é ashi pé zui keq.

⁹'Ngamoq gi, Abraham é yhangzo yhangshû pé nghut lhê.' nghû luí, yhumsing é i-myt nghkaú má hkâlum to kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú

yhangzô pé wó hpan htoq kat lhê.

¹⁰Ahkuí lháng, Garai Gasang gi, Yhâng é wazung lé haû siggâm wang pé má tô to bê nghut ri; haû mù, ge é ashi a zuí é agàm hkgámó lé gi, htuq lhêng pyám mù, myi má dú kat pyám râ nghut lhê.

¹¹Ngò gi, nungmoq myit lhîng kó sháng gaq nghû, wui èq za wui-myhup hkâm byí lhê. Nghut kôlhang, ngá htoq má wum-o a-tsam je bo é sù rayuq, ngá htâng má jé lé lô shirâ nghut luí, ngò gi, Yhâng é hkyí-tsung chûng byí râ lháng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byí râ nghut lhê.

¹²Yhang gi, loq má byò chung to mù, guq chyaráng má é guq bùm lé hik sân pyám luí, já é guq cham lé gi, guqchyí má tsîng kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám râ nghut lhê." gâ ri.

Yesuq, Wui-myhup Hkâm Yu É Hkyô

Mrk 1:9-11; Luk 3:21-22

¹³Haú hkûn, Yesuq gi, Yohan chyáng wui-myhup hkâm yù râ ga, Galile mau mai Yodan làng má jé lé lo ri.

¹⁴Nghut kôlhang, Yohan gi, "Ngò sheq Náng chyáng wui-myhup hkâm yù râ sù ru nghut lhê nhîng! Nàng sheq ngá chyáng lé lo lhê lúhú?" ga luí, lhom taí hkûm ri.

15 Haú hkûn, Yesuq gi, "Dingmán hkyô banshoq lé, nga-nhúng lhoq dik râ é yanmai, Ngo lé wui-myhup hkâm byi laq." ga tû taî ri. Haú mù, Yohan le, gyo byi bê nghut ri.

16 Yesuq gi, wui-myhup hkâm yù eq yhang, wui mai htoq lo ri. Haú hkûn, mauhkûng bóng lô mù, Garai Gasâng é Woi-nyí gi, hpûngkyui gunghkyâng sù é dông mai, Yhâng ahtoq má lé gyó nô tô é lé, Yhang myang kat ri.

17 Haú hkûn, "Shí yuq gi, Ngò chyitdap é Ngá zo nghut lhê; Yhâng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

4

*Yesuq, Gúnglaú Huí É Hkyô
Mrk 1:12-13; Luk 4:1-13*

1 Hau htâng má, Chyoiyúng Woi-nyí gi, Yesuq lé, nat Tsadán èq gunglaú é hui nhâng râ matú, yoso shut shuí é ri.

2 Yesuq gi, zoshuq gám é myi xê nyí myi xê myìn jé jáng, zòmut hui bê nghut ri.

3 Haú hkûn, gunglaú sù gi, Yhâng chyáng lé mù, "Nàng, Garai Gasâng é Yhangzo nghut le gi, luqgok shí pé lé muk dut nhâng aq." ga taî ri.

4 Haú jáng, Yesuq gi, "Byù gi, muk èq za asak duì râ a nghut; Garai Gasâng é nhut mai htoq lo é mungdang hkangmó èq sheq asak duì

râ nghut lhê.[☆] ga luí, Chyúmdang má kê tô ri." ga yhang lé tû taî ri.

5 Haú hkûn, nat Tsadán gi, Yesuq lé, chyoiyúng myuq* má shuí ê mù, noqkuq yhum je myhang é shûhtâng htoq má yap nhang to luí,

6 "Nàng, Garai Gasâng é Yhangzo nghut le gi, byam gyó kat wú aq. Hkâsu mù gâ le,

'Nàng é matú, Garai Gasang gi, Yhâng é maumang lagyô pé lé taî to râ nghut mù,

luqgok má Nàng é hkyî a ló htung shoq,

yhangmoq é loq èq Nang lé lhom bún yú kó râ nghut lhê.[☆]

ga luí, Chyúmdang má kê tô ri." ga taî ri.

7 Nghut kôlhang, Yesuq gi, "'Haú Yhumsîng, nungmoq é Garai Gasang lé, wó chyam wú râ a nghut.[☆] ga luí le, Chyúmdang má kê tô ri." ga, yhang lé tû taî ri.

8 Nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq eq haú pé é hkikhkâm hkyô lé tûn shit ri.

9 Hau htâng, yhang gi, "Nàng hkyihput htuq mù, ngo lé noq é nghut jáng, shí pé banshoq, Nang lé ngò byi râ." ga, Yesuq lé taî ri.

10 Haú hkûn, Yesuq gi, "Tsadán nàng, ló byuq aq! Hkâsu mù gâ le, 'Haú

☆ 4:4 Tarâ Pun 8:3 * 4:5 chyoiyúng myuq gi, Yerusalem lé gâ lhê. ☆ 4:6 Hkya-on 91:11-12 ☆ 4:7 Tarâ Pun 6:16

Yhumsîng náng é Garai Gasang lé za, nàng noqkuq dojaú ra râ nghut lhê.* ga luí, Chyúmdang má kê tô ri." ga, yhang lé tai ri.

¹¹ Haú mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akô nghut ri.

Yesuq Mungdang Hko Hi Ló É Hkyô

Mrk 1:14-15; Luk 4:14-15

¹² Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum taú ló bê nghut ri.

¹³ Yhang gi, Nazaret wà mai htoq ló mù, Zebulun eq Nahtali mau mâ é nhông yàm má joq é Kaperna-um wà má ló nyi nyi ri.

¹⁴ Haú gi, myiqhtoi Esai-aq laiká má,

¹⁵ "Zebulun mau eq Nahtali mau, wuimau mâ é hkyô, Yodan làng yàm, tungbaù pé nyi é Galile mau ê,

¹⁶ mauchut hkaú má nyi nyi é bang, maubó mó lé myàng bê nghut ri;

shí wup hkaú má nyi to bâng é matú, maubó lô bê nghut ri.*

ga kê tô é dang lé lhoq dik rá matú nghut ri.

¹⁷ Haú hkûn mai, Yesuq gi, "Myit lhîng keq! Mauhkûng mingdán gi, chyâng lò bê nghut ri." ga, mungdang hko hi e ló bê nghut ri.

Yesuq É Chángzo Hí Dut Bang

¹⁸ Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luí, nhông má gùn dú nyi akô nghut ri.

¹⁹ Haú mù, Yhang gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga tai ri.

²⁰ Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

²¹ Yesuq gi, jowò haú mai xoq sô e ló le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhai hkaú má gùn hpo nyi akô. Yhangnhik lé, Yesuq wut kat jáng,

²² yhangnhik gi, radá dâm, yhangnhik é yhângwa eq lhai haú lé, tô pyâm to kôluí Yesuq htâng cháng bekô nghut ri.

Nò Bang Lé, Yesuq Lhoq Gê Byí É Hkyô

Luk 6:17-19

²³ Yesuq gi, Galile mau ramaú gón má htoq ê mù, tara-jong pé má, mhoqshit luí, mauhkûng mingdán eq sêng é gabú danglù lé, hko kyo uchyang, byu pé chyáng má é nôhpyo ajung jung hui bang eq noli nojàng amyû myû dap bang lé, lhoq gê byí wún ri.

²⁴ Yesuq eq sêng é hkyô ludang gi, Suriq ramau gón má byo myín ló mù, byu pé gi, awáng nòhpyo ajung jung huí é bang, hkê-nhô jamjaû nyi é bang, nat gang wang júng é bang, mhúngtuq tuq é bang, gùngjum shi é bang lé, shuí lé lô kôluí, Yhang gi, haú bang lé lhoq gê byî ri.

²⁵ Galile mau, Dekapoli,† Yerusalem, Yuda mau eq, Yodan làng tû tap mâ é byu moq mó gi, Yesuq htâng châng bum akô nghut ri.

5

Hkungsô Wó É Tarâ

Luk 6:20-23

¹ Yesuq gi, byu moq mó lé myàng jáng, bùm má doq lô luí, ló zung tô ri. Haú hkûn, Yhâng é chángzô pé gi, Yhâng chyáng lé lô kôjáng,

² Yhang nhut hkum hpóng luí, yhangmoq lé mhòqshit é gi:

³ "Woi-nyí má, asho awui dut é bang gi, hkungsô wó nyi ri; hkâsu mù gà le, mauhkûng mingdán gi, yhangmoq é mingdán nghut nyi ri.

⁴ Myit iyon huí é bang gi, hkungsô wó nyi ri; hkâsu mù gà le, yhangmoq gi, nhik lhoq tîng é hui kó râ nghut lhê.

⁵ I-myit nú-nhâm é bang gi, hkungsô wó nyi ri; hkâsu mù gà le, yhangmoq gi, mingkan lé wó sîng kó râ nghut lhê.

⁶ Dingmán hkyô lé mut shit nyi é bang gi, hkungsô wó nyi ri; hkâsu mù gà le, yhangmoq gi, nhik dik shoq myàng zo kó râ nghut lhê.

⁷ Shogyo nhikmyin myit bo é bang gi, hkungsô wó nyi ri; hkâsu mù gà le, yhangmoq gi, shogyo nhikmyîn yu é hui kó râ nghut lhê.

⁸ Myit sansêng é bang gi, hkungsô wó nyi ri; hkâsu mù gà le, yhangmoq gi, Garai Gasang lé myàng kó râ nghut lhê.

⁹ Nguingón hkyô sô xoq byî é bang gi, hkungsô wó nyi ri; hkâsu mù gà le, yhangmoq gi, Garai Gasang é yhangzô pé gà é hui kó râ nghut lhê.

¹⁰ Dingmán hkyo é yanmai zing-ri huí é bang gi, hkungsô wó nyi ri; hkâsu mù gà le, mauhkûng mingdán gi, yhangmoq é nghut nyi ri.

¹¹ Ngá é yanmai, byu pê èq, nungmoq lé rhoi é, zing-rî é, a teng a mán é dông agè ashop é dang amyû myû taí tso kô é hkûn, nungmoq hkungsô wó nyi ri.

¹² Nguingón gabú nyî keq, hkâsu mù gà le, nungmoq é matú kô é chyunhuq gi, mauhkûng mingdán má joq tô ri. Nungmoq é hí lhê é myiqhtoí pé lé le, yhangmoq

† 4:25 Dekapoli gà é gi, Grik dông myuq raxé lé gà lhê.

gi, haú dông zing-rî lai lo wú bekô nghut ri.

Xo Eq Maubó

Mrk 9:50; Luk 14:34-35

¹³ Nungmoq gi, myidàm htoq mâ é xo nghut nyi lhê. Nghut kôlhang, xo gi, màn kân byuq jáng, haú lé hai èq dum wó lhoq ngam yù râ lúhú? Shinggan shut dú pyám mù, byu pé èq nâng pyeq pyâm é mai lai luí, hai akyû le bò râ a nghut lo.

¹⁴ Nungmoq gi, mingkân é maubó nghut akô; bùm htoq mâ é myuq lé gi, wó nghop to râ a nghut.

¹⁵ Myibung lé tap mù, mũng èq nghop tô é ó a kut wú kó; haú su kut râ malaí, yhúmhaú má lúng tô é bang yuq hkingmó myoq wó myâng râ matú, tsungjang má kúm tsung to râ nghut lhê.

¹⁶ Haú eq rajung za, byu pé gi, nungmoq é ge é muzó pé lé byu-myàng luí, mauhkûng htoq mâ é nungmoq é Íwa lé hkya-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

¹⁷ Ngò gi, myiqhtoí pé é dang eq jep é tarâ lé lhoq hpyoq pyám râ matú, jé lé é nghut nhô hkâ-ngâm kó; haú pé lé lhoq dik râ matú sheq jé lé é ru nghut lhê.

¹⁸ Ngò, nungmoq lé teng za taí kôlé, mauhkûng eq myigùng byuq byuq le lhang, haú pé a ban lhoq dik dik gi, jep é tarâ mâ é tiq dik é dangjí

eq myihkyet zo ralhüm lhang byuq byuq râ a nghut.

¹⁹ Jep é tarâ shí pé mâ é tiq dik é dang rahkùn lé lu lai luí, góbang lé le, haú su kut râ matú mhoq byí é sù ó yuq nghut kôle, mauhkûng mingdán má tiq dik sù gâ é hui râ nghut lhê; nghut kôlhang, jep é tarâ shí pé lé châng kut luí, mhoq byi sù kúm gi, mauhkûng mingdán má, hkik sù gâ é hui râ nghut lhê.

²⁰ Ngò, nungmoq lé taí kôlé, nungmoq dingmán é hkyô má, haú Hparishe pé eq tarâ sará pé dingmán é htoq je a gyaú le gi, mauhkûng mingdán má, nungmoq wó wâng kó râ a nghut.

Byù Hkâsat

²¹ 'Byù hkâsat,* sat é sù gi, jéyáng é hui râ nghut lhê' ga, hí hpyang lhê é bang lé taí tô é dang, nungmoq wó gyô wú bê nghut lhê.

²² Nghut kôlhang, Ngò, nungmoq lé taí kôlé, gumang rayuq yuq lé nhikjum yô é sù gi, jéyáng é hui râ nghut lhê. Hau htoq agó, gumang hpó lé, 'Byù gang'* ga taí é sù gi, Yudaq byin tú wapdoq má jéyáng é hui râ nghut lhê; 'Byù bam è' ga wut é sù gi, ngaraí myi eq gingdán nyi ri.

²³ Haú mù, hkungga gyap má, nàng hkungga nhông râ dâ é hkùn, nàng é gumang rayuq yuq, nang lé mara hun é hkyô rajung jung joq é lé, myit bûn kat é nghut jáng,

* 5:21 Htoq Ló 20:13 * 5:22 Byù gang gâ é lé, Grik dông "Raka" gâ lhê.

²⁴ náng é hkungga lé, haû hkungga gyap hí má tô pyâm to mù, náng é gumang hpó haú yuq eq hí nguingón hkyô lô yû luî sheq, hkungga lé nhông byi aq.

²⁵ Nang lé yui tsuq sù gi, nang lé tarâ rûng má dé e lô é hkûn, hkyô má ru nghut nyi ashî u lé, yhang eq nguingón hkyô hí hân yû aq. Haû a nghut jáng, haú yuq gi, nang lé, tarâ agyi chyáng é ap pyám mù, haû tarâ agyi gi, nang lé htóng hkyô pyám râ matú, htóng suwún hpô é loq má ap pyám râ nghut lhê.

²⁶ Ngò, nang lé teng za tái lé, yuichyîn haû a ban xap xap gi, htóng haú mai nàng wó htoq lô râ a nghut.

Su-myi Sulàng Lú É Hkyô Eq Séng Luî Mhoqshit É Dang

²⁷ 'Su-myi sulàng hkâlú' [☆] gâ é dang lé, nungmoq wó gyo wú bê nghut lhê.

²⁸ Nghut kôle, Ngò, nungmoq lé tái kôlé, myiwe rayuq lé shut nau é myit èq wú é sù gi, yhâng é myit hkaû má, myiwe haú yuq eq su-myi sulàng lú hkyô kut é sù nghut bê.

²⁹ Haû mù, náng é loqyo myoq èq, nang lé mara kut shut nhang é nghut le gi, haú lé lap choq yû mù, dú pyám aq. Hkâsu mù gâ le, náng é ragùngdu gón ngaraî ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

³⁰ Haû eq rajung za, náng é loqyo loq èq, nang lé mara kut shut nhang é nghut le gi, haú lé hpyit yû mù, dú pyám aq. Hkâsu mù gâ le, náng é ragùngdu gón ngaraî ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

Myi Làng Gâng É Hkyô Eq Séng Luî Mhoqshit É Hkyô

Mht 19:9; Mrk 10:11-12; Luk 16:18

³¹ 'Yhumsing é yhangmyi lé kâng é sù gi, lhoq kang laiká byi râ dut lhê.' [☆] gâ é dang joq lhê.

³² Nghut kôlhang, Ngò, nungmoq lé tái kôlé, myiwe đông mai làng shut é a nghut é za, yhumsing é yhangmyi lé kâng é sù gi, myiwe haú lé sulàng lú sù dut nhâng bê nghut ri; hau htoq agó, yhumsing yhanglâng eq gang bê myiwe lé hâng yu é sù le, su-myi lú é sù dut bê nghut ri.

Danggidiq

³³ Hau htoq agó, 'Danggidiq a zùng hkâmû; Yhumsing lé byi tô é danggidiq eq rajung za cháng aq.' ga luî, hí hpyang lhê é bang lé, tái tô é dang lé nungmoq wó gyô wú bê nghut lhê.

³⁴ Nghut kôlhang, Ngò, nungmoq lé tái kôlé, hai èq le hkâdakâm kó: mauhkung lé lang luî le, hkâdakâm kó; hkâsu mù gâ le, haû gi, Garai Gasâng é zùng tanghkuq nghut lhê;

35 myigùng lé lang luí le, hkâdakâm kó; hkâsu mù gâ le, haû gi, Garaí é hkyî nang jang nghut lhê; Yerusalem lé lang luí le, hkâdakâm kó; hkâsu mù gâ le, haû gi, Hkohkâm mó é myuq nghut lhê.

36 Hau htoq agó, yhumsing é ulhûm èq le, hkâdakâm kó; hkâsu mù gâ le, xâm rahkat lé lhang hpyû shoq noq shoq, nàng wó kut é a nghut.

37 Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, táí aq; haû mai láí é gi, haû agè ashop su chyáng mâ é nghut ri.

Lató Hpuq É Hkyô

Luk 6:29-30

38 'Myoqjí matú myoqjí xap, zui matú zui xap' é dang lé, nungmoq wó gyô wú bê nghut lhê.

39 Nghut kôlhang, Ngò, nungmoq lé táí kôlé, agè ashop kut é sù lé lató hkâhpuq. Náng é loqyo bowâm má pyuq byi sù lé, loqpaí hkyam le hkâm byi shi aq.

40 Byù rayuq yuq, nang lé mara tsuq mù, náng é buzo lé yu pyám byí é nghut jáng, bumó lé le, hkyut byi shi aq.

41 Byù rayuq yuq, nang lé zik mù, radéng ê nhâng jáng, yhang eq rahá í déng châng é byi aq.

42 Nang lé dung sù lé, byi aq; náng chyáng mai chyí naû sù lé le, nunghtáng hkâlhik pyám.

Gyè Lé Chyitdap Râ É Hkyô *Luk 6:27-28, 32-36*

43 'Náng é chyangnâm mâ é bang lé gi, chyitdap mù, náng é gyè lé gi, a jú kut aq' é dang lé, nungmoq wó gyô wú bê nghut lhê.

44 Nghut kôlhang, Ngò, nungmoq lé táí kôlé, nungmoq gi, mauhkûng htoq mâ é nungmoq é Íwâ é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyûdung byi keq;

45 hkâsu mù gâ le, Yhang gi, agè ashop bâng é ahtoq má le, gè bâng é ahtoq má le, bui tsô byi nhâng mù, dingmán bâng é ahtoq má le, a dingmán bâng é ahtoq má le, mau wô byi nhâng Sù nghut ri.

46 Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó râ lúhú? Kang guq bang lhang, haû su kut lhê a nghut kó lúhú?

47 Hau htoq agó, nungmoq é gumang wuì lé za shi-kyám kô le gi, nungmoq kut é muzó gi, góbâng htoq má haí wá lak-láí râ lúhú? Tungbaù pé lhang haû su kut lhê a nghut kó lúhú?

48 Haû mù, mauhkûng htoq mâ é nungmoq é Íwa gumjup é su, nungmoq le gumjup nyi keq.

6

Alu Byí É Hkyô

1 Nungmoq dingmán é hkyô lé, byu pé myàng sháng

gaq nghû, byu pê hí má a kut shít loshoq, sidiq nyí keq. Haû su kut é nghut jáng, mauhkûng htoq mâ é nungmoq é Íwâ chyáng mai, chyunghuq wó yû kó râ a nghut.

² Haû mù, haû gegùn labyoq kut bang gi, byu pê èq shigyaú é huì sháng gaq ga, tarajong pé hká, hkyô pé hká kut é su, nàng gi, alu byí é hkûn, tut htê su hkâlhoq htoq. Ngò, nungmoq lé teng za táí kôlé, haú bang gi, yhangmoq é chyunghuq lé hkúm shoq wó yû bekô nghut lhê.

³ Ra châ to bang lé nàng alu byí é hkûn, náng é loqyo loq kut é hkyô lé, loqpaí loq lé lháng hkâsé nhâng.

⁴ Haú hkûn, nàng alu byí é lé, ó a châng sé râ nghut lhê. Haû jáng sheq, ó a sé loshoq kut é hkyô lé myang é sù, náng é Íwa gi, nang lé chyunghuq shigyaú râ nghut lhê.

Kyûdûng É Hkyô

Luk 11:2-4

⁵ Nungmoq kyûdûng le, gegùn labyoq kut bang su hkâkut kó; hkâsu mù gà le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyûdung râ ô nau akô. Ngò, nungmoq lé teng za táí kôlé, haú bang gi, yhangmoq é chyunghuq lé wó yû bekô nghut ri.

⁶ Nghut kôlhang, nàng kyûdûng le, náng é gok hkaû má wang lô mù, hkum myhí pyám luí, a byu-myang é

náng é Íwâ chyáng dung aq. Haû jáng, ó a byu-myang é lé myàng sù, náng é Íwa gi, nang lé jeju dum tau byi râ nghut lhê.

⁷ Haû mù, kyûdûng le, tûngbaù pé su kut luí, dang puq hkâhtau kó; hkâsu mù gà le, yhangmoq gi, dang hîng chín luí dung jáng sheq, gyo byi nhô ngam akô nghut ri.

⁸ Haú bang su hkâkut kó; hkâsu mù gà le, nungmoq é Íwa gi, nungmoq râ é hkyô lé, nungmoq a dung shi mai sê to Sù nghut lhê.

⁹ Haû mù, nungmoq kyûdûng le,

'Mauhkûng htoq tsáng myhâng mâ é ngamoq é Áwa ê,

Náng é myîng gi, chyoiyúng nyí sháng gaq,

¹⁰ Náng é mingdán jé lô sháng gaq,

Nàng ô nau é hkyô, mauhkûng htoq má dik é su, myigùng htoq má le dik sháng gaq ô.

¹¹ Ngamoq nyí wuî râ é zoshuq lé, ngamoq lé hkû-nyí byi laq.

¹² Ngamoq lé shut é bâng é mara lé ngamoq hkyut pyám byí é su, ngamoq é mara lé le hkyut pyám byi laq.

¹³ Ngamoq lé, agúng alaú hkyô má a wàng nhang é za,

agè ashop jang mai hkyi yù laq ô.

(Hkâsu mù gà le, kô dik é up síng hkyô, a-tsam eq hpungwup shing kang

gi, pyat dedu ahtum
abyuq Náng chyáng ru
joq nyi ri ô! Amen.)*

ngû dung keq.

¹⁴ Supê èq, nungmoq lé kut
shut é mara lé, nungmoq
hkyut pyám byí é nghut le
gi, mauhkûng htoq mâ é
nungmoq é Îwa le, nungmoq
lé mara hkyut pyám byi râ
nghut lhê.

¹⁵ Nghut kôlhang, haú bang é
mara lé, nungmoq a hkyut
pyám byí é nghut le gi, nung-
moq é Îwa le, nungmoq é
mara lé hkyut pyám byi râ a
nghut.

Zoshuq Gám É Hkyô

¹⁶ Nungmoq gi, zoshuq gám
é hkûn, gegùn labyoq kut
bang su myoqdong hkâlhoq
nyhui kó; hkâsu mù gâ le,
haú bang gi, yhangmoq
zoshuq gám é hkyô lé, tân
shit râ matú myoqdong lhoq
nyhuí shit akô nghut ri.
Ngò, nungmoq lé teng za taí
kôlé, haú bang gi, yhangmoq
é chyunghuq wó yû bekô
nghut ri.

¹⁷ Nungmoq kúm gi, zoshuq
gám é hkûn, nungmoq
zoshuq gám é hkyô lé, byu
pê hí má de de a dut é za,
nungmoq a byu-myang é Îwa
za myàng sháng gaq, myoq
chí pyám luí, u xû but keq;

¹⁸ haú jáng sheq, ó a sé
loshoq kut é hkyô lé myang é
Sû, nungmoq é Îwa gi, nung-
moq lé chyunghuq shigyaú râ
nghut lhê.

*Mauhkûng Htoq Mâ É
Sutzè*

Luk 12:33-34

¹⁹ Jàngkon, jogyik èq wó
lhoq htên pyám é eq hkaú
su èq le wó wang hkaú yu
pyám byí é myigùng htoq má,
nungmoq é matú, sutzè lé
hkâhkong to kó.

²⁰ Jàngkon, jogyik èq le a wó
lhoq htên pyám é eq, hkaú
su èq le a wó wang hkaú yu
pyám byí é mauhkûng htoq
má sheq, nungmoq é matú
sutzè hkong to keq.

²¹ Hkâsu mù gâ le, náng é
sutzè joq jang má, náng é i-
myit le jé nyi râ nghut lhê.

²² Myoqjí gi, gungdû é my-
ibung nghut nyi ri. Náng é
myoqjí ge é nghut le gi, náng é
gungdu gón má maubó bying
mui to râ nghut lhê.

²³ Nghut kôlhang, náng é
myoqjí a ge é nghut le gi, náng
é gungdu gón gi, mauchut
tuq dut nyi râ nghut lhê.
Náng chyáng bo é maubó gi,
mauchut byuq é nghut jáng,
mauchut haú gi, hkâ-í yhang
htû râ lhê!

²⁴ Ó yuq nghut kôle,
yhumsing í yuq lé wó dojaú
râ a nghut. Hkâsu mù gâ le,
yhang gi, rayuq lé a jú kut mù,
rayuq lé gi, chyitdap râ nghut
lhê; haú a nghut jáng, rayuq
lé lhumzui mù, rayuq lé gi,
hpau a tap kut râ nghut lhê.
Nungmoq gi, Garai Gasang lé
le, ngunzè lé le, radá dâm wó
dojaú kó râ a nghut.

Hkâ-myit Chiq Kó

Luk 12:22-31

* 6:13 Chyúmlaika ra-am má, shí túm a bo é nghut lhê.

25 Haû mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdû matú haí wut haí tsang râ lé, hkâ-myit chiq kó. Asak gi, zoshuq htoq má, gungdu gi, mebû htoq má, je ahkyak lhê a nghut kó lú?

26 Maulat mâ é nghoqzô pé lé wú wú keq; yhangmoq gi, kyô hkyó kyô shu a kut é htoq agó, chyí pé má le haí a tsîng kat to kô é nghut le lháng, mauhkûng htoq mâ é nungmoq é Íwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpaudap nyi lhê a nghut kó lú?

27 Nungmoq má, ó yuq wá, myit chiq é èq, yhumsing é asak lé radúng kô wó jat yù kó râ lú?

28 Haû nghut le nhîng, haí mù, mebû matú myit chiq akô lú? Myigùng má yuq tô é htutbó ban pé hkâsu kut kô lo é lé, myit wú keq. Haú pé gi, mù le a zui, hkyîng le a ðui kó nghut ri.

29 Nghut kôlhang, Ngò, nungmoq lé taí kyo kôlé, hkohkâm Sholomon hpung kô dik u lé wut é mebu lháng, ban haû rabó lé a hkyit nghut ri.

30 Lumjîng myit tiq é bang ê, hkû-nyí joq mù, napmá myihkyóm má ðú kat pyám hui râ nghut é yosô mhan pé lé za lháng, Garai Gasang haû su kut hut é nghut le gi, nungmoq lé je riyhang hut râ a nghut kó lú?

31 Haû mù, 'Haí zo râ lhi?' 'Haí shuq râ lhi?' 'Haí wut râ lhi?' nghû hkâ-myit chiq myhîng kó.

32 Tûngbaù pé kúm gi, haú pé banshoq lé châng hkat ho nyi akô; nghut kôlhang, mauhkûng htoq má é nungmoq é Íwa gi, haú pé lé nungmoq râ é hkyô, sé byí nyi lhê.

33 Nghut kôlhang, Yhâng é mingdán eq dingmán hkyô lé hí hô keq, haú jáng, haú pé banshoq, nungmoq lé puq byi râ nghut lhê.

34 Haû mù, napmá lhê é matú hkâ-myit chiq kó; hkâsu mù gâ le, napmá gi, yhâng é yhang myit chiq râ nghut lhê. Hkû-nyí é wuîhke hkyô gi, hkû-nyí é matú gé bê nghut ri.

7

A Jéyáng Râ Hkyô *Luk 6:37-38, 41-42*

1 Nungmoq jéyáng é a hui kó sháng gaq, ó lé le, hkâjéyáng kó.

2 Hkâsu mù gâ le, nungmoq jéyáng é su, nungmoq le, jéyáng é hui kó râ nghut é htoq agó, nungmoq lik byí é bung èq, nungmoq lé dum lik byi râ nghut lhê.

3 Yhumsing myoq hkaû má lúng tô é siktúm lé lháng a myit wú é nhîng, haí mù luí, nunggu nungmâng é myoqwàng lé myang lhê lú?

4 Yhumsing é myoq má siktúm lhûng to luí nhîng, 'Náng myoq má lúng tô é myoqwàng lé, ngò choq pyám byi lé.' nghû luí, náng é

gumang hpó lé hkâsu wó tai râ lúhú?

⁵ Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmâng é myoq má wang tô é myoqwàng choq pyám byi râ matú, nàng san za myàng râ nghut lhê.

⁶ Hkuî pé lé, yunglhô é zê hkâbyi kó; waq pê hí má, nungmoq é palhé wuizo lé hkâdú byi kó. Haû su kut jáng, haû bang gi, zè haû pé lé nâng pyeq pyám mù, nungmoq lé dum taû ngat lò râ nghut lhê.

Dung Keq, Hô Keq, Hkum Má Kok Keq

Luk 11:9-13

⁷ Dung keq, haû jáng, nungmoq lé byi râ nghut lhê; hô keq, haû jáng, nungmoq myàng kó râ nghut lhê; hkum má kok keq, haû jáng, nungmoq lé hpóng byi râ nghut lhê.

⁸ Hkâsu mù gà le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

⁹ Nungmoq má, ó yuq wá, yhumsing yhangzo muk dúng le, luqgok byi kó râ lúhú?

¹⁰ Ngozo dúng le, lhang-muì* byi kó râ lúhú?

¹¹ Agè ashop é bang nungmoq lháng gi, nungmoq é zo wú lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é Íwa gi, Yhang lé

dúng é bang lé, je riyhang ge é chyunghuq byi râ nghut lhê!

¹² Haû mù, hai hkyô má nghut kôlhang, nungmoq gi, yhumsîng ô nau é dông supé lé kut nhâng nau é su, yhangmoq lé le kut byi keq. Haû mù gà le, haû gi, jep é tarâ eq myiqhtoî pê é dang lo jup tô é nghut ri.

Chyap É Hkúmdong Eq Lam É Hkúmdong

Luk 13:24

¹³ Chyap é hkúmdong mai wàng keq. Hkâsu mù gà le, lam é hkúmdong eq hkyô mó gi, htên byoq hkyô shut shuí e é nghut mù luí, haû dông wàng bang gi, myô akô nghut ri.

¹⁴ Chyap é hkúmdong eq hkyô zo kúm gi, asak hkyô shut shuí e é nghut mù luí, haû lé myang ho é bang gi, shaû akô nghut ri.

Agàm Eq Ashi

Luk 6:43-45

¹⁵ Nungmoq chyáng jé lé lo é myiqhtoî pyoq pé lé, sidiq nyi keq; yhangmoq gi, sau-kuq wut mù, nungmoq chyáng jé lé kôlhang, myaq zo myaq shuq nau é wamhkuí pé nghut akô.

¹⁶ Yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê. Zubyap mai tsibiyiq shi, zugâm mai maihpáng-shi wó yu wú akô lúhú?

¹⁷ Ge é agàm gi, ge é ashí zui mù, a ge é agàm gi, a ge é ashí za dat zui ri.

* **7:10** Garai Gasang gi, lhangmuì a zo râ matú, Yudaq byu pé lé hkunmó hkyô tô é nghut lhê.

18 Ge é agàm gi, a ge é ashi a wó zui, a ge é agàm le, ge é ashi a wó zui nghut ri.

19 Ge é ashi a zuí é shigâm hkangmó lé gi, htuq pyám mù, myi má dú kat pyám rã nghut lhê.

20 Haú mù, yhangmoq é muzó jizó lé wú mù, nungmoq gi, yhangmoq lé wú sé kó rã nghut lhê.

21 Ngo lé, 'Yhumsing ê, Yhumsing ê,' ga, wut é bang yuq hkangmó gi, mauhkung mingdán má myang wàng kó rã a nghut; haú mauhkung htoq mâ é Ngá Wa ô nau é đông kut sũ za sheq, myang wàng rã nghut lhê.

22 Haú buinyi má, byù myo myo gi, 'Yhumsing ê, Yhumsing ê, Náng é mying mai, ngamoq gi, myiqhtoi le htoi bê; nat gang lé hkat htoq bê; laklai kumlhá ajung jung lé, kut bê a nghut l hú?' ga luí, Ngo lé myi kó rã nghut lhê.

23 Haú hkũn, Ngò gi, 'Nungmoq lé, Ngò hkã-nhãm le a sé; agè ashop hkyô kut é bang nungmoq, Ngá chyáng mai gâng ló byuq keq.' nghũ, yhangmoq lé san za tũ taí kat rã nghut lhê.

Hpaqchyí Bò Sũ Eq Ngok Sũ

Luk 6:47-49

24 Haú mù, Ngá é dang shí pé lé wó gyô yù luí, châng kut é sũ gi, hpaqchyí bò mù, lunghtân htoq má, yhũm saí é sũ eq wuí nyi ri.

25 Mau wô, wuì je, laidun lò mù, yhũm haú lé lo htung kôlhang, yhũm haú gi, a htên

byoq byuq rã nghut lhê; hkãsu mù gã le, yhũm haú gi, lunghtân htoq má tsuq tô é yanmai nghut ri.

26 Nghut kôlhang, Ngá é dang lé, wó gyô yù mù, a châng sũ gi, semuì-jàng má, yhũm saí é byù ngok eq wuí nyi rã nghut lhê.

27 Mau wô, wuì je, laidun wò yup dut lò mù, yhũm haú lé lo htung jàng, yù whuì a mù loshoq htên byoq byuq rã nghut lhê." gã ri.

28 Yesuq mungdang ban taí é hkũn, shiwa byu pé gi, Yhang mhoqshit é hkyô lé maúhong bum akô;

29 hkãsu mù gã le, Yhang gi, yhangmoq é tarã sará pé eq a pung é za, ahkáng ayá wó sũ rayuq su, mhoqshit é yanmai nghut ri.

8

Manggâm Dap É Byù Rayuq

Mrk 1:40-45; Luk 5:12-16

1 Yesuq gi, bùm htoq mai gyó lo é hkũn, byù moq mó gi, Yhâng htâng châng bum akô nghut ri.

2 Haú hkũn, manggâm dap é byù rayuq gi, Yhâng é hí má, lé mù, hkyihput htuq luí, "Yhumsing ê, Nàng dóng é nghut le gi, ngo lé Nàng wó lhoq sân-yúng byi rã nghut lhê." ga taí ri.

3 Yesuq gi, loq lhâm kat mù, haú yuq lé ê záng luí, "Ngò dóng lhê, sân-yúng aq hkoì." ga taí kat ri. Haú hkũn jàng, haú yuq é manggâm gi, ge byuq bê nghut ri.

⁴ Haú hkûn, Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tûn shit mù, yhangmoq é matú saksé dut sháng gaq, Mosheq taí tô é eq rajung za, hkungga ló nhông byi aq." ga haú yuq lé taí kat ri.

Gyezau Hpô É Lumjúng Myit

Luk 7:1-10; Yhn 4:43-54

⁵ Yesuq, Kaperna-um wà má wang e ló le, Romaq gyezau hpó rayuq gi, Yhâng chyáng lé jé mù,

⁶ "Yhumsîng ê, ngá é dui-nhâng zoshâng gi, gùngjum shi é htoq agó, yhûm má gyaí no jamjaû leq tô ri." ga garúm lé dung ri.

⁷ Haú hkûn, Yesuq gi, yhang lé, "Ngò, lé lhoq gê byi râ." ga taí kat ri.

⁸ Gyezau hpó haú, Yhang lé dum tû taí é gi, "Yhumsîng ê, Nàng, ngá é laishîn-htâng má, lé nang râ lhang ngò má a gingdán. Nàng, dang rahkun za taí kat laq; haú hkûn, ngá é dui-nhâng zoshâng ge ló râ nghut lhê.

⁹ Hkâsu mù gâ le, ngò le ahkáng ayá wó é zau rayuq é a-ô má é zau nghut lhê; ngá é a-ô má le gyezô pé nyi lhê; rayuq lé, 'Ê aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jûn lé le, 'Shí kut aq!' nghu le, yhang kut lhê." gâ ri.

¹⁰ Yesuq gi, dang haú lé wó gyo jáng, maú byuq luí, Yhâng htâng cháng bang lé, "Ngò, nungmoq lé teng za taí kôlé,

Israelaq amyû má lhang, shí í lumjúng é sù lé, Ngò, rayuq lé le a myàng wú é nghut lhê.

¹¹ Ngò, nungmoq lé taí kôlé, buihtog buiwàng hkyam mâ é byu pé myo myo gi, mauhkûng mingdán má, Abraham, Isak, Yakup pé eq rahá, zoshuq poí mó má myang zùng kó râ nghut lhê.

¹² Nghut kôlhang, mingdán haú má wàng âng é bang kúm gi, shinggan mauchut hkaû shut dú pyâm é hui luí, haú jowò má ngaubyi ngaù nhap eq zuí kyik kyik shoq hpuzô nyi bùm bekô râ nghut lhê." ga taí ri.

¹³ Hau htâng, Yesuq gi, gyezau lé, "Ló aq hkoi! Nàng lumjúng é eq rajung za, dut râ nghut lhê." ga taí ri. Haú-u má yhang, haú dui-nhâng zoshâng gi, ge byuq bê nghut ri.

Byù Myo Myo Lé Lhoq Gê Byí É Hkyô

Mrk 1:29-34; Luk 4:38-41

¹⁴ Yesuq gi, Petruq é yhûm má jé wang e é hkûn, Petruq é yhâng-aumó gyai yhang no leq tô é lé, ê myang ri.

¹⁵ Yesuq gi, yhâng é loq má ê záng kat é hkûn, Petruq yhâng-aumó gi, nõhpyo ge byuq mù, toq luí, Yhang lé wó gaí tso gaí huq bê nghut ri.

¹⁶ Myinhtâng mauchut lô jáng, nat gang wang júng nyi é bang myo myo lé, Yhâng chyáng shuí lé lo akô. Yhang gi, agè ashop é nat gâng pé lé dâng èq hkat htoq pyám mù, nõhpyo huí é bang banshoq lé lhoq gê byí ri.

17 Haû gi,
 "Yhang gi, nga-nhung é noli
 nojang lé yu pyám byi
 mù, nga-nhung é noli
 nojang lé, wùn waq
 pyám byi bê nghut ri."*
 ga, myiqhtoi Esai-aq taî tô é
 dang lhoq dik râ matú nghut
 ri.

*Yesuq Htâng Cháng Râ
 Bang*

Luk 9:57-62

18 Yesuq gi, Yhâng é
 hínhkyuq má byù moq mó
 zup míng nyi é lé myàng jáng,
 Yhâng é chángzô pé lé, không
 hé hpoq shut gû dap ê sháng
 gâ ri.

19 Haû hkûn, tarâ sará
 rayuq gi, lé lô mù, "Sarâ ê, ngò
 gi, Nàng hká e le hká cháng râ
 nghut lhê." ga Yhang lé lé taî
 ri.

20 Haû jáng, Yesuq gi,
 "Wamhkuî pé gi, hkyûng wó
 akô; nghoq pé le, nghoqsut
 wó akô. Nghut kôlhang, haû
 Byu Yhangzo gi, u nghê jowò
 lhang a wó nghut ri." ga lhom
 taî kat ri.

21 Haû hkûn, chángzo rayuq
 gi, "Yhumsîng ê, ngá wa lé lô
 yhûm pyám râ ahkáng hí byi
 shilaq." ga taî kat ri.

22 Nghut kôlhang, Yesuq gi,
 "Shî bê bang gi, shî bê bang
 yhangchang yhûm lhum kó
 sháng gaq, nàng gi, Ngá htâng
 cháng aq." ga dum taû taî ri.

Laidun Lhoq Zim É Hkyô

Mrk 4:35-41; Luk 8:22-25

23 Hau htâng, Yesuq lhaî
 hkaû má wàng mù, Yhâng é

chángzô pé le, Yhâng htâng
 châng wàng bekô nghut ri.

24 Haû hkûn, không má
 byodan-htik laidun mó lô mù,
 wuìhêng pé gi, lhaî má bat ùm
 lô bê nghut ri. Nghut kôlhang,
 Yesuq gi, yhup myhî tô ri.

25 Chángzô pé gi, Yhâng
 chyáng jé ê mù, Yhang lé
 nhaû pun luî, "Yhumsîng ê,
 hkyi yù laq ô! Nga-nhung
 myup lô nyi ri." ga taî akô.

26 Yhang gi, "Lumjîng myit
 shaû é bang ê! Haî mù, haû-
 í gyuq bum akô lhu?" ga taî
 kat ri. Hau htâng, Yhang gi,
 toq luî, laidun eq wuìhêng pé
 lé tân kat jáng, banshoq zîm
 byuq bê nghut ri.

27 Byù haû bang gi,
 maúhong byuq kômù, "Shî
 yuq gi, hkasû é byù lha?
 Laî eq wuìhêng pé lhang gi,
 Yhâng é dang lé gyo byî ri
 myhi-nhung!" ga luî, rayuq
 eq rayuq myî lhum bum akô
 nghut ri.

*Nat Wang Júng Su Nhik Lé,
 Lhoq Gê Byî É Hkyô*

Mrk 5:1-20; Luk 8:26-39

28 Yesuq gi, Gadara byu pé
 é mau hpoq má jé dap lô jáng,
 nat gang wang júng é byù í
 yuq gi, lupdùng mai htoq lé
 lo kômù, Yhang lé lé huî akô.
 Haû nhik gi, haû hkyô mai ó
 lhang a wám lai loshoq wuî é
 su nhik nghut akô.

29 Yhangnhik gi, Yesuq lé,
 "Garaî Yhangzo ê, Nàng, ng-
 amoq eq haî sêng lhê lhu?
 Ahkyíng a jé shimá, ngamoq
 lé zing-ri râ matú jé lé lo é

nghut lê lú?" ga taí garú akô.

³⁰ Haú mai a lúm wê é jowò má, waq rajùm mó gi, myi dû but zô nyi bum akô nghut ri.

³¹ Nat gâng pé gi, Yesuq lé, "Nàng, ngamoq lé hkat htoq râ nghut jáng, hê waq pè chyáng wàng nhâng laq." ga dúng akô.

³² Yesuq gi, "Htoq ló keq!" ga taí kat ri. Haú mù, yhangmoq gi, htoq ló luí, waq pè chyáng wàng mù, waq haú jùm gi, gampyoq mai nhông hkaú shut đin yán wang ló kôluí, wui hkaú má myup shi byuq bekô nghut ri.

³³ Waq zúng bang gi, myuq hkaú shut hphang đin wang ló kômù, dut laí lo é hkyô ban-shoq lé le, nat gang wang júng huí su nhik hkâsu dut é hkyô lé le, ló taí kyo akô nghut ri.

³⁴ Haú mù, rawa bang gi, Yesuq lé hui râ matú htoq lé lo bùm kômù, Yhang lé myàng jáng, yhangmoq é mau mai htoq ló byuq râ matú, chôm dúng tôngbán akô nghut ri.

9

Gungjum Shí Sû Lé Lhoq Gê Byi É Hkyô

Mrk 2:1-12; Luk 5:17-26

¹ Yesuq gi, lhai má wàng mù, yhumsing é wà shut jì dap ló bê nghut ri.

² Byù ra-am gi, gùngjum shí sù rayuq lé, taphkang mai Yhâng chyáng waq lé lo akô. Yesuq gi, yhangmoq é lumjúng myit lé byu-myàng jáng, haú gùngjum shí sù lé, "Ngá zo ê, nhik hkâ-ngê; náng é yubak

mara lé hkyut pyám byi bê." ga taí ri.

³ Haú hkùn, tarâ sará pé ra-am gi, yhangmoq é i-myt hkaú má, "Byù shí yuq gi, Garai Gasang lé rhoi dang taí nyi ri." ga myit nyi bum akô nghut ri.

⁴ Yesuq gi, yhangmoq myit nyi é hkyô lé sé mù, "Nungmoq é i-myt hkaú má, haú su agè ashop é đông haí mù myit nyi akô lú?"

⁵ 'Náng é yubak mara lé hkyut pyám byi bê.' nghu taí râ eq 'Toq luí, hkyô so aq.' nghu taí râ má, hká hkun je taí lui lê lú?"

⁶ Nghut kôhlang, haú Byu Yhangzo gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lê." ga taí luí, haú gùngjum shí sù lé, "Toq aq, náng é taphkang yu chùng luí, yhùm taú ló aq hkoí." ga taí kat ri.

⁷ Haú mù, haú yuq gi, toq mù, yhùm shut ló byuq bê nghut ri.

⁸ Byù hpùng mó gi, haú hkyô lé myàng kôjáng, gyuq maú kômù, byu pé lé haú su é ahkáng ayá byi tô é Garai Gasang lé hkya-on kungton bum akô nghut ri.

Mahte lé shuí yu é hkyô

Mrk 2:13-17; Luk 5:27-32

⁹ Yesuq gi, haú jowò mai sô e ló é hkùn, kang guq zúm má zung tô é Mahte ga sù lé myàng mù, "Ngá htàng cháng aq." ga taí jáng, haú yuq gi, toq luí, Yhâng htàng cháng bê nghut ri.

10 Yesuq gi, Mahte é yhûm má myinzang zô nyi é hkûn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô.

11 Haû lé, Hparishe pé myàng kôjáng, Yhâng é chángzô pé lé, "Nungmoq é sará gi, haî mù luî, kang guq bang eq yubak dap bang eq rahá zo shuq nyi lhê lhú?" ga myî akô.

12 Yesuq gi, haû su ga kô é lé wó gyo jáng, "Wángzán bang gi, chí sará a ra kó; nòhpyo hui bang za sheq ru râ lhê.

13 Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê.* gâ é lichyúm lé mhoq yû keq. Hkâsu mù gâ le, Ngò gi, dǐngmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga tû taî kat ri.

Zoshuq Gám É Eq Sêng É Hkyô

Mrk 2:18-22; Luk 5:33-39

14 Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lhê; nghut kôle, Náng é chángzô pé gi, haî mù a gám kô é lhú?" ga luî, lé myî akô.

15 Haû mù, Yesuq tû taî é gi, "Bíng pé gi, lusik eq rahá nghut nyi to ashî hkûn, hkâsu ge yón kó râ lhú? Lusik lé, yhangmoq chyáng mai shuí

yu pyâm é hkyíng jé râ nghut lhê; haû hkûn kúm gi, yhangmoq zoshuq gám kó râ nghut lhê.

16 Ó yuq le, mebu xau má pán sik èq a lhaq hpo wú kó; hkâsu mù gâ le, pán sik kun byuq jáng, mebu xau le je lhoq cheq pyám râ nghut lhê.

17 Tsibiyiq wing asik lé le, shokuq htúng axau má ó a kat wú kó. Kat é nghut jáng, tsibiyiq wing asik soq htân luî, htúng buq goq byuq mù, tsi-biyiq wing le yui shun byuq, htúng le htên byuq, dut râ nghut lhê. Haû mù, tsibiyiq wing asik lé, shokuq htúng sik má kat jáng sheq, haû í júng é a hten râ nghut lhê." gâ ri.

Shî Bê Myiwe Zo Eq No É Myiwe Myhí

Mrk 5:21-43; Luk 8:40-56

18 Yesuq haû su ga taî nyi é hkûn, suwún rayuq jé lé lô mù, Yhâng é hí má hkyihput htúq luî, "Ngá zo byizo gi, ahkuî za shi byuq bê. Nghut kôlháng, Nàng lé mù, yhâng é ahtoq má loq lé ke byi laq, haû jáng, yhang, asak dum dui lò râ nghut lhê." ga taî ri.

19 Yesuq gi, toq mù, Yhâng é chángzô pé eq rahá, haû yuq htâng châng e ló akô.

20 Haû hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huî lé mù, Yhâng é bushi htâng má é záng kat ri.

21 Myiwe myhí haû gi, yhang gûng yhang, "Ngò, Yhâng é buhtáng má ê wó

záng jáng gi, ge byuq râ nghut lhê." ga, wó myit é yanmai nghut ri.

22 Yesuq gi, lhing wú kat luí, yhang lé myàng jáng, "Ngá zo é, nhik hkâ-ngê, náng é lumjíng myit gi, nang lé lhoq gê byi bê nghut ri." ga taí ri. Haú hkûn jáng yhang, myiwe myhí haú gi, ge byuq bê nghut ri.

23 Yesuq gi, suwún hpô é yhúm má jé wang ló é hkûn, sampyí mut bang eq garu garín dut nyi é bang lé, é myâng mù,

24 yhangmoq lé, "Hui keq. Myiwe zo gi, shi byuq é a nghut, yhup myhí tô é sheq ru nghut lhê." ga taí jáng, yhangmoq gi, Yhang lé wuizui kut pyám byí akô.

25 Yesuq gi, byù hpûng lé, shinggan shut htoq ló nhâng mù, Yhang wang ê luí, myiwe zo haú lé loq èq zuí kat jáng, myiwe zo haú gi, dum dui toq lo ri.

26 Haú hkyo é danglù gi, ramau gón yhang jam ló byuq bê nghut ri.

Myoqjit Í Yuq Eq Nhut Jit Sû Rayuq Lé, Lhoq Gê Byí É Hkyô

27 Yesuq gi, haú jowò mai xoq e ló nyi le, Yhâng é htâng má, myoqjit í yuq gi, châng dìn uchyang, "Dawiq é Yhangzo é, ngá-nhik lé shogyô yù laq ô!" ga wut taí akô.

28 Yesuq gi, yhúmhaú má jé wang ló é hkûn, myoqjit su nhik châng wang lò kômù, haú nhik lé, "Ngò wó kut byí

é lé, nungnhik lumjíng akô luq?" ga myí ri.

Haú hkûn, yhangnhik gi, "Lumjíng lhê ô, Yhumsíng é." ga tâ taí akô.

29 Hau htâng, Yhang gi, haú nhik é myoqjí má é záng htung luí, "Nungnhik lumjíng é eq rajung za dut sháng gaq." ga tâ ri.

30 Haú mù, yhangnhik gi, myoq wó myâng bekô nghut ri. Yesuq gi, "Shí hkyô, ó lé le hkâsé nhâng kó." ga, yhangnhik lé htân htân sidiq byí ri.

31 Nghut kôlhâng, yhangnhik gi, haú hkyô lé, haú mau ramau gón yhang taí pyo ló bekô nghut ri.

32 Haú nhik htoq ló nyí kô é hkûn, nat gang wang júng luí, dang a wó nyô sù rayuq lé, Yesuq chyáng shuí lé lo akô.

33 Nat gang lé hkat htoq pyám é hkûn, nhutjit sù haú gi, dang wó nyô bê nghut ri. Byù hpûng mó gi, haú lé wú maú byuq kômù, "Shí su dut é hkyô lé, Israelaq amyû má radàm lháng a myang wú." ga taí bum akô.

34 Nghut kôlhâng, Hparishe pé kúm gi, "Nat gâng pé é zaú é wum-o a-tsam èq za, nat gâng pé lé hkat htoq pyám é nghut ri." ga taí bum akô nghut ri.

Mû Zui Byù Shaú Ri

35 Yesuq gi, myuq pé eq wà pé banshoq má wàng luí, haú pé mâ é tarajong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nõhpyo ajung jung eq nolì nojàng hui bang yuq

hkgámó lé, lhoq gê byî wún ri.

³⁶ Yesuq gi, byù moq mó lé myàng jáng, wú shogyô nyi ri. Hkâsu mù gâ le, yhangmoq gi, sau zúng sũ a nyi é sau pé su, awui ahke dut é eq byo myín bûm kô é yanmai nghut ri.

³⁷ Haû mù, Yhang gi, Yhâng é chángzô pé lé, "Kyôshû yù râ myo shoq joq kôhlang, mù zui râ byù gi, shaû nyi ri.

³⁸ Haû mù, haû kyô Yhumsîng lé, Yhâng é kyô yô má, kyô shu byù myo myo nhâng byi râ matú, dung keq." ga tái ri.

10

Raxe Í Yuq Lé Nhang Htoq Kat É Hkyô

Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17

¹ Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq râ eq, noli nojàng eq nõhpyo ajung jung lé wó lhoq gê râ ahko ahkáng yhangmoq lé byî ri.

² Haû lagyo raxe í yuq é myìng gi, (Petruq ga sũ) Simun eq yhanggu Andre; Zebedi é yhangzô nhiktang Yakuq eq yhanggu Yohan;

³ Hpilip eq Barhtolume; Htomaq eq kang guq sũ Mahte; Alhpe é yhangzo Yakuq, Htade,

⁴ Zelutuq* dut é Simun eq, Yesuq lé ap pyám râ sũ, Yudaq Iskarut pé nghut akò.

⁵ Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, "Tûngbàu pê chyáng le hkâ-ê kó; Samariq wà rawá má le hkâwâng kó.

⁶ Haû byuq byuq é sau pé su nghut nyi é Israelaq byu pé chyáng sheq ê keq.

⁷ Nungmoq gi, ê mù, 'Mauhkûng mingdán gi, chyâng lò bê nghut ri.' nghu é danglù lé hko kyo keq.

⁸ Nò bang lé lhoq gê byi, shî bê bang lé lhoq dui toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Laí laí wó é lé, laí laí byi keq.

⁹ Nungmoq é hpyihit má, hîng, ngùn eq gyi pé hkâkat chûng kó;

¹⁰ hkyowui é matú, etap, mebu htaí, hkyî-tsung eq dumbáng pé hkâyú chûng kó; hkâsu mù gâ le, mù zui sũ gi, zoshuq wó gíng lê.

¹¹ Hká wâ hká dum má jé wang ló le le, haú mâ é gíngdán é byù lé hô mù, haú mai htoq ló é hkûn jé shoq, haú yuq é yhûm má za nyi nyi keq.

¹² Haú yhûm má wang é hkûn, shichyên yù keq.

¹³ Haú yhûm gi, gíngdán é nghut jáng, nungmoq shimân byî é hkyô, yhangmoq chyáng joq nyi sháng gaq; a gíngdán é

* **10:4** Zelutuq gâ é lichyúm gi, yhumsîng zui sai é hkyô má gyai yhang myit lòm shirong é sũ lé ga lê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lê.

nghut jáng, nungmoq chyáng dum taù lò sháng gaq.

¹⁴ Nungmoq lé a lhom hap yu é eq nungmoq é dang lé a lhom gyo byi kô é nghut jáng, haù yhùm haù wâ mai htoq lò é hkùn, nungmoq é hkyiwa má dap é hpuilhaù lé ko hkyô pyâm to keq.

¹⁵ Ngò, nungmoq lé teng za taí kôlé, tarâ jéyáng é buinyi má, haù wâ gi, Sodom eq Gomoraq myuq htoq má je hpuzo râ nghut lhê.

¹⁶ Wamhkui hpúng má nhang hâng kat é sau pé lé su, Ngò, nungmoq lé nhang kat é nghut lhê. Haù mù, nhangmuì su hpaqchyì bò luì, hpûngkyui su nú-nhâm nyi keq.

¹⁷ Byu pé lé sidiq keq; hkâsu mù gà le, yhangmoq gi, nungmoq lé, tarâ rúng pé má é ap pyâm kó râ nghut é htoq agó, yhangmoq é tarajong pé má, nungmoq lé nhuq bat kó râ nghut lhê.

¹⁸ Nungmoq gi, Ngá é yanmai, mauzau wuì eq hkohkam pê é hí má shuì jé é hui luì, yhangmoq é hí má le, tûngbaù pê é hí má le, saksé myang hkâm kó râ nghut lhê.

¹⁹ Nghut kôlhang, nungmoq lé ap pyâm kô é hkùn, nungmoq hkâsu taí râ eq haì taí râ lé, hkâ-myit chiq kó. Haù hkùn taí râ dang, nungmoq wó kó râ nghut lhê.

²⁰ Hkâsu mù gà le, haù gi, nungmoq é dang a nghut, nungmoq é Yhângwâ é Woinyí sheq, nungmoq đông taí râ ru nghut lhê.

²¹ Nhiktâng gi, nhiktâng yhangchang, îwa gi, yhangzo lé, shí shoq ap pyâm lhum kó râ nghut lhê; zo wuì gi, mó wuì lé gumlau toq mù, sat pyâm nhâng kó râ nghut lhê.

²² Byù lhunglhang bang gi, Ngá é yanmai, nungmoq lé a nguì kut kó râ nghut lhê; nghut kôlhang, jihùm jé shoq wó hkam jân nyi é sù gi, hkyi yu é hui râ nghut lhê.

²³ Rawò má zing-ri é hui jáng, rawò shut hpang é keq. Ngò, nungmoq lé teng za taí kôlé, Israelaq byu pê é myuq pé má, nungmoq a ban wang ngap shimá, haù Byu Yhangzo jé râ nghut lhê.

²⁴ Jongzo gi, sará htoq, dui-nhâng zoshâng gi, yhumsing htoq, gyaù râ a nghut.

²⁵ Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé lhang Bezebulaq† ga kô le gi, Yhâng é yhumbyù wuì lé gi, je riyhang nghú kó râ a nghut lhú?

²⁶ Haù mù, yhangmoq lé hkâgyuq kó. A byông htoq loshoq wó zaù nghop tô é haì le a joq râ nghut lhê; a sé loshoq wó haq tô é le, haì a joq râ nghut lhê.

²⁷ Ngò, nungmoq lé mauchut hkaù má taí é hkyô lé, myoq myàng maubó má taí kyo keq; Ngò, nungmoq lé dangsoq soq kyo é hkyô lé, yhumhkûng htoq mai taí pyô keq.

† 10:25 Bezebulaq gà é gi, Tsadán é myíng rajà nghut lhê.

28 Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraí ming má wó lhoq htên é Sû lé sheq, gyuq nyi keq.

29 Johkýang í du lé, gyi htingchap rachap èq wó ùng pyám lhê a nghut kó lú? Nghut kôlhang, haû radu lhang, nungmoq é Íwâ é myit èq a nghut jáng, myigùng má wó byit gyó rà a nghut.

30 Nungmoq é ulhum mâ é xâm banshoq lé lhang, nghap to gù nghut lhê.

31 Haû mù, hkâgyuq kó; nungmoq gi, haû johkýang myo myô htoq má lhang gù je bo é bang nghut lhê.

32 Byu pê hí má, Ngo lé lhom yín yu é sù ó yuq lé nghut kôle, mauhkùng htoq mâ é Ngá Wâ é hí má, Ngò lhom yín yû rà nghut lhê.

33 Byu pê é hí má, Ngo le he-ngik pyám é sù ó yuq lé nghut kôle, mauhkùng htoq mâ é Ngá Wâ é hí má, Ngò he-ngik pyám rà nghut lhê.

34 Ngo lé, haû myidàm htoq má simsaq hkyô byi rà matú lé lo é sù su hkâ-ngâm kó. Ngò gi, simsaq hkyô byi rà matú lé lo é a nghut, shâm byi rà matú sheq lé lo é ru nghut lhê.‡

35 Hkâsu mù gâ le,

'Yuzqo gi, yhângwa eq, byizo gi, yhângnu eq, dumó gi, yhângmhoí eq, byoq lhum kó rà nghut lhê.

36 Yhumsing é yhumbyù wui gi, yhumsing é gyè taù dut rà nghut lhê.‡

gâ tô é matú sheq, Ngò jé lé é ru nghut lhê.

37 Ngo lé chyit é htoq yhum-sing é ìnu îwa lé je chyit é sù ó yuq nghut kôle, Ngá é chángzo kut rà gingdán sù a nghut; Ngo lé chyit é htoq yhumsing é zo wui lé je chyit é sù ó yuq nghut kôle, Ngá é chángzo kut rà gingdán sù a nghut;

38 Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo kut rà gingdán sù a nghut.

39 Yhumsing é asak lé ha bûn é sù ó yuq nghut kôle, asak sum rà nghut lhê; Ngá é yanmai, yhumsing é asak sùm pyám é sù ó yuq nghut kôle, asak wó rà nghut lhê.

40 Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haû Ngo lé nhang kat Sû lé hap yu é sù nghut bê.

41 Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chyunghuq lé wó yû rà nghut lhê; dingmán sù rayuq lé, dingmán sù dông lhom hap yu é sù ó yuq nghut kôle, dingmán sù rayuq é chyunghuq lé wó yû rà nghut lhê.

42 Shî, tiq bang mâ é rayuq yuq lé, Ngá é chángzo nghut é yanmai, uchyam ragóm byi

‡ 10:34 Yesuq gi, simsaq hkyô byi sù nghut lhê. Nghut kôlhang, Yhang é yanmai, byu pé mabyoq htoq rà nghut é hkyô lé sé mù, haû su ga taí é nghut lhê. ☆ 10:36 Mihka 7:6

huq é sũ gi, Ngò, nungmoq lé teng za tái kôlé, yhâng é chyunghuq lé hkyak myang hkam yù rã za nghut lhê." gã ri.

11

Yesuq Eq Wui-myhup Sará Yohan

Luk 7:18-35

¹ Yesuq gi, Yhâng é chángzo raxe í yuq lé dang ban pying é htâng má, Galile mau mâ é wà pé má mhoqshit rã matú eq hko kyo rã matú, haú jowò mai htoq e ló bê nghut ri.

² Wui-myhup Sará Yohan gi, Hkrisduq kut nyi é hkyô lé, htóng hkaũ má wó gyo jáng,

³ "Nàng gi, haũ jé lé lô rã Sũ nghut lhê lhú? Haũ a nghut jáng, ngamoq gi, góyuq lé lángrã shirã lhú?" ga, yhâng é chángzô pé lé myí nhang kat ri.

⁴ Yesuq tũ tái é gi, "Nungmoq wó gyo wó myang é hkyô, Yohan lé lô tái kyo keq;

⁵ myoqjit bang, myoq wó myâng bekô; hkyí hten bang le, wó so bekô; manggãm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê.

⁶ Ngá é yanmai, Ngo lé lum shut é hkyô a bò sũ gi, hkungsô wó nyi ri." ga tái ri.

⁷ Yohan é chángzô pé taũ ló kô é u lé, Yohan eq séng luí, byù moq mó lé Yesuq tái é gi; "Nungmoq gi, haĩ lé hpuq wú rã matú, haũ yoso shut e

akô lhú? Lai èq hik nhũn é jamgãm lé wú rã matú nghut akô lhú?

⁸ Haũ a nghut jáng, haĩ lé wú rã matú e akô lhú? Nú-nhâm é mebu wut sũ lé wú rã matú e akô lhú? A nghut. Nú-nhâm é mebu wut bang gi, hkohkãm-wâng pé má sheq rũ nyi lhê.

⁹ Haũ nghut lé gi, haĩ lé wú rã matú é kô é lhú? Myiqh-toi rayuq lé lhú? Haũ kũm nghut ri; Ngò, nungmoq lé tái kôlé, Yohan gi, myiqhtoĩ htoq lhang gyaũ sũ nghut lhê.

¹⁰ Haũ yuq é hkyô lé, Chyúmdang má kã tô é gi,

"Wú aq, Náng é hkyô lajang lángrã matú, Ngá é lagyo lé, Náng é hí má Ngò nhang kat rã nghut lhê."[✧]

gã ri.

¹¹ Ngò, nungmoq lé teng za tái kôlé, myiwe wui mai hku kat é bang má, Wui-myhup Sará Yohan htoq je kô é rayuq lhang a htoq wú shi; nghut kôlhang, Garai Gasang é mauhkũng mingdán má je tiq dik sũ gi, Yohan htoq je kô lhê.

¹² Wui-myhup Sará Yohan é buinyi mai ahkuĩ jé shoq, mauhkũng mingdán gi, lú chyĩn wang nyi é hui mù, sarhé pé gi, haũ lé wó yũ bekô nghut ri.

¹³ Hkãsu mù gã le, Yohan é ahkying jé shoq, haũ myiqh-toĩ pé banshoq eq tarã gi, haũ hkyô eq séng luí, myiqh-toi to gi nghut lhê.

14 Nungmoq hap yù nau é nghut jáng, Yohan gi, haù jé lé lô râ ga sù Eliyaq nghut lhê.*

15 Gyô yù râ nohkyap dap sù gi, gyô yù sháng gaq.

16 Shí ipyat lhê é byu pé lé, Ngò, hai eq taì kê wú râ lú?

17 Yhangmoq gi,
'Nungmoq é matú, ng-amoq sampyí mut byi kôlhang, nungmoq gi, a gó kó;

ngamoq, ngaù hkyangsâng kôlhang, nungmoq gi, a ngaù kó.'

ga luí, gai pé má zùng mù, góbang lé wut taì lhùm nyi é zoshâng wui eq wui akô.

18 Hkâsu mù gâ le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga taì akô.

19 Haù Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taì akô. Nghut kôlhang, hpaqchyí byéng-yá gi, yhâng é muzó èq saksé tûn shit nyi ri." gâ ri.

Myit A Lhîng É Wà Mó Pé Hkyô

Luk 10:13-15

20 Hau htâng, Yesuq gi, lak-lai kumlhá pé je myo kut shit bê nghut kôlhang, myit a lhing é myuq pé lé tân é gi,

21 "Kurazin và mó ê! Nàng dingnyé wó ri! Bet-saida và mó ê! Nàng dingnyé wó ri! Nungmoq chyáng lé kut shit é laklai kumlhá pé lé, Turuq

myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimê tû wut lhê, myiwap kyaq gyûn lhê kut bekô râ nghut lhê.

22 Ngò, nungmoq lé taì kôlé, tarâ jéyáng é buinyi má, nungmoq gi, Turuq myuq eq Sidun myuq htoq má je hpuzo kó râ nghut lhê.

23 Dum mù, Kaperna-um và nàng ê, nàng gi, mauhkûng jé shoq waq toq é hui râ lú? A nghut, mosumhkung má sheq gyó râ nghut lhê. Náng chyáng kut shit é laklai kumlhá lé, haù Sodom và má kut shit é ru nghut le gi, myuq haù hkû-nyí jé shoq joq nyi râ nghut lhê.

24 Ngò, nungmoq lé taì kôlé, tarâ jéyáng é buinyi má, Sodom và hpuzô é gi, náng htoq shau râ nghut lhê." gâ ri.

Ngú Nyî Bâng É Matú Bánno Jang

Luk 10:21-22

25 Haù u lé, Yesuq taì é gi, "Mauhkûng eq myigung é Yhumsîng, Âwa ê, Nàng gi, haù pé lé, hpaqchyí byéng-yá bò bang eq myit hpaqchyí sé bâng é hí má nghop to luí, zoshâng wui lé tûn shit bê nghut é yanmai, Ngò, Nang lé hkya-on lhê ô.

26 Nghut bê, Âwa ê, haù gi, Nàng ô nau é hkyô nghut ri.

27 Ngá Wa gi, lhunglhang lé Ngá é loq má ap byi to bê. Haù Zo lé, Âwa mai lai luí ó le a sé; Âwa lé le, haù Zo eq haù Zo

mai sé nhâng râ matú hkyin yu é bang mai lai luí ó a sé.

²⁸ Ngú é eq wòlai wun é lhunglhâng bang ê, Ngá chyáng lé keq; Ngò, nungmoq lé bánno nhâng râ nghut lhê.

²⁹ Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yû keq; haú hkûn, nungmoq é asak woi-nyí bánno kó râ nghut lhê.

³⁰ Haí mù gâ le, Ngá é kandang gi, waq lui é htoq agó, Ngá é wò le sôm lhê." gâ ri.

12

Bánno Buinyi É Yhumsing

Mrk 2:23-28; 3:1-6; Luk 6:1-5, 6-11

¹ Haú yoq lhê é Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yû mù, zô akô nghut ri.

² Hparishe pé gi, haú lé myàng kôjáng, "Wú aq! Náng é chángzô pé gi, Bánno buinyi má a ge kut jung lé kut nyi akô." ga taí kat akô.

³ Haú hkûn, Yesuq tû taí é gi, "Dawiq lháng gi, yhâng htâng châng é bang eq rahá zòmut huí é hkûn hkâsu kut é hkyô lé, nungmoq a nghap wú kó lú?"

⁴ Dawiq gi, Garai Gasâng é yhúmkaú má wang ê mù, hkyangjông pé mai lai luí, ó le a ge zô é, kyâng tô é muk lé, yhang eq yhâng htâng châng

é bang yù zo kô é a nghut kó lú?"

⁵ Hau htoq agó, Bánno buinyi má, hkyangjông pé gi, noqkuq yhúmkaú má Bánno buinyi é tarâ lé shut kôlhâng mara a wó é lé, haú tarâ laiká má nungmoq a nghap wú kó lú?"

⁶ Ngò, nungmoq lé taí kôlé, haú noqkuq yhúm htoq je ko sù gi, shí má nghut nyi lhê.

⁷ 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê'☆ gâ é lichyúm lé nungmoq sé kô é ru nghut le gi, mara a bò bang lé mara hún kó râ a nghut.

⁸ Hkâsu mù gâ le, haú Byu Yhangzo gi, haú Bánno buinyi é Yhumsing nghut lhê." gâ ri.

⁹ Hau htâng, Yhang gi, haú jowò mai e ló mù, yhangmoq é tarajong má wang e ló ri.

¹⁰ Loq rahkyam ajum shi byuq é byù rayuq le, haú má nyi tô ri. Yhangmoq gi, Yesuq lé, "Bánno buinyi má, nòhpyo lhoq gê byi le, tarâ wang lhê lú?" ga myi é dông, Yhang lé mara hún râ hkyô ho akô nghut ri.

¹¹ Haú hkûn, Yesuq gi, "Nungmoq chyáng mâ é ó yuq wá, yhumsing é sau radu, Bánno buinyi má dong gyó tô le, a xe htoq yu é nyi kó râ lú?"

¹² Byù gi, saú htoq má hpaudap dik é nghut lhê! Haú mù, Bánno buinyi má ge é hkyô kut le, tarâ wang lhê." ga yhangmoq lé tû taí ri.

13 Hau htâng, Yhang gi, haû loq jum shî sù lé, "Náng é loq nyhang kat aq." ga taî kat jáng, haú yuq gi, loq nyhang kat jáng, loq haû gi, a no é loq su ge byuq bê nghut ri.

14 Hparishe pé kúm gi, htoq ló kômù, Yesuq lé hkâsu kut wó sat pyám râ hkyô lé, chôm hpyê lhùm bum akô nghut ri.

Garai Hkyin Tô É Dui-nhâng Zoshâng

15 Yesuq gi, haú hkyô lé sé jáng, haú jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nôhpyo hui bang banshoq lé lhoq gê byi luí,

16 Yhang ó yuq nghut é hkyô lé, a taî byông htoq râ matú, yhangmoq lé taî hkâm tô ri.

17 Haû gi, myiqhtoi Esai-aq é nhut dông mai taî tô é dang lé lhoq dik râ matú nghut ri. Dang haú pé gi,

18 "Shí yuq gi, Ngò chyt, Ngò myit nguì luí, hkyin tô é Ngá é dui-nhâng zoshâng nghut lhê;

Ngò gi, Ngá é Woi-nyí, Yhang lé kat byi râ nghut mù,

Yhang gi, tarâ dingmán é hkyô lé byù myû banshoq pé má taî kyo râ nghut lhê.

19 Yhang gi, haí a hpuq tù é htoq agó, a garu râ nghut lhê; Yhâng é htê lé, hkyô mó pé má wó gyo râ a nghut.

20 Yhang gi, tarâ dingmán é hkyô lhoq ung é hkûn jé shoq,

nâng chap pyám bê jàm gàm lé le, lhoq hkyui râ a nghut, myihkau za htoq nyí bê myi lé le, lhoq sat pyám râ a nghut.

21 Byù myû chângiup gi, Yhâng é myìng má myit myoqbyù kó râ nghut lhê."*

gâ ri.

Yesuq Eq Bezebulaq

Mrk 3:20-30; Luk 11:14-23; 12:10; 6:43-45

22 Hau htâng, agè ashop é nat gang wang júng luí, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, haú yuq lé lhom lhoq gê byí ri; haú mù, haú yuq gi, dang le wó nyô, myoq le wó myâng dut bê nghut ri.

23 Byù hpûng mó gi, haú lé wú maú byuq kômù, "Shí yuq, Dawiq é Yhangzo za gi, nghut lhê laq?" ga taî bum akô.

24 Nghut kôlhang, Hparishe pé gi, haú lé wó gyo kôjáng, "Shí yuq gi, nat gâng pé é zau Bezebulaq* é wum-o a-tsam èq za nat gâng pé lé wó hkat htoq é nghut ri." ga taî bum akô nghut ri.

25 Yhangmoq myit nyi é hkyô lé Yesuq sé mù, yhangmoq lé taî é gi, "Hká mingdán nghut kôle, ahkaû má byoq gâng lhùm nyi kô é nghut jáng, htên byoq byuq râ

* 12:21 Esai 42:1-4 * 12:24 Bezebulaq gâ é gi, Tsadán é myìng rajà nghut lhê.

za nghut lhê; haû eq rajung za, myuq ralhûm nghut nghut, yhumhtu ralhûm nghut nghut, yhangchang byoq lhûm nyi kô é nghut jáng, haû gi, wó gîng nyi râ a nghut.

²⁶ Tsadán gi, Tsadán lé hkat htoq pyâm é nghut jáng, yhumsing gùng yhumsing lhoq hpyoq nyi gù bê nghut ri. Haû su nghut jáng, yhâng é mingdán gi, hkâsu kut wó gîng to râ lhú?

²⁷ Haû mù luí, Ngò gi, Bezebulaq é wum-o a-tsam èq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam èq hkat htoq pyâm kô é nghut lhê lhú? Haû su nghut jáng, haû bang gi, nungmoq lé tarâ jéyáng bang dut kó râ nghut lhê.

²⁸ Nghut kôlhang, Ngò gi, Garai Gasâng é Woi-nyí èq nat gâng pé lé hkat htoq pyâm é nghut jáng, Garai Gasâng é mingdán gi, nungmoq chyáng jé bê nghut ri.

²⁹ Ó yuq nghut kôle, wum-o bò sù lé hí tuí zing pyâm é a nghut le gi, yhâng é yhûm má lú wâng mù, yhâng é sutzè lé hkâsu wó lú yû râ lhú? Haû yuq lé hí tuí zing pyâm jáng sheq, yhâng é sutzè lé wó lú yû râ nghut lhê.

³⁰ Ngá hkyam shut a dap sù gi, Ngo lé gye kut sù nghut lhê; Ngò eq rahá a shûm tsing sù gi, lhoq pyo pyâm é sù nghut nyi ri.

³¹ Haû mù, Ngò, nungmoq lé taí kôlé, byu pé é yubak

mara hkangmó eq Garai Gasang lé rhoi dang taí pyâm é lhunglhang gi, mara hkyut byí é wó hui râ nghut lhê. Nghut kôlhang, haû Chyoiyung Woi-nyí lé rhoi dang taí pyâm é gi, mara hkyut byí é hui râ a nghut.

³² Haû Byu Yhangzo lé dang đông shut é sù gi, mara hkyut byí é wó hui râ nghut lhê; nghut kôlhang, haû Chyoiyung Woi-nyí lé dang taí shut é sù gi, shí ipyat má le, htang pyat má le, mara hkyut byí é hui râ a nghut.

³³ Ashi lé wú luí, agàm lé sé râ nghut é yanmai, agàm lé lhoq gè jáng, ashí le gè râ nghut lhê; agàm lé a lhoq gè jáng, ashí le gè râ a nghut;

³⁴ Duq htân lhangmui amyû ê, nungmoq gi, agè ashop é bang nghut to kôlú nhing, dang gè hkâsu wó taí kó râ lhú? Hkâsu mù gâ le, i-myit unghkaû má bying mui tô é lé za, nhut mai taí htoq lo é nghut lhê.

³⁵ Ge é sù gi, yhumsing é i-myit unghkaû mâ é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaû mâ é agè ashop é sutdò mai, agè ashop é zè pé lé lhoq htoq shit lhê.

³⁶ Ngò, nungmoq lé taí kôlé, byu gi, yhumsing taí kat é akyû a bo é dang pé é matú, tarâ jéyáng é buinyi má taí sân kyo ra kó râ nghut lhê.

³⁷ Hkâsu mù gâ le, yhumsing mara lut râ le, ó le ó taí é dang pé mai; mara byí é hui râ le, ó le ó taí é dang pé

mai, nghut râ nghut lâ." gâ ri.

Limik Kumlhá Lé Dung Kô É Hkyô

Mrk 8:11-12; Luk 11:29-32; 11:24-26

³⁸ Hau htâng má, Hparishe pé eq tarâ sará pé ra-am gi, "Sará ê, ngamoq gi, Nàng, limik kumlhá kut shit râ lé myàng nau ri." ga Yhang lé dúng akô.

³⁹ Haù mù, Yhang tû taí é gi, "Agè ashop é eq lhum a zuí é ipyat shí gi, limik kumlhá dung nyi ri myhi-nhung! My-iqhtoi Yonaq é kumlhá mai lai luí, gotû haí le tûn shit râ a nghut.

⁴⁰ Hkâsu mù gâ le, Yonaq gi, ngo mó é wamdau hkaù má sum nyí sum myîn lúng é su, haù Byu Yhangzo le, myigùng káng má sum nyí sum myîn lúng râ nghut lâ.

⁴¹ Ninewe wà byù wuì gi, Yonaq mungdang hko kyô é hkûn myit lhîng kô é nghut mù, tarâ jéyáng é buinyì má, ipyat shí mâ é bang eq rahá toq lò luí, ipyat shí mâ é bang lé mara hûn kó râ nghut lâ; haù Yonaq htoq ko sù gi, ahkuí shí má jé nyi to bê.

⁴² Maupyî mâ é hkohkâm myhí gi, maumyî ló htâng é mai lé lô mù, Sholumon é hpaqchyî dang lé, lé gyô yù bê nghut mù, haù tarâ jéyáng é buinyì má, ipyat shí mâ é bang eq rahá toq lò luí, ipyat shí mâ é bang lé mara hûn râ nghut lâ; haù Sholumon htoq ko sù gi, ahkuí shí má jé nyi to bê.

⁴³ Haù agè ashop é nat gi, byù rayuq chyáng mai htoq lò mù, kyuq huí é jowò pé má sô yông e ló luí, no râ jowò hkat ho wú le, a myang hô nghut ri.

⁴⁴ Haù hkûn, yhang gi, 'Ngò nyi lai lo é yhûm má dum taù ló wú râ.' ga taí ri. Yhang dum taù jé ló wú le, yhûm haù lé, ó le a sing yu hpyuq é htoq agó, san za rago dut to lánng é lé ló myang ri.

⁴⁵ Haù jáng, yhang gi, dum taù ê mù, yhâng htoq je wuì é nat nyhit nat lé shuí lò luí, haù má lo wang nyi to bekô. Haù mù, haù yuq é nyi yap sâmlai gi, hí lâ htoq má je wuì lò bê nghut ri; agè ashop é ipyat shí le, haù eq rajung za dut râ nghut lâ." gâ ri.

Yesuq É Yhângnu Eq Yhanggû Pé

Mrk 3:31-35; Luk 8:19-21

⁴⁶ Yesuq, shiwa byu pé lé dang rû nyo nyi ashí hkûn, yhângnu eq yhanggu pé gi, Yhang lé nyò nau kômù, shinggan má lé yap tô akô nghut ri.

⁴⁷ Haù mù, Yesuq lé, "Náng nu eq nunggu pé gi, Nang lé nyò nau mù, shinggan má lánng yap bum akô." ga taí kyô akô.

⁴⁸ Haù hkûn, Yhang gi, "Ô pé gi, Ngá nu eq Ngá gu pé nghut akô lhú?" ga tû taí kat ri.

⁴⁹ Hau htâng, Yhang gi, Yhâng é chángzô pé lé loq tun luí, "Wú keq, shí bang gi, Ngá nu eq Ngá é gumang wui nghut bê.

50 Hkâsu mù gâ le, mauhkûng htoq mâ é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq taí ri.

13

Kyôshi Sân É Dangtú
Mrk 4:1-20; Luk 8:4-15

1 Haú nyí má yhang, Yesuq gi, yhúmkaû mai htoq ló mù, wuì nhông yàm má ê zung tô ri.

2 Byù hpûng mó gi, Yhâng é lhîngkyuq má zup zîng lé bûm kô é yanmai, Yhang gi, lhaí hkaû má doq zùng tô ri. Shiwa byu pé kúm gi, gin-gau htoq má yap tô bum akô.

3 Hau htâng, Yhang gi, haú bang lé, dangtú pé dông myo myo taí é má, "Kyô hkyó sù rayuq gi, kyôshi san râ ga htoq e ló ri.

4 Yhang, kyôshi sân kat é hkûn, ra-am gi, hkyô má gyó ang mù, ngoq pê èq lé hte zô pyám ri.

5 Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle,

6 amyit a wó chîn hing é nghut mù, buì htoq lô jáng, lhap kyuq pyám bê nghut ri.

7 Dum ra-am gi, zugyóm hkaû má gyó ang lui, zubyap haú pé kô lò mù, wup pyâm ri.

8 Ra-am dum nghut jáng, myìhpún bo é jang má gyó ang lui, ashi zuí lo é gi, sân kat é htoq rashô tú, hkyuq xê tú,

sum xê tú, myô jat lo é nghut ri.

9 Gyô yù râ nohkyap dap sù gi, gyô yù sháng gaq." ga le taí ri.

10 Haú hkûn, chángzô pé gi, Yhâng chyáng lé mù, "Nàng gi, haí mù, shí bang lé, dangtú dông taí lê lhu?" ga myí akô.

11 Haú jáng, Yhang tû taí é gi, "Mauhkûng mingdán eq sêng é sê gyo wuì é hkyô pé lé sê gyo râ ahko ahkáng, nungmoq lé byí to bê, nghut kôlhang, yhangmoq lé gi, a byi shí é nghut lê.

12 Wó to sù lé gi, yhang agùn agó wó râ matú, jat byi shirâ nghut lê. A wó su chyáng mai kúm gi, yhang wó tô é lé lhang yu pyám byi shirâ nghut lê.

13 Yhangmoq gi, wú to kôlhang, a myàng kó; gyô nyì kôlhang, a wó gyo, a sê gyo kó nghut é yanmai, yhangmoq lé Ngò dangtú dông taí râ é nghut lê.

14 Haú gi,

'Nungmoq gi, wó gyô tô nyì kôlhang, sê gyo kó râ a nghut;

myang tô nyì kôlhang, wú sé kó râ a nghut.

15 Hkâsu mù gâ le, byù shí bang gi, myit nhikshi jit byuq bê;

yhangmoq é nohkyap gi, a wó gyo kó,

myoqjí le chûm byuq bekô nghut ri.

Haú su a nghut le gi, yhangmoq, myoq myàng no gyo mù,

i-myt bun bóng luí, lêng
lò kômù,

Ngò, yhangmoq lé yâ gè byi
berâ nghut lhê.¹⁵

gâ é, Esai-aq é myiqhtoi dang
lé lhoq dik é nghut ri.

¹⁶ Nghut kôlhang, nungmoq
é myoq gi, wó myâng mù,
nungmoq é nohkyap gi, wó
gyô é yanmai, nungmoq gi,
hkungsô wó nyi ri.

¹⁷ Hkâsu mù gâ le, Ngò, nung-
moq lé teng za tái kôlé, nung-
moq wó myâng, wó gyô é pé
lé, myiqhtoi pé eq dîngmán
bang myo myo gi, myàng nau
gyo nau kôlhang, a wó myâng,
a wó gyo kó nghut ri.

¹⁸ Ahkuí, kyôshi san sù eq
sêng é dangtú é lichyúm lé
rago gyô wú keq;

¹⁹ Hkyô má gyô âng é kyôshi
gi, mauhkûng mingdán eq
sêng é danglù lé wó gyo
kôlhang, a sê gyô é yanmai,
haú agè ashop sù lé lô mù,
yâng é i-myt hkaú má san
kat tô é kyôshi lé, lé yu pyám
byí é hui sù lé gá nau é nghut
lhê.

²⁰ Luqgok yò pé má gyô âng
é kyôshi gi, mungdang lé wó
gyo jáng, radá dâm gabú myit
èq hap yù kôlhang,

²¹ amyit a wó chin é yan-
mai, razup zo za yuq mù,
mungdâng é yanmai, wuîhkê
é eq zing-rí é hui kôjáng, hân
hân htak ló byuq é sù lé gá
nau é nghut lhê.

²² Zugyóm má gyô âng é
kyôshi gi, haú mungdang lé
wó gyô yù kôlhang, shí ipyat
lhê é myit wui myit hke hkyô
pé eq hkyô shuí ngoq jung

ngùn hîng zèhkoq èq hup pyâm
é yanmai, ashi a wó zuí é sù lé
gá nau é nghut lhê.

²³ Nghut kôlhang, myìhpún
bo é jang má gyô âng é kyôshi
kúm gi, mungdang lé wó gyo
mù, sê gyô yu é sù lé gá nau
é nghut lhê. Haú yuq ashi zuí
é gi, san kat é htoq rashô tú,
hkyuq xê tú, sum xê tú, myô
jat lo é nghut ri.

Myoqgàm Dangtú

²⁴ Yesuq, yhangmoq lé dan-
gtú dông xoq tái kyô é gi,
"Mauhkûng mingdán gi, ge é
kyôshi lé, yò má san kat sù
rayuq eq du ri.

²⁵ Byu pé yhup myhî tô
bum é u lé, yâng é gyè gi,
lé jé mù, guq gàm gyoro má,
myoqshi lé sân to hkó luí, taú
lò byuq bê nghut ri.

²⁶ Guq gàm yuq lò mù, guq
nhâm htoq lo é hkûn, my-
oqgàm le bo yuq htoq lo ri.

²⁷ Yhumsîng hpô é dui-
nhâng zoshâng wui gi, yâng
chyáng lé jé mù, 'Yhumsîng é,
ge é kyôshi lé za yò má sân tô
é a nghut lú? Myoqgàm pé
gi, hkâmai htoq lo é lú?' ga
myi kôjáng,

²⁸ haú yhumsîng hpó gi,
'Gumlau gye èq kut é nghut
ri.' ga tû tái ri.

Haú jáng, dui-nhâng
zoshâng wui gi, 'Ngamoq,
myoq haú pé lé ê nut pyám
râ lé, nàng ô nau ri lú?' ga
myi akô.

²⁹ Haú hkûn, yhang gi, 'Hká
nut pyám kó; hkâsu mù gâ
le, nungmoq, myoq haú pé lé
nut é hkûn, guq gàm pé lé le

bo záng nut pyám kó râ nghut lhê.

³⁰ Kyôshu yoq jé shoq rahá yuq to kó sháng gaq; háu hkûn, myoqgàm pé lé hí hkyin tsîng yù mù, nyhê hkyô pyám râ matú hkyom dîng to luî, guq lé kúm gi, shù yù mù, ngá é chyí má tsing kat to râ matú, kyô shu bang lé ngò taí râ nghut lhê.' ga tú taí ri." gâ ri.

Angshi Cham Eq Múnchi Dangtú

Mrk 4:30-34; Luk 13:18-21

³¹ Hau htâng, Yesuq gi, yhangmoq lé gotú dangtú ralhum dum xoq taí é gi; "Mauhkûng mingdán gi, byù rayuq èq, yhâng hkyâm má hô tô é angshi cham eq wuí ri.

³² Angshi cham háu gi, kyômyui jí banshoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

³³ Yhang, gotú dangtú dum xoq taí é gi, "Mauhkûng mingdán gi, myiwe rayuq èq sunsô mún sum bûng má yu nyhó luî, háu pé banshoq lé wó lhoq dau nhang é múnchi eq wuí ri." gâ ri.

³⁴ Yesuq gi, byù moq mó lé, háu pé banshoq dangtú dông mai chyat taí ri; yhangmoq lé, dangtú a bo é haí lháng a taí wú nghut ri.

³⁵ Háu gi, "Ngá nhut lé hpóng mù, dangtú dông mai taí râ;

mingkan lé sâng-hi hpan é mai zaú tô é hkyô pé lé taí sân kyo râ nghut lhê."*

ga, myiqhtoi dông taí tô é dang lo dik é nghut ri.

Myoqgàm Dangtú Lé Taí Sân Kyô É Hkyô

³⁶ Hau htâng má, Yesuq gi, byù moq mó mai htoq lò mù, yhúmhkaú má wang ló ri. Háu hkûn, Yhâng é chángzô pé gi, Yhâng chyáng lé lô kômù, "Yò mâ é myoqgàm dangtú eq sêng é hkyô lé taí sân kyo laq." ga taí akô.

³⁷ Háu jáng, Yhang tú taí é gi, "Ge é kyôshi san sù gi, háu Byu Yhangzo nghut ri.

³⁸ Yò gi, mingkan nghut ri; ge é kyôshi gi, mauhkûng mingdán é yhangzô pé nghut akô. Myoqgàm pé kúm gi, háu Tsadán é yhangzô pé nghut akô;

³⁹ háu lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htûm é ahkyíng nghut ri; kyô shu bang gi, maumang lagyô pé nghut akô.

⁴⁰ Háu myoqgàm pé lé, nut yù mù, myí má nyhê pyâm é su, háu mingkan htûm é ahkyíng má dut râ nghut lhê.

⁴¹ Háu Byu Yhangzo gi, Yhâng é maumang lagyô pé lé nhâng râ nghut lhê; háu mù, háu bang gi, hkyô lhoq nghoq nhang é bang banshoq eq agè ashop hkyô kut é bang lhunglháng lé, Yhâng é

mingdán mai hkyin she htoq yû mù,

⁴² gyúng nyi é myibung hkyûng hkaû má dú kat pyám kó râ nghut lâ; hau má, ngaubyi ngaù nhap eq zùi kyik kyik shoq hpuzô nyi kó râ nghut lâ.

⁴³ Háu hkûn, dingmán bang gi, yhangmoq Yhângwâ é mingdán má bùi su duqbó nyi kó râ nghut lâ. Nohkyap dap sù gi, gyô yù sháng gaq.

Haq Tô É Sutzè Dangtú

⁴⁴ Mauhkûng mingdán gi, yò má haq tô é sutzè eq wuí ri. Sutzè háu lé myang é sù gi, háu lé saí haq to mù, gabú myit eq taù ló luí, yhang wó é banshoq lé ùng pyám mù, yò háu lé wui yu ri.

⁴⁵ Dum, mauhkûng mingdán gi, réng é palhé lé châng ho wún é hpugá hpó eq wuí ri.

⁴⁶ Yhang gi, gyai hpaû é palhé lé myàng jáng, yhang wó é banshoq lé ló ùng pyám mù, háu lé wui yu ri.

Gùn Lé Dangtú Yu É Hkyô

⁴⁷ Mauhkûng mingdán gi, nhông má, ngozo ajà jà lé wó dú nghop yu é gùn eq le wuí ri.

⁴⁸ Gùn háu má ngozo byíng jáng, ngo kóng bang gi, wui yàm má she htoq yû mù, zung to luí, ge é pé lé gi, ngo-pyap má guq kat yû luí, a ge é pé lé gi, dú pyám akò.

⁴⁹ Háu eq rajung za, mingkan htúm é ahkyíng má le, maumang lagyô pé gi, gyó lé lô mù, agè ashop é bang

lé, dingmán bang chyáng mai gam htoq yû luí,

⁵⁰ ngaubyi ngaù nhap eq zùi kyik kyik shoq hpuzô nyi râ nghut é, gyúng nyi é myibung hkyûng hkaû má dú kat pyám kó râ nghut lâ.

⁵¹ Shí hkyô banshoq lé nungmoq sê gyo bekô lúhú?" gâ ri.

Háu hkûn, yhangmoq gi, "Sê gyo bê." ga tú taí akò nghut ri.

⁵² Hau htâng, Yesuq gi, yhangmoq lé, "Mauhkûng mingdán eq séng luí mhoq yû bê é tarâ sará ó nghut kôle, yhang mhoq é hkyô gi, yhumsing é sut-púnglhung hkaû mai zè sik zè xau lé yu htoq é yhumsing hpó rayuq eq wuí ri." ga dum taí ri.

Myiqhtoi, Myoqdong A Wó Dut É Jang

Mrk 6:1-6; Luk 4:16-30

⁵³ Yesuq gi, dangtú háu pé lé ban taí jáng, háu jowò mai htoq e ló bê nghut ri.

⁵⁴ Yhang gi, Yhâng é yhum-mau má jé ló jáng, byu pé lé, yhangmoq é tarajong má mhoqshit ri; háu hkûn, yhangmoq gi, gyô maú byuq kôluí, "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lâ lhà?"

⁵⁵ Yhang gi, laksîma hpó é yhangzo a nghut lúhú? Yhângnú é myíng gi, Mariq gâ lhê a nghut lúhú? Yhanggú pé gi, Yakuq, Yosep, Simun eq Yudaq gâ é bang a nghut kó lúhú?

56 Yhâng nhammó pé le, nga-nhúng eq rahá nghut nyi lhê a nghut kó lú? Haû su nghut le nhîng, haû pé ban-shoq lé, Yhang hkâmai wó yu é nghut lhê lhà?" ga myî bùm kômù,

57 Yesuq lé myit a ngón dut bùm bekô nghut ri.

Yesuq kúm gi, yhangmoq lé, "Myiqhtoï rayuq gi, yhum-sing é yhummau eq yhums-ing é yhûm má za, myoqdong a lhaq wó wú é nghut lhê." ga tû taï kat ri.

58 Yhangmoq lumjîng myit a bò kô é yanmai, Yesuq gi, haû má, laklai kumlhá myo myo a kut shit lo nghut ri.

14

*Wui-myhup Sará Yohan
Shi Byuq É Hkyô*

Mrk 6:14-29; Luk 9:7-9

1 Haû hkûn, mauzau Herut gi, Yesuq eq sêng é ludang lé wó gyo jáng,

2 yhâng a-ô mâ é bang lé, "Shí yuq gi, Wui-myhup Sará Yohan nghut ri-nhung; Yhang gi, shi é mai dum dui toq lo é nghut mù, hpungwup a-tsam haû pé lé wó kut é nghut ri." ga taï ri.

3 Herut haû su gâ é gi, yhanggu Hpilip é yhangmyi Herudiaq é yanmai, Yohan lé chyup tûi yù mù, htóng hkyô pyâm é yanmai nghut ri.

4 Hkâsu mù gâ le, Yohan gi, yhang lé, "Nàng, myiwe haû lé hâng yu é gi, tarâ a wang é nghut lhê." ga taï byî nyi é yanmai nghut ri.

5 Herut gi, Yohan lé sat pyám naû kôlhang, mingbyû wuì lé gyuq é yanmai, a wám sat nghut ri; haû mù gâ le, yhangmoq gi, Yohan lé myiqhtoï tsuq nyî kô é yanmai nghut ri.

6 Nghut kôlhang, Herut é hkû ladu hkyûm buinyi má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit nguì mù,

7 byizo haû lé, yhang haî dung le haî byi râ ga dakam é danggidiq byî ri.

8 Byizo haû gi, yhângnu hpaqchyî byî é lé gyô yù mù, "Shî, bó má, Wui-myhup Sará Yohan é ulhum lé, kat byi laq." ga, Herut lé dúng ri.

9 Mauzau hpó gi, myit a ngón dut byuq kôlhang, yhang dakam tô é danggidiq é yanmai le, bíng pê é myoqdong lé tê nau é yanmai le, yhang dúng é lé, byi râ matú,

10 htóng hkaû má lúng tô é Yohan é ulhum lé hpyit râ hkunmó hkyô kat bê nghut ri.

11 Yohan é ulhum lé bó má kat luî, myiwe zo haû lé byi jáng, myiwe zo haû gi, haû lé yhângnu chyáng yu ló byî ri.

12 Haû mù, Yohan é chángzô pé gi, yhâng é mâng lé lé yù luî, myhup pyám bekô nghut ri. Hau htâng, yhangmoq gi, Yesuq lé ló taï kyô akô nghut ri.

Byù Ngo Hkyîng Lé Byi Tsô É Hkyô

*Mrk 6:30-44; Luk 9:10-17;
Yhn 6:1-14*

13 Yesuq gi, haú hkyô lé wó gyo jáng, haú mai lhai ji mù, tsím tsâm é jowò shut Yhang baú e ló ri. Haú lé, byu pé wó gyô bùm kôjáng, wà mó pé mai htoq lé lô kômù, hkyí hkyô Yhâng htâng châng e lô akô nghut ri.

14 Yesuq gi, lhai mai gyó dap ló é hkûn, byù moq mó nyi to lánng é lé myàng jáng, yhangmoq lé wú shogyo luí, nò bang lé lhoq gê byí ri.

15 Myinhâng jé lô jáng, haú chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, bui le gym ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wuî kó sháng gaq, yhangmoq lé nhang kat aq hkoi." ga taí akô.

16 Haú hkûn, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tû taí kat ri.

17 Haú su ga jáng, yhangmoq gi, "Muk ngo long eq ngozo í du za ru wó lhê." ga dum tû taí akô.

18 Haú jáng, Yesuq gi, "Yu lò keq." ga tû taí mù,

19 shiwa byu pé lé, wàhu yò má zùng nhang ri. Hau htâng, Yhang gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gàm mù, chángzô pé lé byí ri. Haú chángzô pé gi, shiwa byu pé lé gàm byí akô nghut ri.

20 Yhangmoq banshoq bang zô gyí bùm kô é htâng

má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashî kô nghut ri.

21 Haú má zô é bang gi, myiwe wui eq zoshâng wui lé a nghap lhôm é za, yuqgè baú ngo hkyíng kô bo ri.

Yesuq, Wui Htoq Má Sô É Hkyô

Mrk 6:45-56; Yhn 6:15-21

22 Yesuq gi, haú shiwa byu pé lé byo ló nhang nyi é hkûn jáng, chángzô pé lé lhai má wang ji nhâng mù, tû tap shut dap ló lánng nhang ri.

23 Shiwa byu pé lé nhang pyâm é htâng má, Yhang gi, kyúdung râ ga, Yhang baú bùm shut doq e ló ri. Myinhâng chutshúm zó jé shoq, Yhang baú haú má nyi nyi ri.

24 Haú u lé, lhai gi, gin-gau mai tsómra wê é jowò má jé é hkûn, lai tau mut é yanmai, wuìheng èq gyai yhang lo bat nhùn é hui zô ri.

25 Htang napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri.

26 Haú mù, chángzô pé gi, Yesuq nhông htoq má sô nyi é lé myàng kôjáng, gyuq dàn kômù, "Sobyô ô!" ga gyuq nán é èq taí garú akô nghut ri.

27 Haú jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq kíng keq." ga nyo kat ri.

28 Haú hkûn, Petruq gi, "Yhumsíng ê, Nàng yhang ru nghut le gi, ngo lé, wui htoq

mai sô lé lô nhâng laq." ga taí kat ri.

²⁹ Haú jáng, Yesuq gi, "Lé lô aq." ga tũ taí kat ri.

Haú mù, Petruq gi, lhaí mai gyó mù, wuì htoq mai Yesuq chyáng sô e ló ri.

³⁰ Nghut kôlhang, yhang gi, laidun htan é lé myang kat jáng, wú gyuq luí, wuì má nop ló nyí mù, "Yhumsing ê, ngo lé hkyi yù laq." ga wut garú kat ri.

³¹ Yesuq gi, radá dâm yhâng é loq lhâm kat luí, Petruq lé lêng zing to mù, "Lumjینگ myit shau sũ ê, nằng haí mù úng-âng lhê lú?" ga taí ri.

³² Yhangnhik, lhaí má wàng kôjáng, laidun le zím byuq bê nghut ri.

³³ Hau htâng, haú lhaí má lúng tô é bang gi, Yhang lé paí gop mù, "Nằng gi, gè gè yhang, Garai Gasâng é Yhangzo nghut bê." ga taí akô nghut ri.

³⁴ Yhangmoq gi, gũ dap ló kômù, Genesarat mau má jé wang ló bekô nghut ri.

³⁵ Haú mau mâ é bang gi, Yesuq lé wú sé kôjáng, awui ayâm mâ é bang ban-shoq lé kyô kat akô. Haú mù, byu pé gi, nòhpyo hui bang lhunglhang lé, shuí lé lô kômù,

³⁶ nòhpyo hui bang lé, Yhâng é bushi htâng má za lhang záng nhâng rã matú dúng tôngbán akô; Yhang lé záng é lhunglhang bang gi, lhoq gè byi é huì bekô nghut ri.

15

Sansêng É Hkyô Eq A
Sansêng É Hkyô
Mrk 7:1-23

¹ Hau htâng má, Hparishe pé eq tarã sarã pé ra-am gi, Yerusalem wà mó mai Yesuq chyáng jé lé lô kômù,

² "Nằng é chángzô pé gi, haí mù luí, íchýi íwa pê é htungli lé a cháng kut akô lú? Yhang-moq gi, loq hí a chí é zang zô akô nghut ri." ga, lé taí akô.

³ Haú jáng, Yesuq tũ taí é gi, "Nungmoq gi, haí mù, nung-moq é htungli é yanmai, Garai Gasâng é hkunmó lé a cháng kô é lú?"

⁴ Hkãsu mù gã le, Garai Gasang gi, 'Nungmoq é ìnu íwa lé, hkungga keq.'* ga le, 'Ìnu íwa lé, nhing é sũ ó yuq nghut kôle, sat pyâm é hui rã lhê.'* ga le, taí tô é nghut lhê.

⁵ Nghut kôlhang, nungmoq taí é gi, 'byù rayuq yuq, yhumsing é yhângnu yhângwa lé byi âng é zè lé, Garai Gasang lé byi rã chyunghuq nghut lhê ga taí é nghut jáng,

⁶ haú yuq gi, yhângwa lé hkungga nó a ra.' gã akô nghut ri. Haú dông mai, nungmoq gi, nungmoq é htungli é yanmai, Garai Gasâng é mungdang lé he-ngik pyâm akô nghut ri.

⁷ Gegùn labyoq kut bang ê! Nungmoq eq séng luí, myiqh-toi Esai-aq htoí tô é dang gi, têng ri.

⁸ Myiqh-toi dang haú gi,

'Byù shí bang gi, nhut htoq mai za Ngo lé hkunggâ akô;
 yhangmoq é myit nhiklhum gi, Ngò eq wê gâng nyi akô.

⁹ Yhangmoq, Ngo lé noqkuq nyi kô é gi, akôm má za nghut nyi ri;

hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri. ^{*}

gâ é nghut lhê." gâ ri.

¹⁰ Hau htâng, Yesuq gi, shiwa byu pé lé, Yhâng chyáng wut yù luí, "Gyô yù mù, sé lo keq.

¹¹ Nhut má wang lo é hái jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga tâ ri.

¹² Haú hkûn, haú chángzô pé gi, Yhâng chyáng lé lô kôluí, "Hparishe pé gi, shí hkyô lé wó gyo mù, nhik-yô nyi bùm kô é lé, Nàng sê lhê lú?" ga myi kôjáng,

¹³ Yhang gi, "Mauhkûng htoq tsáng myhâng mâ é Ngá Wa a hô tô é agàm hkangmó gi, apûn eq roq nut pyâm é hui râ nghut lhê.

¹⁴ Yhangmoq é yanmai, myit hkâ-myo kó; yhangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yhangchang hkyô-u she lhum é nghut le gi, í yuq é yhang

donghkong má byit gyó kó râ za nghut lhê." ga tâ ri.

¹⁵ Haú hkûn, Petruq gi, "Ngamoq lé, dangtú hau é lichyúm tâ sân kyo laq." ga tâ jáng,

¹⁶ Yesuq gi, "Nungmoq, ahkuí le haú-í yhang go nyi ashi kô luq?

¹⁷ Nhut má wang lo é hái jung le, wamdau hkaú má jé wang ló mù, gungdu mai dum htoq ló é nghut lhê.

¹⁸ Nghut kôlháng, nhut mai htoq lo é gi, myit nhiklhum mai htoq lo é nghut mù, byù lé a sanséng dut nhang ri.

¹⁹ Hkâsu mù gâ le, myit nhiklhum mai htoq lo é gi, agè ashop é dông myit é hkyô pé, byù sat é hkyô, su-myi sulàng lú hkyô, ashop é dông gungsho zùm yap é hkyô, hkaú é hkyô, a tengmán é saksé hkâm é hkyô, lumù gansang é hkyô pé nghut ri.

²⁰ Haú pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga tâ ri.

*Hkanan Myiwe Myhi
 Rayuq É Lumjing Myit
 Mrk 7:24-30*

²¹ Hau htâng, Yesuq gi, haú mai Turuq eq Sidun mau shut htoq e ló bê nghut ri.

²² Haú hkûn, haú mau má nyi é Hkanan myiwe myhi rayuq gi, Yhâng chyáng lé jé mù, "Dawiq é Yhangzo, Yhumsing ê, ngo lé shogyô yù laq ô! Ngá byizo gi, nat gang

wang júng mù, gyai yhang nò gyîn nyi ri." ga tai garû ri.

23 Nghut kôlhang, Yesuq gi, dang rahkun le a tú tai nghut ri. Haû mù, Yhâng é chángzô pé gi, Yhâng chyáng lé jé kômù, "Myiwe myhí haû lé ló nhang pyám aq; haî mù gâ le, yhang gi, nga-nhông é htâng má châng garû nyi ri." ga tai akô.

24 Yesuq gi, "Byuq byuq é sau pé su nghut nyi é Israelaq byu pé chyáng sheq, Ngo lé nhang kat é ru nghut lhê." ga tai ri.

25 Haû hkûn, myiwe myhí haû gi, Yhâng é hí má lé mù hkyihput htuq luî, "Yhumsîng ê, ngo lé garúm yû laq ô!" ga tai ri.

26 Yesuq gi, "Zô wui chyáng mâ é zoshuq lé yù mù, hkuî pé lé byi tsô é jung a nghut." ga tú tai jáng,

27 myiwe myhí haû gi, "Yhumsîng ê, haû kúm nghut ri; nghut kôlhang, hkuî pé lhang, yhumsîng hpô é zohpoq mai gyó é zang cham zang htâng lé, zô akô mhaî." ga dum tai ri.

28 Haû mù, Yesuq gi, "Myiwe zo ê, náng é lumjîng myit gi, kô nyi ri! Nàng dúng é hkyô lé gyo byi bê nghut lhê." ga tú tai ri. Haû hkûn jáng, myiwe myhí hau é byizo le ge byuq bê nghut ri.

Byù Myi Hkyîng Lé Byi Tsô É Hkyô

Mrk 8:1-10

29 Yesuq gi, haû mai htoq ló luî, Galile nhông yàm má é jé

mù, bùm shut doq ló luî, ló zung nyi ri.

30 Haû hkûn, byù moq mó gi, hkyî hten bang, myoqjit bang, gung-yùn bang, nhut jit bang eq nò bang gotú myo myo lé shuî lé lô kômù, Yhâng é hkyî wang má lé nyhi to kô é nghut luî, Yhang gi, haû bang lé lhoq gê byi ri.

31 Haû shiwa byu pé gi, nhut jit bang dang wó nyò kô é lé le, gung-yùn bang ge byuq é le le, hkyî hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkya-ôn bum akô nghut ri.

32 Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhang-moq gi, Ngò eq rahá nghut nyi é sum nyi bò bê, haî le a myàng zo kó nghut ri. Yhang-moq, hkyolat má mut yut ló yut kó abe, yhangmoq zòmut to gû lé, Ngò a nhang kat naù." ga tai ri.

33 Haû hkûn, Yhâng é chángzô pé gi, "Isù é yoso má nhîng, byù shî myhò bang lé luq shoq byi tso râ zoshuq gi, hkarâ é wó râ lú?" ga myi akô.

34 Yhang gi, "Nungmoq, muk hkâ-myhó long wó akô lú?" ga tau myi jáng, yhangmoq gi, "Muk nyhit long eq ngo-nú zo ratsuî wó lhê." ga tú tai akô.

35 Haû mù, Yhang gi, byù hpûng lé, myigùng htoq má zùng nhang ri.

³⁶ Hau htâng, Yhang gi, haù muk nyhit long eq ngozo lé yù mù, jeju ban hkya-on jáng, myhik hpé luí, haù chángzô pé lé byi jáng, yhangmoq gi, byù hpûng lé gàm byi akô nghut ri.

³⁷ Yhangmoq lhunglhâng bang zô gyi bùm kô é htâng má, haù chángzô pé gi, amyit ahtâng lé nyhit mung bying shoq wó guq tsing yu ashí kô nghut ri.

³⁸ Haù hkûn zô é bang má, myiwe wuì eq zoshâng wuì lé a nghap lhôm é za, yuqgè wuì baú myi hkying yuq bo ri.

³⁹ Yesuq gi, byù hpûng lé ló nhang pyâm é htâng má, lhai má wang ji mù, Magadan mau shut dap é ló bê nghut ri.

16

Kumhá Dung Kô É Hkyô

Mrk 8:11-13; Luk 12:54-56

¹ Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkûng mâ é kumhá kut shit râ matú, dúng akô.

² Haù mù, Yhang gi, yhangmoq lé, "Nungmoq gi, myinhtâng jé jáng, 'Mau hpong râ nghut lhê, hkâsu mù gâ le, mauhkûng ne ri.' ga le,

³ napkyó lé nghut jáng, 'Hkû-nyí laidun lò râ nghut lhê, hkâsu mù gâ le, mauhkûng nè mù, noq ri.' ga le, lhaq taí akô. Nungmoq gi, mauhkung é isâm lé wú mù sê gam hkoq yú kô é nghut kôhang, shí ipyat lhê é kumhá lé gi, a sê gam hkoq yú kó nghut ri.

⁴ Agè ashop é eq lhum a zuí é ipyat shí gi, limik kumhá lé ho nyi akô; nghut kôhang, Yonaq é kumhá mai lai luí, gotú haí le tûn shit râ a nghut." ga taí ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pé É Múnchi

Mrk 8:14-21

⁵ Yhangmoq, nhông hé hpoq shut gû dap ló kô é hkûn, haù chángzô pé gi, muk yu chûng râ lé tô-myhí pyâm akô.

⁶ Haù hkûn, Yesuq gi, "Hparishe pé eq Saduke pê é múnchi lé, sidiq luí, koi pyâm nyi keq." ga, yhangmoq lé taí kat ri.

⁷ Yhangmoq gi, "Nga-nhúng, muk a yu chung é yanmai, haù su ga taí é nghut ri." ga luí, taí lhum bum akô nghut ri.

⁸ Yhangmoq haù su taí lhûm nyi kô é lé Yesuq sé jáng, yhangmoq lé, "Lumjing myit shaú é bang ê, muk a bo é hkyô lé, haí mù taí lhûm nyi akô lú?"

⁹ Ahkuí jé shoq, nungmoq gi, a sê gyo shi kó lú? Muk ngo lông èq byù ngo hkying lé byi tsô é htâng, nungmoq hkâ-myhó mung wó dum guq tsing yù kô é lé le,

¹⁰ muk nyhit lông èq byu myi hkying lé byi tsô é htâng, nungmoq hkâ-myhó mung wó dum guq tsing yù kô é lé le, nungmoq a myit bun kó lú?"

¹¹ Ngò gi, muk eq séng luí taí é a nghut é lé, nungmoq,

hkâsu mù a sê gyo kô é lúh? Hparishe pé eq Saduke pé é múnchi lé koi pyám keq nghu taí é ru nghut lhê." ga taí ri.

12 Haú hkûn sheq, Yhang taí é gi, muk má chung é múnchi lé koi pyám râ matú taí é a nghut e za, Hparishe pé eq Saduke pé é mhoqshit hkyô lé koi pyám râ matú taí é ru nghut é lé, yhangmoq sê gyô akô nghut ri.

Yesuq Lé, Petruq Yín Yu É Hkyô

Mrk 8:27-30; Luk 9:18-21

13 Yesuq gi, Kesare-Hpilipi wà mó nâm mâ é mau má jé é hkûn, Yhâng é chángzô pé lé, "Haú Byu Yhangzo gi, ó yuq nghut lhê ga, byu pé taí akô lúh?" ga myî ri.

14 Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotû myiqhtoi rayuq yuq nghut ri ga, taí akô." ga tû taí kôjáng,

15 Yhang gi, "Haú jáng, nungmoq gi, Ngo lé ó yuq nghut lhê nghu akô lúh?" ga, yhangmoq lé xoq myî ri.

16 Haú hkûn, Simun Petruq gi, "Nàng gi, rû dui nyi é Garaí Gasâng é Yhangzo, Hkrisduq nghut ri." ga tû taí ri.

17 Haú mù, Yesuq tû taí é gi, "Yonaq é yhangzo Simun é, nàng gi, hkungsô wó nyi ri; hkâsu mù gâ le, nang lé haú hkyô tûn shit é gi, byù mai a nghut, mauhkûng htoq má

nyi é Ngá é Îwa mai tûn shit é ru nghut lhê.

18 Ngò, nang lé taí lé, nàng gi, Petruq* nghut luí, luqgok shî má, Ngò, Ngá é noqkuq hpúng lé xuq to râ nghut mù, haú moming hkúmdong pé gi, hpúng haú lé wó ûng râ a nghut.

19 Mauhkûng mingdán é zoqshi pé lé, Ngò, nang lé ap byi râ nghut lhê; myigùng htoq má, nàng tuí to má tuí to lé, mauhkûng htoq má le, tuí to râ nghut lhê; myigùng htoq má, nàng lhoq lhut má lhoq lhut lé, mauhkûng htoq má le, lhoq lhut byi râ nghut lhê." gâ ri.

20 Hau htâng, Yhang Hkrisduq nghut é hkyô lé, ó lé le a taí kyo râ matú, Yhâng é chángzô pé lé taí hkûm kat ri.

Yesuq Gi, Yhang Shî Râ Lé Hí Te Taí É Hkyô

Mrk 8:31–9:1; Luk 9:22-27

21 Yesuq gi, Yhang Yerusalem wà mó má ló mù, suwún wui, hkyangjong agyi pé eq tarâ sará pé é loq má, zing-rî é myo myo hui zo luí, sat pyám é hui ra râ nghut kôle, sum nyí nghu râ buinyi má, lhoq toq yu é hui râ nghut é hkyô lé, haú hkûn mai, Yhâng é chángzô pé lé taí kyo hi ló bê nghut ri.

22 Haú mù, Petruq gi, Yhang lé rahkyam shut shuí htoq yû mù, "Yhumsîng ê, haú hkyô Náng chyáng hkâ-nhám le a dut sháng gaq." ga Yhang lé tân ri.

* 16:18 Grik đông Petruq gâ é gi, luqgok lé gâ é nghut lhê.

23 Yesuq gi, lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut mù, Ngá é matú myit leqbat jowò nghut ri." ga taí ri.

24 Hau htâng, Yhang gi, Yhâng é chángzô pé lé, "Ngá htâng cháng naù sù ó yuq nghut kôle, yhumsing gùng yhumsing he-ngik pyám mù, yhumsing é tapzîng lé waq chûng luí, cháng ra râ nghut lhê.

25 Hkâsu mù gâ le, yhumsing é asak lé hkyi yù naù sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sùm pyâm é sù kúm gi, asak wó yù râ nghut lhê.

26 Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, hai akyû bò râ lúh? Byù gi, yhumsing é asak woi-nyí lé, hai èq wó htaí yù râ lúh?

27 Haù Byu Yhangzo gi, Yhâng Wâ é hpungwup shing kang bo é èq, Yhâng Wâ é maumang lagyô pé eq rahá jé lé lô râ nghut lhê; haù hkûn, Yhang gi, yuq hkangmó lé, yhumsing kut lai bê eq rajung za akyû byi râ nghut lhê.

28 Ngò, nungmoq lé teng za taí kôlé, ahkuí shí má yap to bang ra-am gi, haù Byu Yhangzo, Yhâng é mingdán eq jé lé lo é lé, a myang é za shí kó râ a nghut." ga taí ri.

17

Yesuq, Isâm Htaí Lo É Hkyô Mrk 9:2-13; Luk 9:28-36

1 Hkyuq nyí lai htâng má, Yesuq gi, Petruq lé le, Yakuq eq yhanggu Yohan nhiktâng lé le, shuí chûng mù, yhangmoq baú myhang é bùm ralhum má doq lô akô.

2 Haù má, yhangmoq é myoq hí tê má, Yesuq é ihpyô isâm htaí byuq mù, Yhâng é myoqdong gi, bui su duqbó tô é eq, Yhâng é mebu gi, maubó su hpyu zan tô ri.

3 Haù hkûn jáng, Mosheq eq Eliyaq gi, yhangmoq é hí má htoq shit mù, Yesuq eq dâng nyo lhùm nyi akô.

4 Haù mù, Petruq gi, Yesuq lé, "Yhumsing ê, shí jowò má nga-nhúng nyi le ge ri. Nàng ô nau é nghut le gi, Náng é matú ralhum, Mosheq é matú ralhum, Eliyaq é matú ralhum kut, ngò zúm sùm lhum saí bá." ga taí ri.

5 Petruq dang ru taí nyi ashí le, duqbó é mhut gi, yhangmoq lé htup zing lô mù, mhut hkaù mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhang má Ngò myit dik nyi lhê. Yhâng é dang gyo keq." gâ ri.

6 Haù su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekô nghut ri.

7 Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat luí, "Toq keq, hkâgyuq kó." ga taí ri.

⁸ Yhangmoq tu wú kat kô le, Yesuq mai lai luí, ó lé le a myàng lo kó nghut ri.

⁹ Bùm mai taù gyó lô kô é hkûn, Yesuq gi, "Ahkuí nungmoq myang é hkyô lé, haù Byu Yhangzo shi é mai lhoq dui toq yu é a hui hui gi, ó lé le hkâtaí kyo kó." ga, yhangmoq lé taí hkûm tô ri.

¹⁰ Haù jáng, chángzô pé gi, "Eliyaq hí lé ra râ nghut lhê ga, tarâ sará pé haí mù taí kô é lhú?" ga, Yesuq lé myí akó.

¹¹ Haù hkûn, Yesuq gi, "Eliyaq hí lé luí, lhunglhang lé hen lajâng to râ gâ é gi, têng lhê.

¹² Nghut kôlhang, Ngò, nungmoq lé taí kôlé, Eliyaq gi, jé lé bê nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dông banshoq kut bekô nghut ri. Haù eq rajung za, haù Byu Yhangzo le, yhangmoq é loq má hpuzo râ nghut lhê." ga tũ taí ri.

¹³ Haù hkûn sheq, Yhang taí nyi é gi, Wui-myhup Sará Yohan eq sêng é hkyô nghut é lé, haù chángzô pé sê gyô akó nghut ri.

Nat Wang Júng Sũ Lé Lhoq Gê Byí É Hkyô

Mrk 9:14-32; Luk 9:37-45

¹⁴ Yhangmoq, byù moq mó pé chyáng dum taù jé lô kô é hkûn, byù rayuq gi, Yesuq chyáng lé jé mù, hkyihput htuq luí,

¹⁵ "Yhumsîng ê, ngá é yuqzo lé shogyô yù laq; yhang gi, mhûngtuq tuq luí, gyai yhang

jamjaù nyi ri. Myihkyóm má le, wuì má le, anum num lêng wàng wàng dut nyi ri.

¹⁶ Yhang lé, Náng é chángzô pé chyáng shuí é kôlhang, yhangmoq a wó lhoq gê byi kó nghut ri." ga taí ri.

¹⁷ Haù mù, Yesuq gi, "Lumjîng myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haù lé, Ngá chyáng shuí lé lô keq." ga tũ taí kat ri.

¹⁸ Yesuq gi, nat gang lé tân kat jáng, nat gang haù gi, yuqgè zo haù yuq chyáng mai htoq ló byuq bê nghut mù, haù hkûn jáng, yuqgè zo haù gi, ge byuq bê nghut ri.

¹⁹ Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq gi, haí mù, nat haù lé a wó hkat htoq é lhú?" ga, lé myi kôjáng,

²⁰ Yhang gi, "Nungmoq é lumjîng myit shaù é yanmai nghut ri. Ngò, nungmoq lé teng za taí kôlé, nungmoq é lumjîng myit angshi cham í za hkâlhang bò kô é nghut le gi, bùm shí lé, 'Hé shut htot ló aq.' ga taí le, htot râ nghut lhê. Nungmoq a wó kut é haí lhang joq râ a nghut.

²¹ Shí jung gi, kyûdung é eq zoshuq gám é dông za a nghut jáng, a htoq ló é nghut lhê.*" ga dum tũ taí ri.

²² Yhangmoq, Galile mau má rahá zup nyi kô é hkûn, Yesuq gi, yhangmoq lé, "Haù

* 17:21 Chyûmbun shí gi, chyûmding myo myo má a bo é nghut lhê.

Byu Yhangzo gi, byu pê é loq má ap pyâm é hui zo râ nghut lhê.

²³ Haú bang gi, Yhang lé sat pyâm kó râ nghut lhê; nghut kôlhang, Yhang gi, shi é htâng sum nyí nghû râ nyí má lhoq dui toq é hui râ nghut lhê." ga taí ri. Haú mù, haú chángzô pé gi, gyai yhang gyô yón nyí bekô nghut ri.

Noqkuq Yhûm Hkansê Kat É Hkyô

²⁴ Yesuq eq Yhâng é chángzô pé gi, Kaperna-um wà má jé kô é hkûn, noqkuq yhûm hkansê hkyuî bang gi, Petruq chyáng lé jé kômù, "Nungmoq é sará gi, noqkuq yhûm hkansê a kat lú?" ga myí akô.

²⁵ Petruq gi, "Kat lhê." ga tâ ri.

Hau htâng, Petruq yhúmhaú má wang ló le, Yesuq hí lhom taí é gi, "Simun ê, mingkan hkohkam pé gi, kang eq hkansê pé lé, ô pê chyáng mai guq yu akô lú? Yhumsing byu pê chyáng mai lú? Haú a nghut jáng, góbâng chyáng mai lú? Nàng, hkâsu wó myit lhê lú?" gâ ri.

²⁶ Haú mù, Petruq gi, "Góbâng chyáng mai nghut ri." ga tâ taí jáng, Yesuq gi, "Haú su nghut le gi, yhumsing byu pé gi, lut akô nghut ri.

²⁷ Nghut kôlhang, yhangmoq é i-myt a ngón a dut kó sháng gaq, nhông má ê mù, ngo-nhe ê hkyó aq. Sâng-hi wó nhê yu é ngozô é nhut lé láng há kat jáng, ngùn ht-ingchap rachap lé myàng râ

nghut lhê. Haú lé yù mù, Ngá é matú eq náng é matú, yhangmoq lé ló byi aq." ga taí ri.

18

Kô Dik Sû Gi, Ó Yuq Nghut Lhê Lhú?

Mrk 9:33-37, 42-48; Luk 9:46-48; 17:1-2

¹ Haú hkûn, haú chángzô pé gi, Yesuq chyáng lé jé kômù, "Mauhkûng mingdán má, kô dik sû gi, ó yuq nghut lhê lú?" ga myí akô.

² Yesuq gi, zoshâng zo rayuq lé wut yù mù, yhangmoq é gung gûng má shap to lú,

³ taí é gi, "Ngò, nungmoq lé teng za taí kôlé, nungmoq gi, myit htaí lhik lú, zoshâng zo wuî su dut kô é za a nghut jáng, mauhkûng mingdán má hkâ-nhám le wó wâng kó râ a nghut.

⁴ Haú mù, zoshâng zo shí yuq su, yhumsing é i-myt wó lhoq nyhum é sù ó yuq nghut kôle, mauhkûng mingdán má, kô dik sû nghut ri.

⁵ Shî sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê.

⁶ Nghut kôlhang, Ngo lé lumjìng é zoshâng wuî mã é rayuq yuq lé, mara kut shut nhang é sù gi, yhâng é lingzing má luqlú long mó tuî hut byi lú, nik é wuimau má, dú hkyô pyâm é huí é nghut le gi, yhâng é matú je gè râ nghut lhê.

⁷ Haú mingkan gi, byu pé lé mara kut shut nhâng jang

joq é yanmai, dingnyé wó ri. Haû mara kut shut nhâng hkyô gi, htoq lugù bê; nghut kôlhang, haú lé lhoq htoq sù gi, dingnyé wó ri.

⁸ Náng é loq èq, a nghut jáng, náng é hkyi èq, nang lé mara kut shut nhang é nghut le gi, haú lé hpyit dú pyám aq. Ahtum abyuq é myi má, hkyi hkúm loq hkúm gû dú hkyô pyâm é hui râ htoq má, hkyi loq a hkâm é za, asak wó yu é nghut le gi, náng é matú je ge ri.

⁹ Náng é myoqjí èq, nang lé mara kut shut nhang é nghut le gi, haú lé lap choq yû mù, dú pyám aq; myoqjí í jí dap gû ngaraí myi má dú hkyô pyâm é hui râ htoq má, myoq rají eq za, asak wó yu é nghut le gi, náng é matú je ge ri.

Byuq Byuq É Sau

Luk 15:3-7

¹⁰ Shî sù é zoshâng zo wuî mã é rayuq lé lhang a wú tiq râ matú, sidiq nyi keq. Hkâsu mù gâ le, Ngò, nungmoq lé taí kôlé, mauhkûng mã é yhangmoq é maumang lagyô pé gi, mauhkûng htoq mã é Ngá Wâ é myoqdong lé, hkâ-nhâm le myang nyi akô.

¹¹ (Hkâsu mù gâ le, haû Byu Yhangzo gi, byuq byuq bê bang lé hkyi yù râ matú, jé lé é nghut lhê.)*

¹² Byù rayuq gi, sau rashô du wó é nghû sháng, sau haú gû mã é radu byuq byuq é nghut jáng, haû gaú xe gaú du lé, bùm pé má nyhi pyâm

to luî, byuq byuq é sau lé a châng ho é nyi râ lhu? Haú lé, nungmoq hkâsu wó myit ngam akô lhu?

¹³ Ngò, nungmoq lé teng za taí kôlé, yang gi, haû byuq byuq é sau haú lé myang ho é hkûn, a lám byuq é sau gaú xe gaú dû é matú gabú é htoq má, haú dû matú je riyhang gabú ri.

¹⁴ Haû eq rajung za, mauhkûng htoq mã é nungmoq é Íwa gi, shî tiq bang mã é rayuq htên byoq byuq râ lé lhang, ô nau é a nghut.

Mara Kut Shut É Gumang Hpó Lé Hkâsu Kut Râ Hkyô

¹⁵ Náng é gumang hpó, nang lé mara kut shut é nghut jáng, yhang chyáng ê mù, nungnhik baú za nghut é hkûn, yhang é mara lé tûn shit aq. Yhang, náng é dang lé gyô é nghut jáng, nàng gi, gumang rayuq dum wó bê nghut ri.

¹⁶ Nghut kôlhang, yang, náng é dang lé a gyô é nghut jáng, 'Mara hun é hkyô hkangmó lé, saksé í yuq sum yuq lòm jáng, wó lhoq teng sháng gaq. * gâ tô é eq rajung za, nàng, gotû byù ra-í yuq lé shuî chûng aq.

¹⁷ Yhang gi, haú bâng é dang lé le a lhom yu é nghut jáng, haú hkyô lé, noqkuq hpúng mã shit kyo aq; hpúng é dang lé le a gyô é nghut jáng, yhang lé, a lumjîng é byù rayuq dông le, kang guq sù rayuq dông le sôn pyám aq.

* **18:11** Bun zo shî gi, chyúmding myo myo má a bo é nghut lhê. * **18:16** Tará Pun 19:15

18 Ngò, nungmoq lé teng za taí kôlé, myigùng htoq má, nungmoq tuí to má tuí to lé, mauhkúng htoq má le, tuí to râ nghut lhê; myigùng htoq má, nungmoq lhoq lhut má lhoq lhut lé, mauhkúng htoq má le, lhoq lhut byi râ nghut lhê.

19 Ngò, nungmoq lé dum taí kôlé, myigùng htoq má, nungmoq mâ é í yuq myit hui luí, haí lé dung kôlhang, mauhkúng htoq mâ é Ngá Wa gi, haú nhik lé gyo byi râ nghut lhê.

20 Hkâsu mù gâ le, Ngá mying lé lang luí, í yuq sum yuq zup zing é jang hkâmá nghut kôlhang, haú bâng é gyoro má Ngò nyi lhê." gâ ri.

Shogyo Nihkmyin A Sé É Jùn Hpô É Dangtú

21 Haú hkûn, Petruq gi, Yesuq chyáng huí ê mù, "Yhumsing ê, ngá é gumang, ngo lé mara kut shut é nghut le, yhang lé hkâ-myhó dâm mara hkyut byi ra râ lúh? Nyhit dâm jé shoq hkyut byi ra râ lúh?" ga myí ri.

22 Haú jáng, Yesuq tû taí é gi, "Ngò, nang lé taí lé, nyhit dâm za a nghut, nyhit xe nyhit tú dâm hkyut byi râ lhê.

23 Mauhkúng mingdán gi, yhumsing é dui-nhâng zoshâng wui é jihpán lé jep nau é hkohkâm rayuq eq du ri.

24 Yhang gi, jihpán lé jep hi ló é u lé, yhâng chyáng ngùn

wan myo myo chyîn dap to sù lé shuí lé lo akò.

25 Haú yhumsing hpó gi, haú yuq chyîn a wó xap é yanmai, chyîn wó yû râ matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ùng pyám râ hkunmó hkyô kat ri.

26 Haú mù, dui-nhâng zoshâng haú yuq gi, yhâng é hí má hkyihput htuoq luí, 'Ngo lé myit hing byi shi laq; banshoq lé, ngò xap râ.' ga dúng tôngbán ri.

27 Haú dui-nhâng zôshang é yhumsing hpó gi, haú yuq lé wú shogyo luí, chyîn banshoq lhut pyám byi mù, nhang kat ri.

28 Nghut kôlhang, dui-nhâng zoshâng haú gi, htoq ló mù, yhang lé, denari[†] rashô chyîn dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zing to mù, 'Ngo lé dap tô é chyîn hân xap aq!' ga taí ri.

29 Haú hkûn, yhâng é luzúm dui-nhâng zoshâng haú gi, yhâng é hí má hkyihput htuoq luí, 'Ngo lé myit hing byi shi laq; ngò xap râ.' ga dúng tôngbán ri.

30 Nghut kôlhang, yhang gi, a gyo byi e za, yhâng é chyîn dum wó xap é hkûn jé shoq, haú yuq lé htóng hkyô pyám nhâng ri.

31 Gotû dui-nhâng zoshâng wui gi, haú hkyô lé myàng kôjáng, i-myit wú nô kôluí,

† 18:28 Denari rachap gi, ra-nyí lhê é byù rayuq é zuihpau eq wui ri.

yangmoq é yhumsing hpó lé, háu hkyô banshoq ló tái kyo akô.

³² Háu mù, háu yhumsing hpó gi, dui-nhâng zoshâng háu lé wut hâng yù mù, 'Agè ashop é dui-nhâng zoshâng ê, nàng, ngo lé dũng tũngbán é yanmai, nàng, ngo lé dap é chyin banshoq lé, ngò lhut pyám byi bê nghut lhê mhai.

³³ Háu su é nhing, ngò, nang lé shogyô yu é su, náng é luzúm dui-nhâng zoshâng lé, nàng ge shogyô yu lhê a nghut lú?" ga tái lú,

³⁴ yang gi, nhikjum yo mù, yhang é chyin ban xap é hkũn jé shoq, jamjau hui zo rã matú, yang lé, htóng suwún pê chyáng ap byi pyám bê nghut ri.

³⁵ Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkũng htoq tsáng myhâng mã é Ngá Wa le, nungmoq lé háu đông kut rã nghut lhê." gã ri.

19

Myi Làng Gâng É Hkyô
Mrk 10:1-12

¹ Yesuq gi, mhoqshit é dang háu pé lé ban tái jáng, Galile mau mai htoq ló mù, Yodan làng tũ tap mã é Yuda mau mã è jé ri.

² Byù moq mó gi, Yhang htang cháng kô é nghut mù, Yhang gi, háu bang mã é nõhpyo hui bang lé, háu mã lhoq gê byi ri.

³ Háu hkũn, Hparishe pé ra-am gi, Yhang chyáng lé jé kômù, Yhang lé chyam wú é đông, "Byù rayuq gi, hai hkyô mai nghut nghut, yhumsing é yangmyi lé lhoq kãng pyám le, tarã wang lhê lú?" ga myi akô.

⁴ Háu jáng, Yhang tũ tái é gi, "A-nham sâng-hi lé, Hpãn Sũ, 'byu hpan é hkũn, yuqgè eq myiwe lé hpan é nghut lhê.'[✧]

⁵ 'Hau é yanmai, yuqgè gi, yhumsing é inu iwã chyáng mai htoq lú, yangmyi eq rahá rading ralhum za kut nyi mù, yangnhik gi, gungsho ralhum za dut byuq kó rã nghut lhê.'[✧] ga kã tô é lé, nungmoq a nghap wú kó lú?

⁶ Háu mù lú, yangnhik gi, í yuq a nghut lô e za, rayuq za dut bê nghut ri. Háu mù lú, Garai Gasang lhoq tsũm tô é lé, byù gi, a lhoq kang sháng gaq." gã ri.

⁷ Háu hkũn, yangmoq gi, "Háu lé nhing, yuqgè rayuq gi, lhoq kang laiká za kã byi mù, yangmyi lé wó nhang pyám lhê ga, hai mù, Mosheq, hkunmó hkyô tô lhê lú?" ga, Yhang lé dum taũ myi akô.

⁸ Háu mù, Yesuq gi, "A-nham sâng-hi mai gi, háu đông a nghut. Nghut kôlhang, nungmoq é myit nhiklum htãn kô é yanmai, nungmoq é yangmyi pé lé lhoq kang rã ahkáng, Mosheq byi tô é ru nghut lhê.

⁹ Ngò, nungmoq lé tái kôlé, sulàng lú é za a nghut jáng, yhumsing é yangmyi lé kãng

pyám mù, myiwe gotû dum hâng yu é sù ó yuq nghut kôle, su-myi lú é sù dut bê." ga, yhangmoq lé dum tâ ri.

¹⁰ Haú hkûn, haú chángzô pé gi, "Myi làng hkyô má haú dông ru nghut le gi, a yu le háng je ge nyo ri." ga tâ akô.

¹¹ Haú mù, Yesuq gi, "Yuq hkgangmó gi, dang haú lé wó hap yu é a nghut, wó hkâm râ jeju wó é bang za sheq, wó hap yu é nghut lê.

¹² Byù ra-am gi, înú unghkaû mai yhang, yuqgè a jé gû hku lé lo é bang nghut akô; ra-am gi, góbâng èq kut é yanmai, yuqgè a jé dut byuq akô; ra-am nghut jáng, mauhkûng mingdán é matú, yuqgè a jé râ dông kut yu pyám akô nghut ri. Shí hkyô lé wó hap yù sù gi, hap yù sháng gaq." ga dum tâ ri.

Zoshâng Wui Eq Yesuq

Mrk 10:13-16; Luk 18:15-17

¹³ Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shuí lé lo akô. Haú chángzô pé kúm gi, haú shuí lé lô bang lé lhom tân hkûm akô nghut ri.

¹⁴ Nghut kôlhâng, Yesuq gi, "Haú zoshâng wui lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, mauhkûng mingdán gi, haú sù é bâng é mingdán ru nghut lê." ga tâ kat ri.

¹⁵ Yhang gi, zoshâng wui htoq má loq ke shimân byi

mù, haú jowò mai htoq lô bê nghut ri.

Sùt Wó É Zorâm Rayuq É Hkyô

Mrk 10:17-31; Luk 18:18-30

¹⁶ Byù rayuq gi, Yesuq chyáng lé jé mù, "Sarâ ê, ahtum abyuq é asak wó yû râ matú, ge é muzó haí kut ra râ lú?" ga myî ri.

¹⁷ Haú jáng, Yesuq gi, "Ge é hkyô eq séng luí, haí mù Ngo lé myî lê lú? Ge é Sù gi, rayuq za nyi lê. Nàng, asak dui é má wàng nau é nghut le gi, jep é tarâ pé lé cháng aq." ga tâ ri.

¹⁸ Haú yuq gi, "Hká gû lé lú?" ga dum myi jáng, Yesuq gi, "Byù hkâsat, su-myi hkâlú, hkâhkau, a teng a mán é saksé hkâhkâm,

¹⁹ nángnu nánwa lé hkungga aq, [☆] ga le, 'náng gûng lé nàng chyitdap e su, náng é chyangnâm mâ é bang lé le chyitdap aq. [☆] ga le bo tô ri." ga tâ kat ri.

²⁰ Haú hkûn, zorâm hpó haú gi, "Haú pé banshoq lé, ngò cháng bê nghut lê; haí kut râ ashî lú?" ga dum taú myî ri.

²¹ Yesuq gi, "Nàng, gumjup sù dut nau le gi, lô mù, nàng wó é sutzè pé lé ûng pyám luí, myùng bang lé byî pyám aq; haú jáng, nàng, mauhkûng htoq má sutzè wó râ nghut lê; haú mù, Ngá htâng lé cháng aq." ga tâ ri.

22 Zorâm hpó haû gi, sutzè gyai wó sù nghut é yanmai, dang haú lé wó gyo jáng, gyai yhang myit a ngón é èq ló byuq bê nghut ri.

23 Hau htâng, Yesuq gi, Yhâng é chángzô pé lé, "Ngò, nungmoq lé teng za tái kôlé, sutzè wó bang gi, mauhkông mingdán wó wâng râ gyai yhang wuî ri.

24 Hau htoq agó, Ngò, nungmoq lé tái kôlé, sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lê." ga tái ri.

25 Haû chángzô pé gi, haû su gâ é lé wó gyo kôjáng, haû ru nghut le gi, ó yuq za hkyi yu é hui râ nghut lê lú?" ga Yhang lé myí akô nghut ri.

26 Haú hkûn, Yesuq gi, yhangmoq lé wú kat mù, "Haú hkyô lé byù mai gi, wó kut râ a nghut; nghut kôlhang, Garai Gasang gi, lhunglhang lé wó kut é Sù nghut lê." ga tái ri.

27 Haú hkûn, Petruq gi, Yhang lé, "Ngamoq gi, wó é gû lhunglhang lé tô pyâm to lui, Náng htâng cháng bê nghut lê. Ngamoq, hai wá wó râ nghut lê lú?" ga myí kat ri.

28 Haû mù, Yesuq tû tái é gi, "Ngò, nungmoq lé teng za tái kôlé, lhunglhang lé asik dum saî dut nhang é má, haû Byu Yhangzo gi, Yhâng é hpungwup bo é hkohkâm-tanghkuq má zùng

tô é hkûn, Ngá htâng châng é bang nungmoq le, hkohkâm-tanghkuq raxe í lhûm htoq má zùng to kômù, Israelaq amyû raxe í hú lé jéyáng kó râ nghut lê.

29 Ngá é yanmai, yhumsing é yhûm, nhiktâng wuî, înu îwa, zo dù wuî eq yò pé rajung jung lé tô pyâm tô é sù ó yuq nghut kôle, rashô tú akyû myo jat shoq wó râ nghut é htoq agó, ahtum abyuq é asak le, wó yû râ nghut lê.

30 Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyí bang yuq gi, hí bekô râ nghut lê.

20

Tsibiyiq Hkyâm Mû Zui Bang Lé Dangtú Yu É Hkyô

1 Hkâsu mù gâ le, mauhkông mingdán gi, yhumsing é tsibiyiq hkyâm má mû zui nhâng râ langchyang ê lûng râ ga, napsûn noq le htoq e ló é hkyâm yhumsing eq du ri.

2 Yhang gi, ra-nyí é matú denari rachap byi râ dông, haû bang eq myit huî yù mù, yhangmoq lé, yhâng é tsibiyiq hkyâm má nhang hâng kat ri.

3 Napkyó gau hkyíng* kô má, yhang gi, htoq e ló le, hai mù le a kut é za, gài má yap tô é bang ra-am lé ê myang ri.

4 Haû mù, yhang gi, haû bang lé, 'Nungmoq le, ngá é hkyâm má mù ê zui keq; byi

* 20:3 Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lê. Yudaq byu pé é ahkyíng gi, napkyó hkyuq hkyíng mai nghap hi lê.

âng é ahpau, ngò, nungmoq lé byi râ nghut lê.' ga tái jáng, yhangmoq gi, e ló bekô nghut ri.

⁵ Hau htâng, yhang gi, raxe í hkyíng má le, myinhtâng sum hkyíng kô má le, dum htoq ê mù, haú eq rajung za langchyâng pé ê lung kat ri.

⁶ Myinhtâng ngo hkyíng kô má, yhang dum htoq e ló wú le, góbang ra-am le yap tô bum é lé, ê myâng mù, haú bang lé, 'Nungmoq gi, haí le a kut é za, ra-nyí buí haí mù shí má yap tô bum akô lú?' ga myi jáng,

⁷ haú bang gi, 'Ngamoq lé, ó yuq eq le a lùng kô é yanmai nghut lê.' ga tũ tái akô.

Haú hkũn, yhang gi, 'Nungmoq le, ngá é hkyâm má mù é zui keq.' ga tái ri.

⁸ Myinhtâng jé jáng, tsibiyiq hkyâm yhumsíng gi, yhâng é mù shuí u sũ lé, 'Haú langchyâng pé lé ji yù mù, je htâng má lung yu é bang mai hí luí, sâng-hi lung yu é bang jé shoq, mù zui hpau byi aq.' ga tái ri.

⁹ Myinhtâng ngo hkyíng má mù wàng bang le, denari rachap chap wó yu bum akô.

¹⁰ Haú mù, je hí má mù wàng bang gi, yhangmoq je myo wó nhô ngam akô. Nghut kôlhang, yhangmoq le, rayuq denari rachap chap za wó akô nghut ri.

¹¹ Yhangmoq gi, haú myhó za wó yu bùm kô é yanmai, haú hkyâm yhumsíng lé,

¹² 'Shí bang gi, je htâng má mù lé wàng mù, nayí rahkum

za mù zui kôlhang, nàng gi, ra-nyí buigyùm chap buí htân yò má mù zui é bang ngamoq eq rajung za byí ri.' ga mara hũn dang tái akô.

¹³ Nghut kôlhang, haú hkyâm yhumsíng gi, haú bang má é rayuq lé, 'Buinùm hpó ê, ngò, nang lé a tarâ é đông kut é a nghut. Denari rachap byi râ nghũ, nàng eq ngò myit hui to bê a nghut lú?' ga tái ri.

¹⁴ Nàng wó âng é lé yu chũng mù, ló aq. Je htâng má mù lé wang é sũ lé le, nang lé byí é myhó, ngò byí nau ri.

¹⁵ Ngá é ngùn lé, ngò kut nau é su a ge kut lú? Ngò, ge é kut le, nàng manôn ri lú?' ga tái ri.

¹⁶ Haú mù luí, htâng gyó nyí bang gi, hí bekô râ nghut mù, hí nghut nyí bang gi, htâng gyó byuq kó râ nghut lê." gâ ri.

Yesuq Gi, Yhang Shí Râ Hkyô Lé Dum Tái Ri

Mrk 10:32-34; Luk 18:31-34

¹⁷ Ahkuí, Yesuq gi, Yerusalem wà mó shut doq ló nyi é u lé, haú chángzo raxe í yuq lé, gotũ kut wut yù mù,

¹⁸ "Nga-nhúng gi, Yerusalem wà mó shut doq ló nyi lê; haú Byu Yhangzo gi, hkyangjong agyi pé eq tarâ sará pê é loq má ap byí pyâm é hui râ nghut lê; haú bang gi, Yhang lé, shí râ mara byi kó râ nghut é htoq agó,

¹⁹ jóng pyâm é, nhuq bat é eq tapzĩng má jén sat pyâm é hui râ matú, haú tũngbaù pé é loq má ap pyám kó râ nghut

lhê. Nghut kôlhang, Yhang gi, sum nyi nghu rô buinyi má, lhoq dui toq é dum hui rô nghut lhê." ga taí ri.

Zô Njik Matú Ínu Êq Dung Byí Ê Hkyô

Mrk 10:35-45

²⁰ Hau htâng má, Zebedi é yhangzô nhiktang é yhângnu gi, yhangzô njik eq rahá jé lé lô kômù, rajung dung rô matú, Yesuq é hí má hkyihput htuoq nyi ri.

²¹ Haú mù, Yesuq gi, "Nàng, haí ô nau ri lú?" ga yhang lé myi jáng, yhang gi, "Náng é mingdán má, shí ngá zô nhiktâng lé, Náng é loqyò hkyam má rayuq, loqpaí hkyam má rayuq kut, zùng rô ahkáng byi laq." ga taí ri.

²² Haú hkûn, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq rô góm† lé, nungnhik wó shuq kó rô lú?" ga myi jáng, yhangnhik tâng gi, "Wó shuq lhê." ga tû taí akô nghut ri.

²³ Haú mù, Yesuq gi, yhangnhik lé, "Ngò shuq rô góm lé, nungnhik shuq ra kó rô za nghut lhê. Nghut kôlhang, Ngá é loqyò, loqpaí hkyam má zùng rô ahkáng lé gi, Ngò byí jung a nghut. Jowò haú pé gi, Ngá Wa hen to byi bâng é matú za ru nghut lhê." ga taí ri.

²⁴ Gotû chángzo raxê yuq gi, haú hkyô lé wó gyo kôjáng, haú nhiktâng lé njik-yô akô nghut ri.

²⁵ Haú mù, Yesuq gi, yhangmoq banshoq bang lé wut tsing yù luí, "Tûngbaù pé lé uphâng é ga bang gi, tûngbaù pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chûng mù, up zô nyi kô é hkyô lé le, nungmoq sé lhê.

²⁶ Nungmoq chyáng gi, haú su a dut kó sháng gaq; haú Byu Yhangzo lháng gi, dojaú é lé hkam yù rô matú jé lé é a nghut é za, dojaú rô matú eq byù myo myô é matú, shíhtaí gunglik hkungga dông, Yhâng é asak lé byi pyám rô matú sheq, jé lé é ru nghut é su,

²⁷ nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra rô nghut lhê.

²⁸ Hau htoq agó, nungmoq má ushuq dut naù sù ó yuq nghut kôle, nungmoq é jùn dut ra rô nghut lhê." ga taí ri.

Myoqjit Í Yuq Myoq Dum Myang Ê Hkyô

Mrk 10:46-52; Luk 18:35-43

²⁹ Yesuq eq Yhâng é chángzô pé gi, Yerihko myuq mai htoq ló nyi kô é hkûn, byù moq mó gi, yhangmoq é htâng má châng e ló bum akô.

³⁰ Haú hkyô yàm má zung tô é myoqjit í yuq gi, Yesuq laí ló nyi é hkyô lé wó gyo kôjáng, "Dawiq é Yhangzo, Yhumsing ê, ngá-njik lé shogyô yù laq ô!" ga, wut garû kat akô nghut ri.

† 20:22 Góm gâ é gi, Yesuq, jamjau hui rô hkyô eq shí rô hkyô lé, taí nau é nghut lhê.

³¹ Byù moq mó gi, yhangnhik zîm byuq râ matú tân hkúm kôlhang, yhangnhik gi, "Dawiq é Yhangzo, Yhumsîng ê, ngá-nhik lé shogyô yù laq ô!" ga, je riyhang htê mó èq wut garû kat akô nghut ri.

³² Haû mù, Yesuq gi, yap kat mù, "Ngò, nungnhik lé haî kut byi râ ô nau akô l hú?" ga, yhangnhik lé wut myî kat ri.

³³ Haû hkûn, yhangnhik gi, "Yhumsîng ê, ngá-nhik myoq myàng nau ri." ga tû taî akô.

³⁴ Yesuq gi, yhangnhik lé wú shogyo luí, yhangnhik é myoqjí má ê záng byî ri. Haû hkûn jáng, yhangnhik gi, myoq wó myâng kômù, Yhâng htâng cháng bekô nghut ri.

21

Yesuq, Yerusalem Wà Mó Má Wang E Ló É Hkyô

Mrk 11:1-11; Luk 19:28-38; Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyâng lo nyî kô é hkûn, Tsan-lun Bùm mâ é Bethpage wà má jé ló kôjáng, Yesuq gi, chángzo í yuq lé,

² "Nungnhik, hí mâ é wà má é keq; wà haû má, logúng zîng radu lé, logúng zo eq rahá tuí to lánng é lé, ê myâng kó râ nghut lhê; haû lé hpyi yù mù, Ngá chyáng she lò keq.

³ Byù rayuq yuq, nungnhik lé rajung jung gâ lò jáng, 'Shî í du lé, haû Yhumsîng chûng râ ri.' gâ nghû tû taî keq; haû

jáng, yhang, radá dâm nhâng byi râ nghut lhê." ga Yesuq taî luí, nhang kat ri.

⁴ Haû gi, myiqhtoi dang lhoq dik râ matú dut lo é nghut ri.

⁵ Myiqhtoi dang haû gi,

"Zi-un byizo* lé, shî su nghû keq; 'Wú aq, nánng é hkohkâm gi,

nú-nhâm é myit eq logúng htoq má ji mù, nghut bê, logúng zo htoq má ji mù, nánng chyáng lé lô bê nghut ri.'"*

gâ ri.

⁶ Haû chángzô nhik gi, e ló mù, Yesuq taî kat é eq rajung za é kut bekô nghut ri.

⁷ Yhangnhik gi, logúng me lé she lò mù, yhangnhik é buhîng pé lé, haû logúng mê é htoq má ke byi kôjáng, Yesuq gi, doq jí ri.

⁸ Byù moq mó mâ é myo myo gi, yhangmoq é buhîng lé, hkyô má hkyut hkang byi akô; ra-am gi, mhandîng pé lé zân hkyô yù mù, hkyô má hkang byi akô nghut ri.

⁹ Yhâng é hí má htâng má châng sô nyi bum é bang gi,

"Dawiq é Yhangzo gi, hosana† nghut nyî sháng gaq ô!"

"Haû Yhumsîng é myîng mai jé lé lô Sû gi, hkungsô wó nyî sháng gaq ô!"*

"Htoq tsáng myhâng má, hosana nghut nyî sháng gaq ô!"

* **21:5** Zi-un byizo gâ é lichyúm gi, Yerusalem byu pé gâ é nghut lhê. ☆ **21:5** Zhk 9:9 † **21:9** Hebre dang má, *hosana* gâ é gi, "ahkuí hkyi yù laq" gâ é nghut lhê. Nghut kôlhang, bun zo 9 má gi, hkyá-on dang đông chung é nghut lhê. ☆ **21:9** Hkyá-on 118:26

ga luí, taí garû bum akô nghut ri.

¹⁰ Yesuq, Yerusalem wà mó má wang ló é hkûn, rawà gón é bang gi, gabyông lo bùm kômù, "Shí yuq gi, ó wá nghut lhê lhà?" ga luí, myi lhùm bum akô.

¹¹ Haú hkûn, byù moq mó gi, "Shí yuq gi, Galile mau, Nazaret wà byù Yesuq gâ é myiqhtoi nghut lhê." ga taí akô nghut ri.

Yesuq, Noqkuq Yhùm Lé Lhoq Sansêng Pyâm É Hkyô

Mrk 11:15-19; Luk 19:45-48; Yhn 2:13-22

¹² Yesuq gi, noqkuq yhùm má wang ê mù, haú má é zè ung zè wuì kut nyi é bang banshoq lé, hkat htoq pyám luí, ngùn htaí zo bâng é siboî pé eq hpûngkyui ung zo bâng é tanghkuq pé lé, tu mhuq pyám byî ri.

¹³ Haú hkûn, Yhang gi, "Ngá yhùm gi, kyûdung yhùm ga râ nghut lhê."* ga kê to kôlhang, nungmoq gi, jowò shî lé 'damaq hkyûng'* kut nyi akô." ga, yhangmoq lé taí ri.

¹⁴ Yesuq, noqkuq yhùm má nyi tô é hkûn, myoqjit bang eq hkyî hten bang Yhâng chyáng lé lô kômù, Yhang gi, haú bang lé lhom lhoq gê byî ri.

¹⁵ Nghut kôlhang, hkyangjong agyi pé eq tarâ sará pé gi, Yhang kut é mauhpo muzó pé lé le, "Dawiq é Yhangzo gi, hosana nghut sháng gaq." ga, noqkuq yhùm má zoshâng wuì garû nyi bùm kô é lé le,

myàng kôjáng, wú nhik-yô bum akô nghut ri.

¹⁶ Haú mù, yhangmoq gi, "Zoshâng shí bang haí taí nyi kô é lé, Nàng wó gyô lhê lhú?" ga, Yesuq lé myi kôjáng, Yhang gi, "Wó gyô ri. Nungmoq gi,

'Zoshâng wuì eq nyheqnú pè é nhut mai hkya-on kungtôn râ matú, nàng lajáng to bê nghut ri.'*

ga kê tô é lé, Chyúmdang má a nghap wú kó lhú?" ga yhangmoq lé taí ri.

¹⁷ Hau htâng má, Yhang gi, haú bang lé nyhi to luí, wà hkaú mai htoq ló mù, Behtani wà má é jé luí, haú myîn, haú má bíng yu ri.

Maihpáng Gâm Nyhuí Kyuq Shi Byuq É Hkyô

Mrk 11:12-14, 20-24

¹⁸ Yhang gi, htang napkyó noq le, Yerusalem wà mó shut dum taú ló é hkûn, hkyô má zòmút hui bê nghut ri.

¹⁹ Haú mù, Yhang gi, hkyô yàm má yuq tô é maihpáng gâm lé myang kat mù, chyâng e wú le, ahaq mai lai luí, haí lé le a myàng nghut ri. Haú mù, Yhang gi, shigâm haú lé, "Nàng má, hkâ-nhám le ashî a zui sháng gaq." ga taí kat ri. Haú hkûn jáng, agâm haú gi, nyhuí kyuq shî ló byuq bê nghut ri.

²⁰ Haú chángzô pé gi, haú lé myàng kôjáng, maú byuq kômù, "Maihpáng gâm shî gi, haí mù haú-í hân nyhuí kyuq shî ló lhê lhà?" ga myí akô.

* 21:13 Esai 56:7

* 21:13 Yer 7:11

* 21:16 Hkya-on 8:2

21 Yesuq gi, "Ngò, nungmoq lé teng za taí kôlé, nungmoq, úng-âng é myit a bo é za, lumjǐng kô é nghut le gi, maihpáng gâm má Ngò kut é muzó lé, nungmoq wó kut kó râ nghut é htoq agó, bùm shí lé, 'Htot mù, wuimau má ló gyó wàng aq.' ga taí jǎng, taí é eq rajung za dut râ nghut lhê.

22 Nungmoq, lumjǐng myit èq dung kô é nghut jǎng, hai dǔng le le wó yú kó râ nghut lhê." ga tú taí ri.

Yesuq É Ahkáng Ayá Lé Myí Chyam É Hkyô

Mrk 11:27-33; Luk 20:1-8

23 Yesuq gi, noqkuq yhúm wàng hkaú má wang ê mù, mhoqshit nyi é hkûn, hkyangjong agyi pé eq mingbyu é suwún wuî gi, Yhâng chyáng lé jé kômù, "Hai ahko ahkâng èq, Nàng, shí pé lé kut nyi lhê lú? Ahko ahkáng shí, Nang lé ó yuq byí é lú?" ga myí akô.

24 Haú hkûn, Yesuq gi, "Ngò le, nungmoq lé rajung myí wú kôlé, nungmoq wó tú taí kô é nghut jǎng, hai ahko ahkâng èq, Ngò, shí pé kut é hkyô lé taí kyo râ nghut lhê.

25 Yohan byí é baptisma gi, ó yuq é ahko ahkáng mai nghut lhê lú? Mauhkûng mai lú? A nghut jǎng, byu chyáng mai lú?" ga taú myí kat ri.

Haú hkûn, yhangmoq, chôm hpyê lhum kô é gi, "'Mauhkûng mai nghut lhê.' nghú, nga-nhúng taí jǎng le, 'Haú nghut le nhing, hai mù,

yhang lé a lumjǐng kô é lú?' ga râ nghut;

26 'Byu chyáng mai nghut lhê.' nghú jǎng le, yhangmoq lhunglhâng bang gi, Yohan lé, myiqhtoi rayuq ga lumjǐng bùm kô é nghut lhê yanmai, haú bang lé, nga-nhúng gyuq râ lhê nghut." gâ akô.

27 Haú mù, yhangmoq gi, Yesuq lé, "Ngamoq a sé." ga tú taí akô.

Haú hkûn, Yesuq gi, "Haú jǎng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

Yuqzô Nhiktâng Lé Dangtú Yu É Hkyô

28 Yesuq xoq taí é gi, "Nungmoq hkâsu wó myit akô lú? Byù rayuq gi, yuqzo í yuq wó ri. Yhang gi, ko sù yuq chyáng ê mù, 'Ngá zo ê, nàng, hkû-nyí tsibiyiq hkyâm má mù ê zui aq.' ga taí jǎng,

29 yuqzo haú gi, 'Ngò a kâm ê.' ga tú taí ri; nghut kôlhâng, htâng má, yhang gi, myit dum lhing mù, ê bê nghut ri.

30 Hau htâng, yhângwa gi, yhang zo tiq sù yuq chyáng ê mù, rajung za ga ê dum taí jǎng, yuqzo haú gi, 'Ê râ, âwa!' ga yín yú kôlhâng, a ê kut ri.

31 Haú nhiktâng mâ é hká yuq sheq, yhângwa ô nau é hkyô lé kut sù nghut ri lú?" gâ ri.

Haú hkûn, yhangmoq gi, "Ko sù nghut ri." ga tú taí akô.

Haú mù, Yesuq gi, yhangmoq lé, "Ngò, nungmoq lé teng za taí kôlé, kang guq bang eq shiwa myhí pé gi,

Garai Gasâng é mingdán má, nungmoq a wàng shimá, wang ló nyi bùm kó râ nghut lhê.

³² Hkâsu mù gâ le, Yohan gi, nungmoq chyáng lé jé mù, dingmán hkyô lé tân shít kôlhang, nungmoq gi, yhang lé a jing kut akô nghut ri; nghut kôlhang, haú kang guq bang eq shiwa myhî pé gi, yhang dang lé jing akô nghut ri. Nungmoq gi, haú hkyô lé myang é nghut kôlhang, myit a lhing kô é htoq agó, yhang lé a lumjing shi kó nghut ri.

Tsibiyiq Hkyâm Saí Bang Lé Dangtú Yu É Hkyô

Mrk 12:1-12; Luk 20:9-19

³³ Gotû dangtú lé gyô wú shi keq; hkyâm yhumsing rayuq gi, tsibiyiq hkyâm ralhum saí to mù, lhinghkyuq kyâm to luí, tsibiyiq wing pyik htoq râ dongkong dù to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byi to mù, gó ming shut e ló byuq bê nghut ri.

³⁴ Kyôshu yoq jé jáng, yhang gi, yhang eq sêng é tsibiyiq shi é yú râ matú, yhang é dui-nhâng zoshâng wui lé, haú hkyâm saí zo bâng chyáng nhang kat ri.

³⁵ Haú hkyâm saí zo bang gi, dui-nhâng zoshâng wui lé, lhom chyup yú kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, luqgok eq lhom dú sat pyám, kut akô nghut ri.

³⁶ Hau htâng má, yhang gi, hí dam lhê htoq je myo shoq

gotû dui-nhâng zoshâng wui lé dum nhang kat le le, haú hkyâm saí zo bang gi, hí lhê bang lé su lhom dum kut akô nghut ri.

³⁷ Ló htáng má, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhang zo lé, haú bâng chyáng nhang kat ri.

³⁸ Nghut kôlhang, haú hkyâm saí zo bang gi, yhang zo lé myàng kôjáng, 'Shí yuq gi, silí wunlí sing yú râ sú nghut lhê; lé keq, yhang lé sat pyám mù, yhang é silí wunlí lé yu pyám byi sháng.' ga, rayuq eq rayuq taí lhum bum akô nghut ri.

³⁹ Haú mù, yhangmoq gi, yhang lé, chyup yú luí, hkyâm shinggan shut dú htoq kômù, sat pyám bekô nghut ri.

⁴⁰ Haú mù luí, tsibiyiq hkyâm yhumsing lé jé é hkûn lé, haú hkyâm saí zo bang lé hkâsu kut nhô ngam akô lhú?" ga Yesuq myí ri.

⁴¹ Haú hkûn, haú hkyangjong agyi pé eq suwún wui gi, "Haú agè ashop bang lé gi, agè ashop é dong sat pyám râ nghut lhê. Haú tsibiyiq hkyâm lé gi, kyô shu yoq má, yhang é gambùm lé byi râ bang lé, htot ngho byi pyám râ nghut lhê." ga, tú taí akô nghut ri.

⁴² Haú jáng, Yesuq dum taí é gi, "Chyúmdang má, 'Yhûm saí bâng eq hkyin htoq pyám é luqgok gi, htungchyûn mã é ahkyak dik é luqgok dut bê.

Shí hkyô gi, haû Yhumsîng
kut é nghut luî, nga-
nhûng é myoq hí má
mauhpo dut bê nghut
ri.*

ga bo tô é lé, nungmoq a ng-
hap wú kó lúh?

⁴³ Haû mù, Ngò, nungmoq
lé taí kôlé, Garai Gasâng é
mingdán lé, nungmoq chyáng
mai yù mù, hau é ashí wó zui
râ byuhú lé byî pyám râ nghut
lhê.

⁴⁴ Luqgok haú má gyó záng
é sù gi, gyuí gyop byuq râ
nghut lhê. Luqgok hau èq gyó
nhê záng é sù le, nhê pyeq
pyám é hui râ nghut lhê." gâ
ri.

⁴⁵ Hkyangjong agyi pé eq
Hparishe pé gi, haû Yesuq taí
é dangtú pé lé wó gyo kôjáng,
yangmoq lé taí nyi é hkyô lé,
sê gyô akô nghut ri.

⁴⁶ Haû mù, yangmoq gi,
Yang lé chyup yû râ hkyô ho
nyi akô; nghut kôlhang, byu pé
gi, Yang lé, myiqhtoi rayuq
ga myit lum to kô é yanmai,
yangmoq gi, haû bang lé
gyuq akô nghut ri.

22

Myiháng Poî Dangtú Pé

Luk 14:15-24

¹ Yesuq, dangtú pé dông
yangmoq lé dum taí é gi,

² "Mauhkûng mingdán gi,
yhumsing yangzô é matú
myiháng poî hen lajâng to byî
é hkohkâm rayuq eq du ri.

³ Hkohkâm hpó haû gi,
yang ji tô é bang, haû poî
má lé lô râ matú, yhâng é dui-
nhâng zoshâng wui lé é tsing

taí nhang ri; nghut kôlhang,
haú bang gi, a lé kut akô
nghut ri.

⁴ Hau htâng má, yang gi,
gotû dui-nhâng zoshâng wui
lé, 'Ngò haî le hen to bê; ngá é
no eq xu-myum é gau-nyhaú
pé lé sat mù, jung hkangmó rì
rì nghut to bê. Myiháng poî
má lé lò keq hkoi nghû, haû ji
tô é bang lé ê taí keq.' ga pyîng
luî, nhang kat ri.

⁵ Nghut kôlhang, haû ji to
huî é bang gi, dang haú lé haî
su a gyô ngàm kômù, rayuq
gi, yohtung shut, rayuq gi,
hpugá dinggá hkyô shut é
byuq bekô nghut ri.

⁶ Ra-am dum nghut jáng,
yhâng é dui-nhâng zoshâng
wui lé lhom chyup yû kômù,
nhuq bat luî, sat pyám byî akô
nghut ri.

⁷ Haû mù, hkohkâm gi,
nhikjum yo luî, yhâng é gyezô
pé lé, haû byù sat bang lé sat
pyám nhâng mù, yangmoq
é myuq lé nyhê hkyô pyám
nhang ri.

⁸ Hau htâng má, yang gi,
yhâng é dui-nhâng zoshâng
wui lé, 'Myiháng poî gi, rì rì
nghut to bê; nghut kôlhang,
haû ji to huî é bang gi, lé râ a
gingdán kó nghut ri.

⁹ Haû mù, hkyô kang pé má
é luî, myang é yuq hkangmó
lé, poî má lé râ matú ê jî keq.'
ga taí ri.

¹⁰ Haû jáng, dui-nhâng
zoshâng haú bang gi, hkyô
kang pé má htoq ê luî, myang
é byù gè byù gang lhunglhang
lé ji tsîng yù kô é nghut mù,

myiháng poí gi, bíng pé zung byíng bùm bê nghut ri.

¹¹ Nghut kôhlang, bíng haú bang lé, hkohkâm hpó, lé wang wú é hkûn, myiháng poí wàng hking a wut tô é byù rayuq lé, yhang byu-myang ri.

¹² Haú mù, yhang gi, haú yuq lé, 'Buinùm hpó ê, nàng gi, myiháng poí wàng hking le a wut é nhíng, shí má hkâsu kut wang lo é lú?' ga myi jáng, haú yuq gi, haí le a dat tû táí lo nghut ri.

¹³ Haú hkûn, hkohkâm hpó gi, yhâng é dui-nhâng zoshâng wui lé, 'Yhâng é hkyî loq má tui luí, haú ngaubyi ngaù nhap eq zuì kyik kyik shoq hpuzô nyi râ nghut é shing-gan mauchut hkaú má, dú htoq pyám keq.' gâ ri.

¹⁴ Hkâsu mù gâ le, byù myo myo gi, ji yu é huí kôhlang, hkyin yù huí é bang gi, shaù ri." gâ ri.

Kehtağ Lé Kang Kat Byî É Hkyô

Mrk 12:13-17; Luk 20:20-26

¹⁵ Hau htâng má, Hparishe pé gi, htoq ló kômù, Yhâng é dang pé má mara chyup râ hpaqchyî dâ akô nghut ri.

¹⁶ Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haú bang gi, Yesuq chyáng lé jé kômù, "Sarâ ê, Nàng gi, tengmán sù nghut é eq, Garai Gasâng é hkyô lé, tengmán é đông mho-qshit é sù nghut é lé le, Nàng gi, ó haí ga râ lé le haí su a

ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê.

¹⁷ Haú mù, hkoséng Kehtağ lé kang kat byî le gi, ge lhê lú? A gè lú? Nàng, hkâsu wó myit é hkyô taí kyô wú aq." ga taí akô nghut ri.

¹⁸ Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang ê, nungmoq gi, haí mù, Ngo lé lé chyam wú akô lú?"

¹⁹ Kang kat râ ngùn ht-ingchap rachap, Ngo lé byi wú keq." ga taí kat ri. Haú hkûn, yhangmoq gi, denari rachap yù byî akô.

²⁰ Haú mù, Yhang gi, yhangmoq lé, "Shí má, ó yuq é alhò eq masat laiká dap tô ri lú?" ga myi jáng,

²¹ yhangmoq gi, "Kehtağ é nghut ri." ga tû taí akô. Haú mù, Yhang gi, yhangmoq lé, "Kehtağ é lé gi, Kehtağ lé byi keq; Garai Gasâng é lé gi, Garai Gasang lé byi keq." ga taí kat ri.

²² Haú su gâ é lé, wó gyo kôjáng, haú bang gi, maú byuq kômù, Yhâng chyáng mai htoq ló byuq bekô nghut ri.

Saduke Pé, Yesuq Lé Myî Chyam É Hkyô

Mrk 12:18-27; Luk 20:27-40

²³ Haú nyi má yhang, haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô.

²⁴ Yhangmoq myi kô é gi, "Sarâ ê, 'Myiwe wó é byù rayuq gi, zo dù a dap é za shi

byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê.' ga, nga-nhúng lé, Mosheq taí tô é nghut lhê.

²⁵ Hí hpyang lé, ngamoq chyáng, gumang nhiktâng wui nyhit yuq nyi akô. Lagám yuq gi, myiwe yù luí, zo dù a dap é za yhangmyi lé shi lhuí pyâm to bê nghut ri.

²⁶ Haû eq rajung za, Lanong, Lalaq mai Lahkâ jé shoq, chuimô haú lé gon luí, ó le zo dù a dap é za shi ló byuq bùm bekô nghut ri.

²⁷ Ló htáng má, myiwe myhí haû le châng shi ló byuq bê nghut ri.

²⁸ Haû mù luí, haû dum dui toq é buinyi má, myiwe myhí haû gi, haú nhiktâng wui nyhit yuq mâ é hká yuq é yhangmyi nghut râ lúh? Hkâsu mù gâ le, yhang gi, haú nhiktâng wui banshoq bâng é yhangmyi dut wú bê sù nghut ri." gâ akô.

²⁹ Haú hkûn, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri.

³⁰ Haú dum dui toq é buinyi má gi, myi byi myi yù hkyô joq lo râ a nghut; yhangmoq gi, mauhkûng htoq mâ é mau-mang lagyô pé su dut byuq kó râ nghut lhê.

³¹ Shi é mai dum dui toq bang eq séng luí,

³² Garai Gasang gi, 'Ngò

gi, Abraham é Garai Gasang, Isak é Garai Gasang, Yakup é Garai Gasang nghut lhê.'[☆] ga, nungmoq lé taí tô é lé, nungmoq a nghap wú kó lúh? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lhê." ga taí ri.

³³ Byù moq mó gi, dang haú wó gyo kôjáng, Yhang mho-qshit é hkyô lé maú byuq bum akô nghut ri.

Ahkyak Dik É Jep É Tarâ

Mrk 12:28-34; Luk 10:25-28

³⁴ Saduke pé lé, Yesuq lhoq zím pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zing lé bum akô.

³⁵ Yhangmoq má bo é tarâ sará rayuq gi, Yesuq lé chyam wú é dông,

³⁶ "Sará ê, jep é tarâ má, hká lhum gi, je ahkyak dik lhê lúh?" ga myí ri.

³⁷ Haú mù, Yesuq gi, "Haú Yhumsing náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq èq, chyitdap râ lhê.'[☆] gâ é nghut lhê.

³⁸ Tarâ haú gi, je hí lhum eq je ahkyak dik é lhum nghut lhê.

³⁹ Hau htang lhum le haú eq du é nghut mù, 'Náng gûng lé nàng chyitdap é su, náng é chyangnâm mâ é bang lé le chyitdap aq.'[☆] gâ é nghut lhê.

40 Tarâ haû í lhum gi, jep é tarâ banshoq eq myiqhtoi laiká banshoq é dangchyûng nghut lhê." ga, yhang lé taí kat ri.

Hkrisduq Gi, Ô Yuq É Yhangzo?

Mrk 12:35-37; Luk 20:41-44

41 Hparishe pé zup zîng to kô é hkûn, Yesuq gi, yhangmoq lé,

42 "Nungmoq gi, Hkrisduq eq séng luí hkâsu myit ngam akô lhú? Yhang gi, ó yuq é yhangzo nghut lhê lhú?" ga myi jáng, yhangmoq gi, "Dawiq é yhangzo nghut ri." ga tú taí akô.

43 Haû mù, Yhang gi, yhangmoq lé, "Haú hkûn, Dawiq gi, Woi-nyí dông mai, Yhang lé, 'Yhumsîng' ga, haí mù wut lhê lhú? Hkâsu mù gà le, Dawiq taí é gi,

44 'Haû Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq,

Ngá é loqyo hkyam shut zung nyí shi aq." ga taí ri.*

45 Haû mù, Dawiq yhang lháng, Hkrisduq lé, 'Yhumsîng' gà é nghut le gi, yhangzo za hkâsu ge nghut râ lhú?" ga taí ri.

46 Haû mù, ó yuq le, dang rahkun lháng a wó tú taí lo kô é nghut mù luí, haú nyí mai, ó yuq lháng Yhang lé dangmyi a wám myi lo kó nghut ri.

23

Tarâ Sará Pé Eq Hparishe Pé Lé Sidiq Râ Hkyô

Mrk 12:38-40; Luk 11:37-52; 20:45-47

1 Hau htâng, Yesuq gi, byu moq mó eq Yhâng é chángzô pé lé taí é má,

2 "Tarâ sará pé eq Hparishe pé gi, Mosheq é tanghkuq má zung akô.

3 Haû mù, yhangmoq mhoqshit é hkyô chângjup lé, nungmoq châng kut ra kó râ nghut lhê. Nghut kôlháng, yhangmoq kut é dông gi, hkâkut kó; hkâsu mù gà le, yhangmoq gi, yhangmoq taí é dông a kut kó nghut ri.

4 Yhangmoq gi, byu pé é goqsân má wòlai ke byi kôlháng, yhangmoq yhang gi, wò hau pé lé bo waq râ matú, loqnyhui lháng a kâm lhoq tuí kó nghut ri.

5 Yhangmoq kut é hkyô lhunglháng gi, byu pé myàng râ matú za kut shit é nghut akô; haû chyúmbun bo é showuî-htûng pé lé lhoq kô yù kômù, buhîng pé mâ é banbyaú pé lé lhoq hing yu akô nghut ri;

6 yhangmoq gi, poí pé mâ é réng é jowò pé eq tarajong pé mâ é ahkyak dik é zûng jang pé má, myang zûng râ lé ô nau nyi akô;

7 yhangmoq gi, gai pé má lhom shi-kyâm yù kó râ eq, byu pé mai, yhangmoq lé, 'Rabai'* ga lhom wut kó râ lé ô nau nyi bum akô.

* 22:44 Hkya-on 110:1 * 23:7 Aramaik dang dông *rabai* gà é gi, sará gà é lichyúm nghut lhê.

⁸ Nungmoq kúm gi, 'Rabai' ga wut râ lé hkâ-ô nau kó; hkâsu mù gà le, nungmoq gi, sará rayuq za wó lhê nghut é htoq agó, nungmoq ban-shoq bang gi, gumang chyat ru nghut lhê.

⁹ Haû mù, myidàm htoq má, ó yuq lé le, 'âwa' hkâ-nghû kó; hkâsu mù gà le, mauhkûng htoq mâ é Íwa rayuq za, nungmoq é Íwa nghut lhê.

¹⁰ Hau htoq agó, 'sarâ' ga wut râ lé, hkâ-ô nau kó; hkâsu mù gà le, Hkrisduq za, nungmoq é Sará nghut lhê.

¹¹ Nungmoq mâ é je gyaú sù gi, nungmoq é dui-nhâng zoshâng dut râ nghut lhê.

¹² Hkâsu mù gà le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê, yhumsing gùng lé lhoq nyhûm sù kúm gi, waq toq é hui râ nghut lhê.

¹³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, byu pê hí má, mauhkûng mingdán hkyô lé xaû tô akô; nungmoq yhang le a wàng kó, wàng nau nyi bang lé le a wàng nhâng kó nghut ri.

¹⁴ (Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, chuimó pê é yhûm-yò pé lé hpyoq zo hpyoq shuq é eq kyû hîng hîng dùng shit mhaû é bang nghut akô; haû mù, dam byí é je myo hui zo kó râ

nghut lhê.)†

¹⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, byù rayuq lé nungmoq é noqkuq htûng má wó lhoq lhik yû râ matú, myì hkyô, wuì hkyô, châng jón wún kômù, wó lhoq lhik yu é sù lé gi, nungmoq su ngaraí byù í tú shuì dut akô nghut ri.

¹⁶ Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhûm lé lang luí dakam é sù gi, haí a ra; noqkuq yhûm mâ é hîng lé lang mù dakam é sù kúm gi, cháng ra bê.' ga lhaq taí akô.

¹⁷ Myoqjit é byù nâ pé ê! Haû hîng eq hîng lé lhoq yúnglhô é noqkuq yhûm gi, hká lhum je ahkyak lhê lú?

¹⁸ Hau htoq agó, nungmoq gi, 'Haû hkungga gyap lé lang luí dakam é sù gi, haí a ra, nghut kôlhang, haû hkungga zè lé lang mù dakam é sù gi, cháng ra bê.' ga le, lhaq taí akô nghut ri.

¹⁹ Myoqjit pé ê! Haû hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lú?

²⁰ Haû mù, haû hkungga gyap lé lang luí dakam é sù gi, haû hkungga gyap eq hau é ahtoq má ke tô é zè banshoq lé lang luí dakam é sù dut bê nghut ri.

²¹ Noqkuq yhûm lé lang luí dakam é sù gi, haû noqkuq yhûm eq haú má nyi é Sù lé

† 23:14 Chyúmding ra-am má gi, bun zo 14 shi a bo é nghut lhê.

lang luí dakam é sù dut bê nghut ri.

²² Hau htoq agó, mauhkûng lé lang luí dakam é sù gi, Garai Gasâng é tanghkuq eq haú má zung é Sù lé lang luí dakam é sù dut bê nghut ri.

²³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, xunmân nghut é gau-tsang shingtón, bantsái, hpakkyí pé mâ é xê gambùm ragambùm lé gi, byí nyi kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaí pyâm tô akô nghut ri. Hí lhum lé kut é su, htang lhum lé le kut râ lhê.

²⁴ Hkyô-u she é myoqjit pé ê! Nungmoq, pyup lé gi, jân pyám kômù, gola-uq lé gi, myui pyâm akô nghut ri.

²⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing maiwáng zat é myit byíng zan tô ri.

²⁶ Hparishe myoqjit pé ê! Zo hkoq shuq góm é ahte lé hí chí yúng pyám keq, haú jáng, ahtoq le sân-yúng râ nghut lhê.

²⁷ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, but hpyu tô é lup pé eq du akô; haú pé gi, ahtoq má wú yúng kôhlang, ahkaú

má gi, mâng bup showui pé eq achaq achyut é chângiup byíng tô é nghut ri.

²⁸ Haú eq rajung za, nungmoq gi, byu pé hí má, ahtoq pyâm dingmán é su kut shit kôhlang, ahkaú má gi, gegùn labyoq kut é eq agè ashop é hkyô pé byíng zan tô ri.

²⁹ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, myiqhtoí pé é lup lé luqtsuq tsuq kômù, dingmán bâng é lup pé lé mhón byi kôluí,

³⁰ Ngamoq gi, ngamoq é íchyí íwa pé é ípyat má nyi âng é ru nghut le gi, haú myiqhtoí pé é sui lhoq shun é bang má, ngamoq bo lòm râ a nghut.' ga lhaq taí akô.

³¹ Haú su mù, nungmoq gi, haú myiqhtoí pé lé sat pyám bâng é awut ashín pé nghut é hkyô lé, nungmoq gùng nungmoq saksé hkam yu nyi akô nghut ri.

³² Haú mù, nungmoq é íchyí íwa pé hí tô é muzó lé, ban-shoq châng kut pán keq!

³³ Lhangmui pé ê, duq htân lhangmui amyú pé ê! Ngarai mîng é dam byi hkyô mai, hkâsu wó hfang lut kó râ lúh?

³⁴ Hau é yanmai, myiqhtoí pé, hpaqchyí bò bang eq chyúm sará pé lé, Ngò, nungmoq chyáng nhang kat râ nghut lhê. Haú bang mâ é ra-am lé gi, nungmoq lhom sat pyám mù, tapzîng má jén pyám kó râ nghut lhê; ra-am lé gi, nungmoq é tarajong pé má, nhuq bat kômù, ra-

myuq htâng ra-myuq châng hkat zing-rî wún kó râ nghut lhê.

³⁵ Hau é yanmai, haû dingmán sù Abelaq é sui mai hî luî, noqkuq yhûm eq hkungga gyap gyoro má nungmoq sat pyâm é, Berehkiq é yhangzo Zahkariq é sui jé shoq, myidâm htoq má shun pyâm é dingmán bang banshoq é sui gi, nungmoq é ahtoq má jé lô râ nghut lhê.

³⁶ Ngò, nungmoq lé teng za taí kôlé, shí hkyô banshoq gi, ipyat shi é ahtoq má jé râ nghut lhê.

³⁷ Yerusalem ê, Yerusalem ê, myiqhtoî pé lé sat pyâm pyâm kut mù, náng chyáng nhang kat é bang lé luqgok eq dú sat sat kut é myuq nàng ê, woqzìng gi, yhangzô pé lé, yhâng é dùng hkaû má tsìng lhûng yu é su, nungzô pé lé, Ngò, hkâ-myhó dâm shuí tsìng yù naù kôlhang, nàng a dóng nghut ri.

³⁸ Wú keq, nungmoq é yhûm gi, nungmoq é matú chamchuyiui dut pyâm to berâ nghut lhê.

³⁹ Hkâsu mù gâ le, Ngò, nungmoq lé taí kôlé, 'Yhums-ìng é myìng mai jé lé lo é Sù gi, hkungsô wó nyî sháng gaq.'* ga, nungmoq a taí taí gi, Ngo lé wó myâng kó râ a nghut lo." gâ ri.

24

Ló Htâng Buinyì Má Dut Lò

* 23:39 Hkya-on 118:26

Râ Hkyô

Mrk 13:1-31; Luk 21:5-33

¹ Yesuq gi, noqkuq yhûm mai htoq e ló é u lé, Yhâng é chángzô pé gi, Yhâng é nàm má huí lé lô kômù, haû noqkuq yhum é loqmú pé lé tûn shit akô.

² Haû hkûn, Yesuq gi, yhangmoq lé, "Haú pé banshoq lé, nungmoq myang lhê a nghut kó lú? Ngò, nungmoq lé teng za taí kôlé, luqgok haú pé gi, rachâm htoq racham lhang a kê lhum loshoq, hpyoq hpyi pyâm é hui râ nghut lhê." ga taí ri.

³ Yesuq gi, Tsanlun Bùm má zung tô é hkûn, haû chángzô pé gi, yhangmoq baú Yhâng chyáng lé jé kômù, "Haú hkyô pé gi, hkâ-nhám dut lò râ lú? Nàng gyó lé râ hkûn eq ló htâng buinyì má, hkasû é kumlhá htoq lô râ nghut lhê lú? Ngamoq lé taí kyô wú laq." ga, Yhang lé myî akô.

⁴ Haú hkûn, Yesuq, yhangmoq lé tû taí é gi, "Nungmoq lé, ó yuq eq le a wó shuí nghoq sháng gaq, sidiq nyi keq.

⁵ Hkâsu mù gâ le, 'Ngò gi, haû Hkrisduq nghut lhê.' ga, Ngá myìng lé lhang é byù myo myo pò htoq lô mù, byù myo myo lé hkyô shuí nghoq kó râ nghut lhê.

⁶ Nungmoq gi, majan dut nyi é hkyô eq majan eq sêng é danglám pé lé, wó gyo kó râ nghut lhê; nghut kôlhang, hkâgyuq dàn kó. Haú hkyô pé gi, dut lò râ za nghut

lhê; nghut kôlhang, ló htâng é buinyi gi, a nghut shi.

⁷ Byù ra-myû eq ra-myû, mingdán ralhüm eq ralhüm majan zân lhüm lò kó râ nghut lhê. Jowò myo myo má, mutmó gyó é pé eq layàng nún é pé dut lò râ nghut lhê.

⁸ Haú pé gi, wuîhke jamjau hkyo é apûn awang za ru nghut ashî.*

⁹ Haú hkûn, nungmoq gi, zing-rî é eq sat pyâm é hui zo râ matú, ap pyâm é hui kó râ nghut lhê. Byù myû lhunglhang bang gi, Ngá é yanmai, nungmoq lé a ngui kut kó râ nghut lhê.

¹⁰ Haú u lé, byù myo myo gi, lumjîng myit lé tô pyám kômù, rayuq eq rayuq a ngui lhüm dut é htoq agó, rayuq eq rayuq ap pyâm lhüm kó râ nghut lhê.

¹¹ Hau htoq agó, myiqhtoi pyoq pé myo myo pô htoq lô kômù, byù myo myo lé hkyô shuî nghoq kó râ nghut lhê.

¹² Agè ashop é hkyô myô jat lo é yanmai, byù myo myô é chyitdap myit gi, kân ló byuq râ nghut lhê;

¹³ nghut kôlhang, jihtûm jé shoq wó hkam jân nyi é sù gi, hkyi yu é hui râ nghut lhê.

¹⁴ Byù myû banshoq má saksé dut râ matú, haú mingdán eq sêng é gabú danglù lé, mingkan gón má hko kyo râ nghut lhê. Hau htâng má sheq, ló htum buinyi jé râ nghut lhê.

¹⁵ Haú mù luî, myiqhtoi

Danielaq dông mai taî tô é eq rajung za, haú lhoq hten lhoq hpyoq é achaoq achyut hkyô^{*} gi, chyoiyúng jowò má shap tô é lé, nungmoq myàng kó râ nghut lhê. (Chyúmlaiká nghap sù gi, sê gyo sháng gaq).

¹⁶ Haú hkûn, Yuda mau má nyi é bang gi, bùm pé shut hpang doq lò kó sháng gaq.

¹⁷ Yhumhkûng htoq má nyi tô é sù gi, yhúmhaû má é zé haî lé le, a ló gyó wang yù lo sháng gaq.

¹⁸ Yò má nyi tô é sù gi, yhâng é buhîng lé a ló taû yu nyi lo sháng gaq.

¹⁹ Haú buinyi pé má, zogûng dut é myiwe eq náu huq ashî nghut é înu wuî gi, gyai yhang wuîhke jamjau kó râ nghut lhê.

²⁰ Haú nungmoq hpâng rá buinyi gi, gyoqmyò,* a nghut jáng, Bánno buinyi má a ang rá matú, kyûdûng nyi keq.

²¹ Hkâsu mù gâ le, mingkan lé joq é hkûn mai ahkuî jé shoq, hkâ-nhám le a dut wú shî é wuîhke jamjau mó gi, haú buinyi pé má dut lò râ nghut lhê; haú sù é hkyô gi, htângnùng má hkâ-nhám le dum dut lo râ a nghut.

²² Buinyi haú pé lé lhoq shaû pyâm é za a nghut le gi, ó yuq le asak wó lut râ a nghut; nghut kôlhang, Garai Gasang èq hkyin yù hui bâng é matú gi, buinyi haú pé lé, lhoq shaû pyâm byi râ nghut lhê.

²³ Haú ahkyíng má, byù

* 24:8 Esai 19:2 * 24:15 Dan 9:27; 11:31; 12:11 * 24:20 Israelaq mau má gi, gyoqmyò lé hkyô htoq le gyai wuîhke é ahkyíng nghut lhê.

rayuq yuq mai, nungmoq lé, 'Wú keq, shí má Hkrisduq nyi ri.' ga, haû a nghut jáng, 'Wú keq, Yhang hê má nyi ri.' ga taí jáng, nungmoq hkâjáng kó.

²⁴ Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá mó pé eq laklai kumlhá pé lé kut shit kó râ nghut lhê.

²⁵ Gyo keq, shí hkyô a dut shimá, Ngò, nungmoq lé taí kyô nyi gù nghut lhê.

²⁶ Haû mù, rayuq yuq èq, nungmoq lé, 'Yhang gi, yoso má nyi ri.' gâ jáng le, hkâ-ê kó; 'Yhang gi, shí gok hkaû má lúng tô ri.' ga jáng le, hkâjáng kó.

²⁷ Hkâsu mù gâ le, bui htoq hkyam má lhap hpyat é gi, bui wang hkyam má lhang jé shoq duqbó é su, haû Byu Yhangzo jé lé é hkûn le, dut râ nghut lhê.

²⁸ Màng leq é jang má, langdâ pé, lé zîng bùm râ nghut lhê.

²⁹ Buinyi haû pé mâ é wuîhke jamjau lai eq yhang, 'Bui gi, noq byuq mù, lhamó gi, a tsô dut byuq râ nghut lhê;

kyi pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huî bùm kó râ nghut lhê.'^{*}

³⁰ Haû hkûn, haû Byu Yhangzô é kumlhá gi, mauhkûng má htoq shit lô râ nghut mù, myidàm htoq mâ é byù myû lhunglhang gi, yón ngau bùm kó râ nghut lhê. Haû Byu Yhangzo gi, mauhkûng mai, mhut ji mù, hpungwup a-tsam mó eq le, hpungwup shingkang eq le, gyó lé lo é lé, yhangmoq byu-myàng kó râ nghut lhê.

³¹ Hau htâng má, Yhang gi, Yhâng é maumang lagyô pé lé, tut htê mó èq nhang kat luî, yhangmoq gi, maumyî chyûn myi chyûn eq mauhkûng rahkyam mai, gó hkyam htum shoq mâ é, Yhang hkyin yu tô é bang lé shuî tsîng yù kó râ nghut lhê.

³² Maihpáng gâm lé wú mù, mhoq yû keq; agàm mai anyuq nyún lô mù, ahaqhtut lô jáng, bui nyé nám chyâng lò bê lé, nungmoq sê lhê.

³³ Haû eq rajung za, shí hkyô banshoq[†] lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyi bê hkyô lé, nungmoq sé lo keq.

³⁴ Ngò, nungmoq lé teng za taí kôlé, shí pyat mâ é byu pé a ban shi byuq shimá, haû hkyô pé[‡] banshoq dut byuq râ nghut lhê.

³⁵ Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyi râ nghut

^{*} 24:29 Esai 13:10; 34:4 † 24:33 Shí hkyô banshoq gâ é gi, Yesuq jé lé râ hí má dut râ hkyô pé lé taí é nghut lhê. ‡ 24:34 Haû hkyô pé gâ é gi, Yerusalem noqkuq yhûm htên byoq râ lé taí é nghut lhê.

lhê.

*Haû Buinyi Eq Ahkyíng Lé,
Ó Le A Sé*

Mrk 13:32-37; Luk 17:26-30, 34-36; 12:35-48

³⁶ Buinyi eq ahkyíng haú lé gi, ó yuq le a sé; mauhkûng htoq mâ é maumang lagyô pé lhang a sé; haû Zo le a sé; haû Íwa za ru sê lhê.

³⁷ Noaq é tsín pyat má dut é su, haû Byu Yhangzo lé lo é hkûn le, dut râ nghut lhê.

³⁸ Hkâsu mù gâ le, dowuí a dítng shî é buinyi pé má, byu pé gi, Noaq, wuì-sanghpo mó hkaû má wang é hkûn jé shoq, zo zo shuq shuq, myi byi myi yû, kut nyi bum akô nghut ri;

³⁹ yhangmoq gi, dowuí dítng lô mù, yhangmoq banshoq lé ùm sat pyâm é hkûn jé shoq, haí dut lò râ lé, a sé kó dut bùm é su, haû Byu Yhangzo lé lo é hkûn le, dut râ nghut lhê.

⁴⁰ Haú hkûn, yò má rahá nyi tô é byù í yuq mâ é rayuq gi, shuí yu é hui mù, rayuq gi, myit gyó to râ nghut lhê.

⁴¹ Luqluí chôm llang nyi é myiwe í yuq mâ é rayuq gi, shuí yu é hui mù, rayuq gi, myit gyó pyâm to râ nghut lhê.

⁴² Haû su mù, haû nungmoq é Yhumsíng gi, hká nyí jé lé lô râ lé, nungmoq a sê kô é yanmai, sidiq machya nyi keq.

⁴³ Myín hká u má hkau sù jé lé lò râ lé, yhumsíng sê é ru nghut le gi, yhang é yhûm má a wó hput wâng nhâng loshoq, yhang machya nyi râ

nghut é lé, nungmoq sê gyô nyi keq.

⁴⁴ Haû mù, nungmoq le rì rì nghut nyi keq; hkâsu mù gâ le, haû Byu Yhangzo gi, a bûn nùng má jé lé lô râ nghut lhê.

⁴⁵ Yhumsíng hpô é dui-nhâng zoshâng wuì lé, uphkâng râ eq ahkyíng jé jáng zoshuq gàm byi râ matú, yhumsíng hpô eq mù nhang tô é, lhumzui luí, hpaqchyí bo é dui-nhâng zoshâng gi, ó yuq nghut râ lú?

⁴⁶ Yhumsíng hpó dum taù lo é hkûn, haû su kut nyi llang é dui-nhâng zoshâng gi, hkungsô wó nyi ri.

⁴⁷ Ngò, nungmoq lé teng za tai kôlé, yhumsíng hpó haú gi, yhang é sutzè banshoq, dui-nhâng zoshâng haú yuq lé ap to râ nghut lhê.

⁴⁸ Nghut kôlhang, laqmá mù, dui-nhâng zoshâng haú yuq gi, agè ashop sù nghut luí, 'Ngá é yhumsíng hpó jé lô râ gyai myáng ashî.' ga, yhang é i-myt unghkaû má myit yù mù,

⁴⁹ gotû dui-nhâng zoshâng luzúm wuì lé nhuq bat é htoq agó, î shuq wut bang eq rahá zo zo shuq shuq kut nyi é nghut le gi,

⁵⁰ dui-nhâng zoshâng hau é yhumsíng hpó gi, yhang a myitngam tô é buinyi eq yhang a sê tô é ahkyíng má jé lô mù,

⁵¹ yhang lé jap pyám luí, gegùn labyoq kut bang hkâm zô é, ngaubyi ngaù nhap eq zuì kyik kyik shoq hpuzô nyi râ jowò má hkyô pyám râ nghut lhê.

25

Zomyi Raxê Yuq Lé Dangtú Yu É Hkyô

¹ Haú hkûn, mauhkûng mingdán gi, myibung yu chûng mù, lusik lé te yù râ ga, htoq e ló é zomyi raxê yuq eq pûng râ nghut lhê.

² Haú bang má, ngo yuq gi, nhik a gyîng kó; ngo yuq gi, nhik gyîng akô nghut ri.

³ Haú nhik a gyîng é bang gi, myibung yu chûng kôlhang, xû a yu chûng kó nghut ri.

⁴ Nghut kôlhang, haú nhik gyîng é bang kúm gi, yhangmoq é myibung lé le, xû bo é bòng lé le yu chung akô nghut ri.

⁵ Lusik jé lé lô râ myáng nyi é yanmai, yhangmoq ban-shoq bang gi, yhup mui lò kômù, yhup myhî byuq bekô nghut ri.

⁶ Myín gunggàm jé jáng, 'Lusik jé bê ô! Yhang lé te yù râ matú, htoq lé lô keq hkoi ô! ga, garú é htê htoq lo ri.

⁷ Haú hkûn, zomyi haú bang ban-shoq gi, toq lô mù, yhangmoq é myibung lé hen lajâng akô nghut ri.

⁸ Haú nhik a gyîng bang gi, 'Ngamoq lé, xû ratsuí byi kó laq; hkâsu mù gâ le, ngamoq é myibung shi ló nyi ri.' ga, haú nhik gyîng bâng chyáng dúng akô.

⁹ Haú hkûn, haú nhik gy-ing bang gi, 'Nungmoq eq ngamoq é matú ga jáng, luq râ a nghut. Haú mù, nungmoq é matú, xû ung bâng chyáng ê wui yù keq.' ga tû taí kat akô.

¹⁰ Yhangmoq, xû wui e ló kô é hkûn, lusik gi, jé lé lô mù, haú rì rì hen tô é zomyi wui gi, yhang eq rahá myiháng poí má wang ló bekô. Hkum le myhî byuq bê nghut ri.

¹¹ Hau htâng má, hau htâng gyó tô é zomyi wui gi, tau jé lô kômù, 'Yhumsîng ê! Yhumsîng ê! Ngamoq lé, hkum hpóng byi laq ô!' ga taí akô.

¹² Nghut kôlhang, haú lusik gi, 'Ngò, nungmoq lé teng za taí kôlé, nungmoq lé ngò a sé.' ga tû taí kat ri.

¹³ Haú mù luí, haú Byu Yhangzo jé lé râ buinyi eq ahkyîng lé, nungmoq a sé kô é yanmai, sidiq machya nyi keq.

Dui-nhâng Zoshâng Sum Yuq Lé, Dangtú Yu É Hkyô Luk 19:11-27

¹⁴ Mauhkûng mingdán gi, byù rayuq byìn we htoq râ hen nyi é nghut mù, yhâng é dui-nhâng zoshâng wui lé wut yù luí, yhâng é sutzè lé ap byi to sù eq pung ashî nghut ri.

¹⁵ Yhang gi, yhangmoq é atsam má cháng luí, rayuq lé gi, ngùn ngo joí, rayuq lé gi, í joí, htâng rayuq lé gi, rajoí kut byi to mù, byìn we shut htoq ló byuq bê nghut ri.

¹⁶ Ngùn ngo joí wó yû sù gi, haú hkûn jáng htoq ló mù, hpugá gá luí, ngùn ngo joí wó myat yù bê nghut ri.

¹⁷ Haú eq rajung za, ngùn í joí wó yû sù le, í joí wó myat yù bê nghut ri.

¹⁸ Nghut kôlhang, rajoí za wó yû sù gi, htoq e ló mù,

myigùng má du luí, yhâng yhumsing hpô é ngùn lé haq myhup tô ri.

¹⁹ Hau htâng tsómra myáng jáng, dui-nhâng zoshâng haú bâng é yhumsing hpó gi, dum taú jé lô mù, yhangmoq é ngùn chyarâng lé, lo jep ri.

²⁰ Ngùn ngo jói wó yú sù gi, amyat ngo jói lé le yu lé lô mù, 'Yhumsing ê, nàng, ngo lé, ngùn ngo jói ap tô é nghut lhê. Wú aq, amyat ngo jói wó ho jat yù bê.' ga taí ri.

²¹ Haú hkún, haú yhumsing hpó gi, 'Arâ! Nghut bê. Nàng gi, kyet é eq lunging é dui-nhâng zoshâng nghut ri! Tiq é mú má lhang wó lum é sù nghut é yanmai, ngò, nang lé, kô é mú lé le ap byi râ nghut lhê. Náng yhumsing hpô é gabú hkyô má bo wang lòm aq hkoil!' ga tú taí ri.

²² Haú eq rajung za, í jói wó yú sù le, lé lô mù, 'Yhumsing ê, nàng, ngo lé ngùn í jói ap tô é nghut lhê. Wú aq, amyat í jói wó ho jat yù bê.' ga, lé taí ri.

²³ Haú hkún, haú yhumsing hpó gi, 'Arâ! Nghut bê. Nàng gi, kyet é eq lunging é dui-nhâng zoshâng nghut ri! Tiq é mú má lhang wó lum é sù nghut é yanmai, ngò, nang lé, kô é mú lé le ap byi râ nghut lhê. Náng yhumsing hpô é gabú hkyô má bo wang lòm aq hkoil!' ga tú taí ri.

²⁴ Hau htâng, rajoí wó yú sù le, lé lô mù, 'Yhumsing ê, nàng gi, byù wui nghut mù, yhumsing a hô tô é jang mâ é shú yù nau é htoq agó, yhumsing, kyôshi a sân hkyô

tô é jang mâ é tsing yù nau sù nghut é lé, ngò sê lhê.

²⁵ Haú mù, ngò gi, gyuq luí, htoq ê mù, nàng é ngùn lé, myigùng má é haq myhup tô é nghut lhê. Wú aq, shí gi, nàng é ngùn nghut lhê.' ga taí ri.

²⁶ Haú mù, yhumsing hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsing a hô tô é jang mâ é shú yù nau é eq, yhumsing, kyôshi a sân hkyô tô é jang mâ é tsing yù nau sù nghut é lé, nàng sê to gù nghut le nhing,

²⁷ ngá é ngùn lé, ngò dum taú jé lô jáng, aráng eq amyat wó yú shoq, ngùn hpún kat jang má, haí mù a kat tô é lúh?

²⁸ Haú mù, haú ngùn rajoí lé, nàng chyáng mai yù luí, raxê jói wó to sù lé, byí pyám nhâng râ nghut lhê.

²⁹ Hkâsu mù gâ le, wó sù ó yuq lé nghut kôle, yhang agùn agó wó râ matú, jat byi râ nghut lhê. A wó su chyáng mai kúm gi, yhang wó tô é lé lhang yu pyám byi shirâ nghut lhê.

³⁰ Haú mù, haú akyú a bo é dui-nhâng zoshâng lé gi, ngaubyi ngaù nhap eq zuì kyik kyik shoq hpuzô nyi râ jowò nghut é, shinggan mauchut hkaú má dú htoq pyám keq.' gâ ri.

Sau Eq Bainám

³¹ Haú Byu Yhangzo gi, Yhâng é hpungwup shingkang mai, maumang lagyo lhunglhang bang eq rahá jé lé lo é hkún, Yhâng é hpungwup shingkang bo é

hkohkâm-tanghkuq htoq má zùng râ nghut lhê.

32 Haú hkûn, byù myû chângjup gi, Yhâng é hí má zîng lé lo bùm kó râ nghut mù, Yhang gi, sau zúng sù mai, sau eq bainám lé gotû tû kut gam hkoq é su, byu pé lé gam hkoq pyám râ nghut lhê.

33 Yhang gi, sau pé lé, loqyo hkyam shut, bainám pé lé, loqpaí hkyam shut kut, nyhi to râ nghut lhê.

34 Hau htâng má, haû Hkohkâm gi, Yhâng é loqyo hkyam shut mâ é bang lé, 'Ngá Wâ chyáng mâ é shimân jeju hkam yu é hui bang ê, lé keq; mingkan lé hpan é hkûn mai, nungmoq é matú ga hen lajâng tô é muì mingdán má wang ló keq.

35 Hkâsu mù gâ le, Ngò zòmut é u lé, nungmoq, Ngo lé byi tso kô é nghut lhê; Ngò wuìshit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê;

36 Ngò gùngchîn dut é u lé, nungmoq, Ngo lé byi hut kô é nghut lhê; Ngò nõhpyo huì é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga táí râ nghut lhê.

37 Haú hkûn, haû dingmán bang gi, Yhang lé, 'Yhumsîng ê, Nàng zòmut huì é lé, ngamoq, hkâ-nhám myàng luì, byi tsô wú é lhú? Nàng wuìshit é lé, ngamoq, hkâ-nhám myàng luì, byi huq wú é

lhú?

38 Nàng bíng kut wún é lé, ngamoq, hkâ-nhám myàng luì, lhom hkulum wú é lhú? Nàng gùngchîn dut é hkûn, ngamoq, hkâ-nhám byi hut wú é lhú?

39 Nàng nõhpyo huì é lé le, htóng lúng é lé le, ngamoq, hkâ-nhám myàng luì, lé gon lé kum wú é lhú?' ga myi kó râ nghut lhê.

40 Haú hkûn, haû Hkohkâm gi, 'Ngò, nungmoq lé teng za tái kôlé, shî, Ngá gumang wui mâ é je tiq sù lé, nungmoq kut byi é hkyô hái le, Ngo lé kut byi é nghut bê.' ga tû tái râ nghut lhê.

41 Hau htâng má, Yhang gi, Yhâng é loqpaí hkyam shut mâ é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pé é matú hen tô é, ahtum abyuq é myi má wang ló keq.

42 Hkâsu mù gâ le, Ngò zòmut é u lé, nungmoq, Ngo lé a byi tso kó; Ngò wuìshit é u lé, nungmoq, Ngo lé a byi huq kó;

43 Ngò bíng kut wún é u lé, nungmoq, Ngo lé a lhom hkulum yù kó; Ngò gùngchîn dut é u lé, nungmoq, Ngo lé, mebu a byi hut kó; Ngò nõhpyo huì é eq htóng lúng é u lé, nungmoq, Ngo lé a gon kó nghut ri.' ga táí râ nghut lhê.

44 Haú hkûn, yhangmoq gi, 'Yhumsîng ê, nàng zòmut wuìshit é, bíng kut wún é, gùngchîn dut é, nõhpyo huì é eq htóng lúng é lé, ngamoq, hkâ-nhám myàng luì, a wú

gon kut wú é lhú?' ga taû myi kó râ nghut lhê.

⁴⁵ Haú hkûn, Yhang gi, 'Ngò, nungmoq lé teng za taí kôlé, shí bang mâ é je tiq sù lé, nungmoq, a kut byî é hkyô haî le, Ngo lé a kut byî é nghut bê.' ga, yhangmoq lé tû taí râ nghut lhê.

⁴⁶ Haú mù luî, haú bang gi, ahtum abyuq mara dam byî é má wang ló kó râ nghut lhê; haú dingmán bang kúm gi, ahtum abyuq é asak má wang ló kó râ nghut lhê." ga Yesuq taî ri.

26

Yesuq Lé, Sat Râ Da Kô É Hkyô

Mrk 14:1-2; Luk 22:1-2; Yhn 11:45-53

¹ Yesuq gi, haú hkyô pé lé ban taí é htâng má, Yhâng é chángzô pé lé,

² "Nungmoq sê tô é eq rajung za, í nyí laî é htâng má, Lhoqlhai Poî jé râ nghut mù, haú Byu Yhangzo gi, tapzîng má jén sat é hui râ matú, ap pyâm é hui râ nghut lhê." ga taî ri.

³ Haú u lé, hkyangjong agyi pé eq suwún wuî gi, Kayahpaq gâ é hkyangjong mó rayuq é yhumwàng má zup zîng to kômù,

⁴ Yesuq lé haq chyup yû râ eq sat pyâm râ hkyô lé, hpyê lhùm bum akô nghut ri.

⁵ Nghut kôlhang, yhangmoq gi, "Byu pé gabyông lò kó abe, poî gyoro má gi, a kut shí sháng." ga, taî lhùm akô nghut ri.

Yesuq, Xû Hut Gyun Huî É Hkyô

Mrk 14:3-9; Yhn 12:1-8

⁶ Yesuq gi, Behtani wà má nyi é manggâm dap wú sù Simûn é yhùm má nyi tô é hkûn,

⁷ myiwe myhí rayuq gi, gyai hpaû é namngón xû bo é luq hpyû bông yu lé lô mù, Yesuq zo shuq nyi é hkûn, namngón xû haú lé, Yhâng é ulhum má hut gyun byî ri.

⁸ Haú hkyô lé, haú chángzô pé myàng kôjáng, wú nhik-yo kômù, "Haî mù luî, haú lé aha agô kut pyâm lhê lhú?"

⁹ Xû haú lé, ahpaû myo myô eq ûng pyâm mù, myùng bang lé byî le ge lhê mhaî!" ga taí kat akô.

¹⁰ Yesuq gi, haú hkyô lé sé luî, "Haî mù, myiwe zo haú lé, i-myt lhoq myô nyi akô lhú? Yhang gi, Ngá é ahtoq má ge é hkyô kut bê nghut ri.

¹¹ Haú myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut.

¹² Yhang, Ngá gûng má namngón xû hut gyûn é gi, Ngá gûng lé yhum râ matú, hen lajâng é hkyô nghut ri.

¹³ Ngò, nungmoq lé teng za taí kôlé, haú gabú danglù lé, mingkan gón hko kyô é jowò hkangmó má, yhang lé myit bûn é dông, yhang kut é hkyô shî lé, taí kyo bekô râ nghut lhê." ga taí kyo ri.

Yesuq Lé, Yudaq Êq Ung Zô

*Pyâm É Hkyô**Mrk 14:10-11; Luk 22:3-6*

14 Hau htâng, haû chángzo raxe í yuq má bo é Yudaq Iskarut ga sù gi, hkyangjong agyi pê chyáng ê mù,

15 "Ngò, Yesuq lé nungmoq é loq má ap byí é nghut jáng, nungmoq, ngo lé haí byi kó râ lúhù?" ga myí ri. Haû mù, yhangmoq gi, yhang lé ngùn denggá sum xê chap nghap byí akô.

16 Haû hkûn mai, Yudaq gi, Yesuq lé ap pyám râ hkyô ho nyi bê nghut ri.

*Yhumsing É Myinzang**Mrk 14:12-26; Luk 22:7-23; Yhn 13:21-30*

17 Múnchi a kat é Muk Zo Poí sâng-hi nyí má, haû chángzô pé gi, Yesuq chyáng lé lô kômù, "Nàng zo râ Lhoqlhai Poí zoshuq lé, ngamoq hkâmá món to râ lúhù?" ga myí akô.

18 Haû mù, Yhang gi, "Myuq hkaû shut wang ló mù, byù rayuq chyáng ê luí, haû yuq lé, 'Ngá é ahkyíng chyáng bê; Ngá é chángzô pé eq rahá, Ngò, náng é yhùm má Lhoqlhai Poí kut râ nghut lhê.' gâ Sará taí ri nghù, ê taí keq." ga pying kat ri.

19 Haû mù, haû chángzô pé gi, Yesuq pying kat é eq rajung za ê taí kômù, Lhoqlhai Poí lé món to bekô nghut ri.

20 Myinhtâng jé lô jáng, Yesuq gi, haû chángzo raxe í yuq eq rahá, zohpoq má zung tô ri.

21 Yhangmoq zô nyi bùm kô é u lé, Yesuq gi, "Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lhê." ga taí ri.

22 Haû hkûn, yhangmoq gi, gyai gyô yón kômù, rayuq htâng rayuq, "Yhumsing ê, ngò a nghut hkaí?" ga, Yhang lé chôm myí akô.

23 Haû hkûn, Yesuq gi, "Ngò eq rahá, hkoq shí má loq lap bê sù gi, Ngo lé ap pyám râ sù nghut lhê.

24 Haû Byu Yhangzo gi, Yhang eq séng luí kâ tô é eq rajung za, shí râ za nghut lhê. Nghut kôlhang, haû Byu Yhangzo lé ap pyám é sù gi, dingnyé wó ri; haû yuq gi, a hku lé le lhang, je ge ri." ga dum taí kat ri.

25 Hau htâng, Yhang lé ap pyám râ sù, Yudaq gi, "Rabai ê, ngò a nghut hkaí?" ga myi jáng, Yesuq gi, "Nàng nghut ri." ga tû taí kat ri.

26 Yhangmoq zô nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byí ri.

27 Hau htâng, Yhang gi, góm lé le, yù mù, jeju hkya-on luí, yhangmoq lé byi mù, taí é gi, "Nungmoq banshoq bang, shuq keq.

28 Shí gi, yubak mara hkyut pyám byi râ, byù myo myô é matú htoq pyám é, dangshikaq eq séng é Ngá sui nghut lhê.

29 Ngò, nungmoq lé tái kôlé, ahkuí mai gi, Ngò, Ngá Wá é mingdán má, nungmoq eq rahá tsibiyiq wing asik lé shuq é buinyi a jé jé, tsibiyiq wing lé dum shuq rá a nghut lo." ga tái ri.

30 Yhangmoq gi, hkya-on mahkôn ralhum ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Lé, Te Tai É Hkyô

Mrk 14:27-31; Luk 22:31-34; Yhn 13:36-38

31 Hau htâng má, Yesuq gi, yhangmoq lé, "Nungmoq lhunglhang bang gi, hkû-myîn yhang jáng, Ngá é yanmai, myit lingbat kó rá nghut lhê; hkâsu mù gâ le,

'Haû sau zúng sù lé, Ngò bat sat pyám mù, sau hpúng mâ é sau pé gi, lhoq pyo pyâm é hui kó rá nghut lhê.'^{*}
ga kê tô ri.

32 Nghut kôlhang, Ngò gi, lhoq dui toq é huí htâng má, Galile mau shut, nungmoq é hí má e ló lángrá rá nghut lhê." gâ ri.

33 Haú hkûn, Petruq gi, "Náng é yanmai, góbang ban-shoq myit lingbat kôlhang, ngò gi, hkâ-nhám le myit lingbat rá a nghut." ga tû tái ri.

34 Yesuq gi, "Ngò, nang lé teng za tái lé, hkû-myîn yhang jáng, woq a tûn shimá, nàng, Ngo lé sum dâm he-ngik pyám rá nghut lhê." ga tû tái ri.

35 Nghut kôlhang, Petruq gi, "Ngò, Nàng eq rahá shî râ dut kôlhang, Nang lé ngò he-ngik pyám rá a nghut." ga saí tái ri. Haû chángzô pé góbang banshoq le, haû su ga châng tái bum akô nghut ri.

Get-samane Gâ É Jowò Má Kyûdûng É Hkyô

Mrk 14:32-42; Luk 22:39-46

36 Hau htâng má, Yesuq gi, Yhâng é chángzô pé eq rahá Get-samane gâ é jowò má ê kômù, yhangmoq lé, "Ngò, hé má ê mù, kyûdûng nyi é u lé, nungmoq shí má zúng lángrá keq." ga tái ri.

37 Yesuq gi, Petruq eq Zebedi yhangzô nhik lé shuí chûng ri. Yhang gi, myit gyai a ngón é eq myit wui nhik hkyik dut lò bê nghut ri.

38 Hau htâng, Yhang gi, yhangmoq lé, "Ngò gi, shî rá í yhang myit yón nyi ri; nungmoq gi, Ngò su machyâ luí, shî má lángrá nyi keq." ga tái ri.

39 Yesuq gi, haû mai ratsuí zo sô ê mù, myigùng má ngóm gop to luí, "Áwa ê, wó dut é nghut le gi, góm* shí lé, Ngá chyáng mai lhai pyám byi laq. Nghut kôlhang, Ngò ô nau é dông a nghut, Nàng ô nau é dông sheq nghut sháng gaq." ga kyûdûng ri.

40 Hau htâng, Yhang gi, Yhâng é chángzô pé chyáng dum taû lo le, yhangmoq yhup myhî to kô é lé lo myàng ri. Haû mù, Yhang gi, Petruq

* 26:31 Zhk 13:7 * 26:39 Góm gâ é gi, Yesuq, jamjau hui rá hkyô eq shî rá hkyô lé, tái nau é nghut lhê.

lé, "Nungmoq gi, hkyíng hkum rahkum za lhang, Ngò eq rahá a wó machya nyi kó lú?"

41 Gunglaú é a hui sháng gaq, machyâ luí, kyûdûng nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga taí ri.

42 Yhang gi, radâm dum ê mù, "Áwa ê, góm shí lé, Ngò a shuq é a wó lai râ nghut jáng gi, Nàng ô nau é dông nghut sháng gaq hkoi." ga kyû dum dûng ri.

43 Yhang dum taú lo le, yhangmoq gi, myoqkuq lai kô é yanmai, yhup myhî to lánng kô é lé, lo dum myàng ri.

44 Haú mù, Yhang gi, yhangmoq lé tô pyâm to mù, sum dâm nghû râ dâm dum ê luí, hí lé dûng é dang lé roq é dum dûng ri.

45 Haú mù, Yhang gi, haú chángzô pè chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lú? Wú keq! Haú ahkyíng gi, jé bê nghut luí, haú Byu Yhangzo gi, yubak dap bâng é loq má ap pyâm é hui râ nghut bê.

46 Toq keq! Ló lo sháng hkoi! Ngo lé ap pyám râ sù gi, jé lé bê nghut ri." ga taí ri.

Yesuq, Chyup Yú Huí É Hkyô

Mrk 14:43-50; Luk 22:47-53; Yhn 18:3-12

47 Yesuq, dáng nyo nyi ashí u lé, haú chángzo raxe í yuq má bo é Yudaq gi, jé lé lo ri; haú hkyangjong agyi pé eq mingbyu é suwún wui chyáng

mai nhang kat é bang nghut é, shâm eq dumbáng pé chung tô é byù moq mó le, yhang eq rahá nghut akô.

48 Yesuq lé ap pyám râ sù gi, haú bang lé, "Ngò, bopuq puq é sù gi, haú yuq nghut bê; Yhang lé chyup yû keq." ga kumlhá byí tô ri.

49 Yudaq gi, Yesuq chyáng hkyê za ê mù, "Rabai ê, wángzán nyi lhê lú?" ga taí luí, Yhang lé bopuq puq byí ri.

50 Haú hkûn, Yesuq gi, "Buinùm hpó ê, nàng kut râ muzó lé kut aq hkoi." ga tû taí kat ri.

Hau htâng, yhangmoq gi, hí shut huí ê luí, Yesuq lé chôm zuí zing mù, chyup yû bekô nghut ri.

51 Haú mù, Yesuq eq rahá nyi bang mâ é rayuq gi, shâm she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

52 Haú jáng, Yesuq gi, haú yuq lé, "Náng é shâm lé, xâng pyám aq; hkâsu mù gà le, shâm shê sù gi, ó yuq nghut kôle, sham eq shí râ nghut lhê.

53 Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byí râ nghut é lé, nungmoq a sé kó lú?

54 Nghut kôlhang, haú su nghut é nghut jáng, shí hkyô dut lò râ nghut lhê ga Chyúmdang pé má bò tô é hkyô gi, hkâsu wó dik lò râ lú?" ga taí kat ri.

55 Hau htâng, Yhang gi, byù moq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chùng mù, lé lo akô lúhú? Ngò gi, nyí wuî, noqkuq yhûm má zùng mù, mhoqshít nyî kôlhang, nungmoq, Ngo lé a chyup yû kô é nghut lhê.

56 Nghut kôlhang, shî su dut é hkyô pé banshoq gi, haû myiqhtoî pé kê tô é hkyô pé lo dik râ matú dut é nghut ri." ga taî ri. Haú hkûn, haû chángzô pé banshoq gi, Yesuq lé tô pyâm to kôluî, hfang byo byuq bekô nghut ri.

Yudaq Byìn Tú Wapdoq Má Jep Huî É Hkyô

Mrk 14:53-65; Luk 22:54-55, 63-71; Yhn 18:13-14, 19-24

57 Yesuq lé chyup yu é bang gi, haû tarâ sará pé eq suwún wuî zup zîng nyi é jang, hkyangjong mó Kayahpaq é yhûm má, Yhang lé shuî e akô.

58 Petruq gi, hkyangjong mó é yhumwàng hkaû má châng jé wâng shoq, we we mai Yesuq htâng châng tô ri. Yhang gi, hkâsu dut lò râ lé myàng naù luî, wâng hkaû má wang ê mù, zúng bang eq rahá zung tô ri.

59 Haú hkyangjong agyi pé eq Yudaq byìn tú wapdoq mâ é góbang gi, Yesuq lé sat pyâm nhâng râ matú, a têng é saksé ho nyi akô.

60 A têng é saksé myo myo htoq lô kôlhang, wó sat râ í é saksé a myàng kó nghut ri.

Ló htáng má, byù í yuq gi, lé lô kômù,

61 "Shí yuq gi, 'Ngò gi, haû Garai Gasâng é noqkuq yhûm lé lhoq hten pyám mù, sum nyí gyoro má dum wó saî lhê,' ga taî sù nghut ri." ga taî akô.

62 Haú hkûn, haû hkyangjong mó gi, toq yap mù, "Nàng, haî le a tú taî luq? Shí bang, Nang lé mara hun nyi é saksé gi, hká đông nghut lhê lúhú?" ga, Yesuq lé myî ri.

63 Nghut kôlhang, Yesuq gi, jit le a ga nyi tô ri.

Haú mù, hkyangjong mó gi, Yhang lé, "Haú rù dui nyi é Garai Gasâng é myìng lé lang luî, ngò, Nang lé myî wú lé: Nàng gi, Garai Gasâng é Yhangzo, Hkrisduq nghut lhê luq, ngamoq lé taî kyô wú aq." ga taî jáng,

64 Yesuq gi, "Nàng taî é eq rajung za nghut lhê. Ngò, nungmoq banshoq lé taî kôlé, nungmoq gi, ahkuî mai htâng hpyang má, haû Byu Yhangzo gi, a-tsam bo dik Su é loqyo hkyam má zung tô é lé le, mhuthtui ji mù, mauhkûng mai lé lo é lé le, nungmoq myàng kó râ nghut lhê." ga taî ri.

65 Haú hkûn, hkyangjong mó gi, yhâng é bu lé lêng cheq pyám mù, "Yhang gi, Garai Gasang lé rhoi dang taî bê nghut ri! Nga-nhúng, hai saksé râ ashî lúhú? Yhang, Garai Gasang lé rhoi dang taî é lé, nungmoq, ahkuî wó gyo bekô nghut lhê.

66 Nungmoq hkâsu wó myit akô lúhú?" ga myi jáng, yhangmoq gi, "Yhang gi, shî gíng sù

nghut lhê." ga tũ taĩ akô nghut ri.

⁶⁷ Hau htâng má, yhang-moq gi, Yesuq é myoqdong má sôkan byé gyun luĩ, loqt-sup eq htui byĩ akô nghut ri. Góbang gi, Yhang lé bo-pyuq pyuq byĩ luĩ,

⁶⁸ "Hkrisduq Nàng, Nàng lé bat sũ ó yuq nghut é lé, my-iqhtoi htoĩ wũ aq." ga taĩ akô.

*Yesuq Lé, Petruq He-ngik
Pyâm É Hkyô*

Mrk 14:66-72; Luk 22:56-62; Yhn 18:15-18, 25-27

⁶⁹ Petruq gi, wâng hkaũ má nyi tô é u lé, dui-nhâng zoshâng myhĩ rayuq gi, yhâng chyáng lé jé mù, "Nàng le, haũ Galile byù Yesuq eq rahá nyi sũ nghut ri." ga taĩ ri.

⁷⁰ Nghut kôlhang, Petruq gi, haũ bang banshoq é hí má yhang, "Nàng haĩ taĩ nyi é lé, ngò a sé." ga he kat ri.

⁷¹ Hau htâng, yhang gi, wâng hkúmdong shut htoq e ló le, haũ jowò má, dui-nhâng zoshâng myhĩ góyuq le, yhang lé myàng mù, "Shĩ yuq gi, Nazaret wà byù Yesuq eq rahá nyi sũ nghut ri." ga, haũ má é bang lé taĩ kat ri.

⁷² Haũ hkũn, yhang gi, "Byù haũ yuq lé, ngò a sé!" ga dakam é dông he pyâm ri.

⁷³ Hau htâng razup zo má, haũ jowò má yap to bang gi, Petruq chyáng huĩ ê kômù, "Nàng le, haũ bang má bò sũ yhang nghut ri; náng é danghtê lé sê gyô ri." ga taĩ akô.

⁷⁴ Haũ hkũn, yhang gi, yhanggùng yhang nhing luĩ,

"Haũ yuq lé, ngò a sé." ga dakâm dang taĩ ri.

Haũ-u yhang, woq tũn bê nghut ri.

⁷⁵ Haũ mù, Petruq gi, "Woq a tũn shi má, nàng, Ngo lé sum dâm he pyám rã nghut lhê." ga, Yesuq, yhang lé taĩ é dang lé, myit bũn kat mù, shinggan shut htoq ê luĩ, gyai yhang ê ngau ri.

27

Yudaq Juĩshi É Hkyô

Mrk 15:1; Luk 23:1-2; Yhn 18:28-32

¹ Napsũn noq le, hkyangjong agyi pé banshoq bang eq mingbyu é suwũn wui gi, Yesuq lé sat pyám nhâng rã matú chôm myit hpyit yũ bekô nghut ri.

² Haũ mù, yhangmoq gi, Yhang lé tuĩ yũ luĩ, shuĩ htoq ê kômù, mauzau Pilat chyáng ê ap byĩ akô nghut ri.

³ Yesuq lé ap pyâm é sũ Yudaq gi, Yesuq lé jéyáng doqdân é hkyô lé myang sé jáng, nungngham wó mù, haũ ngùn sum xê chap lé, hkyangjong agyi pé eq suwũn wui chyáng ló dum taũ byĩ ri.

⁴ Haũ mù, yhang gi, "Mara a bò Su é sui lé, ngò ap pyám bê nghut é yanmai, ngò mara wó bê." ga taĩ jáng, yhangmoq gi, "Haũ hkyô, ngamoq eq haĩ sêng lhê lú? Haũ gi, nàng eq sheq ru sêng lhê." ga lhom taĩ kat akô nghut ri.

⁵ Haũ mù, Yudaq gi, ngùn haũ lé, noqkuq yhũmhkaũ má dú pyâm to luĩ, htoq ló mù,

yang gung yang ê juishi byuq bê nghut ri.

⁶ Haû hkyangjong agyi pé gi, ngùn chap haú pé kui yù luí, "Shí gi, sui hpau ngùn nghut lhê yanmai, alu sidek má a ge kat." ga taí akô.

⁷ Haû mù, yangmoq gi, tungbaù pé é lupdùng kut râ matú, au saí zo su é maumyí lé, ngùn hau èq wui hpyit yû râ dông, chôm myit hpyit to bekô nghut ri.

⁸ Hau é yanmai, ahkuí jé shoq, haú jowò lé, sui myigùng ga myhíng tô akô nghut ri.

⁹ Haû gi, "Haû Israelaq byu pé mai, Yang lé gù hpyit tô é ngùn sum xê chap lé, yangmoq yù mù, haû Yhumsíng Garai, ngo lé pying tô é eq rajung za,

¹⁰ haû au saí zo su é maumyí lé, yangmoq wui yù bekô nghut ri." ga myiqh-toi Yeremiaq taí tô é dang lo dik é nghut ri.

Yesuq Lé, Pilat Myí Jep Wú É Hkyô

Mrk 15:2-15; Luk 23:3-5, 13-26; Yhn 18:33-19:16

¹¹ Haú u lé, Yesuq gi, mauzau hpô é hí má yap tô é nghut mù, haû mauzau hpó gi, Yang lé, "Nàng gi, Yudaq byu pé é hkohkâm nghut lhê lhú?" ga myi jáng, Yesuq gi, "Nàng taí é eq rajung za nghut lhê." ga tû taí ri.

¹² Haû hkyangjong agyi pé eq suwún wuí gi, Yang lé, mara hûn kôjáng, Yang gi, haí le a tû taí nghut ri.

¹³ Haú hkûn, Pilat gi, Yang lé, "Yangmoq, Nang lé mara hûn saksé haû-í hkâm nyi kô é lé, Nàng a wó gyo lhú?" ga saí myí ri.

¹⁴ Nghut kôlhang, Yesuq gi, dang rahkun lhang a tû taí é yanmai, haû mauzau hpó gi, gyai maú byuq bê nghut ri.

¹⁵ Haû Lhoqlhai Poí u lé, mingbyû wui ô nau é má cháng luí, haû mauzau hpó gi, htóng byû rayuq yuq lé nhâng byí é htung joq ri.

¹⁶ Haú u lé, a gè myìng htoq é htóng byû, Barabaq ga sù rayuq nyi ri.

¹⁷ Haû mù, byù moq mó zup zing lò kô é hkûn, Pilat gi, yangmoq lé, "Nungmoq é matú, hká yuq lé lhut byi nhâng nau akô lhú? Barabaq luq? Haû a nghut jáng, Hkrisduq gâ é Yesuq lé luq?" ga myí ri.

¹⁸ Yang haû su ga myí é gi, yangmoq, Yesuq lé manôn kôluí, yhang chyáng lé ap byi kô é hkyô lé sê é yanmai nghut ri.

¹⁹ Pilat gi, tarâ jéyáng tingnyâng htoq má zung tô ashí hkûn, yangmyi gi, "Haû mara a bò Sù lé, haí le hkâkut; hkâsu mù gâ le, hkû-nyí za lhang, yhupmoq má, haú yuq é yanmai, ngò tsómra hpuzô pyám bê nghut lhê." ga, yhang chyáng dang pying kat ri.

²⁰ Nghut kôlhang, haû hkyangjong agyi pé eq suwún wuí gi, Barabaq lé dúng htoq yû râ eq Yesuq lé sat pyám nhâng râ matú, shiwa byu pé lé wum byi bekô nghut ri.

21 Haû mauzau hpó gi, "Shí í yuq mâ é hká yuq lé, nhâng byi nhâng nau akô lhú?" ga myi jáng, yhangmoq gi, "Barabaq!" ga tû taí akô nghut ri.

22 Haû mù, Pilat gi, "Haû jáng gi, Hkrisduq gâ é Yesuq lé, ngò hkâsu kut râ lhú?" ga dum myi kat jáng, yhangmoq banshoq bang gi, "Yhang lé tapzîng má jén sat pyám aq!" ga dum tû taí akô nghut ri.

23 Nghut kôlhang, yhang gi, "Haí mù luí lhú? Yhang gi, hai mara kut shut bê lhú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq!" ga je riyhang garú lo bum akô nghut ri.

24 Pilat gi, hká dông le a dat kut lô é eq byu pé gabyông lò kó râ nghut é hkyô lé myàng luí, uchyam yù mù, shiwa byu pé hí má loq chi luí, taí é gi, "Shí yuq é sui gi, ngò eq haí a séng; nungmoq eq za ru sêng lhê." gâ ri.

25 Haû shiwa byù lhunglhang bang gi, "Yhâng é sui gi, ngamoq eq ngamoq é yhangzo yhangshû pê htoq má joq nyi sháng gaq." ga, dum tû taí kat akô nghut ri.

26 Haú hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byi kat bê nghut ri.

Yesuq Lé, Gyezô Pé Rhoi É Hkyô

Mrk 15:16-21; Yhn 19:2-3

27 Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaû má shuí wang ló kômù, Yhâng é lhinghkyuq má, gyedap gón lé ji tsîng tô akô.

28 Yhangmoq gi, Yesuq é mebu hkyut pyám byi kôluí, zam zam ne é buhîng hut byi kômù,

29 zujanmaú ralhum saí yù kôluí, Yhâng é ulhum má tsung byi akô nghut ri. Yhangmoq gi, jàm-yang rahkat lé, Yhâng é loqyo loq má kat byi kômù, Yhâng é hí má hkyihput htuq kôluí, "Yudaq byu pé é hkohkâm hpó ê! Chyung hîng xê hing nyi sháng gaq ô!" ga, jihpoi dang taí akô.

30 Yhangmoq gi, Yhang lé sôkan byé gyun luí, Yhâng é loq mai jàm-yang lú yù mù, Yhâng é ulhum má dum bat bat kut akô nghut ri.

31 Yhangmoq gi, Yhang lé rhoi jihkyoí ban kut yù kôjáng, Yhang wut tô é buhîng lé hkyut yù kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

Yesuq Lé Jén Pyám É Hkyô
Mrk 15:22-32; Luk 23:27-43; Yhn 19:17-27

32 Yhangmoq htoq e ló nyi le, Kuruni myuq byù nghut é Simun ga sù lé myàng kômù, yhang lé, zik luí tapzîng waq nhang akô nghut ri.

33 Yhangmoq gi, Golgahta gâ é jowò má jé e ló bekô nghut ri. Golgahta gâ é

lichyúm gi, ugyap joq é jowò lé gâ é nghut lhê.

³⁴ Haú má jé jáng, yhangmoq gi, Yesuq lé, hkô jung eq nyhò tô é tsibiyiq wing lé byi huq akô; nghut kôlhang, Yhang gi, haú lé chyam wú mù, a shuq byi kut pyâm ri.

³⁵ Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyîn shosé shé é dông gam yu pyâm byi akô.

³⁶ Hau htâng, yhangmoq gi, haú jowò má zung to mù, Yhang lé zúng nyi akô nghut ri.

³⁷ Yhâng é u htoq má, "SHÍ YUQ GI, YUDAQ BYU PÊ É HKOHKÂM, YESUQ NGHUT LHÊ." ga, Yhang lé mara hun é laiká kê tap tô akô.

³⁸ Haú hkûn, Yhang eq rahá, damyaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri.

³⁹ Hkyô sô laí ló é bang gi, nyhap é dông u-ngut nut mù, taí kô é gi,

⁴⁰ "Noqkuq yhûm lé hpyoq pyám luí, sum nyí gyoro má dum wó saí lhê ga Sû ê! Nâng, Garai Gasâng é Yhangzo nghut le gi, Nâng gûng nâng hkyi yù luí, tapzîng mai gyó lo wú aq mhaí!" ga akô nghut ri.

⁴¹ Haú eq rajung za, hkyangjong agyi pé, tarâ sará pé eq suwún wuí le, Yhang lé rhoí jihkyoí kut mù, taí kô é gi,

⁴² "Shí yuq gi, góbang lé hkyi yù sù nghut kôlhang, Yhânggûng yhang gi, a wó hkyi yù nghut ri myhi-nhung! Yhang gi, Israelaq byu pê é hkohkâm nghut lhê lhà! Ngamoq wó lumjîng râ matú, Yhang, tapzîng mai gyó lo wú sháng gaq.

⁴³ Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yù sháng gaq; hkâsu mù gâ le, Yhang gi, 'Ngò, Garai Gasâng é Yhangzo nghut lhê.' ga taí ri." ga bum akô nghut ri.

⁴⁴ Haú eq rajung za, Yhang eq rahá tapzîng má jén to huí é damyaq í yuq le, Yhang lé rhoí dang taí akô nghut ri.

Yesuq Soqkâng Byit É Hkyô Mrk 15:33-41; Luk 23:44-49; Yhn 19:28-30

⁴⁵ Nyí-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq bê nghut ri.

⁴⁶ Myinhtâng sum hkyíng kô má, Yesuq gi, "Eloi, Eloi, lama sabakhtani?" ga, htê mó èq garú kat ri. Hau é lichyúm gi, "Ngá Garai ê, Ngá Garai ê, Nâng, haí mù, Ngo lé tô pyâm tô lhê lhú?" gâ é nghut ri.*

⁴⁷ Haú nâm má yap tô é bang ra-am gi, haú lé wó gyo kôjáng, "Yhang gi, myiqhtoi Eliyaq lé wut nyi ri." ga taí akô.

⁴⁸ Haú hkûn jáng, yhangmoq mâ é rayuq gi, din e ló mù, wuimaù lé ê yu ri. Yhang gi, haú lé tsibiyiq wing chyín

má jum yù luí, jàm-yang má tuí tap mù, Yesuq shuq râ matú yhun byí ri.

⁴⁹ Góbang gi, "Yhang lé, Eliyaq, lé hkyi yu lhê laq, nga-nhúng chôm láng wú sháng." ga taí akô nghut ri.

⁵⁰ Haú hkûn, Yesuq gi, htê mó èq dum garû kat luí, Yhâng é soqkâng byit bê nghut ri.

⁵¹ Haú u lé, haú noqkuq yhûm mâ é pán-gyang gi, ahtuq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri.

⁵² Lup pé gi, bóng lô mù, shi byuq bê é chyoiyúng bang myo myo gi, lhoq dui é hui akô.

⁵³ Haú bang gi, Yesuq dum dui toq é htâng, lup mai htoq lô kômù, chyoiyúng myuq* má wang é luí, byù myo myô hí má htoq shit akô nghut ri.

⁵⁴ Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô banshoq lé myàng kôjáng, gyuq dàn kômù, "Yhang gi, gè gè yhang, Garai Gasâng é Yhangzo nghut ri-nhung!" ga taí akô nghut ri.

⁵⁵ Myiwe wui myo myo le, we we mai wú nyi bum akô. Haú bang gi, Yesuq râ é má garúm râ matú, Galile mau mai Yhang htâng châng lé é bang nghut akô.

⁵⁶ Haú bang má, Magadalaq wà mâ é Mariq, Yakuq eq Yose nhiktâng é yhângnu

Mariq eq Zebedi é yhangzô nhiktang é yhângnu pé le bo akô nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-42

⁵⁷ Myinhâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri.

⁵⁸ Yhang gi, Pilat chyáng é mù, Yesuq é gungsôm lé ê dung jáng, Pilat gi, yhang lé byi râ matú hkunmó hkyô kat bê nghut ri.

⁵⁹ Yosep gi, gungsôm lé yù mù, pán yúng èq htup yup luí,

⁶⁰ luqgok lé kyúng tô é, yhâng é lup sik hkaú má é kat tô ri. Hau htâng, yhang gi, luphkum má, luqlông èq lhêng chí pyâm to luí, ló byuq bê nghut ri.

⁶¹ Magadalaq wà mâ é Mariq eq goyuq Mariq gi, lup hí má zung tô akô nghut ri.

Lup Zúng É Hkyô

⁶² Haú Hên Lajang Buinyi laí é htâng nyi lé, hkyangjong agyi pé eq Hparishe pé gi, Pilat chyáng é mù,

⁶³ "Yhumsing é, Yhang, asak dui nyi ashí hkûn, 'Sum nyi nghû râ buinyi má, Ngò dum dui toq lô rá.' ga, haú byù mhaú taí é dang lé, ngamoq bûn nyi lhê.

⁶⁴ Haú mù, haú sum nyi nghû râ buinyi jé shoq, lup lé rago za zúng nhang to aq. Haú a nghut jáng, Yhâng é chángzô pé, mâng lé lé hkaú

* 27:53 Chyoiyúng myuq gâ é gi, Yerusalem wà mó lé gâ é nghut lhê.

yu ló mù, Yhang shi é mai dum dui toq lô bê ga, byu pé lé taí kó râ nghut lhê. Shî, lô htâng dàm mhaû é hkyô gi, sâng-hi dàm htoq je wui râ nghut lhê." ga, lé taí akô nghut ri.

⁶⁵ Haú hkûn, Pilat gi, "Nungmoq sê é dông, lup lé haí a dut loshoq, gyezô pé lé zúng nhang to keq." ga tû taí kat ri.

⁶⁶ Haú mù, yhangmoq gi, ê luí, lup lé gau shoq ga, luqgok má dizik htung mù, lup zúng byû nyhi to bekô nghut ri.

28

Dum Dui Toq Lo É Hkyô

Mrk 16:1-8; Luk 24:1-12; Yhn 20:1-10

¹ Bánno buinyì lai jáng, rabat é sâng-hi nyí maubó zó má, Magadalaq wà mâ é Mariq eq goyuq Mariq gi, lup má ê wú râ ga, e ló akô.

² Haú hkûn, layàng mó nún lo ri; hkâsu mù gâ le, Yhumsîng Garaí é maumang lagyo rayuq gi, mauhkûng mai gyó lé lô mù, lup má ê luí, haú luqlong lé tu lheng mù, hau ahtoq má zung tô ri.

³ Yhâng é isâm gi, lhap su duqbó mù, Yhâng é mebu gi, gyo su hpyu zan tô ri.

⁴ Zúng nyi é bang gi, yhang lé lûm wú gyuq kômù, pyik pyik nán luí, shî gùng su dut bùm bekô nghut ri.

⁵ Haú maumang lagyo gi, myiwe haú nhik lé, "Hkâgyuq kó! Haú tapzîng má jén sat huí é Yesuq lé, nungnhik ho nyi kô é lé, ngò sê lhê.

⁶ Yhang gi, shí má a nyi lo; Yhang taí tô é eq rajung za, lhoq dui toq é hui bê nghut ri. Yhang lé lheq é jowò lé, lé wú keq.

⁷ Haú mù, hân taú ló luí, Yhâng é chángzô pé lé, 'Yhang, shi é mai lhoq dui toq é hui bê nghut ri; nungmoq é hí má, Galile mau shut ló lánng berâ. Nungmoq, Yhang lé, haú má ló myâng kó râ nghut lhê.' nghû ló taí kyo keq. Nungnhik lé, ngò taí é lé matsîng chûng keq." ga taí kat ri.

⁸ Haú mù luí, myiwe myhí haú nhik gi, gyuq kôlhâng, gyaí gabú é myit èq lup mai hân taú ló mù, Yhâng é chángzô pé lé ló taí kyo râ matú, din ló bê nghut ri.

⁹ Haú hkûn, Yesuq gi, radá dâm yhangnhik lé lhom tê mù, "Wángzán nyí kó sháng gaq." ga taí ri. Haú mù, yhangnhik gi, huí ê luí, Yhâng é hkyí má po zing to mù, Yhang lé noqkuq akô.

¹⁰ Haú hkûn, Yesuq gi, yhangnhik lé, "Hkâgyuq kó. Ngá é gumang wui lé, Galile mau shut e ló keq nghû ló taí kyo keq; haú má, yhangmoq, Ngo lé myàng kó râ nghut lhê." ga taí kat ri.

Zúng Nyi É Gyezô Pé Taí É Danglù

¹¹ Myiwe haú nhik hkyô má ru nghut nyi ashî le, lup zúng é gyezô pé ra-am gi, myuq hkaú má wang ló mù, dut lai lo é hkyô banshoq lé, haú hkyangjong agyi pé lé ló taí kyo akô nghut ri.

12 Haù hkyangjong agyi pé gi, suwún wuí eq huí lhum luí, hpyê lhùm é htâng má, haù gyezô pé lé, ngùn myo myo tsup byi mù,

13 "'Myín lé, ngamoq yhup myhî tô é hkùn, Yhâng é chángzô pé lé lô mù, mâng lé, lé hkaù yu ló bekô nghut ri.' nghû taí keq.

14 Shí hkyô lé, haù mauzau hpó wó gyô é nghut jáng, yhang myit ngón shoq, ngamoq taí râ nghut lhê; haù hkùn, nungmoq gi, hai manghkáng a htoq râ nghut lhê." ga taí kat ri.

15 Haù mù, gyezô pé gi, ngùn haù pé lé yù luí, yhangmoq lé taí kat é eq rajung za kut bekô nghut ri. Haù su mù, haù hkyô gi, Yudaq byu pé má taí pyo myhîn ló bê nghut mù, ahkuí jé shoq taí nyi bum akô nghut ri.

Chángzô Pé Kut Râ Sasana Muzó

Mrk 16:14-18; Luk 24:36-49; Yhn 20:19-23; Lagyo 1:6-8

16 Hau htâng má, haù chángzo raxe rayuq gi, yhangmoq lé, Yesuq ê nhang tô é Galile mau mâ é bùm shut e ló bekô nghut ri.

17 Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a dê jing kó nghut ri.

18 Hau htâng, Yesuq gi, yhangmoq chyáng lé lô mù, "Mauhkûng eq myigùng htoq mâ é ahkáng ayá banshoq, Ngo lé byí to bê nghut lhê.

19 Haù mù, nungmoq gi, htoq ê luí, byù myû chângjup

lé, Ngá é chángzô pé dut nhâng mù, haù Íwa, Yhangzo, Chyoiyung Woi-nyí é mying lang luí, wui-myhup hkám byi mù,

20 nungmoq lé, Ngò hkunmó hkyô tô é lhunglhang lé châng kut râ matú, yhangmoq lé mhoqshit keq. Ngò gi, mingkan pyat htâm é hkùn jé shoq lhang, nungmoq eq rahá ru nghut nyí râ nghut lhê." ga pying tô ri.

MARKUQ

é Gabú Danglù

Laiká

(The Gospel of Mark)

Yesuq É Matú Hkyô Htong
Byí É Hkyô

Mht 3:1-12; Luk 3:1-18;
Yhn 1:19-28

¹ Haú Garai Gasâng é Yhangzo, Yesuq Hkrisduq eq sêng é gabú danglù hi é hkyô gi,

² haú myiqhtoi Esai-aq laiká má:

"Náng é hkyô lajang lángrâ matú, Ngá é lagyo lé, Náng é hí má Ngò nhang kat râ nghut lhê."*

ga luí le,

³ "Haú yoso má, byù rayuq garú taí é hté gi,

'Haú Yhumsing é matú, hkyô hen to keq; Yhâng é matú hkyô lhoq nyhang to keq.'*

ga luí le, kê tô é eq rajung za nghut lhê.

⁴ Haú mù, Wui-myhup Sará Yohan gi, yoso hkaú má jé lé luí, wui-myhup hkám byí nyi é eq, yubak mara hkyut pyám byí é hui râ matú myit lhíng mù, wui-myhup hkám yù râ hkyô lé, hko kyô nyi ri.

⁵ Haú hkûn, Yuda mau jowò hkangmó mâ é bang eq Yerusalem wà mó mâ é banshoq bang gi, yhâng chyáng htoq e bum akô. Yhangmoq gi, yhumsing é

mara lé yín yû kôluí, yhâng chyáng mai Yodan làng má wui-myhup hkám yu bum akô nghut ri.

⁶ Yohan gi, gola-uq shomaú èq saí é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosô byo-î pé lé zo sù nghut ri.

⁷ Yhang taí kyô é dang gi, "Ngá htoq má wum-o a-tsam je bo é sù rayuq, ngá htâng má jé lé râ nghut lhê; ngò gi, yhâng é hkyí-tsung tui lé hpyí râ lháng a gingdán é nghut lhê.

⁸ Ngò gi, nungmoq lé, wui èq za wui-myhup wó hkám byí lhê; nghut kôlhang, Yhang gi, Chyoiyúng Woi-nyí má nungmoq lé wui-myhup hkám byí râ nghut lhê." gâ ri.

Yesuq, Wui-myhup Hkâm Yu É Hkyô Eq Gunglaú Huí É Hkyô

Mht 3:13-17; 4:1-11; Luk 3:21-22; 4:1-13

⁹ Haú yoq má, Yesuq gi, Galile mau Nazaret wà mai lé jé mù, Yohan chyáng Yodan làng má wui-myhup hkám yu ri.

¹⁰ Yesuq gi, wui mai htoq lo é u lé, mauhkûng bóng lo é lé le, Woi-nyí gi, hpûngkyui gunghkyâng sù é dông mai, Yhang ahtoq má gyó lé lo é lé le, Yhang myang kat ri.

¹¹ Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

12 Haú hkûn jáng, Woi-nyí gi, Yhang lé yoso shut wang e ló nhang ri.

13 Haú mù, Yhang gi, yoso má myi xê nyí nyí luí, Tsadán èq gunglaú é huí ri; tân jung yosô zè pé le, Yhang eq rahá nghut nyi ri; maumang lagyô pé gi, Yhang lé, lé dojaú nyi akô nghut ri.

Sâng-hi Lhê É Chángzô Pé

Mht 4:12-22; Luk 4:14-15; 5:1-11

14 Yohan htóng gyó é htâng má, Yesuq gi, Galile mau má ló jé mù,

15 "Ahkyíng gi, jé bê; Garai Gasâng é mingdán gi, chyâng lò bê nghut ri; myit lhíng mù, haú gabú danglù lé lumjíng keq hkoi." ga luí, Garai Gasâng é gabú danglù lé hkô kyo wún ri.

16 Yesuq gi, Galile nhông yàm mai sô laí ló le, Simun eq yhanggu Andre nhiktâng, nhông má gùn dú nyí kô é lé, myang ri; haú nhik gi, ngozo kóng zo su nhik nghut akô.

17 Haú mù, Yesuq gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taí ri.

18 Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

19 Yesuq gi, radun zo dum sô e ló é hkûn, Zebedi é yhangzo, Yakuq eq yhanggu Yohan nhiktâng, lhaí hkaú má gùn hpo nyí kô é lé, myang ri.

20 Haú hkûn, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhangwa Zebedi eq langchyâng pé lé, lhaí hkaú má nyhi pyâm to kôluí, Yhang htâng cháng bekô nghut ri.

Nat Lé, Yesuq Hkat Htoq Pyâm É Hkyô

Luk 4:31-37

21 Yhangmoq gi, Kapernaum wà má e akô; Bánno buinyí nyí jé jáng, Yesuq gi, tarajong má wang ê mù, mhoqshit hi ló bê nghut ri.

22 Shiwa byu pé kúm gi, Yhang mhoqshit é hkyô lé mauhong bum akô; hkâsu mù gâ le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri.

23 Haú u lé, agè ashop é nat wang júng é byù rayuq tarajong má bo lom nyí luí, wut garú kat é gi,

24 "Nazaret wà byù Yesuq ê, ngamoq gi, Nàng eq haí sêng lhê lú? Ngamoq lé lhoq hten râ matú, Nàng jé lé é nghut lhê lú? Nàng gi, Garai Gasâng é Choyiyúng Sù nghut é lé, ngò sê lhê." gâ ri.

25 Haú hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat ri.

26 Haú hkûn, agè ashop é nat haú gi, byù haú yuq lé wum kat langhtân nhâng luí, htê mó èq garu uchyang htoq ló byuq bê nghut ri.

27 Shiwa byù banshoq bang gi, gyai yhang máu byuq

kômù, rayuq eq rayuq, "Shí yuq é dang gi, hkasû é dang wá nghut lhê lhu? Ahko ahkáng bo é dông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lhang gyo byi akô nghut ri." ga luí, taí lhum bum akô nghut ri.

²⁸ Yesuq eq sêng é ludang gi, Galile mau jam shoq, yang é dông byo myín ló bê nghut ri.

Byù Myo Myo Lé, Yesuq Lhoq Gê Byi É Hkyô

Mht 8:14-17; Luk 4:38-41

²⁹ Yhangmoq gi, tarajong mai htoq luí, haú hkûn jáng, Yakuq eq Yohan nhik le mù, Simun eq Andre nhiktang é yhum má wang e ló bekô nghut ri.

³⁰ Simûn é yhang-aumó gi, gyai yhang nô leq tô é nghut mù luí, yhangmoq gi, Yesuq lé haú yuq no é hkyô lhom taí kyô akô nghut ri.

³¹ Haú mù luí, Yesuq gi, yhang chyáng huí é mù, yhang é loq má zui luí tu tsung ri; haú hkûn jáng, nô ge byuq luí, yhang gi, yhangmoq lé gaí tso gaí huq bê nghut ri.

³² Haú nyí buiwang é htang má, byu pé gi, no é bang eq nat gang wang júng nyi é bang banshoq lé, Yesuq chyáng shuí lé lo bum akô nghut ri.

³³ Rawa bang, hkúmdong nàm má lé zup zing tô akô.

³⁴ Haú mù, Yesuq gi, awáng nõhpyo ajung jung huí é bang myo myo lé lhoq gê byi ri; nat gang myo myo lé le, hkat

htoq pyâm ri; nghut kôlhang, Yhang ó nghut é lé nat gang haú bang sé kô é yanmai, nat gang haú bang lé dang a taí nhang nghut ri.

³⁵ Yesuq gi, htang napkyó mau lhang a bó shimá, toq mù, gaú é jowò ralthum má htoq é luí, kyû é dúng ri.

³⁶ Simun eq yhang é luzúm wu kúm gi, Yhang lé châng hô kômù,

³⁷ Yhang lé myang hô kôjáng, "Yuq hkanmó gi, Nang lé châng hkat ho nyi akô." ga luí, taí kyô akô nghut ri.

³⁸ Haú hkûn, Yesuq gi, yhangmoq lé, "Awui ayâm mâ é wà pé má le, ngò, mungdang wó hkô râ matú é sháng, hau é matú ngò lé é ru nghut lhê." ga tú taí ri.

³⁹ Haú mù luí, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyâm byi wún ri.

Manggâm Dap Sû Lé, Yesuq Lhoq Gê Byi É Hkyô

Mht 8:1-4; Luk 5:12-16

⁴⁰ Manggâm dap é byù rayuq gi, Yesuq chyáng lé mù, hkyihput htuq luí, "Nàng dóng é nghut le gi, ngò lé Nàng wó lhoq sân-yúng byi râ nghut lhê." ga dung wut ri.

⁴¹ Haú hkûn, Yesuq gi, yhang lé wú shogyo luí, loq lham kat mù, haú yuq lé é záng luí, "Ngò dóng lhê, sân-yúng aq hkoi." ga taí ri.

⁴² Haú hkûn jáng, manggâm ana byuq byuq luí, yhang gi, gè bê nghut ri.

⁴³⁻⁴⁴ Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tân shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé gyai yhang sidiq byi mù, radá dâm nhang kat bê nghut ri.

⁴⁵ Nghut kôlhang, haú yuq gi, htoq ló mù, haú hkyô lé je taí pyo myhîn ló bê nghut ri. Hau é yanmai, Yesuq gi, wà hkaû má de de a ge wang ló lo mù, shinggan mâ é cham-chyuiyui dut é jowò má za nyi nyi ri. Nghut kôlhang, byu pé gi, jowò hkangmó mai Yhâng chyáng ru zîng lé nyi bum ashî kó nghut ri.

2

Gùngjum Shî Sû Lé, Yesuq Lhoq Gê Byî É Hkyô

Mht 9:1-8; Luk 5:17-26

¹ Buinyi hkâ-myháng a myáng má, Yesuq gi, Kaperna-um wà má dum wang lò jáng, Yhang yhûm dum taú jé lô bê gâ é hkyô lé, byu pé wó gyô bum akô nghut ri.

² Haú mù, byù myo myo zîng lé lô kôluí, yhúmhkaû má jowò a joq lô é htoq agó, hkumtot má lhang a joq lo

nghut ri; Yesuq gi, yhangmoq lé mungdang hko kyô nyi ri.

³ Haú hkûn, byù myi yuq gi, gùngjum shî sù rayuq lé chôm dang waq luí, Yhâng chyáng lé lo akô.

⁴ Yhangmoq gi, byù lûm myô chyín chyap to mù, byù haú yuq lé Yesuq chyáng a wó shuí jé é kô é yanmai, Yesuq é u htoq mâ é yhumhkûng lé dong htông yù luí, gùngjum shî sù lé taphkang eq roq hkyô kat akô nghut ri.

⁵ Yesuq gi, yhangmoq é lumjîng myit lé byu-myàng jáng, gùngjum shî sù lé, "Ngá zo é, náng é yubak mara lé hkyut pyám byi bê." ga taí ri.

⁶ Haú hkûn, tarâ sará pé ram gi, haú má zung to kôluí, yhangmoq é i-myt unghkaû má,

⁷ "Byù shí yuq gi, haí mù luí haú su gâ lhê laq? Yhang gi, Garai Gasang lé rhoi dang taí nyi ri; Garai Gasang mai lai luí, ó yuq wá mara wó hkyut byi rá lhu?" ga luí, myit són wuí nyi bum akô nghut ri.

⁸ Yesuq gi, yhangmoq é unghkaû má myit wú nyi kô é hkyô lé, radá dâm Yhang é myit mai sé mù, "Nungmoq é i-myt hkaû má, haí mù haú su nghû myit són wuí nyi bum akô lhu?"

⁹ Haú gùngjum shî sù lé, 'Náng é yubak mara lé hkyut pyám byi bê.' nghû taí é dang eq, "Toq aq, náng é taphkang lé yù mù, hkyô so aq.' nghû taí rá má, hká hkun je taí lui lhê lhu?"

* **2:10** *Byu Yhangzo* gâ é gi, Yesuq Yhânggùng yhang lé le taí é nghut lhê, Mesaia lé le taí é nghut lhê.

10 Nghut kôhlang, haû Byu Yhangzo* gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lê." ga, yhang-moq lé taí kat ri.

11 Hau htâng, Yhang gi, haû gùngjum shí sù lé, "Ngò, nang lé taí bá, toq aq, náng é taphkang lé yu chùng luí, yhûm taú ló aq hkoi." ga taí ri.

12 Haú yuq gi, toq mù, yhâng é taphkang lé yu chùng luí, yhangmoq banshoq bang wú tsuq tô é myoq hí mai sô htoq ló byuq bê nghut ri. Hau é yanmai, yuq hkanmó gi, mauhong bùm kômù, "Isû é hkyô gi, hkâ-nhám lháng a myàng wú shi." ga, Garaí Gasang lé hkya-on kungton bum akô nghut ri.

Lewiq (Mahte) Lé Wut Yu É Hkyô

Mht 9:9-13; Luk 5:27-32

13 Yesuq gi, nhông yàm má radàm dum htoq e ri. Haú hkûn, byù moq mó gi, Yhâng chyáng jé lé lo bùm kômù, Yhang gi, haú bang lé lhom mhoqshit nyi ri.

14 Yhang gi, sô yông ló nyi é hkûn, kang guq zúm má zung tô é, Alhpe yhangzo Lewiq lé myang kat luí, "Ngá htâng cháng aq." ga taí ri. Haú hkûn, Lewiq gi, toq luí, Yhang htâng cháng bê nghut ri.

15 Yesuq gi, Lewiq é yhûm má myinzang ê zô nyi é hkûn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gâ

le, Yhang htâng châng é bang gi, ajùm ayò nghut é yanmai nghut ri.

16 Tarâ sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haí mù luí, kang guq bang eq yubak dap bang eq rahá zo shuq nyi lê lhú?" ga myí bum akô nghut ri.

17 Haú su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chí sará a ra kó, nòhpyo hui bang za sheq ru râ lê. Haú eq rajung za, Ngò gi, dingmán bang lé wut yù râ matú jé lé é a nghut, yubak dap bang lé jì yù râ matú sheq jé lé é ru nghut lê." ga taí kat ri.

Zoshuq Gám É Eq Sêng É Hkyô

Mht 9:14-17; Luk 5:33-39

18 Yohan é chángzô pé eq Hparishe pé gi, zoshuq gám nyi akô nghut ri. Haú mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pê é chángzô pé gi, zoshuq gám akô; nghut kôhlang, náng é chángzô pé gi, haí mù a gám kô é lhú?" ga luí, myí akô nghut ri.

19 Haú hkûn, Yesuq tû taí é gi, "Bíng pé gi, lusik eq rahá nghut nyi tô ashí hkûn, zoshuq hkâsu wó gám râ lhú? Yhangmoq gi, lusik eq rahá nghut nyi é u lé, zoshuq gám kó râ a nghut.

20 Nghut kôlhang, lusik lé yhangmoq chyáng mai shuí yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê.

21 Ó yuq le, mebu xau má pán sik èq a lhaq hpo wú kó; haú su kut é nghut jáng, pán sik gi, kun byuq mù, mebu xau le je lhoq cheq pyám râ nghut lhê.

22 Haú eq rajung za, tsi-biyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng luí, tsibiyiq wing eq shokuq htûng htên byuq râ nghut lhê. Haú mù, tsibiyiq wing asik gi, shokuq htûng sik má za ge kat é nghut lhê.

*Bánno Buinyi É Yhumsîng
Mht 12:1-14; Luk 6:1-11*

23 Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô laí ló é hkûn, Yhâng é chángzô pé gi, kyôshi ratsuí langshap yu akô nghut ri.

24 Haú mù, Hparishe pé gi, Yesuq lé, "Wú aq, Bánno buinyi má a ge kut jung lé, haí mù, náng é chángzô pé kut nyi akô lú?" ga taí akô.

25 Haú hkûn, Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut hui luí, zoshuq râ tô é hkûn, hkâsu kut é hkyô lé, nungmoq hkâ-nhám le a nghap wú kó lú?"

26 Abiahta, hkyangjong mó kut nyi é u lé, Dawiq gi, Garai Gasâng é yhúmhaú má wang

é mù, hkyangjông pé mai lai luí, ó le a ge zô é, kyâng tô é muk lé yù zo mù, yhang htâng châng é bang lé le ratsuí tsuí byi tso é nghut lhê." ga taí taí ri.

27 Hau htâng, Yhang gi, yhangmoq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut.

28 Haú mù, haú Byu Yhangzo gi, haú Bánno buinyi é Yhumsîng lháng nghut lhê." ga xoq taí ri.

3

1 Yesuq gi, tarajong má radàm dum wang e le, loq raloq ajum shi byuq é byù rayuq nyi to láng ri.

2 Haú hkûn, haú má nyi tô é bang ra-am gi, Bánno buinyi má, Yesuq mai haú yuq lé lhoq gè byi râ lú ga, mara hûn râ matú gyám wú nyi akô nghut ri.

3 Yesuq gi, haú loq jum shí sù lé, "Banshoq bâng é hí má, toq yap shit aq." ga taí kat ri.

4 Hau htâng, Yhang gi, haú má nyi tô é bang lé, "Bánno buinyi má, ge é muzó kut râ, a ge é muzó kut râ, byù asak hkyí râ eq byù sat râ hkyô pé má, hká lhum kut le sheq tarâ wang lhê lú?" ga myí kat jáng, yhangmoq kúm gi, jit le a ga kó nghut ri.

5 Haú mù, Yhang gi, nhik-yô nau é myit èq haú bang lé lhíng wú mù, yhangmoq myit htan é hkyô lé, wú yón luí, haú loq jum shí sù lé, "Náng é loq nyhang kat aq." ga taí kat jáng, haú yuq gi, loq nyhang

kat luí, yhang é loq gi, shoq za ge byuq bê nghut ri.

⁶ Hau htâng má, Hparishe pé gi, htoq ló kômù, Yesuq lé hkâsu kut wó sat pyám rà hkyô lé, Herut é byu pé eq chôm hpyê lhùm bum akô nghut ri.

Byù Ajùm Ayò, Yesuq Htâng Cháng Kô É Hkyô

⁷ Yesuq gi, Yhang é chángzô pé eq rahá, nhông shut dum e ló le, Galile mau mâ é byù ajùm ayò gi, Yhang htâng châng e ló bum akô nghut ri.

⁸ Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang, Yodan làng hé hpoq mâ é bang, Turuq myuq eq Sidun myuq awui ayàm jé shoq mâ é bang, ajùm ayò gi, Yhang kut nyi é hkyô banshoq lé wó gyo kôjáng, Yhang chyáng jé lé bum akô nghut ri.

⁹⁻¹⁰ Yesuq gi, byù myo myo lé lhoq gê byi é yanmai, nõhpyo hui to bang gi, Yhang lé wó záng shoq ga, chyin chyap wang ló bum akô. Byù lùm myo luí, Yesuq gi, Yhang lé a nhê pyet pyám sháng gaq ga, Yhang é chángzô pé lé lhai ralhum hen to nhang ri.

¹¹ Agè ashop é nat pé gi, Yhang lé myàng hkangmó, Yhang é hí má lêng ngop to luí, "Nàng gi, Garai Gasâng é Yhangzo nghut ri." ga luí, tai garû akô.

¹² Nghut kôlhang, Yesuq gi, Yhang ó yuq nghut é hkyô lé

a tai byông htoq rà matú, tân hkúm kat ri.

Lagyo Kut Râ Byù Raxe Í Yuq Hkyin Yu É Hkyô

Mht 10:1-4; Luk 6:12-16

¹³ Yesuq gi, bùm shut doq ló mù, Yhang ô nau é bang lé ji kat luí, haú bang gi, Yhang chyáng jé lé lo bum akô nghut ri.

¹⁴ Haú hkûn, Yesuq gi, byù raxe í yuq lé hkyin yù luí, lagyo ayá byi ri; haú bang gi, Yhang eq rahá nyi rà matú le, mungdang hkô rà matú Yhang nhang htoq kat rà eq,

¹⁵ nat gâng pé lé hkat htoq rà ahko ahkáng wó rà matú le, nghut akô nghut ri.

¹⁶ Haú raxe í yuq gi, Simun (Yesuq mai Petruq ga myìng myhíng byi sù);

¹⁷ Zebedi é yhangzô nhiktâng Yakuq eq yhanggu Yohan (Yháng nhiktâng lé Yesuq mai Buanerga ga myìng myhíng byi ri; hau é lichyùm gi, maugum zô nhik gâ é nghut lhê.);

¹⁸ Andre, Hpilip, Barhtol-ume, Mahte, Htomaq, Alhpe é yhangzo Yakuq, Htade, Zelutuq* dut é Simun eq,

¹⁹ Yhang lé ap pyám rà sù, Yudaq Iskarut pé nghut akô.

Yesuq Eq Bezebulaq

Mht 12:22-32; Luk 11:14-23; 12:10

²⁰ Hau htâng, Yesuq gi, yhùm má wang ló le, byù ajùm ayò dum zing lé lô kômù, Yhang eq Yhang é chángzô pé

* **3:18** Zelutuq gâ é lichyùm gi, yhumsing zui sai é hkyô má gyai yhang myit lòm shirong é sù lé gâ lhê. Haú u lé, Israelaq byu pé gi, mingdán luthkyô wó rà matú shikut nyi é hpúng bang lé, Zelutuq gâ lhê.

gi, zang zo hkyíng lhang a wó kó nghut ri.

21 Yhâng é yhumbyù wuì gi, haú hkyô lé wó gyo kôjáng, "Yhang, myit a gying lo nghut ri." ga luí, Yhang lé hung shuí yù râ matú, e akô nghut ri.

22 Yerusalem wà mó mai gyó lé lo é tarâ sará pé gi, "Shí yuq gi, Bezebulaq gâ é nat gâng pê é zau lúng sù nghut ri-nhung! Yhang gi, nat zaû é wum-o a-tsam èq za, nat gâng pé lé hkat htoq pyâm é nghut ri." ga taí bum akô nghut ri.

23 Haú mù luí, Yesuq, yhangmoq lé wut yù mù, dangtú dong taí é gi, "Tsadán gi, Tsadán lé hkâsu kut wó hkat htoq râ lú?"

24 Mingdán ralhum gi, ahkaú má byoq gâng lhûm nyi kô é nghut jáng, mingdán haú wó gíng nyi râ a nghut.

25 Yhumhtu ralhum má le, ikun byù yhangchang byoq gâng lhûm nyi é nghut le gi, yhumhtu haú wó gíng nyi râ a nghut.

26 Haú eq rajung za, Tsadán le, yhânggùng yhang lhoq hpyoq luí, gam hkoq nyi é nghut le gi, yhang wó nyi nyi râ a nghut, htùm byuq râ za nghut lhê.

27 Ó yuq nghut kôle, wum-o bò sù lé hí tui zing pyâm é a nghut le gi, yhâng é yhûm má lú wâng mù, yhâng é sutzè lé wó lú yû râ a nghut: Haú yuq lé hí tui zing pyâm jáng sheq, yhâng é sutzè lé wó lú yû râ nghut lhê.

28 Ngò, nungmoq lé teng za taí kôlé, byu pé kut shut é

mara banshoq eq rhoí dang taí pyâm é pé lé gi, mara wó hkyut pyâm byí lhê.

29 Nghut kôlhang, haú Chyoiyúng Woi-nyí lé rhoí dang taí pyâm é sù gi, hkâ-nhám le, mara hkyut byí é wó hui râ a nghut; haú yuq gi, ahtum abyuq yubak wó sù nghut nyi ri." gâ ri.

30 Yhang haú su ga taí é gi, yhangmoq mai, "Yhang gi, agè ashop é nat wó sù nghut ri." ga kô é yanmai nghut ri.

Yesuq É Yhângnu Eq Yhanggu Pé

Mht 12:46-50; Luk 8:19-21

31 Hau htâng, Yesuq é yhângnu eq yhanggu pé gi, jé lé mù, yhûm hkun má yap to kôluí, Yesuq htoq lô râ matú, byù rayuq lé wang taí nhang akô nghut ri.

32 Byù ajùm ayò gi, Yhâng é lhíngkhyuq má zung tô akô; haú bang gi, Yhang lé, "Wú aq, náng nu eq nunggu pé gi, nang lé hui naú luí, shinggan má lág bum akô." ga taí kyô akô nghut ri.

33 Haú hkûn, Yhang gi, "Ô pé gi, Ngá nu eq Ngá gu pé nghut akô lú?" ga myi kat ri.

34 Hau htâng, Yhang gi, Yhâng é lhíngkhyuq má zung hkyuq tô é bang lé wú mù, taí é gi, "Shí bang gi, Ngá nu eq Ngá é gumang wuì nghut bê!

35 Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

4

*Kyôshi Sân É Dangtú**Mht 13:1-23; Luk 8:4-15*

1 Yesuq gi, không yàm má radàm dum mhoqshit hi lô bê nghut ri. Haú hkûn, Yhâng é lêngkhuyuq má byù moq mó lûm yán zîng lé lo bùm kô é yanmai, Yhang gi, không hkaú mã é lhaí mã wang zung tô ri; haú u lé, byù moq mó gi, không yàm gin-gau htoq má nyi míng bum akô nghut ri.

2 Yhang gi, haú bang lé, dangtú pé dông myo myo mhoqshit byi nyi ri; Yhang mhoqshit é má,

3 "Gyo wú keq! Kyô hkyô sù rayuq gi, kyôshi san râ gâ htoq e lô ri.

4 Yhang, kyôshi sân kat é hkûn, ra-am gi, hkyô má gyó ang mù, ngoq pê èq lé hte zô pyám ri.

5 Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle,

6 amyit a wó chin hing é nghut mù, bui htoq lô jáng, lhap kyuq pyám bê nghut ri.

7 Dum ra-am gi, zugyóm hkaú mã gyó ang lui, zubyap haú pé kô lò mù, wup pyám é yanmai, ashi a wó zui nghut ri.

8 Nghut kôlhang, ra-am gi, myihpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lhang, zui myô lo é nghut ri." gâ ri.

9 Hau htâng, Yesuq dum taí é gi, "Gyo yù râ nohkyap dap sù gi, gyô yù sháng gaq." gâ ri.

10 Yhang baú za nghut nyi é hkûn, haú lagyo raxe í yuq eq Yhang nàm mã nyi tô é bang gi, dangtú haú eq sêng é hkyô lé, lé myi akô.

11 Haú hkûn, Yhang, yhang-moq lé taí kyô é gi, "Garai Gasâng é mingdán eq sêng é sê gyo wui é hkyô lé sé gyo râ ahko ahkáng, nungmoq lé byi to lugù nghut bê. Nghut kôlhang, góbâng é matú gi, jung hkangmó lé dangtú dông chyat taí é nghut lhê.

12 Haú mù lui, 'Yhangmoq gi, myang nyi kôlhang, a wú sé kó, gyô nyi kôlhang, a sê gyo kó; sé wú sê gyo kô é ru nghut le gi, lêng taú lò mù, mara hkyut pyám byi é hui kó râ nghut lhê!'[☆] gâ ri." ga tô ri.

13 Hau htâng, Yhang, yhangmoq lé dum xoq taí é gi, "Nungmoq, dangtú shi lé a sê gyo kô é nghut le gi, gotú dangtú pé lé hkâsu kut ung sê gyo kó râ lúh?

14 Yò mù zui sù san kat é kyôshi gi, mungdang nghut lhê.

15 Byù ra-am gi, hkyô má gyó âng é kyôshi eq wui akô; yhangmoq gi, mungdang lé wó gyô yu é hkûn yhang, Tsadán gi, lé mù, yhangmoq chyáng mã é mungdang lé lé yù pyám byi ri.

16 Ra-am gi, luqgok yò pé má gyó âng é kyôshi eq wui akô; yhangmoq gi,

☆ 4:12 Esai 6:9-10

mungdang lé wó gyo jáng, radá dâm gabú myit èq hap yù akô.

17 Nghut kôlhang, yhangmoq gi, amyit a wó chin é yanmai, razup zo za yuq kômù, mungdâng é yanmai, wuîhke é eq zing-rî é pé hui kôjáng, hân hân htak ló byuq kó râ nghut lhê.

18 Dum ra-am nghut jáng, zugyóm hkaû má gyó âng é kyôshi eq wuí akô; yhangmoq gi, mungdang lé wó gyo yù kôlhang,

19 shí ipyat lhê é myit wui myit hke hkyô, hkyô shuí nghoq jung ngùn hîng zèhkoq eq gotû zè pé lé ô nau é hkyô pé, yhangmoq chyáng wang lò jáng, haû mungdang lé hup pyâm é yanmai, ashi a wó zui dut kó râ nghut lhê.

20 Ra-am kúm gi, myìhpún bo é jang má gyó âng é kyôshi eq wuí akô; yhangmoq gi, haû mungdang lé gyo yù mù, lhom yù luí, sân kat é htoq sum xê tú, hkyuq xê tú, rashô tú lhang myo shoq ashi zui lò kó râ nghut lhê." gâ ri.

Myibung Htûn É Hkyô
Luk 8:16-18

21 Yesuq, yhangmoq lé xoq taí é gi, "Nungmoq gi, myibung lé yù mù, tsungjang má a tsung e za, mûng eq nghop tô é, a nghut jáng, yhupchong ô má tsung tô é, ó yuq wá kut wú akô lhú?

22 Hkâsu mù gâ le, haq tô é zè hái jung le htoq ze lò râ eq, zaú tô é pé hái jung le byông htoq lô râ nghut lhê.

23 Gyô yù râ nohkyap dap sù ó yuq nghut kôle, gyo yù sháng gaq." gâ ri.

24 Hau htoq agó, Yhang dum taí é gi, "Nungmoq gi, wó gyo yu é hkyô lé rago myit wú keq; nungmoq lik byí é bung èq, nungmoq lé dum lik byi râ nghut lhê; hau htoq lhang myo shoq wó kó râ nghut lhê.

25 Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lhang yu pyâm byi shirâ nghut lhê." gâ ri.

Kyôshi Yuq Kô Lo É Dangtú

26 Hau htâng, Yhang dum xoq taí é gi, "Garai Gasâng é mingdán gi, byù rayuq mai, myigùng má sân kat é kyôshi eq wuí ri.

27 Byù haú yuq gi, myín lé yhup tô é nghut nghut, nyí lé toq lô é nghut nghut, kyôshi gi, zui htoq lô mù, yuq kô lo nyi ri; nghut kôlhang, yhang gi, hkâsu kut yuq lo nyi é hkyô lé a sé nghut ri.

28 Myigùng gi, yhang baú yhang, kyôshi lé, sâng-hi má abum bum nhâng, hau htâng má a-nhâm htoq nhâng mù luí, ashi zui shoq kut é nghut lhê.

29 Kyôshi myhíng jáng, kyô shu yoq jé bê nghut é yanmai, yhang gi, zaiyik èq yâm yù râ nghut lhê." gâ ri.

Angshi Cham Lé Dangtú
Yu É Hkyô

Mht 13:31-32; Luk 13:18-19

30 Yesuq dum xoq taí é gi, "Garai Gasâng é mingdán lé, hai èq lhoq whuí wú râ lhú?

Haí jung dangtú yù mù, shit wú râ lúh?

³¹ Garai Gasâng é mingdán gi, angshi cham eq wuí ri. Angshi cham haû gi, myigùng má hô é kyômyui jí pé má je tiq é nghut lê.

³² Nghut kôlhang, ho mù, yuq kô lô jáng, xun hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq kô lò luí, hau é buishûm hkaû má, maulat nghoq zô pé lé wó zung nô nyi é nghut lê." gâ ri.

³³ Haû sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri.

³⁴ Yhang gi, yhangmoq lé, dangtú a bo é haí lhang a taí wú nghut ri; nghut kôlhang, Yhang eq chángzô pé baú nghut nyi é hkûn kúm gi, jung hkanmó é lichyúm lé taí sân kyô ri.

*Laidun Mó Lé, Yesuq Lhoq
Zim Pyâm É Hkyô*

Mht 8:23-27; Luk 8:22-25

³⁵ Haû nyí, myinhâng lé, Yesuq gi, Yhâng é chángzô pé lé, "Nga-nhúng nhông hé hpoq shut dap e lô sháng." ga taí ri.

³⁶ Haú hkûn, chángzô pé gi, byù moq mó lé nyhi pyâm to luí, Yhang zung tô é lhai mai yhang, Yhang lé shuí gû dap lô bekô; gotú lhai pé le, yhangmoq eq rahá bo gû dap lô akô nghut ri.

³⁷ Haú u lé, laidun mó jé lô mù, wuìlhêng hta toq lô luí, lhai má lo bat hâng é yanmai, wui byíng lô bê nghut ri.

³⁸ Haú hkûn, Yesuq gi, lhai htâng má uhkuq hkuq mù yhup myhî tô ri; haû chángzô pé gi, Yhang lé nhaû pun luí "Sarâ ê, nga-nhúng myup shi lô râ dut é lé, nàng a chiq byi lúh?" ga taí akô nghut ri.

³⁹ Yesuq gi, toq mù, laidun lé tan luí, wuìlhêng lé, "Zim aq." ga taí kat jáng, haû laidun num lô byuq luí, banshoq zím byuq bê nghut ri.

⁴⁰ Hau htâng, Yhang gi, Yhâng é chángzô pé lé, "Haí mù, haû-í gyuq bum akô lúh? Nungmoq gi, lumjín myit a bò shi kó lúh?" ga taí ri.

⁴¹ Yhangmoq gi, gyai yhang gyuq dan bùm kômù, "Shí yuq gi, hkasû é byù nghut lê lha? Lai eq wuìlhêng pé lhang gi, Yhâng é dang lé gyo byí ri-nhung!" ga luí, rayuq eq rayuq myí lhum bum akô nghut ri.

5

*Nat Gang Hkat Htoq Pyâm
É Hkyô*

Mht 8:28-34; Luk 8:26-39

¹ Yhangmoq gi, nhông hé hpoq mâ é Gerase byu pé é mau má jé dap e lô akô.

² Yesuq lhai mai htoq lô é hkûn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huí ri.

³ Haú yuq gi, lupdùng má za nyi é sù nghut ri; yhang lé, ó yuq èq le, shamtoq-tuì èq lhang a wó tuí zing wú kó nghut ri.

⁴ Hkâsu mù gâ le, adàm dàm, yhâng é loq eq hkyí

má shamtoq-tuî èq tuî tô wú kôlhang, yhang gi, loq mâ é shamtoq-tui pé lé lêng hpyit pyám pyám kut mù, hkyî mâ é shamtoq kyum lé lhoq hkyop pyám pyám kut ri. Yhang lé, ó yuq èq le a wó hkuq yù kó nghut ri.

⁵ Yhang gi, nyí myín aga lupdùng eq bùm pé má puk garu uchyang, yhumsing gùng lé luqgok èq dún cheq wún ri.

⁶ Yhang gi, Yesuq lé, we mai myang kat jáng, din e ló mù, Yhâng é hí má hkyihput htuoq ngop luí,

⁷ htê mó èq, "Myhang htâng é Garaî Yhangzo Yesuq ê! Nàng gi, ngò eq haî sêng lhê lhú? Nàng gi, ngo lé a zing-ri râ matú, Garaî Gasâng hí má danggidiq byi laq." ga taî garú ri.

⁸ Haî mù gâ le, Yesuq gi, yhang lé, "Agè ashop é nat nàng ê, byù shí yuq chyáng mai htoq ló aq." ga taî kat é yanmai nghut ri.

⁹ Hau htâng, Yesuq gi, "Náng myîng haî gâ lhê?" ga, yhang lé myí jáng, yhang gi, "Ng-amoq gi, myo myo nghut é yanmai, Legio gâ lhê." ga tû taî ri.

¹⁰ Hau htâng, yhang gi, haú jowò mai yhangmoq lé a kôn pyám râ matú, Yesuq lé dum dung dung kut nyi ri.

¹¹ Haú u lé, waq rajùm mó gi, bùm yàm má dû but zô nyi bum akô nghut ri.

¹² Haú mù luí, nat gâng pé gi, "Ngamoq lé, waq pé

chyáng nhang kat luí, yhangmoq chyáng wàng nhâng laq." ga luí, Yesuq lé dung akô.

¹³ Haú hkûn, Yesuq gi, yhangmoq lé ahkáng byí kat jáng, haú agè ashop é nat pé gi, haú yuq chyáng mai htoq ló kôluí, waq pé chyáng wang ló byuq bekô nghut ri. Haú mù, haú í hkyîng kô bo é waq hpúng gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

¹⁴ Waq zúng bang gi, hpanq din wang ló kômù, myuq hkaú mâ é bang eq awuî ayàm mâ é bang lé, haú hkyô ló shit kyo kô é yanmai, byù haú bang gi, dut laî lò bê hkyô lé, è htoq wú akô nghut ri.

¹⁵ Yhangmoq gi, Yesuq chyáng jé lé kô é hkûn, nat gang myo myo wang júng wú é sù, mebu wut luí, byù gè rayuq su zung to lánq é lé myàng kômù, gyuq dan bùm bekô nghut ri.

¹⁶ Haú hkyô lé myang é bang gi, nat gâng pé wang júng sù eq waq pé chyáng hkâsu dut é hkyô, góbang lé taî kyo akô nghut ri.

¹⁷ Hau htâng, byu pé gi, Yesuq lé yhangmoq é mau mai htoq ló byuq râ matú, chôm dúng tôngbán akô nghut ri.

¹⁸ Yesuq lhaî hkaú má wang ló é u lé, haú nat gâng pé wang júng laî lò bê sù gi, Yesuq htâng cháng râ matú, Yesuq lé dung tôngbán ri.

¹⁹ Nghut kôlhang, Yesuq gi, yhang lé ahkáng a byi e za,

"Nàng, yhûm shut sheq ló mù, haú Yhumsîng, nang lé hkâ-í kut byi bê hkyô eq hkâsu kut shogyo nhikmyin yu é hkyô lé, nâng é yhumbyù buinùm ji-myi wui lé ló taí kyo aq." ga taí kat ri.

²⁰ Haú mù, byù haú yuq gi, ló luí, yhang lé Yesuq hkâ-í kut byi bê hkyô lé, Dekapoli* mau bang lé ló taí kyô ri. Haú hkûn, wó gyô é bang banshoq gi, mauhong bum akô nghut ri.

Shi Byuq Bê Myiwe Zo Eq No É Myiwe Myhi Rayuq É Hkyô

Mht 9:18-26; Luk 8:40-56

²¹ Yesuq gi, lhaí ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajùm ayò gi, Yhâng é lêngghkyuq má lé zîng bum akô nghut ri;

²² haú hkûn, Ya-iruy gâ é, tarajong má up bang mâ é rayuq gi, haú má lé luí, Yesuq lé myang kat jáng, Yhâng é hkyí wang má paí gop to mù,

²³ "Ngá zo byizo gi, kâng byit ló nyi ri; yhang ge lò mù asak dum duì shi sháng gaq, nâng lé mù, yhâng é ahtoq má loq lé ke byi laq." ga, wum kat dúng tôngbán nyi ri.

²⁴ Haú mù, Yesuq gi, haú yuq htâng châng e ló ri; byù ajùm ayò le, Yhâng é awui ayàm má châng chyín chyap wún bum akô.

²⁵ Haú hkûn, raxe í zân suí yui nyi é myiwe myhí rayuq le haú hpúng má bo tô ri.

²⁶ Yhang gi, chi sará myo myô pê chyáng yhang wó é ngunzè banshoq lhoq pán mù, nò hkâm luí yâ wú kôhang, ge é hkyô a joq é htoq agó, je lhang wuîhke lò ri.

²⁷ Yhang gi, Yesuq é hkyô lé wó gyo jáng, byù hpúng mai Yesuq é nunghtáng má huí lé mù, Yhâng é bu má ê záng kat ri.

²⁸ Haí mù luí gâ le, yhang gi, "Ngò, Yhang é bu má za lhang ê wó záng é nghut le gi, ge byuq râ nghut lê." ga wó myit é yanmai, haú su kut é nghut ri.

²⁹ Haú hkûn jáng, yhâng chyáng suí yui é kân byuq luí, yhang gi, hpuzô nyi é mai wó lut bê hkyô lé, yhânggùng má sê gyô kat bê nghut ri.

³⁰ Yesuq gi, Yhâng é gùng mai hpungwup a-tsam htoq ló é lé, radá dâm châng sê kat luí, byù moq mó shut lhing wú mù, "Ngá é bu má ó yuq záng bê lhu?" ga myi kat ri.

³¹ Haú hkûn, Yhâng é chángzô pé gi, "Nâng é lêngghkyuq má byù ajùm ayò chyín chyap nyi é lé, myang to luí nhîng, 'Ngo lé, ó yuq záng bê lhu?' nghú myi lè lhu?" ga tú taí kat akô.

³² Nghut kôhang, Yesuq gi, Yhang lé lé záng sù lé myàng râ matú, ho lhing wú nyi ashí nghut ri.

³³ Haú hkûn, myiwe myhí haú gi, yhâng chyáng hkâsu dut laí lò bê hkyô lé sê é yanmai, Yesuq é hí má lé mù, gyuq nán é èq Yhang é hkyí

* 5:20 Dekapoli gâ é gi, Grik đông myuq raxê lé gâ lê.

wang má ngóm gop to luí, yhang chyáng dut lai lò bê hkyô banshoq lé tai kyô ri.

³⁴ Haú mù, Yesuq gi, myiwe myhí haú lé, "Byizo ê, nang é lumjínq myit gi, nang lé lhoq gê byi bê nghut ri; nang é nòhpyo ge byuq bê nghut ri; ngón za ló aq hkoi!" ga tai ri.

³⁵ Yesuq gi, dang ru tai nyi ashí hkún, tarajong má up sú Ya-iruq é yhúm mai byù ram jé lé mù, "Nang é byizo gi, shi byuq bê; hai mù luí, haú sará lé lhoq hkyik nyi lhé lú?" ga luí, lé tai kat akô.

³⁶ Yesuq gi, haú bang tai é dang lé gyô hai pyám mù, "Hkâgyuq, za lumjínq aq." ga, haú tarajong má up sú lé tai kat ri.

³⁷ Hau htâng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htâng a cháng nhâng nghut ri.

³⁸ Yhangmoq, haú tarajong má up sú é yhúm má jé lé kô é hkún, Yesuq gi, byu pé garu garín ga yón ngau gabyông nyi bum é lé, myàng ri.

³⁹ Yhang gi, yhúmhaú shut wanglò mù, haú bang lé, "Hai mù, yón ngau gabyông nyi bum akô lú? Haú zoshâng gi, shi byuq é a nghut, yhup myhí tô é sheq ru nghut lhê." ga tai ri.

⁴⁰ Nghut kôlhang, yhangmoq gi, Yhang lé wuizui kut pyám byi akô.

Yhang kúm gi, haú bang banshoq lé hkat htoq pyám mù, zoshâng é yhângnu yhângwa nhik eq Yhâng é

chángzô pé lé za shui luí, zoshâng lé lheq tô é gok má wang e akô nghut ri.

⁴¹ Yesuq gi, myiwe zo hau é loq má zuí to mù, "Talihta kumi" (haú é lichyúm gi, "Myiwe zo ê, ngò, nang lé tai bá, toq aq." gâ é nghut lhê.) ga tai ri.

⁴² Myiwe zo haú gi, haú hkún jáng, toq luí, sô wún ri (yhang gi, asak raxe í zân bò bê sú nghut ri.). Yhangmoq gi, haú sú dut é hkyô lé gyaí yhang maú byuq bùm bekô nghut ri.

⁴³ Yhang gi, haú hkyô ó lé le a sé nhâng râ matú, yhangmoq lé tai hkúm kat luí, myiwe zo haú lé, zô jung byi tso râ matú le, yhangmoq lé tai ri.

6

Yhumsing Wà Má Myoq-dong A Wó É Hkyô

Mht 13:53-58; Luk 4:16-30

¹ Yesuq gi, haú jowò mai htoq e ló mù, Yhâng é yhum mau shut taú ló ri; Yhâng é chángzô pé le, Yhang eq rahá bo châng ló akô nghut ri.

² Bánno buinyi jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, "Byù shí yuq gi, haú pé lé hkámá mhoq yu é là? Yhang wó yu é hpaqchyí byéng-yá gi, hkasú é wá nghut mù luí, laklai kumlhá lé lhang kut lhé laq?

³ Shí yuq gi, Mariq é yhangzo, laksíma hpó nghut lhê, a nghut lú? Yhang gi, Yakuq, Yose, Yudaq, Simun

pê é yhangmang nghut lhê, a nghut lú? Yhâng nhammó pé le, nga-nhung eq rahá nghut nyi lhê, a nghut kó lú?" ga luí, Yhang lé myit a ngón dut bùm bekô nghut ri.

⁴ Yesuq, yhangmoq lé taí é gi, "Myiqhtoi rayuq gi, yhum-sing é yhum mau, yhâng é buinùm ji-myi wuì eq yhum-sing é yhùm má za, myoqdong a lhaq wó wú é nghut lhê." gà ri.

⁵ Yhang gi, nò byù ra-am lé loq ke byi mù, lhoq gê byí é mai lai luí, gotú laklaí kumlhá haí le, haú má a wó kut shit nghut ri.

⁶ Haú mù, Yesuq gi, yhangmoq lumjínq myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

Lagyo Raxe Í Yuq Lé Nhang Htoq Kat É Hkyô

Mht 10:5-15; Luk 9:1-6

⁷ Yesuq gi, haú lagyo raxe í yuq lé wut yù mù, agè ashop é nat pé lé ûng râ a-tsam byi luí, í yuq yuq kut nhang htoq kat ri.

⁸ Yhang, yhangmoq lé châng pying kat é dang gi, "Hkyowuì é matú má, dumbáng mai lai luí, zoshuq le, etap le, ngùn le, gotú haí le, hkâyú chûng kó;

⁹ hkyî-tsung kúm gi, tsûng chûng keq; nghut kôlhang, bu í dung hkâwut chûng kó.

¹⁰ Hká má nghut kôlhang, rayhùm yhùm má nungmoq wang bínq kô é nghut le gi,

haú wâ mai dum htoq ló é buinyì jé shoq, haú yhùm má za nyi nyi keq.

¹¹ Jowò rawò wò mâ é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyâm to mù, haú jowò mai htoq ló keq." gà ri.

¹² Haú mù, yhangmoq gi, htoq e ló luí, myit lhíng rá é hkyô, byu pé lé hkô kyô akô.

¹³ Hau htoq agó, yhangmoq gi, nat gâng pé myo myo lé hkat htoq pyám byi mù, no é bang myo myo lé le xú but byi luí, lhoq ge byí akô nghut ri.

Yohan, Ulhum Hpyit Huí é Hkyô

Mht 4:1-12; Luk 9:7-9

¹⁴ Yesuq é mying hú lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, "Shí yuq gi, haú shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haú pé lé wó kut é nghut ri." ga luí, taí bum akô nghut ri.

¹⁵ Ra-am gi, "Yhang gi, Eliyaq nghut ri." ga taí akô nghut ri.

Dum, ra-am taí kô é gi, "Yhang gi, hí hpyang lhê é myiqhtoi pé su, myiqhtoi rayuq nghut ri." gà ri.

¹⁶ Herut kúm gi, haú lé wó gyo jáng, "Ngò, ulhum hpyit pyám byí é Yohan gi, shi é mai

dum dui toq bu-nhung!" ga taî ri.

¹⁷ Herut gi, yhanggu Hpilip é yhangmyi Herudiaq lé hâng yu pyâm é hkyô é yanmai, Yohan lé chyup tuî yù nhâng mù, htóng hkyô pyâm nhang wú é sù nghut lhê.

¹⁸ Hkâsu mù gâ le, Yohan gi, Herut lé, "Nàng, nunggu é yhangmyi lé hâng yu é gi, tarâ a wang é nghut lhê." ga luî, taî byî nyi é yanmai nghut ri.

¹⁹ Haû mù, Herudiaq gi, Yohan lé gyai a jú dut byuq luî, sat pyâm naû kôlhang, a wó sat dut nyi ri.

²⁰ Haî mù gâ le, Herut gi, Yohan, dingmán chyoyúng é sù nghut é lé sé mù luî, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôlhang, yhang taî é dang pé lé ru gyô nau nyi ashî nghut ri.

²¹ Nghut kôlhang, Herut gi, yhâng é hkû ladu hkyúm buinyi má, byù mó pé, gyezau pé, Galile mau suwún wui pé lé, ji yù mù zoshuq poi mó kut é yanmai, haû nyi gi, Herudiaq é matú, buinyi gè dut bê nghut ri.

²² Herudiaq é yhangzo byizo gi, wang lé lô mù, gó shit é hkûn, Herut eq yhâng é bíng pé gi, myit ngón bum akô nghut ri.

Haû mù, hkohkâm gi, myiwe zo haû lé, "Nàng ô nau é haî nghut kôle, dung aq, ngò nàng lé byi râ nghut lhê." ga, dakam é danggidiq byî ri.

²³ Hau htoq agó, yhang gi, myiwe zo haû lé, "Nàng dung é haî nghut kôle, ngò byi râ; ngá é mingdán rawuí gû lháng, byi râ nghut lhê." ga, dakam é danggidiq byî ri.

²⁴ Haû hkûn, myiwe zo haû gi, htoq lô mù, yhâng nu lé, "Haî dúng le gè râ laq?" ga myi jáng, yhângnu gi, "Wui-myhup Sará Yohan é ulhum dung aq." ga tû taî kat ri.

²⁵ Myiwe zo haû gi, radá dâm hân hân wang lô mù, hkohkâm lé, "Ahkuî yhang, Wui-myhup Sará Yohan é ulhum lé, bó má kat mù byi laq." ga, dúng tôngbán ri.

²⁶ Haû su ga jáng, hkohkâm gi, myit gyai yhang a ngón dut byuq kôlhang, yhang dakam tô é danggidiq é yanmai le, bíng pê é myoqdong lé tê nau é yanmai le, myiwe zo haû taî é dang lé a kâm he pyâm lo nghut ri.

²⁷ Haû mù, hkohkâm gi, zúng é gyezo rayuq lé, Yohan é ulhum ê hpyit lô râ matú, radá dâm hkunmó hkyó mù nhang kat ri. Haû mù, haû yuq gi, htóng hkaû má ê luî, Yohan é ulhum lé, ê hpyit mù,

²⁸ bó má kat luî, myiwe zo haû lé lo byî ri; myiwe zo haû gi, ulhum haû lé, yhângnú chyáng yu lô byî ri.

²⁹ Yohan é chángzô pé gi, haû hkyô lé wó gyo kôjáng, yhâng é mâng lé lé yû luî, lup má lô myhup pyâm bekô nghut ri.

Byù Ngo Hkyîng Lé Byi Tsô É Hkyô

Mht 14:13-21; Luk 9:10-17;

Yhn 6:1-14

30 Lagyo pé gi, Yesuq chyáng dum jé zîng lò kômù, yhangmoq kut lai lo é hkyô pé eq mhoqshit bê hkyô pé banshoq, Yhang lé taî kyô akô nghut ri.

31 Hau htâng, byù myo myo gi, yhangmoq chyáng htoq htoq wàng wàng kut nyî kô é yanmai, yhangmoq gi, zang zo ahkying lháng a wó kô nghut ri. Haû mù, Yesuq gi, chángzô pé lé, "Nga-nhúng, tsím tsâm é jowò ralhú má é mù, é nô yù sháng." ga taî ri.

32 Haû mù, yhangmoq gi, yhangmoq baú lhai racham má ji mù, tsím tsâm é jowò shut e ló akô nghut ri.

33 Nghut kôlhang, yhangmoq e ló é lé châng myang é bang myo myo gi, yhangmoq lé wú sé kôluî, wà hkanmó mai hkyî hkyô châng din é kômù, yhangmoq é hí má jé to láng akô nghut ri.

34 Yesuq gi, lhai mai gyó dap ló é hkûn, byù moq mó nyî to láng lé myàng jáng, yhangmoq gi, zúng sú a nyî é sau pé su dut kô é yanmai, yhangmoq lé wú shogyo luî, myo myo mhoqshit byî hi ló bê nghut ri.

35 Bui gyum ló yâm jé jáng, Yhang é chángzô pé gi, lé lô kômù, Yhang lé, "Shí má gi, tsím tsâm é jowò nghut é htoq agó, bui le gyum ló bê;

36 yhangmoq gi, awui ayàm mâ é yhúm pé eq wà pé má, zoshuq ló ho wui zo kó sháng

gaq, yhangmoq lé ló nhâng aq hkoi." ga taî akô nghut ri.

37 Haû hkûn, Yhang gi, "Nungmoq, yhangmoq lé rajung jung byi tso keq." ga tû taî jáng, yhangmoq gi, "Shî myhó é bang zo râ matú, ngamoq gi, ê luî, denari* í sho èq muk é wui byi ra râ luq?" ga dum taû myî akô nghut ri.

38 Nghut kôlhang, Yhang gi, "Nungmoq chyáng muk hkâm-yhó wó akô? Ê wú wú keq." ga myî ri. Haû mù, yhangmoq gi, myang hô jáng, "Muk ngo long eq ngozo í du wó lhê." ga, dum tû taî akô nghut ri.

39 Hau htâng, Yesuq gi, banshoq bang lé ahpúng hpúng kut wàhu yò má zùng nhâng râ matú, Yhâng é chángzô pé lé taî kat ri.

40 Haû mù, shiwa byu pé gi, rashô shô kut le, ngo xê xê kut le, ahpúng hpúng zung tô bùm bekô nghut ri.

41 Yesuq gi, haû muk ngo long eq ngozo í du lé yù mù, mauhkûng shut tu wú to luî, jeju ban hkya-on jáng, muk lé hpê gam ri. Hau htâng, Yhang gi, byu pê hí má châng hkat to byi râ matú, Yhâng é chángzô pé lé byî ri. Ngozo í du lé le, Yhang yù mù, banshoq bang lé gàm byî ri.

42 Yhangmoq banshoq bang gi, zô gyî bùm bekô nghut ri.

43 Hau htâng, haû chángzô pé gi, zô myhit tô é muk eq ngozo lé, raxe í mung byíng

* 6:37 Denari rachap gi, byù rayuq é ra-nyî lhê é zuihpau eq wui ri.

shoq wó guq tsîng yu ashî kó nghut ri.

⁴⁴ Haú hkûn, zô é bang gi, yuqgè wuì baú lhang, byù du ngo hkyîng nghut ri.

Yesuq, Wuì Htoq Má Sô É Hkyô

Mht 14:22-33; Yhn 6:15-21

⁴⁵ Yesuq gi, haú shiwa byu pé lé byo ló nhang nyi é hkûn jáng, Yhâng é chángzô pé lé lhai má wang ji nhâng mù, tû tap mâ é Bet-saida wà mó shut dap ló lán nhang ri.

⁴⁶ Yhangmoq lé shi-kyâm kat é htâng, Yhang gi, kyûdung râ ga, Yhang baú bùm shut doq e ló bê nghut ri.

⁴⁷ Buigyum htâng, lhai gi, nhông gùng má jé tô é u lé, Yesuq gi, Yhang baú za myì htoq má nyi tô ashî nghut ri.

⁴⁸ Lài tau mut é yanmai, haú chángzô pé gi, lhai lhu wuìhkê nyi kô é lé, Yesuq myang ri. Napsûn maubó zó sum hkyîng eq hkyuq hkyîng gyoro má, Yesuq gi, nhông htoq má so mù, yhangmoq shut e ló luí, yhangmoq é nàm mai lai ló râ dâ ri.

⁴⁹ Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyek garû bum akô nghut ri.

⁵⁰ Hkâsu mù gâ le, yhangmoq banshoq bang gi, Yhang lé myàng kôluí, gyuq dàn kô é yanmai nghut ri.

Nghut kôlhang, Yhang, radá dâm yhangmoq lé dâng nyo kat é gi, "Hkâgyuq kó. Ngò ru nghut lhê; zim za nyi keq." gâ ri.

⁵¹ Hau htâng, Yhang gi, lhai htoq má yhangmoq eq rahá ê doq ji jáng, lài gi, zîm byuq bê nghut ri; haú mù, yhangmoq gi, gyai yhang mauhong byuq bùm bekô nghut ri.

⁵² Hkâsu mù gâ lé, yhangmoq gi, muk gam é laklai kumlhá eq séng luí a sê gyo kô é htoq agó, myitbun a bóng kô é yanmai nghut ri.

⁵³ Yhangmoq gi, gû dap ló kômù, Genesarat mau má jé wang lò jáng, lhai lé haú má ló shap tô akô nghut ri.

⁵⁴ Yhangmoq lhai mai gyó é hkûn jáng, byu pé gi, Yesuq lé lhom wú sê akô nghut ri.

⁵⁵ Haú mù, yhangmoq gi, haú mau ramau gón má din jón mù, nò bang lé taphkang mai waq luí, Yesuq nyi rí gâ é jowò hkangmó má, shuí lé lo bum akô nghut ri.

⁵⁶ Yesuq jé é wà hkangmó, myuq hkangmó, awui ayàm mâ é wà hkangmó pé má, yhangmoq gi, nò byù lé gai pé má lé lhez to kôluí, Yhâng é bushi htâng má za lhang, haú bang lé byi záng nhâng râ matú, Yhang lé dúng tôngbán akô. Yhang lé záng é lhunglhang bang gi, lhoq gè byí é huí akô nghut ri.

7

A Sanséng Dut Nhang É Hkyô Pé

Mht 15:1-20

¹ Haú Hparishe pé eq tará sará pé ra-am gi, Yerusalem wà mó mai jé lé lô kômù, Yesuq é nàm má lé zup zîng bum akô.

2 Haú hkûn, Yhâng é chángzô pé ra-am gi, htûngli dông a chí pyâm é, a sansêng é loq èq zo shuq nyî kô é lé, yhangmoq myang akô nghut ri.

3 (Hparishe pé eq Yudaq byù banshoq bang gi, yhangmoq é íchýí îwâ pé é htûngli lé châng é bang nghut lhê mù luí, loq hí a chí é gi, haí le a zô wú kó nghut ri.)

4 Yhangmoq gi, gài pé mai taù lò jáng le, gùng hí a chí pyâm é, zojung a zo kó nghut é htoq agó, góm pé, hkoq pé, gyi chônkon pé lé chí é htûngli gotû pé lé le, châng akô nghut ri.)

5 Haù mù, Hparishe pé eq tarâ sará pé gi, Yesuq lé, "Náng é chángzô pé gi, haí mù luí, íchýí îwa pé é htûngli lé a châng e za, a sansêng é loq èq zo shuq nyi akô lúh?" ga myî akô.

6 Haù hkûn, Yesuq gi, yhangmoq lé, "Gegùn labyoq kut bang é, nungmoq eq séng luí myiqhtoi Esai-aq htoí tô é dang má,

'Byù shí bang gi, nhut htoq mai za Ngo lé hkunggâ akô; yhangmoq é myit nhiklhum gi, Ngò eq wê gâng nyi akô.

7 Yhangmoq gi, akôm má za, Ngo lé noqkuq nyi akô; hkâsu mù gà le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.'^{*}
ga kâ tô é gi, têng ri.

8 Nungmoq gi, Garai Gasang tô tô é hkunmó lé tô pyâm luí, byu é htûngli lé za, myhik zing tô akô nghut ri." ga luí tû taí ri.

9 Hau htâng, Yhang xoq taí é gi, "Nungmoq gi, yhumsing é htûngli lé za châng râ matú, Garai Gasâng é hkunmó lé hengik pyâm é má, hpaqchyí gyaí bo akô nghut ri.

10 Hkâsu mù gà le, Mosheq gi, 'Nungmoq é înu îwa lé, hkungga keq.'^{*} ga le, 'Înu îwa lé, nhing é sù ó yuq nghut kôle, sat pyâm é hui râ lhê.'^{*} ga le, kâ tô é nghut lhê.

11 Nghut kôlhang, nungmoq taí é gi, byù rayuq yuq, yhumsing é yhângnu yhângwa lé byi âng é zè lé, Korban za (Garai Gasang lé byi râ chyunghuq) nghut lhê gá nhang akô.

12 Haù mù, haù yuq lé, yhângnu yhângwâ é matú, haí a kut byi nhâng lô é dông dut bê nghut ri.

13 Haù dông mai, nungmoq gi, nungmoq chung gyó lo é htûngli é yanmai, Garai Gasâng é mungdang lé hengik pyâm akô; haù sù é hkyô myo myo lé le, nungmoq kut akô nghut ri." gà ri.

14 Yesuq gi, shiwa byu pé lé Yhâng chyáng dum wut yù mù, taí é gi, "Nungmoq banshoq bang, ngò taí é lé gyô yù mù, sé lo keq;

15 Shinggan mai wang lo é haí jung le, byù lé a sanséng dut nhang é a nghut, nghut kôlhang, byu é unghkaù mai

* 7:7 Esai 29:13

* 7:10 Htoq Ló 20:12

* 7:10 Htoq Ló 21:17

htoq ló é zè kúm gi, byù lé a sanséng dut nhang lhê." gâ ri.

16 (Gyo râ nohkyap dap é sù gi, gyô yù sháng gaq.)" ga taí ri.*

17 Yhang gi, byù moq mó mai htoq ló mù, yhúmkaû má jé wang ló é hkún, Yhâng é chángzô pé gi, dangtú haú eq séng luí, Yhang lé lhom myí akô nghut ri.

18 Haú mù, Yhang gi, yhangmoq lé, "Nungmoq gi, haú-í yhang go akô luq? Shinggan mai wang lo é haí jung le, byù lé a sanséng nhâng wó dut râ a nghut é hkyô lé, a sé kó lúh?

19 Hkâsu mù gâ lé, haú gi, byu é myit nhiklhum hkaû má wang ló é a nghut e za, wamdau hkaû má sheq wang ló é nghut mù, shinggan shut dum lhoq htoq pyâm é nghut lhê." ga taí ri. (Yhang isu ga taí é gi, zoshuq lhunglhang sanséng lhê gá nau é dông nghut ri.)

20 Hau htoq agó, Yhang xoq taí é gi, "Byù mai htoq ló é haí jung le, byù lé a sanséng nhâng wó dut é nghut lhê.

21 Hkâsu mù gâ lé, ahkaû mai htoq lo é gi, byu pé é myit mai htoq ló é nghut mù, agè ashop é dông myit é hkyô pé, ashop é dông gungsho zùm yap é hkyô, hkaû é hkyô, byù sat é hkyô, su-myi sulàng lú hkyô,

22 myoqnoq é hkyô, agè ashop é hkyô, mhaú zô é

hkyô, achag achyut zùm yap lhúm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê;

23 Agè ashop é hkyô shí pé banshoq gi, byu é unghkaû mai htoq lo é nghut mù, byù lé a sanséng dut nhang ri." gâ ri.

*Tungbau Myiwe Myhi
Rayuq É Lumjing Myit
Mht 15:21-28*

24 Yesuq gi, haú jowò mai htoq ló mù, Turuq eq Sidun maukyo shut e ló luí, yhúm rallhum má wang ê ri; Yhang nyi é hkyô lé, ó yuq lé lé a sé nhâng nau kôlhang, a wó zaú to nghut ri.

25 Haú mù, agè ashop é nat wang jung tô é myiwe zo rayuq é yhângnu gi, Yhang nyi tô é hkyô lé wó gyô é hkún jáng, Yhâng chyáng jé lé mù, Yhâng é hkyô wang má lé paí gop to luí,

26 yhang zô chyáng mai nat gang lé hkat htoq pyâm byi râ matú, Yhang lé dúng tôngbán ri. Myiwe haú gi, Suru-Hpiniki mau má é Grik byuhú nghut ri.

27 Yesuq gi, "Zo wui† hí zô gyi kó sháng gaq; haí mù gâ le, zô wui chyáng má é zoshuq lé yù mù, hkuí pé‡ lé byi tsô é jung a nghut." ga yhang lé taí kyô ri.

28 Haú hkún, yhang gi, "Yhumsing ê! Haú kúm nghut ri; nghut kôlhang, siboí ô má é

* 7:16 Bun zo shí gi, Chyúmlaiká ra-am má bo lhê, ra-am má a bò. † 7:27 Zo wui gâ é gi, Yudaq byu pé lé gâ é nghut lhê. ‡ 7:27 Hkuí pé gâ é gi, tungbau pé lé gâ é nghut lhê.

hkuí lhang, zô wui é zô myhit shuq htâng lé, ge zo lhê a nghut lhu?" ga dum tâ ri.

²⁹ Haú mù, Yesuq gi, yhang lé, "Nàng tâ taí é dang hau é yanmai, ló lo aq hkoí; haú nat gang gi, nung zô chyáng mai htoq ló byuq bê nghut ri." ga taí kat ri.

³⁰ Myiwe myhí haú gi, yhûm má dum taú jé lo é hkûn, yhang zo chong htoq má leq to lánq é lé le, nat gang htoq byuq bê nghut é lé le, lo myang ri.

Nojit É Eq Dang A Hkyang É Sû Lé Lhoq Gê Byí É Hkyô

³¹ Yesuq gi, Turuq mau mai dum htoq ló mù, Sidun mai sô laí ló luí, Dekapoli mau hkaú dông laí byit mù, Galile nhông shut gyó jé ló ri.

³² Haú hkûn, byù ra-am gi, nojit é eq dang a hkyang é byù rayuq lé, Yhâng chyáng shuí lé lô kômù, haú yuq é ahtoq má loq ke byi râ matú, Yhang lé dúng tôngbán akô nghut ri.

³³ Yesuq gi, haú yuq lé baú za byù hpúng mai shuí htoq yû mù, yhâng é nohkyûng má loqnyhui htaú háng byi luí, sôkan byé tik yû mù, haú yuq é shô má htau byi ri.

³⁴ Hau htâng, Yhang gi, mauhkûng shut tu wú mù, soq mó shê luí, "Ehpahta!" (Lichyúm gi, "Bóng aq hkoí!") ga luí, haú yuq lé taí kat ri.

³⁵ Haú hkûn, haú yuq é nohkyap le bóng byuq luí, shô le nyhôm byuq mù, balang hkyáng hkyáng dang wó nyô bê nghut ri.

³⁶ Yesuq gi, haú hkyô ó lé le a taí kyo râ matú, yhangmoq lé hkúm kôlhang, yhangmoq gi, je hkúm le, je taí pyo akô nghut ri.

³⁷ Byu pé gi, gyai yhang mauhong byuq bùm kôluí, "Yhang gi, haí lé le, ge é dông chyat kut ri; nojit sù lé, wó gyo shoq, dang a hkyáng sù lé, wó nyô shoq, kut byi bê nghut ri." ga luí, taí bum akô nghut ri.

8

Byù Myi Hkyîng Lé Byi Tsô É Hkyô

Mht 15:32-39

¹ Haú yoq má, gotû byù moq mó gi, lé zîng bum akô; haú bang zoshuq langhpyut to kô é yanmai, Yesuq gi, Yhâng é chángzô pé lé wut yù mù,

² "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri.

³ Yhangmoq chyáng mâ é ra-am gi, mau we mai lé é bang nghut é yanmai, yhangmoq lé, zòmut gû yhûm shut nhang kat é nghut le gi, hkyolat má mutyut yut é ló hui kó râ nghut lhê." ga taí ri.

⁴ Haú hkûn, Yhâng é chángzô pé gi, Yhang lé, "Ísu é yoso má nhîng, shí myhò bang lé luq shoq byi tso râ zoshuq gi, hkâmá ê yû râ lhu?" ga taí akô.

⁵ Yesuq gi, "Nungmoq, muk hkâ-myhó long wó akô lhu?" ga taú myi jáng, yhangmoq gi,

"Nyhit long." ga, dum tũ tai akô nghut ri.

6 Haũ mù, Yhang gi, byũ hpũng lé myigũng htoq má zũng nhang to luĩ, muk haũ nyhit long lé yũ mù, jeju ban hkya-on jáng, myhik hpé luĩ, haũ bang lé gãm byi rã matũ, Yhãng é chãngzô pé lé byĩ kat ri; haũ mù, yhangmoq gi, haũ bang lé gãm byĩ akô nghut ri.

7 Yhangmoq gi, ngo-nũ zo ratsuĩ le wó akô nghut ri; haũ mù, Yhang gi, ngozo haũ pê é matũ jeju hkya-on luĩ, chãngzô pé lé dum gãm byĩ nhang ri.

8 Yuq hkgãmó zô gyĩ bũm kô é htãng má, haũ chãngzô pé gi, amyit ahtãng lé nyhit mung byĩng shoq wó guq tsĩng yu ashĩ kó nghut ri.

9 Zô é bang gi, byũ myi hkyĩng kô nghut ri; Yesuq gi, haũ bang lé, nhang kat luĩ,

10 Yhãng é chãngzô pé eq rahá, lhaĩ má wang jĩ mù, Dalamanuhta mau má ê jé akô nghut ri.

11 Hparishe pé gi, lé mù, Yesuq eq dang htĩng htĩng lhũm akô; hau htoq agó, yhangmoq gi, mauhkũng mã é kumlhá lé dũng é dũng, Yhang lé chyam wũ akô nghut ri.

12 Yesuq gi, myit nò-kying kying luĩ, yhangmoq lé tai é gi, "Haĩ mù luĩ, shĩ ipyat lhè é byu pé gi, limik kumlhá dũng akô lú? Ngò teng za tai kôlé, shĩ ipyat mã é bang lé, hai kumlhá le tũn shit rã a

nghut." gã ri.

13 Hau htãng, Yhang gi, yhangmoq lé pyãm to mù, lhaĩ má dum taũ wang ló luĩ, tũ tap shut gũ dap e ló bê nghut ri.

Hparishe Pé Eq Herut É Mũnchi

Mht 16:5-12

14 Haũ chãngzô pé gi, muk yu chũng rã lé tũ-myhĩ pyãm kôluĩ, lhaĩ hkaũ má muk ralong za ru wó akô nghut ri.

15 Yesuq gi, yhangmoq lé, "Nungmoq gi, Hparishe pé eq Herut é mũnchi* lé, sidiq luĩ, koi pyãm nyi keq." ga tai ri.

16 Haũ hkũn, yhangmoq gi, "Nga-nhũng chyáng muk a bo é yanmai, haũ su ga tai é nghut ri." ga luĩ, rayuq eq rayuq tai lhũm bum akô nghut ri.

17 Haũ su ga tai lhũm nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haĩ mù tai lhũm nyi akô lú? Ahkuĩ jé shoq, nungmoq gi, a byu-myàng, a sê gyo shĩ kó lú? Nungmoq é myit nhikhũm gi, ru htan nyi ashĩ kó lú?

18 Myoq dap to kôluĩ nhĩng, a myàng kó lú? Nohkyap dap to kôluĩ nhĩng, a wó gyo kó lú?

19 Ngò, muk ngo long lé myhik hpé mù, byũ ngo hkyĩng lé byi tsô é hkũn, zô myhit shuq htãng lé, nungmoq hkã-myhó mung wó guq tsĩng yu é lé, bun ashĩ kó lú?" ga myi jáng,

* 8:15 Shĩ má tai é mũnchi gi, Hparishe pé eq Herut é mhõqshit hkyô lé, lhoq pyo é lé gã lhè.

yhangmoq gi, "Raxe í mung." ga tũ taí akô.

²⁰ Dum, Yesuq gi, "Ngò, muk nyhit long lé myhik hpé mù, byù myi hkyîng lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsîng yù kô é lhú?" ga myi jáng, yhangmoq gi, "Nyhit mung." ga dum tũ taí akô.

²¹ Haú hkûn, Yesuq gi, "Haú nghut le nhîng, ahkuí le, a sê gyo shi kó lhú?" ga, yhangmoq lé myí ri.

Myoqjit Sũ Rayuq Lé Lhoq Gê Byí É Hkyô

²² Yhangmoq gi, Bet-saida và mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lô mù, haú yuq lé záng byi râ matú, dúng tóngbán akô.

²³ Yesuq gi, myoqjit sũ haú yuq é loq lé zui mù, và shing-gan shut shuí htoq lô luí, yhâng é myoq má sôkan byé tik byi mù, loq ke byi luí, "Nàng, rajung jung lé myang ri lhú?" ga myí kat ri.

²⁴ Haú jáng, yhang gi, tu wú kat luí, "Byu pé gi, sikgâm su dut luí, hkyô sô wún é lé, ngò myang ri." ga taí ri.

²⁵ Hau htâng, Yesuq gi, haú yuq é myoq má Yhâng é loq dum ke byí ri; haú hkûn, haú yuq é myoq gi, bóng lô mù, ge byuq luí, haí lé le san za myàng bê nghut ri.

²⁶ Yesuq gi, haú yuq lé, "Wà hkaú má hkâwang lô lo." ga

taí luí, yhâng é yhùm shut lô nhang kat bê nghut ri.

Hkrisduq Ga, Petruq Yín Yu É Hkyô

Mht 16:13-20; Luk 9:18-21

²⁷ Yesuq eq Yhâng é chángzô pé gi, Kesare-Hpilipi và mó awui ayàm mâ é và pé shut e lô é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, taí akô lhú?" ga myí ri.

²⁸ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoí rayuq yuq nghut ri ga taí akô." ga, Yhang lé tũ taí akô.

²⁹ Yesuq gi, "Nungmoq gi, ngo lé ó yuq nghut lhê nghu akô lhú?" ga, yhangmoq lé xoq myi jáng, Petruq gi, "Nàng gi, Hkrisduq[†] nghut ri." ga tũ taí ri.

³⁰ Yesuq gi, haú hkyô ó lé le a taí kyo râ matú, yhangmoq lé taí hkúm ri.

Byu Yhangzo Gi, Sat Pyâm É Hui Luí, Dum Dui Toq Râ Hkyô

Mht 16:21-28; Luk 9:22-27

³¹ Hau htâng, Yhang gi, yhangmoq lé mhoqshit é má, "Haú Byu Yhangzo gi, zing-rí é myo myo hui zo luí, suwún wuí, hkyangjong agyi pé, tarâ sará pé èq he-ngik pyâm é hui mù, sat pyâm é hui ra râ nghut lhê; nghut kôlhang, sum nyí nghû râ buinyi má, dum dui toq râ nghut lhê." gâ ri.

[†] 8:29 Grik dong *Hkrisduq* gâ é gi, xũ but hui Sũ gâ é lichyúm nghut mù, Hebre dong "Mesaia" gâ é eq rajung za nghut lhê.

32 Yesuq gi, haú hkyô lé san za dut shoq taí nyi é yanmai, Petruq gi, Yhang lé rahkyam shut shuí htoq yû mù, Yhang lé tân ri.

33 Nghut kôlhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

34 Hau htâng, Yhang gi, byù moq mó eq Yhâng é chángzô pé lé wut yù mù, taí é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyám mù, yhumsing é tapzîng lé waq chûng luí, cháng ra râ nghut lhê.

35 Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai le, haú gabú danglù é yanmai le, yhumsing é asak sùm pyám é sù kúm gi, asak hkyi yu é hui râ nghut lhê.

36 Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhâng é matú, hai akyû bò râ lhú?

37 Byù gi, yhumsing é asak woi-nyí lé, hai èq wó htaí yù râ lhú?

38 Yubak mara myô é eq su-myí sulàng shut é ipyat shí má, Ngò eq Ngá é dang lé hoq pyám é sù ó yuq lé le, haú Byu Yhangzo gi, Yhâng Wâ é hpungwup shingkan bo é

èq, haú chyoiyúng maumang lagyô pé eq rahá jé lé é hkûn, hoq pyám râ nghut lhê."^{*} gâ ri.

9

1 Hau htâng, Yesuq gi, yhangmoq lé, "Ngò, nungmoq lé teng za taí kôlé, shí má yap tô é bang ra-am gi, Garai Gasâng é mingdán, hpungwup a-tsâm èq jé lé lo é lé, a myang é za shí kó râ a nghut." ga taí ri.

Yesuq É Ihyô Isâm Htaí Lo É Hkyô

Mht 17:1-13; Luk 9:28-36

2 Hkyuq nyí laí htâng má, Yesuq gi, Petruq lé le, Yakuq eq Yohan lé le, shuí chûng mù, yhangmoq baú myhang é bùm ralhú má doq ló akô; haú hkûn, yhangmoq é myoq hí tê má, Yesuq é ihyô isâm htaí lo ri.

3 Hau htoq agó, Yhâng é mebu gi, wik wik duq hpyu zan lo ri; myidàm htoq má, ó yuq le haú-í hpyû shoq a wó xaú hpyu wú é nghut lhê.

4 Eliyaq eq Mosheq gi, yhangmoq é hí má htoq shit mù, Yesuq eq dâng nyo lhûm nyi akô.

5 Haú mù, Petruq gi, Yesuq lé, "Rabai è, shí jowò má nganhúng nyi le ge ri; haú mù, Náng é matú ralhú, Mosheq é matú ralhú, Eliyaq é matú ralhú kut, ngamoq lé, zúm sùm lhú saí nhâng laq." ga taí ri.

6 Hkâsu mù gâ le, yhangmoq gi, gyai yhang gyuq dan

^{*} 8:38 Yer 3:8; Ezk 23:37; Hos 2:2-10

bùm kô é yanmai, Petruq gi, haí taí râ le a sé mù, haú su gâ é nghut ri.

⁷ Hau htâng, mhut htoq lô luí, yhangmoq lé htup zíng lô mù, mhut hkaú mai htoq lo é htê gi, "Shí yuq gi, Ngò chyt-dap é Ngá Zo nghut lhê; Yhâng é dang gyo keq." gâ ri.

⁸ Haú hkûn jáng, chángzô pé gi, lhîngkhyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

⁹ Yhangmoq, bùm mai taú gyó lô kô é hkûn, Yesuq gi, haú Byu Yhangzo shi é mai a dum dui toq toq gi, yhangmoq myang é hkyô lé, ó lé le a taí kyo râ matú taí hkûn tô ri.

¹⁰ Chángzô pé gi, dang haú lé myit má kat to kôluí, "Shi é mai dum dui toq râ." gâ é lichyúm lé, rayuq eq rayuq myí lhûm bum akô nghut ri.

¹¹ Hau htâng, yhangmoq gi, "Eliyaq hí lé ra râ nghut lhê ga, tarâ sará pé haí mù taí kô é lú?" ga, Yesuq lé myí akô.

¹² Haú hkûn, Yesuq gi, "Eliyaq hí jé lé é gi, teng bê nghut luí, lhunglhang lé dum lajâng tô é nghut ri. Nghut kôlhang, haú Byu Yhangzo gi, myo myo hpuzo luí, he-ngik pyâm é hui ra nghut lhê ga le, Chyúmdang má kê to ashî, a nghut kó lú?"

¹³ Ngò, nungmoq lé taí kôlé, Eliyaq gi, jé lé bê nghut mù, yhang eq séng luí Chyúmdang má kê tô é eq rajung za, yhangmoq gi, ô nau é dông banshoq kut bekô nghut ri." ga tú taí ri.

Nat Dap É Yuqgè Zo Rayuq Lé Lhoq Gê Byí É Hkyô

Mht 17:14-20, 22-23; Luk 9:37-45

¹⁴ Yhangmoq gi, chángzô pé chyáng dum taú jé lô kô é hkûn, haú bâng é lhîngkhyuq má byù moq mó zîng lé é lé le, tarâ sará pé, haú bang eq dang htíng htíng lhûm nyi kô é lé le, myang akô.

¹⁵ Haú má nyi tô é lhunglhang bang gi, Yesuq lé myang kat é eq, maú byuq kôluí, din ê mù, ê shi-kyâm akô nghut ri.

¹⁶ Haú hkûn, Yesuq gi, yhangmoq lé, "Nungmoq gi, yhangmoq eq haí lé dang htíng htíng lhûm nyi akô lú?" ga myí ri.

¹⁷ Byù hpúng hkaú mâ é rayuq tú taí kat é gi, "Sará ê! Nhut jit nhang é nat wang júng tô é ngá é yuqzo lé, Náng chyáng shuí lé lo lhê.

¹⁸ Nat haú gi, yhâng chyáng wàng hkanmó, yhang lé myí htoq má lhoq leqbat nhang ri; haú mù, yhang gi, nhut mai guttsú htoq lhê, zui kyik kyik lhê, langhtan lo lhê, dut ri; hau é yanmai, nat haú lé hkat htoq pyám byi râ matú, Náng é chángzô pé lé dúng wú kôlhang, yhangmoq a wó dut kó nghut ri." gâ ri.

¹⁹ Haú hkûn, Yesuq gi, "Lumjîng myit a bo é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lú? Yuqgè zo haú lé, Ngá chyáng shuí lé lô keq." ga taí kat ri.

20 Haû mù, yhangmoq gi, yuqgè zo haû lé shuî lé lo akô; nat haû gi, Yesuq lé myang kat é eq yhang, yuqgè zo haû lé langhtân nhang ri; yuqgè zo haû gi, myigùng má lêng leq luî goleng leng mù, nhut mai tsû-myup htoq nyi ri.

21 Haú hkûn, Yesuq gi, yhângwa lé, "Yhang, isu dut é hkâ-myháng myáng bê l hú?" ga myi jáng, yhâng wa gi, "Zoshâng hkûn mai nghut bê.

22 Nat haû gi, yhang lé lhoq sat pyám naû mù, myi má le, wuî má le, anum num lêng wàng nhang wú bê nghut lhê; nghut kôlhâng, Nàng, rajung jung wó kut byî é nghut le gi, ngá hpe lé shogyo yù laq, garúm yû laq." ga tû taî ri.

23 Yesuq gi, "Nàng, wó kut byî é nghut le gi, ' nghû, haî mù taî lhê l hú? Lumjîng myit bò su é matú gi, haî le wó dut lhê." ga, yhang lé taî ri.

24 Haû zôshâng é yhângwa gi, radá dâm, "Ngò lumjîng lhê; nghut kôlhâng, ngá é lumjîng myit gi, shaû ashî nghut é yanmai garúm yû laq." ga taî garû ri.

25 Yesuq gi, byù hpúng din zîng lé lô kô é lé, myàng jáng, haû agè ashop é nat lé, "Nojit, nhutjit nhang é nat é! Ngò, nang lé hkunmó hkyô lhê, yhâng chyáng mai htoq ló aq; hkâ-nhám le, yhâng chyáng hkâdum wàng lo." ga tân kat ri.

26 Haú hkûn, nat haû gi, garu mù, zoshâng haû lé wum kat langhtân nhâng luî, htoq ló byuq bê. Zoshâng haû gi, shî mâng gùng su dut byuq

é yanmai, byù myo myo gi, "Yhang shî bê nghut ri." ga taî akô.

27 Nghut kôlhâng, Yesuq gi, zôshâng é loq má zui luî, tu toq kat ri; haû mù, zoshâng gi, yap to bê nghut ri.

28 Yesuq, yhúmhkaû má wang ló é htâng, Yhâng é chángzô pé gi, "Ngamoq gi, haî mù, nat haû lé a wó hkat htoq é l hú?" ga, tsik za Yhang lé myî akô.

29 Yesuq gi, "Haú jung nat lé gi, kyûdùng é dông za a nghut jáng, wó hkat htoq râ a nghut." ga, yhangmoq lé tû taî ri.

30 Yhangmoq gi, haú jowò mai htoq ló mù, Galile mau mai lai ló akô; nghut kôlhâng, Yesuq gi, ó lé le a sé nhâng naû nghut ri.

31 Haî mù gâ le, Yhang gi, "Haû Byu Yhangzo gi, byu pé é loq má ap pyâm é hui râ nghut lhê; haú bang gi, Yhang lé sat pyám kó râ nghut lhê; nghut kôlhâng, Yhang gi, shi é htâng sum nyí nghû râ nyí má, dum dui toq râ nghut lhê." ga, Yhâng é chángzô pé lé mhoqshit byî nyi é yanmai nghut ri.

32 Yhâng é chángzô pé gi, dang haú lé a sê gyo kôlhâng, Yhâng chyáng a wám myi kó nghut ri.

Kô Dik Sû Gi, Ó Yuq Nghut Lhê L hú?

Mht 18:1-5; Luk 9:46-48

33 Yhangmoq gi, Kaperna-um wà má jé e akô nghut ri. Yesuq gi, yhúmhkaû má nyi tô é hkûn, chángzô pé lé, "Hkyô

má, nungmoq, hai hkyô lé dang chyin chyîn lhum kô é lhú?" ga myî ri.

³⁴ Nghut kôlhang, yhangmoq gi, zim za nyi tô akô; hkâsu mù gâ le, ko dik sù gi, ó yuq nghut lhê nghû é hkyô lé, hkyolat má, yhangmoq dang chyin chyîn lhum kô é yanmai nghut ri.

³⁵ Yesuq gi, zùng mù, haû chángzo raxe í yuq lé, wut yù luí, "Kô dik naû sù ó yuq nghut kôle, tiq dik sù eq banshoq bâng é dui-nhâng zoshâng dut ra râ nghut lhê." ga taî ri.

³⁶ Hau htâng, Yhang gi, zoshâng rayuq lé shuí yù mù, yhangmoq é gung gûng má shap to luí, dum bún yù mù, yhangmoq lé taî é gi,

³⁷ "Shî sù é zoshâng lé, Ngá é myîng mai hap yu é sù ó yuq nghut kôle, Ngo lé hap yu é sù nghut bê; Ngo lé hap yu é sù ó yuq nghut kôle, Ngo lé za hap yu é a nghut, Ngo lé nhang kat é Sù lé hap yu é le nghut lhê." gâ ri.

Nga-nhung Lé Gye A Kut É Sù Gi, Nga-nhung É Hkyam Shut Nghut Lhê Gâ É Hkyô

Luk 9:49-50

³⁸ Haû hkûn, Yohan gi, "Sarâ ê! Náng é myîng lang luí, nat gâng pé lé hkat pyám byî wún é byù rayuq lé, ngamoq myang ri. Yhang gi, nga-nhung chyáng a lòm sù nghut é yanmai, yhang lé ngamoq hkûm pyám é nghut lhê." ga taî ri.

³⁹ Yesuq kúm gi, "Yhang lé hkâhkúm kó; Ngá myîng lé lang luí, laklaí kumlhá kut é sù gi, razup za má, Ngò eq séng luí, a ge é hkyô pé lé taî râ a nghut;

⁴⁰ Hkâsu mù gâ le, nga-nhung lé gye a kut é sù gi, nga-nhung é hkyam shut nghut lhê.

⁴¹ Ngò, nungmoq lé teng za taî kôlé, nungmoq gi, Hkrisduq eq sêng é bang nghut lhê gâ é yanmai, ngá é myîng lé lang luí, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù râ za nghut lhê.

Mara Shut Nhang É Hkyô Mht 18:6-9; Luk 17:1-2

⁴² Ngo lé lumjîng é zoshâng wui mâ é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuimau má ê dú hkyó pyám é huí é nghut lé gi, yhang é matú je gè râ nghut lhê.

⁴³ Náng é loq èq, nang lé mara kut shut nhang é nghut le gi, haû lé hpyit dú pyám aq; loq í loq dap luí, hkâ-nhám le, myiduq a dat shum é ngaraî ming wàng râ htoq má, loq raloq eq za ahtum abyuq é asak wó râ shut wàng le gi, náng é matú je ge ri.

⁴⁴ (Haû ngaraî ming gi, 'yhangmoq lé hkê nyi é luq le a shî, myiduq le a shûm' é jowò nghut lhê.)*

* 9:44 Bun zo 44, 46, gi, Chyúmlaika myo myo má a bo é nghut lhê.

45 Náng é hkyi èq, nang lé mara kut shut nhang é nghut le gi, haû lé hpyit dú pyám aq; hkyî í hkyî dap luí, hkâ-nhám le, myiduq a dat shum é ngaraí ming má dú hkyô pyám é hui râ htoq má, hkyî rahkyî za dap luí, ah-tum abyuq é asak wó râ shut wang le gi, náng é matú je ge ri.

46 (Haû ngaraí ming gi, 'yhangmoq lé hkê nyi é luq le a shî, myiduq le a shûm' é jowò nghut lhê.)

47 Náng é myoqjí èq, nang lé mara kut shut nhang é nghut le gi, haû lé lap choq pyám aq; myoqjí í jí dap gû, ngaraí ming má dú hkyô pyám é hui râ htoq má, myoq rají eq za, Garai Gasâng é mingdán má wang le gi, náng é matú je ge ri.

48 (Haû ngaraí ming gi, 'yhangmoq lé hkê nyi é luq le a shî, myiduq le a shûm' é jowò nghut lhê.)^{*}

49 Hkâsu mù gâ le, hkungga sho lé xo kat luí lhoq sansêng é su, myi gi, yuq hkanmó lé lhoq sansêng râ nghut lhê.^{*}

50 Xo gi, ge lhê. Nghut kôhang, xomân kân byuq jáng gi, hkâsu kut dum wó lhoq ngam yù râ lhú? Nungmoq gi, xo su ngam nyi mù, rayuq eq rayuq nguingón nyi keq." ga tâ ri.

10

*Myi, Làng Gâng É Hkyô
Mht 19:1-12; Luk 16:18*

1 Hau htâng má, Yesuq gi, Kaperna-um mai htoq ló mù, Yuda mau mâ é maukyo má ê jé luí, Yodan làng tû tap má dap ló bê nghut ri; byù myo myo gi, Yhâng chyáng dum zîng lé lô kôluí, Yesuq gi, Yhang lhaq kut nyi é eq rajung za, haú bang lé mhoshit byî ri.

2 Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyám le, tarâ wang lhê lhú?" ga myî é dong, Yhang lé chyam wú akô.

3 Yesuq gi, "Mosheq gi, nungmoq lé, hkâsu ga hkunmó hkyô tô é lhú?" ga taû myî ri.

4 Haú hkûn, yhangmoq gi, "Yuggè rayuq gi, lhoq kang laiká ká mù, yhangmyi lé wó nhang pyám lhê ga, Mosheq, ahkáng byî tô ri." ga tû taî akô.

5 Yesuq dum tû taî é gi, "Nungmoq é myit nhiklum htân kô é yanmai, Mosheq gi, tarâ haú lé kê tô é nghut lhê.

6 Nghut kôhang, mau htoq xâng hkun lé, Garai Gasang gi, 'yuggè eq myiwe lé hpan é nghut lhê'.^{*}

7 'Hau é yanmai, yuggè gi, yhumsing înu îwâ chyáng mai htoq luí, yhangmyi eq rahá rading ralhum za kut nyi mù,

8 yhangnhik gi, gungsho ralhum za dut byuq kó râ nghut lhê'.^{*} Haû mù luí, yhangnhik gi, í yuq a nghut lo é za, rayuq za dut bê nghut ri.

^{*} 9:48 Esai 66:24

^{*} 9:49 Nhong 2:13

^{*} 10:6 Apûn 1:27

^{*} 10:8 Apûn 2:24

⁹ Haù mù luí, Garai Gasang lhoq tsùm tô é lé, byù gi, a lhoq kang sháng gaq." gâ ri.

¹⁰ Yhumhkaù má, yhang-moq nyi tô é hkùn lé, chángzô pé gi, haù hkyô eq séng luí, Yhang lé dum saí myí akô.

¹¹ Haù hkùn, Yhang gi, "Yhumsing é yhangmyi lé kâng pyám mù, myiwe gotù dum hâng yu é sù ó yuq nghut kôle, su-myi lú é sù dut bê nghut mù, yhangmyi lé shut é sù nghut bê.

¹² Myiwe rayuq le, yhumsing é yhanglâng lé kâng pyám mù, yuqgè góyuq eq dum hâng é nghut le gi, sulàng lú é hkyô lé kut bê nghut ri." ga tû taí ri.

Zoshâng Wuì Eq Yesuq É Hkyô

Mht 19:13-15; Luk 18:15-17

¹³ Byu pé gi, zoshâng wuì lé Yesuq záng byí sháng gaq ga, Yesuq chyáng shuí lé lo akô; nghut kôlhang, chángzô pé gi, yhangmoq lé lhom tân hkùm akô nghut ri.

¹⁴ Haù lé Yesuq myàng jáng, Yhang gi, wú nhik-yo naù luí, "Haù zoshâng wuì lé, Ngá chyáng lé nhâng keq; yhang-moq lé hkâhkùm zing to kó; hkâsu mù gâ le, Garai Gasâng é mingdán gi, haù su é bâng é mingdán ru nghut lê.

¹⁵ Ngò, nungmoq lé teng za taí kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haù

má wó wâng râ a nghut." ga yhangmoq lé taí ri.

¹⁶ Hau htâng, Yesuq gi, zoshâng wuì lé bún yù mù, yhangmoq ahtoq má loq ke luí, shimân byí ri.

Sùt Wó É Zorâm Rayuq É Hkyô

Mht 19:16-30; Luk 18:18-30

¹⁷ Yesuq gi, hkyô dum so xoq e ló é hkùn, byù rayuq gi, din lé lô mù, Yhâng é hí má hkyihput htuq luí, "Ge é Sará ê, ahtum abyuq é asak wó yù râ matú, ngò haí kut ra râ l hú?" ga myí ri.

¹⁸ Haù mù, Yesuq gi, "Haí mù, Ngo lé ge é Sará nghu lê l hú? Garai Gasang mai lai luí, ge é ó yuq le a nyi.

¹⁹ Jep e tarâ má, 'Byù hkâsat, su-myi sulàng hkâlú, hkâhkau, a teng a mán é saksé hkâhkám, hkâmô zo, nángnu nángwa lé hkungga aq!'[☆] ga bo tô é lé, nàng sê lê." ga tû taí ri.

²⁰ Haù hkùn, haù yuq gi, "Sará ê, haù pé banshoq lé, ngò, zoshâng hkùn mai cháng bê nghut lê." ga taí ri.

²¹ Yesuq gi, haù yuq lé wú tsuq to mù, yhang lé chyit-dap luí, taí é gi, "Nàng kut râ rajung râ tô ashî; ló mù, nàng wó miwó lé ùng pyám luí, myùng bang lé byí pyám aq; haù jáng, nàng, mauhkung htoq má sutzè wó râ nghut lê; haù mù, Ngá htâng lé cháng aq." gâ ri.

²² Haù yuq gi, dang haù lé wó gyo jáng, sutzè gyai wó sù

[☆] 10:19 Htoq Ló 20:12-16

nghut é yanmai, myoqdong shum byuq mù, gyai yhang myit a ngón é èq ló byuq bê nghut ri.

23 Yesuq gi, lnhnghkyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wàng râ matú, haû-í yhang wuî ri-nhung!" ga taî ri.

24 Chángzô pé gi, Yhang taî é dâng é yanmai, mauhong bum akô nghut ri. Nghut kôhang, Yesuq dum xoq taî é gi, "Zo wuî ê, Garai Gasâng é mingdán má wàng râ matú, haû-í yhang wuî ri-nhung!"

25 Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." gâ taî ri.

26 Haú hkûn, chángzô pé gi, je riyhang maú byuq kômù, rayuq eq rayuq, "Haú su ru nghut le gi, ó yuq za hkyi yu é hui râ nghut lhê lú?" ga, taî lhum bum akô nghut ri.

27 Haú hkûn, Yesuq gi, yhangmoq lé wú kat mù, "Haú hkyô lé, byù mai gi, wó kut râ a nghut; nghut kôhang, Garai Gasang gi, wó dut lhê; hkâsu mù gâ le, Garai Gasang gi, lhunglhang lé wó kut é Sù nghut lhê." ga taî ri.

28 Haú hkûn, Petruq gi, Yhang lé, "Ngamoq gi, wó é gû lhunglhang lé tô pyâm to lui, Náng htâng cháng bê nghut lhê." ga taî ri.

29 Haú mù, Yesuq tû taî é gi, "Ngò, nungmoq lé teng za taî kôlé, Ngá é yanmai le, gabú

danglu é yanmai le, yhumsing é yhûm, gumang gu-nhá, înu îwa, zo dù wuî eq yò pé lé tô pyâm tô é sù ó yuq nghut kôle,

30 shí pyat lhê é yhûm pé, gumang gu-nhá wuî, înu pé, zo dù wuî eq yò pé lé, rashô tú wó hkam yù lui, zing-rî é hkyô pé lé le hui kó râ nghut é htoq agó, htang pyat má le, ahtum abyuq é asak wó yû râ nghut lhê.

31 Nghut kôhang, hí nghut nyi é bang myo myo gi, htâng gyó byuq kó râ nghut mù, htâng gyó nyi bang yuq gi, hí bekô râ nghut lhê." gâ ri.

Yesuq, Yhang Shî Râ Hkyô Lé Dum Taî É Hkyô

Mht 20:17-19; Luk 18:31-34

32 Yhangmoq gi, Yerusalem wà mó shut doq ló nyi kô é u lé, Yesuq gi, yhangmoq é hí má sô tô ri; haú hkûn, htâng má sô é bang gi, gyuq nyi bùm kô é u lé, haú chángzô pé gi, maú byuq bum akô nghut ri; Yesuq gi, haú chángzô raxe í yuq lé gotû kut dum wut yù mù, Yhâng chyáng dut lò râ hkyô, yhangmoq lé taî kyô é gi,

33 "Wú keq, nga-nhung gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tarâ sará pê é loq má ap byi pyâm é hui râ nghut lhê; haú bang gi, Yhang lé, shî râ mara byi lui, tungbaù pê é loq má ap byi pyám kó râ nghut lhê.

34 Haú bang gi, Yhang lé, wuîzùi kut pyâm é, sôkan byé

gyûn é, nhuq bat é kut yû mù, sat pyám kó râ nghut lhê. Hau htâng sum nyí má, Yhang dum dui toq lô râ nghut lhê." gâ ri.

Yakuq eq Yohan nhik dung é hkyô

Mht 20:20-28

³⁵ Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, "Sarâ ê, ngá-nhik dúng é gû banshoq, Nang kut byi râ lé, ngá-nhik ô nau ri." ga taí akô.

³⁶ Haú hkûn, Yhang gi, "Ngò, nungnhik lé haí kut byi râ ô nau akô lhú?" ga myí ri.

³⁷ Yhangnhik gi, "Náng é hpungwup shingkang hkaú má, ngá-nhik tâng lé, Náng é loqyò hkyam má rayuq, loqpaí hkyam má rayuq kut, zùng nhâng laq." ga tú taí akô.

³⁸ Nghut kôlhang, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq râ góm* lé, nungnhik wó shuq kó râ lhú? Ngò hkam yù râ baptisma lé, nungnhik wó hkam yù kó râ lhú?" ga yhangnhik lé tú taí ri.

³⁹ Haú hkûn, yhangnhik gi, "Nga-nhik wó dut lhê." ga tú taí kôjáng, Yesuq gi, "Ngò shuq râ góm lé, nungnhik shuq kó râ nghut lhê; ngò hkam yù râ baptisma lé le, nungnhik hkam yù kó râ nghut lhê.

⁴⁰ Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byí jung a

nghut. Jowò haú pé gi, hen to byí é hui bâng matú za nghut lhê." ga yhangnhik lé taí ri.

⁴¹ Haú su gâ é hkyô lé, haú gotû chángzo raxê yuq wó gyo kôjáng, yhangmoq gi, Yakuq eq Yohan nhik lé nhik-yô akô nghut ri.

⁴² Yesuq gi, yhangmoq banshoq bang lé wut tsing yù lui, "Túngbaù pé lé uphkang é ga bang gi, túngbaù pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chùng mù, up zô nyi kô é hkyô lé le, nungmoq sê lhê.

⁴³ Nghut kôlhang, nungmoq chyáng gi, haú su a dut kó sháng gaq, nungmoq má, byù mó dut nau sù ó yuq nghut kôle, nungmoq é dui-nhâng zoshâng dut ra râ nghut lhê.

⁴⁴ Hau htoq agó, nungmoq má ushuq dut nau sù ó yuq nghut kôle, banshoq bâng é jùn dut ra râ nghut lhê.

⁴⁵ Hkâsu mù gâ le, haú Byu Yhangzo lháng gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shihtá gunglik hkungga dông, Yhâng é asak lé byi pyám râ matú sheq, jé lé é ru nghut lhê." ga, yhangmoq lé taí ri.

Myoqjit Sù Barateme, Myoq Dum Myang É Hkyô

Mht 20:29-34; Luk 18:35-43

⁴⁶ Hau htâng, yhangmoq gi, Yerihko wà má jé ló akô

* **10:38** Góm eq baptisma gâ é gi, jamjau hui râ eq shi râ lé, taí nau é nghut lhê.

nghut ri. Yesuq eq Yhâng é chángzô pé gi, byù moq mó eq rahá, wà mai htoq ló nyí kô é hkûn, Barateme (Teme é yhangzo) gâ é myoqjit sù rayuq gi, hkyô yàm má dung zô zung tô ri.

⁴⁷ Yhang gi, Nazaret wà byù Yesuq lai ló é lé wó gyo jáng, "Dawiq é Yhangzo Yesuq ê, ngo lé shogyo yù laq ô!" ga garû kat ri.

⁴⁸ Haú mù, byù myo myo gi, zim za nyi râ matú yhang lé tân hkûm akô; nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang garû kat ri.

⁴⁹ Haú mù luí, Yesuq gi, yap nô kat mù, "Yhang lé ji kat keq." ga tai jáng, yhangmoq gi, "Myit ngón aq hkoi; Yhang, nàng lé ji nyi ri; toq aq." ga myoqjit sù haú lé tai akô.

⁵⁰ Haú hkûn, haú yuq gi, yhâng é buhîng lé hkyut pyám mù, byam chyu luí, Yesuq chyáng lé jé ri.

⁵¹ Yesuq gi, yhang lé, "Ngò, nang lé hai kut byi râ ô nau ri thú?" ga myi jáng, yhang gi, "Sarâ ê, ngò myoq myàng nau ri." ga tû tai ri.

⁵² Yesuq gi, "Ló aq hkoi, náng é lumjîng myit gi, nàng lé lhoq gê byi bê nghut ri." ga tai kat é hkûn jáng, yhang gi, myoq wó myâng mù, Yesuq e ló é hkyô shut cháng e ló bê nghut ri.

11

Yesuq, Yerusalem Wà Mó Má Wang Ló É Hkyô
Mht 21:1-11; Luk 19:28-40;

Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyâng lo nyi kô é hkûn, Tsan-lun Bùm má é Bethpage wà eq Behtani wà má jé ló kôjáng, Yesuq gi, Yhâng é chángzo í yuq lé,

² "Nungnhik, hí mâ é wà má ê keq; wà haú má wang é hkûn jáng, ó le a jî wú shí é logúng zo tui to láng é lé, ê myâng kó râ nghut lhê; haú lé hpyi yù mù, Ngá chyáng she lò keq.

³ Byù rayuq yuq mai, 'Haí mù, haú su kut nyi akô thú?' ga nungnhik lé lhom myi jáng, 'Shí du lé, haú Yhumsîng râ ri ga, razup má dum taú dé byi râ nghut lhê.' nghû tû tai keq." ga pyîng luí, nhang kat ri.

⁴ Haú nhik gi, e ló mù, hkyô mó yâm mâ é hkumdong nàm má tui tô é logúng zo radu lé, ê myâng kôluí, haú lé tui hpyi nyi akô.

⁵ Haú hkûn, haú má yap tô é bang ra-am gi, "Haí mù, logúng tui hpyi nyi akô thú?" ga myí akô.

⁶ Haú jáng, yhangnhik gi, Yesuq pyîng kat é eq rajung za tai kyo kôjáng, yhangmoq gi, she ló râ ahkáng byi kat akô nghut ri.

⁷ Yhangnhik, logúng zo haú lé Yesuq chyáng she jé lo é hkûn, logúng hau é gùng htoq má, yhangmoq é buhîng pé buí jáng, hau é ahtoq má, Yesuq doq jî ri.

⁸ Byù myo myo gi, yhangmoq é buhîng pé lé, hkyô

má hkyut hkanq byî akô; ram gi, yò pé má zân yu é mhandíng lé hkanq byî akô nghut ri.

⁹Hí má so bang eq htâng má châng é bang gi,

"Hosana!"

Haú Yhumsîng é myîng mai jé lé lô Sû gi, hkungsô wó nyî sháng gaq ô!

¹⁰Jé lé lô râ nghut é, nganhûng é iwa Dawiq é mingdán gi, hkungsô wó nyî sháng gaq ô!

Htoq tsáng myhâng má hosana nghut sháng gaq ô!*

ga luí, taí garû bum akô nghut ri.

¹¹Yesuq gi, Yerusalem wà mó má jé mù, noqkuq yhûm má wang ê luí, lhîngkyuq mâ é jung hkanqmó lé wú ri; nghut kôhang, bui gyum ló bê nghut é yanmai, Yhâng é chángzo raxe í yuq eq rahá, Behtani wà shut htoq e ló bekô nghut ri.

Maihpáng Gâm Ashi A Zui Râ Matú Taí É Hkyô

Mht 21:18-19

¹²Hau htang nyí, yhangmoq, Behtani wà mai htoq ló kô é hkûn, Yesuq gi, zo mut bê nghut ri.

¹³Yhang gi, ahaq wúm é maihpáng gâm ragàm lé, we we mai byu-myang kat jáng, agàm haú má ashí zui lhê laq ga é jé wú le, ahaq mai lai luí, haí le a myàng nghut ri. Haí mù gâ le, maihpáng-shi zui

yâm a nghut é yanmai nghut ri.

¹⁴Haú mù, Yesuq gi, shigâm haú lé, "Ahkuí mai gi, náng chyáng mâ é ashí, ó yuq le a myàng zo lo kó sháng gaq." ga taí ri. Yhâng é chángzô pé gi, haú su ga taí é dang lé wó gyô yu akô nghut ri.

Yesuq, Noqkuq Yhûm Lé Lhoq Sansêng Pyâm É Hkyô

Mht 21:12-17; Luk 19:45-48; Yhn 2:13-22

¹⁵Yhangmoq, Yerusalem wà mó má jé é hkûn, Yesuq gi, noqkuq yhûm má wang ê mù, haú mâ é zè ung zè wui kut nyi é bang lé, hkat htoq pyám luí, ngùn htaí zo bâng é siboí pé eq hpûngkyui ung zo bâng é tanghkuq pé lé tu mhuq pyám byî ri.

¹⁶Hau htoq agó, Yhang gi, ó yuq lé nghut kôle, ung zê lé noqkuq yhûm mai a waq lai nhâng kut pyâm ri.

¹⁷Yesuq, yhangmoq lé mhoqshit é gi,

"Ngá yhûm gi, byù myû lhunglhâng bâng é matú, kyûdung yhûm ga râ nghut lhê.*

ga kâ tô é a nghut kó lú? Nghut kôhang, nungmoq gi, 'damaq hkyûng' kut pyám bekô nghut ri." gâ ri.*

¹⁸Hkyangjong agyi pé eq tarâ sará pé gi, haú lé wó gyo kômù, Yhang lé hkâsu kut wó sat pyám râ hkyô ho nyi akô; nghut kôhang, shiwa byu pé gi, Yhang mhoqshit é hkyô

* **11:9** Hebre dang má, *hosana* gâ é gi, "ahkuí hkyi yù laq" gâ é nghut lhê. Nghut kôhang, bun zo 9, 10 má gi, hkyá-on dang dông chung é nghut lhê. ☆ **11:10**

Hkyá-on 118:25-26 ☆ **11:17** Esai 56:7 ☆ **11:17** Yer 7:11

má, myit zìng zuq bùm kô é yanmai, yhangmoq gi, Yhang lé gyuq bum akô nghut ri.

¹⁹ Myinhâng jé jáng, Yesuq eq Yhâng é chángzô pé gi, wà hkaû mai htoq ló bekô nghut ri.

Maihpáng Gâm Nyhuí Shi Byuq É Hkyô

Mht 21:20-22

²⁰ Htang napkyó, yhangmoq sô laí ló le, maihpáng gâm gi, amyit mai yhang nyhuí kyuq shi byuq é lé myang akô.

²¹ Petruq gi, myit bûn kat luí, "Rabai ê, wú aq! Nàng nhîng pyâm é maihpáng gâm gi, nyhuí shi byuq bê nghut ri." ga luí, Yesuq lé taí ri.

²² Haú hkûn, Yesuq gi, "Garai Gasang lé lumjîng keq.

²³ Ngò, nungmoq lé teng za taí kôlé, ó yuq nghut kôle, i-myit má úng-âng é hkyô a bo é za, yhumsîng taí é hkyô gi, dut lò râ nghut lhê ga lumjîng kô é nghut le gi, bùm shî lé, 'Htot mù, wuimau má ló gyó wâng aq.' ga taí le lháng, haú hkyô dut byi râ nghut lhê.

²⁴ Haú mù luí, Ngò, nungmoq lé taí kôlé, nungmoq haí dúng le le wó yû râ nghut lhê nghû lumjîng kô é nghut le gi, wó yû kó râ za nghut lhê.

²⁵ Mauhkûng htoq mâ é nungmoq é Íwa gi, nungmoq é mara lé hkyut pyám byi sháng gaq, nungmoq gi, kyûdûng yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq;

²⁶ (Nghut kôlhâng, nungmoq mai mara a hkyut pyám byí é nghut le gi, mauhkûng htoq mâ é nungmoq é Íwa le, nungmoq é mara lé hkyut pyám byí râ a nghut.)" ga tú taí ri.†

Yesuq É Ahko Ahkáng Lé Myí Chyam É Hkyô

Mht 21:23-27; Luk 20:1-8

²⁷ Yhangmoq, Yerusalem wà mó má dum jé mù, Yesuq gi, noqkuq yhûm wàng hkaû má sô yông wún é u lé, hkyangjong agyi pé, tarâ sará pé eq suwún wuí gi, Yhâng chyáng lé jé kômù,

²⁸ "Hai ahko ahkáng èq, Nàng, shí pé lé kut nyi lhê lhú? Haú su kut râ ahko ahkáng, Nang lé ó yuq byí é lhú?" ga myí akô.

²⁹ Haú jáng, Yesuq gi, "Ngò le, nungmoq lé rajung myí wú kôlé, tú taí wú keq; haú hkûn, hai ahko ahkáng èq, Ngò, shí pé kut é hkyô lé taí kyo râ nghut lhê.

³⁰ Yohan byí é baptisma gi, mauhkûng mai lhú? A nghut jáng, byu chyáng mai lhú? Taí wú keq!" ga taú myí kat ri.

³¹ Haú hkûn, yhangmoq chôm hpyê lhum kô é gi, "'Mauhkûng mai nghut lhê' nghû nga-nhúng taí jáng le, 'Haú nghut le nhîng, haí mù, yhang lé a lumjîng kô é lhú?' ga râ nghut;

³² 'Byu chyáng mai nghut lhê.' nghû jáng le..." gâ ri. (Yohan gi, myiqhtoi rayuq gè gè nghut lhê ga, lhunglhâng

† 11:26 Bun zo shî gi, Chyúmlaika ra-am má za bo lhê.

bang lumjǐng bŭm kô é yan-mai, yhangmoq gi, haũ byu pé lé gyuq bum akô nghut ri.)

³³ Haũ mù, yhangmoq gi, Yesuq lé, "Ngamoq a sé." ga tù taĩ akô.

Haũ hkũn, Yesuq gi, "Haũ jǎng, Ngò le, hai ahko ahkàng èq shí pé kut é hkyô lé, nungmoq lé a taĩ kyo." ga, yhangmoq lé taĩ ri.

12

Tsibiyiq Hkyâm Saĩ Bang Lé Dangtú Yu É Hkyô

Mht 21:33-46; Luk 20:9-19

¹ Hau htàng, Yesuq, dangtú dông yhangmoq lé taĩ é gi, "Byù rayuq gi, tsibiyiq hkyâm rahkyam saĩ to mù, lǐnghkyuq kyâm to luĩ, tsibiyiq wǐng pyik htoq râ donghkong dù to mù, machya ralhum saĩ tô ri. Hau htàng, yhang gi, hkyâm haũ lé, hkyâm saĩ zo bǎng chyáng ngho byĩ to mù, gó ming shut e ló byuq bê nghut ri.

² Kyôshu yoq jé jǎng, yhang gi, yhang yù áng é tsibiyiq shi ê yũ râ matú, dui-nhàng zoshàng rayuq lé, hkyâm saĩ zo bǎng chyáng nhang kat ri.

³ Nghut kôlhang, haũ bang gi, haũ yuq lé lhom chyup bat luĩ, loq kôm taũ nhang kat akô.

⁴ Haũ mù, yhang gi, gotũ dui-nhàng zoshàng rayuq lé, yhangmoq chyáng dum nhang kat ri; yhangmoq gi, haũ yuq lé le, ulhum má lhom bat cheq byi kôluĩ, hoq lhoq hpũ kat akô nghut ri.

⁵ Hau htàng, rayuq lé dum nhang kat jǎng, haũ yuq lé gi, lhom sat pyâm akô; Yhang gi, góbang myo myo lé le, yhangmoq chyáng nhang kat ashĩ nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

⁶ Ló htáng má, yhang gi, yhang chyitdap é zo lé nhang kat râ za ru nghut alô; haũ mù, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhangzo lé nhang kat ri.

⁷ Nghut kôlhang, haũ bang gi, 'Shĩ yuq gi, silĩ wunlí sing yù râ sũ nghut lhê; lé keq, yhang lé sat pyám sháng, haũ jǎng sheq, silĩ wunlí pé lé nganhúng wó yũ râ nghut lhê.' ga rayuq eq rayuq taĩ lhũm bum akô.

⁸ Haũ mù, yhang lé chyup yũ luĩ, sat pyám mù, hkyâm shinggan shut dú htoq pyâm akô nghut ri.

⁹ Haũ jǎng, tsibiyiq hkyâm yhumsǐng gi, yhangmoq lé hkâsu kut râ lhú? Yhang gi, ê mù, haũ hkyâm saĩ zo bang lé sat pyám luĩ, hkyâm haũ lé, góbang lé htot ngho byĩ pyám râ nghut lhê.

¹⁰ Chyúmdang má, 'Yhũm saĩ bǎng èq hkyin htoq pyâm é luqgok gi, htungchyũn mã é ahkyak dik é luqgok dut bê.

¹¹ Shĩ hkyô gi, haũ Yhumsǐng kut é nghut luĩ, nganhúng é myoq hí mã mauhpo dut bê nghut

ri.' ga bò tô é lé, nung-
moq a nghap wú kó
lúhú?"[☆]

gâ ri.

¹² Hau htâng, yhangmoq gi, dangtú haù, yhangmoq lé lhoq ang luí taí é hkyô lé, sé kô é yanmai, Yhang lé chyup yû râ matú hkyô ho nyi akô. Nghut kôhlang, yhangmoq gi, byù moq mó lé gyuq kô é yanmai, Yhang lé nyhi pyâm to luí, htoq ló byuq bekô nghut ri.

Kehtaq Lé Kang Kat Byî É Hkyô*

Mht 22:15-22; Luk 20:20-26

¹³ Hau htâng má, yhangmoq gi, Yesuq é dang má mara hô luí Yhang lé chyup yû râ matú, Hparishe pé ram eq Herut é byu pé ram lé, Yesuq chyáng nhang kat akô.

¹⁴ Haù bang gi, Yhâng chyáng lé jé kômù, "Sarâ ê, Nàng gi, tengmán sù nghut é lé, ngamoq sê lhê. Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byî é za, Garai Gasâng é hkyô lé, tengmán é dông mhogshit é sù nghut ri. Haù mù, Kehtaq lé kang kat byî le gi, ge lhê lúhú?

¹⁵ Ngamoq kat ra râ lúhú? A kat ra râ lúhú?" ga Yhang lé taí akô.

Yesuq kúm gi, yhangmoq, gegùn labyoq kut nyî kô é lé sé mù, "Nungmoq gi, haí mù, Ngo lé lé chyam wú akô

lúhú? Denari ngùn rachap yu lé keq, ngò wú wú bá." ga taí kat ri.

¹⁶ Haù hkùn, yhangmoq yu jé lô jáng, Yhang gi, "Shí má, ó yuq é alhô eq masat laiká dap tô ri lúhú?" ga myî ri.

Yhangmoq gi, "Kehtaq é nghut ri." ga tú taí akô.

¹⁷ Haù mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí jáng, yhangmoq gi, maù byuq bùm bekô nghut ri.

Saduke Pé, Yesuq Lé Myî Chyam É Hkyô

Mht 22:23-33; Luk 20:27-40

¹⁸ Haù dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô.

¹⁹ Yhangmoq myi kô é gi, "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kê to byî ri.

²⁰ Hí hpyang lé, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri.

²¹ Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haù eq rajung za dut byuq bê nghut ri.

[☆] 12:11 Hkya-on 118:22-23

^{*} 12:12 Kehtaq gâ é gi, "hkoséng" gâ é nghut lhê.

22 Haú nhiktâng wuì nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myhí haû le châng shi ló byuq bê nghut ri.

23 Haû mù luî, haû dum dui toq é buinyi má, myiwe myhí haû gi, hká yuq é yhangmyi nghut râ lhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." gâ akô.

24 Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lhú?

25 Haû shi byuq bê bang dum dui toq é hkûn gi, myi byi myi yû hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê.

26 Shi é mai dum lhoq dui toq é hkyô eq séng luî, Mosheq kê tô é laiká má lháng, haû nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.* ga kê tô é lé, nungmoq a nghap wú kó lhú?

27 Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekô nghut ri." ga taí ri.

Ahkyak Dik É Jep É Tarâ
Mht 22:34-40; Luk 10:25-28

28 Tarâ sará rayuq gi, lé lô mù, yhangmoq taí htîng lhum nyi kô é lé, lé wó gyô ri. Yhang gi, haú bang lé, Yesuq rago tú taí nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lhú?" ga myí ri.

29 Haû jáng, Yesuq gi, "Ahkyak dik é jep é tarâ gi, 'Israelaq byu pé ê, gyo wú keq! Nga-nhûng é Yhumsîng Garai Gasang za, Garai Gasang nghut lhê.

30 Haû Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, náng myit é hkyô banshoq, náng é wum-o banshoq èq, chyitdap râ lhê.* gâ é nghut lhê.

31 Hau htang lhum gi, 'Náng gûng lé náng chyitdap é su, náng é chyangnâm mâ é bang lé le chyitdap aq.* gâ é nghut lhê. Shí í lhûm htoq kô é tarâ gotû a joq lo." ga yhangmoqlé tú taí ri.

32 Haú hkûn, tarâ sará haú yuq gi, "Gyo naû bê, Sará ê! Garai Gasang rayuq za nghut lhê, gotû a nyi lo ga náng taí é gi, têng ri.

33 Garai Gasang lé, náng é myit nhiklhum banshoq èq le, náng é sê gyo é nyan banshoq èq le, náng é wum-o banshoq èq le, chyitdap râ lhê gâ é eq, náng gûng lé náng chyitdap é su, náng é chyangnâm mâ é bang lé le chyitdap râ

* 12:26 Htoq Lô 3:6

* 12:30 Tarâ Pun 6:4-5

* 12:31 Nhong 19:18

lê gâ é gi, myi nyhé hkungga eq gotû hkungga pé banshoq htoq má, je ahkyak lê." ga taí ri.

³⁴ Yesuq gi, yhang hpaqchyí bo é dông tú taí nyi é lé myàng jáng, "Nàng gi, Garai Gasâng é mingdán eq a we lo nghut ri." ga yhang lé taí kat ri. Haú hkûn mai gi, ó yuq le, Yhang lé dangmyi a wám myi lo kó nghut ri.

Hkrisduq Gi, Ó Yuq É Yhangzo?

Mht 22:41-46; Luk 20:41-44

³⁵ Yesuq, noqkuq yhûm má mhoqshit nyi é hkûn lé taí é dang gi, "Haí mù, haú tarâ sará pé gi, Hkrisduq lé, Dawiq é yhangzo za nghut lê gâ akô lú?"

³⁶ Dawiq gi, Chyoiyúng Woi-nyí eq taí nhang é má, 'Haú Yhumsîng Garai gi, ngá é Yhumsîng lé, "Ngò, náng é gumlau gye pé lé,

náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga taí ri. ✧

gâ ri.

³⁷ Haú mù, Dawiq yhang lháng, Hkrisduq lé, Yhumsîng gâ é nghut le gi, yhangzo za hkâsu ge nghut râ lú?" gâ ri.

Byù hpûng mó gi, Yhâng é dang lé, gabú myit eq gyô nyi bum akô nghut ri.

³⁸ Yesuq gi, mhoqshit uchyang taí é má, "Tarâ sará pé lé sidiq nyi keq.

Yhangmoq gi, réng é buhîng wut chûng mù, sô yông wún lûi, gài pé má lhom shi-kyâm yù râ lé le,

³⁹ tarajong pé mâ é ahkyak dik é zûng jang pé eq poi pé mâ é réng é zûng jowò pé má myang zûng râ lé le, ô nau nyi bum akô.

⁴⁰ Yhangmoq gi, chuimó pé é yhûm-yò pé lé hpýoq zo hpýoq shuq kôluí, kyû hîng hîng dîng shit mhaú é bang nghut akô. Haú su é bang gi, dam byí é je riyhang hui zo kó râ nghut lê." gâ ri.

Chuimó Myhí Kat É Alu Ngùn

Luk 21:1-4

⁴¹ Yesuq gi, alu sidek nàm má zung to mù, noqkuq yhûm mâ é alu sidek haú má, byù moq mó ngùn kat nyi é lé wú nyi ri. Sùt wó bang myo myo gi, ngùn ga-myhó myhó kat bum akô.

⁴² Haú hkûn, myung é chuimó myhí rayuq gi, lé mù, gyi htingchap ngùn zo í chap lé kat ri.

⁴³ Yesuq gi, Yhâng é chángzô pé lé wut yù mù, "Ngò, nungmoq lé teng za taí kôlé, shí myung é chuimó myhí gi, góbang banshoq htoq má je myo kat bê nghut ri.

⁴⁴ Haú góbang banshoq gi, yhumsîng agùn agó wó é má é lé, lé kat akô; yhang kúm gi, myùng sù nghut kôle, yhâng é asak lé baú râ ngùn banshoq lé, kat bê nghut ri." ga taí ri.

13

Ló Htâng Buinyì Má Dut Lò Râ Hkyô

Mht 24:1-21, 29-35; Luk 21:5-33

¹ Yesuq, noqkuq yhûm mai htoq lô é hkûn, Yhâng é chángzo rayuq gi, "Sarâ ê, wú aq; hkâ-í ko é luqgok pé! Hkâ-í hkik é yhûm pé!" ga Yhang lé tai kat ri.

² Haú hkûn, Yesuq gi, "Nàng, yhûm mó shí pé lé myàng lhê a nghut lhú? Luqgok shí pé gi, rachâm htoq racham lhang a kê lhum loshoq, hpyoq hpyi pyâm é hui râ nghut lhê." ga tú tai ri.

³ Yesuq gi, Tsanlun Bùm má, noqkuq yhûm shut hû mù zung tô é hkûn, Petruq, Yakuq, Yohan eq Andre pé gi, Yhâng chyáng lé jé kômù,

⁴ "Haú hkyô pé gi, hkâ-nhâm dut lò râ lhú? Haú dut lò râ hkûn, hkasû é kumlhá htoq lô râ nghut lhê lhú? Ngamoq lé tai kyô wú laq." ga Yhang lé baú myí akô nghut ri.

⁵ Haú mù, Yesuq gi, yhangmoq lé, "Nungmoq lé, ó yuq eq le a wó shuí nghoq sháng gaq, sidiq nyi keq.

⁶ Hkâsu mù gâ le, 'Ngò gi, haú yuq* nghut lhê.' ga, Ngá myíng lé lhang é byù myo myo pò htoq lô mù, byù myo myo lé shuí nghoq kó râ nghut lhê.

⁷ Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dàn kó. Haú hkyô pé gi, dut lò râ za nghut

lhê; nghut kôlhang, lô htâng é buinyì gi, a nghut shi.

⁸ Byù ra-myû eq ra-myû, mingdán ralhum eq ralhum majan zân lhûm lò kó râ nghut lhê. Jowò myo myo má, layàng nún é, mutmó gyó é pé dut lò râ nghut lhê. Haú pé gi, wuîhke jamjau hkyo é apûn awang za ru nghut ashí.

⁹ Nungmoq gùng nungmoq sidiq nyi keq. Hkâsu mù gâ le, yhangmoq gi, nungmoq lé, tarâ rûng pé má ê ap pyám kó râ nghut é htoq agó, tara-jong pé má nungmoq lé nhuq bat kó râ nghut lhê. Hau htoq agó, nungmoq gi, Ngá myíng é yanmai, mauzau wui eq hkohkam pé é hí má, saksé dông yap ra kó râ nghut lhê.

¹⁰ Haú gabú danglù gi, amyû banshoq lé hí hko kyo ra râ nghut lhê.

¹¹ Nungmoq gi, chyup yu é hui luí, jep hui é hkûn, hai tai râ lé, hkâ-myt chiq kó. Ahkyíng jé jáng, nang lé myit htoq lô nhang é dong za tai aq; hkâsu mù gâ le, dang haú pé gi, nungmoq tai é a nghut, haú Chyoiyúng Woi-nyí eq tai nhang é ru nghut lhê.

¹² Nhiktâng gi, nhiktâng yhangchang, iwa gi, yhangzo lé, shí shoq ap pyâm lhum kó râ nghut lhê; zo wuî gi, mó wuî lé gumlau toq mù, sat pyám nhâng kó râ nghut lhê.

¹³ Byù lhunglhang bang gi, Ngá é yanmai, nungmoq lé a nguì kut kó râ nghut lhê; nghut kôlhang, jihâm jé shoq

* 13:6 Haú yuq gâ é gi, Hkrisduq lé gâ é nghut lhê. ✧ 13:14 Dan 9:27; 11:31; 12:11

wó hkam jân nyi é sù gi, hkyi yu é hui râ nghut lâ.

14 'Haû lhoq hten lhoq hpyoq é achag achyut hkyô[✧] gi, yhang a nyi âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyi é bang gi, bùm pé shut hfang doq lô kó sháng gaq.

15 Yhumhkûng htoq má nyi tô é sù gi, yhúmkaû mâ é zè haî lé le, a lô gyó wang yù lo sháng gaq.

16 Yò má nyi tô é sù gi, yhâng é buhîng lé a lô taû yu nyi lo sháng gaq.

17 Haú buinyi pé má, zogùng dut é myiwe wui eq naú huq ashî nghut é înu wui gi, hkâ-í yhang wuîhke bekó nghut ri myhi-nhung.

18 Haú hkyô gi, gyoqmyò má a dut sháng gaq, kyûdûng nyi keq.

19 Hkâsu mù gâ le, Garai Gasang, mingkan lé hpan tô é hkûn mai ahkuî jé shoq, hkâ-nhâm le a dut wú shî é wuîhke jamjau mó gi, haú buinyi pé má dut lò râ nghut lâ; haú su é hkyô gi, htângnùng má hkâ-nhâm le dum dut lo râ a nghut.

20 Buinyi haú pé lé, haú Yhumsîng Garai mai a lhoq shaú é nghut le gi, ó yuq le asak wó lut râ a nghut. Nghut kôlhang, Yhang hkyin yù bê nghut é, hkyin yù hui bâng é matú gi, buinyi haú pé lé, Yhang lhoq shaú pyám byi bê nghut ri.

21 Haú ahkyíng má, byù rayuq yuq mai, nungmoq lé,

'Wú keq, shî má Hkrisduq nyi ri.' ga le, 'Wú keq, Yhang hê má nyi ri.' ga le, taí jáng, nungmoq hkâjîng kó.

22 Hkâsu mù gâ le, Hkrisduq apyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lháng, wó lhoq nghoq shoq ga, kumlhá pé eq laklaí kumlhá pé lé kut shit kó râ nghut lâ.

23 Haú mù, nungmoq sidiq nyi keq; ahkyíng a jé shi mai, ngò, nungmoq lé, jung hkangmó taí kyô nyi gù nghut lâ.

24 Buinyi haú pé má, wuîhke jamjau haú pé laí é htâng,

'Bui gi, noq byuq mù, lhamó gi, a tsô dut byuq râ nghut lâ;

25 kyî pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é hui bùm kó râ nghut lâ.[✧]

26 Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shingkan eq le, gyó lé lo é lé, byu pé byu-myàng kó râ nghut lâ.

27 Hau htâng má, Yhang gi, Yhâng é maumang lagyô pé lé nhang kat mù, maumyî chyûn hkangmó eq myigùng htum shoq, mauhkûng htáng shoq mai, Yhang hkyin yu tô é bang lé shuî tsîng yù nhâng râ nghut lâ.

²⁸ Maihpáng gâm lé wú mù, mhoq yû keq; agâm mai a-nyuq nyún lô mù, ahaqhtut lô jáng, bui nyé nám chyâng lô bê lé, nungmoq sê lhê.

²⁹ Haû eq rajung za, shí hkyô pé dut nyi é lé, nungmoq myàng kôjáng, Yhang gi, chyáng bê nghut mù, hkúmdong má lháng nghut nyi bê hkyô lé, nungmoq sé lo keq.

³⁰ Ngò, nungmoq lé teng za taí kôlé, shí pyat mâ é byu pé a ban shi byuq shimá, haú hkyô pé banshoq dut byuq râ nghut lhê.

³¹ Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyi râ nghut lhê.

*Haû Buinyi Eq Ahkyíng Lé,
Ó Le A Sé*

Mht 24:36-44

³² Buinyi eq ahkyíng haú lé gi, ó yuq le a sé; mauhkûng htoq mâ é maumang lagyô pé lháng a sé; haú Zo le a sé; haú Íwa za ru sê lhê.

³³ Haû mù, nungmoq gi, ahkyíng haú hkâ-nhám jé râ lé, a sé kô é yanmai, sidiq nyi keq! Machya nyi keq!

³⁴ Haû gi, byù rayuq, yhâng é dui-nhâng zoshâng wui lé, ó le ó eq sêng é mũ lé gâm byi to mù, hkum zúng sù lé le, machya nyi râ matú pying to luí, yhâng yhûm lé, haú dui-nhâng zoshâng wui chyáng ap pyâm to mù, byìn we shut htoq ló byuq é sù eq pung ri.

³⁵ Haû mù, haú Yhumsíng hpó gi, myinhtâng laq, myín

gunggâm laq, woqtûn hkun laq, maubó zó laq, hkâ-nhám jé lô râ lé nungmoq a sê kô é yanmai, sidiq machya nyi keq.

³⁶ Haû a nghut jáng, Yhang, dàn loq tung tau jé lo é hkûn, nungmoq yhup myhi tô é lé, lo myang pyám râ nghut lhê.

³⁷ Ngò, nungmoq lé, 'sidiq machya nyi keq,' nghû taí é eq rajung za, yuq hkangmó le, taí é nghut lhê." ga taí ri.

14

*Yesuq, Xû But Byi Huí É
Hkyô*

*Mht 26:1-16; Luk 22:1-6;
Yhn 11:45-53; 12:1-8*

¹ Ahkuí, haú Lhoqlhai Poí eq múmchi a kat é Muk Zo Poí jé râ í nyi za ru ra alô hkûn, hkyangjong agyi pé eq tarâ sará pé gi, Yesuq lé hkâsu kut wó haq chyup yú mù, sat pyám râ matú, hkyô ho nyi akò nghut ri.

² Nghut kôlhang, yhangmoq gi, "Byu pé gabyông lô kó abe, poí gyoro má gi, a kut shi sháng." ga taí akò.

³ Yesuq gi, Behtani và má nyi é manggâm dap wú sù Simûn é yhûm, siboí má nghe zung tô é hkûn, myiwe myhi rayuq gi, nardu amyit maí za saí yu é, gyai hpaû é namngón xû bo é alabasta (luq hpyû) bông yu lé lô mù, bông haú lé lêng hkyui luí, namngón xû haú lé Yesuq é ulhum má hut gyun byi ri.

⁴ Haú má nyi tô é bang ram gi, wú nhik-yô é myit eq, rayuq eq rayuq taí lhum kô

é gi, "Haî mù, namngón xû lé aha agó kut pyâm lhê laq?

⁵ Haû namngón xû lé, denari* sùm sho èq ung luî, myùng bang lé byî le ge lhê mhaî!" gâ akô. Yhangmoq gi, miwe myhí hau lé le, gyai chôm tân akô.

⁶ Nghut kôlhang, Yesuq gi, yhangmoq lé, "Myiwe zo háu lé, hkâtân nyi kó; haî mù, yhang lé i-myt lhoq myo nhang nyi akô lú? Yhang gi, Ngá é ahtoq má ge é hkyô kut bê nghut ri.

⁷ Haû myùng bang gi, nungmoq eq rahá hkâ-nhám le nyi râ nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhang, ngò gi, shî má nungmoq eq rahá ayang nyi nyi râ sù a nghut.

⁸ Yhang gi, yhang wó dut é í kut bê nghut ri. Yhang, Ngá gûng má, namngón xû hut gyún é gi, Ngá gûng lé yhum râ matú, hí hen lajâng tô é ru nghut lhê.

⁹ Ngò, nungmoq lé teng za taí kôlé, haû gabú danglù lé mingkan gón hko kyô é jowò hkangmó má, yhang lé myit bûn é dông, yhang kut é hkyô shî lé, taí kyo bekô râ nghut lhê." ga taí kyo ri.

¹⁰ Hau htâng, haû chángzo raxe í yuq má bo é Yudaq Iskarut gi, Yesuq lé ap pyám râ ga, hkyangjong agyi pê chyáng e ri.

¹¹ Haû bang gi, haû hkyô lé lhom wó gyo kôjáng, gyô gabú luî, yhang lé ngùn byî râ ga,

danggidiq byî akô. Haû mù, yhang gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mht 26:17-30; Luk 22:7-23;

Yhn 13:21-30

¹² Haû htungli joq é eq rajung za, Lhoqlhai Poí hkungga sauzo jáu byî é, múnchi a kat é Muk Zo Poí sâng-hi nyi má, Yesuq é chángzô pé gi, Yesuq lé, "Nàng zo râ Lhoqlhai Poí lé, ngamoq hkâmá é món to râ lú?" ga myî akô.

¹³ Haû mù, Yhang gi, chángzo í yuq lé, "Nungnhik, myuq hkaû shut wang ló keq, wuî yambú waq é byù rayuq lhom hui râ nghut lhê; háu hkûn, nungnhik gi, yhâng htâng cháng keq.

¹⁴ Haû yuq, wang ló é yhùm mâ é yhumsing lé, 'Ngò, Ngá é chángzô pé eq rahá, Lhoqlhai Poí lé zo râ bíng wap hkâmá nghut lhê lú ga, Sará myí nhang kat ri.' ngû taí keq.

¹⁵ Haû hkûn, hen to gû nghut é, ahtoq mâ é wap mó lé lhom tûn shít râ nghut lhê. Wap háu má, nga-nhùng é matú ê hen to keq." ga taí luî, nhang kat ri.

¹⁶ Chángzo háu nhik gi, htoq e ló mù, myuq hkaû má wang e ló le, Yesuq taí kat é eq roq za ê myâng kômù luî, Lhoqlhai Poí lé, món to bekô nghut ri.

¹⁷ Myinhâng jé lô jáng, Yesuq gi, haû chángzo raxe í yuq eq rahá, háu má lé jé bekô nghut ri.

* 14:5 Denari rachap gi, byù rayuq é ra-nyí lhê é zuihpau eq wuî ri.

18 Yhangmoq gi, siboî má nghê mù, zô nyi bùm kô é u lé, Yesuq gi, "Ngò, nungmoq lé teng za taí kôlé, Ngò eq rahá zô nyi é bang nungmoq mâ é rayuq sù gi, Ngo lé ap pyám rà nghut lhê." ga taí ri.

19 Haú hkûn, yhangmoq gi, gyô yón kômù, rayuq htâng rayuq, "Ngò, a nghut hkaí?" ga Yhang lé myí akô.

20 Haú hkûn, Yhang gi, "Haú yuq gi, haú raxe í yuq mâ é rayuq nghut lhê. Ngò eq rahá, hkoq shí má muk jùmzo sù nghut lhê.

21 Haú Byu Yhangzo gi, Yhang eq séng luí kâ tô é eq rajung za, shí rà za nghut lhê. Nghut kôlhang, haú Byu Yhangzo lé ap pyám é sù gi, dingnyé wó ri; haú yuq gi, a hku lé le lháng, je ge ri.

22 Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé my-hik hpé mù, "Shí gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byí ri.

23 Hau htâng, Yhang gi, góm lé le, yù mù, jeju hkya-on luí, yhangmoq lé byí ri; yhangmoq banshoq bang gi, haú lé yù shuq akô nghut ri.

24 Yesuq gi, yhangmoq lé, "Shí gi, byù myo myô é matú htoq pyám é, dangshikaq eq sêng é Ngá sui nghut lhê.

25 Ngò, nungmoq lé teng za taí kôlé, Ngò, Garai Gasâng é mingdán má, tsibiyiq wing asik lé shuq é buinyi a jé jé,

tsibiyiq wing lé dum shuq rà a nghut lo." ga taí ri.

26 Yhangmoq gi, hkya-on mahkôn ralhum ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Hkyô Lé, Te Taí É Hkyô

Mht 26:31-35; Luk 22:31-34; Yhn 13:36-38

27 Yesuq gi, yhangmoq lé, "Nungmoq lhunglhang bang gi, myit lingbat kó rà nghut lhê; hkâsu mù gâ le,

'Haú sau zúng sù lé, Ngò bat sat pyám mù, sau pé gi, lhoq pyo pyám é hui kó rà nghut lhê."*

ga kâ tô ri.

28 Nghut kôlhang, Ngò gi, lhoq dui toq é huí htâng má, Galile mau shut, nungmoq é hí má e ló lánng rà nghut lhê." ga taí ri.

29 Haú hkûn, Petruq gi, "Góbang banshoq myit lingbat kôlhang, ngò gi, myit lingbat rà a nghut." ga taí kat ri.

30 Haú mù, Yesuq gi, "Ngò, nàng lé teng za taí lé, hkû-nyí, hkû-myîn yhang jáng, woq í dâm a tún shimá, nàng, Ngo lé sum dâm he-ngik pyám rà nghut lhê." ga tû taí ri.

31 Nghut kôlhang, Petruq gi, "Ngò, Nàng eq rahá shí rà dut kôlhang, Nang lé ngò he-ngik pyám rà a nghut." ga zuq zuq taí ri. Góbang banshoq le, haú su ga châng taí bum akô nghut ri.

* 14:27 Zhk 13:7

Get-samane Gâ é Jowò Má Kyûdûng É Hkyô

Mht 26:36-46; Luk 22:39-46

³² Yhangmoq gi, Get-samane gâ é jowò má jé ló kômù, Yesuq gi, Yhâng é chángzô pé lé, "Ngò, kyû é dũng nyi é u lé, shí má zùng lánq keq." ga taí ri.

³³ Yesuq gi, Yhang eq rahá Petruq, Yakuq, Yohan pé lé, shuí chũng ri. Haú hkũn, Yhang gi, myit gyai a ngón é eq myit wuĩhke é hui mù,

³⁴ yhangmoq lé, "Ngò gi, shí râ í yhang myit yón nyi ri; nungmoq gi, machyá luí, shí má lánq nyi keq." ga taí ri.

³⁵ Yesuq gi, haú mai ratsuí zo sô é mù, myigũng má gop byên to luí, ahkyíng haú lé ge lhoq lhai pyám byi le gi, Yhâng chyáng mai lhoq lhai pyám byi râ matú,

³⁶ "Aba,[†] Áwa ê, Nàng gi, haí le wó dut é Sû nghut lhê. Góm[‡] shí lé, Ngá chyáng mai yu pyám byi laq. Nghut kôlhang, Ngò ô nau é dõng a nghut, Nàng ô nau é dõng sheq nghut sháng gaq." ga kyûdũng ri.

³⁷ Hau htâng, Yhang gi, Yhâng é chángzô pé chyáng dum taú lo le, yhangmoq yhup myhî to kô é lé lo myang ri. Haú mù, Yhang gi, Petruq lé, "Simun, nàng yhup ngón nyi lhê lúhú? Razup za lháng a wó machya nyi lúhú?

³⁸ Gungláú é a hui sháng gaq, machyá luí, kyûdũng nyi

keq. Haú woi-nyí gi, kâm nyi kôlhang, gungsho gi, wum nyhôm nyi ri." ga taí ri.

³⁹ Yesuq gi, radàm dum é mù, hí lé dũng é dang lé za, é dung ri.

⁴⁰ Yhang dum taú lo le, yhangmoq gi, myoqkuq lai kô é yanmai, yhup myhî to lánq kô é lé, lo dum myang ri. Yhangmoq gi, Yhang lé hai taí râ a sé dut byuq akô nghut ri.

⁴¹ Yesuq gi, sum dâm nghû râ lhĩng má, yhangmoq chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lúhú? Gé bê! Haú ahkyíng gi, jé bê nghut luí, haú Byu Yhangzo gi, yubak dap bãng é loq má ap pyám é hui râ nghut bê.

⁴² Toq keq! Ló losháng hkoil! Ngo lé ap pyám râ sũ gi, jé lé lô bê nghut ri." ga taí ri.

Yesuq, Chyup Yú Huí É Hkyô

Mht 26:47-56; Luk 22:47-53; Yhn 18:3-12

⁴³ Yesuq, dǎng nyo nyi ashí u lé, haú chángzo raxe í yuq má bo é Yudaq gi, haú hkyangjong agyi pé, tará sará pé eq suwún wui chyáng mai nhang kat é bang nghut é, shâm eq dumbáng pé chung tô é byù moq mó eq rahá jé lé lo ri.

⁴⁴ Yesuq lé ap pyám râ sũ gi, yhangmoq lé, "Ngò bopuq puq é sũ gi, haú yuq nghut bê; Yhang lé chyup yú mù, zúng

[†] 14:36 *Aba* gâ é gi, Aramaik dang dõng "Áwa" gâ é lichyúm nghut lhê. [‡] 14:36 *Góm* gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

shuî ló keq." ga kumlhá byî to bê nghut ri.

⁴⁵ Yudaq gi, Yesuq chyáng hkyê za ê mù, "Rabai ê." ga tai luî, Yhang lé bopuq puq byî ri.

⁴⁶ Haú hkûn, yhangmoq gi, Yesuq lé chôm zuî zìng mù, chyup yû bekô nghut ri.

⁴⁷ Haú mù, nàm má yap tô é byù rayuq gi, yhâng é shâm lé she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁴⁸ Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chûng mù, lé lo akô lú?"

⁴⁹ Ngò gi, nyí wuî, nungmoq eq rahá nyi luî, noqkuq yhûm má mhooqshit byî nyi kôlhang, nungmoq, Ngo lé a chyup yû kô é nghut lhê. Nghut kôlhang, Chyûmdang pé gi, dik ra râ nghut lhê." ga tai ri.

⁵⁰ Haú hkûn, haú chángzô pé gi, Yesuq lé tô pyâm to kôluî, h pang byo byuq bekô nghut ri.

⁵¹ Buhîng za wut é zorâm rayuq gi, Yesuq htâng cháng wún ri. Yhangmoq gi, haú yuq lé, wó kyaq zui kô é hkûn,

⁵² yhang gi, buhîng lé hkyut hkyô pyâm to mù, gùngchîn h pang ló byuq bê nghut ri.

Yudaq Byìn Tú Wapdoq Má Jéyáng Huî É Hkyô

Mht 26:57-68; Luk 22:54-55, 63-71; Yhn 18:13-14, 19-24

⁵³ Yhangmoq gi, Yesuq lé, hkyangjong mó chyáng shuî e

akô; haú hkyangjong agyi pé lhunglhang bang, suwún wuî eq tarâ sará pé le, lé zup zîng bum akô.

⁵⁴ Petruq gi, hkyangjong mó é yhumwàng hkaú má châng jé wâng shoq, we we mai Yesuq htâng châng tô ri. Yhang gi, haú má, zúng bang eq rahá, myihkyóm yâm má gyoq gang zung tô ri.

⁵⁵ Haú hkyangjong agyi pé eq Yudaq byìn tú wapdoq gón gi, Yesuq lé sat râ saksé hô kôlhang, haî le a myàng kó nghut ri.

⁵⁶ Byù myo myo gi, a têng é saksé hkám kôlhang, yhangmoq é dang gi, a tsûng lhum kó nghut ri.

⁵⁷ Hau htâng, ra-am gi, toq yap mù, a têng é saksé hkám kô é gi,

⁵⁸ "Yhang gi, 'Byu loq èq saî é noqkuq yhûm shî lé, Ngò hpyoq hpyi pyâm mù, sum nyí gyoro má, byu loq èq a saî é, gotû ralhum dum saî râ nghut lhê.' ga tai é lé, ngamoq wó gyô ri." ga akô.

⁵⁹ Nghut kôlhang, yhangmoq é saksé gi, a tsûng lhum kó nghut ri.

⁶⁰ Hau htâng má, hkyangjong mó gi, yhangmoq é hí má toq yap mù, "Nàng, haî le a tú tai luq? Shí bang, Nàng lé mara hun nyi é saksé gi, hká đông nghut lhê lú?" ga luî, Yesuq lé myî ri.

⁶¹ Nghut kôlhang, Yesuq gi, jit le a ga nyi tô ri.

Haú mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq

nghut lhê lú?" ga dum myí ri.

⁶² Haú hkûn, Yesuq gi, "Nghut lhê; haú ngò Byu Yhangzo gi, a-tsam bo dik Su é loqyo hkyam^S má zung tô é lé le, mhuthtui ji mù, mauhkûng mai lé lo é* lé le, nungmoq myàng kó râ nghut lhê." ga tâ ri.

⁶³ Haú hkûn, hkyangjong mó gi, yhâng é bu lé lêng cheq pyám mù, "Nga-nhúng, hai saksé râ ashî lú?"

⁶⁴ Yhang, Garai Gasang lé rhoi dang taí é lé nungmoq wó gyo bê nghut lhê. Nungmoq hkâsu wó myit akô lú?" ga myí ri; yhangmoq ban-shoq bang gi, shî gíng sù nghut ri ga, chôm myit huí akô.

⁶⁵ Haú mù, ra-am gi, Yhang lé sôkan byé gyun é eq, myoq má nghop pyám byi luí, loqt-sup èq htui byí lhê kut mù, "Nang lé ó yuq htui é, myiqh-toi htoí wú aq." ga tâ akô. Haú zúng bang gi, Yhang lé shuí yù mù, nhuq bat akô nghut ri.

Yesuq Lé, Petruq He-ngik Pyám É Hkyô

Mht 26:69-75; Luk 22:56-62; Yhn 18:1-18, 25-27

⁶⁶ Petruq gi, wàng hkaú má nyi tô é u lé, haú hkyangjong mó é dui-nhâng zoshâng myhí rayuq jé lé lo ri.

⁶⁷ Haú yuq gi, Petruq gyoq gang nyi é lé myàng jáng, yhang lé rago wú mù, "Nàng

le, Nazaret wà byù Yesuq eq rahá nyi sù nghut ri." ga tâ ri.

⁶⁸ Nghut kôhang, yhang gi, "Nàng taí é hkyô lé, ngò, sé le a sé, gyo le a sê gyo." ga he pyám luí, wàng hkúmdong shut htoq e ló bê nghut ri.†

⁶⁹ Dui-nhâng zoshâng myhí haú gi, Petruq lé, haú má dum myàng jáng, awui ayám má yap tô é bang lé, "Shí yuq le, haú hpúng má lom é sù rayuq nghut ri." ga dum tâ ri.

⁷⁰ Petruq gi, radàm dum he pyám ri; hau htàng razup zo má, haú nàm má yap tô é bang gi, Petruq lé, "Nàng gi, Galile byù rayuq nghut é yanmai, haú hpúng mâ é byù rayuq hkyak nghut lhê." ga tâ akô.

⁷¹ Haú hkûn, yhang gi, yhânggùng yhang nhing luí, "Haú nungmoq taí é byù lé, ngò a sé." ga dakam ri.

⁷² Haú u yhang, woq radàm dum tun kat bê nghut ri. Haú mù, Petruq gi, "Woq í dâm a tûn shimá, nàng, Ngo lé sum dâm he-ngik pyám râ nghut lhê." ga, Yesuq, yhang lé taí é dang lé, myit bûn kat mù, wum kat ngau ri.

15

Pilat Hí Má Yesuq Jé Nyi É Hkyô

Mht 27:1-2, 11-26; Luk 23:1-5, 13-25; Yhn 18:28-19:16

¹ Haú napkyó noq za má, hkyangjong agyi pé gi, suwún wuî, tarâ sará pé, Yudaq byìn

^S 14:62 Loqyo hkyam gâ é gi, ahko ahkáng wó é jowò lé gâ é nghut lhê. * 14:62

Mhuthtui ji mù, mauhkûng mai lé lo é gâ é gi, Danielaq 7:14 má bò lhê. † 14:68

Chyúmding ra-am má Haú hkûn jáng, woq tûn bê nghut ri gâ é le bo ri.

tú wapdoq gón bang eq rahá kut, chôm bóng yû kômù, Yesuq lé tuí yû lúí, shuí htoq é kômù, mauzau Pilat chyáng é ap byí akô nghut ri.

² Pilat gi, Yesuq lé, "Nàng gi, Yudaq byu pê é hkohkâm nghut lê lú?" ga myi jáng, Yesuq gi, "Nàng taí é eqrajung za nghut lê." ga, tú taí ri.

³ Haú hkyangjong agyi pé gi, Yhang lé mara gyai myo shoq chôm hun akô.

⁴ Haú mù, Pilat gi, Yesuq lé, "Wú aq, yhangmoq, nàng lé mara haú myhó hun nyi le, nàng, haí le a tú taí lú?" ga myí ri.

⁵ Nghut kôlhang, Yesuq gi, haí le a tú taí kut jáng, Pilat gi, maú byuq bê nghut ri.

⁶ Haú Lhoqlhai Poí u lé, mingbyû wuì dúng é htóng byû rayuq yuq lé, mauzau mai lhaqlhoq htoq byi byi kut é htung joq ri.

⁷ Haú hkûn, Barabaq gâ é byù rayuq gi, gumlau gabyông é hkûn, byù sat é gumlau bang eq rahá, htóng gyó tô ri.

⁸ Byù hpûng mó gi, doq lé lô mù, mauzau Pilat lé, yhang lhaq kut é eqrajung za, yhangmoq lé kut byi râ matú, dúng akô.

⁹ Haú mù, yhang gi, "Yudaq byu pê é hkohkâm lé nhang htoq kat byi râ lé, nungmoq ô nau akô lú?" ga myí ri.

¹⁰ Pilat, haú su ga myí é gi, haú hkyangjong agyi pé, Yesuq lé manôn kôluí, yhang chyáng lé ap byi kô é hkyô lé sê é yanmai nghut ri.

¹¹ Nghut kôlhang, haú hkyangjong agyi pé gi, Barabaq lé sheq nhâng byi râ matú, Pilat chyáng dung kó sháng gaq ga, haú byù moq mó lé i-myit lhoq toq byí akô.

¹² Pilat gi, "Haú jáng, nungmoq mai Yudaq byu pê é hkohkâm ga sù yuq lé, ngò hkâsu kut râ lú?" ga yhangmoq lé myí ri.

¹³ Haú hkûn, yhangmoq gi, "Yhang lé tapzîng má jén sat pyám aq." ga chôm garu akô.

¹⁴ Haú jáng, Pilat gi, "Haí mù lú lú? Yhang haí kut shut bê lú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq." ga je riyhang garú lo bum akô nghut ri.

¹⁵ Pilat gi, haú byù moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byí kat bê nghut ri.

Gyezô Pé Gi, Yesuq Lé Rhoi É Hkyô

Mht 27:27-30; Yhn 19:2-3

¹⁶ Gyezô pé gi, Yesuq lé, Pretori yhumwàng (mauzau hpô é yhumwàng) mó hkaú má shuí wang lô kômù, gyedap gón lé ji tsîng yu akô.

¹⁷ Hau htâng, yhangmoq gi, Yesuq lé buhîng nè radung hut byi mù, zujanmaú saí yù kôluí, Yhâng é ulhum má tsung byí akô.

¹⁸ Hau htâng, yhangmoq gi, "Yudaq byu pê é hkohkâm hpô é! Chyung hîng xê hing

nyì sháng gaq ô!" ga wut garû akô.

19 Hau htoq agó, yhangmoq gi, Yhâng é ulhum má dumbáng eq adàm dàm bat kômù, sôkan byé gyun luî, Yhâng hí má hkyihput htuq mù, paî mhaû akô nghut ri.

20 Yhangmoq gi, Yhang lé rhoi jihkyoî ban kut yû kôjáng, Yhang wut tô é buhíng nè lé hkyut yû kômù, Yhâng é mebu lé dum hut byi luî, tapzîng má jén sat pyám râ matú, Yhang lé shuí htoq e ló bekô nghut ri.

Yesuq Lé Jén Pyâm É Hkyô

Mht 27:31-44; Luk 23:27-43; Yhn 19:17-27

21 Alesander eq Ruhpu nhiktang é yhângwa, Kuruni myuq byû nghut é Simun ga sù gi, yosô wà mai lò mù, haû jowò mai lai ló ri. Haû hkûn, gyezô pé gi, yhang lé, tapzîng waq nhang akô nghut ri.

22 Yhangmoq gi, Yesuq lé, Golgahta gâ é jowò má shuí e akô (Golgahta gâ é gi, ugyap joq é jowò lé gâ é nghut ri).

23 Hau htâng, yhangmoq gi, Yhang lé, mura* eq nyhô tô é tsibiyiq wing huq akô; nghut kôlhang, Yhang gi, a lhom shuq byi nghut ri.

24 Hau htâng má, yhangmoq gi, Yhang lé tapzîng má jén tap to kôluî, Yhâng é mebu pé lé, hkyîn shosé shê mù, âng é dông gam yu pyám byi akô nghut ri.

25 Yhangmoq, Yesuq lé tapzîng má jén tap pyâm é hkûn gi, napkyó gau hkyíng nghut bê nghut ri.

26 Hau htoq agó, Yhang lé mara hun é dông kê tap to kô é gi, "YUDAQ BYU PÊ É HKOHKÂM" gâ ri.

27 Yhangmoq gi, damyaq í yuq lé le, Yhâng é loqyo hkyam shut rayuq, loqpaî hkyam shut rayuq kut, tapzîng htoq má jén tap tô akô nghut ri.

28 (Haû gi, "Yhang gi, yubak dap bâng chyáng nghap lhôm é hui bê nghut ri."* gâ é Chyúmdang lé lhoq dik é nghut ri.)†

29 Hkyô sô lai ló é bang gi, nyhap é dông u-ngut ngut mù, taí kô é gi, "Noqkuq yhúm lé hpoyoq pyám luî, sum nyí gyoro má dum wó sai lê ga Sù ê!

30 Náng gùng nàng hkyi yù luî, tapzîng mai gyó lò wú aq mhai!" ga akô nghut ri.

31 Haû eq rajung za, hkyangjong agyi pé eq tará sará pé le, yhangmoq hkaû má, "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung!

32 Nga-nhúng wó myâng mù, lumjîng râ matú, shí, Israellaq byu pé é hkohkâm, Hkrisduq gi, tapzîng mai gyó lo wú sháng gaq." ga, Yhang lé rhoi dang taí akô. Yhang eq rahá tapzîng má jén tap to

* 15:23 Mura gi, chi wó kut jung xû nghut lhê. ✧ 15:28 Esai 53:12 † 15:28 Bun zo shí gi, chyúmdang axau ra-am pé má za bo é nghut lhê.

huí é su nhik le, Yhang lé rhoi dang taí akô nghut ri.

Yesuq, Shi É Hkyô

Mht 27:45-56; Luk 23:44-49; Yhn 19:28-30

³³ Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri.

³⁴ Myinhâng sum hkyíng jé é hkûn, Yesuq gi, "Eloi, Eloi, lama sabakhtani."* ga, htê mó èq garû kat ri. Haú é lichyúm gi, "Ngá Garai ê, Ngá Garai ê, Nàng, haí mù, Ngo lé tô pyâm tô lhê lúhú?" gá é nghut ri.

³⁵ Haú nâm má yap tô é bang ra-am gi, haú lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, taí akô.

³⁶ Haú hkûn, byù rayuq gi, din e ló mù, wuimaù lé tsi-biyiq wing chyín má jum yù luí, jàm-yang má tuí tap mù, Yesuq shuq sháng ga yhun byi luí, "Eliyaq gi, lé lô mù, Yhang lé lé lhoq hkyô yù abe, nganhúng chôm lánng wú sháng." ga taí ri.

³⁷ Yesuq gi, htê mó èq garû kat luí, káng byit byuq bê nghut ri.

³⁸ Noqkuq yhùm má é pán-gyang gi, ahtoq mai a-ô í hkyam byáng dut byuq bê nghut ri.

³⁹ Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é

Yhangzo nghut ri-nhung!" ga taí ri.

⁴⁰ Myiwe wuì ra-am gi, we we mai wú nyi bum akô. Haú bang má, Magadalaq wà mâ é Mariq, Yakuq tiq sù yuq eq Yose nhiktang é yhângnu Mariq eq Salome pé le bo akô nghut ri.

⁴¹ Haú bang sum yuq gi, Galile mau má, Yesuq htâng cháng mù, Yhâng râ é hkyô pé lé châng kut byi é bang nghut akô. Yesuq eq rahá, Yerusalem wà mó má doq lé lo é myiwe wuì, góbang myo myo le haú má nyi tô bum akô nghut ri.

Yesuq Lé, Myhup Pyâm É Hkyô

Mht 27:57-61; Luk 23:50-56; Yhn 19:38-42

⁴² Haú nyí gi, Hên Lajang Buinyi (Bánno buinyi é hí nyi) nghut ri. Haú mù, myinhâng jé lô jáng,

⁴³ Yudaq uphkâng hpúng má bo é, aróng wó é, Garai Gasâng é mingdán lé lánng nyi é sù, Aramahti wà byù Yosep gi, myit wum lhoq kíng yù mù, Pilat chyáng wàng luí, Yesuq é gungsôm lé ê dúng ri.

⁴⁴ Pilat gi, Yesuq shí bê gá é hkyô lé wó gyo jáng, maú byuq ri; haú mù, yhang gi, shô up gyezau lé wut yù mù, Yesuq shí teng bê lúhú ga myí ri.

⁴⁵ Shí teng bê hkyô lé, shô up gyezau chyáng mai wó sê yù jáng, Pilat gi, Yesuq é gungsôm lé yù rà ahkáng, Yosep lé byi kat ri.

46 Haù mù, Yosep gi, pán yúng lé wui yù luí, gungshòm lé yu hkyó mù, htup yup luí, luqgok lé kyûng tô é lup hkaù má ê kat tô ri. Hau htâng, yhang gi, luphkum má, luqlông èq lhêng chí pyâm tô ri.

47 Magadalaq wà mâ é Mariq eq Yose é yhângnu Mariq gi, Yesuq lé, hkâmá lheq tô é lé, ê myang akô nghut ri.

16

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

1 Bánno buinyì lai jáng, Magadalaq wà mâ é Mariq, Yakuq é yhângnu Mariq eq Salome pé gi, Yesuq é gùng má, ê but byi rà matú namngón jung ê wui akô.

2 Bánno buinyì htang napkyó bui htoq lo é hkûn yhang, yhangmoq gi, lup shut e ló akô.

3 Yhangmoq gi, "Luphkum mâ é luqgok lé, ó yuq chyûn lhêng pyâm byi rà lhú?" ga, rayuq eq rayuq tai lhum akô.

4 Nghut kôlhang, yhangmoq tu wú kat kô é hkûn, luqlong haù gi, lhoq lhêng to lánng é lé, myàng akô nghut ri; luqlong haù gi, gyai kô é nghut lhê.

5 Yhangmoq gi, lup hkaù má wang ê kô é hkûn, hpyu é buhîng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

6 Haù hkûn, haù yuq gi, "Hkâgyuq dân kó! Nungmoq gi, haù tapzîng má jén sat huí

é, Nazaret wà byù Yesuq lé ho akô, a nghut lhú? Yhang dui toq ló bê! Yhang gi, shí má a nyì lo. Yhang lé, lheq tô é jowò lé wú wú keq.

7 Ahkuí, nungmoq gi, ló mù, 'Yesuq gi, nungmoq hí má, Galile mau shut so lánng rà nghut lhê. Nungmoq lé, Yhang tai tô é eq rajung za, nungmoq gi, Yhang lé haù má ló myàng kó rà nghut lhê.' nghû, Yhâng é chángzô pé eq Petruq lé ló tai kyo keq." ga lhom tai kat ri.

8 Haù mù, myiwe myhí haù bang gi, byòdàn gyuq nán é eq, lup mai hpang htoq ló akô; yhangmoq gi, lùm gyuq byuq kô é yanmai, ó yuq lé lé, haù le a tai kó nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

Yesuq Htoq Shit É Hkyô

Mht 28:9-10, 16-20; Luk 24:13-53; Yhn 20:11-23; Lagyo 1:6-11

9 Yesuq gi, Bánno buinyì htang napsûn lé, Yhang dui toq é htâng, Yhang mai nat gang nyhit du hkat htoq pyâm byi bê sù, Magadalaq wà mâ é Mariq lé hí htoq shit ri.

10 Mariq haù gi, ló mù, haù Yesuq eq nyi lai lò bê bang, yón ngau nyì kô é hkûn, haù hkyô lé ló tai kyô ri.

11 Yhangmoq gi, Yesuq dum dui bê gâ é hkyô lé le, Yhang lé, Mariq myang é gâ é hkyô lé le, wó gyo kôlhang, a jíng kó nghut ri.

12 Hau htâng má, Yesuq gi, yosô wà shut htoq e ló

nyi é chángzo í yuq lé, gotû gunghkyâng dong htoq shit ri.

¹³ Haú nhik gi, taû lò mù, gotû chángzô pé lé haú hkyô lò shit kyo akô; nghut kôlhang, yhangmoq gi, haû lé le a jing byi kó nghut ri.

¹⁴ Hau htâng má, Yesuq gi, haû chángzo raxe rayuq baú za zang zô nyi kô é hkûn, yhangmoq chyáng lé htoq shit ri. Yhangmoq chyáng lumjینگ myit a bò kô é yanmai le, Yhang dui toq é htâng má, Yhang lé myang é bang taí kyo kô é dang lé, a jing é za myit htan to kô é yanmai le, Yhang gi, yhangmoq lé tân ri.

¹⁵ Hau htoq agó, Yesuq gi, yhangmoq lé, "Mingkan jam shoq htoq é mù, waxâng zo wuî lunglhang lé, haû gabú danglù hko kyo keq.

¹⁶ Lumjینگ mù, wui-myhup hkâm yu é sù ó yuq nghut kôle, hkyi yu é hui râ nghut lhê. Nghut kôlhang, a lumjینگ é sù ó yuq nghut kôle, mara byi é hui râ nghut lhê.

¹⁷ Lumjینگ é bang wó kut shit râ kumlhá pé gi, Ngá é mying lé lang luî, nat gâng pé lé wó hkat htoq kó râ eq laklaí é mying pé lé dat nyò kó râ nghut lhê;

¹⁸ yhangmoq gi, lhangmui pé lé le, wó kui zui kó râ nghut lhê; muî shi jung duq lé, shuq kôlhang, haî dut kó râ a nghut. Nò bâng é htoq má, yhangmoq é loq ke byi jáng, nò bang ge byuq kó râ nghut lhê." ga taí ri.

¹⁹ Haû Yhumsing Yesuq gi,

yhangmoq lé dang ban taí é htâng má, mauhkûng shut shuî toq yu é hui luî, Garai Gasâng é loqyo hkyam má zung to bê nghut ri.

²⁰ Hau htâng, haû chángzô pé gi, htoq é mù, jowò hkangmó má mungdang é hko kyô akô nghut ri; haû Yhumsing gi, yhangmoq eq rahá nghut nyi mù luî, Yhâng é mungdang têng é hkyô lé tân shit râ matú, yhangmoq lé, kumlhá pé wó kut é a-tsam byi é nghut ri. Amen.

LUKAQ é Gabú Danglù Laiká (The Gospel of Luke)

¹ Aróng wó dik é sù Htoh-piluq ê, ngamoq chyáng dut laí lò bê hkyô pé lé, sâng-hi mai yhumsing myoq eq yhang, myang é bang eq, mungdang wùn waq é bang mai shap kyô gyó lò mù luí,

² byù myo myo gi, shikut luí kâ to bekô nghut ri.

³⁻⁴ Ngò le haú pé banshoq lé awang mai ahyo hpyot jikhúm nuqguq ho myí yù luí, nàng wó sê yu to bê hkyô pé gi, je lhoq gíng é dut sháng gaq nghú, náng é matú banshoq tok za kâ kat byi râ lé, ngò wó myit ri.

*Wui-myhup Sará Yohan
Hku Lé Lô Râ Gà É Hkyô*

⁵ Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyú mâ é, Elizabet ga sù nghut ri.

⁶ Haú nhik gi, Yhumsing Garaí é jep é tarâ eq htúngtarâ banshoq lé, rago za cháng mù, Garaí Gasâng é hí má dingmán é su nhik nghut akô.

⁷ Nghut kôlhang, Elizabet gi, baùdung dung sù nghut é yan-mai, yháng nhâm gi, zo dù a dap kó. Yhangnhik gi, asak ipyat le ko bekô nghut ri.

⁸ Ahkuí, Zahkariq gi, dum lhing hkyuq lo é hkyangjong

mù lé, yhâng é hpúng eq rahá, Garaí Gasâng é hí má lé zui le,

⁹ haú Yhumsing é noqkuq yhúm ahkaú má namngón hkungga é wang nyhé râ matú, hká yuq nghut râ lé hkyangjong pé é htúngli eq rajung za byù hkyín shosé she wú é hkûn, yhâng chyáng âng ri.

¹⁰ Haú mù yhang namngón hkungga lé nyhé é u lé, shiwa byù banshoq gi, yhumpán má, kyûdung nyi akô.

¹¹ Haú hkûn, Yhumsing Garaí é maumang lagyo gi, namngón jung nyhé é hkungga gyap é loqyo hkyam má, Zahkariq lé, lé yap shit ri.

¹² Zahkariq gi, maumang lagyo haú lé myàng jáng, dan gyuq nyi ri.

¹³ Nghut kôlhang, mau-mang lagyo gi, "Zahkariq ê, hkâgyuq, náng é kyûdung dang lé Garaí Gasang gyo byi bê. Haú mù luí, náng é yhumsing myhí Elizabet gi, náng é matú yuqzo rayuq bau byi berâ nghut lhê; náng gi, yhang lé Yohan nghú myhing byi ra râ nghut lhê.

¹⁴ Yhang gi, náng é matú gabú hpo eq nguingón é hkyô dut berâ nghut lhê. Yhang lé baú lo é yanmai, byù myo myo le gabú lo bùm berâ nghut lhê.

¹⁵ Hkâsu mù gà le, yhang gi, haú Yhumsing Garaí é hí má ahko ahkáng wó mù luí, byù mó dut râ sù nghut lhê. Yhang gi, tsibiyiq wing eq ihpe lé ge shuq râ sù a nghut; yhâng nú é unghkaú

mai yhang, Chyoiyúng Woi-nyí eq byíng nyí râ sù nghut lhê.

¹⁶ Yhang gi, Israelaq yhangzo yhangshû pé myo myo lé, Yhumsíng yhangmoq é Garai Gasâng chyáng lhing lò nhâng râ sù nghut lhê.

¹⁷ Íwâ pê é myit nhiklhum lé gi, zô wui shut, nyo é a gyo bang lé gi, dingmán bâng é hpaqchyí hkyô shut lhing lò nhâng luí, haú Yhumsíng jé lé râ matú hen tô é byù myû dut nhâng râ matú, Yohan gi, Eliyaq é woi-nyí wum-o wó é eq, Yhumsíng é hí má e ló râ nghut lhê." ga luí, yhang lé taí ri.

¹⁸ Haú hkûn, Zahkariq gi, "Haú hkyô lé ngò hkâsu kut wó sé râ lhu? Ngò le mang byuq bê, ngâ é yhumsíng myhí le asak ipyat ko bê." ga luí, maumang lagyo lé tû taí ri.

¹⁹ Maumang lagyo haú gi, "Ngò gi, Garai Gasang eq rahá nyí é sù Gabrielaq nghut lhê. Nang lé gabú danglù shî taí kyo aq ga luí, Yhang, ngo lé nhang kat é nghut lhê.

²⁰ Ahkyíng jé jáng, ngá dang gi, gè gè dut lò râ nghut lhê. Dang shí pé lé nàng a lumjíng é yanmai, mú haú dut lo é buinyí jé shoq, nàng gi, nhut jít byuq râ nghut lhê." ga luí, yhang lé tû taí ri.

²¹ Haú u, shiwa byu pé gi, Zahkariq noqkuq yhûm ahkaú má haú-í myáng shoq lúng byuq é hkyô lé láng maú nyí akô.

²² Zahkariq dum htoq lo le, dang a wó nyo byuq mù

shiwa byu pé lé loq lik za lik shit nyi ri. Haú mù luí, yhang-moq gi, noqkuq yhûm ahkaú má yhang myoqwup shing-rán rajung jung myàng ang bê lé, wú sé yu akô nghut ri.

²³ Ahkuí, Zahkariq gi, hkyangjong jong âng é buinyí ngap jáng, yhûm shut dum taú ló byuq bê.

²⁴ Hau htâng má, yhâng é yhumsíng myhí Elizabet gi, zogúng dut lò mù luí, hká le a htoq e za lhamó ngo hkyap yhûmhkaú má lúng byuq ri.

²⁵ Haú hkûn, yhang gi, "Byu pê hí má ngò hui zô é hoq hpu hkyô lé, Garai Gasang gi, myàng byi luí, shî su dut nhang é dông mai huí sêng pyám byí é buinyí má, Yhang ge é hkyô lé, ngo lé tûn shit bê nghut ri." ga taí ri.

Yesuq Hku Lé Lô Berâ Gâ É Hkyô

²⁶ Ahkuí, Elizabet zogúng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyí é, zomyi gyíng rayuq chyáng nhang kat ri.

²⁷ Zomyi hau é myíng gi, Mariq gâ ri; yhang gi, Dawiq amyú mâ é Yosep gá su eq dúng tô é zomyi nghut ri.

²⁸ Maumang haú gi, Mariq chyáng jé jáng, "Mariq ê, nguínón nyí sháng gaq; Nang, hkungsô wó nyi ri; Haú Yhumsíng Garai gi, nàng eq rahá nyi nyi ri ò!" ga taí ri.

²⁹ Mariq gi, dang haú lé gyo sing nán mù, shî su gâ é dang

gi, hai jung gá naú é nghut lê
 thú ga luí, myit maú nyi ri.

³⁰ Haú hkûn, haú mau-
 mang lagyo gi, "Mariq ê,
 hkâgyuq, nàng gi, Garai
 Gasâng é hí má myoqdong wó
 bê nghut ri.

³¹ Wú aq, nàng zogûng dut
 lò mù luí, yuqzo rayuq bau
 râ nghut lê. Yhâng é mying
 lé gi, 'Yesuq' nghû luí, nàng
 myhíng byi ra râ nghut lê.

³² Yhang gi, hpung bô sù
 dut râ nghut mù, Myhang
 htáng htúm Su é Yhangzo gâ
 é huí râ nghut lê. Yhumsing
 Garai Gasang gi, yhang lé,
 yhâng é íchý íwa Dawiq é
 hkohkâm tanghkuq lé, byi râ
 nghut mù luí,

³³ Yhang gi, Yakup yhûm*
 lé hkâ-nhâm le ru-up nyi râ
 nghut lê. Yhâng é mingdán
 le htum nghu é joq râ a
 nghut." ga luí, yhang lé taí ri.

³⁴ Haú hkûn, Mariq gi, "Ngò
 gi, zomyi gyíng ru nghut ashî,
 haú gi, hkâsu wó dut râ thú?"
 ga luí, maumang lagyo lé tû
 taí ri.

³⁵ Haú maumang lagyo gi,
 "Choyiyúng Woi-nyí náng é
 ahtoq má jé lé mù, Myhang
 htáng htúm Su é wum-o a-
 tsam gi, nàng lé shum gum
 to byi luí, haú baú lò râ Chy-
 oiyúng sù le gi, Garai Gasâng
 é Yhangzo ga kó râ nghut lê.

³⁶ Hau htoq agó, wú aq,
 náng é amyû suissho baùdung
 myhí Elizabet lháng, mang bê
 le yuqgè zo wun to bê. Ahkuí,
 zogûng dut é lhamó hkyuq
 hkyap wàng bê nghut ri.

³⁷ Hkâsu mù gâ le, Garai
 Gasang a wó kut é hai le a
 joq." ga luí, yhang lé tû taí ri.

³⁸ Haú hkûn, Mariq gi,
 "Yhumsing é jùnmyhí ngò
 nghut nyi lê; náng é dang
 eq rajung za ngá chyáng dut
 lò sháng gaq." ga tû taí ri.
 Hau htâng, maumang lagyo
 gi, yhâng chyáng mai ló byuq
 bê.

*Elizabet Lé Mariq Ê Huí Ê
 Hkyô*

³⁹ Hau htâng hkâ-í a myáng
 má, Mariq gi, Yuda mau bum
 mau mâ é wà rawà shut hân
 hân e ló luí,

⁴⁰ Zakhariq é yhûm má
 wàng mù, Elizabet eq huí nyo
 lhûm ri.

⁴¹ Mariq é danghtê lé Eliz-
 abet wó gyo jáng, yhâng é
 unghkaú mâ é zoshâng gi,
 byam chyû lo ri.

⁴² Elizabet le, Choyiyúng
 Woi-nyí byíng to mù luí,
 Mariq lé htê mó èq taí é gi,
 "Myiwe banshoq má, nàng
 gi, hkungsô wó dik sù nghut
 ri. Náng é unghkaú mâ é
 zoshâng le hkungsô wó nyi
 ri ô!

⁴³ Ngá Yhumsing é yhângnu
 ngá chyáng jé lé é jeju gi, hai é
 yanmai nghut bê thú?

⁴⁴ Wú aq, náng danghtê lé
 wó gyo kat jáng, ngá unghkaú
 mâ é zoshâng gi, gabú luí
 byam chyû nyi ri.

⁴⁵ Haú Yhumsing taí é dang
 gi, gè gè dik lò râ nghut lê
 ga luí, lumjíng é myiwe gi,
 hkungsô wó nyi ri." gâ ri.

* 1:33 Yakup yhûm nghu e gi, Israelaq amyû lé gâ lhê.

Mariq É Hkya-on Dang

- 46 Haú hkún, Mariq gi,
 "Ngá é i-myt mai haú
 Yhumsîng lé hkya-on
 nyi lhê,
 47 ngá é woi-nyí le, Garai
 Gasang ngá é hkyi yù
 Sû má gabú nyi lhê.
 48 Ngò Yhâng é jùnmyhí myit
 nyhum nyi é lé, Yhang
 myàng byi bê nghut ri.
 Wú aq, ahkuí mai ipyat dedu
 má, ngo lé gi, hkungsô
 wó nyí sù, gá nyi bekô
 râ nghut lhê.
 49 hkâsu mù gâ le, Wum-o
 Bo Dik é Garai Gasang
 gi, ngo lé mauhpo mù
 mó kut byi bê nghut ri,
 Yhâng é myìng gi, chy-
 oiyúng nyi ri ô.
 50 Yhang lé gyuq hoq nyí bâng
 é ahtoq má, Yhang
 shogyo nhikmyîn é
 hkyô gi,
 pyat bán hkangmó jé
 shoq hkâ-nhám le joq
 nyi râ nghut lhê.
 51 Yhâng é wum-o bo é loq èq
 mauhpo mù mó pé lé
 tân shit bê.
 Yhumsîng myit é hkyô
 má nghutbûn nyi é
 bang lé, Yhang lhoq
 pyo pyám bê.
 52 Zaugun suwún wuî lé gi,
 zau zûng tanghkuq
 mai lhoq hkyô pyám
 mù,
 i-myt nyhûm bang lé gi,
 lhoq myhâng bê nghut
 ri.
 53 Zòmút hui bang lé gi, ge é
 zoshuq gyi shoq byi tso
 mù,

sutzè wó bang lé gi, akôm
 nhang kat bê nghut ri.

- 54-55 Nga-nhûng é íchyí îwâ pé
 lé taí tô é dang eq ra-
 jung za, Abraham eq
 yhangzo yhangshu pé
 lé,
 hkâ-nhám le shogyo nhik-
 myîn nyi râ gâ e lé myit
 bûn nyi é yanmai,
 Yhâng é dui-nhâng
 zoshâng Israelaq byu
 pé lé hku baú nyi ri."

ga luí, taí ri.

- 56 Mariq gi, Elizabet chyáng
 lhamó sum hkyap kô nyí mù
 luí, yhûm shut dum taú lò
 byuq bê.

*Wui-myhup Sará Yohan
 Baú É Hkyô*

- 57 Hau htâng, Elizabet gi,
 zoshâng bau râ buinyi jé mù,
 yuqgè zo bau bê.

58 Yhang lé haú-í kô é jeju
 Yhumsîng tân shit é hkyô lé,
 yhâng é yhumkyo buinùm
 wuî eq mung moq gumang
 wuî wó gyo kojáng, yhang eq
 rahá gabú nyi akô.

59 Ahkuí shit nyí jé jáng,
 yhangmoq gi, zoshâng haú lé
 ahpyo-kuq hpyit byi râ matú
 lé kôluí, yhâng wâ é myìng
 eq rajung za, Zakhariq ga
 myhíng byi râ dâ akô.

60 Nghut kôlháng, yhâng nu
 gi, "A nghut, Yohan nghû
 sheq myhíng râ nghut lhê." ga
 tû taí ri.

61 Yhangmoq gi, "Náng é
 amyû suisho má le, haú su gâ
 é myìng rayuq le a bo wú shí."
 ga luí, yhang lé taí akô.

62 Haú hkún, zoshâng haú
 lé hkâsu nghû myhíng nau lhê

laq ga, yhang wa lé loq lik lik shit mù myî akô.

63 Zahkariq gi, kê jung longpá dúng yù mù, "Yhang é mying gi, Yohan nghut lhê." ga kê shit ri. Haû mù, lhunglhâng bang gi, maú byuq bum akô.

64 Haû hkûn jáng, Zahkariq gi, nhut hkum bóng lô mù, dang wó nyô lui, Garai Gasang lé hkya-ôn nyi ri.

65 Haû su dut é hkyô lé, wó gyô é awui ayàm lhinghkyuq mâ é lhunglhâng bang gi, gyuq maú byuq bùm kômù, Yuda mau bum mau ramau gón taí pyo lô bum akô.

66 Wó gyô é lhunglhâng bang gi, haû hkyô lé yhum-sing é i-myit unghkaú má kat to mù, "Zoshâng shî gi, hkâsu dut lò râ sù nghut lhê lhú?" ga myit wú nyi akô. Haî mù gâ le, haû Yhumsing é loq gi, yhang eq rahá nghut nyi é yanmai nghut ri.

Zahkariq É Myiqhtoi Dang

67 Haû hkûn, zôshang é yhangwa Zahkariq gi, Chyoiyúng Woi-nyí byíng lô mù, myiqhtoi dang dong taí é gi,

68 "Haû Yhumsing, Israelaq é Garai Gasang lé hkya-on sháng ô!

Haî mù gâ le, Yhang gi, Yhang é amyû lé, lé kûm wú mù lui, lé hkyi yù bê nghut ri.

69 Garai Gasang gi, Yhang é dui-nhâng zoshâng, Dawiq é amyû mai nga-nhúng é matú

wum-o bo é hkyi yu é hkyuî† lé, yuq htoq lô nhâng bê.

70 Shí hkyô gi, a-nham pyat mai yhang é chyoiyúng myiqhtoi pé é nhut mai taí tô é eq rajung za nghut ri.

71 Haû hkyuî gi, nga-nhúng lé nga-nhúng é gye pé chyáng mai le, a ngui a naù bang banshoq é loq mai le, hkyi yù râ nghut lhê.

72 Îwa Garai gi, nga-nhúng é îchyí îwa pé lé shogyo nhikmyin hkyô lé tân shit râ matú, Yhang byî tô é chyoiyúng dangshikaq lé a tô-myhí nghut ri.

73 Haû gi, nga-nhúng é chyiké Abraham lé byi tô é danggidiq nghut lhê.

74-75 Nga-nhúng lé gye pé loq mai hkyi yù râ eq, nga-nhúng asak dui tô é buinyi banshoq má,

Yhang é hí má a gyuq a kyum é za, chyoiyúng é eq dingmán é hkyô mai,

Yhang lé wó dojaú nyi nhâng râ matú, Yhang jé lé é nghut lhê.

76 Ngá zo ê, nàng gi, Yhumsing é hí má, e lô mù lui, Yhang é hkyô lé hen lajang byi râ sù nghut é yanmai,

nang lé Myhang htáng htúm Su é myiqhtoi ga kó râ nghut lhê.

† 1:69 Hkyi yu é hkyuî gi, Yhumsing Yesuq lé taí é nghut ri.

77 Nàng gi, Garai Gasâng é byu pé lé, yangmoq é yubak mara hkyut pyám byí é dong, hkyi yu é hui râ hkyô lé taí kyo râ sù nghut lhê.

78 Haí mù gà le, Garai Gasâng é shogyo nhikmyin é yanmai, napsûn bui‡ gi, mauhkûng mai nga-nhûng chyáng htoq lé lô râ nghut lhê.

79 Yhang gi, mauchut hkaûš eq shî wup hkaû má lúng to bang lé builoq su duqbó byi râ eq, nga-nhûng lé nguingón sim-saq é hkyô shut shuî e lô râ sù nghut lhê." ga ri.

80 Zoshâng haú gi, kô lò mù, woi-nyí wum-o bo lò luí, Israelaq byu pê chyáng htoq shit lo é buinyi jé shoq, yoso pé má nyi nyi ri.

2

Betlehem Wà Mó Má Yesuq Hku Lo É Hkyô

Mht 1:18-25

1 Buinyi haú pé má, Romaq hkoséng ming banshoq má é byù lhunglhâng bang gi, myìng jihpán kat râ matú, hkoséng Kehtaq Augustuq chyáng mai mungdang htoq ri.

2 Jihpán haú lé sâng-hi dàm guq hi é gi, Kuireni ga sù Suriq mau má mauzau kut nyi é hkûn nghut ri.

3 Haú hkûn, byù du jup gi, myìng jihpán kat râ matú, ó le ô é wà shut lô bum akô.

4 Haú mù, Yosep le Dawiq é awut ashín nghut é yanmai, Galile mau Nazaret wà mai, Yuda mau mâ é Betlehem gá é Dawiq é wà shut,

5 yhang dúng tô é myiwe Mariq eq rahá myìng kat lhóm râ matú jé doq lô akô; Mariq kúm gi, gungloq laí to bê nghut ri.

6 Haú Betlehem má nyi tô ashî le, Mariq gi, zo hkú râ buinyi jé mù, zomún yuqzo lé bau bê.

7 Yhang gi, zoshâng haú lé panchoq eq htup mù no tso langhkang má lheq tô ri; haí mù gà le, bíng yhûm má yangmoq nyi râ jowò a joq lo é yanmai nghut ri.

Sau Zúng Bang Yesuq Chyáng Jé Lé É Hkyô

8 Ahkuí, haú ginwáng má é sau zúng zo bang gi, sau zúng jang má yangmoq é sau hpúng lé, myín lé zúng nyi akô.

9 Haú hkûn, Yhumsîng é maumang lagyo gi, yangmoq é hí má lé htoq yap shit to mù, Yhumsîng é hpung-wup shingkang gi, awui ayàm má duqbang lò luí, yangmoq gyai gyuq bum akô.

10 Maumang lagyo gi, "Hkâgyuq kó, byù lhunglhâng bâng é matú, gyai yhang gabú é danglù, ngò nungmoq chyáng wun lé lo lhê.

‡ 1:78 Napsûn bui gà é gi, Yesuq lé taí é nghut lhê. § 1:79 Mauchut hkaû gà é gi, Garai lé a sé mù woi-nyí má shi tô é bang lé gà lhê. * 2:11 Grik dong Hkrisiduq gà é gi, xù but hui Sù gà é lichyûm nghut mù, Hebre dong "Mesaia" gà é eq rajung za nghut lhê.

11 Hkû-nyí lhê buinyì má, Hkrisduq* nghu é Yhumsîng nghut é hkyi yù Sû gi, Dawiq é wà má nungmoq é matú hku to bê.

12 Nungmoq é matú kumlhá gi, zoshâng nyheqnú rayuq panchoq eq htup mù, no tso langhkang má lheq to lánq ra nghut lhê." ga luí, yhangmoq lé tai ri.

13 Haú hkûn jáng yhang, mauhkûng bang rajum rayo htoq lô mù, maumang lagyo haú eq rahá Garai Gasang lé hkya-ôn é dang gi,

14 "Htoq tsáng myhâng má, Garai Gasang gi, hpungwup shingkang bo nyi sháng gaq ô!

Myigùng htoq má le, Yhang ô nau é byu pé má, ngu-ingón é gi, hkâ-nhám le joq nyi sháng gaq ô!"

gâ akô.

15 Maumang lagyo pé, yhangmoq chyáng mai, mauhkûng shut dum ló byuq jáng, sau zúng bang gi, "Sà! Betlehem wà mó má jé shoq yhang, nga-nhúng ê mù, ahkuí za Yhumsîng nga-nhúng lé lé shit kyô lai ló bê hkyô lé ê gôn wú sháng." ga luí, rayuq eq rayuq tai lhûm akô.

16 Hau htâng, yhangmoq gi, hân hân ê luí, Mariq eq Yosep lé le, no tso langhkang má lheq tô é zoshâng nyheqnú lé le, ê myàng akô.

17 Zoshâng haú lé, yhangmoq myàng kôjáng, zoshâng haú eq séng luí yhangmoq lé,

lé tai kyô é dang lé, tai pyô kat bekô.

18 Wó gyô é bang banshoq gi, haú sau zúng bang tai kyô é dang lé, maú byuq bum akô.

19 Mariq kúm gi, dut lo é hkyô pé eq wó gyô é dang banshoq lé unghkaú má matsîng yù mù luí, nik nik myit wú nyi ri.

20 Sau zúng bang gi, yhangmoq lé maumang lagyo tai kyô kat é dang eq rajung za, wó gyô yù, wó myang yu é hkyô pé banshoq é yan-mai, Garai Gasang lé hkya-on kungtôn uchyang dum tai ló bekô nghut ri.

Yesuq Lé, Noqkuq Yhûm Má Shui É É Hkyô

21 Zoshâng haú, shit nyi jé mù ahyo-kuq hpyit byi rá buinyí má, yhang unghkaú má a lúng shi mai maumang lagyo myhîng tô é myîng eq rajung za, yhang lé, "Yesuq" ga luí, myhîng byi akô.

22 Mosheq é tarâ eq rajung za, yhangmoq é lhoq san lhoq séng é buinyi byîng jáng, Yhumsîng é tarâ má, "Zomún yuqzo hkangmó gi, haú Yhumsîng é hí má chyoiyúng sù wó nghû rá matú, Yhumsîng chyáng é ap byi rá lhê."* gâ é eq,

23 "Hpûngkyui razúm, haú a nghut jáng, nghoqmyhû zo í du,"* hkungga byi rá lhê ga kâ tô é eq rajung za,

24 Mariq eq Yosep gi, zoshâng haú lé shui mù Yerusalem wà mó shut ê akô.

25 Haú hkûn, Simeon gâ é mangzo rayuq, Yerusalem wà mó má nyi ri. Haú yuq gi, dingmán é eq tarâ cháng sù nghut mù, Israelaq lé nhik lhoq títng râ ahkýng lé láng nyí sù nghut ri; haú Chyoiyúng Woi-nyí le, yhâng é ah-toq má nyi nyi ri.

26 Yhang gi, haú Yhumsîng Hkrisduq lé a myang é za, shî râ a nghut, ga Chyoiyúng Woi-nyí èq tûn shit tô é hui sù nghut lhê.

27 Yhang gi, Chyoiyúng Woi-nyí èq shui mù, noqkuq yhúmhaú má ê jé nyi tô é hkûn lé, Mariq eq Yosep gi, zoshâng Yesuq lé htûng tarâ eq rajung za kut byi râ matú, noqkuq yhúmhaú má shuí wang lô kôjáng,

28 Simeon gi, zoshâng lé loq èq lhom bún yú mù, Garai Gasang lé hkya-ôn é dang gi,

29 "Yhumsîng ê, náng é dang-gidiq gi, dik bê nghut ri; hkû-nyí náng é jùn ngò gi, nguingón é èq wó shi lô berâ nghut lhê.

30 Haí mù gâ le, byù lhunglhang bâng é matú, nàng lajang tô é hkyi yù hkyô lé, ngá myoq èq yhang wó myâng bê.

31 Haú gi, byù myú chângjup wó myâng râ matú, nàng lajang to byí é nghut mù,

32 tûngbaù pé lé, tengmán hkyô má bui su duqbó mù hpông shit râ matú le, náng é amyû

Israelaq é hpungwup shingkâng matú le nghut nyi ri."

gâ ri.

33 Yhângnu eq yhângwâ nhik gi, zoshâng Yesuq é hkyô lé Simeon taí é yanmai, maú byuq akô.

34 Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shî gi, Israelaq ming mâ é byù myo myô é matú lingbat jowò eq myo myô é matú kô lò myhang lò râ hkyô le, byù myo myo taí he pyám râ kumlhá matú le, hkyin tô é hui sù nghut ri.

35 Haú mù, byù myo myô é unghkaú má, myit mi-myt lé lhoq htoq shit râ nghut lhê. Náng é myit nhiklhum má, shâm chûn èq htaú kyâng kat é su gâ é lé, nàng hui zo râ nghut lhê." ga taí ri.

36 Ashe amyû mâ é Hpanuelaq é yhangzo, Annaq gâ é myiqhtoi myhí rayuq nyi ri; yhang gi, ipyat gyai ko bê. Yhang gi, zomyí pyat mai, yhanglâng eq nyhit zân za nyi luí, shit xe myi zân jé shoq chuimó mó nyi to sù nghut ri.

37 Myiwe haú gi, noqkuq yhûm mai a htoq ê za, nyí myín a ga noqkuq dojaú nyí mù, zoshuq gám luí kyûdûng nyi ri.

38 Simeon dang ban taí jáng, Annaq gi, hui lé lô mù, Garai Gasâng jeju lé hkya-on luí, Yerusalem wà mó lé Garai Gasang hkyi yù râ gâ é lé, myit lum to bang lhunglhang

lé, zoshâng hau é hkyô taí kyô ri.

³⁹ Yosep eq Mariq gi, kut râ pé lé haû Yhumsing é tarâ joq é dông ban kut jáng, Galile mau mâ é yhangmoq wà Nazaret shut dum taû lô bekô.

⁴⁰ Zoshâng haû gi, kô lò mù, wum-o bò lo é eq, hpaqchyî byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

Noqkuq Yhúmhaû Má Zoshâng Yesuq Jé Nyi É Hkyô

⁴¹ Yhângnu yhângwâ nhik gi, Lhoqlhai Poî jé hkangmó, zàn wui Yerusalem wà mó má é ê kut akô.

⁴² Yesuq raxe í zân jé jáng, poî haû, é bo lòm ra htungli joq é eq rajung za, yhangme wui yhanghpe wui doq lô akô.

⁴³ Haû poî buinyi lai luí, dum taû lo é hkûn, zoshâng Yesuq gi, Yerusalem wà mó má nyi gyó tô ri; nghut kôhang, yhângnu yhângwâ nhik gi, a sé kó.

⁴⁴ Yesuq lé rahá lo é luzúm wui chyáng bò râ su ngàm kômù luí, Yosep eq Mariq gi, ra-nyî buigyùm chap sô lô bê htâng má, mung moq wui eq, sê lhûm é buinùm ji-myi wui chyáng Yhang lé châng ho akô.

⁴⁵ Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taû jé e lô bekô.

⁴⁶ Ahkuí, sum nyí nghû râ nyí sheq, noqkuq yhúmhaû má, tarâ sará pê é gung gung má zùng to mù, yhangmoq é

dang lé gyo yù luí, dum taû myi myi kut nyi é lé, yhangnhik é myàng akô.

⁴⁷ Yhâng é dang wó gyô é bang banshoq gi, Yhâng é unuq nyau é hkyô lé le, Yhang tû taí é dang lé le, maú nyi akô.

⁴⁸ Yhang lé myàng jáng, yhangnhik maú byuq kômù luí, yhângnu gi, "Ngá zo ê, haí mù luí ngá-nhik lé isu kut lhê lhú? Wú aq, náng wa eq ngá-nhik gi, myit myo myit chiq é eq, náng lé jaq châng ho pyám bê." ga luí, Yhang lé taí ri.

⁴⁹ Yhang gi, "Haí mù luí, ngo lé châng ho akô lhú? mauhkung mâ é ngá Wá é yhûm má ngò nyi râ lhê le gi, nungnhik a sé kó lhú?" ga luí, yhangnhik lé tû taí ri.

⁵⁰ Nghut kôhang, yhangnhik gi, Yesuq taí é dang lichyúm lé, a sê gyo kó.

⁵¹ Yesuq kúm gi, yhangnhik eq rahá Nazaret wà shut taû jé gyó lô luí, yhangnhik nyo é dang lé gyo mù nyi tô ri. Yhângnu Mariq gi, dut lai lò bê hkyô pé banshoq lé, yhâng é myit nhiklhum má matsing tô ri.

⁵² Yesuq gi, hpaqchyî byéng-yá kung zet lo é eq, gunghkyâng kô myhang lò mù, Garai Gasâng é hí má le, byu hí má le, myoqdong wó lo nyi ri.

3

Wui-myhup Sará Yohan Mhoqshit É Hkyô

Mht 3:1-12; Mrk 1:1-8; Yhn 1:19-28

1 Romaq hkoséng Kehtaq Tiberuq gi, hkó zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má;

2 Anna eq Kayahpaq gi, hkyangjong mó mù má, kut nyi akô. Haú hkûn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri.

3 Haú mù, yhang gi, Yodan làng yàm jowò hkanmó má, sô jón wún luí, yubak mara hkyut pyám byí é hui rá matú myit lhîng mù, wui-myhup hkâm* yù rá hkyô lé, hko kyô nyi ri.

4 Haú gi, myiqhtoi Esai-aq laiká má,

"Haú yoso má, byù rayuq garû taí é htê gi,

'Haú Yhumsing é matú, hkyô hen to keq, Yhâng é matú hkyô lhoq nyhang to keq;

5 wuìhkung langhkop hkanmó lé lhoq pyíng ra rá nghut lhê; bùm eq wingkáng hkanmó lé hpyit pyám ra rá nghut lhê;

agoí aguq é hkyô hkat hkanmó lé lhoq nyhâng ra rá nghut lhê; ahkung ahkop dut é hkyô hkat hkanmó lé lhoq rhá ra rá nghut lhê.

6 Haú hkûn, byù banshoq gi, Garai Gasâng é hkyi yù hkyô lé myàng rá nghut lhê."[☆]

ga luí, kê tô é eq rajung za nghut ri.

7 Shiwa byù rajùm rayò gi, Yohan é loq má wui-myhup hkâm yù rá ga luí htoq lé lô kôjáng, Yohan taí é gi, "Duq htan é lhangmuì amyù pé[†] é, jé lô rá yubak dam mai wó hpang lut kó sháng gaq ga, nungmoq lé ó yuq taí pùn é lhú?

8 Myit lhîng hkyô eq gingdán é ashi zui keq. 'Nga-nhúng gi, Abraham é yhangzo yhangshù pé nghut lhê.[‡] nghû luí, yhumsing é i-myit unghkaú má hkâtaí kó. Hkâsu mù gâ le, ngò, nungmoq lé taí kyo kôlé, Garai Gasang gi, luggok shí pé mai, Abraham é matú yhangzô pé wó hpan htoq kat lhê.

9 Ahkuí lháng, Garai Gasang gi, Yhâng é wazung lé haú sigâm wang pé má tô to bê nghut ri; haú mù, ge é ashi a zui é agàm hkanmó lé gi, htuq lhêng pyám mù, myi

* 3:3 Wui-myhup hkâm gâ é gi, baptisma lé gâ é nghut lhê. ☆ 3:6 Esai 40:3-5

† 3:7 Lhangmuì amyù pé gâ é gi, Lukaq 3:7-10 má bo é Hparishe eq Saduke pé lé taí é nghut ri. ‡ 3:8 Nga-nhúng gi, Abraham é yhangzo yhangshù pé nghut lhê gâ é gi, Abraham é yhangzo yhangshu nghut é yanmai, Garai Gasang jéyáng é lé a hui rá ga, myit yu é hkyô nghut ri. § 3:9 Bun zo shí lhùm é lichyúm gi, myit a lhîng bang lé, Garai Gasang jéyáng é buinyi jé rá nghut lhê ga nau é nghut ri.

má dú kat pyám râ nghut lâhê." gâ ri. §

10 Haú hkûn, shiwa byu pé gi, "Haú nghut le gi, ngamoq hkâsu kut le gè râ l hú?" ga luí, yhang lé myí akô.

11 Yhang gi, "Bu í dung wó sũ gi, bu a wó sũ lé, gãm byi sháng gaq; zo shuq wó sũ le, a wó sũ lé, gãm byi sháng gaq." ga luí, yhangmoq lé tũ taí kat ri.

12 Kang guq bang le, wui-myhup hkâm yù râ ga lé lô mù, "Sarâ ê, ngamoq gi, hkâsu kut le ge râ l hú?" ga luí, yhang lé myí akô.

13 Yhang gi, "Nungmoq hkyui yù râ masat tô é htoq lai shoq hkâyû kó." ga luí, yhangmoq lé taí ri.

14 Gyezô pé ra-am le, "Ngamoq gi, hkâsu kut le gè râ l hú?" ga luí, yhang lé lé myí akô.

Yohan gi, "Ó lé le hkâkyuq zo ko; a tara é dõng mara le hkâhûn kó; nungmoq wó e ahpaũ èq gé bũn nyi keq." ga luí, yhangmoq lé taí ri.

15 Shiwa byu pé kúm gi, Hkrisduq lé myit lánq nyi tô é bang nghut é yanmai, Yohan lé haú yuq nghut lâhê laq ga yhumsing é i-myt unghkaũ má myit wú nyi bum akô.

16 Haú hkûn, banshoq bang lé Yohan taí é gi, "Ngò gi, nungmoq lé, wui èq za wui-myhup hkâm byí lâhê; nghut kôlhang, ngá htoq má wum-o a-tsam je bo é sũ rayuq jé lé lô râ nghut lâhê. Ngò gi,

yhâng é hkyî-tsung tui lé hpyí râ l háng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi râ nghut lâhê.

17 Yhang gi, loq má byò chung to mù, guq chyârâng mâ é guq bùm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám râ nghut lâhê." gâ ri.*

18 Haú mù, Yohan gi, byù haú bang lé gotû dang myo myo èq lhoq pun lhoq kying mù, gabú danglù lé hko kyô nyi ri.

19 Nghut kôlhang, hkâ-myháng a myáng má mauzau Herut gi, yhanggû é yhangmyí Herudiaq lé lú yu é hkyô eq, yhang kut shut é gotû a ge é mú banshoq é yanmai, Yohan gi, yhang lé tân mhoqshit bê nghut ri.

20 Mara haú pê htoq agó, Herut dum kut jat yu é mara gi, Yohan lé htóng má lhung kat é nghut ri.

Yesuq, Wui-myhup Hkâm Yu É Hkyô

Mht 3:13-17; Mrk 1:9-11

21 Yohan lé htóng má a lhung kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyûdũng nyi le, mauhkũng bõng lô mù,

* 3:17 Haú eq rajung za, Hkrisduq gi, a ge é byu pé eq ge é byu pé lé gam hkoq pyám râ nghut lâhê.

22 haû Chyoiyúng Woi-nyí gi, hpûngkyui gunghkyâng sù é dông mai Yhâng ahtoq má lé gyó nô ri. Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

Yesuq É Byù Xik Shap Kyô É Hkyô

Mht 1:1-17

23 Yesuq gi, Yhang mû zuí hi é hkûn, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo,

24 Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo,

25 Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo,

26 Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo,

27 Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo,

28 Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo,

29 Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo,

30 Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo,

31 Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo,

32 Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo,

33 Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo,

34 Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo,

35 Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é

yangzo,

³⁶ Shela gi, Kainan é yangzo, Kainan gi, Arhpaza é yangzo, Arhpaza gi, Shem é yangzo, Shem gi, Noaq é yangzo, Noaq gi, Lamek é yangzo,

³⁷ Lamek gi, Mehtusela é yangzo, Mehtusela gi, Enuq é yangzo, Enuq gi, Yaret é yangzo, Yaret gi, Mahelela é yangzo, Mahelela gi, Kainan é yangzo,

³⁸ Kainan gi, Enu é yangzo, Enu gi, Shet é yangzo, Shet gi, Adam é yangzo, Adam gi, Garai Gasâng é yangzo nghut ri.

4

Yesuq Lé Tsadán Gunlaú É Hkyô

Mht 4:1-11; Mrk 1:12-13

¹ Yesuq gi, Chyoiyúng Woi-nyí èq byíng mù, Yodan làng mai dum taú lo é hkûn, Chyoiyúng Woi-nyí gi, Yhang lé yoso shut shuí e ri.

² Haú má, Yesuq gi, buinyi myi xê nyí jé shoq, nat Tsadán èq gunlaú é huí ri. Buinyi haú gyoro má, Yesuq gi, haí le a zô é yanmai, zòmut hui bê nghut ri.

³ Haú mù luí, nat Tsadán gi, "Nàng, Garai Gasâng é Yhangzo nghut le gi, luqgok shí lé muk dut nhâng aq." ga luí, Yhang lé taí ri.

⁴ Haú hkûn, Yesuq gi, "Byù gi, muk èq za asak duì râ a nghut." ga luí, Chyúmdang má kê tô ri. "☆ ga yang lé tû taí ri.

⁵ Hau htâng, nat Tsadán gi, Yesuq lé, gyai yang myhang é bùm htoq má shuí doq ló mù, mingkan má joq é mingdán pé banshoqlé razup má za tûn shit luí,

⁶ "Shí ahkáng ayá banshoq eq haú mingdán é hkikhkâm hkyô banshoq, ngò nang lé wó byí lhê; hkâsu mù gâ le, haú pé banshoq gi, ngo lé ap byí to bê nghut mù, ngò byí nau é sù ó yuq lé nghut kôlhâng, byi râ nghut lhê.

⁷ Haú mù, Nàng, ngo lé noq é nghut jáng, shí pé banshoq Nàng é dut râ nghut lhê." ga, Yesuq lé taí ri.

⁸ Haú hkûn, Yesuq gi, "'Haú Yhumsîng náng é Garai Gasang lé za, nàng noqkuq dojaú ra râ nghut lhê.'☆ ga luí, Chyúmdang má kê tô ri." ga luí, yang lé tû taí ri.

⁹ Nat Tsadán gi, Yesuq lé Yerusalem wà mó má shuí ê mù, noqkuq yhum je myhang é shúhtâng htoq má yap nhang to luí, "Nàng, Garai Gasâng é Yhangzo nghut le gi, shí mai byam gyó kat wú aq.

¹⁰ Hkâsu mù gâ le, 'Nang lé upzúng byí nyi râ matú, Garai Gasang gi, Yhâng é maumang lagyô pé lé taí to râ nghut mù,

¹¹ luqgok má náng é hkyí a ló htung shoq, yangmoq é loq èq Nang lé lhom bún yû kó râ nghut lhê.'☆

ga luí, Chyúmdang má kê tô ri." ga taí ri.

☆ 4:4 Tarâ Pun 8:3

☆ 4:8 Tarâ Pun 6:13

☆ 4:11 Hkya-on 91:11-12

12 Nghut kôlhang, Yesuq gi, "Haù Yhumsîng, nungmoq é Garai Gasang lé, wó chyam wú râ a nghut."☆ ga luî, Chyúmdang má bo tô ri." ga, yhang lé tú taî ri.

13 Nat Tsadán gi, gunglau é hkyô pé banshoq ban kut jáng, ahko ahkáng láng wú uchyang yhâng chyáng mai byam gâng nyi byuq ri.

Yesuq Lé Nazaret Wà Bang He-ngik Pyâm É Hkyô

Mht 4:12-17; 13:53-58; Mrk 1:14-15; 6:1-6

14 Yesuq kúm gi, Chyoiyúng Woi-nyí wum-o byíng é èq Galile mau shut dum taù lo ri. Haù mau jowò hkangmó má, Yhâng é hkyô lé taî pyo ló bùm bekô.

15 Yhangmoq é tarajong pé má, Yesuq mhoqshit byi mù, lhunglhâng bang gi, Yhang lé taî hkya-ôn nyi bum akô.

16 Hau htâng má, Yhang nyi kô lo é Nazaret wà má dum taù jé ló bê; Yhang gi, hkâ-nhám le kut nyi é eq rajung za, Bánno buinyi* lé tarajong má wang ê mù, laiká nghap râ ga toq yap é hkûn,

17 Yhang lé myiqhtoi Esai-aq chyúmding byi kôjáng, Yhang chyúmding haù lé hpông kat le,

18 "Yhumsîng é Woi-nyí gi, ngá é ahtoq má nyi nyi ri;

hkâsu mù gâ le, asho awuî é bang lé gabú danglù hkô kyo râ matú, Yhang ngo lé hkyin yù bê.

Htóng lúng bang lé lhoq htoq râ hkyô eq, myoqjit bang lé myoq dum myàng nhâng râ hkyô hkô kyo râ matú le, zik zo huî é bang lé nhang kat nhâng râ eq,

19 Yhumsîng, Yhâng é byu pé lé hkyi yù râ ahkyíng zanwut lé hkô kyo râ matú le, Yhang, ngo lé nhang kat bê nghut ri."☆

ga luî, kê tô é jowò lé myang záng mù nghap ri.

20 Hau htâng, Yesuq gi, chyúmding haù lé ding mù, shuî-u sù lé tau byi pyám luî, dum zung tô ri; tarajong má é byù lhunglhâng bang gi, Yesuq lé chôm wú tô é hkûn,

21 Yesuq gi, "Nungmoq é nohkyap má, ahkuî wó gyô é Chyúmdang shî gi, hkû-nyí yhang lo dik bê." ga luî, yhangmoq lé taî hi kat ri.

22 Lhunglhâng bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, maù kôluî, "Shí yuq gi, Yosep é yhangzo a nghut lhu?" ga taî bum akô.

23 Haù mù luî, Yesuq gi, "Nungmoq gè gè yhang, 'Chi sará ê, yhumsing gùng lé lhoq

☆ **4:12** Tarâ Pun 6:16 * **4:16** Bánno buinyi gâ é gi, Yudaq byu pé nômù é buinyi lé gâ lhê. Ahkui lhê é dông ga jáng, Bánno buinyi gi, bat htoq hkyuq nyi lé âng ri. ☆ **4:19** Esai 61:1-2 † **4:23** Chi sará ê, yhumsing gùng lé lhoq ge yù aq gâ é sanghkyang gi, "Mesaia nghut le gi, mauhpo mù wó tûn shit râ nghut lhê." gâ é nghut lhê.

ge yù aq.[†] gâ é sanghkyang èq le, 'Nàng, Kaperna-um wà má kut shit wú é hkyô ngamoq wó gyo bê, haù eq rajung za, nàng, nàng é yhum mau má le, kut shit wú aq.' ga luí le, ngo lé taí kó rà nghut lhê." ga taí ri.

²⁴ Yhang dum xoq taí é gi, "Ngò, nungmoq lé teng za taí kôlé, myiqhtoi ó yuq le yhum-sing é yhum mau má myoq-dong wó wú é a nghut.

²⁵ Ngò, nungmoq lé teng za taí kôlé, Eliyaq é pyat lé, Israelaq ming má chuimó myo myo nyi bum akô.

²⁶ Nghut kôlhang, haù ming má súm zan eq lhamó hkyuq hkyap yhang, mau a wò dut byuq mù, mutmó gyó tô é hkûn, Garai Gasang gi, yhangmoq mâ é rayuq chyáng le, Eliyaq lé a nhang kat é za, Sidun mau Zarephta wà mâ é, chuimó myhí rayuq chyáng sheq nhang kat byî é nghut lhê.

²⁷ Myiqhtoi Elisha é pyat má le, Israelaq ming má, manggâm dap é byù myo myo nyi kôlhang, yhangmoq chyáng mâ é rayuq le wó sân-yúng yù kô é a nghut; Suriq byù Naman ga sù tungbaù hpó za sheq wó sân-yúng é nghut lhê." ga taí ri.

²⁸ Tarajong hkaù mâ é lunglhang bang gi, haù hkyô lé wó gyo kôjáng, gyai yhang nhik-yo nau bùm kômù,

²⁹ toq yap luí, Yhang lé wà mai hkat htoq mù, yhangmoq é wà xuq tô é bùm gùng htoq mâ é gampyoq má, ê chýùn

hpyit hkyô pyám rà ga shuí e ló akô.

³⁰ Nghut kôlhang, Yesuq kúm gi, byù hpûng haù mai so hkoq htoq ló byuq bê nghut ri.

Agè Ashop É Nat Lé Yesuq Hkat Htoq É Hkyô

Mrk 1:21-28

³¹ Hau htâng, Yesuq gi, Galile mau mâ é Kaperna-um wà má jé é mù, Bánno buinyi má byu pé lé mhoqshit hi ló bê nghut ri.

³² Yhangmoq gi, Yhang mhoqshit é hkyô lé mauhong nyi akô; hkâsu mù gâ le, Yhang gi, ahko ahkáng bo é dang dông taí nyi é yanmai nghut ri.

³³ Yesuq, tarajong hkaù má mhoqshit byî nyi é hkûn, nat gang wang júng é byù rayuq htê mó o mó èq taí é gi,

³⁴ "Ê, Nazaret wà byù Yesuq é, ngamoq gi, Nàng eq haí sêng lhê lú? Ngamoq lé lhoq hten rà matú, Nàng jé lé é nghut lhê lú? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

³⁵ Haù hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat jáng, nat gi, haù yuq le yhangmoq é gung gung má lhoq lheq to mù, a nò nhang é za, yhâng chyáng mai htoq ló byuq ri.

³⁶ Haù mù luí, shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasú é dang wá nghut lhê lú? Yhang gi, ahkáng ayá

èq le, wum-o bo é èq le, agè ashop é nat pé lé hkunmó hkyó jáng, haú bang htoq ló byuq akô." ga taí lhum bum akô.

³⁷ Haú hkûn, haú mau mâ é awui ayàm jowò hkanmó má jàm shoq, Yhâng é hkyô lé taí pyo hû ló bûm bekô nghut ri.

Yesuq Nòhpyo Lhoq Gê Byî É Hkyô

Mht 8:14-17; Mrk 1:29-34

³⁸ Yesuq gi, haú tarajong mai toq ló mù, Simun é yhûm má wang ló ri. Simun é yhâng-aumó gi, alì gyai nyé no nyi é nghut mù luí, lhoq gê byî râ matú, Yesuq lé garúm dung byî akô.

³⁹ Yesuq gi, Simun é yhâng-aumó nàm má yap to mù, nòhpyo haú lé tân kat jáng, Simun é yhâng-aumó gi, ge ló byuq bê; haú hkûn jáng, yhang gi, toq mù, yhangmoq lé gaí tso gaí huq bê nghut ri.

⁴⁰ Bui wang ló jáng, nòhpyo hui bang eq awáng nòhpyo ajung jung dap é bang lhunglhang lé, Yesuq chyáng shuí lé lô kômù, yhangmoq rayuq htàng rayuq é ahtoq má Yesuq gi, loq ke byi luí, lhoq gê byî ri.

⁴¹ Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luí, wut taí mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó taí loshoq, Yesuq tân pyâm ri.

⁴² Maubó lô jáng, Yesuq gi, htoq ló mù, gaú é jowò yoso hkaú má ê nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a ló byuq râ matú châng hkúm wú akô.

⁴³ Nghut kôlhang, Yesuq gi, "Garai Gasâng é mingdán é gabú danglù lé, gó wâ pé má le ngò hko kyo râ râ ashî, haú é matú, Garai Gasang gi, ngo lé nhang kat bê nghut lhê." ga luí, yhangmoq lé taí ri.

⁴⁴ Haú mù, Yesuq gi, Yuda mau mâ é tarajong pé má, hko kyô wún nyi ri.

5

Sâng-hi Ji Yù Huí É Chángzô

Pé

Mht 4:18-22; Mrk 1:16-20

¹ Radàm má lé, Yesuq gi, Genesarat nhông yàm má yap tô le, Garai Gasâng é mung-dang gyo râ ga, shiwa byu pé, Yhâng chyáng chýn chyap wang lé lô kô é hkûn,

² nhông gin-gau yàm má lhaí razúm joq tô é lé, Yhang myang kat ri. Ngogûn dú bang kúm gi, lhaí mai htoq mù, yhangmoq é gùn pé lé chỉ nyi akô.

³ Yesuq gi, Simûn é lhaí má wàng mù gin-gau mai rachyit lhoq kang nhâng luí, haú lhaí htoq má zung to mù, shiwa byu pé lé mhoqshit taí kyô nyi ri.

⁴ Dang ban taí jáng, Yesuq gi, Simun lé, "Wui nik é shut hui luí, ngozo wó kông yù râ matú, nungmoq é gùn pé lé dú hkyô kat keq." ga taí ri.

5 Simun gi, "Yhumsing ê, ngangmoq amàn ra-myin mau shikut wú kôlhang, haî le a wó; nghut kôlhang, náng dang é yanmai, ngò gùn dú hkyô kat râ nghut lhê." ga tâ ri.

6 Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq ló râ su dut é yanmai,

7 lhaî gó lhum mâ é luzúm wuî lé, lé garúm yû râ matú loq lik lik kat kôjáng, haú bang lé lô mù, haú lhaî í lhum aluq myup ló shoq ngozo lé kat pyíng bekô.

8 Simun Petruq gi, haú lé myàng jáng, Yesuq é hkyî wang má hkyihput htuoq mù, "Yhumsing ê, ngá chyáng mai ló byuq aq, haî mù gâ le, ngò gi, yubak dap é byù nghut nyi lhê." ga tâ ri.

9 Haî mù luî gâ le, Simun le, yhang eq nyi tô é lhunglhang bang le, haú su ngozo wó yu é yanmai, maú nyi bùm kômù nghut ri.

10 Simûn é luzúm nhik, Zebedi é yhangzo Yakuq eq Yohan le, haú su chôm maú byuq akô.

Hau htâng, Yesuq gi, "Hkâgyuq, ahkuî mai nàng gi, byù lé châng kóng sù dut râ nghut lhê." ga luî, Simun lé tâ ri.

11 Yhangmoq gi, wuiyàm má jé jáng, lhaî pé eq yhangmoq é zè banshoq lé tô pyâm to luî, Yesuq htâng cháng bekô nghut ri.

Manggâm Dap Bang Lé

Yesuq Lhoq Gê Byî É Hkyô
Mht 8:1-4; Mrk 1:40-45

12 Radàm lé, Yesuq gi, wà rawà má nyi tô lé, ragùngdû é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuoq luî, "Yhumsing ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga dúng wut ri.

13 Yesuq gi, loq lham kat mù, haú yuq lé ê záng luî, "Ngò dóng lhê, sân-yúng aq hkoî." ga tâ ri; haú hkûn jáng, haú yuq é manggâm gi, ge byuq bê nghut ri.

14 Yesuq gi, "Nàng, shí hkyô ó lé le hkâtaî kyo. Nghut kôlhang, náng é gungdu lé, hkyangjong hpô chyáng ló tân shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé taî hkûm kat ri.

15 Nghut kôlhang, Yesuq é hkyô gi, je riyhang taî pyo hû jam ló mù luî, shiwa byù rajùm rayò gi, Yhâng é dang gyo râ matú le, yhangmoq é nòhpyo lhoq gê byî nhâng râ matú le, lé zup míng tô akô.

16 Yesuq kúm gi, Yhang baú tsik za yoso shut htoq é mù, kyû é dung dung kut ri.

Gùngjum Shî Sû Lé, Yesuq
Lhoq Gê Byî É Hkyô
Mht 9:1-8; Mrk 2:1-12

17 Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wà hkyap

hkanqmó mâ é bang eq Yuda mau, Yerusalem và mó mâ é bang nghut akô. Yhumsing Garaí é wum-o a-tsam le nõhpyo lhoq gê râ matú Yesuq eq rahá nghut nyi ri.

¹⁸ Haú hkûn, byù ra-am gi, gùngjum shî sù rayuq lé taphkang mai waqlé lô kômù, haú yuq lé, yhúm hkaú má nyi tô é Yesuq é hí má, wó lheq byi shoq ga hkyô ho nyi akô.

¹⁹ Byù lúm myô chyin chyap to mù, haú nõ sù lé hká dông le a wó shuí wàng kôluí, haú yhumhkung htoq shut waq doq lô mù, haú yuq lé taphkang eq roq, shiwa hpong gung gûng, Yesuq é hí ang ang má hkyô hang kat akô.

²⁰ Yesuq gi, yhangmoq é lumjing myit lé byu myàng jáng, "Byù nàng ê! Náng é yubak mara lé hkyut pyám byi bê." ga taí ri.

²¹ Haú hkûn, Hparishe pé eq tarâ sará pé gi, "Shî su ga luí, Garaí Gasang lé rhoi dang taí é sù gi, ó yuq wá nghut lhê lhú? Garaí Gasang za a nghut jáng, yubak mara wó hkyut pyám byi sù gi, ó yuq wá nghut lhê lhú?" ga luí, myit són wuí nyi bum akô.

²² Yesuq gi, yhangmoq myit són wuí nyi é hkyô lé sé mù, "Nungmoq é i-myt hkaú má, haí mù shí pé lé myit són wuí nyi akô lhú?

²³ 'Náng é yubak mara lé hkyut pyám byi bê.' nghu taí râ eq, 'Toq luí, hkyô so aq.'

ngû taí râ má, hká hkun je taí lui lhê lhú?

²⁴ Nghut kôlhang, haú Byu Yhangzo* gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga mù, haú gùngjum shî sù lé, "Ngò, nàng lé taí bá, toq aq, náng é taphkang yu chùng lui, yhùm taú lô aq hkoi." ga taí ri.

²⁵ Haú hkûn jáng, yhang gi, yhangmoq é hí má toq yap mù, yhâng é taphkang waq chùng lui, yhâng é yhùm shut Garaí Gasang lé hkya-on kungtôn uchyang lô byuq bê.

²⁶ Byù banshoq bang gi, gyai maú byuq kômù lui, Garaí Gasang lé hkya-on kungton akô nghut ri. Yhangmoq gyai gyuq maú dik é èq le, "Hkû-nyí, nganhúng, mauhpo amú pé lé myàng bê." ga taí nyi akô.

Yesuq Gi, Lewiq É Yhùm Má Yubak Dap Bang Eq Rahá Zo Shuq É Hkyô

Mht 9:9-13; Mrk 2:13-17

²⁷ Hau htâng má, Yesuq sô e lô le, Lewiq gâ é kang guq sù rayuq yhâng é kang guq zúm má zung tô é lé ê myàng mù, haú yuq lé, "Ngá htâng cháng aq." ga taí ri.

²⁸ Lewiq gi, haú mâ é zè banshoq lé tô pyám to mù, toq lui, Yhâng htâng cháng bê nghut ri.

²⁹ Hau htâng, Lewiq gi, yhâng é yhùm má Yesuq é matú zoshuq poi mó kut byi ri; poi haú má kang guq bang

* 5:24 Byu Yhangzo gâ é gi, Yesuq Yhànggùng yhang lé le taí e nghut lhê, Mesaia lé le taí é nghut lhê.

myo myo eq byù góbang le, yhangmoq eq rahá za zô zung nyi bum akô.

³⁰ Haû mù luí, Hparishe pé eq yhangmoq hpúng mâ é tarâ sará pé kúm gi, "Nungmoq gi, haî mù luí kang guq bang eq yubak dap bang eq rahá zo shuq nyi akô lúhú?" ga, Yhâng é chángzô pé lé mara hûn dang taî akô.

³¹ Yesuq gi, yhangmoq lé, "Wángzân bang chi sará a ra kó, nôhpyo hui bang za sheq ru râ lhê.

³² Ngò gi, dingmán bang lé wut yù râ matú jé lé é a nghut, yubak dap bang myit lhîng râ matú sheq jé lé é ru nghut lhê." ga tû taî ri.

Zoshuq Gám Hkyô Eq Séng Luí, Yesuq Taí É Hkyô

Mht 9:14-17; Mrk 2:18-22

³³ Dum, yhangmoq gi, "Yohan é chángzô pé gi, zoshuq gám mù kyûdung dung kut akô; Hparishe pé é chángzô pé le, haû su kut akô; nghut kôlhang, náng é chángzô pé gi, haî mù zô nyi shuq nyi akô lúhú?" ga Yesuq lé taî akô.

³⁴ Yesuq, yhangmoq lé tû taî é gi, "Bíng pé gi, lusik eq rahá nghut nyi to ashî hkûn, yhangmoq lé zo shuq wó gám nhâng râ lúhú?

³⁵ Nghut kôlhang, lusik† lé yhangmoq chyáng mai shuí yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê." gâ ri.

³⁶ Dangtú dông mai le, Yesuq, yhangmoq lé taî é gi, "Mebu sik mâ é lîng cheq yû mù, mebu xau má hpo é gi, ó a kut wú kó; haû su kut é nghut jáng, mebu sik lé le lîng cheq pyâm é dut mù, pán jap sik le mebu xau eq du lhum râ a nghut.

³⁷ Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng mù, tsibiyiq wing le yui shun byuq, htûng le htên byuq, dut râ nghut lhê.

³⁸ Haû su a dut shoq gi, tsibiyiq wing asik lé, shokuq htûng asik má kat ra râ nghut lhê.

³⁹ Tsibiyiq wing axau shuq nyi bê sù gi, asik lé a shuq naû nghut râ; hkâsu mù gâ le, 'Axau sheq je nghâm ri.' ga taî râ." gâ ri.

6

Bánno Buinyi Má, Yesuq É Chángzô Pé Kyôshi Shap Zô É Hkyô

Mht 12:1-8; Mrk 2:23-28

¹ Bánno buinyi ra-nyí má, Yesuq gi, Yhâng é chángzô pé eq yò hkaû mai sô laí ló é hkûn, Yhâng é chángzô pé gi, kyôshi ratsuí langshap yû mù, loq èq nè hpuq zô akô.

² Haû mù luí, Hparishe pé ra-am gi, "Bánno buinyi má a ge kut jung lé, nungmoq gi, haî mù luí haû su kut akô lúhú?" ga taî akô.

† 5:35 Lusik gâ é gi, Yesuq lé taî nau é nghut lhê.

³ Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut huí é hkûn, hkâsu kut é hkyô lé, nungmoq a nghap wú kó lú?"

⁴ Dawiq gi, Garai Gasâng é yhûm* hkaû má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhâng htâng châng é bang lé le, byi tsô é a nghut kó lú?" ga tâ tai ri.

⁵ Hau htâng, Yhang gi, "Hau Byu Yhangzo gi, hau Bánno buinyi é Yhumsîng nghut lhê." ga yhangmoq lé tai ri.

Loq Jum Shî Sû Lé Yesuq Lhoq Gê Byî É Hkyô

Mht 12:9-14; Mrk 3:1-6

⁶ Gotû Bánno buinyi má le, Yesuq gi, tarajong má wàng mù mhoqshit nyi é hkûn, loqyo loq ajum shi byuq é byù rayuq hau má nyi tô ri.

⁷ Hau hkûn, tarâ sará pé eq Hparishe pé gi, Bánno buinyi má nòhpyo lhoq gê byi râ lú ga luí, Yhang lé mara wó hùn shoq ga gyám wú nyi akô.

⁸ Yesuq kúm gi, yhangmoq é i-myt lé sé sù nghut luí, loq jum shî sù lé, "Toq mù, ban-shoq bâng é hí má, yap shit aq." ga tâ kat ri. Hau yuq le, toq mù yap tô ri.

⁹ Hau hkûn, Yesuq gi, "Ngò nungmoq lé myî wú kôlé, Bánno buinyi má, ge é muzó kut râ, a ge é muzó kut râ, byù asak hkyî râ eq lhoq hten râ

pé má hká lhum kut le sheq tarâ wang lhê lú?" ga luí, yhangmoq lé tai ri.

¹⁰ Hau htâng má, yhangmoq banshoq lé lhing wú mù, hau loq jum shî sù lé "Náng é loq nyhang kat aq." ga tâ kat é hkûn lé, yhang le loq nyhang kat luí, yhâng é loq gi, shoq za ge byuq bê nghut ri.

¹¹ Nghut kôlhang, yhangmoq gi, myoq chum nhô chik yhang nhik-yo nau kômù luí, "Yesuq lé hkâsu wá kut pyám râ lú?" ga luí, rayuq eq rayuq tâ lhum nyi akô.

Raxe Í Yuq Lé Lagyo Ga Myhîng Yu É Hkyô

Mht 10:1-4; Mrk 3:13-19

¹² Hau yoq ra-nyí má, Yesuq gi, kyûdung râ ga bùm shut htoq e ló luí, ra-myin mau Garai Gasang lé kyûdung nyi ri.

¹³ Maubó jáng Yhâng é chángzô pé lé wut yù mù, yhangmoq chyáng má é raxe í yuq lé hkyin yù luí, lagyo pé ga myhîng to byî ri.

¹⁴ Hau bang gi, Yesuq èq Petruq ga myîng myhîng byî é Simun eq, yhanggu Andre, Yakuq eq Yohan, Hpilip eq Barhtolume,

¹⁵ Mahte eq Htomaq, Alhpe é yhangzo Yakuq eq Zelutuq† dut é Simun,

¹⁶ Yakuq é yhangzo Yudaq eq, Yesuq lé ap pyám râ sù Yudaq Iskarut pé nghut akô.

* **6:4** *Garai Gasâng é yhûm* nghu é gi, Yerusalem wà mó má joq é saksé zúm lé gâ é nghut lhê. † **6:15** *Zelutuq* gâ é lichyúm gi, yhumsîng zui sai é hkyô má gyai yhang myit lòm shirong é sù lé ga lhê. Hau u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

*Hkungsô Wó É Hkyô Eq
Dingnyé Wó É Hkyô*

Mht 4:23-25; 5:1-12

17 Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wà mó mâ é bang, wuìshuq lung-aû ayàm mâ é Turuq myuq eq Sidun myuq mâ é bang, rajùm rayò gi,

18 Yhâng é dang gyô yù rà eq yhangmoq é nõhpyo lhoq gê nhâng rà matú, rahá za zup míng tô akô. Agè ashop é nat èq zing-ri huì é bang le ge byuq akô.

19 Yhâng é gùng mai htoq é wum-ô èq byù banshoq lé lhoq gê byì nyi é yanmai shiwa byu pé le Yhang lé wó záng shoq ga, ho nyi akô.

20 Haú hkûn, Yesuq gi, Yhâng é chángzô pé lé wú kat lúí taí é gi,

"Myùng bang nungmoq gi, hkungsô wó nyi ri, hkâsu mù gà le, Garai Gasâng é mingdán[‡] gi, nungmoq é mingdán nghut nyi ri.

21 Ahkuí, zòmút wuìshit huì nyi é bang nungmoq gi, hkungsô wó nyi ri, hkâsu mù gà le, nungmoq nhik dik shoq myàng zo kó rà nghut lhê.

Ahkuí, ngau nyi bang nungmoq gi, hkungsô wó nyi ri, hkâsu mù gà le,

nungmoq myang wuì kó rà nghut lhê.

22 Haú Byu Yhangzô é yanmai nungmoq lé su èq a nguì é, lhoq hpyoq lhoq kâng é, hoq hpu nhang é,

agè ashop nghut é dong jihpoi gamhkui huì é hkûn, nungmoq gi, hkungsô wó nyi ri.

23 Haú hkûn lé, gabú byam chyû nyi keq, hkâsu mù gà le, wú keq, nungmoq é matú kô é chyunghuq gi, mauhkûng mingdán má joq tô ri. Ngò, nungmoq lé taí lhê, hkâsu mù gà le, yhangmoq é íchýí îwa pé le myiqhtoí pé[§] lé haú su kut wú bekô."

24 Nghut kôlhang, sùt wó bang nungmoq gi, dingnyé wó rà, hkâsu mù gà le, nungmoq gi, yhum-sing gùng má nhik shí nhik dik é hkyô lé huì yù bekô.

25 Ahkuí, gyi gyi dau dau myàng zo myàng shuq nyi é bang nungmoq gi, dingnyé wó rà, hkâsu mù gà le, nungmoq zòmút wuìshit é hui kó rà nghut lhê.

Ahkuí, wui nyi é bang nungmoq gi, dingnyé wó rà, hkâsu mù gà le, iyon yôn é eq ngaubyi ngau-nhap htoq é hui kó rà nghut lhê.

26 Byù banshoq bang, nungmoq lé ge é byù ga

[‡] 6:20 *Garai Gasâng é mingdán* gà é gi, *Garai Gasang up é lé gà lhê.* § 6:23 *Myiqhtoí pé le zing-ri huì é yanmai, yhangmoq chyunghuq wó nyi akô.* Haú eq rajung za, jamjau huì é bang nga-nhúng le chyunghuq wó rà nghut lhê.

kôjáng, nungmoq gi,
dingnyé wó râ,
hkâsu mù gâ le, yhang-
moq é îchyí îwâ pé le,
myiqhtoi pyoq pé* lé,
haû su ga taî wú bekô.

*Gye Pé Lé Chyitdap Râ
Hkyô*

Mht 5:38-48; 7:12

²⁷ Hau htoq agó, ngá dang
gyô nyi bang nungmoq lé ngò
taî kôlé, nungmoq é gye pé lé
chyitdap nyi keq; nungmoq
lé a naù a wôm é bang lé ge é
hkyô kut keq;

²⁸ nungmoq lé nhîng é bang
lé, shimân byi keq; nungmoq
lé rhoi é bang lé kyûdung byi
keq.

²⁹ Nang lé bo-pyuq
rahkyam shut pyuq byi sù lé,
rahkyam dum hkâm byi shi
aq; náng bumó hkyut yu é sù
lé, buzo le dum hkyut byi shi
aq;

³⁰ nang lé rajung jung dîng
é sù lé le, byi pyám aq; náng zè
yu pyám byi é su chyáng mai
le, hkâdîng yù lo.

³¹ Nungmoq ô nau é dîng
supé lé kut nhâng nau é su,
yhangmoq lé le kut byi keq.

³² Nungmoq lé chyitdap é
bang lé za chyitdap kô le gi,
nungmoq é matú hai akyû bò
kó râ lhú? Yubak dap bang le,
yhumsîng lé chyitdap é bang
lé gi, chyitdap nyi akô.

³³ Nungmoq lé ge é dîng kut
nyi é bang lé za, ge é dîng kut
nyî kô le gi, nungmoq é matú
hai akyû bò kó râ lhú? Yubak

dap bang le haû su kut nyi
akô.

³⁴ Supé lé zè chyí byi le,
dum wó tau byi râ su dut
é bang lé za, chyí byi le gi,
nungmoq é matú hai akyû
bò kó râ lhú? Yubak dap
bang lháng chyí byi é myhó
dum wó yù shoq, yubak dap
é bang lé chyí byi akô.

³⁵ Nghut kôlhang, nungmoq
gi, nungmoq é gye pé lé chy-
itdap mù, ge é dîng kut byi
nyi keq. Dum wó taû yù
râ lé myoq a byu é za, chyí
ngho byi keq; haû su kut jáng,
nungmoq wó é chyunghuq ko
râ eq, Myhang htáng htúm Su
é yhangzô pé dut râ nghut
lhê; hkâsu mù gâ le, Yhang
gi, jeju a dat bun bang eq agè
ashop é bang lé ge é kut nyi ri.

³⁶ Nungmoq é Îwa Garai
Gasang shogyo nhikmyin sê é
su, nungmoq le shogyo nhik-
myîn nyi keq.

A Jéyáng Râ Hkyô

Mht 7:1-5

³⁷ A jéyáng é za nyi keq; haû
jáng, nungmoq le jéyáng é a
hui kó râ nghut lhê. A do-
qdân é za nyi keq; haû jáng,
nungmoq le doqdân é a hui
kó râ nghut lhê. Mara hkyut
byi keq; haû jáng, nungmoq
le mara hkyut byi é hui kó râ
nghut lhê.

³⁸ Byi keq, haû jáng, nung-
moq le dum byi é hui kó râ
nghut lhê. Mán é bîng mai
byíng mui shûn shoq nhûn
chyíng, dîng chyíng kat mù,
nungmoq é tanghkoí hkaû
má lik kat byi é hui kó râ.

* 6:26 Myiqhtoi pyoq pé gi, Garai Gasang jéyáng é hui râ.

Hkâsu mù gâ le, nungmoq lik byî é bung èq, nungmoq lé dum lik byi râ nghut lhê." gâ ri.

³⁹ Hau htoq agó, Yhang dangtú ralhum dông yhangmoq lé dum taí é gi, "Myoqjit sù gi, myoqjit sù lé hkyô wó tân shit lhê lúh? Yhangnhik í yuq é dongkong má byit gyó kó râ nghut lhê, a nghut kó lúh?

⁴⁰ Jongzo gi, sará htoq gyaú râ a nghut; nghut kôlhang, gúm shoq mhoq yû bê sù ó nghut kôlhang, yhumsing é sará su dut râ nghut lhê.

⁴¹ Yhumsing myoq hkaú má lúng tô é siktúm† lé lhang a myit wú é nhing, haí mù luí, nunggu nungmâng é myoqwàng‡ lé myang lhê lúh?

⁴² Yhumsing é myoq má lúng tô é siktúm lé lhang a myàng sù nhing, 'Gumang hpó ê, náng myoq má lúng tô é myoqwàng lé, ngò choq pyám byi lé.' nghu luí, náng é gumang hpó lé hkâsu wó taí râ lúh? Gegùn labyoq kut sù ê, náng é myoq má lúng tô é siktúm lé hí choq pyám aq. Haú jáng sheq, nunggu nungmang é myoq má wang tô é myoqwàng lé choq pyám byi râ matú, nàng san za myàng râ nghut lhê.

Agàm Eq Ashi

Mht 7:17-20; 12:34-35

⁴³ A ge é ashí zuí é, ge é shigâm hkâmá le a joq. Ge é

ashí zuí é, a ge é shigâm le a joq.

⁴⁴ Haú mù luí, shigâm hkangmó lé, zuí é ashí lé wú mù wó sê hkyin yu lhê. Dangké, zubyap mai maihpáng-shi ó le a myang hpyoq yù wú, zugyóm mai le tsibiyiq shi a wó hpyoq yu wú.

⁴⁵ Ge é sù gi, yhumsing é i-myit unghkaú má é sutođ mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaú má é agè ashop é sutođ mai, agè ashop é zè pé lé lhoq htoq shit lhê. Haí mù gâ le, yhâng é i-myit unghkaú má byíng mui tô é lé za, yhâng é nhut mai taí htoq lo é nghut lhê.

Luqtân Htoq Má Yhûm Sai Sù Eq Myì Chîn Dum Má Yhûm Sai Su É Hkyô

Mht 7:24-27

⁴⁶ Ngò taí é eq rajung za lhang a wó châng kut kô é nhing, haí mù luí, nungmoq Ngo lé 'Yhumsing ê, Yhumsing ê.' nghu nyi akô lúh?

⁴⁷ Ngá chyáng lé mù, ngá dang gyô yù luí, châng kut é sù ó nghut kôle, hkasú é sù eq wuí é lé ngò nungmoq lé shit kyo kôle.

⁴⁸ Haú yuq gi, wahpang yhûm saí le, nik nik du luí a dui é lunghtân htoq má apûn awang hí é sù eq wuí lhê. Wui jê lò luí wuibaú pê èq yhûm haú lé lo gùn kôlhang, ging ging tíng tíng saí to bê nghut luí, haú lé a wó gun nhún.

† **6:41** Siktúm nghu e gi, yubak mara kô é lé taí lhê. ‡ **6:41** Myoqwàng nghu e gi, yubak mara atiq azo lé taí é nghut lhê.

49 Ngá dang gyô yù mù, a cháng sù gi, apùn awang a saí é za myì chîn dum má wah-pang yhùm saí sù eq wuí nyi ri. Wuibaù pê èq yhùm haù lé lo gun kat é eq, haù hkûn jáng, lêng gyop byuq ri. Yhùm haù byoq hten byuq é gi, yù whuí a bò lohoq dut byuq râ nghut lhê." gâ ri.

7

Romaq Gyezau Rayuq É Lumjîng Myit

Mht 8:5-13; Yhn 4:43-54

1 Yesuq gi, shiwa byu pé lé ban mhoqshit é htâng má, Kaperna-um wà shut wang ló ri.

2 Haù hkûn, Romaq gyezau rayuq é chyitdap dui-nhâng zoshâng gi, shî-nò no nyi ri.

3 Haù u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gê byi râ matú, Yesuq lé è ji lò keq ga, Yudaq suwún wuí lé nhang kat ri.

4 Haù bang gi, Yesuq chyáng jé è kô é hkûn, "Yhang gi, nàng shí hkyô kut byi râ matú gingdán é sù, yhang nghut nyi ri;

5 hkâsu mù gâ le, yhang gi, nga-nhûng amyú lé chyitdap é eq, ngamoq matú tarajong le kut byi sù nghut ri." ga luí, Yhang lé zuq zuq dúng wut nyi akô.

6 Haù mù luí, Yesuq gi, yhangmoq eq rahá za e ló ri.

Haù yhùm eq hká hé a wê é má jé jáng, Romaq gyezau hpó, yhâng é luzúm wuí lé taí nhang kat é gi, "Yhumsîng

Yesuq ê, náng gûng lé hkâlhoq hkyik lo. Nàng, ngá é laishîn-htâng má, lé nang râ lhang ngò má a gingdán.

7 Haù mù, ngò, náng chyáng jé lé râ matú gingdán é sù a nghut; Nàng, dang rahkun za taí kat laq, haù hkûn, ngá é dui-nhâng zoshâng ge ló râ nghut lhê.

8 Hkâsu mù gâ le, ngò le ahkáng ayá wó é zau rayuq é a-ô mã é zau nghut lhê; ngá é a-ô mã le gyezô pé nyi lhê, rayuq lé 'Ê aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jùn lé le, 'Shí kut aq!' nghu le, yhang kut lhê." gâ ri.

9 Yesuq gi, dang haù lé wó gyo jáng, haù yuq é hkyô lé maú byuq luí, Yhang htâng châng é shiwa byu pé lé lhing wú mù, "Ngò, nungmoq lé taí kôlé, Israelaq amyú má lhang, shî í lumjîng é sù lé, Ngò a myang wú." ga taí ri.

10 Nhang kat é bang yhùm má dum taù jé jáng, no nyi é dui-nhâng zoshâng gi, ge to lánng é lé ló myang akô.

Shî Sù Lé Dum Lhoq Tui É Hkyô

11 Hau htâng hkâ-myháng a myáng má, Yesuq gi, Yhâng é chángzô pé eq, shiwa byù moq mó le mù rahá za Na-in gâ é wà shut e ló akô.

12 Haù wà wàng hkum má jé lo é hkûn lé, chuimó myhí é yuqzo te gi, shí mù, yhâng é mâng lé waq htoq lé lo akô. Wà byù myo myo le, chuimó

myhí haú eq rahá châng lé lo akô.

¹³ Yhumsîng gi, haú chuimó myhí lé myàng jáng, yhang lé wú shogyo luí, "Hkâ-ngaú." ga taí ri.

¹⁴ Yesuq gi, gung shut huí ê mù, loq èq ê záng kat ri. Haú hkûn, waq tô é bang le jâng yap to byí akô. Yhang gi, "Zorâm ê, ngò, nang lé taí lhê, toq aq." ga taí ri.

¹⁵ Haú hkûn, shí bê sù gi, toq zûng mù dang taí lo ri. Yesuq gi, zorâm haú lé yhângnú chyáng dum ap byí ri.

¹⁶ Byù lhunglhâng bang gyuq maú bùm kôluí, Garai Gasang lé hkya-ôn é dang gi, "Myiqhtoi mó, nga-nhûng chyáng lé pô htoq bê nghut ri. Garai Gasang gi, Yhâng é amyû lé garúm râ ga lé kûm wú nyi ri." ga taí nyi akô.

¹⁷ Haú Yesuq é hkyô eq sêng é ludang lé, Yuda mau eq haú mau awui ayàm jowò hkangmó má taí pyo myhîn lô bum akô.

Yesuq Eq Wui-myhup Sará Yohan É Hkyô

Mht 11:1-19

¹⁸ Haú hkûn, wui-myhup sará Yohan é chángzô pé gi, haú hkyô banshoq yhang lé lo taí kyô akô.

¹⁹ Haú mù luí, Yohan gi, yhâng é chángzo í yuq lé jì yù mù, haú Yhumsing chyáng nhang kat luí, "Nàng gi, haú jé lé lô râ Sù nghut lhê lhú? Haú a nghut jáng, ngamoq, góyuq lé láng ra shirâ lhú?" ga, myí nhang kat ri.

²⁰ Haú nhik gi, Yesuq chyáng jé jáng, "Nàng gi, haú jé lé lô râ sù nghut lhê lhú? Haú a nghut jáng, ngamoq góyuq lé myoqbyu láng nyí ra shirâ lhú?" ga luí, Wui-myhup Sará Yohan gi, ngá-nhik lé náng chyáng myí nhang kat ri." ga taí akô.

²¹ Haú u yhang, Yesuq gi, nò zo hpyo zo, noli nojàng huí é bang eq agè ashop é nat dap jun dap é byù myo myo lé, lhoq gê byí ri. Myoqjit bang myo myo lé le, myoq dum myàng nhang ri.

²² Haú hkûn, Yesuq gi, yhangnhik lé, "Myàng mi-myàng, wó gyo má wó gyo, Yohan lé lô taí kyo keq; myoqjit bang, myoq wó myâng bekô; hkyí hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê.

²³ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

²⁴ Yohan é chángzô nhik lô byuq é htâng má, Yesuq gi, Yohan eq séng luí, byù moq mó lé taí é gi, "Nungmoq gi, haí lé hpuq wú râ matú, haú yoso shut e akô lhú? Lai èq hik nhûn é jamgàm lé wú râ matú nghut akô lhú?

²⁵ Haú a nghut jáng, haí lé wú râ matú e akô lhú? Nú-nhâm é mebu wut sù lé wú râ matú e akô lhú? A nghut! Wú keq, gyai hpaú é mebu wut luí agùn agó wó bang gi,

hkohkâm-wâng pé má sheq ru nyi lhê.

²⁶ Haû nghut le gi, haî lé wú râ matú ê kô é lhú? Myiqh-toi rayuq lé lhú? Haû kúm nghut ri. Ngò, nungmoq lé taí kôlé, Yohan gi, myiqhtoî htoq lháng gyaú sù nghut lhê.

²⁷ Haú yuq é hkyô lé, Chyúmdang má kâ tô é gi,

'Wú aq, Náng é hkyô lajang lán râ matú, Ngá é lagyo lé, Náng é hí má Ngò nhang kat râ nghut lhê.'^{*}

gâ ri.

²⁸ Ngò, nungmoq lé taí kôlé, myiwe wuî maî hku kat é bang má, Yohan htoq je kô é rayuq lháng a nyi, nghut kôlháng, Garai Gasâng é mingdán má je tiq dik sù gi, Yohan htoq je kô lhê." gâ ri.

²⁹ Mingbyû lhunglhâng bang eq kang guq bang gi, dang haú pé lé wó gyo kôjáng, Yohan byî é bapisma lé hkâm yù kô é nghut mù luî, Garai Gasâng é dingmán é hkyô lé sé gyô yu akô.

³⁰ Hparishe pé eq tará sará pé kúm gi, Yohan byî é bapisma a hkam yù kômù luî, Garai Gasang hen lajang é hkyô lé yhumsing gung é matú he-ngik pyâm akô.

³¹ Yesuq dum taî é gi, "Haû mù luî, byù myû shî lé, Ngò, hai èq taî kê wú râ lhú? Yhangmoq hai eq wuî akô lhú?

³² Yhangmoq gi,

'Nungmoq é matú, ngamoq sampyí mut byi kôlháng, nungmoq gi, a gó kó,

ngamoq ngaù hkyangsâng kôlháng, nungmoq gi, a ngaù kó.'

ga luî, gai pé má zùng uchyang rayuq eq rayuq wut taî lhùm nyi é zoshâng wuî eq wuî akô.

³³ Hkâsu mù gâ le, Wui-myhup Sará Yohan jé lé luî, muk a zo, tsibiyiq a shuq é nyi le le, 'Yhang gi, nat gang dap sù nghut ri.' ga luî, nungmoq taî akô.

³⁴ Haû Byu Yhangzo jé lé luî, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taî akô.

³⁵ Nghut kôlháng, hpaqchyî byéng-yá é yhangzô pé gi, hpaqchyî byéng-yá tengmán é hkyô lé saksé hkâm byî nyi akô."* gâ ri.

Yubak Dap É Myiwe Rayuq, Yesuq Lé Xû But Byî É Hkyô

³⁶ Hparishe rayuq gi, Yesuq lé yhâng chyáng zang zo râ matú ji kat ri. Haû mù, Yesuq gi, haû Hparishe é yhùm má wàng luî zo râ matú zung tô ri.

³⁷ Haú hkûn, wú keq, haú wâ mâ é yubak dap é myiwe rayuq gi, Yesuq haû Hparishe é yhùm má zô zung tô é lé sé

^{*} 7:27 Mal 3:1 ^{*} 7:35 Nghut kôlháng, Garai Gasâng é hpaqchyî byéng-yá lé lhom hap yu é banshoq bang gi, Garai Gasâng é hpaqchyî byéng-yá haû, tengmán ri ga saksé hkâm nyi akô.

jáng, gyai hpau dap é nam-
ngón xû bo é luq hpyû bông
yu lé luí,

³⁸ Yesuq é nunghtáng hkyî
wàng má ngau yap to mù,
Yhâng é hkyî má ngaubyî èq
záng lhoq teq byi jáng, úxam
èq but sut pyám byî ri. Dum
nghut jáng, nhut èq puq luí
mura lé but byî ri.

³⁹ Yesuq lé ji é Hparishe wá
gi, haú lé myàng jáng, "Shí yuq
myiqhtoi nghut le gi, Yhang lé
záng htông é sù, ó yuq nghut
é eq hkâsû é yubak dap é
myiwe nghut é lé, Yhang sé
râ nghut lhê." ga luí, yhâng é
unghkaû má myit nyi ri.

⁴⁰ Yesuq gi, "Simun ê, Ngò,
nang lé taí râ rajung joq ri."
ga taí ri.

Simun le, "Sarâ ê, taí aq." ga
taí kat ri.

⁴¹ Haú hkûn, Yesuq gi,
"Ngùn chyî zo sù rayuq
chyáng, chyîn dap é byù í yuq
nyi ri. Rayuq gi, denari† ngo
shô chap, rayuq gi, ngo xê
chap dap ri.

⁴² Haú nhik gi, chyîn xap
râ ngùn a wó kôluí, chyîn
yhumsîng gi, yhangnhik lé
xap a ra lò gâ pyâm ri. Haú
mù luí, haú nhik mâ é hká
yuq gi, yhang lé je chyitdap râ
lhú?" ga myí ri.

⁴³ Simun gi, "Je myo lhoq
lhut hui sù, nghut râ su ngam
ri." ga tâ taí ri.

Yesuq gi, "Nàng myit e đông
jô ri." ga tâ ri.

⁴⁴ Haú hkûn, Yesuq, myiwe
zo haú lé lhing wú luí, Simun
lé, "Nàng myiwe zo shí lé

myang lhê lhú? Ngò, nàng é
yhûm má wang le, hkyî chi
râ uchyam, nàng a byi, yhang
kúm gi, ngaubyî èq ngá hkyî lé
tik byi luí, yhâng é xam èq sut
pyám byi bê.

⁴⁵ Nàng gi, ngo lé nhut èq
a puq nghut ri; yhang kúm
gi, ngò yhúmhkaû má wang é
mai ngá hkyî má a no loshoq
puq nyi râ.

⁴⁶ Nàng gi, ngá ulhum má
xû a but byí wú, yhang kúm
gi, ngá é hkyî má nàm ngón é
mura but byi bê nghut ri.

⁴⁷ Haú su mù, ngò, nàng lé
taí lé, haú myiwe gi, je chy-
itdap luí, yhang wó é yubak
myo myo lé hkyut pyám byî é
hui bê. Shau za mara hkyut
pyám byî é hui sù gi, shau za
chyitdap sù nghut ri." ga tâ
ri.

⁴⁸ Yesuq gi, myiwe haú lé
le, "Ngò, nàng é yubak mara
hkyut pyám byi bê." ga tâ ri.

⁴⁹ Rahá zung tô é bang gi,
"Yubak mara lháng wó hkyut
pyám byi sù, shí yuq gi, ó wá
nghut lhê lhú?" ga luí, myit
nyi bum akô.

⁵⁰ Yesuq gi, "Nàng é lumjîng
myit èq nang lé hkyi yù bê,
ngón za lô aq hkoi." ga luí,
myiwe haú lé taí kat ri.

8

*Yesuq Htâng Châng É
Myiwe Wui*

¹ Hau htâng hkâ-myháng a
myáng má, Yesuq gi, Garai
Gasâng é mingdán hkyô eq
sêng é gabú danglù lé taí kyo

† 7:41 Denari rachap gi, ra-nyí lhê é byù rayuq é zuihpau eq wuí ri.

uchyang, Yhâng é lagyo raxe í yuq eq rahá za, rawa htâng rawà jé e ló ri.

² Hau htoq agó, nat gang dap é mai le, nôhpyo mai le Yesuq eq lhoq ge yu é myiwe wui, nat nyhit nat lhoq htoq pyám byi huí é, Magadalaq wà má é Mariq le,

³ Herut é ikun zum sù Kuza é yhumsing myhí Yoanaq le, Susannaq le, gotú myiwe wui myo myo le, Yesuq eq rahá nghut akô. Haú bang gi, yhumsing wó du é í Yesuq eq lagyo pé lé byi zo byi huq nyi akô.

Kyôshi Sân É Hkyô
Mht 13:1-23; Mrk 4:1-20

⁴ Wà hkanq wà mó má é bang gi, Yesuq chyáng zup zing lé lo bùm kômù shiwa byù moq mó zup ming tô é hkûn, Yesuq dangtú dong tái kyô é gi,

⁵ "Kyô hkyó sù rayuq gi, kyôshi san râ ga htoq e ló ri. Yhang, kyôshi sân kat é hkûn, ra-am gi, hkyô má gyó ang mù, byu eq záng nâng pyeq pyâm lhê, maulat nghoq pê eq hte zo pyâm lhê dut ri.

⁶ Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuí shi byuq akô.

⁷ Ra-am gi, zugyóm hkaû má gyó ang luí, zubyap eq rahá yuq htoq lô mù, wup pyâm é hui bê nghut ri.

⁸ Nghut kôlhang, ra-am gi, myihpún bo é jang má gyó ang mù, yuq kô lò jáng, rashô tú myô jat lo ri." ga tái ri.

Yhang haú su ga tái nyi é hkûn, "Gyô yù râ nohkyap dap sù gi, gyô yù sháng gaq!" ga le, htê mó eq tái kat ri.

⁹ Haú hkûn, Yhâng é chángzô pé gi, dangtú shí hai lichyúm nghut lhê lhú ga, Yhang lé myi akô.

¹⁰ Yhang gi, "Garai Gasâng é mingdán eq sêng é sê gyo wui é hkyô pé lé sê gyo râ ahko ahkáng, nungmoq lé byi to bê. Nghut kôlhang, góbâng matú gi,

"Wú to kôlhang, a myàng kó sháng, gyô nyi kôlhang, a sê gyo kó sháng."^{*}

ngû, ngò dangtú dong tái lhê.

¹¹ Ahkui lhê é dangtú shi é lichyúm gi, ísu nghut ri: kyôshi gi, Garai Gasâng é mungdang nghut nyi lhê.

¹² Hkyô má gyó âng é kyôshi gi, haí eq wui lhê lhú gâ le, haú mungdang lé byu pé wó gyô é htâng má, lumjینگ é má le, hkyi yu é má le, a jé kó sháng gaq ga luí, yhangmoq é i-myt hkaû mai nat Tsadán eq mungdang haú lé, lé yu pyâm é hui bang eq wui lhê.

¹³ Luqgok yò pé má gyó âng é kyôshi gi, haí eq wui lhê lhú gâ le, haú mungdang lé wó gyo jáng, gabú myit eq hap yù kôlhang, amyit a wó chín mù, rayoq rabun za lumjینگ luí, gunglaú huí é nyí má, dum htak ló byuq é bang eq wui lhê.

¹⁴ Zugyóm má gyó âng é kyôshi gi, haí eq wui lhê lhú gâ le, haú mungdang lé gyô

^{*} 8:10 Esai 6:9

yù luí, yhumsing é asak dui e ló é hkyô má, shí ipyat lhê é myit wui myit hke hkyô, ngùn zè sutgan eq mingkan ngón hkyô má myup byuq luí, mo é ashi a zuí é bang eq wui lhê.

¹⁵ Hpún bo é myigùng má gyô é kyôshi kúm gi, haí eq wui lhê lú gâ le, haú mungdang lé lhumzui luí ge é i-myit eq ban gyô yù mù, ging tíng shoq zuí zìng luí, wó jân é i-myit eq ashi zuí é bang eq wui lhê.

Myibung Htún É Hkyô

Mrk 4:21-25

¹⁶ Myibung lé tap mù, aù eq nghop tô é le, yhupchong ô má tô tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô.

¹⁷ Hkâsu mù gâ le, a htoqzê loshoq haq tô é zè haí le a joq, a sé a byông htoq loshoq wó zaú tô é zè le haí a joq nghut ri.

¹⁸ Haú mù luí, nungmoq hkâsu wó gyô yu é hkyô lé sidiq nyi keq, haí mù gâ le, wó to sú lé gi, jat byi shirâ, a wó su chyáng mai kúm gi, yhang wó to bún é mâ é lé lhang, yu pyám byi shirâ nghut lhê." ga taí ri.

Yesuq É Yhângnu Eq Yhanggu Pé

Mht 12:46-50; Mrk 3:31-35

¹⁹ Haú hkûn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lûm chyûn chyap to kômù, Yhâng chyáng a wó wang é kó nghut ri.

²⁰ Haú hkûn, Yhang lé, "Náng nu eq nunggu pé gi, nang lé hui naú luí, shinggan má lánq yap bum akô." ga taí kyo akô.

²¹ Yesuq gi, yhangmoq lé, "Garai Gasâng é mungdang lé gyô yù luí, châng é bang gi, Ngá nu eq Ngá gû pé nghut akô." ga luí, yhangmoq lé tû taí kat ri.

Laidun Mó Lé Yesuq Lhoq Zim É Hkyô

Mht 8:23-27; Mrk 4:35-41

²² Ra-nyí lé, Yesuq gi, Yhâng é chángzô pé lé, "Nga-nhúng nhông he hpoq shut dap e ló sháng." ga taí luí, lhaí má wàng mù gû dap e ló akô.

²³ Yhangmoq gû dap e ló é hkûn lé, Yesuq gi, yhup myhí tô ri. Haú u lé, nhông haú má laidun mó lò luí, lhaí má wui byíng lô mù, yhangmoq myup shí râ su dut lò nyi bekô nghut ri.

²⁴ Haú mù, yhangmoq gi, Yesuq chyáng huí é luí, Yhang lé nhaú pun mù, "Yhumsing ê, Yhumsing ê, nga-nhúng myup ló nyi ri." ga taí akô.

Haú hkûn, Yhang toq luí, laidun eq wuìlhêng pé lé tân kat jáng, haú pé gi, zim za dut ló byuq bê.

²⁵ Haú mù, Yesuq gi, "Nungmoq é lumjíng myit gi, hkâmá nghut akô lú?" ga luí, yhangmoq lé myí ri.

Yhangmoq kúm gi, gyuq maú byuq bùm kôluí, "Shí yuq gi, hkasû é byù nghut lhê là? Yhang hkunmó hkyó jáng, lai eq wuìlhêng pé lhang gyo byi ri-nhung!" ga luí, rayuq eq

rayuq myî lhûm bum akô nghut ri.

Nat Lé Hkat Htoq Byî É Hkyô

Mht 8:28-34; Mrk 5:1-20

²⁶ Hau htâng, yhangmoq gi, Galile mau tú tap mâ é Gerase byu pê é mau má jé dap e ló bekô.

²⁷ Yesuq kong shut doq ló le, haú wâ mâ é nat gang dap é sù rayuq gi, Yhang lé hui ri. Haú yuq gi, yhûm má le a nyi é za, mebu a dap é, lupdùng má myáng myáng nyi nyi sù nghut ri.

²⁸ Haú yuq gi, Yesuq lé myàng jáng, wut garu luí, yhâng é hkyî wang má paí gop to mù, "Myhang htâng é Garaí Yhangzo Yesuq é, Nàng gi, ngò eq haí séng lhê lhú? Ngo lé a zing-ri râ matú, ngò nang lé dúng nyi lhê." ga luí, htê mó èq taí garú nyi ri.

²⁹ Hkâsu mù gâ le, Yesuq gi, agè ashop é nat lé haú yuq gùng mai htoq ló râ matú, tân pyâm é yanmai nghut ri. Byù haú yuq lé nat gâng èq adàm dàm wang júng hkanmó, loq eq hkyî má toqjâng tuí èq tuí shung, kyum xâng tô é eq, zúng tô é nghut kôlhang, lêng hpyit pyám pyám kut é htoq ago, nat gâng èq yhang lé yoso hkaú shut lêngmhap yù yù kut nyi ri.

³⁰ Yesuq gi, yhang lé, "Náng myîng haí gâ lhê?" ga myî kat é hkûn, yhang gi, "Legio* gâ lhê." ga tú taí ri. Haí mù gâ le, yhâng chyáng nat gang myo

myo wang lúng tô é yanmai nghut ri.

³¹ Nat jùm gi, yhangmoq lé nik dik htûm é Lasang-dong shut a kôn kat râ matú, Yesuq lé chôm dúng nyi bum akô.

³² Haú u lé, waq rajùm mó gi, bùm yàm má dù but zô nyi bum akô nghut ri. Haú mù, yhangmoq gi, waq pê chyáng wàng nhâng laq ga, Yesuq lé ahkáng dum dung dung kut kojáng, Yesuq gi, yhangmoq lé ahkáng byi kat ri.

³³ Haú mù luí, nat gang jùm gi, byù haú yuq chyáng mai htoq ló kôluí, waq pê chyáng wàng byuq bekô nghut ri. Haú hkûn, waq haú jùm gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

³⁴ Waq zúng bang gi, haú su dut é lé myàng jáng, hpang din ló kômù, myuq hkaú mâ é bang lé ló taí kyô akô nghut ri.

³⁵ Haú mù, wó gyô é bang gi, haú hkyô lé wú râ matú htoq lé lo akô. Yhangmoq gi, Yesuq chyáng jé lé kô é hkûn, nat gang htoq byuq hui sù, Yesuq é hkyî wang má mebu wut to luí, byù gè rayuq su zùng to lánng é lé myàng kômù, gyuq dan bùm bekô nghut ri.

³⁶ Nat dap sù lé hkâsu kut luí lhoq ge yu é hkyô lé myang é bang gi, góbang lé taí kyô akô nghut ri.

³⁷ Haú hkûn, Gerase byu pê é mau mâ é lhunglhang bang gi, gyuq dan dik kôluí, Yesuq

* **8:30** *Legio* gâ é lichyúm gi, gyezo 4000 eq 6000 gyoro bo é gyedap lé taí ri.

lé yhangmoq é mau mai htoq ló byuq râ matú, chôm dúng tôngbán akô. Haû mù luí, Yesuq gi, taû ló byuq râ matú lhai má wàng bê nghut ri.

³⁸ Nat htoq byuq huí é sù gi, Yesuq htâng cháng râ matú, Yesuq lé dúng tôngbán ri.

³⁹ Nghut kôhang, Yesuq gi, "Nàng, yhùm shut sheq ló mù, Garai Gasang, nang lé hkâ-í kut byi bê hkyô lé, ló taí kyo aq." ga luí, yhang lé ló nhâng bê nghut ri. Haû hkûn, yhang htoq ló mù, Yesuq yhang lé hkâ-í kut byi bê hkyô lé, haû wà rawà bang lé ló taí kyô ri.

Ya-iruaq É Yhangzo Byizô É Hkyô Eq, Yesuq É Bu Lé Lé Záng É Myiwe Rayuq É Hkyô Mht 9:18-26; Mrk 5:21-43

⁴⁰ Ahkuí, Galile byu pé gi, Yesuq dum taû lò râ lé láng nyí kô é nghut mù, Yhang dum taû gú dap lo é hkûn gabú myit eq lhom te yu akô.

⁴¹ Haû hkûn, Ya-iruaq gâ é tarajong má up sù rayuq gi, jé lé lô mù, Yesuq é hkyí wang má hkyihput htuq luí, yhang yhùm má lé râ matú ji nyi ri.

⁴² Hkâsu mù gâ le, raxe í zân bò bê é, yhangzo byizo te gi, shi ló nyi é yanmai nghut ri.

Haû mù, Yesuq cháng e ló le, shiwa byu pé gi, Yhang lé záng htùng lo bum akô.

⁴³ Haû u lé, raxe í zân sui yuí luí ngunzè lhungháng ban pyám shoq chi sará pè chyáng yâ wú kôhang, hká yuq le a wó yâ gè byi é† myiwe

myhí rayuq le haû hkaû má bo tô ri.

⁴⁴ Myiwe haû gi, Yesuq é nunghtáng má huí lé mù, Yhâng é bushi htâng má é záng kat eq, súi yui é ana gi, ge byuq bê nghut ri.

⁴⁵ Haû hkûn, Yesuq gi, "Ngo lé, ó yuq záng bê lhu?" ga luí myí jáng, lhunghâng bang gi, a sé ga he nyi bùm kô é hkûn lé, Petruq gi, "Yhumsing ê, shiwa byu pé gi, náng é lhinghyuq mai náng chyáng chyín chyap wang lo bùm kô é yanmai, nang lé záng bekô râ nghut lhê?" ga taí ri.

⁴⁶ Yesuq gi, "Byù rayuq ngo lé lé záng mù, ngá chyáng mâ é hpungwup a-tsam htoq ló é lé, ngò châng sé kat ri." ga taí ri.

⁴⁷ Haû jáng, myiwe myhí haû gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyí wang má ngóm gop kat luí, haí mù Yhang lé záng é hkyô eq, hká dông ge ló byuq é hkyô pé lé, shiwa byù ban-shoq bâng é hí má Yesuq lé taí kyô nyi ri.

⁴⁸ Yesuq gi, "Ngá zo ê, náng é lumjúng myit gi, nang lé lhoq gè byi bê nghut ri, ngón za ló aq hko!" ga luí, myiwe haû lé taí kat ri.

⁴⁹ Yesuq gi, dang ru taí nyi ashí hkûn, tarajong má up sù Ya-iruaq é yhùm mai byù rayuq jé lé lô luí, "Nung zo gi, shi byuq bê, haû sará lé

† 8:43 Ngunzè lhungháng ban pyám shoq chi sará pè chyáng yâ wú kôhang, hká yuq le a wó yâ gè byi gâ é, Chyúmdang ra-am má gi, bo lhê; ra-am má gi, a bò.

hkâlhoq hkyik nyî lo." ga luî, Ya-iruoq lé taî kyô ri.

⁵⁰ Yesuq gi, dang haû lé wó gyo jáng, "Hkâgyuq, za lumjîng aq, haû jáng, yhang ge byuq râ nghut lhê." ga luî, Ya-iruoq lé taî ri.

⁵¹ Yesuq gi, Ya-iruoq é yhûm má jé é hkûn lé, Petruq, Yohan, Yakuq, eq haû myiwe zô é yhângnu eq yhângwa mai lai luî, yhûm haú má, ó lé le a wàng nhâng kut ri.

⁵² Haú u lé, lhunglhâng bang zoshâng hau é yanmai, ngaubyi ngau-nhap èq yón nyi akô. Yesuq kúm gi, "Hkângaû kó, yhang shi byuq é a nghut, yhup myhî tô é sheq ru nghut lhê." ga luî, yhangmoq lé taî ri.

⁵³ Zoshâng gi, shi byuq bê lé yhangmoq sé kôluî, yhangmoq gi, Yesuq lé wuizui kut pyám byî akô.

⁵⁴ Yhang kúm gi, myiwe zo hau é loq má zuî to mù, "Zoshâng ê, toq aq." ga taî kat ri.

⁵⁵ Haû mù luî, yhâng woi-nyî dum taû wàng mù, haú hkûn jáng toq yap ri. Haû jáng, Yesuq gi, zoshâng haû lé zôjung byi keq, ga yhangmoq lé taî kat ri.

⁵⁶ Haû myiwe zô é yhângnu eq yhângwa nhik gi, gyai maú byuq akô. Nghut kôlhâng, Yesuq gi, haû dut é hkyô ó lé le a taî kyo râ matú, yhangnhik lé taî hkûm tô ri.

9

Lagyo Raxe Í Yuq Lé Nhang Htoq Kat É Hkyô
Mht 10:5-15; Mrk 6:7-13

¹ Yesuq gi, haû lagyo raxe í yuq lé wut yù mù, nat gang banshoq lé wó hkat htoq pyám râ matú eq, noli nojàng wó lhoq gê râ matú, yhangmoq lé wum-o a-tsam eq ahko ahkáng byî ri.

² Hau htâng má, Garai Gasâng é mingdán hkyô hko kyo râ eq, nõhpyo lhoq gê byi râ matú nhang htoq kat ri.

³ Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htai lhang hkâwún hkáchúng kó.

⁴ Nungmoq hká yhûm má wàng kôlhâng, haú wâ mai dum htoq ló é buinyî jé shoq, haú yhûm má za nyi nyi keq.

⁵ Nungmoq lé a lhom hap yu é bang lé gi, yhangmoq é wâ mai htoq ló é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaû lé yhangmoq é myoq hí má ko hkyô pyám to keq." ga taî kat ri.

⁶ Haû mù, yhangmoq gi, htoq e ló luî, wâ hking wâ mó má haû gabú danglù hko kyo uchyang, hká jé hkâmá nõhpyo lhoq gê byî wún akô.

Herut Maú Úng-âng É Hkyô
Mht 14:1-12; Mrk 6:14-29

⁷ Haû su dut é hkyô ban-shoq lé, mauzau Herut wó gyô yù luî myit wuî nyi ri. Hkâsu mù gâ le, ra-am gi, Yohan shi é mai dum dui toq lô bê ga,

⁸ ra-am gi, Eliyaq dum pô htoq lo ri ga, haû mai, ra-am gi, hí hpyang lhê é myiqhtoi rayuq yuq dum dui toq lô bê

ga luí, taí bùm kô é yanmai nghut ri.

⁹ Herut gi, "Yohan é ulhum lé, ngò hpyit pyám nhâng bê, nghut kôlhang, shí í wá taí byông bùm kô é gi, ó wá nghut lhê lúh?" ga luí, Yesuq lé myàng shoq ga ho nyi ri.

Byù Ngo Hkyîng Lé Yesuq Zoshuq Byi Tsô É Hkyô

Mht 14:13-21; Mrk 6:30-44; Yhn 6:1-14

¹⁰ Lagyô pé dum taú lo é hkûn, yhangmoq kut laí lo é hkyô pé, Yesuq lé taí kyô akô. Haú hkûn, Yesuq gi, yhangmoq lé shuí chûng mù, Bet-saida gâ é wá mó shut tsik za e ló byuq ri.

¹¹ Shiwa byu pé gi, haú hkyô lé châng sé kômù, Yhâng htâng châng e ló akô. Yesuq le yhangmoq lé lhom hap yù mù, Garai Gasâng é mingdán hkyô lé taí kyo luí, nõhpyo gè nau bang lé, lhoq gê byí ri.

¹² Buigyùm zó má, lagyo raxe í yuq gi, Yhâng chyáng huí ê mù, "Haú shiwa byu pé lé, awui ayàm mâ é yhùm pé eq wá pé má ló mù, zoshuq hô zo luí ló yhup kó sháng gaq, ló nhâng aq. Hkâsu mù gâ le, ahkuí nga-nhúng gi, yoso má nghut nyi ri." ga luí, Yhang lé taí akô.

¹³ Haú hkûn, Yesuq gi, "Nungmoq, yhangmoq lé rajung jung byi tso keq." ga tú taí ri.

Yhangmoq gi, "Shí myhò bang lé tso rà zoshuq a ê wui le gi, ngamoq chyáng muk-yo muk ngo long eq ngozo í du mai lai luí, haí le a wó nghut

ri." ga taí akô. (Hkâsu mù gâ le, yuqgè wui baú lhang ngo hkyîng kô nghut ri.)

¹⁴ Nghut kôlhang, Yesuq gi, "Shí bang lé rahpúng má ngo xê xê kô kut luí, zùng nhang to keq." ga luí, Yhâng e chángzô pé lé taí ri.

¹⁵ Yhangmoq lé Yesuq taí é eq rajung za, banshoq bang lé zùng nhang to bekô.

¹⁶ Haú hkûn, Yesuq gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, haú lé ajap jap hpé luí, shiwa byu pé lé, châng to byi râ matú, Yhâng é chángzô pé lé byi kat ri.

¹⁷ Haú hkûn, yhangmoq banshoq bang zô gyí bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashí kô nghut ri.

Yesuq Gi, Hkrisduq Nghut Lhê Ga Petruq Taí É Hkyô

Mht 16:13-28; Mrk 8:27-9:1

¹⁸ Radàm lé, Yesuq gi, Yhang baú kyûdùng nyi é hkûn, chángzô pé le, Yhang eq rahá nghut akô. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lhê ga, taí akô lúh?" ga myí ri.

¹⁹ "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqhtoi rayuq yuq dum dui toq lo é nghut ri ga, taí akô." ga luí, yhangmoq tú taí akô.

20 Dum, Yhang gi, yhang-moq lé, "Nghut kôlhang, nung-moq gi, ngo lé ó yuq nghut lê nghu akô lúhú?" ga myí ri.

Haú hkûn, Petruq gi, "Nàng gi, Garai Gasang nhâng byî é Hkrisduq nghut ri." ga tû taí ri.

21 Shí hkyô ó lé le a taí kyo sháng gaq ga, Yesuq, yhang-moq lé taí hkûm pyâm ri.

22 Haú mù, Yhang gi, "Haú Byu Yhangzo gi, zing-rî é myo myo hui zo luí, suwún wuí, hkyangjong agyi pé, tarâ sará pê èq he-ngik pyâm é hui mù, sat pyâm é hui ra râ nghut lê, hau htâng sum nyí nghú râ buinyì má, lhoq toq yu é hui râ nghut lê." ga taí ri.

23 Hau htâng, banshoq bang lé Yhang dum xoq taí é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyâm mù, nyí wuí yhumsing é tapzîng lé waq chûng* luí, cháng ra râ nghut lê.

24 Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lê; nghut kôlhang, Ngá é yanmai, yhumsing é asak sum pyâm é sù kúm gi, asak hkyi yu é hui râ nghut lê.

25 Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, haí akyú bò râ lúhú?

26 Ngò eq Ngá é dang lé, lhóm hap yù râ lé hoq é sù ó yuq lé le, haú Byu Yhangzo

gi, yhumsing é hpungwup shing kang eq, Yhâng Wâ é hpungwup shing kang, haú chyoiyúng maumang lagyô pê é hpungwup shing kang eq jé lé é hkûn, hoq pyâm râ nghut lê.

27 Ngò, nungmoq lé teng za taí kôlé, shí má yap tô é bang ra-am gi, Garai Gasâng é mingdán lé a myang é za shí kó râ a nghut." gâ ri.

Mosheq Eq Eliyaq Yesuq Lé Hui Nyo É Hkyô

Mht 17:1-8; Mrk 9:2-8

28 Dang haú taí é htâng, shit nyí kô nghut jáng, Yhang gi, kyûdung râ ga Petruq, Yohan, Yakuq pé lé shuí chûng mù, bùm shut doq ló ri.

29 Kyû dúng nyi le, Yesuq é myoqdong gi, ihpyô isâm htaí lò mù, Yhâng é mebu gi, lhap su duq bang lo ri.

30 Haú hkûn, wú keq, Mosheq eq Eliyaq gi, hpungwup shing kang eq htoq lé lô luí, Yesuq eq dáng nyo lhùm nyi akô.

31 Yhangmoq gi, Garai Gasang myit tô é hkyô Yerusalem wà mó má Yesuq shí hkâm é dông mai dik lò râ nghut é hkyô lé taí lhùm nyi akô.

32 Petruq eq yhâng luzúm nhik gi, yhup mui nyi akô; nghut kôlhang, yhangmoq bûn lo é hkûn lé, Yesuq é hpungwup shing kang lé le, Yhang eq rahá yap to su nhik lé le, myang kat akô.

* 9:23 Tapzîng lé waq chûng nghu é gi, Yesuq é yanmai jamjau hui é lé taí é nghut lê.

33 Haû nhik Yesuq chyáng mai gâng ló nyi é hkûn, Petruq gi, Yesuq lé, "Yhumsîng ê, shí jowò mã nga-nhúng nyi le ge ri, haû mù, Nàng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq." ga taí kat kôlhang, yhang haí taí nyi é lé, yhang a sé.

34 Petruq dang taí nyi ashí hkûn lé, mhut jé mù, yhangmoq lé htup zíng lo nyi ri. Mhut haû htup lo nyi é yanmai, yhangmoq gi, gyuq byuq akô.

35 Haû mhut hkaû mai htoq lo é htê gi, "Shí yuq gi, Ngá zo nghut lhê; Ngò hkyin yu é Sû le nghut lhê; Yhâng é dang gyo keq." gâ ri.

36 Dang htê haû zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyi haú bun haú yoq má, ó lé le a taí kyô é zim za nyi byuq akô.

Nat Gang Dap É Yuqgè Zo Rayuq Lé Lhoq Gê Byí É Hkyô Mht 17:14-18; Mrk 9:14-27

37 Hau htâng nyí, yhangmoq bùm haû mai gyó ló kô le, byù moq mó gi, Yesuq lé lhom te yu akô.

38 Haú hkûn, byù hpúng haú mâ é byù rayuq wut garû htoq ló é gi,

39 "Sarâ ê, wú aq, ngá é zo te yuqzo gi, nat wangjúng mù dàn so dàn loq garû lo lhê, guttsû gi, agut gut dut shoq langhtân nhang lo lhê kut mù,

nat gi, yhang lé gyai myáng shoq zing-rî yù yù kut nyi ri.

40 Nat haû lé hkat pyám byi kó laq nghû luí, Náng é chángzô pé lé ngò dúng wú kôlhang, yhangmoq a wó hkat pyám byi kó. Haû mù, ngá zo lé lhoq gê byi râ matú, ngò gi, nang lé gyai myit lum é eq dúng kat lhê." gâ ri.

41 Haû mù luí, Yesuq gi, "Lumjîng myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhu? Nung zo lé, shí shut shuí lé lô aq." ga tû taí ri.

42 Zoshâng haû, lé lo nyi le lhang, nat gang gi, yhang lé lhoq lhêng to mù langhtân nhang ashí. Yesuq kúm gi, haû agè ashop é nat lé tân kat luí, zoshâng haú lé lhoq gê byi mù, yhâng wa lé dum ap byí ri.

43 Nyi mi-nyí gi, Garai Gasâng é kô dik é hpungwup a-tsam lé maú hong nyi bum akô.

Lhunglhang bang gi, Yesuq kut é muzó haû lé maú nyi bùm kô le, Yesuq gi,

44 "Haû Byu Yhangzo gi, byu pé é loq má ap pyâm é hui zo râ nghut lhê. Dang shí hkun lé nungmoq é no má rago gyô wun to keq." ga luí, chángzô pé lé taí ri.

45 Yhangmoq kúm gi, dang haú lé a sê gyo kó, hkâsu mù ga le, haû gi, yhangmoq é matú a sê gyo sháng gaq ga luí, nghop tô ashí yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

Ó Yuq Gi, Kô Dik Sû Nghut Râ Lhú?

Mht 18:1-5; Mrk 9:33-40

46 Hau htâng, lagyo pé gi, hká yuq sheq, kô dik sû nghut lhê lhú ga, rayuq eq rayuq taí myíng myô lhúm nyi akô.

47 Yesuq kúm gi, yhangmoq é unghkaú má myit nyi é hkyô lé sé byi luí, zoshâng rayuq lé shuí yù mù, Yhâng nàm má shap to luí,

48 "Shí zoshâng lé Ngá é myíng mai hap sù ó yuq nghut kôle, Ngo lé hap yu é sù nghut bê; Ngo lé hap yù sù ó yuq nghut kôle, haú Ngo lé nhang kat é Sù lé hap yu é le nghut lhê. Haú mù luí, nungmoq banshoq má, je tiq sù gi, je ko sù nghut lhê." ga luí, yhangmoq lé taí ri.

49 Haú hkûn, Yohan gi, "Yhumsîng ê, Náng é myíng láng luí, nat gâng pé lé hkat pyám byi wún é byù rayuq lé, ngamoq myang ri. Yhang gi, ngamoq chyáng a lòm sù nghut é yanmai, yhang lé ngamoq hkûm pyâm é nghut lhê." ga taí ri.

50 Yesuq kúm gi, "Yhang lé hkâhkúm kó, nungmoq é gyè hkyam shut a nyi sù gi, nungmoq é hkyam shut nyi sù nghut lhê." ga luí, yhang lé taí ri.

Samariq Wà Bang Yesuq Lé A Lhom Hap Yu É Hkyô

51 Ahkuí, Yesuq gi, Yhang lé mauhkûng shut shuí toq yù râ buinyi chyâng lò bê nghut mù, Yerusalem wà mó shut é

râ lé myit hpyit to luí, Yhâng é hí má lagyo nhang kat ri.

52 Lagyo haú bang gi, Yhâng matú râ é hkyô lajang láng râ ga, Samariq wà rawà má wang ló akô.

53 Nghut kôlhâng, Yesuq gi, Yerusalem wà mó shut laí e ló é sù nghut é yanmai, haú wà bang gi, Yhang lé a lhom hap yù kó.

54 Haú hkûn, lagyo Yakuq eq Yohan nhik gi, haú lé myàng jáng, "Yhumsîng ê, yhangmoq lé lhoq htên pyám râ matú, ngá-nhik mauhkûng mai myi wut hkyó le, a gè lhú?" ga luí, Yesuq lé myí akô.

55 Yhang kúm gi, lhing wú luí yhangnhik lé, tân pyâm ri,

56 haú mù luí, yhangmoq gi, gó wà shut e ló byuq akô.

Yesuq É Htâng, Hkâsu Kut Cháng Râ Hkyô

Mht 8:19-22

57 Yhangmoq haú hkyô má e ló kô le, byù rayuq gi, "Nàng hká e le hká ngò cháng râ." ga luí, Yesuq lé taí ri.

58 Yesuq gi, haú yuq lé, "Wamhkuí pé gi, hkyûng wó akô, nghoq pé le, nghoqsut wó akô. Nghut kôlhâng, haú Byu Yhangzo gi, ulhum to jang lháng a wó é nghut ri." ga taí pyám ri.

59 Dum rayuq lé, "Ngá htâng cháng aq." ga taí jáng, haú yuq gi, "Yhumsîng ê, ngá wa lé, lò yhâm pyám râ ahkáng hí byi shi laq." ga taí ri.

60 Yesuq gi, yhang lé, "Shí bê bang† gi, shí bê bang

† 9:60 *Shí bê bang* gâ é gi, woi-nyí má shi to bang lé gâ lhê.

yhangchang yhûm lhum kó sháng gaq; nghut kôlhang, nàng gi, Garai Gasâng é mingdán hkyô lé, ê hko kyo aq." ga taí ri.

61 Byù rayuq dum, Yhang lé, "Yhumsîng ê, ngò le náng htâng cháng rã, nghut kôlhang, ngá yhumbyù lé hí hkyang ló shit to rã ahkáng byi shi laq." ga taí ri.

62 Yesuq gi, "Yò hpuq li zui mù htâng shut lhing wú sù ó yuq nghut kôlhang, Garai Gasâng é mingdán eq a gingdán." ga luí, yhang lé taí ri.

10

Yesuq, Chángzô Pé Nyhit Xê Yuq Lé, Nhang Htoq Kat É Hkyô

1 Hau htâng má, Yhumsîng gi, gotû chángzô pé nyhit xê yuq* lé hkyin yù mù, Yhang e ló rã wà eq jowò hkangmó shut í yuq razúm zúm kut luí, Yhâng é hí má ê nhang kat ri.

2 Yesuq gi, yhangmoq lé, "Kyô† shú yù rã myo shoq joq kôlhang, mù zui rã byù gi, shaú nyi ri. Haú mù, haú kyô Yhumsîng lé, Yhâng é kyô yò má, kyô shu byù‡ myo myo nhâng byi rã matú, dung keq.

3 Nungmoq e ló keq! Wamhkuí hpúng má nhang hâng kat é sau zô pé lé su, Ngò, nungmoq lé nhang kat é nghut lhê.

4 Ngùn htûng eq, etap, hkyî-tsung pé hkâyü chûng kó, hkyô má ó lé le hkâshichyên kûn nyi kó.

5 Nungmoq gi, hká yhûm má wàng e ló kô le, 'Shi yhûm nguingón nyi sháng gaq.' nghû luí, hí taí keq.

6 Haú yhûm má nguingón hkyô eq gingdán sù nyi é nghut le gi, nguingón hkyô haú gi, haú yuq é ahtoq má joq to rã nghut lhê. Haú a nghut jáng, nguingón hkyô haú gi, nungmoq chyáng dum taú lo byuq rã nghut lhê.

7 Haú yhûm má nyi to mù, yhangmoq haí byí le haí zo haí shuq keq; hkâsu mù gâ le, mù zui sù gi, zuihpau wó yú gíng lhê; haú mù, nungmoq rayhum htâng rayhûm hkâhtot nyi wún kó.

8 Nungmoq hká wà má wang ló kôlhang, yhangmoq lhom hap yù kô é nghut le gi, nungmoq é hí má yhangmoq htung to byí é zoshuq lé, zo keq, shuq keq.

9 Haú mâ é nò bang lé lhoq gê byi mù, 'Garai Gasâng é mingdán gi, nungmoq eq chyâng lò bê nghut ri.' nghû luí, yhangmoq lé taí kyo keq.

10 Nghut kôlhang, nungmoq hká wà má wang ló kô le, yhangmoq a lhom hap yu é nghut le gi, haú wâ mâ é hkyô mó má htoq ê mù,

11 'Ngamoq é hkyî má dap tô é nungmoq wà mâ é hpuilhaú lhang, nungmoq lé

* 10:1 Chyúmdang ra-am má gi, chángzo nyhit xê í yuq ga le kâ tô ri. † 10:2 Kyô nghû é gi, Yesuq lé lumjǐng naù kôlhang taí kyo rã bang a nyi luí láng tô é bang nghut ri. ‡ 10:2 Kyô shu byù nghu é gi, Yesuq é hkyô gabú danglù lé taí kyo bang nghut ri.

hkyang pû tsô nyi râ matú ngamoq ko hkyô pyâm to byi bê. Nghut kôlhang, Garai Gasâng é mingdán gi, chyâng lò bê hkyô lé, sé to keq.' nghú luí taí keq.

12 Ngò, nungmoq lé taí kôlé, haú buinyi[§] lé, haú wâ gi, Sodom và htoq má je hpuzo râ nghut lhê.

13 Kurazin và mó ê! Nàng dingnyé wó ri! Bet-saida và mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lêng mù, jimê tû wut lhê, myiwap kyaq gyûn lhê kut zung ngûng to bekô râ nghut lhê.

14 Haú mù, tarâ jéyáng é nyí jé jáng, nungnhik gi, Turuq myuq eq Sidun myuq htoq má je hpuzo* kó râ nghut lhê.

15 Dum mù, Kaperna-um và nàng ê, nàng gi, mauhkûng jé shoq waq toq é hui râ lú? A nghut, mosumhkung má sheq gyó râ nghut lhê." ga taí ri.

16 Hau htâng má, chángzô pé lé dum xoq taí é gi, "Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." gâ ri.

Nyhit Xê Yuq Dum Taú Jé Lo É Hkyô

17 Hau htâng, haú chángzo nyhit xê yuq gi, gabú myit èq dum taú lò mù, "Yhumsîng ê, náng é myîng lé lang jáng, nat gâng pé lhang ngamoq é dang lé gyô bum akô." ga taí akô.

18 Haú su ga taí kôjáng, Yesuq tû taí é gi, "Tsdán gi, mauhkûng htoq mai lhap hpyat é su byit gyó lo é lé ngò myang kat bê.

19 Wú keq! Ngò gi, nungmoq lé, lhangmuì eq gogok pé lé wó nang râ eq gumlau gyè pé é wum-o a-tsam banshoq lé wó ûng râ ahko ahkáng lé byi bê nghut mù luí, hai èq le nungmoq lé wó lhoq hten râ a nghut lo.

20 Nghut kôlhang, nat pé nungmoq é dang gyô é lé za hkâgabú nyí kó, mauhkûng htoq mâ é asak jihpán laiká buk má nungmoq é myîng bo to bê lé sheq gabú nyí keq." ga taí ri.

21 Haú u lé, Yesuq gi, Chyoiyúng Woi-nyí má gabú é myit byíng lô mù, "Mauhkûng eq myigung é Yhumsîng, Áwa ê, Nàng gi, haú pé lé, hpaqchyí byéng-yá bò bang eq myit hpaqchyí sé bâng é hí mai haq nghop to luí, zoshâng wuì lé tûn shit bê nghut é yanmai, Ngò, Nang lé hkya-ôn lhê ô. Nghut bê, Áwa ê, haú gi, Nàng ô nau é hkyô nghut ri.

22 Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang

§ 10:12 Haú buinyi gâ é gi, Garai Gasâng tarâ jéyáng é buinyi lé gâ lhê. * 10:14 Nungnhik je hpuzô é hkyô gi, mauhpo kumlhá myo myo myang é nghut kôlhang, myit a lêng kô é yanmai nghut ri.

mai lai lui ó le a sé; Áwa ó nghut é lé le, haú Zo eq haú Zo mai sé nhâng râ matú hkyin yu é bang mai lai lui, ó a sé." ga tai ri.

²³ Hau htâng má, Yhâng é chángzô pê shut lhing wú lui, yhangmoq lé baú za haq tai kat é gi, "Nungmoq byu-myàng é hkyô pé lé, myang é myoq pé gi, hkungsô wó nyi ri.

²⁴ Hkâsu mù gâ le, Ngò, nungmoq lé tai kôlé, nungmoq wó myâng, wó gyô é pé lé, myiqhtoí pé eq hkohkam pé myo myo gi, myàng nau gyo nau kôlhang, a wó myâng, a wó gyo kó nghut ri." ga tai ri.

Gè É Samariq Byù

²⁵ Haú hkûn, wú keq, tarâ sará rayuq gi, toq lui, Yesuq lé, "Sarâ é, ahtum abyuq é asak lé wó yû shoq, ngò hkâsu kut râ râ lhê lhú?" ga lui, Yhang lé myi chyam wú ri.

²⁶ Yesuq gi, "Mosheq é tarâ má hkâsu ga kâ tô ri lhú? Nang haú lé hkâsu nghap yu nyi lhê lhú?" ga lui, yhang lé myi ri.

²⁷ Haú yuq gi, "'Haú Yhumsing náng é Garai Gasang lé, náng é myit nhiklum banshoq, náng é asak woi-nyí lhum gón, náng é wum-o banshoq, náng myit é hkyô banshoq eq, chyitdap râ lhê; 'náng gûng lé nang chyitdap é su, náng é chyangnâm mâ é bang lé le chyitdap aq.'" ga tai ri.

²⁸ Yesuq gi, "Nang tú tai é dang jô ri; haú su yhang kut

aq, haú jáng nang gi, asak duì râ nghut lhê." ga yhang lé tai ri.

²⁹ Nghut kôlhang, haú yuq gi, yhâng gungdu dingmán é lé, tûn shit nau lui, "Ngá é chyangnâm mâ é sù gi, ó yuq nghut lhê lhú?" ga lui, Yesuq lé myi ri.

³⁰ Yesuq tú tai é gi, "Byù rayuq gi, Yerusalem wà mó mai Yeriho wà shut gyó ló le, damyaq eq htung hui ri. Damyaq haú bang gi, yhâng é mebu pé lé hkyut shang pyám byi kôlui, rayum gyut shoq bat nha mù, aluq shoí shi jáng sheq tô pyâm to kôlui ló byuq bekô.

³¹ Haú u lé, hkyangjong rayuq gi, haú hkyô mai lai ânng ló le, haú damyaq hui sù lé myàng jáng, koi lai ló byuq ri.

³² Haú eq rajung za, Lewiq rayuq le, haú mai lai ló é hkûn, haú yuq lé myàng jáng, koi lai ló byuq ri.

³³ Nghut kôlhang, Samariq byù rayuq le, haú mai lai ló é hkûn, haú yuq leq tô é lé myàng jáng, wú shogyo lui yhâng chyáng hui é mù,

³⁴ yhâng é dâm má, xû eq tsibiyiq wing shoq gyun lui, rago za htup byi mù, yhâng é logung má, haú yuq lé bún ke lui, bing-yhûm ralhûm má jé shoq shuí ló mù, gôn lajang byi ri.

³⁵ Htang nyí lé, yhang gi, haú bing-yhûm yhumsing lé ngùn Denari í chap shê byi mù, tai é gi, 'Shi yuq lé wú lajang byi laq, yhâng gung má

nàng myo chung záng é ban-shoq lé ngò dum taù lò jáng, lo xap rã.' gã ri." gã ri.

³⁶ Hau htàng, tarã sarã lé, "Nàng gi, byù haù bang sum yuq má damyaq huí sũ é chyàngnãm mã é đông nghut sũ gi, hkã yuq nghut rã su ngam ri lhu?" ga luí, Yesuq myí ri.

³⁷ Haù tarã sarã gi, "Haù yuq lé shogyo sũ nghut ri." ga taí ri.

Yesuq gi, "Nàng le haù đông ló kut aq." ga luí, yhang lé taí kat ri.

Mariq Eq Mahtaq Nhik Chyáng Yesuq Ê Jé É Hkyô

³⁸ Ahkuí, Yesuq eq Yhâng é chángzô pé hkyô xoq sô e ló kô le, wà rawà má jé wang ló é hkùn, Mahtaq gã é myiwe rayuq gi, Yesuq lé yhâng yhùm mã lhom te yu ri.

³⁹ Mahtaq gi, Mariq gã é yhanggu myiwe zo rayuq wó ri. Mariq haù gi, Yhumsing Yesuq é hkyí wang má zung to mù, Yhang mhoqshit é dang lé gyô nyi ri.

⁴⁰ Mahtaq kúm gi, saí tso saí huq é amù myo luí, gyin bìn nyi ri. Haù mù luí, yhang huí ê mù, "Yhumsing ê, ngá gu gi, saí tso saí huq é amù má, ngo lé baù za rap kut tô é lé, nàng a bo myàng byi lhu? Ngo lé, lé garúm sháng gaq, yhang lé taí byi laq." ga luí, Yesuq lé taí ri.

⁴¹ Haù hkùn, Yhumsing gi, "Mahtaq, Mahtaq, nàng gi, muzó lé za ma nyi mù, myit myo myit chiq é huí nyi ri.

⁴² Nghut kôlhang, je ahkyak é hkyô gi, rahkat za nghut

lhê. Mariq kúm gi, haù je ge é hkyô lé hkyin yù bê nghut ri. Haù lé yhâng chyáng mai wó yu pyám byi rã a nghut." ga luí, yhang lé tũ taí ri.

11

Yesuq Mhoqshit É Kyûdung Dang

Mht 6:9-13; 7:7-11

¹ Ra-nyí lé, Yesuq gi, jowò rawò má kyûdung nyi ri. Yhang kyû ban dung jáng, Yhâng é chángzo rayuq gi, "Yhumsing ê, Yohan gi, yhâng é chángzô pé lé kyûdung rã hkyô mhoq byi é su, ngamoq lé le mhoq byi laq." ga Yhang lé taí ri.

² Haù hkùn, Yhang gi, "Nungmoq kyûdung le, 'Mauhkung htoq tsáng myhâng mã é ngamoq é Áwa ê,

Náng é mying gi, chyoiyúng nyí sháng gaq.

Náng é mingdán jé lô sháng gaq.

³ Ngamoq nyí wuí rã é zoshuq lé, ngamoq lé nyí wuí byi laq.

⁴ Ngamoq lé shut é byù banshoq bâng é mara lé, ngamoq hkyut pyám byi é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwâng nhâng.'

ngû keq." ga luí, yhangmoq lé mhoqshit ri.

⁵ Yesuq yhangmoq lé dum taí é gi, "Dangké, nungmoq chyáng mã é rayuq sũ gi, buinùm wó é ngû sháng,

yang gi, gunggàm yoq má haú yuq chyáng ê luí, 'Buinùm hpó ê, ngo lé muk sùm long byam chyí byí kat laq,

⁶ haí mù gâ le, ngá buinùm rayuq byìn we mai ngá chyáng jé nyi tô ri. Ngò gi, yang lé byi tso râ haí le a joq byam dut tô ri.' ga taí é hkûn,

⁷ yhúmkaû shut mâ é sù gi, 'Ngo lé, hkâlé lhoq hkyik lo, hkum le myhí pyám bê, ngá zoshâng wuì le ngò eq rahá yhupjang má yhup to bekô. Ngò, nang lé haí le a wó toq yû byi lo.' ga tu kat ri.

⁸ Ngò, nungmoq lé taí kôlé, buinùm nghut é yanmai za gi, muk a kâm toq byi lo kôlhang, zuq zuq dúng nyi é yanmai, haú yuq lé, yang ra châ é banshoq toq yû byi râ nghut lhê.

⁹ Haú mù, ngò, nungmoq lé dum taí kôlé, dung keq, haú jáng, nungmoq lé byi râ nghut lhê; hô keq, haú jáng, nungmoq myàng kó râ nghut lhê; hkum má kok keq, haú jáng, nungmoq lé hpóng byi râ nghut lhê.

¹⁰ Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

¹¹ Nungmoq íwâ pé má, ó yuq wá, yhumsing yangzo muk dúng le, luqgok byi kó râ lúh? Ngozo dúng le, lhang-muì byi kó râ lúh?

¹² Woq-ú dúng le, gogok byi kó râ lúh?

¹³ Agè ashop é bang nungmoq lháng gi, nungmoq é zo wuì lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é Íwa gi, Yang lé dúng é bang lé, je riyhang haú Chyoiyúng Woi-nyí byi râ nghut lhê." ga taí ri.

Mara Hûn É Dang Lé Yesuq Tû Taí É Hkyô

Mht 12:22-30, 43-45; Mrk 3:20-27

¹⁴ Radàm lé, Yesuq gi, byù rayuq lé dang a wó nyô shoq kut tô é nat gang lé, haú yuq chyáng mai hkat htoq pyâm ri. Nat haú htoq ló byuq é htâng má, dang a wó nyô sù gi, dang wó nyo nyi é yanmai, byù moq mó gi, chôm maú byuq bum akô.

¹⁵ Nghut kôlhang, yangmoq chyáng mâ é ra-am gi, "Yang gi, nat gâng pé é zau Bezebulaq é wum-o a-tsam èq za, nat gâng pé lé wó hkat pyâm é nghut ri." ga taí bum akô nghut ri.

¹⁶ Ra-am le, Yang lé, mauhkûng mâ é kumlhá tûn shit wú laq ga dúng chyam wú akô.*

¹⁷ Yesuq kúm yangmoq myit nyi é hkyô lé sé mù taí é gi, "Ikun byoq é mingdán hká lhum nghut kôle, hten byuq râ za nghut lhê; haú eq rajung za, ikun byù yangchang rayuq eq rayuq byoq lhûm é yhûm htú gi, byoq gâng lhum râ za nghut lhê.

* **11:16** Byu pé gi, Yesuq lé Garai Gasang nhang kat é hkyô lé saksé myàng nàu luí, mauhpo kumlhá dúng nyi akô.

18 Nat pé le yhangmoq yhangchang byoq gâng lhûm nyi kô é nghut le gi, Tsadán é mingdán gi, hkâsu kut wó gîng to râ lhú? Ngò isu nghu taí é gi, nungmoq ngo lé Bezebulaq é wum-o a-tsâm èq za, nat gâng pé lé hkat pyâm ri ga kô é yanmai nghut lhê.

19 Ngò gi, Bezebulaq é wum-ô èq za, nat gâng pé lé hkat htoq é nghut jáng, nungmoq é chángzô pé gi, ó yuq é wum-o a-tsâm èq za, nat gâng pé lé hkat pyâm kô é nghut lhê lhú? Haû mù luí, yhangmoq gi, nungmoq lé jéyáng é bang dut bekô râ nghut lhê.

20 Nghut kôlhang, Ngò gi, Garai Gasâng é wum-ô èq nat gâng pé lé hkat htoq pyâm é nghut jáng, Garai Gasâng é mingdán† gi, nungmoq chyáng jé bê nghut ri.

21 Wum-o bo é sù rayuq gi, yhâng é yhûm lé, shâm, lhâm chûng luí zúng tô é nghut jáng, yhâng é sutzè pé gi, rago za wó joq to râ nghut lhê.

22 Nghut kôlhang, yhâng htoq wum je bo é sù lé luí, haú yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyâm byi luí, yhâng é sutzè pé lé, gam yu pyâm byi râ nghut lhê.‡

23 Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuí tsing sù gi, lhoq pyo pyâm é sù

nghut nyi ri.

24 Haû agè ashop é nat gi, byù rayuq chyáng mai htoq lò mù, kyuq huí é jowò pé má sô yông e lò luí, no râ jowò hkat ho wú le, a myang hô nghut ri. Haú hkûn, yhang gi, 'Ngò nyi lai lo é yhûm má dum taú lò wú râ.' ga taí ri.

25 Yhang dum taú jé lò wú le, yhûm haû gi, shum pyám mù san za rago dut to láng é lé lò myang ri.

26 Haû jáng, yhang gi, dum taú é mù, yhâng htoq je wuí é nat nyhit nat lé shuí lò luí, haú má lo wàng nyi to bekô. Haû mù, haú yuq é nyi yap sâmlai gi, hí lhê htoq má je wuí lò bê nghut ri." ga taí ri.

27 Haû su ga, Yesuq taí nyi é hkûn, haû shiwa hpong mâ é, myiwe zo rayuq htê mó o mó èq Yhang lé taí é gi, "Nang lé wun é ûng wam eq nàng shuq é nauwang gi, hkungsô wó nyi ri ô!" gâ ri.

28 Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó râ nghut lhê." ga taí ri.

Mauhpo Kumlhá Lé Dung Kô É Hkyô

Mht 12:38-42; Mrk 8:12

29 Shiwa byu pé jat myô zup zîng lo é hkûn lé, Yesuq taí é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumlhá dîng nyi bûm kôlhang, Yonaq

† 11:20 *Garai Gasâng é mingdán* gâ é gi, byù htoq má le, nat htoq má le, Garai Gasâng yhang uphkan é lé gâ é nghut lhê. ‡ 11:22 Haû eq rajung za, Yesuq gi, Tsadán lé zân ûng bê nghut é yanmai, agè ashop é nat pé lé byu pé chyáng mai, wó hkat pyâm bê nghut ri.

é kumlhá mai lai luí, gotû hai le tân shit râ a nghut.

³⁰ Yonaq gi, Ninewe wà byu pê hí má kumlhá\$ dut é su, haú Byu Yhangzo gi, shí pyat lhê é byu pê hí má, kumlhá dut râ nghut lhê.

³¹ Maupyí mâ é hkohkâm myhí gi, maumyí ló htâng é mai lé lô mù, Sholumon é hpaqchyí dang lé, lé gyô yù bê nghut mù, haú tarâ jéyáng é buinyì má, shí ipyat má é byu pé eq rahá toq lô luí, yhangmoq lé mara hùn râ nghut lhê. Wú keq, Sholumon htoq ko sù gi, ahkuí shí má jé nyi to bê.

³² Ninewe wà byu pé gi, Yonaq, mungdang hko kyô é hkùn myit lhîng kô é nghut mù, tarâ jéyáng é buinyì má, shí ipyat eq rahá toq lô luí, yhangmoq lé mara hùn kó râ nghut lhê. Wú keq, Yonaq htoq ko sù gi, ahkuí shí má jé nyi to bê.

Myibung Su Duqbó Râ Hkyô

Mht 5:15; 6:22-23

³³ Myibung lé tuq mù go pyâm é jowò má tô tô é le, mûng eq nghop tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akò.

³⁴ Náng é myoq gi, náng gungdû é myibung* nghut nyi ri. Náng é myoqjí ge é nghut le gi, náng é gungdu

gón má maubó byíng mui to râ nghut lhê. Nghut kôlhang, náng myoq a ge é nghut le gi, náng é gungdu gón gi, mauchut tuq dut nyi râ nghut lhê.

³⁵ Haú mù, náng chyáng bo é maubó gi, mauchut byuq é, a chut byuq é lé wú nyí aq. Náng lumjîng é hkyô eq náng myit é hkyô gi, mauchut tuq a dut sháng gaq, sidiq nyi aq.

³⁶ Náng é ragùngdu gón má duqbó é nghut le gi, rawò má le mauchut é jowò a joq é za, myibung nang lé duqbó byí nyi é su, náng gungdu gón má duqbó nyi râ nghut lhê." ga taí ri.

Hparishe Pé Eq Tarâ Sará Pé Lé, Yesuq Mara Hun É Hkyô Mht 23:1-36; Mrk 12:38-40; Luk 20:45-47

³⁷ Yesuq haú su ga ban taí é htâng má, Hparishe rayuq gi, yhang eq zang rahá zo râ matú, Yesuq lé ji ri. Haú mù, Yesuq gi, haú yhâm má wang ê mù zang zo râ ga siboí nàm má zung tô ri.

³⁸ Nghut kôlhang, Hparishe wá gi, zang zo râ hí má Yesuq loq a chí é lé, myàng luí maú nyi ri.†

³⁹ Haú mù luí, Yhumsîng Yesuq yhang lé taí é gi, "Nungmoq Hparishe pé gi, góm eq zanghkoq lé ahtoq shut za chí yúng nyi kômù, nungmoq é unghkaú má gi, lú zo lú shuq

§ 11:30 Kumlhá gi, Yonaq, ngozô wamdao má sum nyí lúng é su, Yesuq le, shí bê mai sum nyí nghû râ nyi má, dum dui toq lô râ hkyô lé taí nau é nghut ri.

* 11:34 Myibung gâ é gi, tengmán é mungdang lé wó sê yu é a-tsam lé, taí é nghut ri. † 11:38 Yudaq htûng tarâ má gi, zang a zo shi má loq chi râ lhê.

é eq agè ashop é hkyô pé byíng zan tô ri.

⁴⁰ Byù bâm pé ê, ahte[‡] lé le, ahtoq[§] lé le, saí sù gi, Garai Gasang rayuq za nghut é lé, a sé kó lúh?

⁴¹ Nghut kôlhang, ahte má bo é zè pé lé, ra châ é bang lé byí pyám keq; haú hkûn, nungmoq é matú banshoq gi, sân-yúng lô râ nghut lhê.

⁴² Hparishe pé ê, nungmoq gi, dingnyé wó ri, hkâsu mù gà le, nungmoq gi, gau-tsáng, shingtón pé eq zangxun mhan-haq ajù jù má é, xê gambùm ragambùm lé gi, Garai Gasang lé byi nyi kômù, tarâ dingmán é hkyô eq Garai Gasang chyitdap é hkyô lé gi, lhai pyám tô akô. Xê gambùm ragambùm byí é lé le cháng luí, tarâ dingmán é hkyô eq Garai Gasang lé chyitdap é hkyô lé le, kut nyi râ lhê.

⁴³ Hparishe pé ê, nungmoq gi, dingnyé wó ri, hkâsu mù gà le, tarajong pé má é ahkyak dik é zùng jang pé lé le, gài pé má hkunggâ é eq shichyên é dang lé le, nungmoq ô nau nyi bum akô.

⁴⁴ Nungmoq gi, dingnyé wó ri, hkâsu mù gà le, nungmoq gi, ahkô a dong lo mù, byu pé a sé luí, ahtoq mai sô lai é lupdùng eq du akô." ga taí ri.

⁴⁵ Haú hkûn, tarâ sará rayuq gi, "Sarâ ê, nàng haú su gà é gi, ngamoq lé le rhou lhom nyi é nghut bê." ga Yhang lé tù taí ri.

⁴⁶ Haú su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gà le, nungmoq gi, byu pé lé, wùn waq râ wuí é noqkuq htúng tarâ wòlai lé wùn nhâng luí, yhumsíng yhang gi, wò haú lé loqnyhuí eq lhang, a bo záng wú kó nghut ri.

⁴⁷ Nungmoq gi, dingnyé wó ri, hkâsu mù gà le, nungmoq gi, nungmoq é íchýí íwâ pé sat pyám é myiqhtoí pé é lup lé luptsuq tsuq akô.

⁴⁸ Haú mù luí, nungmoq gi, nungmoq é íchýí íwa pé é muzó lé, myit bo huí é bang nghut nyi akô. Hkâsu mù gà le, yhangmoq gi, myiqhtoí pé lé sat pyám mù, nungmoq gi, lup haú pé lé luptsuq tsuq akô.

⁴⁹ Haú mù luí, Garai Gasang, Yhâng é hpaqchyí byéng-yá mai taí é gi, 'Myiqhtoí pé eq lagyô pé lé, ngò yhangmoq chyáng nhang kat râ nghut lhê; haú bang má é ra-am lé gi, yhangmoq lhom sat pyám mù, ra-am lé gi, zing-ri kó râ nghut lhê.' gà ri.

⁵⁰ Haú su mù luí, mau htoq xâng hkûn lhê é, Abelaq é sui mai, hkungga gyap eq noqkuq yhùm gyoro má sat pyám huí é Zahkariq é sui jé shoq, shun pyám é myiqhtoí pé é sui banshoq bâng é manglat gi, shí pyat má é byu pé lé hùn râ nghut lhê.

⁵¹ Ngò, nungmoq lé taí kôlé, manglat haú pé lé gi, shí pyat má é byu pé lé, gè gè yhang

[‡] 11:40 Ahte gà é gi, i-myt unghkaú lé taí ri. [§] 11:40 Ahtoq gà é gi, gungdu lé taí ri.

hûn râ nghut lâ.

⁵² Tarâ sará pé ê, nungmoq gi, dingnyé wó ri, hkâsu mù gâ le, nungmoq gi, byu pé Garai Gasang lé sé ra zo-qshi lé yu pyám byi kômù, yhumsîng yhang le a sé, sé naû bang lé le, hkûm zing tô akô nghut ri." ga taî ri.

⁵³⁻⁵⁴ Yesuq haû mai htoq ló é hkûn, tarâ sará pé eq Hparishe pé gi, Yhang lé gyé kut mù, Yhâng é dang má mara wó myâng shoq ga, wuí é dangmyi myo myo myi luí, gyám wú nyi akô nghut ri.

12

Gegùn Labyoq Kut É Bang Lé Sidiq Râ Hkyô

Mht 10:28-33; 12:32; 10:19-20

¹ Haû u, byù hkyîng mun zup zîng lò mù, rayuq eq rayuq lháng záng nâng lhum shoq dut nyi é hkûn, Yesuq, Yhâng é chángzô pé lé taî hi é gi, "Gegùn labyoq kut é Hparishe pê é múnchi lé koi sidiq pyám keq.

² A byông htoq loshoq wó zaú nghop tô é, haî le a joq râ nghut lâ; a sé loshoq wó haq tô é le, haî a joq râ nghut lâ.

³ Haû mù luí, nungmoq, mauchut hkaû má haq taî é dang banshoq lé, myoq myàng maubó má wó gyô bùm kó râ nghut lâ. Gok hkaû má, dangsoq soq é lé le, yhumhkûng htoq mai taî pyo bùm bekô râ nghut lâ.

⁴ Ngá buinùm wuí ê, Ngò, nungmoq lé taî kôlé, gungdu lé za wó sat pyám mù, woi-nyí

lé haî le a wó kut é bang lé, hkâgyuq kó.

⁵ Nghut kôlhang, nungmoq ó lé za gyuq râ é lé gi, Ngò, nungmoq lé taî kyo kôlé, gungdu lé sat pyám é htâng má, woi-nyí lé ngaraî ming shut wó hkyô kat pyám é a-tsam wó sù lé kúm gi, gyuq keq. Nghut bê, Ngò, nungmoq lé taî kôlé, haû yuq lé za, gyuq nyi keq.

⁶ Johkyáng ngo du lé, gyi htingchap í chap eq wó ùng pyám lâ a nghut kó lú? Haû johkyáng radu lé lháng, Garai Gasang gi, tô-myhî pyám é a nghut.

⁷ Garai Gasang gi, nungmoq é ulhum mâ é xâm banshoq lé lháng, nghap to gù nghut lâ. Haû mù, hkâgyuq kó; nungmoq gi, haû johkyáng myo myô htoq má lháng gù je bo é bang nghut lâ.

⁸ Ngò, nungmoq lé taî kôlé, byu pé hí má Ngo lé lhom yín yu é sù ó yuq nghut kôle, Garai Gasâng é maumang lagyô pê é hí má, haû Byu Yhangzo gi, haû yuq lé lhom yín yû râ nghut lâ.

⁹ Nghut kôlhang, byu pê é hí má Ngo lé he-ngik pyám é sù lé chyaú gi, Garai Gasâng é maumang lagyô pê é hí má, he-ngik pyám râ nghut lâ.

¹⁰ Haû Byu Yhangzo lé dang dông shut é sù gi, mara hkyut byi é wó hui ra nghut lâ; nghut kôlhang, haû Chyoiyúng Woi-nyí lé rhoi dang taî pyám é sù gi, mara hkyut byi é hui râ a nghut.

11 Byu pé nungmoq lé jéyang râ matú tarajong pé má le, agyì suwún wuî eq ahkáng ayá wó bâng é hí má le, shuî e ló kô é hkûn, hkâsu kut râ lé le, hkâsu nghû tû taí râ lé le, hkâ-myyit chiq kó.

12 Hkâsu mù gâ le, haú u lé yhang, Chyoiyúng Woi-nyì gi, nungmoq hkâsu taí râ hkyô lé mhoqshit byi râ nghut lhê." ga taí ri.

Hpaqchyî A Bo É Sahtê Hpó Lé Dangtú Yu É Hkyô

13 Haú hkûn, shiwa hpúng hkaû mai, byù rayuq gi, "Sarâ ê, ngá-nhik tâng wó é muizè pé lé chôm gam lhum râ matú, ngá mang lé bo taí byi laq." ga luî, Yesuq lé taí ri.

14 Yesuq gi, "Byù nàng ê, nungnhik tang ahtoq má tarâ agyì kut luî, ikun zè gàm byi râ gi, ngo lé ó hkyin tô é lhú?" ga luî, yhang lé tû taí ri.

15 Yesuq yhangmoq lé taí é gi, "Myoqnoq é hkyô ban-shoq mai, nungmoq é i-myyit lé hkûm zìng luî, koi sidiq nyì keq. Hkâsu mù gâ le, byu é asak gi, agùn agó é sutzè má bo é a nghut." gâ ri.

16 Dangtú ralhüm dông mai le, yhangmoq lé Yesuq taí é gi, "Sahtê rayuq gi, yhâng é yò pé má guqzo muilhum gyai já ri.

17 Haú mù luî, yhâng é unghkaû má myit é gi, 'Ngò hkâsu kut wú râ lhi? Ngá é guqzo muilhum pé lé kat to râ jowò a wó lo dut to bê.' gâ ri.

18 Dum nghut jáng, yhang gi, 'Ngò Ìsu kut wú râ abe, ngá é chyî xau pé lé hpyoq pyám

luî, je kô é chyî pé lé saí râ nghut lhê. Chyî haú pé má ngá é guqzo muilhum pé eq sutzè ban-shoq lé, tsìng kat to luî,

19 ngá é i-myyit lé Ìsu nghû taí râ, "I-myyit ê, zanwut myáng myáng é matú, zè gè myo myo ngò tsìng to bê. I-myyit nàng zim za kut nyì aq hkoi. Zo mù, shuq mù, ngón ngón nyì aq." ga' gâ ri.

20 Nghut kôlhang, Garai Gasang gi, 'Byù gò ê, náng é asak lé, hkû-myîn yhang, wup yu pyám byî é nghut jáng, nàng tsìng hkong tô é zè pé gi, ó yuq é matú dut râ lhú?' ga luî, yhang lé taí ri.

21 Haú eq rajung za, yhum-sing é matú sutzè hkong to mù luî, Garai Gasâng é hí má myung nyì sù gi, haú yuq su nghut râ nghut lhê." gâ ri.

Myyit A Chiq É Za Garai Lé Lumjìng Râ Hkyô

Mht 6:25-34, 19-21

22 Yesuq, Yhâng é chángzò pé lé dum taí é gi, "Haú mù luî, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdû matú haí wut haí tsang râ lé, hkâ-myyit chiq kó.

23 Asak gi, zoshuq htoq má, gungdu gi, mebù htoq má, je ahkyak lhê.

24 Nghonoq pé é hkyô lé myit wú keq; yhangmoq gi, kyô hkyó kyô shu a kut kó; guqchyî eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haú pé htoq má je

riyhang hpaudap nyi lâ e nghut kó lúh?

²⁵ Nungmoq má, ó yuq wá, myit chiq é èq, yhumsing é asak lé radúng kô wó jat yù kó râ lúh?

²⁶ Haû su mù luí, tiq dik é hkyô lé lhang, nungmoq a wó kut kô é nhing, haí mù luí gotû hkyô pé lé, myit myô nyi akô lúh?

²⁷ Htutbó ban* pé hkâsu kut kô lo é lé, myit wú keq. Haú pé gi, mù le a zui, hkying le a duì kó nghut ri. Nghut kôlhang, Ngò, nungmoq lé tai kyo kôlé, Hkohkâm Sholumon hpúng kô dik u lé wut é mebu lhang, ban haû rabó lé a hkyit nghut ri.

²⁸ Lumjing myit tiq é bang ê, hkû-nyi joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haû su kut hut é nghut le gi, nungmoq lé, je riyhang hut râ a nghut kó lúh?

²⁹ Nungmoq gi, haí zo haí shuq râ lé hkâho nyi kó; haû eq séng luí lé hkâ-myit chiq nyi kó.

³⁰ Hkâsu mù gà le, Garai Gasang lé a sé bang gi, haú hkyô banshoq lé châng hkat ho nyi akó; nghut kôlhang, nungmoq é Íwa Garai Gasang gi, haú pé lé nungmoq râ é hkyô, sé byi nyi lâ.

³¹ Nungmoq kúm gi, Yhâng é mingdán lé ho nyi keq, haú jáng, haú pé, nungmoq lé puq byi râ nghut lâ.

³² Sau hpúng zô pé ê, hkâgyuq ko, hkâsu mù gà le, nungmoq é Íwa Garai Gasang gi, Yhâng é mingdán nungmoq lé byi nau nyi ri.

³³ Nungmoq wó é zè pé lé ùng pyám luí, myùng bang lé byi keq, yhumsing é matú a dat xau a dat wôm é ngunhtùng saí luí, hkau sù lé a je, manot èq le a wó zô é sutzè lé mauhkúng htoq má hkong to keq.

³⁴ Hkâsu mù gà le, náng é sutzè joq jang má, náng é i-myit le je nyi râ nghut lâ.

Yesuq Dum Jé Lé Lô Râ Hkying Lé Machya Nyi Râ Hkyô

Mht 24:45-51

³⁵ Nungmoq gi, hpyihit hit luí, (mù zui râ matú rì rì kut to keq); nungmoq é myibung lé tuq to mù,

³⁶ myiháng poi mai dum taû lò luí, hkúm lo kok é, yhumsing hpó lé radá dâm hkum lhom wó hpông hâng yù shoq, lág tô é dui-nhâng zoshâng wui su kut nyi keq.

³⁷ Haû yhumsing je lo le, machya nyi lág é dui-nhâng zoshâng wui gi, hkungsô wó nyi râ. Hkâsu mù gà le, ngò, nungmoq lé teng za tai kôlé, haû yhumsing hpó gi, yhangmoq lé yuq zung to nhâng luí, yhang gi, dui-nhâng zoshâng su hpyihit hit mù, saí tso saí huq râ nghut lâ.

³⁸ Gunggàm yoq lé nghut kôlhang, woq tûn hkûn lé nghut kôlhang, haû su kut machya nyi é lé, yhumsing

* 12:27 Htutbó ban gi, yúng dik é yosô ban nghut lâ.

hpó lo myang é nghut le gi, dui-nhâng zoshâng haú bang hkungsô wó nyi ri.

³⁹ Yhumsîng hpó rayuq, hká u má hkau sú lé lô râ lé, sê tô é ru nghut le gi, yhang machya nyi luî, yhâng yhûm lé a wó hput htong nhâng râ nghut é lé, bûn sê nyi keq.

⁴⁰ Haú mù, nungmoq le rì rì nghut nyi keq; hkâsu mù gâ le, haú Byu Yhangzo gi, a bûn nùng má jé lé lô râ nghut lhê." gâ rì.

⁴¹ Haú hkûn, Petruq gi, "Yhumsîng ê, dangtú shî gi, ngamoq lé za, taí é nghut lhê lú? Haú a nghut jáng, lhunglhâng bang lé taí é đông nghut lhê lú?" ga myi ri.

⁴² Haú jáng, Yesuq gi, "Lumgíng é eq hpaqchyî bo é sùt zum sú gi, hká yuq nghut lhê lú? Haú yuq gi, yhâng yhumsîng é dui-nhâng zoshâng wuî lé ahkyíng jé jáng zoshuq gàm byi râ matú, yhumsîng hpô eq hkyin to sú dut râ nghut lhê.

⁴³ Yhumsîng hpó dum taú lo é hkûn, haú su kut nyi lánng é dui-nhâng zoshâng gi, hkungsô wó nyi ri.

⁴⁴ Ngò, nungmoq lé teng za taí kôlé, yhumsîng hpó haú gi, yhâng é sutzè banshoq, dui-nhâng zoshâng haú lé ap to râ nghut lhê.

⁴⁵ Nghut kôlhang, dui-nhâng zoshâng haú gi, yhâng é i-myt unghkau má, 'Ngá é yhumsîng hpó jé lô râ gyai myáng ashî.' ga myit

pyám mù, dui-nhâng zoshâng luzúm wuî myiwe, yuqgè lé nhuq bat é eq, zo yê shuq yê î shuq wut nyi é nghut jáng,

⁴⁶ dui-nhâng zoshâng hau é yhumsîng hpó gi, yhang a myitbyu tô é buinyi eq yhang a sé tô é ahkyíng má jé lô mù, yhang lé jap pyám luî a lumjíng bang eq rahá nyhi pyám râ nghut lhê.

⁴⁷ Yhumsîng hpô é i-myt lé sê to kôlhang, yhang ô nau é đông a cháng, rì rì le a hen tô é dui-nhâng zoshâng gi, yhâng yhumsîng eq nhuq bat é lé, myo myo hui zo râ nghut lhê.

⁴⁸ Nghut kôlhang, a sé mù kut shut sú kúm gi, shau za bat é hui râ nghut lhê. Haú eq rajung za, Garai Gasang gi, myo shoq wó yû su chyáng mai, myo shoq dúng yû râ nghut lhê. Myo myo ap byi tô é hui su chyáng mai, je myo shoq dum dúng yû râ nghut lhê.

Nguingón Nhâng Râ A Nghut, Lhoq Kang Nhâng Râ Ru Nghut Lhê

Mht 10:34-36

⁴⁹ Ngò jé lé é gi, myigùng htoq má, myi nyé nhâng râ matú nghut lhê. Myi haú dap to lánng é nghut le gi, ngò ô nau é hkyô jup byíng bê.

⁵⁰ Nghut kôlhang, ngò hkam yû râ é baptisma[†] rajung joq ashî, haú a hkam yû yû gi, ngò gyai yhang hkâm zo wuî nyi ri.

⁵¹ Ngò jé lé é gi, myidàm htoq má simsaq hkyô byi râ

[†] 12:50 Shî má é baptisma gi, Yesuq, ajung jung hpuzo mù shî hkâm é hkyô lé taí é nghut lhê.

matú nghut nhô ngam akô lú? Haú dông a nghut, Ngò, nungmoq lé tái kôlé, byu pé lé lhoq pyô lhoq kang râ matú sheq ru nghut lhê.

⁵² Haú su mù, ahkuí mai rayhúm za mâ é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô râ nghut lhê.

⁵³ Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoí gi, yhâng dumó eq, yhâng dumó gi, yhangmhoí eq kut, ngá é yanmai, rayuq eq rayuq byoq gâng lhum bùm bekô râ nghut lhê." ga tâi ri.

Dut Lò Râ Hkyo É Kumlhá Lé Sê Gam Hkoq Râ Lhê

Mht 16:2-3; 5:25-26

⁵⁴ Hau htâng shiwa byu pé lé, Yhang tâi é gi, "Nungmoq gi, buiwàng hkyam shut mhut htup é lé myàng jáng, 'Maú wo lô berâ.' ga radá dâm lhaq tái tái mu akô, haú eq rajung za le, dut lò lò mu ri.

⁵⁵ Dum nghut jáng, maupyí shut mâ é lài lo le, 'Bùi htân berâ.' ga lhaq tái tái mu akô, haú eq rajung za le dut lò lò mu ri.

⁵⁶ Gegùn labyoq kut bang ê, nungmoq gi, myigùng eq mauhkung é kumlhá lé, sê gam hkoq yu nyi akô. Haú su nghut kô le nhing, haí mù luí, shí ipyat mâ é kumlhá lé gi, a sê gam hkoq dut tô akô lú?

⁵⁷ Haú eq rajung za, haí mù haú dingmán é hkyô lé yhumsing yhang yhang a wó doqdân yù kô é lú?

⁵⁸ Dangké, nang lé yui tsuq sù eq rahá, tarâ agyi wá chyáng e ló le, hkyô má yhang eq ngón shoq byìn hpyé huí yù aq. Haú a nghut jáng, yui yhumsing gi, nang lé tarâ agyi chyáng ê dé pyám luí, tarâ agyi gi, htóng hkyó su chyáng, nang lé ap pyám luí, yhang gi, nang lé htóng má lhung pyám râ nghut lhê.

⁵⁹ Ngò, nang lé tái lé, yuichyín haú a ban xap xap gi, htóng haú mai nàng wó htoq ló râ a nghut." ga tâi ri.

13

Myit A Lhîng Jáng Shi Hten Byuq Râ

¹ Haú hkûn, haú má nyi é byù ra-am gi, mauzau Pilat eq Galile byù ra-am lé sat mù yhangmoq é sui eq yhangmoq nóng jaú é hkungga lé nyhô pyâm é hkyô, Yesuq lé lé tái kyô akô.

² Yesuq gi, "Galile byù haú bang haú su kut hui zo kô é yanmai, yhangmoq gi, gotû Galile byu pé banshoq htoq má, yubak je myô akô nghû, nungmoq myit ngam akô lú?

³ Haú su a nghut! Ngò, nungmoq lé tái kôlé, nungmoq le, myit a lhîng kô é nghut le gi, banshoq bang haú eq rajung za shi hten byuq kó râ nghut lhê.

⁴ Haú htoq agó, Siloam wà mâ é machya gyop gyó luí,

nhê sat huí é byù raxe shit yuq gi, Yerusalem wà mó mâ é byù banshoq bang htoq má mara je kô akô nghû, nungmoq myit ngam nyi akô lúhú?

⁵ Haú su a nghut! Ngò, nungmoq lé taí kôlé, nungmoq le, myit a lêng kô é nghut le gi, banshoq bang haú eq rajung za shi hten byuq kó râ nghut lhê." ga taí ri.

⁶ Yesuq dangtú dông dum taí é gi, "Byù rayuq gi, yhâng é tsibiyiq hkyâm má, maihpáng gâm ragàm hô tô ri. Yhang agàm haú má, ashi ê ho wú le, zui tô é a myàng nghut ri.

⁷ Haú hkûn, yhang gi, 'Wú aq, ngò sum zân tup maihpáng gâm haú má ashi ê ho wú le, a myàng nghut ri; haú lé htuq pyám aq. Haí mù, maumyí aha agó kut yuq nhang tô lhê lúhú?' ga luí, tsibiyiq hkyâm zúng sù lé taí ri.

⁸ Hkyâm zúng sù gi, 'Yhumsing ê, hkûzân za gi, yuq tô wú shi sháng gaq, shigâm hau é lênghkyuq má ngò du lêng to mù, myìhpún kat luí bóm byi wú shirá.

⁹ Htang zàn má ashi zui é nghut le gi, yuq to sháng gaq, ashi a zui é nghut le kúm gi, htuq pyám râ nghut lhê.' ga luí, hkyâm yhumsing lé tû taí ri." gâ ri.

Bánno Buinyì Má Gùng Loq Hten Sù Lé, Lhoq Gê Byí É Hkyô

¹⁰ Bánno buinyì lé, Yesuq gi, tarajong ralhú má, mhòqshit nyi ri.

¹¹ Haú hkûn, haú má raxe shit zân tup nat dap luí, gùng loq lhoq hten huí é myiwe rayuq le nyi tô ri. Yhang gi, dàngngóm luí, gungdu ratsuí lhang a wó lhoq nyhàng lô é sù nghut ri.

¹² Yesuq gi, myiwe haú lé myàng jáng, yhâng chyáng wut yù mù, "Myiwe myí é, nàng, nòhpyo mai gè berá." ga luí,

¹³ yhâng é ahtoq má loq ke byí ri. Haú hkûn jáng, myiwe haú gi, nyàng za dum wó yap luí, Garai Gasang lé hkyá-ôn nyi ri.

¹⁴ Haú mù, Bánno buinyì lé, Yesuq nòhpyo lhoq gê byí é yanmai, tarajong má up sù gi, wú nhik-yo luí, "Mù wó zui é buinyì hkyuq nyi joq tô le, buinyì haú pé má, lé wó lhoq ge yù lhê. Haú mù, Bánno buinyì má gi, hkâkut kó." ga luí, shiwa byu pé lé taí kat ri.

¹⁵ Haú hkûn, Yhumsing Yesuq gi, "Gegùn labyoq kut bang ê, nungmoq yuq hkangmó gi, Bánno buinyì lé, yhumsing é no, logúng pé lé, hkup mai hpông htoq yù mù uchyam byi huq huq kut akó a nghut lúhú?

¹⁶ Haú nghut le gi, raxe shit zân gón Tsadán eq tuí to huí é, Abraham é yhangzo yhangshu myiwe zo shí lé, Bánno buinyì má Tsadán loq mai, hkyut byi a gíng râ lúhú?" ga tû taí ri.

¹⁷ Haú su ga taí jáng, Yhang eq i-myit shai lhum é bang banshoq gi, hoq hpú byuq bum akó. Shiwa byu ban-

shoq bang kúm gi, Yhang kut é mauhpo amû banshoq é yanmai, gabú nyi bum bekô nghut ri.

Angshi Cham Eq Munchi Dangké

Mht 13:31-33; Mrk 4:30-32

18 Haú hkûn, Yesuq taí é gi, "Garai Gasâng é mingdán gi, haí eq wuí lhê lú? Ngò hai eq taí kê wú râ lú?"

19 Haú gi, byù rayuq mai, yhang é hkyâm má hô tô é angshi cham eq wuí ri. Angshi cham haú gi, yuq kô lò mù agàm mó dut lò jáng, hau é akoq pé má, maulat nghoq zô pé wó zung nô yu akô." gâ ri.

20 Yhang dum xoq taí é gi, "Garai Gasâng é mingdán lé, ngò hai eq taí kê wú râ lú?"

21 Haú gi, myiwe zo rayuq eq sungso mún sum bûng má yu nyhó luí, haú pé banshoq lé wó lhoq daú nhang é múnchi eq wuí ri." gâ ri.

Chyap É Hkúmdong

Mht 7:13-14, 21-23

22 Hau htâng, Yesuq gi, Yerusalem wà mó shut laí e ló uchyang, rawà bàn rawà má wàng mù, mhoqshit byí ri.

23 Haú hkûn, byù rayuq gi, "Yhumsing ê, hkyi yu é hui râ bang gi, shau za nghut râ lú?" ga luí, Yesuq lé myí ri.

24 Yesuq gi, "Chyap é hkúmdong mai, Garai Gasâng é mingdán má wó wâng shoq shikut keq. Hkâsu mù gâ le, ngò, nungmoq lé taí kôlé, byù myo myo gi, wó wâng shoq

ga shikut wú kó râ. Nghut kôhang, a wó wâng kó râ nghut lhê.

25 Yhumsing hpó,* hkum toq myhî pyâm é htâng má sheq, nungmoq gi, hkúmdong hí má yap to mù, hkum lé kok uchyang, 'Yhumsing ê, ngamoq lé hkum hpóng byi laq ô!' ga luí, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tú taí râ nghut lhê.

26 Haú jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byí wú bê nghut lhê.' ga taí bekô râ.

27 Nghut kôhang, yhumsing hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dông kut é bang banshoq ê, ngá chyáng mai gâng ló byuq keq.' ga tú taí kat râ nghut lhê.

28 Garai Gasâng é mingdán má, Abraham, Isak, Yakup pé eq myiqhtoí pé banshoq bang nyi to kô é lé, nungmoq wó myâng kôhang, nungmoq gi, shinggan shut hkat pyâm é hui luí, haú jowò má ngaubyi ngàu nhap eq zuí kyik kyik shoq hpuzô nyi bùm bekô râ nghut lhê.

29 Hau hkûn, buihitoq, buiwàng, maupyí, mautsung mâ é mingdán myo myo mai byu pé lé luí, Garai Gasâng

* 13:25 Yhumsing hpó gi, Garai nghut lhê. Yhúm gi, Garaí é mingdán lé taí é nghut lhê.

é mingdán zoshuq poi má myang zùng kó râ nghut lâ.

³⁰ Haú hkûn, ahkuí htâng gyó nyí bang gi, hí bekô râ; ahkuí hî to bang gi, htâng gyó bekô râ." ga luí, yhangmoq lé tai ri.

Yerusalem Wà Mó Eq Séng Luí, Yesuq Tai É Hkyô

³¹ Haú u lé, Hparishe pé ram gi, Yesuq chyáng lé luí, "Shí jowò mai htoq ló byuq aq. Hkâsu mù gà le, Herut gi, nang lé sat râ hen nyi ri." ga luí, Yhang lé tai akô.

³² Haú jáng, Yesuq gi, "Hkûnyí, napmá,[†] ngò nat gang hkat pyám luí, nò zo hpyo zo lhoq gê byi râ nghut lâ; sum nyi nghû râ buinyi[‡] má sheq, ngá mù bàn râ nghut lâ." nghû luí, agè ashop é wamhkuí haú lé ló tai kyo keq.

³³ Haí wá dut kôlhang, hkûnyí, napmá, sânghe nyí, ngò gi, e ló râ dut ashî. Hkâsu mù gà le, myiqhtoí pé gi, Yerusalem wà mó mai lai luí gotû jowò má a shi wú kó nghut ri.

³⁴ Yerusalem ê, Yerusalem ê, myiqhtoí pé lé sat pyám pyám kut mù, náng chyáng nhang kat é bang lé, luqgok èq dú sat sat kut é myuq nàng ê, woqzìng gi, yhangzô pé lé, yhâng é dùng hkaú má tsíng lhung yu é su, nungzô pé lé, Ngò hkâ-myhó dâm shuí tsíng yù naù kôlhang, nàng a dóng nghut ri.

³⁵ Wú keq, nungmoq é yhûm gi, nungmoq é matú chamchuyiuyi dut pyâm to berâ nghut lâ; Ngò, nungmoq lé tai kôlé; 'Yhumsíng é myìng mai jé lé lo é Sû gi, hkungsô wó nyi sháng gaq.[✱] nghû, nungmoq a tai tai gi, Ngo lé wó myâng kó râ a nghut lo." ga luí, yhangmoq lé tai ri.

14

Hparishe Rayuq É Yhûm Má Yesuq Jé Nyi É Hkyô

¹ Bánno buinyi ra-nyí má, Yesuq gi, zang zo râ ga Hparishe suwún rayuq é yhûm má, ê wang nyi tô le, haú má é bang gi, Yhang lé gyui gyui chôm wú nyi bum akô.

² Haú u lé, wui wam ana dut sù rayuq gi, Yesuq é hí má jé nyi tô ri.

³ Haú mù, Yesuq gi, "Bánno buinyi má nòhpyo lé lhoq gê byí é gi, tarâ wang lhê l hú, a wang é l hú?" ga luí, tarâ sará pé eq Hparishe pé lé myí kat ri.

⁴ Nghut kôlhang, yhangmoq gi, zim za dut byuq akô. Haú hkûn, Yesuq gi, nòhpyo hui sù lé, zû to mù, lhoq gê byi luí, nhang kat ri.

⁵ Hau htâng, Yesuq gi, yhangmoq lé, "Nungmoq chyáng mâ é rayuq yuq gi, yhumsíng é yhangzo rayuq yuq, haú a nghut jáng, no myang radu du, Bánno buinyi

[†] 13:32 Hkû-nyí, napmá gà é gi, Yesuq mingkan htoq má mù zui râ ahkýng lé tai é nghut lâ. [‡] 13:32 Sum nyi nghû râ buinyi gà é gi, Yesuq mingkan htoq má mù ban zui é buinyi lé tai é nghut lâ. [✱] 13:35 Hkya-on 118:26

má, wuhtung má byit gyó le, haú hkûn jáng, a xe htoq yu é za, wó nyî kó râ nghut lê lú?" ga myî kat ri.

⁶ Yhangmoq kúm gi, dang haú hkun lé, haí le a wó tú taí kó nghut ri.

⁷ Haú hkûn, Yesuq gi, ji tô é bang jé réng é zùng jowò pé hkyin yu nyî kô é lé myàng jáng, yhangmoq lé dangtú dông taí é gi,

⁸ "Byù rayuq yuq nang lé, myiháng poi má ji é nghut jáng, je réng é jowò má hkâ-ê zùng. Hkâsu mù gâ le, náng htoq je aróng wó sù lé le, ji to shirâ abe.

⁹ Ji tô é nghut jáng gi, nungnhik lé ji tô é yhumsing hpó lé lô mù, 'Shí yuq lé jowò hui byi aq.' ga luí, náng lé lé taí jáng, nàng hoq hpu luí, hkyî htàng shut huí zùng ra râ nghut lê.

¹⁰ Haú mù luí, supé nang lé ji le, hkyî htàng má é zùng aq; haú hkûn, nang lé ji sù lé mù luí, 'Buinùm hpó ê, shí je réng é jowò má huí doq zùng aq.' ga luí, nang lé taí jáng, nàng eq rahá zung tô é bíng lhunghâng bâng é hí má, nàng gi, myoqdong wó râ nghut lê.

¹¹ Hkâsu mù gâ le, yhumsing gùng lé waq toq é sù ó yuq nghut kôle, lhoq nyhum pyâm é hui râ nghut lê; yhumsing gùng lé, lhoq nyhum é sù kúm gi, waq toq é hui râ nghut lê." ga taí ri.

¹² Hau htàng, Yesuq yhang lé ji é yhumsing hpó lé taí é gi, "Napzang, a nghut jáng,

myinxûn lé nàng byi tso nau le gi, náng é buinùm wui, âgu âmâng pé, mungmoq wui, sùt wó é yhumkyo chang pé lé hkâjî tso. Haú bang lé ji tsô é nghut jáng gi, yhangmoq nang lé dum ji tsô é eq, jeju dum tau kó râ nghut lê.

¹³ Nghut kôhang, nàng poi kut mù, byi tso byi huq nau é nghut le gi, myùng bang, hkyî gyui loq hten bang eq myoqjit é bang lé, ji tso aq.

¹⁴ Haú su kut jáng, nàng hkungsô wó nyî râ nghut lê. Yhangmoq nang lé jeju a wó tau kôhang, dingmán bang dum dui toq lo é buinyi má, hau é akyû lé, nàng wó hkam yù râ nghut lê." gâ ri.

Zoshuq Poi Mó Lé Dangtú Yu É Hkyô

Mht 22:1-10

¹⁵ Yesuq eq rahá zô zung tô é byù rayuq gi, dang haú wó gyo jáng, "Garai Gasâng é mingdán mâ é zoshuq poi má wó zo râ sù gi, hkungsô wó nyî sù nghut râ." ga luí, Yesuq lé taí ri.

¹⁶ Yesuq haú yuq lé tú taí é gi, "Byù rayuq gi, myinzang byi tso râ ga, zoshuq poi mó ralhum hen to mù, byù myo lé ji tô ri.

¹⁷ Zang byi tso râ yàm jé jáng, yhâng é dui-nhâng zoshâng lé, ji tô é bâng chyáng 'Lé keq hkoi, zoshuq jin to bê.' ga ê châng wut nhang ri.

¹⁸ Nghut kôhang, haú bang banshoq gi, zoshuq poi má a é râ dông chyat he pyâm akô. Rayuq sù gi, 'Ngô yohtung rahkyang wui tô lê; haú lé é

wú râ dut ri. Haû mù, ngo lé ahkáng byi shi laq.' ga yhang lé tai ri.

¹⁹ Dum rayuq le, 'Ngò, nohtó ngo zúm wui tô lhê; haû pé lé duì nhang chyam wú râ dut ri; ngo lé ahkáng byi shi laq.' ga tai wô ho ri.

²⁰ Dum rayuq le, 'Ngò myiwe hâng tô é a myáng shi mù, a wó lé.' ga tai wô ho ri.

²¹ Haû jáng, dui-nhâng zoshâng taú lò mù, yhâng é yhumsing lé haû hkyô banshoq lò tai kyô ri. Haû hkûn, yhumsing hpó gi, nhikmó gyô yo mù, 'Wà mâ é hkyô mó hkyô zo hkat hkanmó má hân hân ê mù luí, myùng bang, hkyi gyui loq hten bang eq myoqjit bang lé, ê ji lò aq.' ga luí, yhâng é dui-nhâng zoshâng lé nhang kat ri.

²² Hau htâng má, dui-nhâng zoshâng gi, 'Yhumsing ê, nàng nhang é eq rajung za ban kut bê; nghut kôlhang, zùng râ jowò gi, mân tô ashí.' ga tai ri.

²³ Haû su ga jáng, yhumsing hpó gi, 'Ngá yhùm bying râ matú, wà yàm hkyô pé eq hkyâm yàm hkyô pé má htoq ê mù, myang é bang lé a wó le wó shoq é tsing shuí lò aq.

²⁴ Nang lé ngò tai lé, hí lé ji to huí é bang rayuq lhang, ngá é zoshuq poi lé wó chyim wú râ a nghut.' ga luí, yhâng é dui-nhâng zoshâng lé tai ri." gâ ri.

Yesuq É Chángzo Wó Dut Râ Matú

Mht 10:37-38; 5:13; Mrk 9:50

²⁵ Byù hpùng mó Yesuq eq rahá e ló kô é hkûn, Yesuq gi, haû bang lé lhing wú luí,

²⁶ "Ngá chyáng lé sù ó yuq nghut kôle, yhumsing é înu, îwa, yhangmyi, yhangzo eq, yhanggu, yhangmang, yhâng nhammó pé lé le, haû htoq agó, yhumsing é asak lé le, ngo lé chyitdap é htoq má je chyitdap sù gi, ngá é chángzo a wó dut.

²⁷ Yhumsing é tapzing lé a waq é za, Ngá htâng châng é sù ó yuq nghut kôle, Ngá é chángzo a wó dut.

²⁸ Dangké, nungmoq chyáng mâ é byù rayuq yuq, tsehtung yhùm ralhum saí nau le, yhang gi, yhùm haû ban saí râ matú, ngùn hkâm-myhó bàn râ eq yhang wó tô é ngùn luq a luq é lé, zùng mù luí, hí a sôn wú é byù nyi kó râ lhu?

²⁹ Laq má mù, apûn awang gi, saí hi to mù luí, a wó lhoq pân é nghut jáng,

³⁰ myàng é bang banshoq eq, 'Shí yuq gi, apûn awang gi, saí hi to mù luí, banshoq a wó saí pân lo nghut ri.' ga luí, yhang lé jóng pyám bekò râ nghut lhê.

³¹ Dangké, hkohkâm rayuq gi, gyè zan râ hen le, gyezo í mun eq lé sù hkohkâm lé, gyezo ramûn eq za lhom wó zân ûng râ, a wó zân ûng râ lé, zùng mù luí, hí a myit wú é nyi râ lhu?

³² A ûng râ dut le gi, gyè pé we we má nyi tô ashí hkûn lé, lagyo suwún pé lé nhang kat luí, simsaq râ matú htingram pyám ra râ nghut lhê.

³³ Haû eq rajung za, nungmoq chyáng mâ é ó yuq nghut kôlhang, yhumsîng wó é zè banshoq lé, a pyâm to sù gi, ngá é chángzo wó dut râ a nghut.

³⁴ Xo gi, gè lhê. Nghut kôlhang, xomân kân byuq jáng gi, haû lé hai èq dum wó lhoq ngam yù râ lúh?

³⁵ Haû gi, myigung matú le, mylhpún kut râ matú le, akyû a bò lo. Haû mù luí, shinggan shut kúm gi, dú pyám sê akô.

Gyo râ nohkyap dap sù gi, gyô yù sháng gaq." ga taí ri.

15

Byuq Byuq É Sau *Mht 18:12-14*

¹ Ra-nyí lé, Yesuq é dang gyo kó râ ga, kang guq bang eq yubak dap bang gi, Yhâng chyáng lé zîng bum akô.

² Haû hkûn, Hparishe pé eq tarâ sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga taí put nyi bum akô.

³ Haû mù, Yesuq yhangmoq lé dangtú dông taí é gi,

⁴ "Nungmoq má, sau rashô du wó luí radu byuq byuq é nghut le, gaú xe gaú du lé yoso mhan yô má nyhi pyâm to mù, byuq byuq é sau haû lé, myàng shoq a châng ho yu é, ó yuq wá nyi kó râ lúh?

⁵ Byuq byuq é sau haû lé myang hô jáng, gyaí gau é i-myit èq goqsân htoq má bún kê chûng mù,

⁶ yhûm má jé jáng, yhâng é buinùm ji-myi wuè eq,

yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga taí râ nghut lhê.

⁷ Haû eq rajung za, Ngò, nungmoq lé taí kôlé, myit lhîng a râ é dingmán bang gaú xe gau yuq lé gabú é htoq, myit lhîng é yubak dap sù rayuq é yanmai, mauhkûng htoq má, je riyhang gabú jowò dut râ nghut lhê.

Byuq Byuq É Ngùn Chap

⁸ Dum nghut jáng, dangtú rallhum gi, myiwe rayuq, ngùn raxê chap wó é má, rachap byuq byuq é nghut le, yhang gi, myibung tap mù rayhum é shum luí, myang yù shoq rago za, ho wú râ a nghut lúh?

⁹ Haû lé ho myàng jáng le, yhâng é buinùm ji-myi wuè eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chôm gabú sháng.' ga taí râ nghut lhê.

¹⁰ Haû eq rajung za, Ngò, nungmoq lé taí kôlé, myit lhîng é yubak dap sù rayuq é yanmai, Garai Gasâng é mau-mang lagyô pé hí má, gabú jowò dut râ nghut lhê." gâ ri.

Byuq Byuq É Yuqzo

¹¹ Yesuq xoq taí é gi, "Byù rayuq gi, yuqzo í yuq wó ri.

¹² Haû nhik mâ é tiq sù yuq gi, yhâng wa lé, 'Áwa ê, ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tâng lé sutzè gàm byi kat ri.

13 Hau htâng hkâ-myháng a myáng má, yhangzo tiq sù yuq gi, sutzè banshoq hkyom yu chûng mù, mau we shut é luí, haú jowò má, mingkan ngón hkyô châng é má yhang wó é ngunzè banshoq lé langsâ pyám bê.

14 Haú su kut ngunzè wó mi-wó lé ban langsâ pyâm é htâng má, haú mau má mutmó gyo é yanmai, yhang gi, asho awui dut lo nyi bê nghut ri.

15 Haú mù, haú mau mâ é byù rayuq chyáng, langchyáng é kut le, haú yuq gi, yhang lé waq rém jang shut nhang kat mù, waq lé lhom zúng nhang ri.

16 Haú hkûn, yhang gi, waq jùm zô é shigyang cham pé lé lháng, zo naú shoq dut kôlháng, ó yuq le a byi zo kó nghut ri.

17 Haú mù, yhang myit bûn lo é gi, 'Ngá wâ chyáng nyi é langchyâng pé gi, agùn agó myàng zô nyi kó râ nghut lhê. Nghut kôlháng, ngò gi, shí jowò má, zo mut wuìshit é eq shi ló râ dut bê.

18 Ahkuí, ngò toq mù, ngá wâ chyáng taú ló luí, "Áwa ê, ngò gi, Garai Gasang lé le, nang lé le, shut bê.

19 Ahkuí mai ngò gi, nung zo nghû râ a gíng lo, hau é yanmai, náng é langchyáng rayuq dông za ngo lé nyi nhâng laq." nghû luí, ló taí rá.' gâ ri.

20 Hau htâng, yhang toq luí, yhâng wâ chyáng ló le, yhang we we má ru nghut ashí hkûn

mai, yhâng wa gi, yhang lé lhom myàng jáng, wú shogyo luí, din é mù, yhangzô é lingzing má é po pyik dap to luí, bopuq puq byí ri.

21 Haú hkûn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghû râ a gíng lo.' ga luí, yhâng wa lé dúng tôngbán ri.

22 Yhângwa kúm gi, yhâng é langchyâng pé lé, 'Réng dik é mebu hân hân yu lé mù, yhang lé hut byi keq; yhâng é loq má, loqchyop chyop byi keq; hkyî má le hkyî-tsung tsung byi keq.

23 Tsô myum tô é nojûng zo le yu sat keq. Haú mù, nganhúng gi, zoshuq poí kut mù chôm ngón sháng.

24 Haí mù gâ le, ngá zo shí yuq gi, shi byuq é mai, ahkuí dum duì bê; byuq byuq é mai le, ahkuí dum myàng bê.' ga taí ri. Haú mù, yhangmoq gi, ngón ngón zo shuq ló bekô.

25 Haú u lé, yhangzo ko sù yuq kúm gi, yò má nyi tô ri. Yhang gi, yò mai yhâm shut jé lo nyi é hkûn, zìng út bat luí gó nyi é htê lé lò wó gô ri.

26 Haú mù, langchyáng rayuq lé wut yù luí, haú hkyô lé yhang myí wú le,

27 langchyáng haú gi, 'Nung gu dum taú jé lô bê. Haú mù, náng wa gi, nung gu wáng wáng zán zán dum taú jé lo é lé lhom myàng luí, tsô myum tô é nojûng zo lé sat bê nghut ri.' ga taí kyô ri.

28 Dang haú lé wó gyo jáng, yhang gi, gô nhik-yo luí,

yhúmhmau shut a wàng lo kut ri. Haû mù, yhang wa htoq ê luí, yhang lé ê chyuy ri.

²⁹ Yhangzo kúm gi, 'Wú aq, ngò, shí-myháng shílo náng é jùn dông kut luí, hkâ-nhám le náng dang lé a lu lai wú. Nghut kôlhang, ngò ngá é luzúm wuí eq ngón kún rá matú, bainám zo radu lhang radam le nàng a byi wú shi.

³⁰ Shiwa myhí pé eq zum yap wún luí, náng é sutzè lé lhoq pân pyâm é sù nung zo haû dum taú jé lô jáng kúm gi, tsô myum tô é nojúng zo lé, yhang é matú nàng sat byi bunhung!' ga luí, yhang wa lé tú tai ri.

³¹ Yhangwa gi, 'Ngá zo ê, nàng gi, hkâ-nhám le ngò eq rahá yhang nyi nyi lhê mù, ngá é sutzè joq mijoq ban-shoq gi, náng é chyat nghut lhê.

³² Nghut kôlhang, shí nung gu gi, shi byuq é mai ahkuí dum duì bê; byuq byuq é mai le, dum myàng bê. Haû mù, gabú hpo nghut bê.' ga luí, yhang lé tai ri." gâ ri.

16

Hpaqchyí Ge Dâ É Sùt Zum Sú

¹ Yesuq, Yhang é chángzô pé lé tai é gi, "Sahtê rayuq chyáng sùt zum sù rayuq nyi ri. Haú yuq gi, yhang yhum-sing é sutzè pé lé jai hpyuq pyám ri ga, yhang yhumsing é hí má, yhang lé mara lé hun akô.

² Haú hkún, sahtê hpó gi, yhang lé wut yù mù, 'Nàng é hkyô lé ngò wó gyo bê. Haú

gi, hkâsu lhu? Nàng sùt zúm é eq séng luí kut tô é jihpán laiká lé lò shit wú aq. Hkâsu mù gâ le, ahkuí mai nàng gi, sùt zum sù wó kut lo rá a nghut lo.' ga tai ri.

³ Haú jáng, sùt zum sù gi, 'Ahkuí, ngò hkâsu kut lo rá lhu? Ngá é yhumsing gi, ngo lé sùt zum ayá mai lhoq hkyô pyám bê. Myì du myì hkop zo rá le ngò wum a bò; dung zo dung shuq rá le ngò hoq ri.

⁴ Ngo lé sùt zúm é ayá mai hkyô pyâm htang má, supé ngo lé yhangmoq é yhúm má lhom hap yù rá matú, hkâsu kut rá hkyô lé ngò sé bê.' ga wó myit rot jáng,

⁵ yhang gi, yhang yhumsing hpó lé chyín dap tô é bang rayuq htang rayuq lé wut yù mù, sâng-hí yuq lé, 'Ngá yhumsing hpô chyáng nàng chyín hkâ-myhó dap tô lhê lhu?' ga myi jáng,

⁶ haú yuq gi, 'Xù rashô púng dap lhê.' ga tú tai ri.

Haú jáng, sùt zum sù gi, 'Náng é jihpán yù luí, hân zùng mù, ngo xê púng kut kâ to aq.' ga yhang lé tai ri.

⁷ Dum rayuq lé, 'Nàng hkâ-myhó dap tô lhê lhu?' ga myi jáng, haú yuq gi, 'Sungsô rashô búng dap lhê.' ga tú tai ri. Sutzum sù gi, haú yuq lé, 'Náng é jihpán má shit xê búng kut kâ to aq.' ga tai ri.

⁸ Haú a dingmán é sùt zum sù lé, yhumsing hpó gi, hpaqchyí ge da sù nghut ri ga hkya-ôn ri. Ngò shí lé tai é gi, mingkan zo wuí gi, yhangmoq é mingkan eq séng

é hkyô pé má, maubó gung é yhangzo pê* htoq hpaqchyí je bò kô é yanmai nghut lhê.

⁹ Haû mù luí, Ngò nungmoq lé taí kyo kôle, a tara é sutzè pê èq buinùm ho nyí keq, haû mù, sutzè haû htùm byuq jáng, nungmoq lé, ahtum abyuq joq tô é yhùm má, lhom hap yu é hui kó râ nghut lhê.

¹⁰ Tiq é mù má wó lum é sù ó yuq nghut kôlhang, mù mó má le wó lùm râ nghut lhê. Tiq é mù má lhum a zuí é sù ó yuq nghut kôlhang, mù mó má le lhumzui râ a nghut.

¹¹ Haû mù, mingkan sutzè má lhang nungmoq lé a wó lùm kô é nghut le gi, haû tengmán é sutzè lé, nungmoq chyáng ó yuq wá kâm ap byi râ lhu?

¹² Supé é sutzè má, nungmoq lé a wó lùm kô é nghut le gi, nungmoq sîng âng é sutzè lé, nungmoq chyáng ó yuq wá kâm ap byi râ lhu?

¹³ Dui-nhâng zoshâng ó yuq nghut kôlhang, yhumsîng í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé, chyitdap râ nghut lhê; haû a nghut jáng, rayuq lé gi, lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut." ga taí ri.

¹⁴ Ngùn myoqnoq é Hparishe pé gi, dang haû banshoq lé wó gyo kôjáng,

Yesuq lé wuizui kut pyám byí akô.

¹⁵ Haû mù luí, Yesuq gi, yhangmoq lé, "Nungmoq gi, byu pê hí má yhumsing gùng lé yhumsîng dingmán bang su kut shit mhaû é bang nghut akô; nghut kôlhang, Garai Gasang gi, nungmoq é i-myt unghkaú lé sé sù nghut lhê. Byù é hí má hpauap é pé gi, Garai Gasâng é hí má achaq achyut é nghut nyi ri.

¹⁶ Jep é tarâ† eq myiqhtoí pê é dang, ahko ahkáng wó tô é ahkýing gi, wui-myhup sará Yohan jé lé é buinyí jé shoq nghut bê. Haú hkýing mai gi, Garai Gasâng é mingdán hkyô gabú danglù lé, hko kyô nyí mù, yuq du jup gi, haú hkyô má htung chyíng wang ló bum akô.

¹⁷ Jep é tarâ mâ é tiq dik é dangjí eq myihkyet zo ralhùm lé wó lhoq hten râ htoq, mauhkung eq myigùng hten râ gi, je lui râ nghut lhê.

¹⁸ Dangké, yhumsing é yhangmyi lé kâng pyám mù, myiwe gotù dum hâng yu é sù ó yuq nghut kôle, su-myi lú é sù nghut bê; yhumsing é yhanglâng eq gang bê myiwe lé hâng yu é sù le, su-myi lú é sù dut bê nghut ri." ga taí ri.

Sahtê Hpó Eq Lazaruq

¹⁹ Yesuq dum xoq taí é gi, "Radám lé, sahtê rayuq gi, nè é eq nú-nhâm é mebu wut mù luí, nyí nyí bui bui zo ngón shuq ngón nyi ri.

* **16:8** Maubó gung é yhangzò pé nghu é gi, Garai Gasâng é yhangzò pé lé taí é nghut lhê. † **16:16** Jep é tarâ gâ é gi, Garai Gasang, Mosheq mai nga-nhung lé byí tô é tarâ lé gâ lhê.

20 Yhâng é hkúmdong má gi, ragùngdù é jeq byi tô é Lazaruq gâ é dung zo sù rayuq lé, lé nyhi tô akô.

21 Haú yuq gi, sahtê wá é siboí mai gyó é agyó ahtâng lé, wú zô nau nyi ri. Hkui pé le yhâng é dàm pé má, lé yoq byi nyi akô.

22 Htâng má, haú dung zo sù shi byuq jáng, maumang lagyô pé gi, mauhkûng má nyi é Abraham é tanghkoí má yhang lé shuí ló byi akô. Sahtê wá le shi byuq luí, yhûm pyám bekô nghut ri.

23 Sahtê wá gi, ngaraí ming má dik shoq hpuzô nyi mù luí, tu wú kat le, we we má Abraham lé le, yhâng é tanghkoí mâ é Lazaruq lé le, myàng kat ri.

24 Haú mù, yhang gi, 'Áwa Abraham ê, ngo lé shogyo yù laq ô. Ngò gi, shí myi htum má achýi aku nyé é hui zô nyi ri. Haú mù, Lazaruq gi, yhâng é loqnyhui ú èq wui má tik yú mù, ngá é shô má wui rapoq zo hkálháng lé tik cham byi sháng gaq, yhang lé ngá chyáng nhang kat byi laq ô!' ga luí, dúng wut nyi ri.

25 Haú hkûn, Abraham gi, 'Ngá zo ê, asak dui tô é u lé, nàng nyi ngón yuqyo tô é hkûn, Lazaruq gi, asho awui dut é lé, bûn nyi aq. Ahkuí, yhang kúm gi, shí má lo nyi byán to bê; nàng chyaú gi, jamjau hui zô nyi bê.

26 Haú mai gotú gi, shí mai nungmoq chyáng dap lé naú bang a wó dap shoq le, haú mai ngamoq chyáng ó a wó

dap lé râ matú le, ngamoq eq nungmoq é gyoro má, nik dik é langhkung mó èq kyo pyâm to bê nghut ri.' ga tû taí ri.

27 Sahtê wá gi, 'Áwa ê, haú nghut le gi, ngò, nang lé dúng nau ri. Ngá gû pé ngo yuq nyi ashí; yhangmoq le ísu hpuzô é jowò má a jé sháng gaq,

28 yhangmoq myit lhîng shoq ló taí pun râ matú, Lazaruq lé ngá wá yhûm shut nhang kat byi laq ô!' ga luí, dúng wut ngau nyi ri.

29 Abraham gi, 'Yhangmoq chyáng, Mosheq eq myiqhtoí pé nyi lhê; haú bâng dang lé gyô yù kó sháng gaq.' ga taí ri.

30 Sahtê wá gi, 'Áwa Abraham ê, haú su a nghut. Shi byuq é bang mâ é rayuq yuq yhangmoq chyáng dum taú lo é nghut le kúm gi, yhangmoq myit lhîng kó râ nghut lhê.' ga taí ri.

31 Abraham gi, 'Mosheq eq myiqhtoí pé é dang lé yhangmoq a gyo kô é nghut le gi, shi byuq é bang mâ é rayuq yuq dum dui toq ló mù, ló taí kyo kôlháng, kâm gyo kó râ a nghut.' ga luí, yhang lé tû taí ri." ga ri.

17

Mara Hkyut É Hkyô Eq Lumjîng Myit

Mht 18:6-7, 21-22; Mrk 9:42

¹ Yesuq, Yhâng chángzô pé lé taí é gi, "Byu pé lé mara kut shut nhang é hkyô gi, joq htoq lô râ za nghut lhê. Nghut kôlháng, mara kut shut nhang

é hkyô lé lhoq htoq é sù gi, dingnyé wó rà.

² Zoshâng shí bang mâ é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuimau má ê dú hkyô pyâm é huí é nghut le gi, yhang é matú je gè rà nghut lhê.

³ Nungmoq gi, yhumsîng gùng yhumsîng sidiq keq.

Nunggu nungmang nàng lé mara kut shut é nghut le gi, yhang lé tan luí, mhoqshit aq; yhang myit lhîng é nghut le gi, yhang lé mara hkyut pyâm byi aq.

⁴ Ra-nyí má za, yhang nang lé nyhit dàm shut mù, 'Ngò myit lhîng bê.' ga luí, nang lé nyhit dàm dum tóngbán le, tóngbán hkangmó, nàng, yhâng é mara lé hkyut pyâm byi aq." gâ ri.

⁵ Haú hkûn, lagyô pé gi, "Ngamoq é lumjîng myit lé lhoq ko byi laq." ga Yhumsîng lé dúng akô.

⁶ Haú jáng, Yhumsîng gi, "Nungmoq é lumjîng myit angshi cham í za hkâlháng bò kô é nghut le gi, shí hangwâ gàm lé, 'Sikgâm ê, amyit eq roq bún luí, wuishuq lung-aú má, ê yuq to aq ô.' gâ le, nungmoq é dang lé sikgâm haú gyo byi rà nghut lhê.

⁷ Dangké, nungmoq mâ é rayuq yuq chyáng, yò hpuq é, a nghut jáng, sau zúng é dui-nhâng zoshâng rayuq nyi é nghut le, dui-nhâng zoshâng haú yohtung pá mai jé lo é hkûn, yhang lé, 'Hân zùng mù

zang zo aq.' ga luí, ó yuq wá taí kó rà lhú?

⁸ Haú dui-nhâng zoshâng lé sheq, 'Ngò zo rà myinzang lajang aq. Ngò bàn zo shoq hpyidum má hpyihit hit mù, xun zang wú nyí aq. Ngò bàn zo jáng sheq nàng wó zo rà nghut lhê.' ga luí, taí rà a nghut kó lhú?

⁹ Taí mitaí banshoq lé, dui-nhâng zoshâng ban zui saí byí é nghut kôlháng, yhang lé jeju bún é dang ó yuq wá taí wú akô lhú?

¹⁰ Haú eq rajung za, nungmoq gi, taí mitaí ban kut jáng sheq, 'Nga-nhúng gi, jeju bun a gíng é dui-nhâng zoshâng pé nghut nyi lhê; kut rà é mù lé za lhoq pân é bang nghut lhê.' nghû taí keq." ga taí ri.

Manggâm Dap Bang Raxê Yuq Lé, Yesuq Lhoq Gê Byí É Hkyô

¹¹ Ahkuí, Yesuq gi, Yerusalem wà mó shut e ló nyi le, Samariq mau eq Galile mau gyoro mai lai e ló ri.

¹² Yhang, wà rawà shut wang ló é hkûn, manggâm dap é byù raxê yuq eq huí ri. Haú bang gi, we mai yap to mù, Yesuq lé,

¹³ "Yesuq, Zau ê, ngamoq lé shogyô yù laq ô." ga luí, wut garú bum akô.

¹⁴ Yesuq gi, yhangmoq lé myàng jáng, "Nungmoq é gungdu lé, hkyangjông pé chyáng ló tân shit keq." ga yhangmoq lé taí ri. Yhangmoq gi, hkyô má ru sô nyi ashí le lháng, sân-yúng ló byuq bekô.

15 Yhangmoq chyáng mâ é rayuq gi, yhumsing gungdu ge byuq é lé myàng jáng, Yesuq chyáng dum taû ê mù, htê mó eq Garai Gasang lé hkya-ôn é eq,

16 Yesuq é hkyî wang má paî gop to luî, Yhang lé jeju hkya-ôn nyi ri. Haû yuq gi, Samariq byù nghut ri.

17 Haû mù, Yesuq gi, "Sân-yúng byuq é gi, raxê yuq a nghut l hú? Gau yuq gi, hká ló byuq bekô?"

18 Shî tûngbaù rayuq mai lai luî, dum taû lé mù Garai Gasang lé hkya-ôn é byù, rayuq le a nyi lo kó l hú?" ga taî ri.

19 Hau htâng, Yesuq gi, haû yuq lé, "Toq mù ló aq, náng é lumjín myit gi, nang lé lhoq sân-yúng byi bê nghut ri." ga taî ri.

Garai Gasâng É Mingdán Jé Lô Râ Hkyô

Mht 24:23-28, 37-41

20 Radàm lé, Hparishe pé gi, Garai Gasâng é mingdán hkâ-nhám jé râ hkyô, Yesuq lé myî akô. Haû jáng, Yesuq gi, "Garai Gasâng é mingdán jé lé râ gi, myoq eq wú luî myàng râ a nghut.

21 Garai Gasâng é mingdán gi, nungmoq yuq Jup é ahkaû má nghut nyi é yanmai, 'Wú keq, shí má joq ri, mhó má joq ri.' ga luî le, byu pé gi, wó taí kó râ a nghut." ga luî, yhangmoq lé tû taî ri.

22 Chángzô pé lé le Yesuq taî é gi, "Haû Byu Yhangzô é buinyi ra-nyí lé, nungmoq myàng nau dik é ahkýng jé

râ. Nghut kôlhang, nungmoq gi, Byu Yhangzo lé wó myàng kó râ a nghut.

23 Haû buinyi má, byu pé gi, nungmoq lé, 'Yhang shí má nyi ri.' haû a nghut jáng, 'Yhang hê má nyi ri.' ga taí kó râ nghut lhê. Nghut kôlhang, hkâ-ê; hkácháng kó.

24 Hkâsu mù gâ le, maumyî rahkyam má hpyat é maulhap gi, maumyî gó hkyam jé shoq duqbó é su, haû Byu Yhangzo dum jé lé é buinyi má le dut râ nghut lhê.

25 Nghut kôlhang, haû su a dut htoq shimá, Yhang gi, zing-rî é myo myo lé le, ipyat shi mâ é byu pé eq he-ngik pyâm é lé le, hui shirâ nghut lhê.

26 Noaq é tsîn pyat má dut é su, haû Byu Yhangzo jé lé é buinyi má le dut râ nghut lhê.

27 Byu pé gi, Noaq, wui-sanghpo mó hkaû má wang é hkûn jé shoq, zo zo shuq shuq, myi byi myi yû, myiháng kut luî, nyi nyi bum akô. Haû hkûn, dowuî dínng lô mù, yhangmoq banshoq lé lo lhoq htên pyám bê nghut ri.

28 Haû eq rajung za, Lot é pyat má le, byu pé gi, zo mù, shuq mù, ung zo wui zo, ho zo ho shuq, yhûm kut luî nyi nyi akô.

29 Nghut kôlhang, Sodom wà mai Lot htoq ló é buinyi má, mauhkûng mai, myi eq hang gi, mau su wò gyó lô luî, lunglhang lé lhoq htên pyám bê nghut ri.

30 Haû Byu Yhangzo, lé htoq shit é buinyi má le, haû

eq rajung za dut râ nghut lâ.

³¹ Haú buinyì má, yhumhkûng* htoq má nyi tô é sù gi, yhúmkaú má é zè lé, a ló gyó wang yù lo sháng gaq. Yò má nyi tô é sù gi, haú eq rajung za, yhùm shut a taú ló lo sháng gaq.

³² Lot é yhangmyi† lé bûn nyi keq.

³³ Yhumsing é asak duì hkyô hô sù ó yuq nghut kôle, asak sum râ nghut lâ; asak sum pyâm é sù kúm gi, asak wó duì râ nghut lâ.

³⁴ Ngò, nungmoq lé taí kyo kôlé, haú myin lé, yhupjang ralhum má byù í yuq nyi to kô le, rayuq gi, shuí yu é hui mù, rayuq gi, myit gyó to râ nghut lâ.

³⁵ Myiwe í yuq luí má rahá za chôm luí nyi tô le; rayuq gi, shuí yu é hui mù, rayuq gi, myit gyó pyâm to râ nghut lâ.

³⁶ Yohtung má byù í yuq nyi to le, rayuq gi, shuí yu é hui luí, rayuq gi, myit gyó pyâm to berâ nghut lâ." gâ ri.

³⁷ Haú hkûn, chángzô pé gi, "Yhumsing Yesuq é, haú gi, hká gyo má dut râ lhú?" ga luí, Yesuq lé myi kôjáng, Yhang gi, "Màng leq é jang má, langdâ pé, lé zîng bùm râ nghut lâ." ga luí, yhangmoq lé tû taí ri.

18

Chuimó Myhí Eq Tarâ Agyi É Hkyô Lé Dangtú Yù É Hkyô

¹ Yesuq, Yhâng é chángzô pé lé, myit wum a gyui é za, hkâ-nhám le kyûdûng nyi râ hkyô lé, dangtú dông mhoqshit é gi,

² "Wà rawà má, Garai Gasang lé le a gyuq hoq, byù lé le haí su a ngàm é tarâ agyi rayuq nyi ri.

³ Haú wâ má chuimó myhí rayuq le nyi ri. Yhang gi, haú tarâ agyi wá chyáng ê luí, 'Ngò eq amû htoq sù lé, yhâng é mara eq rajung za, jéyáng byi laq.' ga luí, é dum taí taí kut nyi ri.

⁴ Nghut kôlhang, tarâ agyi wá gi, ahkyíng rayoq zo jé shoq tarâ a jéyáng byi é tô tô ri. Hau htàng má, yhang gi, 'Ngò, Garai Gasang lé le a gyuq a hoq, byù lé le haí su a ngàm,

⁵ nghut kôlhang, chuimó myhí shí yuq é amû lé, ngò a jéyáng a doqdan byi é nghut le gi, yhang dum lé lé kut mù, ngo lé myit hpêbù nhâng râ dut ri. Haú mù, ngò yhâng é amû lé jéyáng byi râ.' ga, yhâng é unghkaú má myit yu ri." gâ ri.

⁶ Haú mù luí, Yhumsing Yesuq gi, "A ding a mán é tarâ agyi wá taí é dang mai mhoq yú keq.

⁷ Garai Gasang gi, Yhang lé nyi myin wut dúng nyi é, Yhang hkyin yu to bê bang lé, tarâ é dông a kut byi é gi, myáng myáng nyi to râ lhú?

⁸ Ngò, nungmoq lé taí kôlé, Garai Gasang gi, yhangmoq

* 17:31 Yudaq byu pé é yhumhkûng gi, rá é nghut lâ mù, nyi kún jang kut akò.

† 17:32 Lot é yhangmyi gi, Sodom wâ shut dum taú lhing wú é yanmai, Garai Gasang lhoq hten pyâm é hui sù nghut lâ.

lé hân yhang tengmán é dông jéyáng byi berâ nghut lhê. Nghut kôhang, haû Byu Yhangzo jé lé é buinyi má, lumjing hkyô lé gi, mingkan htoq má myang wú shirâ lhú?" ga taí ri.

Hparishe Eq Kang Guq Sû Kyûdung É Hkyô

⁹ Yhumsing gùng lé dingmán bun luí, byù góbang lé wú tiq é bang ra-am lé, Yesuq dangtú dông taí é gi,

¹⁰ "Byù í yuq kyûdung kó râ ga, noqkuq yhûm má doq e akô. Rayuq gi, Hparishe, rayuq gi, kang guq sù nghut ri.

¹¹ Hparishe hpó gi, yap to luí, 'Garai Gasang ê, ngò gi, byù góbang su lú zo lú shuq é hkyô le a kut, agè ashop é hkyô le a cháng, su-myi le a lú é htoq agó, shí kang guq sù su le, a nghut é yanmai, ngò nàng lé jeju bûn lhê ô!

¹² Ngò gi, rabat má zoshuq í dâm gám nyi lhê; ngò wó yu é gû mâ é xê gambùm ragambùm le kat nyi lhê.' ga luí, yhang baú yhang gotú kut dúng nyi ri.

¹³ Kang guq sù kúm gi, we we má yap to mù, mauhkung shut lháng a wám tu wú é za, wànggàng bat luí, 'Garai Gasang ê, shí yubak dap sù ngo lé, shogyô yù laq ò!' ga dúng ri.

¹⁴ Ngò, nungmoq lé taí kôlé, kang guq sù kúm gi, Garai Gasang é hí má mara hkyut san byí é lé wó yù luí, yhûm shut dum taù ló bê; nghut kôhang, Hparishe wá gi, a wó

nghut ri. Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê; yhumsing gùng lé lhoq nyhum é sù kúm gi, waq toq é hui râ nghut lhê." ga taí ri.

Zoshâng Wuí Lé Yesuq Shimân Byí É Hkyô

Mht 19:13-15; Mrk 10:13-16

¹⁵ Byu pé gi, zonú wuí lé Yesuq záng htung byi sháng gaq ga, Yhâng chyáng shuí lé lo bum akô. Chángzô pé gi, haû lé myàng jáng, lhom tân hkûm akô nghut ri.

¹⁶ Nghut kôhang, Yesuq gi, zoshâng wuí lé, wut yù luí, "Haû zoshâng wuí lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasang é mingdán gi, haû sù é bâng é mingdán ru nghut lhê.

¹⁷ Ngò, nungmoq lé teng za taí kôlé, Garai Gasang é mingdán lé, zoshâng su kut a lhom hap yu é nghut le gi, mingdán haú má gè gè yhang wó wâng râ a nghut." ga taí ri.

Ayá Wó É Sahtê Hpó
Mht 19:16-30; Mrk 10:17-31

¹⁸ Ayá wó é byù rayuq le, Yesuq lé, "Ge é Sará ê, ahtum abyuq é asak wó yù râ matú, ngò haí kut ra râ lhú?" ga myí ri.

¹⁹ Yesuq gi, "Haí mù, Ngo lé ge é Sará nghu lhê lhú? Garai Gasang mai lai luí, ge é ó yuq le a nyi.

²⁰ Jep é tarâ má, 'Su-myi sulàng hkâlú, byù hkâsat,

hkâhkau, a teng a mán é saksé hkâhkám, nángnu nángwa lé hkungga aq. [☆] gâ é dang pé lé, nàng sé gû bê." ga luí, yhang lé tú taí ri.

²¹ Haú yuq gi, "Haú pé ban-shoq lé, ngò, zoshâng hkûn mai cháng bê nghut lhê." ga taí ri.

²² Yesuq gi, dang haú lé wó gyo jáng, "Nàng kut râ rajung râ tô ashî; nàng wó miwó lé ûng pyám luí, myùng bang lé byí pyám aq; haú jáng, nàng, mauhkûng htoq má sutzè wó râ nghut lhê; haú mù, Ngá htâng lé cháng aq." ga luí, yhang lé taí ri.

²³ Haú yuq gi, dang haú lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri.

²⁴ Yesuq gi, haú yuq lé wú luí, "Sutzè wó bang gi, Garai Gasâng é mingdán má wàng râ matú, haú-í yhang wuí ri-nhung!

²⁵ Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." ga taí ri.

²⁶ Dang haú lé wó gyô é bang gi, "Haú su ru nghut le gi, ó yuq za hkyi yu é hui râ nghut lhê lú?" ga myí bum akô nghut ri.

²⁷ Haú hkûn, Yesuq gi, "Byù a wó kut é hkyô lé, Garai Gasang gi, wó kut lhê." ga taí kyô ri.

²⁸ Haú hkûn, Petruq gi, Yesuq lé, "Wú aq, ngamoq gi, wó miwó tô pyám to luí, Náng

htâng cháng bê nghut lhê." ga taí jáng,

²⁹ Yesuq gi, "Ngò, nung-moq lé teng za taí kôlé, Garai Gasâng é mingdán é yanmai, yhumsing é yhûm, yhumsing é yhangmyi, yhumsing é âgu âmang, yhumsing é înu îwa, yhumsing é yhangzô pé lé, pyâm to sù ó yuq nghut kôle,

³⁰ shí pyat má, akyû myo myo wó hkam yù râ htoq agó, htang pyat má le, ahtum abyuq é asak a wó yu é gi, a nyi râ nghut lhê." ga luí, yhangmoq lé taí ri.

Yesuq, Yhang Shî Hkám Râ Lé Dum Taí Ê Hkyô

Mht 20:29-34; Mrk 10:46-52

³¹ Yesuq gi, Yhâng é lagyô pé raxe í yuq lé gotù kut wut yù mù, "Gyô wú keq, nga-nhúng gi, Yerusalem wà mó shut doq ló nyi é nghut lhê. Haú má jé jáng, haú Byu Yhangzo eq séng luí, myiqhtoí pé kâ tô é banshoq gi, dik lò berâ nghut lhê.

³² Hkâsu mù gâ le, Byu Yhangzo gi, tungbau pé é loq má ap pyâm é hui luí, haú bâng êq Yhang lé, wuizui kut pyâm é, rhoi rip e, sôkan byé gyûn é, nhuq bat é kut yù mù, sat pyám kó râ nghut lhê.

³³ Hau htâng sum nyí nghú râ buinyi má, Yhang gi, dum dui toq lô râ nghut lhê." ga luí, yhangmoq lé taí ri.

³⁴ Lagyo pé gi, dang haú pé rahkun lé lháng a sê gyo kó; dang hau é lichyúm gi, yhang-moq é hí má zaú nghop tô é

nghut é yanmai, Yhang haí taí nyi é hkyô pé lé yhangmoq a sé kó nghut ri.

Dung Zo É Myoqjit Sû Lé, Yesuq, Myoq Dum Myàng Nhang É Hkyô

³⁵ Ahkuí, Yesuq Yerihko wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri.

³⁶ Yhang gi, byù rajùm rayò sô lai ló é htê lé wó gyo jáng, haú haí dut nyi é hkyô lé, myi kat ri.

³⁷ Haú hkûn, yhangmoq gi, "Nazaret wà byù Yesuq lai ló ri." ga luí, yhang lé taí kyo akô.

³⁸ Haú su gâ é lé wó gyo jáng, yhang gi, "Dawiq é Yhangzo Yesuq ê, ngo lé shogyo yù laq ô!" ga wut dúng kat ri.

³⁹ Hí má lai ló é bang gi, zim za nyi râ matú yhang lé tân hkûm akô; nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang htê mó o mó èq wut dúng kat ri.

⁴⁰ Haú mù, Yesuq gi, yap kat mù, byù haú yuq lé Yhâng chyáng shuí lé lô nhang kat ri. Myoqjit sù Yhâng nàm má jé lé jáng, Yesuq gi,

⁴¹ "Ngò, nàng lé haí kut byi râ ô nau ri lhú?" ga, yhang lé myi kat ri.

Haú yuq gi, "Yhumsîng ê, ngò myoq myàng nau ri." ga tú taí ri.

⁴² Hau hkûn, Yesuq gi, "Náng myoq myàng sháng gaq! Náng é lumjîng myit gi,

nang lé lhoq gê byi bê nghut ri." ga, yhang lé taí ri.

⁴³ Haú yuq gi, haú hkûn jáng, yhang myoq wó myâng mù, Garai Gasang lé hkya-on uchyang Yesuq htâng cháng bê. Lhunglhang bang haú lé myàng kôjáng, Garai Gasang lé hkya-ôn nyi bum akô.

19

Yesuq Eq Zake

¹ Yesuq gi, Yerihko wà má wàng mù, sô lai ló nyi ri.

² Haú hkûn, haú wâ má, Zake gâ é kang guq agyi rayuq nyi ri; haú yuq gi, sutzê wó sù nghut ri.

³ Yhang gi, Yesuq hká yuq nghut é lé myàng nau kôlhang, nyhûm sù nghut é htoq agó, byù rajùm rayò chyîn chyap tô é yanmai, a wó myâng nghut ri.

⁴ Haú mù, yhang gi, Yesuq lé wó myâng shoq ga, Yesuq lai ló râ hkyô hí shut din ê mù, hkohúm gâm htoq má ê doq zung tô ri.

⁵ Yesuq gi, haú jowò má jé jáng, tu wú kat luí, "Zake ê, hân gyó lô aq; hkû-nyí ngò náng yhûm má bíng râ nghut lhê." ga taí ri.

⁶ Haú jáng, Zake gi, hân hân gyó ló mù, gabú dik é èq Yesuq lé lhom hkulum yu ri.

⁷ Haú má nyi bang banshoq gi, haú lé myàng jáng, "Yhang gi, yubak dap sù rayuq chyáng bíng kut râ ga wang e ló bê." ga luí, mara hûn dang taí nyi bum akô.

⁸ Zake kúm gi, toq yap mù, "Yhumsîng Yesuq ê, ngò wó é

sutzè rawuí gû myùng bang lé gàm byí pyám râ; ngò záng mop zô pyâm é byù rayuq yuq nyi le gi, myi tú dum tau byí râ." ga Yhumsîng Yesuq lé taí ri.

⁹ Haú hkûn, Yesuq gi, "Shí yuq le, Abraham é yhangzo* rayuq nghut é yanmai, hkûnyí shí yhûm má hkyi yù hkyô jé bê,

¹⁰ hkâsu mù gâ le, haú Byu Yhangzo gi, byuq byuq bê bang lé, hkat hô mù hkyi yù râ matú, jé lé sù nghut lhê." ga luí, Zake lé taí ri.

Hkohkam É Dui-nhâng Zoshâng Raxê Yuq

Mht 25:14-30

¹¹ Haú hkyô lé, yhangmoq gyô nyi bùm kô é hkûn, Yesuq gi, Yerusalem wà mó má jé râ chyâng lò bê nghut é yanmai le, Garai Gasâng é mingdán gi, radá dâm htoq shit lô berâ ga, byu pé myit ngam tô bùm kô é yanmai le, dangtú ralhum đông dum taí jat é gi,

¹² "Aróng wó sù byù rayuq gi, hkohkâm ayá é hkam yù luí, dum taú lò râ ga, wé é ming shut ê râ matú hen nyi ri.

¹³ Haú mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí joí ap byi luí, 'Ngò dum taú jé lô shoq, shi èq hpugá gá nyí láng keq.' ga luí, yhangmoq lé pying tô ri.

¹⁴ Yhâng é mingbyû wui kúm gi, yhang lé a ngui bum é nghut mù luí, yhang e ló é

htâng má, 'Shí yuq ngamoq ahtoq má up nyi râ lé, ngamoq a ô naù.' ga luí, ê taí râ matú lagyo châng nhang kat akô.

¹⁵ Nghut kôlhang, yhang kúm gi, hkohkâm ayá wó hkam yù luí, dum taú jé lô jáng, yhang ngùn ap byí tô é dui-nhâng zoshâng wui lé, hpugá gá luí, amyat hkâmyhó wó ho jat bê hkyô lé sé naù luí, yhangmoq lé wut nhang kat ri.

¹⁶ Haú hkûn, sâng-hi yuq gi, lé mù luí, 'Yhumsîng é, ngò, náng é ngùn rajoí mai, amyat raxê joí wó ho jat yù bê.' ga taí ri.

¹⁷ Haú hkûn, yhumsîng hpó gi, 'Arâ! Nghut bê, kyet é dui-nhâng zoshâng ê, náng gi, je tiq é mù má lhang wó lum é sù nghut é yanmai, wà raxê lé upzo lo aq hkoi.' ga luí, yhang lé taí ri.

¹⁸ Htang yuq le, lé mù luí, 'Yhumsîng é, ngò, náng é ngùn rajoí mai, amyat ngo joí wó ho jat yù bê.' gâ ri.

¹⁹ Yhumsîng gi, haú yuq lé, 'Nàng gi, wà ngo wâ lé up lo aq hkoi.' ga taí ri.

²⁰ Dum rayuq le, lé mù luí, 'Yhumsîng é, náng é ngùn rajoí lé a byuq shoq, ngò panchoq èq htup tô lhê; wú aq, shí nghut lhê.

²¹ Nàng gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é yanmai, nang lé ngò gyyuq ri.' ga taí ri.

* **19:9** Abraham é yhangzo nghù é lichyúm gi, Abraham su Garai Gasang lé lumjîng é sù lé gâ lhê.

22 Haú hkûn, yhumsîng gi, 'Agè ashop é dui-nhâng zoshâng ê, náng nhut mâ é dang eq rajung za, ngò, nang lé jéyáng râ nghut lhê. Ngò gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wuì nghut é hkyô lé, nàng sê to gù nghut le nhîng,

23 ngá ngûn lé, ngò dum taù jé lô jáng, aráng eq amyat wó yù shoq, ngùn hpùn kat jang má, haì mù a kat tô é lhú?' ga yhang lé taì ri.

24 Hau htâng, yhumsîng hpó gi, ayàm má yap tô é bang lé, 'Haù ngùn rajoí lé yhâng chyáng mai taù yù luì, raxê joí wó sù lé jat byi keq.' ga taì ri.

25 Haù bang gi, 'Yhumsîng ê, yhang gi, raxê joí wó to bê lé nhîng.' ga akô.

26 Haù jáng, yhang gi, 'Ngò, nungmoq lé taí kôlé, wó sù† ó yuq le, jat byi é hui shirâ nghut lhê; a wó su chyáng mai kúm gi, yhang wó tô é lé lháng, yu pyám byi shirâ nghut lhê.

27 Ahkuì, yhangmoq ahtoq má ngò hkohkâm kut râ lé a ô nau é, ngá é gyè pé lé, shí má shuí lé mù, ngá hí má sat pyám keq.' ga hkûnmó hkyô kat ri." gâ ri.

Yesuq Logúng Ji Mù, Yerusalem Wà Mó Shut Wang E Ló É Hkyô

Mht 21:1-11; Mrk 11:1-11; Yhn 12:12-19

28 Yesuq gi, shí hkyô pé lé ban taí jáng, hí má so luì,

Yerusalem wà mó shut doq ló nyi ri.

29 Yesuq gi, Yhâng é chángzô pé eq Tsanlun Bùm mâ é Bethpage wà eq Behtani wà má jé ló kojáng, Yhâng é chángzo í yuq lé,

30 "Nungnhik, hí mâ é wà má ê keq; wà haù má wang é hkûn jáng, ó le a jì wú shí é logúng zo tuì tô láng é lé, ê myâng kó râ nghut lhê; haù lé hpyi yù mù, Ngá chyáng she lò keq.

31 Byù rayuq yuq mai, 'Haù haì mù hpyi nyi akô?' ga nungnhik lé myi kôjáng, 'Shí du lé, haù Yhumsîng râ ri gâ.' nghu tù taí keq." ga pyîng luì, nhang kat ri.

32 Nhang kat é sù nhik ê jé lé, Yesuq taì kat é dông yhang, dut to láng é lé ê myang akô.

33 Yhangnhik logúng zo haù lé hpyi nyi kô é hkûn, yhumsîng wuì gi, "Haù logúng zo lé, haì mù hpyi nyi akô lhú?" ga luì, yhangnhik lé myi akô.

34 Haù jáng, yhangnhik gi, "Shí du lé haù Yhumsîng râ ri gâ." ga taì akô.

35 Yhangnhik gi, haù logúng zo lé Yesuq chyáng she lò mù, yhangmoq é buhîng pé lé logúng ahtoq má buì luì, Yesuq lé doq jì nhang akô.

36 Haù su kut, Yhang jì e lò nyi le, byu pé gi, yhangmoq é buhîng pé lé hkyô má hking byi akô.

37 Ahkuì, Tsanlun Bùm hkêgyó gyó ló é jowò eq chyáng lo é mai gi, chángzô

† 19:26 Wó sù nghu é gi, yhumsîng a-tsam lé rago dat chûng sù lé taì é nghut lhê.

pé banshoq bang, yhangmoq myang é laklai kumlhá pé é yanmai, gabú myit mai hté mó o mó eq Garai Gasang lé hky-a-on kô é dang gi,

38 "Haú Yhumsing é mying mai jé lé lo é hkohkâm gi, hkungsô wó nyí sháng gaq ô!✧ Mauhkûng htoq má, nguingón nyí sháng gaq ô!

Htoq tsáng myhâng má, Garai Gasang gi, hpungwup shingkang bo nyí sháng gaq ô!"

gâ akô.

39 Haú mù luí, haú byù hpûng hkaú má bo é Hparishe pé ra-am gi, "Sarâ ê, náng é chángzô pé lé tân pyám aq." ga luí, Yesuq lé taí akô.

40 Haú hkûn, Yesuq gi, "Ngò, nungmoq lé taí kôlé, shí bang zim za nyí kó é nghut le gi, luqgok pé garû lô râ nghut lhê." ga tú taí ri.

41 Ahkuí, Yesuq, Yerusalem wà mó eq chyâng lò luí, wà mó haú lé myàng jáng, haú wà mó é matú ngàu mù, taí é gi,

42 "Wà nàng ê! Hkû-nyí lhê é buinyì má, nguingón é hkyô lé nàng bûn sé tô é nghut le gi, gè râ wá! Ahkuí kúm gi, haú hkyô lé nghop to bê nghut mù luí, nàng a sé lo nghut ri.

43 Hkâsu mù gâ le, náng chyáng Garai Gasang lé kûm jé é hkûn, nàng a bun a sé wú kat é yanmai, náng é gyè pé gi, awui ayàm má gyewap xuq mù, náng é lhing hkyuq mai

nang lé lom tô é buinyì jé lô râ nghut lhê.

44 Haú hkûn, nang lé lhoq htên pyám luí, nung zo pé lé le, haú ahkaú má yhang dûn nhê pyet sat pyám bekô râ; nàng gi, luqgok racham htoq má racham lháng a kê lhum loshoq, dut byuq râ nghut lhê." gâ ri.

Yesuq, Noqkuq Yhûm Lé Sêng Pyám É Hkyô

Mht 21:12-17; Mrk 11:15-19; Yhn 2:13-22

45 Ahkuí, Yesuq gi, Yerusalem noqkuq yhûm má wàng mù, ung zo ung shuq é bang lé, "Ngá yhûm gi, kyûdung yhûm dut râ nghut lhê."✧ ga kâ to kôhang,

46 nungmoq gi, jowò shí lé 'damaq hkyûng'✧ kut akô." ga taí uchyang, hkat htoq pyám ri.

47 Yhang gi, nyí wuî no-qkuq yhûm má mhoqshit nyi ri. Hkyangjong agyì pé, tarâ sarâ pé eq, byu pé é suwún wuî kúm gi, Yhang lé wó sat pyám râ hkyô ho nyi akô.

48 Nghut kôhang, byù banshoq bang gi, Yhâng mhoqshit é dang lé gyo nau nyi kô é yanmai, wó sat râ hkyô lé, a myang hô kó nghut ri.

20

Yesuq É Ahko Ahkáng Lé Myî Chyam Wú É Hkyô

Mht 21:23-27; Mrk 11:27-33

1 Ra-nyí lé, Yesuq gi, no-qkuq yhûm wàng hkaú má,

byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sará pé, suwún wuî eq rahá kut, Yhâng chyáng lé jé kômù,

² "Hai ahko ahkâng eq Nàng shí pé lé kut nyi lhê lú? Ahko ahkáng shî, Nang lé ó yuq byî é lú? Ngamoq lé taî kyô wú aq." ga Yhang lé myî akô.

³ Haú hkûn, Yhang gi, "Ngò le, nungmoq lé rajung myî wú kôlé;

⁴ Yohan byî é baptisma gi, mauhkûng mai lú? A nghut jáng, byu chyáng mai lú? Ngo lé taî kyô wú keq?" ga yhangmoq lé myî ri.

⁵ Haú hkûn, yhangmoq chôm hpyê lhum kô é gi, "'Mauhkûng mai nghut lhê.', nghû nga-nhúng taí jáng le, 'Haî mù, yhang lé a lumjíng kô é lú?' ga râ nghut;

⁶ 'Byu chyáng mai nghut lhê.' nghû jáng le, shiwa byù banshoq gi, Yohan lé, myiqh-toi rayuq ga lumjíng to kô é yanmai, yhangmoq, nga-nhúng lé luqgok eq dú sat kó râ nghut." ga akô.

⁷ Haú mù, yhangmoq gi, "Hkâmai nghut é lé, ngamoq a sé." ga tú taî akô.

⁸ Yesuq gi, "Haú jáng, Ngò le, hai ahko ahkâng eq shí pé kut é hkyô lé, nungmoq lé a taî kyo." ga, yhangmoq lé taî ri.

Tsibiyiq Hkyâm Yhumsîng Eq Hkyâm Saí Zo Bang

Mht 21:3-46; Mrk 12:1-12

⁹ Byu pé lé, Yesuq dangtú đông xoq taî kyô é gi, "Byù

rayuq gi, tsibiyiq hkyâm ralhum saí to mù, hkyâm saí zo bâng chyáng ngho byî to luî, gó ming shut myáng myáng é nyi byuq ri.

¹⁰ Kyôshu yoq jé jáng, yhang gi, hkyâm saí zo bâng eq, hkyâm mâ é tsibiyiq shi pé lé lhom byî kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôlhang, hkyâm saí zo bang gi, haú yuq lé lhom bat mù, loq kôm taú nhang kat akô.

¹¹ Gotû dui-nhâng zoshâng rayuq lé, yhangmoq chyáng dum nhang kat ri. Nghut kôlhang, yhangmoq gi, haú yuq lé le, lhom bat mù, hoq lhoq hpu luî, loq kôm dum taú nhang kat akô.

¹² Sum yuq nghû râ dui-nhâng zoshâng lé dum nhang kat ri. Yhangmoq gi, haú yuq lé le bat cheq luî, hkyâm mai hkat htoq kat akô.

¹³ Haú hkûn, tsibiyiq hkyâm yhumsîng gi, 'Ngò hkâsu kut wú râ lú? Ngò chyitdap é ngá zo lé, nhang kat wú râ nghut ri. Yhang lé kúm gi, yhangmoq lhom hkungga kó abe.' ga taî ri.

¹⁴ Hkyâm saí zo bang gi, yhumsîng hpô é yhangzo lé myàng kôjáng, 'Shí yuq gi, silí wunlí sing yù râ sù nghut lhê; nga-nhúng, silí wunlí haú pé wó yù shoq, yhang lé sat pyám sháng.' ga rayuq eq rayuq taî lhùm bum akô.

¹⁵ Haú mù, yhang lé hkyâm shinggan shut dú htoq kômù, sat pyâm akô.

Haû su kut kôjáng, tsibiyiq hkyâm yhumsing gi, yhangmoq lé hkâsu kut râ l hú?

16 Yhang gi, ê mù, haû hkyâm saí zo bang lé sat pyám luí, hkyâm haû lé góbang lé htot ngho byí pyám râ nghut lhê." gâ ri.

Dang haú lé wó gyo bang gi, "Haû su gi, hkâ-nhám le a dut sháng gaq ô!" gâ akô.

17 Hau htâng, Yesuq gi, yhangmoq lé byu wú luí, "Haû jáng gi,

'Yhûm saí bâng eq hkyin htoq pyâm é luqgok gi, htungchyûn mâ é ahkyak dik é luqgok dut bê.^{1*}

ga Chyúmdang má kâ tô é gi, haí gá nau é nghut lhê l hú?

18 Luqgok* haú má gyó záng é sù ó yuq nghut kôle, gyuí gyop byuq râ nghut lhê. Luqgok hau eq gyó nhê záng é sù le, nhê pyeq pyâm é hui râ nghut lhê." ga tâ ri.

19 Tarâ sará pé eq hkyangjong agyi pé gi, dangtú shí gi, yhangmoq lé lhoq ang luí taí é hkyô lé, sé kô é yanmai, haú hkûn jáng l háng Yhang lé chyup yû râ matú hkyô ho nyi akô. Nghut kôlháng, byu pé lé gyuq mù a chyup shi kó nghut ri.

Kang Kat É Hkyô Eq Séng Luí Myí É Dang

Mht 22:15-22; Mrk 12:13-17

20 Haû mù, yhangmoq gi, Yesuq é dang má mara wó chyup yû shoq ga, gegùn

labyoq kut bang lé jowú nhang nyi akô. Haû gi, ahkáng ayá wó é mauzaû chyáng Yhang lé wó ap pyám râ matú nghut ri.

21 Haû jowú bang gi, "Sarâ ê, nàng gi, dǐng dǐng mán mán taí mhoqshit é eq, byu é myoqdong lé a tê byí é za, Garai Gasâng é hkyô lé, tengmán é dōng mhoqshit é sù nghut é lé, ngamoq sê lhê.

22 Hkoséng Kehtaq lé, ngamoq kang kat râ gi, tarâ wang lhê l hú? A wang é l hú?" ga luí, Yhang lé myí wú akô.

23 Nghut kôlháng, Yesuq gi, haú bâng é myit goí é hkyô lé sé mù luí, yhangmoq lé,

24 "Ngo lé, ngùn rachap tûn shit wú keq. Ó yuq é alhô eq masat laiká dap tô ri l hú?" ga myi jáng,

25 yhangmoq gi, "Kehtaq é nghut ri." ga akô.

Haú hkûn, Yesuq gi, "Haû nghut jang, Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga yhangmoq lé taí ri.

26 Yhangmoq gi, byu pé hí má, Yhâng é dang má mara a wó ho myang é eq, Yhang tû taí é dāng é yanmai, maú hong byuq kôluí, zim byuq akô.

Dum Dui Toq Lô Râ Hkyô Eq Séng Luí Myí É Dang

Mht 22:23-33; Mrk 12:18-27

27 Haú hkûn, haû dum dui toq hkyô a joq gâ é Saduke pé

* 20:17 Hkya-on 118:22 * 20:18 Luqgok nghu é gi, Yesuq lé taí ri.

ra-am gi, Yesuq chyáng lé jé kômù,

28 "Sarà ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kê to byi ri.

29 Hí hpyang lé, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri.

30 Lanong yuq le, yhangmang mó é chui lé gon mù, zo dù a dap é za shi ló byuq bê.

31 Hau htâng, Lalaq yuq mai Lahkâ yuq jé shoq, chuimó haú lé rayuq htâng rayuq dum gon gon kut kôlháng, zo dù a dap é chyat shi ló byuq bùm bekô nghut ri.

32 Ló htáng má, myiwe myhí haú le châng shi ló byuq bê nghut ri.

33 Haú mù luí, haú dum dui toq é buinyi má, myiwe myhí haú gi, haú nhiktâng wuì mâ é hkâ yuq é yhangmyi nghut râ lúhú? Hkâsu mù gâ le, yhang gi, haú nyhit yuq é yhangmyi dut wú bê sú nghut ri." ga luí, Yhang lé myi wú akô.

34 Haú hkûn, Yesuq gi, "Shí mingkan htoq mâ é byu pé gi, ikun kut é eq myi byi myi yù kut nyi bum akô.

35 Shi é mai dum dui toq râ eq, haú pyat má nyi râ gíng bâng é matú gi, ikun kut é eq myi byi myi yù hkyô joq lo râ

a nghut.

36 Haú bang gi, maumang lagyô pé su dut byuq luí, a dat shí lo kê râ nghut lhê. Yhangmoq gi, dum dui toq lô su é yhangzô pé† nghut é yanmai, Garai Gasâng é yhangzô pé nghut bekô.

37 Haú nyé duq nyi é mhanpúng eq séng luí, Mosheq eq kê tô é má lháng, Yhumsíng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.* ga bo tô é yanmai, shi é bang dum dui toq lô râ hkyô lé tûn shit to bê nghut ri.

38 Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gâ le, lhunglhâng bang gi, Garai Gasâng é hí má dui nyi é bang chyat nghut akô." ga yhangmoq lé tû taí ri.

39 Haú hkûn, tarâ sará pé ra-am gi, "Sarà ê, nàng taí é jô ri." ga akô.

40 Haú mù, yhangmoq gi, Yhang lé haí le a wám myi jat lo kó nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

41 Hau htâng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkâsu mù taí akô lúhú?

† 20:36 Dum dui toq lô su é yhangzô pé gâ é gi, Yesuq lé lumjíng luí, shi é htâng má dum dui toq lo é bang lé gâ lhê. * 20:37 Htoq Ló 3:6

21

*Chuimó Myhí Kat É Alu**Mrk 12:41-44*

¹ Yesuq tu wú kat é hkûn lé, noqkuq yhûm mâ é alu sidek má, wó bang alu kat nyi bùm kô é lé myang ri.

² Dum nghut jáng, gyi ht-
ingchap ngùn zo í chap za
kat é, myung é chuimó myhí
rayuq lé le myang ri.

³ Haû mù, Yhang gi, "Ngò,
nungmoq lé teng za tái kôlé,
shî myung é chuimó myhí gi,
góbang banshoq htoq má je
myo kat bê nghut ri.

⁴ Hkâsu mù gâ le, haû
góbang banshoq gi, yhumsîng
agùn agó wó é mâ é lé, lé kat
akô; yhang kúm gi, myùng sù
nghut kôlé, yhâng asak lé baú
ra ngùn lhunglhang lé kat bê
nghut ri." ga tái ri.

*Ló Htûm Buinyi Má Dut Lò
Râ Hkyô*

*Mht 24:1-21, 29-35; Mrk
13:1-19, 24-31*

⁵ Noqkuq yhûm lé, yúng
é luqgok pê èq le, alu
chyunghuq pê èq le, mhôn tô
ri ga, chángzô pé ra-am hkyâ-
ôn bùm kôjáng, Yesuq gi,

⁶ "Nungmoq myang nyi
é shí pé gi, luqgok rachâm
htoq racham lhang a kê lhum
loshoq, hpyoq hpyi pyâm é
buinyi jé râ nghut lhê." ga tái
ri.

⁷ Haû su ga jáng, yhang-
moq gi, "Sarâ ê, haû nghut
le gi, haú hkyô pé gi, hkâ-
nhâm dut lô râ lú? Haû dut
râ chyâng lò jáng, hkasû é

⁴²⁻⁴³ Dawiq yhang yhang
lhang gi, Hkya-on Kungtôn
Laikâ má,

'Haû Yhumsîng Garai gi, ngá
é Yhumsîng lé, "Ngò,
náng é gyè pé lé,

náng é hkyî nang tanghkuq
kut pyâm byî é hkyíng
jé shoq, Ngá é loqyo
hkyam[‡] shut zung nyi
shi aq." gâ ri.*

ga kê tô ri.

⁴⁴ Haû mù, Dawiq yhang
lhang, Hkrisduq lé, Yhumsîng
gâ é nghut le gi, Hkrisduq gi,
yhangzo za hkâsu ge nghut râ
lú?" ga tái ri.

*Tarâ Sará Pé Lé Sidiq Râ
Hkyô*

*Mht 23:1-36; Mrk 12:38-
40; Luk 11:37-54*

⁴⁵ Byù banshoq gyô nyi é u
lé, Yesuq, Yhâng é chángzô pé
lé tái é gi,

⁴⁶ "Tarâ sará pé lé sidiq nyi
keq. Yhangmoq gi, réng é
buhîng wut chûng mù, sô yông
wún luî, gai pé má hkunggâ é
èq shichyen râ lé le, tarajong
pé mâ é ahkyak dik é zùng
jang pé eq poí pé mâ é je réng
é zùng jowò pé má myang
zùng râ lé le, ô nau nyi bum
akô.

⁴⁷ Yhangmoq gi, chuimó pê
é yhûm-yò pé lé hpyoq zo
hpyoq shuq kôluî, kyû hîng
hîng dúng shit mhaû é bang
nghut akô. Haû sù é bang gi,
je riyhang htan é dông dam
byî é hui zo kó râ nghut lhê."
gâ ri.

[‡] 20:42-43 Loqyo hkyam nghu é gi, ahko ahkáng wó é jowò nghut lhê. ^{*} 20:42-43
Hkyâ-on 110:1

kumlhá htoq lô râ nghut lê lú?" ga, Yhang lé myí akô.

8 Haú hkûn, Yhang gi, "Nungmoq gi, hkyô shuí nghoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lê.' ga le, 'Ahkyíng chyâng lò bê.' ga le, Ngá myíng lé lêng é byù myo myo pô htoq lô kó râ nghut lê. Nghut kôlhang, nungmoq gi, yhangmoq htâng hkácháng kó.

9 Majan htoq é eq, gum-lau toq é hkyô lé, wó gyo kôjáng, hkâgyuq hkâ-kyúm kó, haú hkyô pé hí dut lò râ nghut lê. Nghut kôlhang, ló htâng é buinyi gi, haú hkûn jáng dut râ a nghut shi." ga taí ri.

10 Hau htâng, Yhang, yhangmoq lé dum taí é gi, "Ra-myú eq ra-myú, mingdán ralhum eq ralhum majan zân lhum lò kó râ nghut lê.

11 Jowò myo myo má, layàng mó nún lo é, noli nojàng myô lo é eq mutmó gyó lo é pé, dut lò râ nghut lê; gyuq chiq jung pé eq kumlhá mó le, mauhkûng htoq mai htoq shit lô râ nghut lê.

12 Nghut kôlhang, haú hkyô banshoq a dut shimá, Ngá myíng é yanmai, byu pé gi, nungmoq lé chyup yú lú, zing-rí yú mù, tarajong pé eq htóng pé má ap pyám kó râ nghut lê, hau htoq agó, nungmoq gi, hkohkam pé eq zau pé chyáng ê ap byí é le, hui kó râ nghut lê.

13 Haú su é pé mai, nungmoq gi, ngò eq séng lú, saksé wó hkám râ hkyô htoq lô berá nghut lê.

14 Nghut kôlhang, hkâsu nghu lhom tú taí râ hkyô lé, hí mai a myit wuí nyi râ lé, nungmoq myit hpyit to keq.

15 Hkâsu mù gâ le, nungmoq é gye pé lhunglhang bang, haí le a wó lhom tú taí loshoq, ngò, nungmoq lé dang eq hpaqchyí byi râ nghut lê.

16 Nghut kôlhang, nungmoq gi, ínu íwá pé, águ âmâng pé, mungmoq eq buinùm ji-myi wui eq lhang, ap pyám é hui kó râ nghut lê. Yhangmoq gi, nungmoq chyáng mâ é ra-am lé lhang, sat pyám kó râ nghut lê.

17 Byù lhunglhang bang gi, Ngá é yanmai, nungmoq lé a nguì kut kó râ nghut lê.

18 Nghut kôlhang, nungmoq é xâm rahkat lhang wó htên byuq râ a nghut.*

19 Nungmoq gi, wó jân é hkyô mai, asak lé wó yú kô râ nghut lê.

20 Yerusalem và mó lé gyé hpúng mó eq lóm tô é lé, nungmoq myàng jáng, và mó haú htên byuq râ ahkyíng chyâng lò bê lé, bûn sê nyi keq.

21 Haú hkûn lé, Yuda mau má nyi é bang gi, bùm pé shut hpang doq ló kó sháng gaq; haú và hkaú má nyi é bang le, hpang htoq kó sháng gaq; và tiq và zo pé má nyi é bang le, và hkaú shut a wàng kó sháng gaq.

* 21:18 Shí má gi, asak woi-nyí a shí râ hkyô lé taí é nghut lê.

22 Hkâsu mù gâ le, Chyúmdang má kê to má kê to banshoq dik lò râ matú, buinyi haú pé gi, mara dam byi é buinyi pé dut râ nghut lhê.

23 Haú buinyi pé má, zogûng dut é myiwe wui eq nau huq ashî nghut é înu wui gi, gyai yhang wuihke kê râ nghut lhê; hkâsu mù gâ le, shí ming ahtoq má wuihke mó eq, shí amyú ahtoq má Garai Gasang nhikmó-yô é jé lô râ nghut lhê.

24 Yhangmoq gi, sâm lham èq sat pyâm hui lhê eq, ming hkang ming mó má chyup shuí lô é le hui kó râ nghut lhê. Tungbaù pé lé byi tô é buinyi ahkying htang shoq, Yerusalem wà mó gi, tungbaù pé èq nâng zik tô é hui râ nghut lhê.

25 Haú hkûn, bui, kyî, lhamó pé má, kumlhá htoq shit râ nghut lhê. Wuishuq lung-aù mâ é wuihêng pé é mying é htê mó é yanmai, myigùng htoq má, byù myû chângjup gi, hkâsu kut râ a sé loshoq maú é eq myit wui myit hkê é hui bekô rá nghut lhê.

26 Byu pé gi, mingkan htoq má dut lò râ é hkyô pé lé, a jé shi mai myit gyuq kê é yanmai, moq byuq lô bùm kó râ nghut lhê; hkâsu mù gâ le, mauhkûng mâ é wum-o a-tsam pé gi, lhoq nhûn é hui bùm kê râ nghut lhê.

27 Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shinggang mó eq

le, gyó lé lo é lé, yhangmoq byu-myàng kó râ nghut lhê.

28 Haú hkyô pé dut hi lò jáng, ulhum tû mù wú kat keq, hkâsu mù gâ le, nungmoq lé hkyi yù râ buinyi gi, chyâng lò bê nghut ri." gâ ri.

29 Yhang, yhangmoq lé dangtú dông xoq taí é gi, "Maihpáng gâm eq sikhgâm banshoq lé wú wú keq.

30 Sikbu nyún lo é lé myàng jáng, bui nyé nám chyâng lò bê ga luí, nungmoq yhang dat wú sê akô.

31 Haú eq rajung za, haú hkyô pé dut nyi é lé, nungmoq myàng kôjáng, Garai Gasang é mingdán gi, chyâng bê nghut é hkyô lé, nungmoq sé lo keq.

32 Ngò, nungmoq lé teng za taí kôlé, shí pyat mâ é byu pé a ban shi byuq shimá, haú hkyô pé banshoq dut byuq râ nghut lhê.

33 Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyi râ nghut lhê.

34 "Nghut kôlhang, zo myo shuq myô é, î shuq wut é, mingkan htoq má é myit wui myit hkê é pé èq, nungmoq é i-myit wò laí nyi luí, haú ngò jé lé é buinyi gi, lhaí bik lo é su, nungmoq ahtoq má byodàn tung a jé lò sháng gaq, sidiq nyi keq.

35 Hkâsu mù gâ le, buinyi haú gi, mingkan htoq má nyi é byù banshoq bâng é ahtoq má, haú su jé lô râ nghut lhê.

36 Haú mù luí, haú dut lò râ hkyô banshoq mai,

nungmoq wó lut lai mù, haù Byu Yhangzô é hí má, wó yap gîng é bang dut sháng gaq, hkâ-nhám le kyûdung luí, ahkyíng hkangmó má machya nyi keq." gâ ri.

³⁷ Yesuq gi, nyí wuî noqkuq yhûm má mhoqshit nyí luí, myìn wuî Tsanlun Bùm gâ é bùm shut htoq ê mù, ê nyi to to kut ri.

³⁸ Byù banshoq bang gi, Yhang mhoqshit é dang gyo râ ga, napsûn noq noq mai noqkuq yhûm má jé lé bum akô nghut ri.

22

Yesuq Lé, Yudaq Êq Ung Zô É Hkyô

Mht 26:1-5,14,16; Mrk 14:1-2, 10-11; Yhn 11:45-53

¹ Ahkuí, Lhoqlhai Poí gâ é Azuma (múnchi a kat é Muk Zo Poí) jé râ chyâng lò bê.

² Haù mù, hkyangjong agyi pé eq tarâ sará pé gi, Yesuq lé hkâsu kut wó sat pyám râ hkyô, ho nyi akô; hkâsu mù gâ le, yhangmoq gi, mingbyû wuì lé gyuq bùm kô é yanmai nghut ri.

³ Haù hkûn, lagyo raxe í yuq má bo é Iskarut gâ é Yudaq chyáng Tsadán wàng mù luí,

⁴ yhang gi, htoq ê mù Yesuq lé hkâsu kut ap pyám râ hkyô lé hkyangjong agyi pé, noqkuq yhûm zúng é gyezau pé eq, ê hpyê ri.

⁵ Haù mù, yhangmoq gi, gyô nguì luí, Yudaq lé ngùn byi râ hkyô myit hui bekô.

⁶ Yudaq le hap yù luí, byù hpúng má a nghut é hkûn, Yesuq lé ap pyám râ hkyô ho nyi bê nghut ri.

Lhoqlhai Poí Lé Món É Hkyô

Mht 26:17-30; Mrk 14:12-26; Yhn 13:21-30

⁷ Ahkuí, haù Lhoqlhai Poí mâ é sauzo shigu hkungga sat nhông byi râ é Azuma buinyi jé bê.

⁸ Haù hkûn, Yesuq gi, Petruq eq Yohan lé, "Nga-nhúng zo râ matú Lhoqlhai Poí ê món lánng keq." ga luí, nhang kat ri.

⁹ Haù nhik gi, "Hkâmá é món to nhâng nau ri l hú?" ga luí, Yhang lé myí akô.

¹⁰ Haù hkûn, Yesuq gi, "Nungnhik, myuq hkaù shut wang e ló le wuì yambú waq é byù rayuq lhom hui râ nghut lhê; haù yuq chyáng châng ló luí, yhang wang ló é yhûm má châng wàng mù,

¹¹ yhumsíng lé, 'Ngò Ngá é chángzô pé eq rahá, Lhoqlhai Poí zo râ bíng wap hkâmá nghut lhê l hú ga, Sará myí nhang kat ri.' nghû tái keq.

¹² Haù hkûn, hen tô é ahtoq mâ é wap mó lé, nungnhik lé lhom tún shit râ nghut lhê; wap haù má é món to keq." ga tái kat ri.

¹³ Haù chángzo nhik htoq e ló le, Yesuq tái kat é eq roq za é myâng kômù, Lhoqlhai Poí lé món to bekô nghut ri.

Yhumsing É Myinzang

¹⁴ Ahkuí, ahkyíng jé jáng, Yesuq eq Yhâng é chángzô pé

rahá za zohpoq má zung tô akô.

¹⁵ Haú hkûn, Yesuq gi, "Ngò wúhke jamjau hpuzô é a hui shi má, Lhoqlhai Poî shî lé nungmoq eq rahá zo râ lé, Ngò gyai ô nau nyi lhê.

¹⁶ Hkâsu mù gâ le, ngò, nungmoq lé taí kôlé, Garai Gasâng é mingdán má poî shî a ló dik dik gi, ngò haú lé dum zo râ a nghut ló." ga luí, yhangmoq lé taí ri.

¹⁷ Hau htâng, Yesuq gi, góm lé yù mù jeju ban hkya-on jáng, "Góm shî lé yù luí, nungmoq yhangchang gàm shuq lhum keq.

¹⁸ Ngò, nungmoq lé taí kôlé, ahkuí mai gi, Ngò, Garai Gasâng é mingdán a jé jé tsibiyiq wing lé dum shuq râ a nghut lo." ga taí ri.

¹⁹ Hau htâng, Yhang gi, muk lé yù mù, jeju hkya-on luí, muklé myhik hpé mù, yhangmoq lé byi uchyang, "Shî gi, nungmoq é matú byí pyâm é, Ngá é gungdu nghut lhê; Ngo lé bûn nyi râ matú, shî su kut nyi keq." ga taí ri.

²⁰ Haú eq rajung za, myin-zang ban zô jáng, góm lé le yù mù, "Góm shî gi, nungmoq é matú htoq pyâm é, Ngá é sui má xuq tô é dangshikaq asik nghut lhê.

²¹ Nghut kôlhang, wú keq, Ngo lé ap pyám râ sù gi, zang bó shî má ngò eq rahá nyi tô ri.

²² Haú Byu Yhangzo gi, hkyin to huí é eq rajung za shî râ nghut lhê; nghut kôlhang, Yhang lé ap pyâm é sù gi, dingnyé wó ri." ga taí ri.

²³ Haú su ga jáng, lagyô pé gi, yhangmoq má shí hkyô kut râ sù gi, hká yuq nghut râ lhu ga, rayuq eq rayuq myí lhum bum akô.

²⁴ Haú htoq agó, yhangmoq mâ é hká yuq sheq je kô lhê lhu ga le, rayuq eq rayuq taí htîng lhûm bum akô.

²⁵ Haú mù luí, Yesuq gi, "Tûngbaù pé é hkohkam pé gi, yhangmoq byù myû pé é ahtoq má up zô nyi kô é nghut luí, byu pé gi, ahkáng ayá wó é bang lé jeju yhumsing pé ga luí, taí hkungga nyi bum akô.

²⁶ Nungmoq kúm gi, haú su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyi sháng gaq.

²⁷ Hká yuq sheq je kô lhê lhu? Zô zung nyi sù lhu? Haú a nghut jáng, saí tsô é sù lhu? Zô zung nyi é sù sheq nghut ri. Nghut kôlhang, ngò gi, nungmoq má é saí tso sù su za nghut nyi lhê.

²⁸ Nungmoq kúm gi, Ngò jamjau huí nyi le, Ngò eq rahá nyi nyi é bang nghut nyi akô.

²⁹ Haú su mù, Ngá wa gi, Ngo lé, mingdán ap byí é su, Ngò le, nungmoq lé mingdán ap byi râ nghut lhê.

³⁰ Haú mù, Ngá é mingdán mâ é, Ngá é zangbó má, nungmoq wó zo kó râ nghut lhê; nungmoq le hkohkâm-tanghkuq má zung to mù, Israelaq amyû raxe í hú lé jéyáng kó râ nghut lhê.

Yesuq Lé, Petruq (Simun)

He-ngik Pyâm Râ Hkyô

Mht 26:31-35; Mrk 14:27-31; Yhn 13:36-38

³¹ Simun, Simun ê, wú aq, sungsô cham lé shaí é su, nungmoq lé wó shaí shoq ga, Tsadán wá gi, ahkáng dung bê.

³² Nghut kôlhang, náng é lumjínng myit a hten sháng gaq nghû, Ngò, náng é matú kyûdung byi bê; náng dum lhing bún lò jáng, nung gu nung mâng pé lé wum-o lhoq ging byi aq." ga tai ri.

³³ Haú hkûn, Simun gi, "Yhumsîng ê, htóng wâng kôlhang, shî kôlhang, ngò gi, nàng eq rahá cháng râ matú myit hpyit to bê." ga tû tai ri.

³⁴ Yesuq gi, "Petruq ê, nang lé Ngò tai lé, hkû-nyî* lhang woq a tân shi má, nàng, Ngo lé a sé ga luí sum dâm he-ngik pyám râ nghut lhê." ga tai ri.

³⁵ Hau htâng, Yesuq, yhangmoq lé tai é gi, "Ngò, nungmoq lé ngunhtûng, jhtûng, hkyî-tsung a wùn a chûng nhang é za, nhang kat é nghut hkûn, nungmoq chyáng haí ra akô lú?" ga myi jáng, yhangmoq gi, "Haí le a ra lo." ga tai akô.

³⁶ Haú hkûn, Yhang gi, "Ahkuí kúm gi, ngunhtûng wó sù gi, yù wun sháng gaq, jhtûng wó sù le, yù wùn sháng gaq, shâm a wó sù gi, bumó ung luí wui sháng gaq.

³⁷ Hkâsu mù gâ le, Ngò, nungmoq lé tai kôlé, Ngò eq

séng luí Chyúmdang má kê tô é gi, dut lò berâ nghut lhê; 'Hau yuq gi, yubak mara wó bang má nghap lhôm to bê.[†] ga kê tô é dang gi, Ngá chyáng dik lò râ nghut lhê." ga luí, yhangmoq lé tai ri.

³⁸ Haú mù, lagyô pé gi, "Yhumsîng ê, wú aq, shí má shâm í hkyam joq tô ri." ga tai kôjáng, Yesuq gi, "Gé bê." ga luí, yhangmoq lé tai ri.

Tsanlun Bùm Má Yesuq Kyûdung É Hkyô

Mht 26:36-46; Mrk 14:32-42

³⁹ Ahkuí, Yesuq gi, htoq luí, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé le Yhang htâng châng e ló akô.

⁴⁰ Haú jowò má jé jáng, Yhang gi, "Nungmoq, gunglau é a hui sháng gaq, kyûdung nyi keq." ga luí, yhangmoq lé tai to mù,

⁴¹ chángzô pé nyi é mai luq-gok radú we kô gâng e ló luí, hkyihput htuq mù,

⁴² "Áwa ê, Náng ô nau é nghut le gi, góm[†] shî lé Ngá chyáng mai lhai pyám byi laq. Nghut kôlhang, Ngò ô nau é đông a nghut, Nàng ô é đông sheq nghut sháng gaq." ga kyûdung ri.

⁴³ Haú hkûn, mauhkûng mai maumang lagyo rayuq htoq lé luí, Yhang lé i-myt nhik lé tai tîng ri.

* **22:34** Yudaq byu pé é ra-nyî gi, myinhâng búi wang é mai, htang nyi búi wang é jé shoq nghut lhê. Shî má é *hkû-nyî* gi, nga-nhûng é matú myin âng ri. [†] **22:37** Esai 53:12 [†] **22:42** góm gâ é gi, Yesuq jamjau hui râ hkyô eq shî râ hkyô lé, tai nau é nghut lhê.

44 I-myt hkaû má dik shoq hkâm zo wuî é yanmai, Yhang je riyhang kyûdung wum kat nyi ri; Yhâng é buibù le, sui hkyí sui pat su myigùng má yui gyó ri.

45 Haû mù, kyû ban dung jáng, Yhang toq luî, chángzô pê chyáng ló wú le, yhangmoq gi, myit yón mù luî, yhup myhî to kô é lé ló myâng mù,

46 "Haî mù yhup nyi akô lhú? Toqkeq! Gunglaú é a hui sháng gaq, kyûdûng nyi keq." ga luî, yhangmoq lé taî ri.

Yesuq Lé Chyup É Hkyô

Mht 26:47-56; Mrk 14:43-50; Yhn 18:3-11

47 Haû su ga, ru taî nyi ashî le, wú keq, haû chángzo raxe í yuq má bo é Yudaq gi, hkyô hí mù byù rajùm rayò lé shuî lé lô luî, yhang gi, Yesuq lé bopuq puq râ ga huî lé lo ri.

48 Haû mù luî, Yesuq gi, "Yudaq ê, nàng gi, haû Byu Yhangzo lé bopuq puq é èq gyè pê chyáng ap pyâm lhé lhú?" ga luî, yhang lé lhom myî ri.

49 Haú hkûn, Yesuq htâng cháng bang gi, haî dut lò râ lé bûn sé kô é yanmai, "Yhumsîng ê, ngamoq gi, sham èq zân le, gè râ lhú?" ga myî akô.

50 Yhangmoq chyáng mâ é rayuq gi, hkyangjong mó é dui-nhâng zoshâng lé zân kat luî, yhâng é loqyo nohkyap byit byuq bê nghut ri.

51 Yesuq kúm gi, "Gé bê. Yhangmoq ô nau é su nghut

kó sháng gaq." ga tû taî mù, haú yuq é nohkyap lé ê záng luî lhoq gê byî ri.

52 Yesuq gi, Yhang lé chyup râ ga jé lé é hkyangjong agyi pé, noqkuq yhùm zúng é zau pé eq agyi suwún wuî lé, "Nungmoq gi, damyaq rayuq lé chyup é su, shâm, dumbáng eq kut luî, lé lo akô lhú?

53 Ngò gi, nyí wuî, noqkuq yhùm má nungmoq eq rahá nyi kôhang, nungmoq Ngo lé chyup yû râ ga a hen wú kó; ahkuî gi, mauchut èq up[‡] nyi bê yanmai, nungmoq é ahkyíng nghut nyi ri." ga taî ri.

Yesuq Lé, Petruq Èq Hengik Pyâm É Hkyô

Mht 26:57-58, 67-75; Mrk 14:53-54, 66-72; Yhn 18:12-18, 25-27

54 Haú hkûn, yhangmoq gi, Yhang lé chyup yû mù she lò luî, hkyangjong mó é yhùm shut shuî wang ló akô. Petruq le we we mai châng tô ri.

55 Ahkuî, yhangmoq gi, wàng hkaû má myi mut yû luî zung tô bum é hkûn, Petruq le yhangmoq é ahkaû má bo tô ri.

56 Langchyáng myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luî, "Shí yuq le Yesuq eq rahá nyi sù nghut ri." ga taî ri.

57 Haú hkûn, Petruq gi, "Myiwe myhí ê, nàng taî é sú lé, ngò a sé." ga he pyâm ri.

58 Hau htâng hkâ-myháng a myáng má, byù rayuq gi,

[‡] 22:53 Mauchut èq up gâ é gi, Tsadán èq up é lé gâ ri.

yang lé dum myàng luí, "Nàng le yangmoq chyáng bo nyi sù nghut ri." ga tái kat jáng, Petruq gi, "Byù hpó ê, ngò a nghut." ga tũ tái ri.

⁵⁹ Hkyíng hkum rahkum kô myáng jáng, rayuq le, "Gè gè yang, shí yuq gi, Yang eq rahá nyi wún sù nghut ri; hái mù gâ le, yang gi, Galile byù le nghut ri." ga zuq zuq tái ri.

⁶⁰ Petruq gi, "Byù hpó ê, nàng tái nyi é hkyô lé, ngò a sé." ga tũ tái ri. Haũ su ga ru tái nyi ashî le, woq tũn bê nghut ri.

⁶¹ Haũ hkũn, Yesuq gi, lhíng luí, Petruq lé wú kat ri. Haũ mù, Petruq gi, "Hkũ-nyí lháng, woq a tũn shi má, nàng Ngo lé sum dâm he pyám rã nghut lhê." ga luí, Yhumsíng yang lé tái é dang lé bũn kat ri.

⁶² Haũ mù, yang gi, shinggan shut htoq ê luí, gyai yang ê ngau nyi ri.

Gyezô Pé Yesuq Lé Rhoi É Hkyô

⁶³ Yesuq lé zúng nyi é bang gi, Yang lé rhoi luí nghap myíng nghap htê mu nyi akô.

⁶⁴ Yangmoq gi, Yhâng é myoqdong nghop pyám byi luí, "Nang lé bat sũ gi, ó yuq nghut ri lúhú? Myiqhtoi htoí wú aq." ga myí akô.

⁶⁵ Yangmoq gi, Yang lé nyhap é dang ajung jung đông tái rhoi nyi akô.

Suwún Wui É Hí Má Yesuq Jé Nyi É Hkyô

Mht 26:59-66; Mrk 14:55-64; Yhn 18:19-24

⁶⁶ Napkyó myoqmyàng jáng, mingbyũ wui é suwún hpúng bang eq rahá, hkyangjong agyi pé, tarã sará pé, zup hpong kut nyi é má, Yesuq lé shuí ê mù,

⁶⁷ "Nàng Hkrisduq nghut é têng le gi, ngamoq lé tái kyo laq." gâ akô.

Yesuq gi, "Ngò gi, Hkrisduq nghut lhê ngũ tái kôlhang, nungmoq jíng kó rã a nghut.

⁶⁸ Ngò, nungmoq lé myi kôlhang, nungmoq gi, tũ tái kó rã a nghut.

⁶⁹ Nghut kôlhang, ahkuí mai haũ Byu Yangzo gi, a-tsam bo dik é Garai Gasâng é loqyò hkyam má wó zung nyi berã nghut lhê." ga luí, yangmoq lé tái ri.

⁷⁰ Haũ hkũn, yangmoq banshoq bang gi, "Haũ nghut le gi, Nàng, Garai Gasâng é Yangzo nghut lhê lúhú?" ga myí akô.

Yesuq gi, "Nungmoq tái é eq rajung za Ngò nghut lhê." ga luí, yangmoq lé tái tái ri.

⁷¹ Haũ hkũn, yangmoq gi, "Nga-nhúng hái jung saksé wã rã nyi ashî lúhú? Yhâng é nhut mai yang, tái htoq kat é dang lé, nga-nhúng wó gyo bê nghut lhê." ga akô.

23

Yesuq Lé Mara Hun É Hkyô
Mht 27:1-2, 11-14; Mrk 15:1-5; Yhn 18:28-38

¹ Haũ hkũn, zup zíng tô é bang banshoq gi, htoq mù, Yesuq lé mauzau Pilat chyáng shuí wang é luí,

² "Shí yuq gi, mingbyû wui lé hkyô shuí nghoq é eq, hkoséng Kehtaq chyáng kang kat râ hkyô lé le hkûm to luí, Yhânggùng yhang gi, haû Hkrisduq nghû é hkohkâm nghut lhê ga luí, taí nyi é lé ngamoq myang ri." ga luí, Yhang lé mara hun akô.

³ Haû hkûn, Pilat gi, Yesuq lé, "Nàng gi, Yudaq byu pê é hkohkâm nghut lhê lúhú?" ga myi jáng, Yesuq gi, "Nàng taí é eq rajung za nghut lhê." ga tû taí ri.

⁴ Pilat gi, "Shí yuq lé hûn râ mara ngò a myàng." ga luí, hkyangjong agyi pé eq shiwa byu pé lé taí ri.

⁵ Nghut kôlhang, haû bang gi, "Shí yuq gi, Yuda mau gón má yhang mhoqshit é dông mai, mingbyû wui é i-myit lé shuí gabyông ri. Haû gi, Galile mau mai ahkuí shí má jé shoq nghut bê nghut ri." ga zuq zuq taí bum akô.

⁶ Pilat gi, haû su ga kô é lé wó gyo jáng, Yesuq Galile byù nghut é, a nghut é hkyô lé myí wú ri.

⁷ Yesuq gi, Herut up é mau mâ é byù nghut é lé Pilat sé jáng, haû u lé Yerusalem wà mó má nyi tô é Herut chyáng, é dé kat nhang ri.

⁸ Herut gi, Yesuq lé myàng jáng, gyai yhang gabú pyâm ri. Hkâsu mù gà le, Yhâng é hkyô lé wó gyô wú mù, Yhang laklaí kumlhá ralhûm lhûm kut shit râ lé, wó myàng shoq ga, myit myoqbyu nyi é nghut luí, Yhang lé myàng nau é gyai yhang myáng bê nghut ri.

⁹ Haû mù, yhang gi, Yesuq lé dangmyi myo myô èq myí wú kôlhang, Yesuq gi, dang rahkun lhâng a tû taí byi nghut ri.

¹⁰ Hkyangjong agyi pé eq tarâ sará pé gi, yap to mù, Yhang lé mara gyai yhang chôm hun akô.

¹¹ Herut eq yhâng é gyezô pé gi, Yesuq lé rhoi jihkyoi kut mù, atam é dông taí hpoi kô luí, réng é mebu hut byi mù, Pilat chyáng dum taú dé nhang kat akô.

¹² Haû nyí jáng, hí hpyang gyè dut lhûm é Herut eq Pilat gi, buinûm dut byuq bekô nghut ri.

*Yesuq Lé Sat Râ Matú Do-
qdân É Hkyô*

Mht 27:15-26; Mrk 15:6-15; Yhn 18:39-19:16

¹³ Haû hkûn, Pilat gi, hkyangjong agyi pé eq zau suwún wui, mingbyû wui lé wut tsing to mù,

¹⁴ "Shí yuq gi, mingbyû wui lé hkyô shuí nghoq ri ga, Yhang lé nungmoq ngá chyáng shuí lé lô bekô. Ahkuí, wú keq, nungmoq é hí má, Yhang lé ngò myí wú le, Yhang má nungmoq hun é mara lé ngò a myàng nghut ri.

¹⁵ Hau htoq agó, Herut le, hai mara le a myàng mù, shí yuq lé nga-nhûng chyáng dum dé kat byi bê nghut ri; haû mù luí, wú keq, shí yuq gi, shí gíng é mara hái le a kut shut nghut ri.

16 Haû mù, ngò, Yhang lé dam byi luí, nhang pyám rà." ga luí, yhangmoq lé taí ri.

17 Nghut kôlhang, Lhoqlhai Poí hkanmó má, Pilat gi, mingbyû wuì lé htongbyû rayuq yuq nhang kat byi byi kut é yanmai,

18 yhangmoq banshoq bang gi, "Shí yuq lé gi, yû pyám aq; Barabaq lé kúm gi, nhang kat byi laq." ga luí, chôm wut garu bum akô.

19 Barabaq gi, wà htum má gumlau kut é eq byû sat é yanmai, htóng gyó nyí sù nghut ri.

20 Pilat gi, Yesuq lé nhang pyám nau é nghut mù luí, yhangmoq lé dum puq taí ri.

21 Nghut kôlhang, yhangmoq gi, "Yhang lé tapzîng má jén tap pyám aq, jén tap pyám aq!" ga luí, wut taí garû nyi bum akô.

22 Haû mù luí, sum dâm nghû rá hkûn, Pilat dum taí é gi, "Haí mù luí lhú? Yhang gi, hai mara kut shut bê lhú? Yhang má shî gíng é mara lé ngò a myàng, haû mù, ngò, Yhang lé bat, nhuq, mhoqshit luí, nhang pyám rà." ga luí, yhangmoq lé taí ri.

23 Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dúng wut nyi akô nghut é yanmai, wó taí ung yù bekô nghut ri.

24 Haû mù luí, Pilat gi, yhangmoq dúng é eq rajung za myit hpyit doqdan byí ri.

25 Haû su mù, yhang gi, yhangmoq dúng é eq rajung za, wà htum má gumlau kut é eq byû sat é mai, htóng gyó nyí sù lé nhang kat byi luí; Yesuq lé gi, yhangmoq ô nau é dông ap byi kat bê nghut ri.

Yesuq Lé Tapzîng Htoq Má Jén Tap É Hkyô

Mht 27:31-44; Mrk 15:21-32; Yhn 19:17-27

26 Yhangmoq gi, Yesuq lé shuî htoq ló kô é hkûn, yosô wà mai lo é, Kuruni myuq byû nghut é Simun ga sù lé, chyup yû mù, tapzîng waq nhâng luí, Yesuq htâng má châng nhang akô.

27 Byû rajùm rayò gi, Yhang htâng má châng e ló bum akô. Yhang é yanmai ngaubyi ngàu nhap eq iyon yôn é myiwe zo wuì le haú má bo tô ri.

28 Yesuq gi, yhangmoq shut lêng wú luí, "Yerusalem byizo wuì ê, Ngá é yanmai hkâ-ngau nyi kó, nungmoq gi, yhumsing gùng eq yhumsing é zo dù wuì é matú sheq ngau nyi keq.

29 Hkâsu mù gâ le, 'Zogûng a dut wú é eq nau a huq wú é baùdung myhí pé gi, hkungsô wó nyi ri.' ga luí, taí é buinyi gi, jé lô rà nghut lhê.

30 Haú buinyi má, byu pé gi, bùm pé lé,

'Ngamoq ahtoq má byoq nhé aq!'

ga luí le, kong pé lé,

'Ngamoq ahtoq má nghop aq!'

ga luí le, wut taí bùm bekô râ nghut lhê.

³¹ Byu pé gi, sikgâm jûm tô ashí le isu kut kô é nghut le gi, màn jáng gi, hkâsu wá dut lò râ lúhú?" ga taí ri.

³² Haú hkûn, damyaq í yuq lé le, sat pyám râ ga, Yesuq eq rahá shuí htoq ló akô.

³³ Ahkuí, Ugyap nghu é kong má jé jáng, Yesuq lé tapzîng htoq má jén tap tô é hkûn, damyaq í yuq lé le, loqpai loqyò shut kut luí tapzîng má jén tap tô akô.

³⁴ Haú hkûn, Yesuq gi, "Âwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyô lé yhangmoq a sé kó nghut ri." ga taí ri. Gyezô pé gi, Yhâng é mebu pé lé lhang, hkyîn shosé she é dông gam yu pyám byi akô.

³⁵ Mingbyû wuì gi, yap to mù tu wú nyi akô. Zau suwún wuì Yhang lé nyhap é gi, "Yhang gi, byù góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gaq." ga akô.

³⁶ Gyezô pé le, huí ê mù, rhoí nyaú nyaú akô. Yhangmoq gi, chyîn wing lé yhun byi kôluí,

³⁷ "Nàng gi, Yudaq byu pé é hkohkâm nghut é nghut le gi, Náng gùng yhang nang, hkyi yu wú aq." ga Yhang lé taí akô.

³⁸ Yhâng é ulhum ahtoq má le, (Grik dông le, Latin dông le, Hebre dông le) "SHÍ YUQ GI, YUDAQ BYU PÊ É HKOHKÂM." gâ é laiká kâ tap tô akô.

³⁹ Tapzîng htoq má bat tap lhang to huí é damyaq rayuq gi, "Nàng gi, Hkrisduq nghut lhê, a nghut lúhú? Haú Náng gùng nang le, ngá-nhik lé le, hkyi yu aq." ga luí, Yhang lé rhoí ri.

⁴⁰ Damyaq góyuq sù kúm gi, "Nàng le shí yuq eq rajung za jén tô é hui luí nhîng, Garai Gasang lé a gyuq lúhú?

⁴¹ Nga-nhik gi, yhumsîng kut shut é mara eq rajung za, jéyáng hui zo gíng é sù nhik nghut lhê; shí yuq kúm gi, hai mara lé kut shut wú sù a nghut." ga luí, haú yuq lé tân kat ri.

⁴² Hau htâng, yhang Yesuq lé taí é gi, "Yesuq ê, Nàng, Náng é mingdán má jé ló jáng, ngo lé myit bun laq ô." gâ ri.

⁴³ Haú hkûn, Yesuq gi, "Ngò, nang lé teng za taí lé, hkûnyí yhang nang Ngò eq rahá hparadisu* má nyi râ nghut lhê." ga luí, yhang lé tû taí kat ri.

Yesuq Soqkang Byit É Hkyô Mht 27:45-56; Mrk 15:33-41; Yhn 19:28-30

⁴⁴ Haú ahkyíng gi, nyí káng raxe í hkyíng nghut luí, myinhtâng sum hkyíng jé shoq ramau gón mauchut tuq dut byuq bê nghut ri;†

* 23:43 Hparadisu nghu é gi, mauhkûng mingdán lé taí ri. † 23:44 Nga-nhùng é nyí káng raxe í hkyíng gi, Yudaq byu pé é napkyó hkyuq hkyíng nghut lhê; yhangmoq é gau hkyíng gi, nga-nhùng é myinhtâng sum hkyíng nghut bê.

45 hkâsu mù gâ le, builoq shum byuq é yanmai nghut ri. Noqkuq yhûm mâ é pân-gyang le, í hkyam byáng dut byuq bê nghut ri.

46 Haú hkûn, Yesuq gi, "Áwa ê, Ngò, Ngá é woi-nyí náng é loq má ap byî lhê." ga htê mó èq garû kat ri. Haú su ga ban táí eq, Yhang kâng byit bê nghut ri.

47 Shô up gyezau hpó gi, haú su dut é lé myàng jáng, "Shí yuq gi, gè gè yhang, dingmán sù nghut ri." ga luí, Garai Gasang lé hkyá-on kungton ri.

48 Haú hkyô lé wú râ ga, lé zîng tô é byù lhunglhâng bang le, haú su dut é hkyô pé lé myàng kôjáng, myit yón kôluí, wànggàng bat mù, dum taú ló byuq bekô.

49 Nghut kôlhâng, Yhang lé sê é bang eq Galile mau mai Yhang htâng châng é myiwe wùi gi, we we má yap to mù, haú hkyô pé lé byu wú nyi akô.

le, zui saí é hkyô má le, myit a bo huí lom é sù nghut ri.

52 Yhang gi, Pilat chyáng wàng luí, Yesuq é gungsôm lé dúng yu ri.

53 Haú mù, gungsôm haú lé tapzîng mai hkyut hkyô yù luí, pán yúng èq htup yup mù, ó lé lháng a kat wú shí é, luq-gok lé kyûng tô é luqgok lup hkaú má kat tô ri.

54 Haú nyí gi, Hên Lajang Buinyì nghut luí, Bánno buinyì jé râ za nghut bê.

55 Galile mau mai Yesuq eq rahá htoq lé lo é myiwe zo wuí le, Yosep htâng má châng ê luí, lup haú lé le, Yesuq é gungsôm lé le, hkâsu kut tô tô é lé, ê myang akô.

56 Hau htâng, yhangmoq gi, yhûm shut taú lò mù, Yesuq é gùng sôm lé but byi râ matú, namngón é jung eq mura xú lé hen tô akô. Bánno buinyì má kúm gi, tarâ joq é eq rajung za, yhangmoq yuban bán nyi bum akô nghut ri.

24

Yesuq É Màng Lé Lup Hkaú Má Kat É Hkyô

Mht 27:57-61; Mrk 15:42-47; Yhn 19:38-42

50 Haú hkûn, Yuda mau Aramahti gâ é myuq má, Yosep gâ é sù rayuq nyi ri. Haú yuq gi, nhik bo é sù eq dingmán é sù nghut é htoq agó, Garai Gasâng é mingdán jé râ hkyô lé myit myoqbyu to sù le, nghut mù luí,

51 yhang gi, Yudaq uphkâng hpúng mâ é rayuq nghut kôlhâng, hpyé lhûm é hkyô má

Yesuq, Dum Dui Toq É Hkyô

Mht 28:1-10; Mrk 16:1-8; Yhn 20:1-10

1 Bánno buinyì htang napsûn noq le, myiwe wùi gi, yhangmoq hen tô é namngón jung pé lé yu chûng mù, lup shut e ló akô.

2 Yhangmoq gi, lup mâ é luqhkum lêng bóng to lánng é lé, ê myâng kômù,

3 wang e wú kô le, haú Yhumsíng Yesuq é gungsôm lé, a myàng lo kó nghut ri.

4 Yhangmoq maú úng-âng nyi bùm kô é hkûn, radá dâm maulhap su duqbó é mebu wut é byù í yuq, yhangmoq é nàm má yap tô akô.

5 Haú mù, myiwe haú bang gi, gyuq dan bum kôluí, myigùng shut myoqdong ngóm gop tô bum é u lé, haú nhik gi, "Nungmoq gi, duì sù lé, shi to bâng chyáng haí mù ho nyi akô lúhú?"

6 Yesuq gi, shí má a nyi lo; Yhang duì toq lo bê! Yhang gi, nungmoq eq rahá Galile mau má nyi tô ashí hkûn lé,

7 'Haú Byu Yhangzo gi, yubak dap bâng é loq má ap pyâm é hui luí, tapzîng má jén sat to huí é htâng, sum nyí nghû é buinyi má lhoq duì toq yu é hui râ nghut lhê.' ga nungmoq lé taí tô é dang lé myit bun keq." ga luí, yhangmoq lé taí ri.

8 Haú hkûn, yhangmoq gi, Yesuq é dang lé bûn kat bekô nghut ri.

9 Yhangmoq gi, lup mai dum taú lò mù, lagyo raxe rayuq eq gotû lhunglhang bang lé, haú hkyô banshoq lo taí kyô akô.

10 Lagyo pé lé lo taí kyo bang gi, Magadalaq wà má é Mariq, Yoanaq, Yakuq é yhangnu Mariq eq, yhangmoq eq rahá nyi é myiwe góbang le nghut akô.

11 Lagyô pé kúm gi, yhangmoq é dang lé dangsôm su ngam pyám kôluí, a jîng byi kó nghut ri.

12 Nghut kôlhang, Petruq gi, toq luí lup má ðin jé ê mù

ngóm wú kat le, mâng htup é pán leq tô é lé za myàng mù luí, haú su dut é hkyô lé maú é èq, yhûm shut dum taú lò byuq bê nghut ri.

Chángzo Í Yuq Lé Yesuq Htoq Shit É Hkyô

Mrk 16:12-13

13 Haú ra-nyí má za, Yesuq é chángzô pé má é í yuq gi, Yerusalem wà mó mai nyhit déng kô wê é Ema-u gâ é wà shut e lô akô.

14 Yhangnhik gi, dut laí lô é hkyô pé banshoq lé, rayuq eq rayuq taí lhûm nyi akô.

15 Yhangnhik gi, haú hkyô pé lé rayuq eq rayuq taí hpyê lhûm e lô kô le, Yesuq gi, yhangnhik chyáng jé lé lô mù, yhangnhik eq rahá sô nyi ri.

16 Nghut kôlhang, yhangnhik gi, myoq hpuq hpuq pyám byí é hui kômù, Yhang lé a sê wú byuq kó nghut ri.

17 Hau hkûn, Yesuq gi, yhangnhik lé, "Nungnhik hkyô so uchyang taí lhûm lé lo é gi, haí jung wá nghut akô lúhú?" ga myi kat jáng, yhangnhik gi, myoqdong shûm kut luí, hkyíng yap tô akô.

18 Yhangnhik má é Hklupa gâ é sù gi, "Nàng gi, Yerusalem wà mó má lé bíng nyí luí nhîng, shí gyoro lé haú wà má dut lo é hkyô pé lé, a sê é bíng gi, Nàng baú za wá nghut lhê lúhú?" ga myi kat ri.

19 Yhang gi, "Haí jung lúhú?" ga dum myí é hkûn lé, yhangnhik gi, "Nazaret wà byù Yesuq é hkyô nghut lhê; haú yuq gi, Garai Gasâng é hí

má le, byù lhunglhâng bâng é hí má le, nhut shô hpaqchyí a-tsam eq hkyí loq a-tsam má wum-o bo é sù myiqhtoi nghut ri.

²⁰ Nghut kôlhâng, hkyangjong agyi pé eq ngamoq é zau suwún wui eq haú yuq lé sat pyám râ matú ap byí pyám kômù, yhangmoq gi, Yhang lé tapzîng má jén sat pyám bekô nghut ri.

²¹ Ngamoq kúm gi, haú yuq lé, Israelaq byù myû lé hkyí yù râ sù nghut lhê nghû luí, myit myoqbyu nyi bum lhê. Nghut kôlhâng, haú su dut laí ló é gi, hkû-nyí sum nyí lháng bò bê.

²² Hau htoq agó, hkû-nap noq le, lup má ê wú é, ngamoq hpúng má é myiwe wui ra-am gi, ngamoq lé, lo lhoq maú akô.

²³ Yhangmoq gi, Yesuq é gungsôm lé a myàng jâng dum taú lò mù, 'Haú Yhumsîng dui nyi ri.' ga luí, taí kyô é mau-mang lagyo htoq shit é shing-rán lé, myang é hkyô lé lo taí kyô akô.

²⁴ Haú mù, ngamoq é luzúm wui ra-am gi, lup má ê wú kô le, myiwe wui taí é eq rajung za, dut to lánng é lé é myàng akô. Nghut kôlhâng, haú yuq lé gi, yhangmoq a myàng kó gâ." ga luí, Yhang lé taí kyô akô.

²⁵ Haú hkûn, Yhang gi, "Myiqhtoi pé taí é dang banshoq lé lumjîng râ matú, hpaqchyí a bo é eq ngha é sù nhik ê,

²⁶ Hkrisduq gi, haú su é wuihke jamjau hkâm zô yu é htâng má sheq, Yhâng é

hpungwup shingkang má wó wang nyi to râ, a nghut kó lhú?" ga luí, yhangnhik lé myí ri.

²⁷ Yhang gi, yhangnhik lé, Mosheq kê tô é eq myiqhtoi pé banshoq bang kê tô é Chyúmdang pé mai, Yhang má âng é dang banshoq é lichyúm lé, taí hpông kyô ri.

²⁸ Ahkuí, yhangmoq, haú nhik e ló é wà má chyâng lò kôjáng, Yesuq gi, laí ló râ su kut ri.

²⁹ Haú hkûn, yhangnhik gi, "Nga-nhik eq rahá wang bíng sháng; hkâsu mù gâ le, buigyùm bê mù, mau le chut lô bê nghut ri." ga luí, Yhang lé wum kat chôm lung nyi akô. Haú mù luí, Yesuq gi, yhangnhik eq rahá wang bíng bê nghut ri.

³⁰ Yesuq gi, zang zo râ ga, yhangnhik eq rahá zung tô é hkûn, muk lé yù luí, jeju hkya-on mù, myhik hpé luí, yhangnhik lé gàm byí ri.

³¹ Haú hkûn, yhangnhik é myoq bóng lò luí, Yesuq nghut é lé bûn sé kat bekô. Yesuq kúm gi, yhangnhik chyáng mai byuq byuq bê nghut ri.

³² Haú mù, yhangnhik gi, "Yhang gi, hkyô má ngá-nhik eq dang nyo lhûm é eq Chyúmdang é lichyúm taí hpóng shit é hkûn, ngá-nhik gi, i-myt unghkaú má, achyí aku dut bê a nghut lhú?" ga luí, yhangnhik yhangchang taí lhûm akô.

³³ Yhangnhik gi, toq mù, radá dâm Yerusalem wà mó shut dum taú lò kô le, lagyo raxe rayuq eq, yhangmoq eq

rahá nyi é bang zup míng to kô é lé ló myang akô.

³⁴ Haú bang gi, "Haú Yhumsíng gi, teng za yang dum dui toq ló bê; Simun lé lhang htoq shit bê nghut ri." ga taí lhum nyi bum akô.

³⁵ Haú hkûn, yangnhik gi, hkyô má dut lai ló é hkyô pé eq, muk hpê é hkûn má Yesuq lé bûn sé kat é hkyô lé, taí kyô akô nghut ri.

Chángzô Pé Lé Yesuq Htoq Shit É Hkyô

Mht 28:16-20; Mrk 16:14-18; Yhn 20:19-23; Lagyo 1:6-8

³⁶ Yangmoq haú hkyô lé chôm taí nyi tô bum ashí le, Yesuq gi, Yang gûng yang, yangmoq é agùng má yap to luí, "Nungmoq nguingón yuqyo nyi sháng gaq." ga luí, yangmoq lé taí ri.

³⁷ Yangmoq kúm gi, gyuq dan byuq bûm kômù, sobyô lé myàng bê ga myit yu pyâm bum akô.

³⁸ Haú mù luí, Yang gi, "Nungmoq gi, haí mù dan nyi bum akô lú? Haí mù nungmoq é i-myit unghkaú má úng-âng nyi bum akô lú?"

³⁹ Ngá é loq eq Ngá é hkyí lé wú wú keq. Ngò yang nghut nyi lê. Ngo lé sop wú keq. Sobyô nghú é gi, ngo lé nungmoq myang é su, sho eq showui showang bo é a nghut." ga luí, yangmoq lé taí kyô ri.

⁴⁰ Yang gi, haú su ga taí mù, Yhâng é hkyí loq lé tûn shit ri.

⁴¹ Yangmoq gi, gabú é eq maú nyi bûm kômù, a wó jing shi dut tô é hkûn lé, Yesuq gi, "Nungmoq shí má zôhpo rajung jung wó akô lú?" ga luí, yangmoq lé myi kat ri.

⁴² Haú hkûn, yangmoq gi, nyhîn nyhoq tô é ngozo rah-tung lé, byí akô.

⁴³ Yang gi, haú lé yù mù, yangmoq é hí má zô shit ri.

⁴⁴ Hau htâng, Yang, yangmoq lé taí é gi, "Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò eq séng luí kâ to má kâ to banshoq gi, dik râ chyat nghut lhê nghú luí, nungmoq eq rahá nyi to ashí hkûn lé, Ngò, nungmoq lé taí kyô tô é pé gi, shí nghut bê." ga taí ri.

⁴⁵ Hau htâng, Yang gi, Chyúmdang pé lé sê gyo shoq ga, yangmoq é i-myit hkum hpóng byí ri.

⁴⁶ Haú mù, Yang gi, "Hkrisduq gi, wuîhke jamjau hui zo mù, sum nyí nghú râ buinyi má, shi é mai dum dui toq lô râ hkyô lé le,

⁴⁷ Yerusalem wà mó mai hí luí, byù myû chângjup lé, Yhâng é mying lé lang luí yubak mara hkyut pyâm byi râ hkyô eq myit lhing râ hkyô lé le, hko kyo râ hkyô lé, kâ to bê nghut ri.

⁴⁸ Nungmoq gi, shí pé é saksé pé nghut nyi akô.

⁴⁹ Ngá Wa byí tô é dang-gidiq* lé, Ngò, nungmoq é ah-toq má nhang kat râ nghut

* 24:49 Ngá Wá byi tô é danggidiq nghu é gi, Chyoiyung é Woi-nyí lé taí ri.

lhê; nungmoq kúm gi, htoq tsáng myhâng mâ é wum-o a-tsam wó yu é buinyì jé shoq, Yerusalem wà mó má láng nyî keq." ga luí, yhangmoq lé taí ri.

Yesuq Mauhkûng Shut Shuí

Toq Yu Huí É Hkyô

Mrk 16:19-20; Lagyo 1:9-

11

⁵⁰ Hau htâng, Yhang gi, yhangmoq lé Behtani wà yàm shut shuí htoq ê mù, Yhâng é loq tu toq luí, shimân byî ri.

⁵¹ Haú su kut shimân byî nyi ashí le, Yhang gi, yhangmoq chyáng mai gâng ló byuq luí, mauhkûng shut shuí toq yu é hui bê nghut ri.

⁵² Yhangmoq kúm gi, Yhang lé noqkuq kômù luí, gyai gabú é myit èq Yerusalem wà mó shut dum taú ló akô.

⁵³ Yhangmoq gi, noqkuq yhûm má nyi to mù, Garai Gasang lé hkya-on kungton nyi bum akô nghut ri.

YOHAN é Gabú Danglù Laiká (The Gospel of John)

*Haù Mungdang, Xângzo
Byù Gùng Lé Dut É Hkyô*

1 A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yang Garai Gasang nghut ri.

2 Yhang gi, a-nham sâng-hi má, Garai Gasang eq rahá nghut nyi ri.

3 Nyi mi-nyì, joq mijoq gi, Yhang đông mai hpan tô é chyat nghut lhê; Yhang đông mai a hpan é gi, haí lhang a joq nghut ri.

4 Asak chyungxe gi, Yhang má nghut lhê mù, asak haù gi, byu pé é matú maubó nghut ri.

5 Haù maubó gi, mauchut má duqbó byì nyì kôlhang, mauchut gi, haù lé a hap yù nghut ri.

6 Garai Gasang mai nhang kat é, Yohan gâ é byù rayuq jé lé ri.

7 Yhang gi, maubó haù eq sêng é hkyô lé, saksé hkám byi luí, yang é yanmai byù lhunglhang bang wó lumjing kó sháng gaq ga, saksé rayuq đông jé lé é sù nghut ri.

8 Yhang gi, haù maubó a nghut; maubó haù lé saksé hkám byi râ matú za sheq jé lé é ru nghut lhê.

9 Byù yuq jup lé duqbó byi é, maubó akying haù gi, mingkan htoq má jé nyi to bê.

10 Yhang gi, mingkan htoq má nyi to bê nghut ri; mingkan lé gi, Yhang đông mai hpan tô é nghut kôlhang, mingkan haù gi, Yhang lé a wú sé nghut ri.

11 Yhang gi, yhumsing mau má jé lé kôlhang, Yhang é amyù pé gi, Yhang lé a lhom hap yù kó nghut ri.

12 Nghut kôlhang, Yhang gi, Yhang lé lhom hap yù luí, Yhang é mying lé lumjing é bang lhunglhang lé, Garai Gasang é yangzô pé dut râ ahkáng byi bê nghut ri.

13 Haù bang gi, sui sho đông hku kat é le a nghut, byù ô nau é đông hku kat é le a nghut, gungsho ô nau é đông hku kat é le a nghut e za, Garai Gasang chyáng mai hku kat é bang ru nghut lhê.

14 Haù Mungdang gi, xângzo byù gùng lé dut luí, ngamoq chyáng nyi wú bê nghut lhê. Ngamoq gi, haù jeju eq tengmán hkyô bying tô é, Yhang é hpungwup shingkang lé myang wú bê nghut lhê; haù gi, haù Íwâ é zote rayuq đông, Yhang wó yu é hpungwup shingkang nghut ri.

15 Wui-myhup Sará Yohan gi, Yhang eq sêng é hkyô lé saksé hkâm é hkùn, garû taí é gi, "'Ngá é htàng má jé lé é Sù gi, ngá é hí mai nyi to bê sù nghut é yanmai, ngá htoq je gyaú sù nghut ri.' nghù, ngò

taí é sù gi, shí yuq nghut bê." gâ ri.

¹⁶ Yhâng é gumjup é jeju ahkaû mai, nga-nhung ban-shoq bang gi, shimân jeju lé ralhûm htoq ralhûm myang yu nyi bê nghut lhê.

¹⁷ Hkâsu mù gâ lé, haû jep é tarâ gi, Mosheq é loq dông mai byî é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê.

¹⁸ Garai Gasang lé, ó yuq èq le a myang wú wú é nghut lhê; nghut kôlhang, haû Íwâ é tanghkoí má lúng tô é, Yhang Zo zote gi, Garai Gasâng é gùng lé lhoq htoq shit bê nghut ri.

Wui-myhup Sará Yohan Hko Kyô É Hkyô

Mht 3:1-12; Mrk 1:1-8; Luk 3:15-17

¹⁹ Yerusalem wà mó mâ é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myí nhang kat kô é hkûn, Yohan saksé hkâm é gi, a-ô mâ é hkyô pé nghut ri.

²⁰ Yhang gi, a hê a zaú tô e za, "Ngò gi, Hkrisduq* a nghut." ga lhom taí kyô ri.

²¹ Haú hkûn, yhangmoq gi, "Haû nghut jáng, nàng gi, ó yuq nghut lhê lhú? Nàng gi, Eliyaq lhú?" ga myi kôjáng, yhang gi, "A nghut." ga taí ri; "Nàng gi, haû Myiqhtoi nghut lhê lhú?" ga dum myi kôjáng,

yhang gi, "A nghut." ga tû taí ri.

²² Haû mù, yhangmoq gi, "Ngamoq lé nhang kat bâng chyáng ló wó taí kyo râ matú, nàng gi, ó yuq nghut lhê lhú? Náng gùng lé nàng hkâsu nghú lhê lhú? Taí kyô wú laq." ga dum myí akô.

²³ Haú hkûn, Yohan gi, myiqhtoi Esai-aq é dang eq rajung za, "Ngò gi, haû yoso má, 'Yhumsing é matú hkyô lhoq nyhang to keq.' gâ é htê lé, garú taí é sù nghut lhê."* ga tû taí ri.

²⁴ Hparishe pé mai nhang kat é bang ra-am gi, yhang lé,

²⁵ "Nàng gi, haû Hkrisduq le a nghut, Eliyaq le a nghut, Myiqhtoi le a nghut é nhîng, haí mù luí, wui-myhup hkâm byi nyi lhê lhú?" ga dangmyi myí akô.

²⁶ Haú hkûn, Yohan tû taí é gi, "Ngò gi, wui èq za wui-myhup hkâm byi lhê; nghut kôlhang, nungmoq a sê é sù rayuq nungmoq chyáng yap tô ri.

²⁷ Yhang gi, ngá htâng má lé é sù yuq nghut bê; ngò gi, Yhâng é hkyî-tsung tui lé hpyî râ lhang a gingdán é nghut ri." gâ ri.

²⁸ Shí pé banshoq gi, Yohan wui-myhup hkâm byi nyi é, Yodan làn hé hpoq mâ é Behtani wà má dut é hkyô pé chyat nghut ri.

Yesuq Gi, Garai Gasâng É Sauzo Nghut É Hkyô

* **1:20** Grik dong *Hkrisduq* gâ é gi, xû but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê. * **1:23** Esai 40:3

29 Hau htang nyí, Yohan gi, yhâng chyáng Yesuq lé lo nyi é lé myàng luí, taí é gi, "Mingkan byu pê é yubak mara lé yu pyám byí é Garai Gasâng é Sauzo lé, wú keq!

30 Shí yuq gi, 'Ngá é htâng má jé lé é Sû gi, ngá é hí má nyi bê sù nghut é yanmai, ngá htoq je gyaú Sû nghut ri.' nghû, ngò taí é sù yhang nghut bê.

31 Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israelaq byu pé wó sé kó sháng gaq nghû, ngò lé jé mù, wui èq wui-myhup hkám byí nyi é nghut lhê." gâ ri.

32 Hau htâng, Yohan saksé hkám é gi, "Haú Woi-nyí gi, mauhkûng mai hpûngkyui gunghkyâng sù é đông mai gyó lé mù, Yhâng chyáng lé nô tô é lé, ngò myàng ri.

33 Ngò gi, Yhang ó yuq nghut é lé a sê é nghut kôlhang, wui èq wui-myhup hkám byi râ matú, ngo lé nhang kat é Sû, ngo lé taí kyô é gi, 'Haú Woi-nyí gyó lé lô mù, ó yuq chyáng lé nô tô é lé, nàng myàng jáng, haú yuq gi, haú Chyoiyúng Woi-nyí má wui-myhup hkám byi râ sù nghut lhê.' gâ ri.

34 Haú eq rajung za ngò myàng bê nghut luí, shí yuq gi, Garai Gasâng é Yhangzo nghut lhê nghû, ngò saksé hkám lhê." gâ ri.

35 Hau htang nyí, Yohan gi, yhâng é chángzo í yuq eq rahá, haú má dum nyi tô akô.

36 Haú hkûn, yhang gi, Yesuq laí ló nyi é lé myang kat jáng, "Hê, Garai Gasâng é sauzo lé, wú keq!" ga taí kat ri.

37 Chángzo haú í yuq gi, yhang haú su gâ é lé wó gyo kôjáng, Yesuq é htâng cháng bekô nghut ri.

38 Yesuq gi, lhing wú kat le, yhangnhik châng tô é lé myàng luí, "Nungnhik haí o akô lhu?" ga myi jáng, yhangnhik gi, "Rabai ê, Nàng hkâmá nyi lhê lhu?" ga taú myí kat akô nghut ri. (Rabai gâ é gi, Sará gâ é lichyúm nghut lhê.)

39 Haú hkûn, Yhang gi, "Lé keq, haú jáng, nungnhik myàng kó râ nghut lhê." ga tú taí ri.

(Haú-u gi, raxê hkyíng[†] kô nghut ri.) Haú mù luí, yhangnhik gi, châng ê mù, Yhang hkâmá nyi é lé, é myàng kôluí, haú nyí buigyùm shoq, Yhang eq rahá ê nyi nyi akô nghut ri.

40 Yohan taí é dang lé wó gyo luí, Yesuq htâng châng é su nhik mâ é rayuq gi, Simun Petruq é yhanggu Andre nghut ri.

41 Andre gi, yhangmang Simun lé hí myàng luí, "Nga-nhik gi, Mesaia lé myàng bê." ga yhang lé taí kyô ri. (Mesaia gâ é lichyúm gi, Hkrisduq ga é nghut lhê.)

Sâng-hi Lhê É Chángzô Pé

† 1:39 Raxê hkyíng gi, myinhâng myi hkyíng záng ri.

42 Hau htâng, yhang gi, yhangmang lé Yesuq chyáng shuê ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa[‡] gâ é myìng lé, nàng wó yû râ nghut lhê." ga taí ri. (Kehpa gâ é lichyúm gi, Petruq gâ é nghut lhê.)

Hpilip Eq Nahtanelaq Lé Hkyin Yu É Hkyô

43 Hau htang nyí, Yesuq gi, Galile mau shut ê râ matú, myit hpyit yû bê nghut ri. Yhang gi, Hpilip lé myàng jáng, "Ngá htâng cháng aq." ga taí ri.

44 Hpilip gi, Andre eq Petruq nhik nyi é Bet-saida wà mó mâ é byù nghut ri.

45 Yhang gi, Nahtanelaq lé myàng jáng, "Mosheq mai tarâ laiká má kê tô é eq myiqhtoí pé mai le lhoq ang luí kê tô é sù, Yosep é yhangzo, Nazaret wà byù Yesuq lé, ngamoq myàng bê." ga yhang lé taí kyô ri.

46 Haú hkûn, Nahtanelaq gi, "Nazaret wà ô! Haú mai, ge é jung haí wa wó htoq lhê lhú?" ga myi jáng, Hpilip gi, "Ru lé wú aq." ga yhang lé taí ri.

47 Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, "Wú keq, shí yuq gi, mhaú é myit a bo é sù, Israelaq byù akying rayuq nghut ri." ga taí ri.

48 Haú hkûn, Nahtanelaq gi, "Nàng, ngo lé hkâsu kut sê

é lhú?" ga myi jáng, Yesuq gi, "Nang lé, Hpilip eq a wut yù shimá, nàng, maihpáng gâm ô má ru nyi tô ashî hkûn, Ngò, nang lé myàng bê nghut lhê." ga tú taí ri.

49 Haú mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pê é Hkohkâm le nghut ri." ga taí ri.

50 Haú hkûn, Yesuq gi, "Ngò, nang lé, maihpáng gâm ô má myang é nghú taí kyô é yan-mai, nàng lumjíng lhê a nghut lhú? Hau htoq je kê é muzó pé lé, nàng myàng râ nghut lhê." ga taí ri.

51 Hau htâng, Yesuq xoq taí é gi, "Ngò, nungmoq lé teng za taí kôlé, mauhkûng bóng lô luí, haú Byu Yhangzô ahtoq má, Garai Gasâng é maumang lagyô pé doq lô gyó lô kut nyi kê é lé, nungmoq myàng kó rá nghut lhê." gâ ri.

2

Wui Lé Tsibiyiq Wing Dut Nhang É Hkyô

1 Hau htâng, í nyi nghú râ nyi má, Galile mau mâ é Hkanaq wà mó má, myiháng poí ralhú joq ri. Haú má Yesuq é yhângnu le, bo lom ri.

2 Yesuq eq Yhâng é chángzô pé lé le, myiháng poí haú má ji akô nghut ri.

3 Tsibiyiq wing jaú tûm to kê é hkûn, Yesuq é yhângnu gi, "Yhangmoq, tsibiyiq wing a

‡ 1:42 Aramaik dang ðông *Kehpa* gâ é eq Grik dang ðông "Petruq" gâ é lichyúm gi, luqgok gâ é nghut lhê.

wó lo kó nghut ri." ga, Yesuq lé tái ri.

⁴ Haú hkûn, Yesuq gi, "Ânu ê,* haú, nàng gi, Ngò eq haí sêng lhê lú? Ngá é ahkýng a jé shi é nghut lhê." ga tũ tái ri.

⁵ Nghut kôlhang, Yhâng nu gi, haú dui-nhâng zoshâng wuì lé, "Yhang haí tái le, haí kut keq." ga tái ri.

⁶ Haú nàm má, í sum xê galan kô wang é luqgok wúng hkyuq cham joq tô ri; haú gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

⁷ Yesuq gi, haú dui-nhâng zoshâng wuì lé, "Wúng haú pé má wuì lhoq pyíng keq." ga tái ri; haú mù, yhangmoq gi, wúng haú pé má byíng shoq shoq lhoq pyíng bekô nghut ri.

⁸ Hau htâng, Yhang gi, yhangmoq lé, "Ahkuì, ratsuí hkú yù mù, poì-up lé yu ló byi keq." ga tái jáng, yhangmoq gi, yu ló byi akô nghut ri.

⁹ Poì-up hpó gi, wuì mai dut é tsibiyiq wíng haú lé, shuq chyam wú ri; wuì hkam é dui-nhâng zoshâng wuì gi, tsibiyiq wíng haú hkâmai lo é hkyô lé sê to kôlhang, yhang gi, a sé nghut ri. Haú mù, yhang gi, lusik lé, jì yù luí,

¹⁰ "Yuq hkangmó gi, tsibiyiq wíng mún lé hí jaú mù, bíng pé shuq gyí bùm jáng sheq, tsibiyiq wíng apyâng lé ru yu htoq lhê; nghut kôlhang, nàng gi, nghâm é tsibiyiq wíng lé, ahkuì jé shoq wó hkong tò ri-nhung!" ga tái ri.

¹¹ Galile mau mâ é Hkanaq wà mó má, Yesuq tũn shit é limik kumlhá gi, Yhang kut é limik kumlhá pé mâ é sâng-hí dàm nghut ri. Yhang gi, Yhâng é hpungwup shing kang lé, haú dông lhoq htoq shit é nghut mù luí, Yhâng é chángzô pé gi, Yhang lé lumjíng bum akô nghut ri.

Noqkuq Yhũm Lé Lhoq Sansêng Pyâm É Hkyô

Mht 21:12-13; Mrk 11:15-17; Luk 19:45-46

¹² Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um wà má gyó ló ri; yhangmoq gi, haú má buinyi myi ngò nyi nyi akô nghut ri.

¹³ Yudaq byu pé é Lhoqlhai Poì jé rã nghut é hkûn, Yesuq gi, Yerusalem wà mó má doq ló ri.

¹⁴ Haú hkûn, noqkuq yhũm wàng má, nojũng, sau, hpũngkyui pé lé ùng nyi é bang lé le, siboì má ngùn htaí zô zung nyi é bang lé le, Yhang ló myàng ri.

¹⁵ Haú mù, Yhang gi, tui lé, nhuq rã wase saí yù mù, ban-shoq bang lé le, sau eq nojũng lé le, haú noqkuq yhũm wàng mai hkat htoq luí, ngùn htaí zo bãng é ngùn htingchap lé gi, tũ hut pyám byi mù, yhangmoq é siboì lé gi, tu mhuq pyám byi ri;

¹⁶ haú hpũngkyui ung zô é bang lé le, "Zè shi pé lé yu htoq ló keq! Ngá Wã é yhũm

* 2:4 Ânu ê gã é lé, Grik dông gi, "Myiwe myhí ê" ga bo tô é nghut lhê.

lé, hpugá jowò hkâkut kó!" ga luí nhik-yô ri.

17 Haû mù, Yhâng é chángzô pé gi, "Ngò, Náng é yhûm lé chyitdap kâng tuí é hkyô gi, Ngo lé myi su nyhê jôm pyám râ nghut lhê."☆ ga kâ tô é lé, myit bûn kat akô nghut ri.

18 Yudaq byu pé gi, Yhang lé, "Nàng, shí pé kut râ ahko ahkáng wó é hkyô lé saksé tân shit râ matú, ngamoq lé, hái jung limik kumlhá wó tân shit râ lhú?" ga chôm myí akô nghut ri.

19 Haû hkûn, Yesuq gi, "Noqkuq yhûm shí lé nungmoq hpyoq pyám keq, sum nyí gyoro má, Ngò, haû lé dum tu shap râ nghut lhê." ga, yhangmoq lé tû taí ri.

20 Haû Yudaq byu pé gi, "Noqkuq yhûm shí lé, myi xe hkyuq zân tup saí é ru nghut lhê; sum nyí gyoro má za, Nàng wó tu shap râ lhú?" ga tu myí akô nghut ri.

21 Nghut kôlhâng, Yesuq taí é noqkuq yhûm gi, Yhâng é gùng lé lhoq ang luí taí é nghut ri.

22 Haû mù, Yhang, shi é mai lhoq dui toq huí é hkûn sheq, Yhâng é chángzô pé gi, Yhang haû su ga taí é dang lé myit bun kômù, Chyúmdang lé le, Yesuq taí é dang pé lé le, lumjínng akô nghut ri.

23 Haû Lhoqlhai Poí nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumlhá pé lé myàng

kômù, Yhang lé lumjínng bum akô nghut ri.

24 Nghut kôlhâng, Yesuq gi, byù lhunglhâng bâng é myit lé sê é yanmai, yhangmoq chyáng, Yhânggùng lé a ap to nghut ri.

25 Yhang gi, byu é i-myit unghkaû má hái lúng tô é lé sê é yanmai, byù yhangchang saksé hkám byí é a ra nghut ri.

3

Nikodimu Lé, Yesuq Mhoqshit É Hkyô

1 Nikodimu gâ é Hparishe rayuq nyi ri; yhang gi, Yudaq byu pé é byin tú wapdoq má bo é sù nghut ri.

2 Yhang gi, myín lé, Yesuq chyáng lé mù, "Rabai ê, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut râ a nghut." ga taí ri.

3 Haû hkûn, Yesuq gi, yhang lé, "Ngò, nàng lé teng za taí kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myâng râ a nghut." ga tû taí ri.

4 Haû jáng, Nikodimu gi, "Ipyat kó bê é byù gi, dum hkû é hkâsu kut wó hui râ lhú? Ínû é unghkaû má dum wàng mù, dum hku é hui râ gi, gè gè yhang wó dut râ a nghut!" ga taí ri.

5 Haû hkûn, Yesuq gi, "Ngò, nàng lé teng za taí kyo lé, ó

yuq nghut kôle, wui eq Woi-nyí mai hku kat é hui sù za a nghut le gi, Garai Gasâng é mingdán má wó wâng râ a nghut.

⁶ Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri.

⁷ 'Nungmoq gi, dum hku é hui râ lhê' nghû Ngò taí é dang lé, nàng hkâmau nyí.

⁸ Haû, lai gi, yang nau é shut ló lhê. Lai lò htê lé nàng wó gyo kôlhang, lai hkâmai lo é eq, hká shut ló é lé, nàng sé râ a nghut; haû Woi-nyí mai hku kat huí é sù, ó yuq nghut kôle, haû eq rajung za nghut lhê." ga tû taí ri.

⁹ Haú hkûn, Nikodimu gi, "Haû gi, hkâsu wó dut râ lhú?" ga myí ri.

¹⁰ Yesuq tû taí é gi, "Nàng gi, Israelaq byu pê é sará rayuq nghut to luí nhîng, haú hkyô pé lé a sê gyo lhú?"

¹¹ Ngò, nang lé teng za taí kyo lé, ngamoq gi, ngamoq sê é hkyô lé taí mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri.

¹² Ngò gi, nungmoq lé, mingkan eq sêng é hkyô lé taí kyô le lhang, a lumjîng kô é nghut le gi, mauhkûng mingdán eq sêng é hkyô lé taí kyô é nghut le gi, hkâsu kut wó lumjîng kó râ lhú?

¹³ Mauhkûng mingdán mai gyó lo é sù, haû Byu Yhangzo mai lai luí, mauhkûng

mingdán má ó yuq lhang wó doq ló wú é a nghut.

¹⁴ Mosheq gi, yoso má lhangmui lé tu shap tô é su, haû Byu Yhangzo le tu shap tô é hui ra râ nghut lhê.

¹⁵ Haû mù, haû Byu Yhangzo lé lumjîng é yuq hkangmó gi, ahtum abyuq é asak wó yù râ nghut lhê.

¹⁶ Hkâsu mù gâ le, Garai Gasang gi, mingkan lé gyai yang chyitdap é yanmai, Yang Zo lé lumjîng é sù ó yuq nghut kôle, htên byoq é a huí e za, ahtum abyuq é asak wó yù sháng gaq ga, rayuq za é Yhâng é Zote lé byí pyám bê nghut ri.

¹⁷ Hkâsu mù gâ le, Garai Gasang gi, mingkan lé mara byí râ matú, Yang Zo lé mingkan htoq má nhang kat é a nghut é za, Yang é yanmai mingkan hkyi yu é hui râ matú sheq nhang kat é ru nghut lhê.

¹⁸ Yang lé lumjîng é sù gi, mara byí é hui râ a nghut; nghut kôlhang, Yang lé a lumjîng é sù kúm gi, Garai Gasâng é Yhangzo zote lé a lumjîng é sù nghut é yanmai, mara byí é huí to gù bê nghut ri.

¹⁹ Maubó gi, mingkan htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yangmoq gi, maubó lé chyit râ malaí, mauchut lé chyit akô nghut ri; haû gi, mara byí é hui râ hkyô yang nghut ri.

²⁰ Agè ashop hkyô kut é sù ó yuq nghut kôle, maubó lé

a nguì nghut ri; haú yuq gi, yhang kut é hkyô lhoq byông htoq kat râ lé gyuq é yanmai, haú maubó shut lé lô râ a nghut.

²¹ Nghut kôlhang, haú tengmán hkyô đông asak dui é sủ ó yuq le, yhumsing kut é hkyô gi, Garai Gasang lom é hkyô lé, san za byu-myàng sháng gaq ga, haú maubó shut lé lo ri." gâ ri.

Yesuq Eq Séng Luí, Wui-myhup Sará Yohan Saksé Hkâm É Hkyô

²² Hau htâng má, Yesuq gi, Yhâng é chángzô pé eq rahá, Yuda mau shut wang lô mù, haú má rayoq zo nyi luí, wui-myhup hkâm byi ri.

²³ Haú u lé, Yohan gi, Salim nàm mâ é E-nun gâ é jowò má, wui gyai myo joq é yanmai, wui-myhup hkâm byi nyi ri; byu pé gi, abyit alan lé lò kômù, wui-myhup lé hkâm yu nyi bum akô nghut ri.

²⁴ (Haú gi, Yohan lé htóng a lhoq hkyó shi é hkun lhê é hkyô nghut ri.)

²⁵ Haú hkùn, Yohan é chángzô pé ra-am eq Yudaq byu rayuq gi, lhoq san lhoq yúng hking eq séng luí, dang htíng htíng lhúm bum akô nghut ri.

²⁶ Hau htâng, yhangmoq gi, Yohan chyáng lé luí, "Rabai ê, Yodan làng hé hpoq shut nàng eq rahá nyi luí, nàng eq saksé hkâm byi é Sủ gi, ahkuí, wui-myhup hkâm byi nyi é nghut mù, yuq hkangmó gi, Yhâng chyáng e bum akô nghut ri mhai." ga, yhang lé taí akô.

²⁷ Haú eq séng luí, Yohan tũ taí é gi, "Byu rayuq gi, mauhkung mai byi é za a nghut jáng, haí le wó hap yu rà a nghut.

²⁸ 'Ngò gi, Hkrisduq a nghut, Yhang é hí má nhang kat huí é sủ za nghut lhê.' nghũ, ngò taí é lé, nungmoq yhang saksé nghut bum akô.

²⁹ Myisik wó é sủ gi, lusik nghut ri. Lusik lé, láng yap tô é luzúm hpó gi, lusik é htê lé wó gyô é yanmai, gyai yhang gabú nyi ri. Haú sủ é gabú hkyô gi, ngá é gabú hkyô nghut mù, ngò má byíng jup nyi bê nghut ri.

³⁰ Yhang gi, kô jat lò ra rà nghut lhê; ngò gi, yom lò ra rà nghut lhê.

³¹ Ahtoq mai lé é Sủ gi, lhunglhang é ahtoq má nghut ri; myigùng htoq mâ é sủ kúm gi, myigùng htoq eq séng é nghut luí, myigùng htoq eq séng é đông za taí ri; mauhkung mai lé é Sủ gi, lhunglhang é ahtoq má nghut ri.

³² Yhang gi, wó myâng wó gyô é hkyô lé, saksé hkâm kôlhang, Yhang hkâm é saksé lé, ó yuq le a hap yu kó nghut ri.

³³ Yhâng é saksé lé hap yu é sủ kúm gi, haú Garai Gasang gi, tengmán sủ nghut ri ga, saksé shit é sủ nghut bê.

³⁴ Garai Gasâng eq nhang kat é hui Sủ gi, Garai Gasâng é mungdang lé taí ri; hkâsu mù gâ le, Garai Gasang gi, haú Woi-nyí lé, laké a kat e za byi é yanmai nghut ri.

³⁵ Haú íwa gi, Zo lé chyitdap luí, jung hkanmó lé Yhâng é loq má ap byi bê nghut ri.

³⁶ Haú Zo lé lumjínng é sù ó yuq nghut kôle, ahtum abyuq é asak wó lhê; nghut kôlhang, haú Zo lé he-ngik pyâm é sù ó yuq nghut kôle, asak haú lé myàng rá a nghut; hkâsu mù gâ le, Garai Gasâng é nhikmo-yo hkyô gi, yhâng chyáng ru joq nyi ri." gâ ri.

4

Yesuq Eq Samariq Myhí Huí É Hkyô

¹ Yesuq gi, Yohan htoq má, chángzo je lhoq myô é eq wui-myhup hkám byi nyi ri gâ é hkyô lé, haú Hparishe pé wó gyô akô nghut ri.

² (Nghut kôlhang, gè gè ga jáng, Yesuq gi, Yhang wui-myhup hkám byi é a nghut, Yhâng é chángzô pé sheq ru nghut akô.)

³ Haú hkyô lé, Yesuq sé jáng, Yhang gi, Yuda mau mai htoq mù, Galile mau shut dum taú ló bê nghut ri.

⁴ Ahkuí, Yesuq gi, Samariq mau mai sô laí ló rá dut bê nghut ri.

⁵ Haú mù, Yhang gi, Yakup mai yhang zo Yosep lé byi é maumyí rajap eq chyâng lhùm é, Suhka ga myhíng é, Samariq mau mâ é wà mó ralhú má lo jé ri.

⁶ Haú má, Yakup é wuhtung le joq to luí, Yesuq gi, hkyô sô ngú é yanmai, wuhtung hau é nàm má zung gyó tô ri. Haú

u gi, nyí-káng raxe í hkyíng* nghut bê nghut ri.

⁷ Haú hkûn, Samariq myiwe myhí rayuq wuì lé hkam ri; Yesuq gi, yhang lé, "Ngo lé wuì byi shuq laq." ga taí ri.

⁸ (Haú u gi, Yhâng é chángzô pé, zoshuq wuì rá matú wà hkaú shut e byuq kô é ahkyíng nghut ri.)

⁹ Haú Samariq myiwe myhí gi, Yhang lé, "Nàng gi, Yudaq byu rayuq nghut to luí nhíng, ngò Samariq myiwe myhí chyáng, haí mù shuq wuì dúng lhê lhú?" ga taí ri. (Hkâsu mù gâ le, Yudaq byu pé gi, Samariq byu pé eq a zùm yap kó nghut ri.)

¹⁰ Haú hkûn, Yesuq gi, yhang lé, "Nàng gi, haú Garai Gasâng é chyunghuq lé le, nang lé wuì dung sù ó yuq nghut é lé le, sê é nghut le gi, noq mai Yhang lé dúng tóngbán luí, Yhang gi, nang lé asak-wuì byi berâ nghut lhê." ga tû taí ri.

¹¹ Myiwe myhí haú gi, "Yhumsíng ê, Nàng gi, wuì hkâm rá zè haí le a wó, wuhtung le nik ri; haú asak-wuì lé, Nàng hkâmâ é wó yú rá lhú?"

¹² Ngamoq é íwa Yakup gi, ngamoq lé wuhtung shí byi to bê nghut lhê; yhang yhang le, yhang zo pé le, yhang rém é dusak pé le, wuhtung shí mâ é wuì shuq bekô nghut ri; Nàng gi, Yakup htoq je kô lhê lhú?" ga Yhang lé taí ri.

* 4:6 Nyí-káng raxe í hkyíng gi, Yudaq byu pé é hkyuq hkyíng nghut ri.

13 Yesuq gi, "Wuì shî lé shuq é sù ó yuq le, wuìshit é dum hui râ nghut lhê.

14 Nghut kôlhang, Ngò byî é wuì lé shuq é sù ó yuq nghut kôle, wuìshit é hkâ-nhám a hui lo râ nghut lhê. Ngò byî é wuì haû gi, haû yuq má, ahtum abyuq é asak matú wuìbúm dut râ nghut lhê." ga yhang lé tû taî ri.

15 Myiwe myhí haû gi, Yhang lé, "Yhumsîng ê, ngò gi, wuì le a shit lo, shî má wuì hkâm le a lé ra lo sháng gaq, wuì haû ngo lé byi laq." ga taî ri.

16 Haû hkûn, Yesuq gi, "Ló mù, nung làng lé ló wut lò aq." ga, yhang lé taî ri.

17 Yhang gi, "Ngò, làng a wó." ga taí jáng, Yesuq gi, yhang lé, "Nàng, làng a wó gâ é gi, têng ri.

18 Hkâsu mù gâ le, nàng gi, yuqgè ngo yuq wó wú bê sù nghut ri; nàng, ahkuí wó tô é yuqgè le nung làng a nghut. Nàng gi, têng é dang taí bê nghut ri." ga taî ri.

19 Haû hkûn, myiwe myhí haû gi, "Yhumsîng ê, Nàng gi, myiqhtoi rayuq nghut é hkyô lé, ngò wú sé bê.

20 Ngamoq é îchyí îwâ pé gi, bùm shî má noqkuq kô é nghut lhê; nghut kôlhang, nungmoq Yudaq byu pé gi, Yerusalem wà mó za noqkuq jowò nghut lhê ga taí akò nghut ri." ga taî ri.

21 Haû hkûn, Yesuq taí é gi, "Myiwe myhí ê, Ngo lé jíng

aq; bùm shî má le a nghut, Yerusalem wà mó má le a nghut e za, haû Íwa lé noqkuq râ ahkyíng, jé lò nyi bê nghut ri.

22 Nungmoq Samariq byu pé gi, yhumsîng lháng a sê é lé, noqkuq akò; ngamoq kúm gi, ngamoq sê é lé noqkuq lhê; hkâsu mù gâ le, hkyi yù hkyô gi, Yudaq amyù mai lo é nghut lhê.†

23 Nghut kôlhang, haû têng é đông noqkuq é bang gi, woi-nyí mai le, tengmán hkyô mai le, haû Íwa lé noqkuq râ ahkyíng gi, jé lo nyi bê nghut luí, ahkuí lháng jé to bê nghut ri; hkâsu mù gâ le, haû Íwa gi, haû su kut noqkuq é bang lé ô nau ri.

24 Garai Gasang gi, woi-nyí nghut lhê; haû mù, Yhang lé noqkuq é bang gi, woi-nyí mai le, tengmán hkyô mai le, noqkuq ra râ nghut lhê." ga taî ri.

25 Myiwe myhí haû gi, "Hkrisduq gâ é Mesaia jé lé râ nghut é lé gi, ngò sê lhê. Yhang jé lé jáng, nga-nhúng lé banshoq taí sân kyo râ nghut lhê." ga taî ri.

26 Hau htâng, Yesuq gi, "Nàng eq dang nyo nyi é sù ngò gi, haû yuq nghut lhê." ga taî ri.

*Haû Chángzô Pé Dum Taù
Jé Lo É Hkûn Lhê Hkyô*

27 Haû u lé, Yhâng é chángzô pé gi, dum taù jé lo bum akò; yhangmoq gi, Yesuq, myiwe rayuq eq dáng nyo nyi é lé

† 4:22 Bun zo shî má, Yesuq taí nau é gi, hkyi yù hkyô lé, Garai Gasang gi, Yudaq byu pé đông danggidíq byi to é nghut é lé taí nau é nghut ri.

lo myàng luí, maú byuq bum akô. Nghut kôlhang, "Nàng, haí ô ri lú?" ga le, "Haí mù Yhang eq dáng nyo nyi lê lú?" ga le, Yhang lé ó yuq a myi kó nghut ri.

²⁸ Hau htâng, myiwe myhí haú gi, yhâng é wuì yambú lé tô pyâm to luí, wà shut taú wang ló mù, wà byù wuì lé ló taí kyô é gi,

²⁹ "Ngò kut lai lò bê hkyô pé lhunglhang lé, taí kyô é byù rayuq lé, lé wú keq! Yhang gi, Hkrisduq nghut lê abe?" gâ ri.

³⁰ Haú mù, yhangmoq gi, wà mai htoq lé luí, Yesuq chyáng lé lo bum akô nghut ri.

³¹ Haú u lé, Yhâng é chángzô pé gi, Yhang lé, "Rabai ê, zoshuq zo aq." ga chôm taí akô.

³² Haú hkûn, Yhang gi, yhangmoq lé, "Nungmoq a sé é jung zoshuq zo rá Ngò wó lê." ga tù taí ri.

³³ Haú mù, Yhâng é chángzô pé gi, "Yhang lé, rayuq yuq èq zoshuq lé dé byí é abe?" ga, rayuq eq rayuq taí lhùm bum akô.

³⁴ Haú hkûn, Yesuq taí é gi, "Ngo lé nhang kat Sù ô nau é hkyô lé kut rá eq Yhâng é muzó jizó lé lhoq pán rá hkyô gi, Ngá é zoshuq nghut bê.

³⁵ 'Kyôshu yoq jé rá gi, lhamó myi hkyap rá ashí.' ga, nungmoq lhaq taí lê a nghut kó lú? Ngò, nungmoq lé taí kôlé, nungmoq é myoq hpóng luí, haú yò pé má wú kat wú keq! Kyôshi gi, myhíng luí, kyô shu yoq gi, jé to bê nghut ri.

³⁶ Haú kyô hkyó sù eq kyô shu sù gi, rahá wó gabú kó sháng gaq ga, ahkuí lhang, haú kyô shu sù gi, yhâng é zuihpau lé myang yù luí, ah-tum abyuq é asak é matú, kyôshi shú tsíng to bê nghut ri.

³⁷ Haú su mù, 'Rayuq gi, sân hkyó, góyuq gi, shú yù.' gâ é sanghkyang gi, têng ri.

³⁸ Nungmoq a zui saí tô é jang mâ é shú yù rá matú, nungmoq lé Ngò nhang kat bê nghut lê. Góbang gi, haú má wum kat zui saí to bê nghut mù, nungmoq gi, haú bang zui saí é akyú lé shu yù bekô nghut ri." gâ ri.

Samariq Byù Myo Myo Lumjínng Kô É Hkyô

³⁹ "Yhang gi, ngò kut lai lò bê hkyô lhunglhang lé, taí kyô ri." ga luí, myiwe myhí haú saksé hkâm é yanmai, haú wá mâ é Samariq byù myo myo gi, Yesuq lé lumjínng bùm bekô nghut ri.

⁴⁰ Haú mù, Samariq byu pé gi, Yesuq chyáng lé jé kômù, yhangmoq eq nyi rá matú, Yhang lé lung kô é yanmai, Yhang gi, í nyi bo nyi bê nghut ri.

⁴¹ Yhâng é dang pé é yanmai, byù myo myo gi, lumjínng bang dut jat lò bekô nghut ri.

⁴² Yhangmoq gi, myiwe myhí haú lé, "Ahkuí, ngamoq lumjínng é gi, nàng taí é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sù nghut é lé, ngamoq

sé bê nghut é yanmai nghut lhê." ga chôm tâi akô nghut ri.

*Mingsuwún Hpó É
Yhangzo Lé Lhoq Gê Byi É
Hkyô*

Mht 8:5-13; Luk 7:1-10

43 Í nyi lai jáng, Yesuq gi, haû mai Galile mau shut htoq e ló bê nghut ri.

44 "Myiqhtoi gi, yhumsing é mau má myoqdong a wó wú é nghut lhê." ga, Yesuq yhang saksé hkâm é nghut lhê.

45 Yesuq gi, Galile mau má jé é hkûn, Galile byu pé gi, Yhang lé lhom hkulum yu akô; yhangmoq gi, Yerusalem và mó má, Lhoqlhai Poí ê lôm kô é nghut é yanmai, poí u lé, Yesuq kut é hkyô lhunglhang lé, myàng kô é bang nghut ri.

46 Yesuq gi, Yhang mai haû wui lé tsibyiq wing dut nhang é, Galile mau mâ é Hkanaq và mó má, ê dum kûm ri. Haû ming suwún rayuq é yhangzo yuqzo gi, Kaperna-um và má no nyi ri.

47 Yesuq gi, Yuda mau mai Galile mau má jé lé bê gâ é hkyô lé, ming suwún haû wó gyo jáng, yhang gi, Yesuq chyáng ê mù, shí-nò no nyi é yhangzo lé, lé lhoq gê byi râ matú, Yhang lé dúng tôngbán ri.

48 Haû hkûn, Yesuq gi, yhang lé, "Byù nungmoq gi, limik kumlhá pé eq mauhpo muzó pé lé za a myàng kô é nghut le gi, hkâ-nhâm lé lumjúng kó râ a nghut." ga tâi ri.

49 Mingsuwún haû gi, "Yhumsing ê, ngá zo a shí shimá gyó lé laq." ga tâi ri.

50 Haû hkûn, Yesuq gi, "Nàng wó ló bê; nung zo byùn râ nghut lhê." ga tâi ri.

Suwún haû gi, Yesuq tâi é dang haû lé gyô jing lui, tau ló bê nghut ri.

51 Yhang gi, hkyô má ru nghut nyi ashí hkûn, yhang é dui-nhâng zoshâng wui gi, yhang lé lé hui lui, zoshâng haû gè byuq é hkyô, lé tâi kyô akô nghut ri.

52 Yhang gi, yhang zo hkâ-nhâm gè byuq é ahkying lé myi wú é hkûn, yhangmoq gi, "A-nyí nap nyi hkyuí rahkying má, gùng nyé é châm ló byuq bê nghut ri." ga tâi kyô akô.

53 Haû hkûn, ahkying haû gi, "Nung zo byùn râ nghut lhê." ga, yhang lé, Yesuq tâi é ahkying nghut é lé, haû yhangwa bún sé bê nghut ri. Haû mù, yhang eq yhang yhumbyù banshoq bang gi, lumjúng bekô nghut ri.

54 Haû gi, Yesuq, Yuda mau mai Galile mau má lé jé é htâng, í dâm nghû râ dá kut shit é limik kumlhá nghut ri.

5

*Wuhtum Yàm Má, Nòhpyo
Lhoq Gê Byi É Hkyô*

1 Hau htâng a myáng má, Yudaq byu pé é poí ralhum joq é yanmai, Yesuq gi, Yerusalem và mó má doq ló ri.

2 Ahkuí, haû Yerusalem và mó é Sau Hkúmdong nằm má,

Hebre myíng đông gi, Betzatha ga myhíng é wuhtum ralhūm joq ri; hau é lhhíngkyuq má, jirop ngo lhum joq tô ri.

³ Jirop haú pé má, myoqjit bang, hkyí hten bang, gùngjum shí bang ajùm ayò leq tô bum akô. (Haú bang gi, wuì dui nún râ lé láng tô é bang nghut akô.

⁴ Hkâsu mù gâ le, haú Yhumsing é maumang lagyo gyó lé lé kut mù, wuì lé, lé lhu nhún jáng, wuhtum haú má hí wó wang é sù gi, hái jung ana wa dap to kôlhāng, ge byuq é huì é yanmai nghut ri.)*

⁵ Súm xe shit zân tup no nyi é byù rayuq le, haú má bo tô ri.

⁶ Yesuq gi, haú yuq no leq tô é lé myàng mù, haú su no nyi é gyai myáng bê nghut é hkyô lé sé jáng, yhang lé, "Nàng, gè nau ri lhu?" ga myí ri.

⁷ Nò sù haú yuq gi, "Yhumsing ê, wuì dui nún lo é hkûn, wuhtum má wàng râ matú, ngo lé garúm râ byù ó a nyi; ngò wàng râ nghû jáng, góyuq hí, ngá hí má wàng wàng dut ri." ga tũ taí ri.

⁸ Hau htāng, Yesuq gi, yhang lé, "Toq aq! Nàng é taphkang yu chūng luì, sô lô aq." ga taí ri.

⁹ Haú yuq gi, radá dām nò ge byuq bê nghut luì, yhang é taphkang yù mù, sô lô bê nghut ri.

Haú nyí gi, Bánno buinyì nghut ri.

¹⁰ Haú mù, Yudaq byu pé gi, haú nò ge byuq é huì sù lé, "Hkû-nyí gi, Bánno buinyì nyí nghut é yanmai, nàng, taphkang waq é gi, tarâ lu lai bê nghut ri." ga taí akô.

¹¹ Nghut kôlhāng, yhang tũ taí é gi, "Haú ngo lé lhoq gè byi sù gi, ngo lé, 'Nàng é taphkang yu chūng mù, sô lô aq.' ga taí é nghut lhhê." gâ ri.

¹² Haú mù, yhangmoq gi, "'Nàng é taphkang yu chūng mù sô lô aq.' ga, nang lé taí é sù gi, ó yuq wá nghut ri lhu?" ga myí akô.

¹³ Nghut kôlhāng, haú ó yuq nghut é lé, nò ge byuq é huì sù gi, a chāng sê kat nghut ri; hkâsu mù gâ le, Yesuq gi, haú mã é byù moq mó má wang nyó lô byuq é yanmai nghut ri.

¹⁴ Htāng má, Yesuq gi, haú yuq lé noqkuq yhūm má myàng jáng, "Wú aq, nàng wāngzán bê nghut ri; hí lhhê htoq má je wuìhke é hkyô a huì zo sháng gaq, mara hkâkut shut lo." ga luì, yhang lé taí ri.

¹⁵ Haú yuq gi, htoq lô mù, yhang lé lhoq gè byí é sù gi, Yesuq nghut ri ga, Yudaq byu pé lé taí kyô ri.

Asak Wó Yú Râ Hkyô

¹⁶ Haú mù, Yudaq byu pé gi, Bánno buinyì nyí má, Yesuq, haú hkyô kut é yanmai, Yhang lé gunjang lo akô nghut ri.

¹⁷ Haú hkûn, Yesuq gi, yhangmoq lé, "Ngá Wa gi,

* 5:4 Bun zo 3 lhum mã é ahtang túm eq bun zo 4 lhum gi, chyúmding myo myo má a bo é nghut lhhê.

hkû-nyí jé shoq, hkâ-nhám le mù zuí nyi é nghut mù, Ngò le mù zuí nyi lhê." ga taí ri.

18 Haû mù luí, Yesuq gi, Bánno buinyi lé lhoq htên é htoq agó, Garai Gasang lé lhang, Yhang Wa ga wut é dông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám rá matú, je riyhang shikut lo akô nghut ri.

19 Yesuq, yhangmoq lé tû taí é gi, "Ngò, nungmoq lé teng za taí kôlé, haû Zo gi, yhumsing é myit dông haí le a wó kut; Yhang Wa kut é hkyô lé myang é gù za wó kut é nghut lhê; hkâsu mù gâ le, haû Íwa kut é hkyô lé za, haû Zo châng kut é yanmai nghut lhê.

20 Hkâsu mù gâ le, haû Íwa gi, Zo lé chyitdap é nghut luí, Yhang kut é hkyô lhunglhang, haû Zo lé tûn shit ri; nungmoq maú hông shoq, shí pé htoq je ko é hkyô pé lé lhang, haû Zo lé tûn shit shirâ nghut lhê.

21 Haû Íwa gi, shí bê bang lé lhoq dui toq mù, yhangmoq lé asak byí é eq rajung za, haû Zo le, Yhang byí nau é bang lé, asak byi rá nghut lhê.

22 Hau htoq agó, haû Íwa lé hkunggâ é eq rajung za, haû Zo lé le, lhunglhang bang hkungga kó sháng gaq ga, haû Íwa gi, ó yuq lé le a jéyáng e za, jéyáng é hkyô lhunglhang, haû Zo lé lum to bê nghut ri.

23 Haû Zo lé a hkunggâ é sù gi, haû Yhang lé nhang kat é

sù Íwa lé le, a hkunggâ é sù nghut ri.

24 Ngò, nungmoq lé teng za taí kôlé, Ngá dang lé gyo luí, Ngo lé nhang kat é Sù lé lumjng é sù, ó yuq nghut kôle, mara byí é a hui e za, ahtum abyuq é asak wó é nghut lhê; haû yuq gi, shi é mai lut luí, asak dui bê sù nghut ri.

25 Ngò, nungmoq lé teng za taí kôlé, haû Garai Gasang é Yhangzô é htê lé, shi byuq bê bang wó gyo rá ahkyíng gi, jé lo nyi bê nghut ri; ahkuí lhang jé to bê nghut ri. Htê haû lé gyô é bang gi, asak dui kó rá nghut lhê.

26 Hkâsu mù gâ le, Garai Gasang gi, Yhanggùng má yhang, asak bo é eq rajung za, Yhang Zo lé le, Yhanggùng má yhang, asak bò nhang é yanmai nghut ri.

27 Hau htoq agó, Yhang gi, haû Byu Yhangzo nghut é yanmai, Garai Gasang gi, tarâ jéyáng rá ahko ahkáng, Yhang lé byi bê nghut ri.

28 Shí hkyô lé hkâ-maú hong nyi kó: lup pé má lúng tô é bang banshoq gi, Yhang é htê lé wó gyo kôluí, htoq ló rá ahkyíng jé lò rá nghut lhê.

29 Ge é hkyô kut é bang gi, asak dui rá matú, dui toq kó rá nghut lhê; agè ashop hkyô kut é bang gi, mara byí é hui zo rá matú, dui toq kó rá nghut lhê.

30 Ngò gi, Ngá myit dông mai haí le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi,

tengmán lhê; hkâsu mù gâ le, Ngò gi, Ngò ô nau é đông châng é a nghut e za, Ngo lé nhang kat é Sû ô nau é đông châng é sheq ru nghut lhê.

Yesuq Eq Séng Luî, Saksé Hkâm É Hkyô

³¹ Ngá gûng lé ngò saksé hkâm é nghut jáng, ngò za saksé hkâm é hkyô gi, teng rã a nghut.

³² Ngá é hkyô lé saksé hkám byî é Sû (Ngá Wa) góyuq nyi lhê; Ngò eq séng luî, haú yuq hkâm é saksé gi, têng é hkyô lé, Ngò sê lhê.

³³ Nungmoq gi, Yohan† chyáng byù nhang kat wú bekô nghut ri; yhang gi, haú tengmán hkyô lé saksé hkám byi bê nghut lhê.

³⁴ Ngò gi, xângzo byu pé mai saksé hkám byi rã lé, ra luî a nghut, nghut kôlhang, nungmoq hkyi yu é wó huì rã matú sheq, haú su nghû taí é ru nghut lhê.

³⁵ Yohan gi, duq nyi é myibung su duqbó byî é nghut mù luî, nungmoq gi, haú duqbó é hkaú má, rayoq zo ngón nau nyi akô nghut ri.

³⁶ Nghut kôlhang, Ngò wó é saksé gi, Yohan byî é saksé htoq je kô lhê; hkâsu mù gâ le, ahkuí Ngò zui saí nyi é muzó gi, Ngò lhoq pán rã matú, haú Íwa, Ngo lé ap byî tô é nghut luî, haú Íwa, Ngo lé nhang kat é hkyô lé, saksé hkám byi nyi ri.

³⁷ Hau htoq agó, haú Ngo lé nhang kat é sù Íwa le, Ngò

eq séng luî saksé hkám byî ri; nungmoq gi, Yhâng é htê lé le, a wó gyô wú kó; Yhâng é gunghkyâng lé le, a myang wú kó;

³⁸ haú Yhâng é mungdang le, nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sû lé a lumjínkô é yanmai nghut ri.

³⁹ Nungmoq gi, haú Chyúmdang mai ahtum abyuq é asak wó yû rã nghut lhê ga myit yù kô é yanmai, haú Chyúmdang má ho wú akô nghut ri; nghut kôlhang, Chyúmdang haú gi, Ngò eq séng luî saksé hkám byî ri;

⁴⁰ nghut kôlhang, asak wó yû rã matú, nungmoq gi, Ngá chyáng a kâm lé kó nghut ri.

⁴¹ Ngò gi, byu eq hkya-ôn é lé a lhom yu é nghut lhê.

⁴² Nghut kôlhang, nungmoq lé gi, Ngò sê lhê; nungmoq é i-myit hkaú má, Garai Gasang lé chyitdap é myit a bò kó nghut ri.

⁴³ Ngò gi, Ngá Wã é myìng mai jé lé é sù nghut kôlhang, nungmoq gi, Ngo lé a lhom hap yù kó; yhâng myìng yhang lang é byù, gotú rayuq jé lé é ru nghut le gi, haú yuq lé, nungmoq lhom hap yù kó rã nghut lhê.

⁴⁴ Nungmoq gi, rayuq eq rayuq hkya-ôn lhùm é lé za hap yù luî, rayuq za nghut é Garai Gasang chyáng mai lo é hkya-ôn hkyô lé gi, a hô kô é bang nhing, hkâsu kut wó lumjínkô rã lú?

† 5:33 Yohan shí yuq gi, Wui-myhup Sará Yohan nghut lhê.

⁴⁵ Nghut kôlhang, haù Íwâ é hí má, Ngò, nungmoq lé mara hùn nhô hkâ-ngâm kó; nungmoq lé mara hun é sù gi, haù nungmoq mai myit myoqbyu tô é Mosheq ru nghut lhê.

⁴⁶ Mosheq lé nungmoq gè gè yhang lumjìng kô é ru nghut le gi, Ngo lé le lumjìng kó rà nghut lhê; hkâsu mù gâ le, Mosheq gi, Ngá é hkyô lé kâ tô é sù nghut ri.

⁴⁷ Nghut kôlhang, nungmoq gi, yhang kâ tô é pé lé lhang a lumjìng kô é nhing, Ngá dang lé, hkâsu kut wó lumjìng kó rà lhu?" ga ri.

6

*Byù Ngo Hkyîng Lé Zoshuq
Byi Tsô É Hkyô*

Mht 14:13-21; Mrk 6:30-44; Luk 9:10-17

¹ Hau htâng a myáng má, Yesuq gi, Tiberi nhông le gâ é, Galile nhông he hpoq shut gû dap ló bê nghut ri.

² Haù hkùn, byù ajùm ayò gi, haù nò bang htoq má, Yhang kut shit é limik kumlhá pé lé myàng kô é yanmai, Yhang htâng châng e ló bum akô nghut ri.

³ Yesuq gi, bùm shut doq ló mù, Yhâng é chángzô pé eq rahá zung tô ri.

⁴ Yudaq byu pè é Lhoqlhai Poì gi, chyâng lo nyi bê nghut ri.

⁵ Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat lûi, Hpilip lé, "Shí bang zo rà

muk, nga-nhúng, hkâmá é wó wuì rã lhu?" ga taì ri.

⁶ Yesuq, haù su ga taì é gi, yhang lé chyam wú rã matú za nghut ri; hkâsu mù gâ le, hkâsu kut rà hkyô gi, Yhâng é myit má bo to gù bê nghut ri.

⁷ Hpilip gi, Yhang lé, "Denari* í sho èq muk wui le lhang, rayuq ratsuí tsuí ngap rà a nghut." ga tú taì ri.

⁸ Haù hkùn, Yhâng é chángzo nghut é, Simun Petruq é yhanggu Andre gi, Yhang lé,

⁹ "Muk-yo muk ngo long eq ngozo í du wó é yuqgè zo rayuq, shí má nyi ri; nghut kôlhang, byù shí myhò bang lé luq shoq, hkâsu kut wó gâm byi rã lhu?" ga taì htoq kat ri.

¹⁰ Yesuq gi, "Haù shiwa byu pé lé, zùng nhâng keq." ga taì ri. Jowò haù gi, mhán htu é jang nghut mù, yuqgè wuì baù lhang, ngo hkyîng kô zung tô bùm bekô nghut ri;

¹¹ hau htâng, Yesuq gi, muk long pé lé yù mù, jeju hkya-on lûi, zung tô é bang lé, yhangmoq o é myhó tsing gâm byi ri. Haù eq rajung za, ngozo lé le haù su kut ri.

¹² Yhangmoq banshoq bang zô gyí bùm kô é htâng má Yhang gi, Yhâng é chángzô pé lé, "Myit gyó tô é ajap azo pé lé châng guq tsing yù keq. Haì le a langsa pyám sháng gaq." ga taì ri.

¹³ Haù mù, yhangmoq gi, zô myhit tô é muk-yo muk ngo long mâ é ajap azo pé lé châng guq tsing le, raxe

* 6:7 Denari rachap gi, byù rayuq é ra-nyí é zuihpau eq wuì é nghut lhê.

í mung byíng shoq wó guq tsíng yu akô nghut ri.

14 Haú shiwa byu pé gi, Yesuq kut é limik kumlhá lé myàng kô é hkûn, "Shí yuq gi, mingkan htoq má jé lé lô râ gâ é, Myiqhtoi yhang nghut ri-nhung!" ga tai bum akô.

15 Yesuq gi, yhangmoq lé mù, Yhang lé hkohkâm zik kut nhâng kó râ dâ é hkyô lé, sê é yanmai, Yhang baú tsik za bùm shut dum haq doq lô bê nghut ri.

Yesuq, Wui Htoq Má Sô É Hkyô

Mht 14:22-27; Mrk 6:45-52

16 Buigyum htâng, Yhâng é chángzô pé gi, haú không shut gyó lô mù,

17 lhai má wang ji luí, không hé hpoq má é Kaperna-um và shut gû e lô akô; haú hkûn, mauchut bê nghut kôlhang, Yesuq gi, yhangmoq chyáng a jé gyó lo shi nghut ri.

18 Haú u lé, laidun htan lo é yanmai, wuìhêng toq lô bê nghut ri.

19 Yhangmoq gi, sum myi déng kô lhai kôn e lô kô é hkûn, Yesuq gi, không htoq má so luí, haú lhai shut chyâng lé lo nyi é lé myàng kômù, gyuq dan bùm bekô nghut ri.

20 Nghut kôlhang, Yesuq gi, "Hkâgyuq kó, Ngò ru nghut lhê." ga yhangmoq lé tai ri.

21 Haú mù, yhangmoq gi, Yesuq lé gabú myit èq lhai hkaú má shuí hâng yù nau akô. Haú hkûn, lhai haú gi, radá dâm yhangmoq jé nau é

jang wuiyàm má jé bê nghut ri.

22 Không hé hpoq má nyi tô é byù moq mó gi, haú má lhai racham za joq lai lo é hkyô eq, lhai haú má Yesuq a bo doq ji e za, chángzô pé baú ji htoq lô kô é hkyô lé, hau htang nyí, bûn sê kat akô nghut ri.

23 Haú hkûn, haú Yhumsíng, jeju hkyá-ôn é htâng, byu pé muk zô é jowò nàm má, Tiberi myuq má é lhai pé jé lé bum ri.

24 Haú byù moq mó gi, Yesuq eq Yhâng é chángzô pé, haú má a nyi lo kô é hkyô lé sé kô é yanmai, Yesuq lé châng hô râ matú lhai haú pé má wang ji mù, Kaperna-um và shut e lô akô nghut ri.

Yesuq, Asak Muk Nghut É Hkyô

25 Yhangmoq gi, không hé hpoq má Yesuq lé myàng kôjáng, "Rabai ê, Nàng gi, shí má hkâ-nhám jé lé é lhu?" ga, Yhang lé myi akô.

26 Haú hkûn, Yesuq gi, "Ngò, nungmoq lé teng za tai kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê.

27 Htên byuq sê é zoshuq é matú, hkâshikut kó; haú Byu Yhangzo byi râ nghut é ahtum abyuq é asak é matú, ru gíng nyi é zoshuq wó yú râ lé sheq shikut nyi keq. Yhâng chyáng gi, haú Íwa Garai Gasang mai Yhâng é saksé dizik tap to bê nghut lhê." ga tù tai ri.

28 Haù mù, yhangmoq gi, "Garai Gasang ô nau é muzó pé zui saí râ matú, ngamoq haí kut ra râ lúhú?" ga Yhang lé myí akô.

29 Haú hkûn, Yesuq gi, "Garai Gasang nhang kat é Sù lé, lumjínq é gi, Garai Gasang ô nau é muzó nghut bê." ga tû taí ri.

30 Haù mù luí, yhangmoq gi, Yhang lé, "Ngamoq myoq èq wó myâng luí, Nàng lé lumjínq râ matú, Nàng, haí jung limik kumlhá kut shit râ lúhú? Nàng, haí jung kut shit râ lúhú?"

31 Haù Chyúmdang má, Yhang gi, yhangmoq zo râ matú, mauhkûng mai muk byí ri.* ga kê tô é eq rajung za, ngamoq é íchyí îwa pé gi, haù yoso hkaù má mannaq muk zo bekô nghut lhê." ga taí akô.

32 Haú hkûn, Yesuq gi, yhangmoq lé, "Ngò, nungmoq lé teng za taí kôlé, nungmoq lé mauhkûng mai muk byí é Sù gi, Mosheq a nghut, haù Ngá Wa sheq, nungmoq lé mauhkûng mai tengmán é muk byí é Sù ru nghut lhê.

33 Hkâsu mù gâ le, Garai Gasang byí é muk gi, mauhkûng mai gyó lé luí, haù mingkan lé asak byí é Sù nghut lhê." ga taí ri.

34 Yhangmoq gi, "Yhumsîng ê, ahkuí mai, ngamoq lé muk haù hkâ-nhám le byí nyi laq." ga chôm taí bum akô.

35 Haù mù, Yesuq taí kyô é gi, "Ngò gi, asak muk nghut

lhê. Ngá chyáng lé é sù gi, hkâ-nhám le zòmút é hui râ a nghut; Ngo lé lumjínq é sù le, hkâ-nhám le wuìshit é hui râ a nghut.

36 Nghut kôlhang, Ngò, nungmoq lé taí wú bê eq rajung za, nungmoq gi, Ngo lé myang wú é nghut kôlhang, a lumjínq shi kó nghut ri.

37 Haù Îwa mai Ngo lé ap byí tô é byù lhunglhang bang gi, Ngá chyáng lé kó râ nghut luí, Ngá chyáng lé é sù ó yuq lé le, Ngò gi, hkâ-nhám lé hkat htoq pyám râ a nghut.

38 Hkâsu mù gâ le, Ngò, mauhkûng mai gyó lé é gi, Ngò ô nau é hkyô lé kut râ matú a nghut e za, Ngo lé nhang kat Sù ô nau é hkyô lé kut râ matú ru nghut lhê.

39 Haù Ngo lé nhang kat Sù ô nau é hkyô gi, Yhang mai Ngo lé ap byí tô é bang mâ é rayuq lé lhang, Ngò, a lhoq hpyuq pyâm e za, jìhtûm buinyi má yhangmoq lé dum lhoq dui toq yû râ matú ru nghut lhê.

40 Hkâsu mù gâ le, Ngá Wa ô nau é hkyô gi, haù Zo lé wú mù, Yhang lé lumjínq é sù yuq hkanqmó, ahtum abyuq é asak lé wó yû râ matú nghut lhê; Ngò le, jìhtûm buinyi má haù bang lé lhoq dui toq râ nghut lhê." gâ ri.

41 Haù mù, "Ngò gi, mauhkûng mai gyó lé é muk nghut lhê." ga, Yesuq taí é yanmai, Yhang eq séng luí, Yudaq byu pé taí put kô é gi,

42 "Shí yuq gi, Yosep é

yangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lú? Haù sù é nhîng, ahkuî, 'Ngò gi, mauhkûng mai gyó lé é nghut lhê.' ga, Yhang hkâsu kut wó taí lhê lú?" gâ bum akô.

43 Haù hkûn, Yesuq gi, "Nungmoq ahkaù má hkâtaí put nyi kó.

44 Haù Ngo lé nhang kat é sù Íwa mai shuí jé é sù za a nghut jáng, ó yuq le Ngá chyáng wó jé lé rá a nghut; jé lé é sù lé gi, jhtûm buinyi má, Ngò lhoq dui toq rá nghut lhê.

45 Myiqhtoi laiká pé má, 'Yhangmoq lhunglhâng bang gi, Garai Gasâng eq mhoq byi é hui kó rá nghut lhê.'* ga kâ tô é eq rajung za, haù Íwa chyáng mai gyo yù, mhoq yu é bang yuq hkangmó gi, Ngá chyáng lé kó rá nghut lhê.

46 Haù gi, rayuq yuq mai, haù Íwa lé myang wú bê nghû nau é a nghut; Garai Gasâng chyáng mâ é Sù za sheq, haù Íwa lé myang wú é Sù nghut lhê.

47 Ngò, nungmoq lé teng za taí kôlé, lumjîng é sù gi, ahtum abyuq é asak wó lhê.

48 Ngò gi, asak muk nghut lhê.

49 Nungmoq é îchyí íwâ pé gi, haù yoso hkaù má man-naq muk zo bekô nghut lhê; nghut kôle, shi byuq bekô nghut ri.

50 Nghut kôlhang, shi gi, mauhkûng mai gyó lé lo é muk nghut lhê; haù lé zô é sù gi, a shi lo rá nghut lhê.

51 Ngò gi, mauhkûng mai gyó lé lo é, haù asak dui é muk nghut lhê; rayuq yuq, muk shi lé zô é nghut le gi, ahtum abyuq dui nyi rá nghut lhê; muk shi gi, mingkan zô wui é asak matú, Ngò byi rá nghut é Ngá gungsho nghut lhê." ga tû taí ri.

52 Haù mù, haù Yudaq byu pé gi, "Byù shi yuq gi, nga-nhúng lé, Yhâng é gungsho hkâsu kut wó byi tso rá lú?" ga, yhangmoq yhangchang dang htîng htîng lhûm bum akô.

53 Haù hkûn, Yesuq gi, yhangmoq lé, "Ngò, nungmoq lé teng za taí kôlé, haù Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó rá a nghut.

54 Ngá é gungsho lé zô é eq Ngá é sui lé shuq é sù, ó yuq nghut kôle, ahtum abyuq é asak wó é nghut lhê; Ngò gi, jhtûm buinyi má, haù yuq lé lhoq dui toq yû rá nghut lhê.

55 Hkâsu mù gâ le, Ngá é gungsho gi, zojung yhang nghut lhê; Ngá é sui gi, shujung yhang nghut lhê.

56 Ngá é gungsho lé zô é eq Ngá é sui shuq é sù, ó yuq nghut kôle, Ngò má nghut nyi lui, Ngò le haù yuq má nghut nyi bê nghut lhê.

57 Haù rû dui nyi é Íwa gi, Ngo lé nhang kat lui, Ngò gi, haù Íwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi rá nghut lhê.

58 Shî gi, mauhkûng mai gyó lé lo é muk nghut lhê. Nungmoq é îchyí îwâ pé gi, mannaq muk zo kôle, shî byuq bekô nghut ri; nghut kôlhang, muk shî lé zô é sù gi, ahtum abyuq dui nyi râ nghut lhê." ga taí ri.

59 Dang haú pé gi, Yesuq, Kaperna-um wà mâ é tara-jong má mhoqshit nyi é u lé, taí é dang nghut ri.

Chángzô Pé Myo Myo, Yesuq Lé Kâng Pyâm To Kô É Hkyô

60 Yhâng é chángzô pé myo myo gi, haú lé wó gyo kôjáng, "Dang shî gi, gyai wuî ri. Ó yuq wá wó cháng râ lú?" ga taí bum akô.

61 Yesuq gi, haú eq séng luî, Yhâng é chángzô pé taí put nyi bùm kô é lé Yhâng é myit má sé luî, yhangmoq lé, "Dang shi é yanmai, nungmoq myit htên bum akô lú?"

62 Haú Byu Yhangzo gi, Yhang nyi laí lò bê jowò shut taú doq ló é lé, nungmoq myàng kô é nghut le gi, hkâsu nghû kó râ lú?"

63 Haú Woi-nyí gi, asak byí lhê; gungsho kúm gi, haí le a wó dut nghut ri. Nungmoq lé, Ngò taí é dang pé gi, Woi-nyí le nghut lhê, asak le nghut lhê.

64 Nghut kôle, nungmoq chyáng mâ é ra-am gi, a lumjínng kó nghut ri." ga taí ri. Hkâsu mù gâ le, ô pé gi, a lumjínng kó râ eq, ó yuq gi, Yhang lé ap pyám râ nghut é hkyô lé, Yesuq gi, sâng-hi mai sé to gù bê nghut ri.

65 Yhang xoq taí é gi, "Haú su mù, haú Îwâ èq ahkáng byí é sù za a nghut le gi, ó yuq le Ngá chyáng wó lé râ a nghut nghû, Ngò, nungmoq lé taí kyo wú bê nghut lhê." gâ ri.

66 Haú dàm mai, Yhâng é chángzô pé myo myo gi, Yhâng htâng a cháng lo kô e za, taú ló byuq bùm bekô nghut ri.

67 Haú su mù, Yesuq gi, haú chángzo raxe í yuq lé, "Nungmoq le, ló byuq nau akô, a nghut lú?" ga myí ri.

68 Haú hkûn, Simun Petruq gi, "Yhumsîng ê, Nàng gi, ahtum abyuq é asak mungdang wó Sù nghut to bê lé nhîng, ngamoq gi, ó yuq chyáng é shirâ lú?"

69 Nàng gi, Garai Gasâng é Choyiyúng Sù nghut é lé, ngamoq, lumjínng lhê, sê nyi lhê." ga, Yhang lé tù taí ri.

70 Haú hkûn, Yesuq gi, "Nungmoq raxe í yuq lé, Ngò hkyin yù bê a nghut kó lú? Nghut kôle, nungmoq mâ é rayuq gi, nat nghut ri." ga tù taí ri.

71 (Yhang gi, haú Simun Iskarut é yhangzo, Yudaq lé taí nau é nghut ri; haú yuq gi, chángzo raxe í yuq má bò sù nghut kôle, htâng má, Yhang lé ap pyám râ sù nghut ri.)

7

Yesuq Eq Yhâng É Gumang Wuî

1 Hau htâng má, Yesuq gi, Yhang lé sat râ matú, Yudaq byu pé ho nyi bùm kô é yanmai, Yuda mau má a kâm sô

wún mù, Galile mau má sô lhing wún ri.

² Nghut kôlhang, haû Yu-
daq byu pé é Saksé Zúm Poî
chyâng lo nyi é hkûn,

³ Yesuq é yhanggu yuqzô
pé gi, Yhang lé, "Náng é
chángzô pé gi, Náng kut é
laklaí kumlhá pé lé myàng kó
sháng gaq, Náng, shî mai htoq
ló luî, Yuda mau shut e ló aq.

⁴ Myìng hu nau é sù gi, hkaû
zaú luî haî le a kut wú é nghut
lê. Náng gi, haú pé lé kut nyî
bê nghut é yanmai, mingkan
lé, Náng gûng tûn shit aq." ga
taí akô.

⁵ Hkâsu mù gâ le, yhanggu
sîng yuqzô pé lhang, Yhang lé
a lumjîng kó nghut ri.

⁶ Haû mù luî, Yesuq gi,
yhangmoq lé, "Ngá é ahkyîng
gi, a jé shî nghut ri; nungmoq
é ahkyîng kúm gi, hká hkûn le
joq nyi ri.

⁷ Haû mingkan gi, nung-
moq lé a jú a wó kut kó nghut
ri; nghut kôlhang, Ngo lé gi,
a jú kó; haî mù gâ le, yhang
kut é hkyô gi, agè ashop é
nghut é lé, Ngò, saksé tûn shit
é yanmai nghut ri.

⁸ Nungmoq gi, poî haú shut
doq ló keq. Ngò kúm gi, Ngá é
ahkyîng a jé shî nghut é yan-
mai, poî haú shut a doq ló
shirâ nghut lê." ga taí ri.

⁹ Haû su ga taí luî, Yhang gi,
Galile mau má nyi gyó to bê
nghut ri.

¹⁰ Nghut kôlhang, Yhang gu
pé, haû poî shut doq ló byuq
é htâng má, Yhang gi, de de
a nghut é dông, tsik za châng
doq ló bê nghut ri.

¹¹ Yudaq byu pé gi, haû poî
má, Yhang lé châng hô kômù,
"Haú yuq gi, hkâmá nghut lê
lú?" ga, myi wún akô nghut
ri.

¹² Haû byù hpûng hkaû
má, Yhang eq séng luî taí
lhûm bùm kô é má, ra-am gi,
"Yhang gi, byù gè nghut ri." ga
taí kôjáng, ra-am gi, "A nghut,
Yhang gi, byu pé lé hkyô shuí
nghoq sù nghut ri." ga tû taí
akô.

¹³ Nghut kôlhang, haû Yu-
daq suwún wuí lé gyuq kô é
yanmai, ó yuq le, Yhang eq
sêng é hkyô lé de de a wám taí
kó nghut ri.

*Haû Poî Má, Yesuq Mho-
qshit É Hkyô*

¹⁴ Haû poî rawuí nghut ló é
hkûn, Yesuq gi, noqkuq yhûm
má doq ê luî, mhoqshit hi ló
bê nghut ri.

¹⁵ Haú hkûn, Yudaq byu pé
gi, gyô maú byuq kômù, "Shí
yuq gi, mhoq yu é hkyô le a
joq wú é wá, haû-í hkâsu mù
sê lê laq?" ga myi bum akô.

¹⁶ Haû mù, Yesuq tû taí é gi,
"Ngò mhoqshit é dang gi, Ngá
é dang a nghut; Ngo lé nhang
kat Su é dang ru nghut lê.

¹⁷ Rayuq yuq, Garai Gasang
ô nau é hkyô lé châng kut nau
é nghut jáng, Ngò mhoqshit é
dang gi, Garai Gasâng chyáng
mâ é nghut a nghut é eq, Ngá
é myit dông taí é dang nghut a
nghut é lé, yhang sê gàm hkoq
yú râ nghut lê.

¹⁸ Yhumsing é myit dông
taí é sù gi, yhumsing é matú
aróng hô sù nghut ri; nghut
kôlhang, yhumsing lé nhang

kat su é matú, aróng ho é sù gi, tengmán é byù nghut ri; yhang má, a tengmán é hkyô haî le a bò nghut ri.

19 Mosheq gi, nungmoq lé jep é tarâ byî to bê, a nghut kó lúh? Nghut kôlhang, nungmoq ó yuq le, jep é tarâ haû lé a cháng kó nghut ri. Haî mù luî, Ngo lé sat nau nyi akô lúh?" gâ ri.

20 Haú hkûn, haû byù hpûng gi, "Nàng gi, nat gang wang tó sù nghut ri-nhung! Nang lé, ó yuq wá sat nau nyi ri lúh?" ga tâi akô.

21 Yesuq gi, yhangmoq lé, "Ngò, laklaí kumlhá ralhum kut jáng, nungmoq banshoq bang gi, maú byuq bum akô.

22 Nghut kôlhang, nungmoq gi, ahpyo-kuq hpyit byî é hkyô lé, Mosheq byî é nghut lhê ga luî, Bánno buinyì má, zoshâng lé ahpyo-kuq hpyit byî akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, íchyî îwâ pê chyáng mai lo é ru nghut lhê.).

23 Haû, Mosheq é jep é tarâ lé a lhoq htên pyám sháng gaq nghû, Bánno buinyì má, zoshâng lé ahpyo-kuq hpyit byî é nghut le gi, haî mù luî, Bánno buinyì má, byù rayuq é gùng gón lé, Ngò lhoq gê byî é yanmai, Ngo lé nhikjum yô akô lúh?

24 Byù du lé wú luî hkâjéyáng kó; tengmán é dông sheq jéyáng keq." ga tâi ri.

Yesuq Gi, Hkrisduq Nghut Lhê Lúh?

25 Haû mù luî, Yerusalem wà mó mâ é byu pé ra-am gi, "Haû yhangmoq sat pyám nau nyi é sù gi, shí yuq a nghut lhi?

26 Yhang gi, shí má de de dáng nyo nyi le, yhangmoq gi, Yhang lé, haî le a ga kó myhi-nhung! Yhang gi, Hkrisduq nghut lhê ga, haû ahkáng ayá wó bang gi, gè gè yhang, sê akô abe?

27 Haû Hkrisduq jé lé é hkûn gi, Yhang hkâmai lé lo é lé, ó yuq lhang sé râ a nghut." ga tâi bum akô. Nghut kôlhang, shí yuq gi, hkâmâ é sù nghut é lé, ngan-húng sê lhê;

28 Haû mù, Yesuq gi, no-qquq yhûm wàng má mho-qshit uchyang, htê mó èq tâi kat é gi, "Nungmoq gi, Ngo lé sê é htoq agó, Ngò, hkâmai lé é sù nghut é lé le, sê akô nghut ri. Ngò gi, Ngá myit dông shí má lé nyi tô é sù a nghut kôlhang, Ngo lé nhang kat é Sù gi, tengmán lhê; nungmoq gi, Yhang lé a sé kôlhang,

29 Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sù eq Yhang mai nhang kat é sù nghut lhê." gâ ri.

30 Haû mù, yhangmoq gi, Yhang lé chyup râ dá akô; nghut kôlhang, Yhâng é ahkyíng a jé shi é yanmai, Yhang lé chyup râ matú, ó yuq le loq a jé kó nghut ri.

31 Nghut kôlhang, byù hpûng hkaû mâ é bang myo myo gi, Yhang lé lumjíng bùm kôluî, "Haû Hkrisduq jé lé é

hkûn, Yhang gi, shí yuq htoq má, limik kumlhá pé je wó kut shit râ lhú?" ga taí bum akô nghut ri.

32 Haú Hparishe pé gi, haú byù hpûng hkaú má, Yesuq eq sêng é hkyô lé, haú su ga dangsoq soq lhûm nyi kô é hkyô lé wó gyô yu akô. Haú mù, haú hkyangjong agyi pé eq Hparishe pé gi, Yhang lé ê chyup râ matú, noqkuq yhûm zúng é bang lé nhang kat akô.

33 Haú hkûn, Yesuq gi, "Ngò gi, nungmoq eq rahá rayoq zo za nyi râ nghut lhê; hau htâng, Ngo lé nhang kat Su chyáng taú ló râ nghut lhê.

34 Haú hkûn, nungmoq gi, Ngo lé hô kôlhang, myang hô kó râ a nghut; Ngò nyi é jang má, nungmoq wó jé kó râ a nghut." ga taí ri.

35 Hau é yanmai, Yudaq byu pé, rayuq eq rayuq taí lhum kô é gi, "Shí yuq gi, Yhang lé nga-nhúng a myang hô loshoq, hká shut e byuq râ dô lhê lhú? Yhang gi, Grik byu pé má nyi byo myín tô é nga-nhúng é byu pé nyi é jowò má ê mù, Grik byu pé lé, é mhòqshit râ dô lhê lhú?

36 'Nungmoq gi, Ngo lé hô kôlhang, myang hô kó râ a nghut.' gâ é eq, 'Ngò nyi é jang má, nungmoq wó jé kó râ a nghut.' gâ é, Yhang taí é dang gi, hai jung wá gá naú é nghut lhê lhú?" gâ akô.

37 Haú lô htâng é eq je ahkyak é Poí buinyi má, Yesuq toq yap luí, htê mó èq taí é gi, "Wuì shit sù gi, Ngá chyáng lé mù, shuq sháng gaq.

38 Ngo lé lumjîng é sù ó yuq nghut kôle, haú Chyúmdang má taí tô é eq rajung za, 'Yhâng chyáng mai asak uchyâm é wuìlàng yui htoq lô râ nghut lhê.'" gâ ri.

39 Yhang haú su gâ é gi, Yhang lé lumjîng é bang myang hap yù râ nghut é, haú Woi-nyí lé taí é nghut ri. Haú hkûn jé shoq, haú Woi-nyí lé a byi kat shi nghut ri. Hkâsu mù gâ le, Yesuq gi, hpungwup shingkang dan hú é a hui nhâng shi é yanmai nghut ri.

40 Yhâng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haú nghut ri." ga taí akô.

41 Ra-am gi, "Shí yuq gi, Hkrisduq nghut ri." ga taí akô. Góbang nghut jáng, "Hkrisduq wá Galile mau mai htoq lé râ nghut lhê lhú?

42 Haú Chyúmdang má, Hkrisduq gi, Dawiq é awut ashín mâ é nghut luí, Dawiq nyi lai lo é Betlehem wà mai htoq ló râ nghut lhê gâ é, a nghut lhú?" ga myí bum akô nghut ri.

43 Haú mù luí, Yesuq é yanmai, shiwa byu pé gi, gàm hkoq lò byuq bekô nghut ri.

44 Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

Yudaq Byu Pé Lé Shuì U É Bang A Lumjîng Kô É Hkyô

45 Hau htâng má, haú noqkuq yhûm zúng bang gi, haú hkyangjong agyi pé eq Hparishe pé chyáng taú ló kô é hkûn, haú bang gi,

yangmoq lé, "Nungmoq, haí mù luí, Yhang lé a shuí lo kô é lhú?" ga lhom myí akô.

⁴⁶ Haú hkûn, haú noqkuq yhûm zúng bang gi, "Shí yuq su ga taí é byù gi, ó le a nyi wú é nghut lhê." ga taí kyô akô.

⁴⁷ Haú mù, haú Hparishe pé gi, "Nungmoq lé le, Yhang èq mhoq hpyoq yù bekô lhú?"

⁴⁸ Haú zaú wui chyáng le, Hparishe pê chyáng le, Yhang lé lumjínng é byù bò akô lhú?

⁴⁹ A bò! Nghut kôlhang, haú jep é tarâ lé a sê é byù moq mó shí gi, nhîng pyâm é hui bekô nghut ri." ga nhik-yô é dông tù taí kat akô nghut ri.

⁵⁰ Nghut kôlhang, yangmoq hpúng má bo é, hí hkûn Yesuq chyáng e wú bê sù nghut é, Nikodimu gi,

⁵¹ "Nga-nhúng é tarâ gi, byù rayuq lé, yhâng é dang hí a gyô wú é eq, yang haí kut é lé a sê e za, mara byi lhê lhú?" ga, yangmoq lé myí ri.

⁵² Haú hkûn, yangmoq gi, "Nàng le, Galile mau byù nghut lhê lhú? Galile mau mai myiqhtoi rayuq lhang a htoq é hkyô lé, nàng gon wú aq, haú jáng sé rá nghut lhê." ga tù taí akô.

⁵³ Hau htâng, yuq hkangmó gi, ó le ô yhûm shut taú ló byuq bùm bekô nghut ri.*

8

Yesuq Lé, Lé Myí Chyam Wú Kô É Hkyô

¹ Yesuq kúm gi, Tsanlun Bùm shut e ló bê nghut ri.

² Htang napkyó napsûn noq le, Yesuq gi, noqkuq yhûm wàng hkaú má dum ê luí, byu pé lhunglhang gi, Yhâng é lhîngkhyuq má lé zîng bum akô; haú mù, Yhang gi, zung to luí, yangmoq lé mhoqshit ri.

³ Haú hkûn, haú tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuí lé lô kômù, gung gung má shap to kôluí,

⁴ Yesuq lé, "Sarâ ê, myiwe myhí shí lé, sulàng shut nyi é má myang chyup yu é nghut lhê.

⁵ Haú Mosheq é tarâ má gi, shí su é myiwe lé, luqgok èq dú sat pyâm keq ga, nganhung lé hkunmó hkyô tô ri. Ahkuí, Nàng gi, hkâsu nghû rá lhú?" ga myí akô.

⁶ Yangmoq haú su ga myí é hkyô gi, Yhang lé mara wó hûn shoq ga, chyam wú rá matú nghut ri.

Nghut kôlhang, Yesuq gi, ngóm mù, myigùng má loqny-huí èq htaú kâ nyi ri.

⁷ Yhang lé, yangmoq ru jang myí nyi kô é hkûn, Yhang gi, yap nyhang kat mù, yangmoq lé, "Nungmoq mâ é mara a wó é sù hí, myiwe myhí shí yuq lé luqgok èq dú sháng gaq." ga taí ri.

⁸ Hau htâng, Yhang gi, dum ngóm luí, myigùng má kâ nyi ri.

⁹ Yangmoq gi, haú su gâ é lé wó gyo kôjáng, je mang bang mai hí luí, rayuq htâng

* 7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

rayuq ló byuq bekô nghut luî, Yesuq baú za myit gyó tô é eq, myiwe myhí haû jâng yap nân tô ri.

¹⁰ Yesuq gi, yap nyhang kat luî, yhang lé, "Myiwe myhí ê, yhangmoq hká ló bekô lúh? Ó yuq eq le, nàng lé mara a byi kó lúh?" ga myi ri.

¹¹ Yhang gi, "Yhumsîng ê, ó yuq le mara a byi kó nghut ri." ga tû taî ri.

Haû hkûn, Yesuq gi, "Ngò le, nàng lé mara a byi, ló aq hkoi, ahkuî mai mara hkâdum kut shut lo." ga taî kat ri.

Yesuq, Mîngkân É Maubó

¹² Yesuq gi, shiwa byu pé lé dum nyo é hkûn, "Ngò gi, mîngkân é maubó nghut lhê; Ngá htâng châng é sù ó yuq nghut kôle, mauchut hkaû má hkâ-nhám le so râ a nghut, asak maubó lé wó râ nghut lhê." ga taî ri.

¹³ Haû mù, haû Hparishe pé gi, "Wú aq, Náng gûng Nàng saksé hkâm yu é nghut ri; Náng é saksé gi, teng râ a nghut." ga taî akô.

¹⁴ Haû hkûn, Yesuq gi, "Ngá gûng Ngò saksé hkâm kôlhang, Ngá é saksé gi, têng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri.

¹⁵ Nungmoq gi, byù hkyam dông za jéyáng akô; Ngò gi, ó yuq lé le a jéyáng é nghut lhê.

¹⁶ Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu

mù gâ le, Ngò gi, Ngò baú a nghut, haû Ngo lé nhang kat é sù Îwa eq rahá nghut nyi lhê.

¹⁷ Haû nungmoq é tarâ má yhang le, í yuq mai hkâm é saksé gi, têng lhê ga kâ tô ri.

¹⁸ Ngò gi, Ngá é matú saksé hkâm yù sù nghut lhê; hau htoq agó, haû Ngo lé nhang kat é sù Îwa le, Ngá é matú saksé hkâm byi é nghut lhê." ga tû taî ri.

¹⁹ Haû mù, yhangmoq gi, Yhang lé, "Náng Wa gi, hkâmá lúh?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kô é nghut le gi, Ngá Wa lé le, sé kó râ nghut lhê." ga tû taî ri.

²⁰ Dang haú pé gi, haû no- qkuq yhùm wàng hkaû mâ é alu kat jang nàm má, Yhang mhoqshit nyi é u lé taî é dang nghut ri. Nghut kôlhang, Yhang lé, ó yuq le a chyup kó; hkâsu mù gâ le, Yhâng é ahkyíng a jé shi é yanmai nghut ri.

²¹ Haû mù luî, Yesuq gi, yhangmoq lé, "Ngò gi, ló byuq râ nghut lhê, haû hkûn, nungmoq Ngo lé hô kó râ, yhum- sing é mara má le shí kó râ nghut lhê. Ngò ló é jang má, nungmoq wó jé kó râ a nghut." ga, radàm dum puq taî ri.

²² Hau é yanmai, haû Yudaq byu pé gi, "Ngò ló é jang má, nungmoq wó jé kó râ a nghut." gâ é gi, Yhânggùng yhang sat shi râ gâ é nghut lhê lúh?" ga myi bum akô.

23 Nghut kôlhang, Yesuq xoq taí é gi, "Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shî eq sêng é bang nghut akô; Ngò kúm gi, mingkan shî eq sêng é sù a nghut.

24 Haû mù, nungmoq gi, yhumsing é mara má shî kó râ nghut lhê nghû, Ngò taí é nghut lhê. Ngò gi, haû Yuq nghut lhê nghû taí é lé, nungmoq a lumjîng kô é nghut jáng, nungmoq gi, gè gè yhang, yhumsing é mara má shî kó râ nghut lhê." gâ ri.

25 Haû hkûn, yhangmoq gi, "Nàng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhám le taí nyi bê nghut lhê.

26 Ngò gi, nungmoq eq séng luí, taí râ hkyô eq jéyáng râ hkyô, myo myo joq lhê. Nghut kôlhang, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyô yu é gú lé, Ngò, mingkan lé taí kyô lhê." ga tù taí ri.

27 Yesuq gi, yhangmoq lé, Yhâng Wa eq sêng é hkyô taí kyô nyi é lé, yhangmoq gi, a sê gyo kó nghut ri.

28 Haû mù luí, Yesuq gi, "Haû Byu Yhangzo lé nungmoq tu shap* kat é hkûn sheq, Ngò gi, haû Yuq nghut é hkyô lé le, yhumsing myit dông hai le a kut e za, haû Íwa mhoq byi é dông za taí é hkyô lé le, nungmoq sé kó râ nghut

lhê.

29 Haû Ngo lé nhang kat é Sù gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baú za a tò pyâm to nghut ri." ga taí ri.

30 Yhang, haû su taí nyi é u lé lhang, byu myo myo gi, Yhang lé lumjîng bùm bekô nghut ri.

Abraham É Awut Ashín Pé Hkyô

31 Haû mù, Yesuq gi, Yhang lé lumjîng é Yudaq byu pé lé, "Ngò mhoqshit é hkyô lé châng kut nyi bekô nghut jáng, nungmoq gi, gè gè yhang, Ngá é chángzô pé nghut bekô.

32 Nungmoq gi, haû tengmán hkyô lé sé kó râ nghut luí, haû tengmán hkyô gi, nungmoq lé lhoq lhut kat râ nghut lhê." ga taí ri.

33 Haû hkûn, yhangmoq gi, "Ngamoq gi, Abraham é awut ashín pé nghut luí, ó yuq é jùn le hkâ-nhám a dut wú é nghut lhê. Haû mù, 'nungmoq lé lhoq lhut kat râ' nghû Nàng hkâsu kut wó taí lhê lhu?" ga tù taí akô.

34 Yesuq dum tù taí é gi, "Ngò, nungmoq lé teng za taí kôlé, mara kut shut é sù gi, marâ é jùn nghut lhê.

35 Jùn gi, yhûm ikun eq hkâ-nhám le sêng nyi râ a nghut; zo kúm gi, ikun eq ahtum abyuq séng lhê.

* 8:28 *Tu shap* gâ é lichyúm gi, tapzîng htoq má jén sat pyám râ gâ é nghut lhê.

36 Haû mù luî, haû Zo gi, nungmoq lé lhoq lhut kat é nghut jáng, nungmoq gi, gè gè yhang, lut berâ nghut lhê.

37 Nungmoq gi, Abraham é awut ashín pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yù kô é yanmai, Ngo lé sat râ dâ akô nghut ri.

38 Ngò gi, Ngá Wâ chyáng mai myang yu é eq rajung za, nungmoq lé taî kyô nyi lhê; nungmoq le, nungmoq é îwa chyáng mai wó gyô yu é eq rajung za kut nyi akô nghut ri." ga ri.

39 Haû hkûn, yhangmoq gi, "Ngamoq é îwa gi, Abraham nghut lhê." ga tâ taî kôjáng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó râ nghut lhê.

40 Nghut kôlhang, nungmoq gi, haû Garai Gasâng chyáng mai wó gyô yu é tengmán hkyô lé taî kyo sù nghut é Ngo lé, sat pyám nau akô nghut ri. Haû sù é hkyô gi, Abraham a kut é nghut lhê.

41 Nungmoq gi, nungmoq é îwa kut é muzó lé yhang, kut nyi akô." ga tâ ri.

Haû hkûn, yhangmoq gi, "Ngamoq gi, dezo amyû a nghut; ngamoq gi, Îwa rayuq za wó lhê; haû gi, Garai Gasang nghut lhê." ga tâ he akô nghut ri.

Zô Wui É A-kyang Gi, Mó Ó Nghut É Hkyô Shit

42 Yesuq gi, yhangmoq lé, "Garai Gasang gi, nungmoq é

Îwa nghut é nghut jáng, nungmoq gi, Ngo lé chyitdap kó râ nghut lhê; hkâsu mù gâ le, Ngò gi, Garai Gasâng chyáng mai lé jé luî, ahkuî, shí má nyi tô é nghut lhê. Ngò gi, Ngá myit đông lé lo é a nghut, Yhang sheq Ngo lé nhang kat é ru nghut lhê.

43 Nungmoq gi, haû mù Ngá é dang lé a sê gyo kô é lhú gâ le, Ngò taî é dang lé, nungmoq a wó lhom yù kô é yanmai nghut ri.

44 Nungmoq gi, haû nungmoq é îwa nghut é nat Tsadán eq sêng é bang nghut luî, nungmoq é îwa ô nau é hkyô lé kut nau bum akô. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haû tengmán hkyô má a yap gîng nyi nghut ri. Yhang gi, mhaû é hkûn, yhang é myit má bo é đông taî ri; hkâsu mù gâ le, Yhang gi, byù mhaû nghut luî, mhaû hkyô pê é îwa nghut ri.

45 Haû su mù, Ngò, nungmoq lé, haû tengmán hkyô taî kyô é yanmai, nungmoq gi, Ngo lé a lumjîng kó nghut ri.

46 Nungmoq mâ é ó yuq wá, Ngo lé mara bo lhê nghú saksé wó tûn shit akô lhú? Ngò gi, haû tengmán hkyô lé taî nyi é nghut le nhîng, nungmoq, Ngo lé haû mù a lumjîng kô é lhú?

47 Garai Gasang eq sêng é sù gi, Garai Gasang taî é dang lé gyô lhê. Nungmoq a gyo kô é gi, nungmoq, Garai Gasang eq a séng kô é yanmai nghut ri." ga tâ ri.

Yesuq Eq Abraham

48 Haú hkûn, haú Yudaq byu pé gi, Yhang lé, "Nàng gi, Samariq byù nghut é htoq agó, nat gang wang júng to sù nghut lhê nghû, ngamoq taí é dang gi, jô lhê a nghut lú?" ga myí akô.

49 Yesuq gi, "Ngò gi, nat gang wang júng é hui sù a nghut; Ngò gi, Ngá Wa lé sheq hkunggâ é ru nghut lhê; nungmoq kúm gi, Ngo lé taí hpoî nyi akô nghut ri.

50 Ngò gi, Ngá é matú aróng ho nyi é a nghut; nghut kôlhang, hô byi Sù rayuq nyi lhê, haú yuq jéyáng sháng gaq.

51 Ngò, nungmoq lé teng za taí kôlé, Ngá dang lé châng é sù gi, hkâ-nhám le, shî râ a nghut." ga taí ri.

52 Hau é yanmai, haú Yudaq byu pé gi, "Nàng gi, nat gang wang júng to sù nghut é lé, ahkuí, ngamoq sé bê! Abraham gi, shi byuq bê; haú myiqhtoí pé le, shi byuq bekô nghut ri; nghut kôlhang, Nàng gi, 'Ngá dang lé châng é sù gi, hkâ-nhám le, shî râ a nghut.' ga taí ri.

53 Nàng gi, ngamoq é îwa Abraham htoq hkik lhê lú? Yhang gi, shi byuq bê; haú myiqhtoí pé le, shi byuq bekô nghut ri. Náng gûng nàng ó yuq su ngàm lhê lú?" ga taí akô.

54 Yesuq gi, "Ngá gûng Ngò lhoq gyaú yu é nghut jáng,

Ngá é aróng gi, hai hpau-dap é a nghut; nghut kôlhang, haú nungmoq é Garai Gasang nghut lhê ga nungmoq taí é sù, Ngá Wa gi, Ngo lé lhoq gyaú é sù ru nghut lhê.

55 Nungmoq gi, Yhang lé a sé kó nghut ri; nghut kôlhang, Ngò gi, sê lhê. Yhang lé a sé nghû Ngò taí é ru nghut le gi, Ngò le nungmoq su byù mhaú dut râ nghut lhê; nghut kôlhang, Ngò gi, Yhang lé sé luí, Yhâng é dang gyo sù nghut lhê.

56 Nungmoq é îwa Abraham gi, Ngo lé râ buinyi lé myoqbyu gabú nyi é nghut luí, myàng mù, gabú bê nghut ri." ga tû taí ri.

57 Haú hkûn, haú Yudaq byu pé gi, Yhang lé, "Nàng gi, asak ngo xê zàn lhang a nghut shî é nhing, Abraham lé myàng wú é nghut lhê lú?" ga taí akô.

58 Yesuq gi, "Ngò, nungmoq lé teng za taí kôlé, Abraham lhang a hkû shi má, Ngò nyi gù bê nghut lhê."* ga tû taí ri.†

59 Haú mù luí, yhangmoq gi, Yesuq lé, dú râ ga luq-gok kui yu akô; nghut kôlhang, Yesuq gi, haú noqkuq yhûm mai haq htoq ló byuq bê nghut ri.

9

Myoqjit Sù Lé Lhoq Gê Byí É Hkyô

1 Yesuq gi, sô yông ló nyi é u lé, hku lé é mai myoqjit to gù

* 8:58 Htoq Ló 3:14 † 8:58 Bun zo shi má, Yesuq gi, Yhânggûng yhang Garai Gasang nghut lhê gâ nyi nghut ri.

nghut é byù rayuq lé myang ri.

² Haú hkûn, Yhâng é chángzô pé gi, Yhang lé, "Rabai ê, shí yuq, myoqjit gû hku lé é gi, ó yuq kut shut é yubak é yanmai nghut lhê lú? Yhang kut shut é lú? A nghut jáng, yhâng nu yhâng wa kut shut é lú?" ga myí akô.

³ Yesuq tû taí é gi, "Haú gi, yhang kut shut é yanmai le a nghut, yhâng nu yhâng wa kut shut é yanmai le a nghut; haú Garai Gasâng é muzó lé, yhang má wó lhoq htoq shit râ matú, haú dut é ru nghut lhê.

⁴ Nga-nhúng gi, haú Ngo lé nhang kat Su é muzó lé, nyí nghut tô ashí hkûn, zui saí nyí ra râ dut lhê; myín jé jáng gi, ó yuq le, mù wó zui saí râ a nghut.

⁵ Ngò gi, mingkan htoq má nyí tô é u lé, mingkân é maubó nghut lhê." gâ ri.

⁶ Yhang gi, haú su ga taí luí, myigùng má sôkan byé hkyó mù, tse-nyhaq saí yù luí, haú yuq é myoqjí má but byí ri.

⁷ Hau htâng, haú yuq lé, "Haú Siloam wuihtum má ê chí pyám aq." ga taí ri. (Siloam gâ é gi, nhang é gâ é lichyúm nghut lhê.). Haú mù, haú yuq gi, ê chí mù, myoq myàng luí, yhùm shut ló bê nghut ri.

⁸ Haú yhâng é yhumkyo bang eq yhang dung zô wún é lé myang wú é bang gi, "Shí yuq gi, haú zung to mù, dung zo zo lhaq kut é sù, a nghut kó lú?" ga myí bum akô.

⁹ Ra-am gi, "Haú yuq nghut lhê." gâ bum akô.

Góbang gi, "A nghut, haú yuq su dut e za ru nghut lhê." ga taí akô.

Nghut kôlhang, yhang gi, "Ngò, haú yuq yhang nghut lhê." ga taí ri.

¹⁰ Haú hkûn, yhangmoq gi, "Haú nghut le gi, náng myoq hkâsu kut wó myang é lú?" ga myí akô.

¹¹ Yhang gi, "Haú Yesuq gâ é byù rayuq, tse-nyhaq ratsuí saí yù luí, ngá é myoqjí má but byi mù, 'Siloam wuihtum má ê chí pyám aq.' ga ngo lé taí ri; haú mù, ngò ê chí pyám é htâng má, ngá myoq wó myang é nghut lhê." ga tû taí ri.

¹² Haú hkûn, yhangmoq gi, "Byù haú yuq gi, hkâmá nyí ri lú?" ga, yhang lé myí akô.

Yhang gi, "Ngò a sé." ga taí ri.

Myoq Dum Myang Byuq É Hkyô Lé, Hparishe Pé Gôn Wú É Hkyô

¹³ Yhangmoq gi, haú myoqjit wú bê sù lé, Hparishe pé chyáng shuí lé akô.

¹⁴ Yesuq, tse-nyhaq saí yù mù, haú yuq é myoq lé lhoq myâng byí é buinyi gi, Bánno buinyi nghut ri.

¹⁵ Haú mù, yhang, myoq hkâsu kut wó myang é hkyô lé, haú Hparishe pé le dum myí akô. Haú jáng, yhang gi, "Haú yuq gi, ngá é myoqjí má tse-nyhaq but byi mù, ngò gi, ê chí pyám jáng, ngá myoq myàng bê nghut lhê." ga tû taí ri.

¹⁶ Haû Hparishe pé ra-am gi, "Shí yuq gi, Bánno buinyi é tarâ lé a châng é sù nghut é yanmai, Garai Gasâng chyáng mai lé é sù a nghut." ga taí akô.

Nghut kôlhang, ra-am gi, "Yubak dap sù rayuq gi, haû su é limik kumlhá pé lé, hkâsu wó kut htoq râ lú?" ga myí akô. Haû mù, yhangmoq gi, myit a huí lúm bùm lò kó nghut ri.

¹⁷ Haû mù, yhangmoq gi, haû myoqjit wú sù shut lêng mù, "Nang lé myoq lhoq myâng byí é sù gi, hkasû é byù nghut lê nghû, nàng taí râ lú?" ga dum myi kôjáng, "Yhang gi, myiqhtoi rayuq nghut ri." ga, yhang tû taí ri.

¹⁸ Haû Yudaq byu pé gi, haú yuq myoqjit wú é hkyô lé le, ahkuí myoq dum myàng bê nghut é hkyô lé le, haû yhâng nu eq yhâng wa lé, ê ji lò nhang é hkûn jé shoq, a lumjíng kó nghut ri.

¹⁹ Haû mù, Yhangmoq gi, haû yhâng nu eq yhâng wa lé, "Shí yuq gi, nungnhik é yhangzo nghut lê lú? Hku lé é hkûn mai, myoqjit gù nghut lê lú? Yhang, ahkuí, hkâsu kut wó myang é lú?" ga myí akô.

²⁰ Haú hkûn, yhâng nu eq yhâng wâ nhik gi, "Yhang gi, ngá-nhik é yhangzo nghut é lé le, hku lé é hkûn mai myoqjit gù nghut é lé le, ngá-nhik sê lhê.

²¹ Nghut kôlhang, yhang, ahkuí hkâsu kut wó myang é hkyô lé le, yhâng é myoq lé ó yuq eq lhoq myâng byí é hkyô

lé le, ngá-nhik a sé. Yhang, asak wáng bê, yhang lé myí wú keq, yhânggùng yhang dat taí kyo râ nghut lhê." ga tû taí akô.

²² Haû yhâng nu eq yhâng wâ nhik gi, Yudaq byu pé lé gyuq kô é yanmai, haû su ga taí kô é nghut ri; hkâsu mù gâ le, Yesuq gi, haû Hkrisduq nghut lhê ga yín yu é sù, ó yuq lé nghut kôle, haû tarajong mai lhoq htoq pyám râ nghut lhê ga, haû Yudaq suwún wuí chôm myit hpyit to bekô nghut é yanmai nghut ri.

²³ Hau é yanmai, yhâng nu eq yhâng wâ nhik gi, "Yhang, asak wáng bê, yhang lé myí wú keq." ga taí kô é nghut ri.

²⁴ Haû Hparishe pé gi, myoqjit wú bê sù haú yuq lé dum ji yù mù, "Garai Gasang lé za hkya-on waq toq aq! Haú yuq gi, yubak dap sù rayuq nghut é lé ngamoq sê lhê." ga taí akô.

²⁵ Haú hkûn, yhang tû taí é gi, "Yhang gi, yubak dap sù rayuq nghut lê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myâng bê nghut é lé za, ngò ru sê lhê." gâ ri.

²⁶ Hau htâng, yhangmoq gi, "Yhang, nang lé haí kut byí ri lú? Náng é myoq lé, yhang, hkâsu kut lhoq myâng byí ri lú?" ga, yhang lé myí akô.

²⁷ Haú hkûn, yhang gi, "Ahkuí za, ngò, nungmoq lé taí kyo bê le, nungmoq sheq a gyo kôluí nhing! Nungmoq gi, haí mù dum gyô nau akô lú? Nungmoq le, Yhâng é chángzô

pé dut nau akô lúhú?" ga taù myî ri.

28 Haù mù, yhangmoq gi, yhang lé gyaí rhoí é đông mai, "Nàng gi, haù yuq é chángzo nghut ri-nhung! Ngamoq kúm gi, Mosheq é chángzô pé ru nghut lê!

29 Garai Gasang gi, Mosheq lé dáng nyo é hkyô lé, ngamoq sê lê; nghut kôlhang, haù yuq eq séng luí, Yhang gi, hkâmai lé é sù nghut é lé lhang, ngamoq a sé." ga taí akô.

30 Haù hkûn, haù yuq gi, "Yhang, ngo lé myoq wó lhoq myang byi kôlhang, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê!

31 Garai Gasang gi, yubak dap bâng é dang lé a gyo byi é hkyô lé, nga-nhung sê lê. Garai Gasang gi, Yhang lé noqkuq luí, Yhang ô nau é hkyô lé, kut é sù é dang lé kúm gyo byi lê.

32 Hku lé é hkûn mai myoqjit gù nghut é byù lé, ó yuq eq myoq lhoq myâng byi é gâ é hkyô lé, mingkan lé joq é hkûn mai, ó yuq le a wó gyô wú é nghut lê.

33 Haù yuq gi, Garai Gasang chyáng mai lé é sù za a nghut le gi, haí le wó kut râ a nghut." ga tû taí ri.

34 Haù su ga jáng, yhangmoq gi, "Nàng gi, yubak htui má hku lé é sù nghut to luí nhing, ngamoq lé wám mhoqshit lê lúhú?" ga tû taí kôluí, yhang lé hkat htoq pyâm akô nghut ri.

Woi-nyí Má Myoqjit É Hkyô

35 Yesuq gi, haù yuq lé yhangmoq hkat htoq pyâm é hkyô lé wó gyo luí, yhang lé myàng hui jáng, "Nàng gi, haù Byu Yhangzo lé lumjing lê lúhú?" ga myî ri.

36 Haù hkûn, haù yuq gi, "Yhumsing ê, haù gi, ó yuq nghut lê lúhú? Yhang lé, ngò wó lumjing sháng gaq, taí kyo laq." ga myî ri.

37 Yesuq gi, "Nàng, haù yuq lé myàng wú bê nghut lê; ahkuí, nàng eq dáng nyo nyi é sù gi, haù yuq yhang nghut lê." ga taí ri.

38 Haù mù, haù yuq gi, "Yhumsing ê, ngò lumjing lê!" ga taí luí, Yhang lé noqkuq ri.

39 Haù hkûn, Yesuq gi, "Haù myoqjit bang myoq myàng kó râ hkyô eq myoq myàng bang myoqjit kó râ hkyô lé, tarâ jéyáng râ matú, mingkan shí má Ngò jé lé é nghut lê." ga taí ri.

40 Yhang eq rahá nghut nyi é Hparishe pé ra-am gi, Yhang haù su ga taí é lé wó gyo kôjáng, "Hkâsu htà? Ngamoq gi, myoqjit bang dut bê lúhú?" ga myî akô.

41 Haù hkûn, Yesuq gi, "Nungmoq, myoqjit é bang ru nghut le gi, yubak mara a bò kó râ nghut lê; nghut kôlhang, ahkuí, nungmoq gi, myoq myàng bang nghut lê ga kô é yanmai, nungmoq má yubak mara bo ashí kó nghut ri.

10

Sau Zúng Sû Eq Sau Hpúng

¹ Ngò, nungmoq lé teng za tái kôlé, haû sau hkup má, hkúmdong mai a wang e za, gó hkyô đông doq lut wang é sủ gi, hkau sủ eq damyaq nghut ri.

² Haû hkúmdong mai wang é sủ kúm gi, sau zúng sủ nghut ri.

³ Haû hkum zúng sủ gi, yhang lé hkum hpóng byí é htoq agó, haû sau pé gi, yhang é htê lé gyo byí akô. Yhang gi, yhang é sau pé lé, mying lang luí wut yù mù, yhangmoq lé shuí htoq htoq kut nyi ri.

⁴ Yhang é sau pé banshoq lé hpông htoq yù mù, yhang gi, hí má sô ri; sau pé gi, yhang é htê lé sê gyo kô é yanmai, yhang é htâng má châng akô nghut ri.

⁵ Nghut kôlhang, yhangmoq gi, byù bing é htâng má, hkâ-nhám lhang cháng kó rả a nghut e za, yhang chyáng mai kúm hpang byuq kó rả nghut lhê; hkâsu mù gả le, haû byù bing é htê lé, yhangmoq a sê gyo kô é yanmai nghut ri." ga tái ri.

⁶ Yesuq gi, dangtú haû lé yù mù, yhangmoq lé tái kyô ri; nghut kôlhang, yhangmoq gi, Yhang haí tái kyô nyi é lé, a sê gyo kó nghut ri.

⁷ Haû mù, Yesuq dum tái é gi, "Ngò, nungmoq lé teng za tái kôlé, Ngò gi, haû sau pé wang é hkúmdong nghut lhê.

⁸ Ngá é hí má lé é lhunglhang bang gi, hkau bang eq damyaq pé nghut

akô; haû sau pé kúm gi, yhangmoq é dang lé a lhom gyo byi kó nghut ri.

⁹ Ngò gi, hkúmdong nghut lhê; Ngò mai wang é sủ ó yuq nghut kôle, hkyi yu é hui rả nghut lhê. Haú yuq gi, htoq htoq wàng wàng wó kut rả eq mhan-yô myang hô rả nghut lhê.

¹⁰ Haû hkau sủ gi, hkau rả, sat rả eq lhoq htên pyám rả matú, lé e za nghut lhê. Ngo lé é gi, yhangmoq, asak wó yủ rả eq byingjup é asak lé wó yủ rả matú sheq nghut lhê.

¹¹ Ngò gi, ge é sau zúng sủ nghut lhê; haû ge é sau zúng sủ gi, sau pé é matú, yhum-sing é asak lé ap byi pyâm é nghut lhê.

¹² Haû langchyáng kut sủ gi, sau pé lé sing é sau zúng sủ a nghut; haû mù, yhang gi, haû wamhkui lé lo é lé myàng jáng, saú pé lé pyâm to mù hpang ló byuq rả nghut lhê; haû hkun, wamhkui gi, sau hpúng lé é htim luí, lhoq pyo pyám rả nghut lhê.

¹³ Yhang gi, langchyáng hpó nghut luí, haû sau pé é matú haí le a myit chiq byí é yanmai, hpang é nghut ri.

¹⁴ Ngò gi, haû ge é sau zúng sủ nghut lhê; haû Íwa gi, Ngo lé sê é nghut luí, Ngò le, haû Íwa lé sê é eq rajung za,

¹⁵ Ngá é sau pé lé, Ngò sê lhê; Ngá é sau pé le, Ngo lé sê akô nghut ri; Ngò gi, haû sau pé é matú, yhum-sing é asak lé ap byi pyâm é nghut lhê.

¹⁶ Ngò gi, sau hkup shi ma é a nghut é gotú sau pé wó

ashî; sau haú pé lé le, Ngò, shuí yù ra râ nghut lhê; sau haú pé le, Ngá é htê lé gyo kó râ nghut lhê; haú hkûn, sau hpúng rahpúng za dut luí, sau zúng sù le rayuq za, nghut râ nghut lhê.*

17 Ngò gi, Ngá é asak lé dum wó taú yù sháng gaq nghû, yhumsing é asak lé ap byi pyâm é yanmai, Ngá Wa gi, Ngo lé chyitdap é nghut lhê.

18 Ngá é asak lé, ó yuq èq le wó yu pyâm é a nghut, Ngá é myit đông byi pyâm é ru nghut lhê. Ngò gi, yhumsing asak lé ap byi pyám râ ahko ahkáng eq haú lé dum taú yù râ ahko ahkáng wó sù nghut lhê. Haú gi, Ngá Wâ chyáng mai Ngò wó yu é hkunmó nghut lhê." gâ ri.

19 Dang haú pê é yanmai, haú Yudaq byu pé gi, myit a huí lhum dum dut byuq bekô nghut ri.

20 Haú mâ é bang myo myo gi, "Yhang gi, nat gang wang júng to luí, nâ byuq bê nghut ri. Yhâng é dang lé, haí mù gyô nyi akô lhú?" ga taí bum akô.

21 Nghut kôlhang, góbang gi, "Dang shi pé gi, nat gang wang júng tô é byù taí é dang a nghut. Nat gang gi, myoqjit sù lé, myoq wó lhoq myâng nhâng râ lhú?" ga taí bum akô nghut ri.

Yudaq Byu Pé A Lumjínq Kô É Hkyô

22 Yerusalem wà mó má, Ap Nóng Poi* jé bê nghut ri. Haú gi, gyoqmyò nám nghut ri.

23 Haú hkûn, Yesuq gi, haú noqkuq yhùm wàng mâ é, Sholumon é Jirop má sô yông wún ri.

24 Haú u lé, haú Yudaq byu pé gi, Yhâng é lhíngkyuq má lé zing bùm kômù, "Nàng gi, ngamoq lé hkâ-myháng jé shoq úng-áng nhang nyi râ lhú? Nàng, Hkrisduq nghut le gi, ngamoq lé san za taí kyô pyám laq." ga taí akô.

25 Yesuq gi, "Ngò, nungmoq lé taí kyo bê nghut lhê; nghut kôlhang, nungmoq a lumjínq kó nghut ri. Ngá Wâ é myìng mai, Ngò kut é laklaí kumlhá haú pé gi, Ngá é matú saksé hkám byi nyi ri.

26 Nghut kôlhang, nungmoq gi, Ngá é sau a nghut kô é yanmai, a lumjínq kó nghut ri.

27 Ngá é sau pé gi, Ngá é htê lé dat gyô akô; Ngò gi, yhangmoq lé sê lhê; yhangmoq le, Ngá htâng châng akô nghut ri.

28 Ngò gi, yhangmoq lé, ah-tum abyuq é asak byi é nghut mù, yhangmoq gi, hkâ-nhám le htên byoq kó râ a nghut; ó yuq èq le, yhangmoq lé, Ngá é loq mai wó lú yù râ a nghut.

29 Yhangmoq lé, Ngá é loq má ap byi tô é sù, haú Ngá Wa gi, lhunglhang htoq má je gyaú Sù nghut lhê; ó yuq èq le, yhangmoq lé, Ngá Wâ é loq mai wó lú yù râ a nghut.

30 Ngò eq haú Íwa gi, rayuq

* 10:16 Esai 56:8 * 10:22 Ap Nóng Poi gâ é gi, Garai Gasâng é yhùm lé ap nóng lé gâ lhê.

za nghut lhê." ga tũ taí ri.

31 Haú hkũn, haú Yudaq byu pé gi, Yesuq lé, dú rã matú luqgok dum kui akô.

32 Nghut kôlhang, Yesuq gi, yhangmoq lé, "Haú Íwã chyang mã é laklaí kumlhá mó pé myo myo, Ngò, nungmoq lé tũn shit bê nghut lhê. Nungmoq, Ngo lé dú rã gi, hká lhũm é yanmai nghut akô lú?" ga myí ri.

33 Haú Yudaq byu pé gi, "Ngamoq, Nang lé dú rã gi, haú pé hká lhũm é yanmai le a nghut; Nang gi, byù rayuq nghut to luí, Garai Gasang nghut é đông taí whuí luí, Yhang lé rhoi dang taí é yanmai, dú rã nghũ lhê." ga tũ taí akô.

34 Haú hkũn, Yesuq gi, yhangmoq lé, "Nungmoq gi, garai pé nghut akô nghũ, Ngò taí bê nghut lhê."* ga nungmoq é tarã mã kã to lhê a nghut kó lú?

35 Chyúmdang haú lé gi, a ge lhoq hpyoq pyãm é nghut luí, haú Garai Gasang é mungdang lé wó yu é bang lé, 'garai pé' gã é nghut le gi,

36 haú Íwã mai, Yhang é matú hkyin htoq yũ luí, mingkan mã nhang é Sũ eq séng luí gi, hká đông nghũ kó rã lú? 'Ngò gi, Garai Gasang é Yhangzo nghut lhê.' nghũ taí é yanmai, Ngò gi, Garai Gasang lé taí hpoí ri nghũ, nungmoq, haí mù Ngo lé mara hũn akô lú?

37 Ngá Wã é muzó pé lé, Ngò kut é a nghut jáng, Ngo lé

hkãlumjĩng kó.

38 Nghut kôlhang, Ngò, haú pé lé kut é nghut le gi, nungmoq, Ngo lé a lumjĩng kôlhang, haú muzó pé lé lumjĩng keq; haú hkũn, haú Íwã gi, Ngò mã nghut nyi é hkyô lé le, Ngò gi, haú Íwã mã nghut nyi é hkyô lé le, nungmoq wó sé luí, sê gyo kó rã nghut lhê." ga tũ taí ri.

39 Yhangmoq gi, Yhang lé chyup rã dum hen akô; nghut kôlhang, Yhang gi, yhangmoq é loq mai wó lut ló bê nghut ri.

40 Hau htãng, Yesuq gi, haú Yodan làng he hpoq mã é, Yohan, wui-myhup hkãm byí hi é jowò mã ló jé ri. Haú mã, Yhang nyi nyi é nghut luí,

41 byù myo myo gi, Yhãng chyang lé jé bum akô. Yhangmoq gi, "Yohan gi, limik kumlhá a kut wú é nghut kôlhang, shí yuq eq séng luí, Yohan taí é hkyô lhunglhang gi, tẽng ri." ga taí bum akô.

42 Haú jowò mã, byù myo myo gi, Yesuq lé lumjĩng bũm bekô nghut ri.

11

Lazaruq Shi Byuq É Hkyô

1 Ahkuí, Lazaruq gã é byù rayuq gi, no nyi ri. Yhang gi, haú Mariq eq yhãngnhã Mah-taq nhik nyi é Behtani wã mã é sũ nghut lhê.

2 Mariq haú gi, Yhumsĩng lé namngón-xũ hut gyun luí, hkyí mã yhãng xam eq sùt byí é sũ nghut ri; yhang gi, haú

no nyi é Lazaruq é yhangnhá nghut ri.

³ Haú mù, haú yhangnhá nhik gi, "Yhumsing ê, Nang chyitdap é sù gi, no nyi ri." ga, Yesuq chyáng é taí nhang akô.

⁴ Yesuq gi, dang haú lé wó gyo jáng, "Nòhpyo haú gi, shì-nò a nghut. Haú Garai Gasâng é Yhangzo gi, hau é yan-mai, hpungwup shingkang wó dan hù é hui sháng gaq ga, Garai Gasâng é hpungwup shingkang é matú dut é ru nghut lhê.

⁵ Yesuq gi, Mahtaq eq yhanggu Mariq lé le, Lazaruq lé le, chyitdap ri.

⁶ Haú su mù, Yhang gi, haú Lazaruq no nyi ri gâ é lé, wó gyô é hkûn, haú Yhang nyi é jowò má, í nyi nyi tô ashí nghut ri.

⁷ Hau htâng, Yhang gi, Yhâng é chángzô pé lé, "Nga-nhúng gi, Yuda mau shut dum taù ló sháng." ga taí ri.

⁸ Haú hkûn, yhangmoq gi, "Rabai ê, hkû-yoq za, haú Yudaq byu pé, Nang lé luqgok eq dú sat râ da kô é nghut le nhîng, ahkuî, haú shut dum taù ló râ lúh?" ga Yhang lé myí akô.

⁹ Yesuq gi, "Nyí gi, hkyíng hkum raxe í hkum bo lhê a nghut kó lúh?" Nyí má hkyô sô é sù gi, mingkan shi é maubó é yanmai myoq myàng luî, lengbat râ a nghut.

¹⁰ Myín lé hkyô sô é sù kúm gi, maubó lé a wó é yanmai, lengbat lhê." ga tû taí ri.

¹¹ Haú su ga taí é htâng má, Yhang, yhangmoq lé xoq taí kyô é gi, "Nga-nhúng é luzúm Lazaruq yhup myhí byuq bê nghut ri; nghut kôlhâng, Ngò gi, yhang lé ê nhaú toq râ nghut lhê." gâ ri.

¹² Haú hkûn, Yhâng é chángzô pé gi, "Yhumsing ê, yhang yhup myhí tô é nghut le gi, ge lò râ nghut lhê." gâ taí akô.

¹³ Yesuq gi, Lazaruq shi byuq bê hkyô lé taí é nghut ri; nghut kôlhâng, Yhâng é chángzô pé gi, gè gè yhup myhí tô é lé taí é su ngam pyâm akô nghut ri.

¹⁴ Haú mù luî, Yesuq, yhangmoq lé san za jáng taí kyô é gi, "Lazaruq gi, shi byuq bê nghut lhê.

¹⁵ Ngò haú má a nyi záng é gi, nungmoq wó lumjîng râ matú nghut luî, nungmoq é matú Ngò gabú byí ri; yhâng chyáng e ló sháng hkoi." gâ ri.

¹⁶ Haú mù, haú Zozúm le gâ é Htomaq gi, gotû chángzô pé lé, "Nga-nhúng le, Yhang eq rahá shi sháng gaq, châng e ló sháng." ga taí ri.

Haú Í-nhâ Njik Lé, Yesuq Njik Tîng É Hkyô

¹⁷ Yesuq gi, jé e é hkûn, haú Lazaruq lé lup má kat pyâm é myi nyí nghut bê hkyô lé, lhom taí kyô akô.

¹⁸ Behtani wà gi, Yerusalem wà mó eq í dêng kô za wê lhum ri.

¹⁹ Haú mù, Yudaq byu pé myo myo gi, Mahtaq eq

* **11:9** Nyí gi, hkyíng hkum raxe í hkum bo lhê a nghut kó lúh? gâ é gi, ahkyíng a jé shimá, muzó nô é gi, a ge é nghut lhê gâ é nghut ri.

Mariq nhik é yhanggu shi byuq é yanmai, nhik títng byi kó râ ga lé jé nyi bum akô nghut ri.

²⁰ Mahtaḡ gi, Yesuḡ jé lé lo é hkyô lé wó gyo jáng, htoḡ ê mù, Yhang lé é huí ri; nghut kôlhang, Mariq gi, yhûm má nyi tô ri.

²¹ Mahtaḡ gi, Yesuḡ lé, "Yhumsîng ê, Nàng, shî má nyi tô é ru nghut le gi, ngá gu shi byuḡ râ a nghut.

²² Nghut kôlhang, ahkuí le, Garai Gasâng chyáng Nàng haí dung kôlhang, Yhang byi râ nghut é lé, ngò sê lhê." ga tâ ri.

²³ Yesuḡ gi, yhang lé, "Nung gu, dum dui toḡ râ nghut lhê." ga tâ ri.

²⁴ Haú hkûn, Mahtaḡ gi, "Haú jhtûm buinyi má dum dui toḡ é hkûn, yhang le dum dui toḡ râ nghut é lé, ngò sê lhê." ga tâ ri.

²⁵ Haú hkûn, Yesuḡ gi, yhang lé, "Ngò gi, dum dui toḡ hkyô eq asak nghut lhê. Ngo lé lumjîng é sù gi, shi byuḡ kôlhang, dum dui râ nghut lhê.

²⁶ Asak dui nyi luí, Ngo lé lumjîng é sù ó yuḡ nghut kôle, hkâ-nhâm le shi é hui râ a nghut. Nàng gi, dang shî lé lumjîng lhê lú?" ga tâ ri.

²⁷ Haú hkûn, yhang gi, "Yhumsîng ê, ngò lumjîng lhê. Nàng gi, haú mingkan má jé lé lô râ nghut é, Garai Gasâng é Yhangzo, Hkrisduḡ† nghut é lé, ngò lumjîng lhê." ga, Yhang lé tâ kyô ri.

²⁸ Yhang gi, haú su ga tâi é htâng má, taú ló mù, yhanggu Mariq lé, tsik za wut yù luí, "Haú Sará jé tô ri; Yhang gi, nang lé myí nyi ri." ga tâ kyô ri.

²⁹ Mariq gi, haú lé wó gyo jáng, hân za toḡ mù, Yesuḡ chyáng ê bê nghut ri.

³⁰ Haú u lé, Yesuḡ gi, haú wâ hkaú má a wang ló shî e za, Mahtaḡ eq huí é jowò má ru nyi tô ashî nghut ri.

³¹ Haú yhûmhkaú má, Mariq lé nhik títng nyi é Yudaḡ byu pé gi, yhang hân za toḡ luí, htoḡ ló é lé myàng kôjáng, yhang, lup má é ngaú râ dá lhê abe ga, myit yù kômù, yhang htâng châng e ló bum akô nghut ri.

³² Mariq gi, Yesuḡ nyi tô é jang má jé mù, Yhang lé myàng jáng, Yhâng é hkyí wang má ngóm gop to luí, "Yhumsîng ê, Nàng, shî má nyi tô é ru nghut le gi, ngá gu shi byuḡ râ a nghut." ga tâ ri.

³³ Yesuḡ gi, Mariq ngaú nyi é lé le, haú yhang eq rahá lé lo é Yudaḡ byu pé ngau nyi kô é lé le, myàng jáng, Yhâng é myit má gyai yhang hkâm zo wui é eq myit wui myit hke dut nyi ri.

³⁴ Haú mù, Yhang gi, "Yhang lé, hkâmá tô tô akô lú?" ga myi jáng, yhangmoḡ gi, "Yhumsîng ê, lé wú wú aḡ." ga tâ tâ akô.

³⁵ Yesuḡ gi, ngaú bê nghut ri.

³⁶ Haú mù, haú Yudaḡ byu pé gi, "Wú keḡ, Yhang gi,

† 11:27 Hkrisduḡ lé Mesaia le gâ lhê.

Lazaruq lé, haû-í yhang chyit ri-nhung!" ga taí akô.

37 Nghut kôlhang, ra-am gi, "Haû myoqjit sù lé, myoq wó lhoq myâng byî é Sù gi, shí yuq lé le, a shí lo shoq a wó kut é lhú?" ga taí bum akô nghut ri.

Lazaruq Lé Lhoq Dui Toq É Hkyô

38 Yesuq gi, Yhâng é myit má radàm dum gyai yhang hkâm zo wuí é eq, lup má lé jé ri. Lup haû gi, luqhkýung dong nghut luí, luqgok rachâm eq chí tô akô.

39 Haû mù, Yhang gi, "Luqgok haû lé yu pyám keq." ga taí ri.

Haû hkûn, haû shi byuq su é yhângnhá Mahta q gi, "Yhumsing ê, yhang lé, haû má tô tô é myi nyí lhang nghut bê yanmai, ahkuí gi, bup nàm berâ nghut lhê." ga taí ri.

40 Haû mù, Yesuq gi, "Nàng, lumjín g é nghut le gi, haû Garai Gasâng é hpungwup shingkang lé, wó myâng râ nghut lhê nghû, Ngò, nang lé taí kyô wú bê a nghut lhú?" ga taí ri.

41 Haû mù luí, yhangmoq gi, luqgok haû lé yu pyám akô. Hau htâng, Yesuq gi, mauhkûng shut tu wú luí, "Áwa ê, Nàng, Ngá é dang lé gyo byî é yanmai, Ngò, Nàng lé jeju hkya-ôn lhê.

42 Nàng gi, hkâ-nhám le, Ngá é dang lé gyo byî nyi é lé, Ngò sê lhê; nghut kôlhang, Nàng, Ngo lé nhang kat é hkyô lé, shí

má yap tô é bang lumjín kó sháng gaq nghû, yhangmoq é matú, Ngò, isu nghû taí é nghut lhê." ga taí ri.

43 Yhang gi, haû su ga taí luí, "Lazaruq ê, htoq lô aq." ga htê mó eq wut kat ri.

44 Haû hkûn, haû shi byuq bê sù gi, yhâng é loq hkyí pé má pân eq htup yup to gû eq, yhâng é myoqdong má hpajet eq htup to gù htoq lo ri.

Haû mù, Yesuq gi, yhangmoq lé, "Yhang lé hpyi pyám byi mù, nhang kat keq." ga taí ri.

Yesuq Lé Sat Pyám Râ Haq Dâ É Hkyô

Mht 26:1-5; Mrk 14:1-2; Luk 22:1-2

45 Haû mù luí, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjín bum bekô nghut ri.

46 Nghut kôlhang, yhangmoq chyáng mâ é ra-am gi, haû Hparishe pé chyáng ló mù, Yesuq kut é hkyô lé, ló taí kyô akô.

47 Haû mù, haû hkyangjong agyi pé eq Hparishe pé gi, Yudaq byin tú wapdoq[‡] zuph-pong lé ji tsing to mù, "Byù shí yuq gi, limik kumlhá myo myo kut shit nyi ri. Nga-nhúng, hkâsu kut le gè râ lhú?

48 Nga-nhúng, Yhang lé haû su ru kut nyi nhang é nghut jáng, yuq hkangmó gi, Yhang lé lumjín kó râ nghut lhê; haû hkûn, Romaq byu pé gi, jé lé mù, nga-nhúng é jowò eq nga-nhúng é byuhú lé, lé lhoq

[‡] 11:47 Yudaq byin tú wapdoq lé Grik đông gi, San-hedrin gâ lhê.

htên pyám kó râ nghut lhê." ga taí akô nghut ri.

49 Haú hkûn, yhangmoq chyáng mâ é, haú zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haí lháng a sé kó nghut ri-nhung!

50 Haú byuhú gón htên byoq byuq râ htoq má, byuhú hau é matú, byù rayuq shí hkâm byi le gi, nungmoq é matú je gè râ hkyô lé, nungmoq, a myit jé kó nghut ri." ga taí kat ri.

51 Yhang haú su ga taí é gi, yhumsing myit dông a nghut e za, haú zân má, yhang gi, hkyangjong mó nghut é eq rajung za, haú Yudaq byuhú é matú, Yesuq shí hkâm byi râ nghut é hkyô lé le,

52 byuhú hau é matú baú a nghut e za, haú byo myín tô é, Garai Gasâng é yhangzô pé lé, shuí tsíng yù mù, rading ralhum za dut nhâng râ matú, shí hkâm byi râ nghut é hkyô lé le, myiqhtoi dang taí é ru nghut lhê.

53 Haú nyí mai, yhangmoq gi, Yesuq lé sat râ matú chôm da bekô nghut ri.

54 Hau é yanmai, Yesuq gi, Yudaq byu pé gyoro má, de de a sô shit wún e za, haú mai htoq luí, haú yoso eq chyâng lhùm é mau mâ é, Ehprim gâ é wà má ê mù, Yhâng é chángzô pé eq rahá nyi nyi ri.

55 Haú Yudaq byu pé é Lhoqlhai Poí jé râ za nghut é hkûn, byù myo myo gi, Lhoqlhai Poí a jé shi má, lhoq san

lhoq yúng hking dông yhum-sing gùng lé lhoq sân-yúng yú râ matú, yosô wà pé mai, Yerusalem wà mó shut doqló bum akô.

56 Haú mù, yhangmoq gi, Yesuq lé ho nyi kô é nghut luí, haú noqkuq yhùm wàng má yap to uchyang, rayuq eq rayuq, "Nungmoq, hkâsu wó myit akô lhú? Yhang gi, Poí má a lé lô râ gâ lhê lhà?" ga myí lhùm bum akô.

57 Nghut kôlhang, haú hkyangjong agyi pé eq Hparishe pé gi, Yesuq lé wó chyup yú râ matú, Yesuq hkâmá nyi é lé, sê é sù ó yuq nghut kôle, yhangmoq lé lo shit kyo râ lhê ga dangmó hkyô tô akô nghut ri.

12

*Yesuq, Namngón-xú But
Byi Huí É Hkyô*

Mht 26:6-13; Mrk 14:3-9

1 Haú Lhoqlhai Poí jé râ hkyuq nyí râ ashí hkûn, Yesuq gi, Yhâng eq shi é mai lhoq dui toq yu é sù, Lazaruq nyi é Behtani wà má ló jé ri.

2 Haú má, Yesuq lé hkunggâ é dông myinzang byi tsô akô; Mahtaq gi, zoshuq jaú ri; Lazaruq gi, haú Yesuq eq rahá siboí má zô zung nyi bang mâ é rayuq nghut ri.

3 Haú hkûn, Mariq gi, haú nardu amyit mai za saí yu é, gyai hpaú é namngón-xú raxe í rúng kô yu lé mù, Yesuq é hkyí má hut gyun byi luí, yhâng é uxam eq sùt byí ri. Haú mù, yhùm haú gi,

namngón-xû shôm byíng to bê nghut ri.

⁴ Nghut kôlhang, Yesuq lé ap pyám râ nghut é, Yhâng é chángzo rayuq nghut sù, Yudaq Iskarut gi,

⁵ "Haù myùng bang lé byí pyám râ matú, haù namngón-xû lé denari sum sho èq haì mù a ùng pyám é lhú?" ga taì ri.

⁶ Yhang haù su ga taì é gi, myùng bang lé chiq byí é yanmai taì é a nghut, yhang gi, ngùn htùng chùng sù nghut luí, haù má kat tô é ngùn lé, yhumsing é matú lhaq yu chùng chùng kut é, hkau sù nghut é yanmai taì é nghut ri.

⁷ Yesuq gi, "Nghut shang gaq; yhang gi, Ngo lé myhup yhum râ buinyi é matú, namngón-xû shí lé hkong to byí é nghut lhê.

⁸ Haù myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sú a nghut." ga tú taì ri.

⁹ Haù u lé, Yudaq byu pé ajùm ayò gi, haù má Yesuq nyi é lé sé kôluí, lé lo akô; haù bang gi, Yesuq é yanmai za lé kô é a nghut, haù Yhâng èq shí bê mai lhoq dui toq yu é Lazaruq lé, lé myâng nau kô é yanmai le nghut ri.

¹⁰ Haù mù, haù hkyangjong agyi pé gi, Lazaruq lé le, sat pyám râ matú chôm hpyê lhùm akô.

¹¹ Hkâsu mù gà le, yhâng é yanmai, haù Yudaq byu pé myo myo gi, Yesuq chyáng lhing ló kômù, Yhang lé lumjìng bùm kô é yanmai nghut ri.

Yesuq, Yerusalem Wà Mó Má Wang E Ló É Hkyô

Mht 21:1-11; Mrk 11:1-11; Luk 19:28-40

¹² Hau htang nyí, haù Poí má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyò bum akô.

¹³ Haù mù, yhangmoq gi, byùm-haq pé yu chùng mù, Yhang lé ê tê uchyang,

"Hosana!"*

Haù Yhumsing é myìng mai jé lé lô Sù gi, hkungsô wó nyí sháng gaq ô!

Haù Israelaq byu pé é Hkòhkâm gi, hkungsô wó nyí sháng gaq!"[☆]

ga, taì garù bum akô nghut ri.

¹⁴ Haù hkùn, Yesuq gi, logúng zo radu lé myàng luí, doq jì ri;

¹⁵ haù gi, "Zi-un byizo[†] é, hkâgyuq; wú keq, nungmoq é hkòhkâm gi, logúng zo má jì mù lé lo nyi ri."[☆]

ga, kâ tô é eq rajung za nghut ri.

¹⁶ Haù pé banshoq lé, Yhâng é chángzô pé gi, sâng-hi lé a sê gyo kó; nghut kôlhang, Yesuq gi, hpungwup shìngkang dan hu huí é htàng má za sheq, haù pé gi, Yhang

* **12:13** Hebre dang má, *hosana* gà é gi, "ahkuí hkyi yù aq" gà é nghut lhê. Nghut kôlhang, bun zo shí má gi, hkya-on dang òng chung é nghut lhê. [☆] **12:13** Hkya-on 118:25-26 [†] **12:15** Hebre myíng òng *Zi-un byizo* gà é gi, Yerusalem mà é byu pé lé gà é nghut lhê. [☆] **12:15** Zhk 9:9

eq séng luí kâ tô é hkyô lé le, haú eq rajung za, Yhang lé, yhangmoq mai kut bê hkyô lé le, bûn sê kat akô nghut ri.

17 Haú Yesuq gi, lup hkaú mâ é Lazaruq lé wut luí, shi é mai lhoq duí toq yu é hkûn, Yhang eq rahá nghut é shiwa hpúng gi, haú hkyô lé, saksé hkám byí nyi akô.

18 Haú mù, byù myo myo gi, Yesuq tân shit é limik kumlhá hau é hkyô lé, wó gyo kô é yanmai, Yhang lé hui rá matú htoq e akô.

19 Hau é yanmai, haú Hparishe pé gi, "Wú keq, nga-nhúng, hkâsu yhang a ge kut lo nhung! Haú mingkan gón gi, Yhâng htâng châng bùm bekô." ga, rayuq eq rayuq taí lhùm bum akô nghut ri.

Yesuq, Yhang Shí Râ Hkyô Lé Te Taí É Hkyô

20 Haú hkûn, noqkuq rá matú Poí má doq ló é bang má, Grik pé ra-am le bo tô akô.

21 Yhangmoq gi, Galile mau, Bet-saida wà mó mâ é Hpilip chyáng lé jé kômù, "Âhkaú ê, ngamoq gi, Yesuq lé myàng nau ri." ga, dung tôngbán akô.

22 Haú mù, Hpilip gi, Andre lé, ê taí kyô ri; Andre eq yháng nhik gi, Yesuq lé, ê taí kyô akô.

23 Haú mù, Yesuq gi, "Haú Byu Yhangzo gi, hpungwup shingkan dan hû é hui rá matú, ahkyíng jé bê nghut ri.

24 Ngò, nungmoq lé teng za taí kôlé, sungsô racham gi, myigùng má gyó luí, shi byuq e za a nghut jáng, acham roq

za dut nyi rá nghut lhê. Nghut kôlháng, shi byuq é nghut le gi, ashí myo myo lhoq htoq rá nghut lhê.

25 Haú yhumsing é asak lé chyitdap é sù gi, asak sùm byuq rá nghut lhê. Mingkan shí má, haú yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to rá nghut lhê.

26 Ngo lé dojaú é sù ó yuq nghut kôle, Ngá htâng cháng rá lhê; Ngò, hkámá nyi le, Ngá é dui-nhâng zoshâng le nyi rá nghut lhê. Ngá Wa gi, haú Ngo lé dojaú é sù lé, shigyaú rá nghut lhê.

27 Ahkuí, Ngò, myit wuítke nyi ri; Ngò hkâsu nghu taí rá lhi? 'Áwa ê, ahkyíng shí mai Ngo lé lhoq lhut yù laq.' nghu taí rá lhu? Nghut kôle, Ngò gi, ahkyíng shi é matú za sheq jé lé é ru nghut lhê.

28 Áwa ê, Náng é myìng lé hpungwup shingkan dan hu nhâng aq hkoil!" ga taí ri.

Haú hkûn, "Ngò gi, Ngá é myìng lé hpungwup shingkan dan hu nhâng bê nghut luí, dum dan hu nhâng shirâ nghut lhê." gâ é htê, mauhkúng mai htoq lo ri.

29 Haú má nyi tô é byù moq mó gi, haú lé wó gyo kôjáng, "Maugum gum ri." gâ bum akô; ra-am gi, "Yhang lé, mau-mang lagyo rayuq nyo ri." ga taí bum akô nghut ri.

30 Haú hkûn, Yesuq gi, "Danghtê shí gi, Ngá é matú a nghut, nungmoq é matú ru nghut lhê.

³¹ Ahkuî gi, mingkan shî lé jéyáng râ ahkyíng nghut bê; mingkan shi é zau gi, ahkuî hkat htoq pyâm é hui râ nghut lhê.

³² Nghut kôlhang, Ngò gi, myigùng mai tu shap kat é huí é hkûn, byù lhunglhang bang lé, Ngá chyáng shê yù râ nghut lhê." ga taí ri.

³³ Yhang haú su ga taí é gi, Yhang hkâsu kut shî râ nghut é hkyô lé shit é nghut ri.

³⁴ Haú hkûn, haú byù moq mó gi, "Haú tarâ laiká má, Hkrisduq gi, ahtum abyuq dui nyi râ nghut lhê gâ é lé sheq, ngamoq wó gyô wú é ru nghut le nhîng, 'Haú Byu Yhangzo gi, tu shap é hui ra râ nghut lhê.' nghû, Nàng hkâsu kut wó taí lhê lúhú? Haú Byu Yhangzo gi, ó yuq nghut lhê lúhú?" ga, myí akô.

³⁵ Haú mù, Yesuq gi, yhangmoq lé, "Nungmoq chyáng, haú maubó joq nyi râ ahkyíng gi, a lûm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haú maubó joq nyi ashî hkûn sô nyi keq; hkâsu mù gâ le, haú mauchut má sô nyi é sù gi, yhang hká shut e ló nyi é lé, a sé nghut ri.

³⁶ Nungmoq gi, maubó é yhangzô pé wó dut kó sháng gaq, haú maubó joq nyi ashî hkûn, haú lé lumjíng keq." ga taí ri. Yesuq gi, dang haú ban taí jáng, yhangmoq chyáng mai htoq ló luí, haq byuq bê

nghut ri.

Yudaq Byu Pé, A Lumjíng Ru Dut Nyi Kô É Hkyô

³⁷ Yesuq gi, yhangmoq é hí má, limik kumlhá haú pé banshoq kut shit kôlhang, yhangmoq gi, Yhang lé a lumjíng shî kó nghut ri.

³⁸ Haú gi, "Yhumsíng ê, nga-nhûng é danglù lé, ó yuq wá lumjíng byi wú é lúhú? Haú Yhumsing é loq[‡] gi, ó yuq lé htoq shit wú é lúhú?"^{*} ga, myiqhtoi Esai-aq taí tô é dang lo dik é nghut ri.

³⁹ Yhangmoq a wó lumjíng kô é hkyô gi, Esai-aq taí é dang má,

⁴⁰ "Yhang gi, yhangmoq é myoqjí lé lhoq chit byi luí, yhangmoq é i-myit lé lhoq htan to byi bê nghut ri;

haú mù, yhangmoq gi, myoqjí èq a wó myâng, i-myit èq a wó sé gyo, Ngò, yhangmoq lé yâ ge byi râ matú, a wó lhing taú lò kó dut râ nghut lhê."^{*}

ga le bo tô é yanmai nghut lhê.

⁴¹ Esai-aq gi, Yesuq é hpungwup shíngkang lé myang é yanmai, Yhang eq sêng é hkyô lé, haú su ga taí é nghut ri.

⁴² Nghut kôlhang, haú uphkâng bang myo myo lhang gi, haú u má, Yesuq lé lumjíng bum akô. Nghut kôle,

[‡] 12:38 *Yhumsíng é loq gâ é gi, Yhumsíng é hpungwup a-tsam lé gâ é nghut lhê.*

^{*} 12:38 Esai 53:1 ^{*} 12:40 Esai 6:10

yangmoq gi, Hparishe pé èq tarajong mai lhoq htoq pyâm é hui râ lé, gyuq kô é yanmai, yangmoq lumjîng bê hkyô lé a yin yu bùm kô nghut ri.

⁴³ Hkâsu mù gâ le, yangmoq gi, Garai Gasâng chyáng mâ é aróng lé, ô nau é htoq má, byu pê chyáng mâ é aróng lé, je ô nau kô é yanmai nghut ri.

⁴⁴ Haû mù, Yesuq, htê mó èq taî é gi, "Ngo lé lumjîng é sù gi, Ngo lé baú lumjîng é a nghut; haû Ngo lé nhang kat é Sù lé le, lumjîng é nghut lhê.

⁴⁵ Ngo lé myang é sù gi, haû Ngo lé nhang kat é Sù lé le myang é nghut lhê.

⁴⁶ Ngò gi, Ngo lé lumjîng é sù ó yuq le, mauchut hkaû má a nyi sháng gaq nghû, maubó dông mingkan má lé jé é nghut lhê.

⁴⁷ Ngò gi, Ngá é dang lé wó gyo luî, a châng é sù ó yuq lé le, jéyáng râ a nghut; hkâsu mù gâ le, Ngò gi, mingkan lé jéyáng râ matú jé lé é a nghut; haû mingkan lé hkyi yù râ matú sheq, jé lé é ru nghut lhê.

⁴⁸ Ngo lé he-ngik luî Ngá é dang lé a hap yu é sù lé, jéyáng râ Sù rayuq nyi lhê; Ngò taî é danghkun haû gi, haû jihtûm buinyi má, haû yuq lé mara byi râ nghut lhê.

⁴⁹ Hkâsu mù gâ le, Ngò gi, Ngá é myit dông taî é a nghut; nghut kôlhâng, Ngò haî taî râ eq hkâsu nghû taî râ lé gi, haû Ngo lé nhang kat é sù Îwa mai, Ngo lé hkunmó hkyô to bê nghut lhê.

⁵⁰ Haû Yhâng é hkunmó gi, ahtum abyuq é asak nghut é lé, Ngò sê lhê. Haû mù luî, Ngò, haî taî kôlé, haû Îwa mai Ngo lé taî kyô é lé za, taî é nghut lhê." gâ ri.

13

Chángzô Pé É Hkyî Chi Byî É Hkyô

¹ Haû Lhoqlhai Poî jé râ hí má za, Yesuq gi, Yhang, mingkan shî mai Yhâng Wâ chyáng htot ló râ ahkyíng jé bê hkyô lé, sê ri. Yhang gi, mingkan má nyi é, Yhâng é byu pé lé chyitdap nyi é nghut luî, jihtûm jé shoq Yhâng é chyitdap myit lé shit râ nghut lhê.

² Myinzang zô nyi bùm kô é u lé, nat Tsadán gi, Simun é yangzo Yudaq Iskarut chyáng, Yesuq lé ap pyám râ myit kat byî to gû nghut ri.

³ Yesuq gi, haû lhunglhang lé Îwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luî, Garai Gasâng chyáng dum taú ló râ sù nghut é lé le, sê ri.

⁴ Haû mù, Yhang gi, zohpoq mai toq luî, Yhâng é bumó lé hkyut pyám mù, hpyidum má hpajet ralhûm èq hpyihit hit tô ri.

⁵ Hau htâng, Yhang gi, jirung má uchyam hut kat mù, Yhâng é chángzô pé é hkyî chi byi luî, haû Yhâng é hpyidum má hit tô é hpajet èq sut huí byî ri.

⁶ Yhang gi, Simun Petruq chyáng jé jáng, Simun Petruq

gi, "Yhumsîng ê, Nàng gi, ngá hkyî lé chi byi râ nghut lê lú?" ga myî ri.

7 Haú hkûn, Yesuq gi, "Ngò, haí kut nyi é hkyô lé, ahkuí, nàng sê gyo rá a nghut; nghut kôhang, htâng má sê gyo rá nghut lê." ga tú tai ri.

8 Petruq gi, "Ngá hkyî lé, Nàng, hkâ-nhám le wó chi byi rá a nghut." ga tai jáng, Yesuq gi, "Nang lé, Ngò a chi byi é nghut jáng, nàng gi, Ngò eq séng rá a nghut." ga tú tai ri.

9 Haú hkûn, Simun Petruq gi, "Yhumsîng ê, haú su nghut jáng gi, ngá é hkyî lé baú za a nghut, ngá é loq eq ulhum lé le chi byi laq!" ga tú tai ri.

10 Yesuq gi, "Gùng chi bê sù gi, hkyî za chi jáng, ragùngdú é sanséng bê nghut ri. Nungmoq gi, sanséng bekô; nghut kôhang, yuq hkangmó gi, sanséng é a nghut." ga tú tai ri.

11 Hkâsu mù gâ le, Yhang gi, Yhang lé ap pyám rá sù ó yuq nghut é lé, sê é yanmai, "Nungmoq gi, sanséng é bang chyat a nghut." ga tai é nghut ri.

12 Yesuq gi, yhangmoq é hkyî lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, "Nungmoq gi, ahkuí, ngò kut byi é hkyô lé, sê gyo akô lú?"

13 Nungmoq, Ngo lé, 'Sará' ga le, 'Yhumsîng' ga le, wut kô é gi, a shut; hkâsu mù gâ le, Ngò gi, haú yuq yhang nghut lê.

14 Ngò, nungmoq é Sará eq Yhumsîng nghut sù lhang, nungmoq é hkyî lé chi byi é nghut le gi, nungmoq le, rayuq eq rayuq é hkyî lé chi byi lhum rá dut lê.

15 Nungmoq gi, Ngò, nungmoq lé kut byi é su kut kó sháng gaq nghû, Ngò, nungmoq lé alik kut shit tô é nghut lê.

16 Ngò, nungmoq lé teng za tai kôlé, dui-nhâng zoshâng gi, yhumsîng htoq je kô é a nghut; lagyo gi, nhang kat é sù htoq je kô é a nghut.

17 Ahkuí, nungmoq gi, haú pé lé sé bekô nghut luí, châng kut kô é nghut jáng, hkungsô wó kô rá nghut lê.

Yesuq Lé Ap Pyám Râ Lé, Te Tai É Hkyô

18 Ngò gi, nungmoq ban-shoq bang lé lhoq ang luí tai é a nghut; Ngò hkyin yu é bang lé gi, Ngò sê lê. Nghut kôhang, 'Haú ngá é muk lé bo zô é sù gi, ngo lé, yhâng é hkyi-htáng la-nhik èq nâng htíng rá nghut lê.* gâ é Chyúmdang lé, lhoq dik rá matú ru nghut lê.

19 Haú a dut htoq shimá, Ngò, nungmoq lé tai kyô nyi é gi, haú dut é hkûn, Ngò gi, haú Yuq* nghut é lé, nungmoq wó lumjíng kô rá matú nghut lê.

20 Ngò, nungmoq lé teng za tai kôlé, Ngò nhang kat é sù lé, lhom hap yu é sù ó yuq nghut kôle, Ngo lé hap yu é nghut bê; Ngo lé hap yu é sù ó yuq nghut kôle, haú Ngo lé nhang

* 13:18 Hkya-on 41:9 * 13:19 Haú Yuq gâ é gi, Hkrisduq lé gâ é nghut lê.

kat é Sû lé hap yu é nghut bê." gâ ri.

²¹ Yesuq gi, haû su ga taí é htâng má, myit wuîhke nyi mù, saksé hkâm é gi, "Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lê." gâ ri.

²² Haû mù, Yhâng é chángzô pé gi, ó yuq lé taí záng nyi é hkyô lé, rago a sé kô é yanmai, rayuq eq rayuq wú tsuq lhum bum akô nghut ri.

²³ Haû Yesuq chyitdap é chángzo rayuq gi, Yesuq é tanghkoí nâm má leq nge zung tô ri.

²⁴ Haû mù, Simun Petruq gi, chángzo haú yuq lé, loq lik kat mù, "Yhang, ó yuq lé lhoq ang luí, taí nyi é hkyô lé, myi wú aq." ga taí ri.

²⁵ Haû mù, chángzo haû gi, Yesuq é tanghkoí má saí leq nge zung mù, "Yhumsîng ê, haû gi, ó yuq nghut lê lhu?" ga, Yhang lé myí ri.

²⁶ Yesuq gi, "Ngò, muk jap zo shî lé jum yù mù, byí é sù gi, haú yuq nghut lê." ga tû taí luí, muk jap zo haú lé jum yù mù, Simun é yhangzo Yudaq Iskarut lé byí ri.

²⁷ Yudaq gi, muk haû lé yù zo kat é eq, Tsadán gi, yhâng chyáng wàng bê nghut ri.

Haû mù, Yesuq gi, "Nàng kut râ é hkyô lé, hân kut aq hkoi." ga yhang lé taí kat ri.

²⁸ Nghut kôlhang, yhang lé, Yesuq haú su ga haí mù taí é hkyô lé, zohpoq haú má nyi tô é bang gi, rayuq lhang a sé gyo kó nghut ri.

²⁹ Haû Yudaq gi, ngùn zum sù nghut é yanmai, ra-am gi, haû Poí má râ é hkyô lé, ê wuî râ matú, Yesuq taí ri ga luí le, myùng bang lé rajung jung byí nhang ri ga luí le, myit yu bum akô nghut ri.

³⁰ Yudaq gi, muk haû lé lhom yù eq, htoq ló byuq bê nghut ri. Haû u gi, mauchut bê nghut ri.

Petruq He-ngik Pyám Râ Lé, Yesuq Te Taí É Hkyô

Mht 26:31-35; Mrk 14:27-31; Luk 22:31-34

³¹ Haú yuq htoq ló byuq jáng, Yesuq taí é gi, "Ahkuí, haû Byu Yhangzo gi, hpungwup shingkang dan hû é nghut luí, Garai Gasang gi, haû Byu Yhangzô é yanmai, hpungwup shingkang dan hu bê nghut ri.

³² Garai Gasang gi, haû Byu Yhangzô é yanmai, hpungwup shingkang dan hû é nghut jáng, Yhang le, Yhang má haû Zo lé hpungwup shingkang dan hu nhâng râ nghut lê; radá dâm dan hu nhâng râ nghut lê.

³³ Ngá zo pé ê, Ngò, nungmoq eq rahá nyi râ gi, razup za ru nghut alô. Nungmoq gi, Ngo lé hô kó râ nghut lê; nghut kôlhang, 'Ngò ló é jang má, nungmoq wó jé kó râ a nghut.' nghû, haû Yudaq byu pé lé, Ngò taí é eq rajung za, ahkuí, nungmoq lé le, Ngò taí lê.

³⁴ Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò,

nungmoq lé chyitdap é su, nungmoq yhangchang chyitdap lhum râ dut lâ.

³⁵ Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byù lhunglhang bang sé kó râ nghut lâ." gâ ri.

³⁶ Haú hkûn, Simun Petruq gi, "Yhumsîng ê, Nàng, hká shut ló râ lú?" ga, Yhang lé myi jáng, Yhang gi, "Ngò ló é jang má, nungmoq, ahkuí a wó châng kó râ nghut lâ. Nghut kôhang, htâng má gi, nungmoq cháng ra kó râ nghut lâ." ga tû tâ ri.

³⁷ Petruq gi, "Yhumsîng ê, haí mù luí, ahkuí ngò Náng htâng a wó châng é lú? Ngò gi, Náng é matú, shî hkám râ ri rì nghut lâ." ga tâ ri.

³⁸ Haú mù, Yesuq taí é gi, "Nàng gi, gè gè yhang, Ngá é matú shî hkám râ lú? Ngò, nàng lé teng za taí lé, woq a tûn shimá, nàng, Ngo lé sum dâm he-ngik pyám râ nghut lâ.

14

Yesuq, Yhâng É Chángzô Pé Lé Nihik Tîng É Hkyô

¹ Nungmoq é i-myit nhiklhum lé, myit wui myit hkê hkâdut nhâng kó. Garai Gasang lé lùm keq; Ngo lé le lùm keq.

² Ngá Wâ é yhûm má, nyi jowò myo myo joq lâ; a joq é ru nghut le gi, noq mai, Ngò, nungmoq lé taí kyo râ nghut

lâ. Ngò, haú má ló é gi, nungmoq é nyi jowò ló hên láng râ matú ru nghut lâ.

³ Ngò gi, ló mù, nungmoq é matú nyi jowò ló hên é nghut jáng, Ngò nyi é jang má nungmoq le wó nyi shoq, Ngò eq rahá nyi râ matú, Ngò dum taú lé mù, nungmoq lé, lé shuí yù râ nghut lâ.

⁴ Ngò ló é jang má jé é hkyô lé, nungmoq sé lâ." gâ ri.

Yesuq Za Hkyô

⁵ Haú hkûn, Htomaq gi, Yhang lé, "Yhumsîng ê, Nàng hká shut ló é lé lhang, ngamoq a sê le nhîng, hkyô haú lé, ngamoq hkâsu kut wó sé râ lú?" ga myí ri.

⁶ Yesuq gi, "Ngò gi, hkyô nghut lâ; haú tengmán hkyô eq asak le nghut lâ. Ngò mai za a nghut jáng, ó yuq le, Íwâ chyáng wó jé é a nghut.

⁷ Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kó râ nghut lâ. Ahkuí mai, nungmoq gi, Yhang lé sé kô é htoq agó, myàng le myang wú bekô nghut lâ." ga tû tâ ri.

⁸ Haú hkûn, Hpilip gi, "Yhumsîng ê, ngamoq lé, haú Íwa tûn shit laq, haú hkûn, ngamoq nihik shî râ nghut lâ." ga tâ ri.

⁹ Yesuq tû tâ é gi, "Hpilip ê, Ngò, nungmoq eq shî myáng lhang nyi lò bê le nhîng, nàng, Ngo lé a sé lú? Ngo lé myang é sù gi, haú Íwa lé myàng bê nghut ri; haú nghut le nhîng, 'Ngamoq lé, haú Íwa tûn shit

laq.' nghû, nàng hkâsu wó tai lê lúh?

¹⁰ Ngò gi, haù Íwa má nghut nyí luí, haù Íwa gi, Ngò má nghut nyi é hkyô lé, nàng a lumjíngh lúh? Ngò, nungmoq lé tai é dang haù pé gi, Ngá é myit mai tai é a nghut; haù Ngò má lúng nyi é Íwa sheq, Yhâng é mù zuí nyi é ru nghut lê.

¹¹ Ngò gi, haù Íwa má nghut nyí luí, haù Íwa gi, Ngò má nghut nyi lê nghû é lé lumjíngh keq; haù a nghut jáng, kut shit é limik kumlhá pé đông za lháng, lumjíngh keq.

¹² Ngò, nungmoq lé teng za tai kôlé, Ngo lé lumjíngh é sù gi, Ngò kut é muzó lé kut rá nghut lê. Ngò gi, haù Íwâ chyáng ló rá nghut é yanmai, haù yuq gi, hau htoq je kô é muzó pé lé lháng kut rá nghut lê.

¹³ Haù Yhangzô é yanmai, Íwâ é hpungwup shíngkang wó hù ló shoq, Ngá é myìng lé lang luí, nungmoq hai jung dung kôlhang, Ngò gyo byi rá nghut lê.

¹⁴ Nungmoq gi, Ngá é myìng lé lang luí, hai dung kôlhang, Ngò gyo byi rá nghut lê.

Chyoiyúng Woi-nyí Byi Râ Danggidíq

¹⁵ Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó rá nghut lê.

¹⁶ Haù Íwa gi, nungmoq eq ahtum abyuq nyi nyi rá nghut é, hpaqchyí byi Sù gotû rayuq, nungmoq lé byi rá

matú, Ngò gi, haù Íwa lé dung rá nghut lê.

¹⁷ Haù yuq gi, tengmán é Woi-nyí nghut lê. Haù mingkan gi, Woi-nyí haù lé a myàng a sê é yanmai, Yhang lé a wó hap yu é nghut lê. Nghut kôlhang, Yhang gi, nungmoq eq rahá nyi nyi é nghut luí, nungmoq má nyi to rá Sù nghut é yanmai, nungmoq gi, Yhang lé sê akô.

¹⁸ Ngò gi, nungmoq lé, chuizô pé đông pyâm to rá a nghut; nungmoq chyáng Ngò dum jé lé rá nghut lê.

¹⁹ Adê myáng má, haù mingkan gi, Ngo lé a myàng lo rá nghut lê; nghut kôlhang, nungmoq gi, Ngo lé myàng kó rá nghut lê. Hkâsu mù gâ le, Ngò gi, asak dui nyi é nghut mù, nungmoq le dui kó rá nghut lê.

²⁰ Ngò gi, Ngá Wâ chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haù buinyi má, nungmoq sé kó rá nghut lê.

²¹ Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap rá nghut lê; Ngò le, haù yuq lé chyitdap luí, Ngá gûng lé yhang, yhang lé shit rá nghut lê." gâ ri.

²² Hau htâng, (Yudaq Iskarut a nghut sù) Yudaq gi, "Yhumsîng ê, Nàng gi, haù mingkan lé Náng gûng a shit e za, ngamoq lé shit rá nghut é gi, hai mù nghut lê lúh?" ga

myî ri.

²³ Haú hkûn, Yesuq tû taí gi, "Rayuq yuq, Ngo lé chyitdap é nghut le gi, Ngá dang lé gyo râ nghut lhê. Ngá Wa le, haú yuq lé chyitdap râ nghut luí, Ngá hpe gi, haú yuq chyáng lé mù, yhang eq rahá nyi râ nghut lhê.

²⁴ Ngo lé a chyitdap é sù gi, Ngá dang lé gyo râ a nghut. Nang wó gyô é dang shí pé gi, Ngá myit mai taí é a nghut; dang haú pé gi, Ngo lé nhang kat é Sù, haú Íwá é ru nghut lhê.

²⁵ Ngò gi, shí pé banshoq lé, nungmoq eq rahá nyi tô ashí u lé taí bê nghut lhê.

²⁶ Nghut kôlhang, Ngá é mying dông, haú Íwa nhang kat râ nghut é, hpaqchyî byi Sù nghû é, haú Chyoiyúng Woi-nyí gi, nungmoq lé, jung hkangmó mhoq byi râ eq, Ngò, nungmoq lé taí kyo bê hkyô lhunglhang, nungmoq lé lhoq pun râ nghut lhê.

²⁷ Ngò gi, nungmoq chyáng, nuingón hkyô tô to byi bê; Ngá é nuingón hkyô, Ngò, nungmoq lé byi é nghut lhê. Ngò gi, mingkan byi é dông, nungmoq lé byi é a nghut. Nungmoq é i-myt nhiklum lé, myit wui myit hke é eq gyuq kyûm é hkâdut nhâng kó.

²⁸ Ngò gi, ló byuq luí, nungmoq chyáng dum taú lé râ nghut lhê.' nghû, Ngò taí é lé, nungmoq wó gyô yù bê nghut lhê. Nungmoq, Ngo lé chyitdap kô é nghut le gi, haú Íwá chyáng Ngò ló râ nghut é hkyô lé, nungmoq gabú kó

râ nghut lhê; hkâsu mù gâ le, haú Íwa gi, Ngá htoq je ko Sù nghut lhê.

²⁹ Haú dut é hkûn, nungmoq lumjing kó sháng gaq nghû, ahkuí, haú a dut shimá, Ngò, nungmoq lé taí kyô é nghut lhê.

³⁰ Ahkuí mai, Ngò gi, nungmoq lé, dang myo myo wó nyô râ a nghut lo; hkâsu mù gâ le, mingkan shi é zau gi, jé lé lo nyi bê nghut ri. Haú yuq gi, Ngo lé up râ ahkáng haí a wó é sù nghut ri.

³¹ Nghut kôlhang, haú Íwa lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

15

Tsibiyiq Núi Eq Akoq Pê É Hkyô

¹ Ngò gi, haú tsibiyiq núi akying nghut lhê; Ngá Wa gi, tsibiyiq hkyâm yhumsing nghut lhê.

² Yhang gi, ashi a zuí é akoq hkangmó lé, Ngá chyáng mai kyik pyám luí, ashi zuí é akoq hkangmó lé kúm gi, ashi je myo zui sháng gaq ga, shang pyám byi ri.

³ Nungmoq gi, Ngò, nungmoq lé taí é mungdang hau é yanmai, sanséng gû nghut bekô nghut ri.

⁴ Ngò má nyi nyi keq; Ngò le, nungmoq má nyi nyi râ nghut lhê. Akoq hkangmó gi, tsibiyiq núi má nui nyi é za a nghut jáng, yhang baú ashi wó zuí é a nghut. Haú eq

rajung za, nungmoq le, Ngò má nyi nyi e za a nghut jang, ashi wó zui kó rã a nghut.

⁵ Ngò gi, tsibiyiq nuî nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luî, Ngò gi, yhang má nyi nyi é nghut jáng, haú yuq gi, ashi myo myo zui rã nghut lhê; hkâsu mù gâ le, Ngò mai gang jáng, nungmoq gi, haî le a wó kut kô é nghut lhê.

⁶ Ngò má a nyi nyi é sũ gi, haú dú pyâm é hui luî, kyuq shi byuq é akoq eq wuî ri; haú sũ é akoq pé gi, byu pê èq guq yù mù, myihkyóm má dú kat pyâm é hui luî, nyé gyó byuq rã nghut lhê.

⁷ Nungmoq gi, Ngò má nyi nyi luî, Ngá é dang pé gi, nungmoq má bo nyi é nghut le gi, nungmoq ô nau é haî nghut kôlhang, dung keq; haú hkûn, nungmoq lé byi rã nghut lhê.

⁸ Nungmoq gi, haú ashi gamyhó zui é dõng, Ngá Wã é hpungwup shing kang lé lhoq htoq shit é nghut luî, Ngá é chángzô pé nghut é hkyô lé tân shit nyî bekô nghut ri.

⁹ Haú Íwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuî, Ngá é chyitdap myit má gîng nyi keq.

¹⁰ Ngò gi, Ngá Wã é hkunmó lé châng é nghut luî, Yhâng é chyitdap myit má gîng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gîng nyi kó rã

nghut lhê.

¹¹ Nungmoq má Ngá é gabú hkyô joq nyi rã eq, nungmoq é gabú hkyô wó byíng jup rã matú, Ngò, nungmoq lé, dang shí pé tai é nghut lhê.

¹² Ngò, nungmoq lé chyitdap é su, nungmoq yhangchang chyitdap lhum keq; haú gi, Ngá é hkunmó nghut lhê.

¹³ Haú yhumsing é luzúm wui é matú, yhumsing é asak ap byî pyâm é chyitdap myit htoq kô é, chyitdap myit gi, ó yuq chyáng le a bò nghut ri.

¹⁴ Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wuî nghut bekô.

¹⁵ Ngò gi, Ngá Wã chyáng mai Ngò wó gyô yu é hkyô lunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghû, a wut lô e za, luzúm wuî nghû wut é nghut lhê; hkâsu mù gâ le, dui-nhâng zoshâng gi, yhâng yhumsing hpô é muzó lé a châng sé nghut ri.

¹⁶ Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gîng nyi é ashi zui rã matú hkyin masat tô é ru nghut lhê. Hau hkûn sheq, Ngá é myìng lé lang mù, haú Íwã chyáng nungmoq haî jung dung kôle, Yhang byi rã nghut lhê.

¹⁷ Nungmoq yhangchang chyitdap lhum keq; haú gi, Ngá é hkunmó nghut lhê.

Pé Lé A Jú É Hkyô

18 Haû mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq.

19 Nungmoq gi, haû mingkan eq sêng é bang nghut é nghut jáng, haû mingkan gi, yang eq sêng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haû mingkan mai hkyin htoq yû bê nghut luí, nungmoq gi, haû mingkan eq a séng lo kô é yanmai, mingkan gi, nungmoq lé a jú é nghut ri.

20 'Dui-nhâng zoshâng gi, yhang é yhumsing htoq je kô é a nghut.' nghû, Ngò, nungmoq lé taí é dang pé lé bûn nyi keq. Ngo lé lhang, yangmoq zing-rí yû bekô nghut le gi, nungmoq lé le, zing-ri kó râ nghut lhê. Ngò mhoqshit é hkyô lé, yangmoq cháng kô é nghut le gi, nungmoq mhoqshit é lé le, cháng kó râ nghut lhê.

21 Nghut kôlhang, yangmoq gi, Ngá é mying é yanmai, nungmoq lé haû su kut kó râ nghut lhê; hkâsu mù gâ le, haû Ngo lé nhang kat é Sû lé, yangmoq a sé kôluí nghut ri.

22 Yhangmoq lé, Ngò a lé nyo wú é nghut le gi, yangmoq mara bò kó râ a nghut; nghut kôlhang, ahkuí gi, yangmoq mara wó taí hkyut râ a nghut lo.

23 Ngo lé a jú é sû gi, Ngá Wa lé le a jú é sû nghut ri.

24 Haû ó yuq lhang a wó kut é muzó lé, Ngò, yangmoq chyáng a kut é nghut le gi, yangmoq mara bò kó râ a nghut; ahkuí kúm gi, laklaí kumlhá haû pé lé yangmoq myang nyi kôlhang, Ngò eq Ngá Wa lé a jú kô é nghut ri.

25 Haû gi, 'Yhangmoq gi, jungúyô má Ngo lé a jú kut akô nghut ri.'* ga, yangmoq é tarâ má kâ tô é dang lé lhoq dik é nghut ri.

26 Haû Íwâ chyáng mâ é, Ngò nhang kat râ nghut é, Íwa mai htoq lé lo é tengmán é Woi-nyí nghut é, haû hpaqchyí byi Sû jé lé é hkûn, Ngá é hkyô lé saksé hkám byi râ nghut lhê.

27 Nungmoq le, Ngò eq rahá sâng-hi mai nyi bekô nghut é yanmai, saksé hkám byi ra kó râ nghut lhê.

16

1 Nungmoq gi, myit lingbat jowò a joq kó sháng gaq nghû, haû pé banshoq lé, Ngò, nungmoq lé taí kyo bê nghut lhê.

2 Yhangmoq gi, nungmoq lé, tarajong mai hkat htoq pyám kó râ nghut lhê; ó yuq nghut kôle, yang mai nungmoq lé sat pyâm é hkûn, yang gi, haû dông mai Garai Gasang lé dojaú nyi lhê ga myit yu é ahkyíng, gè gè yang, jé râ nghut lhê.

3 Yhangmoq gi, haû Íwa lé le, Ngo lé le, a sé kô é yanmai, haû su kut kó râ nghut lhê.

* 15:25 Hkya-on 35:19; 69:4

⁴ Nghut kôlhang, nungmoq lé, Ngò sidiq byî é hkyô lé, ahkyíng jé jáng nungmoq bûn nyî kó sháng gaq nghû, Ngò haú hkyô taí kyô é nghut lhê. Ngò gi, nungmoq eq rahá nghut nyî é yanmai, haú hkyô lé, hí hkûn nungmoq lé a taí kyô é nghut lhê.

Chyoiyúng Woi-nyí é muzó

⁵ Nghut kôlhang, ahkuî, Ngò gi, Ngo lé nhang kat Su chyáng ló râ nghut lhê. Nghut kôlhang, nungmoq ó yuq le, 'Nàng, hká shut ló râ lú?' ga, Ngo lé a myi kó nghut ri.

⁶ Ngò, nungmoq lé, haú hkyô pé taí kyô é yanmai, nungmoq é i-myit unghkaú má iyon hkyô byíng to bekô nghut ri.

⁷ Nghut kôlhang, Ngò, nungmoq lé teng za taí kôlé, Ngò ló byuq é gi, nungmoq é matú je gè râ hkyô ru nghut lhê. Ngò ló byuq e za a nghut jáng, haú hpaqchyî byi Sú gi, nungmoq chyáng lé râ a nghut; Ngò ló jáng sheq, Yhang lé, Ngò, nungmoq chyáng nhang kat byi râ nghut lhê.

⁸ Yhang jé lé é hkûn, Yhang gi, haú mara wó é eq séng luî le, dingmán hkyô eq séng luî le, tarâ jéyáng hkyô eq séng luî le, haú mingkan lé tûn shit râ nghut lhê.

⁹ Haú yubak mara wó é eq séng luî ga jang, byu pé gi, Ngo lé a lumjíng kô é yanmai nghut ri.

¹⁰ Haú dingmán hkyô eq séng luî ga jang, Ngò gi, haú Íwâ chyáng ló râ nghut luî, nungmoq, Ngo lé a myàng lo

kó râ nghut é yanmai nghut ri.

¹¹ Haú tarâ jéyáng hkyô eq séng luî ga jang, mingkan shî é zau gi, mara byî é huî é nghut é yanmai nghut ri.

¹² Ngò gi, nungmoq lé taí râ hkyô myo myo wó ashî; nghut kôlhang, ahkuî, nungmoq wó hkâm kó râ a nghut.

¹³ Nghut kôlhang, haú tengmán é Woi-nyí jé lé é hkûn, Yhang gi, tengmán hkyô lhunglhang lé shuí sé râ nghut lhê. Yhang gi, Yhâng myit dông taí râ a nghut; Yhang, wó gyô yu é hkyô lé za taí luî, dut lò râ hkyô pé lé le, nungmoq chyáng taí pyô râ nghut lhê.

¹⁴ Yhang gi, Ngò wó é lé, yù mù, nungmoq lé taí kyô é eq sé nhang é dông, Ngá é hpungwup shingkang lé hû ló nhâng râ nghut lhê.

¹⁵ Haú Íwâ wó é lhunglhang gi, Ngá é chyat nghut lhê. Hau é yanmai, haú Woi-nyí gi, Ngò wó é lé yù mù, nungmoq lé sé nhâng râ nghut lhê nghû, Ngò taí é nghut lhê.

¹⁶ Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê." gâ ri.

Changzô Pé É Iyon Hkyô Gi, Gabú Hkyô Taú Dut Râ

¹⁷ Yhâng é chángzô pé ra-am gi, "Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê."

gâ é eq 'Ngò gi, Íwâ chyáng ló râ nghut é yanmai nghut lhê.' ga, Yhang taí é gi, hái jung gá nau é nghut lhê lú?" ga, rayuq eq rayuq myí lhum bum akô.

¹⁸ Hau htoq agó, yhangmoq gi, "Adê myáng má, gâ é gi, Yhang hái jung gá nau lhê lú? Nga-nhúng gi, Yhang hái taí nau é lé a sê gyo." ga, taí lhum bum akô nghut ri.

¹⁹ Yesuq gi, yhangmoq myi nau kô é hkyô lé sê ri; haû mù, Yhang, yhangmoq lé taí é gi, "Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê.' nghû, Ngò taí é lé, hái jung gá nau lhê laq nghû, rayuq eq rayuq myi lhum nyi akô lú?"

²⁰ Ngò, nungmoq lé teng za taí kôlé, haû mingkan gi, gabú nyi é u lé, nungmoq gi, ngaù é eq iyon yón é hui kó râ nghut lhê. Nungmoq gi, iyon yón é hui kó râ nghut lhê; nghut kôlhang, nungmoq é iyon hkyô gi, gabú hkyô taù dut râ nghut lhê.

²¹ Myiwe gi, zoshâng hkû râ nghut jáng, zohkû-nò nò râ ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkûn gi, mingkan htoq má zoshâng rayuq wó hku to bê nghut luí, yhang gabú é yanmai, haû no hpu é hkyô lé a bun byuq lo nghut ri.

²² Haû eq rajung za, ahkuí gi, nungmoq iyon yôn é ahkyíng nghut ri; nghut

kôlhang, Ngò, nungmoq lé dum huí é hkûn, nungmoq gi, gabú kó râ nghut lhê; nungmoq é gabú hkyô haû lé, nungmoq chyáng mai ó yuq eq le wó yu pyám byi râ a nghut.

²³ Haû buinyi má, nungmoq gi, Ngo lé, hái le a dung lo kó râ nghut lhê. Ngò, nungmoq lé teng za taí kôlé, nungmoq gi, Ngá myíng lang luí, Ngá Wâ chyáng hái dung kôle, Yhang byi râ nghut lhê.

²⁴ Ahkuí jé shoq, nungmoq gi, Ngá myíng lé lang luí, hái le a dúng wú shi kó nghut ri. Dung keq, haû hkûn, nungmoq myang hap yù kó râ nghut luí, nungmoq é gabú hkyô gi, byíng jup lò râ nghut lhê.

²⁵ Ngò gi, nungmoq lé, dangtú dông haû pé taí kyo bê nghut lhê; nghut kôlhang, Ngò gi, dangtú a chùng lô e za, haû Íwa eq sêng é hkyô, nungmoq lé san za taí kyô é ahkyíng jé râ nghut lhê.

²⁶ Haû buinyi má, nungmoq gi, Ngá é myíng lé lang luí dung kó râ nghut lhê. Ngò gi, nungmoq é matú, haû Íwâ chyáng dung byi râ nghut taí nyi é a nghut.

²⁷ Hkâsu mù gâ le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjíng kô é yanmai, haû Íwa yhang, nungmoq lé chyitdap é nghut lhê.

²⁸ Ngò gi, haû Íwâ chyáng mai htoq lé mù, mingkan má

lé jé wang é nghut lhê; ahkuî, Ngò gi, mingkan mai htoq mù, haû Íwâ chyáng dum taû ló râ nghut lhê." gâ ri.

²⁹ Haû hkûn, Yesuq é chángzô pé gi, "Ahkuî, Nàng gi, dangtú a chûng é dông, san za taî kyô nyi é nghut bê!

³⁰ Nàng gi, lhunglhang lé sê é sù nghut é lé le, Nàng lé, ó yuq èq le dangmyi myi nó a râ é hkyô lé le, ahkuî, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjîng lhê." ga taî bum akô.

³¹ Haû hkûn, Yesuq tâ taî é gi, "Nungmoq, ahkuî lumjîng bekô lhu?

³² Nghut kôlhang, nungmoq gi, lhoq pyo pyâm é hui lui, Ngo lé baú za tô pyâm to kômù, ó le ô yhûm shut ló byuq râ ahkyíng jé lo nyi bê nghut ri; ahkuî lhang jé to bê. Nghut kôlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

³³ Nungmoq gi, Ngò má nuingón hkyô wó kó sháng gaq nghû, Ngò gi, haû hkyô pé lé taî kyô é nghut lhê. Nungmoq gi, mingkan shí má, wuîhke hkyô hui kó râ nghut lhê; nghut kôlhang, myit wum lhoq kíng keq. Ngò gi, mingkan lé ung pyâm bê nghut lhê." gâ ri.

17

Yesuq Kyûdung É Hkyô

¹ Yesuq gi, haû su ga taî é htâng má, mauhkûng shut tu wú lui, kyûdung é gi, "Áwa ê,

ahkyíng jé bê nghut ri; haû Nung Zo gi, Nang lé hpungwup shingkang wó hu nhâng sháng gaq, Nung Zo lé hpungwup shingkang hû ló nhâng laq ô!

² Hkâsu mù gâ le, Nàng mai Yhang lé ap byi tô é bang ban-shoq lé, Yhang, ahtum abyuq é asak wó byi sháng gaq ga, Nàng gi, byù lhunglhang bang lé up râ ahkáng, Yhang lé byi tô é yanmai nghut ri.

³ Nàng za tengmán é Garai Gasang nghut é eq Nàng nhang kat é sù Yesuq Hkrisduq lé, sê é gi, ahtum abyuq é asak nghut lhê.

⁴ Ngò gi, Nàng, Ngo lé wùn waq nhang é muzó lé lhoq pán é dông, myidàm htoq má, Náng é hpungwup shingkang lé lhoq htoq shit bê nghut lhê.

⁵ Áwa ê, haû mingkan lhang a joq shí mai, Ngò, Nàng eq rahá chôm wó é hpungwup shingkang èq, ahkuî, Náng é myoq hí má, Ngo lé hpungwup shingkang dan hu nhâng laq.

Chángzô pé matú, Yesuq kyûdung byi é hkyô

⁶ Mingkan mai, Nàng, Ngo lé hkyin htoq yû byi é bang lé, Ngò gi, Náng é myîng lhoq htoq shit bê nghut lhê. Yhangmoq gi, Náng é byu pé nghut bekô; Nàng gi, yhangmoq lé, Ngá é loq má ap byi bê nghut lui, yhangmoq gi, Náng é dang lé châng kut bekô nghut ri.

⁷ Nàng, Ngo lé byi é lhunglhang gi, Náng chyáng

mâ é nghut é lé, ahkuî, yhangmoq sé bekô nghut ri.

⁸ Hkâsu mù gâ le, Nàng, Ngo lé byi kat é mungdang pé lé, Ngò, yhangmoq lé byi bê nghut lui, yhangmoq gi, haú pé lé hap yù bekô nghut ri; Ngò gi, Náng chyáng mai lé é sù nghut é lé le, yhangmoq hkyak sê akô; Nàng, Ngo lé nhang kat é hkyô lé le, yhangmoq lumjìng bekô nghut ri.

⁹ Ngò gi, yhangmoq é matú kyùdung byi lê. Ngò gi, haú mingkan byu pê é matú dung byi nyi é a nghut; Nàng, Ngo lé ap byi tô é bâng é matú sheq dung byi nyi é ru nghut lê; hkâsu mù gâ le, yhangmoq gi, Náng é byu pé nghut akô.

¹⁰ Ngò wó é lhunglhang gi, Náng é chyat nghut mù, Nàng wó é lhunglhang le, Ngá é chyat nghut lê. Haú mù, Ngò gi, yhangmoq má hpungwup shing kang hú é hui bê nghut lê.

¹¹ Ngò gi, Nàng chyáng lò râ nghut lê mù, mingkan htoq má nyi nyi râ a nghut lo; nghut kôlhàng, yhangmoq gi, mingkan htoq má nyi nyi shirâ nghut lê; chyoyúng é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nàng, Ngo lé byi é, haú Náng myìng é a-tsam èq yhangmoq lé upzúng nyi aq.

¹² Ngò gi, yhangmoq eq rahá nghut nyi é u lé, yhangmoq lé upzúng bê nghut lui, Nàng, Ngo lé byi é myìng hau èq, yhangmoq lé rago zúng bê nghut lê. Haú Chyúmdang

lhoq dik sháng gaq ga, haú bang mâ é htên byoq hui râ sù mai lai lui, ó yuq le a byuq byuq é nghut lê.

¹³ Ngò gi, ahkuî, Náng chyáng lò râ nghut bê; nghut kôlhàng, Ngá é gabú hkyô gi, yhangmoq chyáng byìng jup sháng gaq nghù, Ngò gi, haú pé lé mingkan má tai é nghut lê.

¹⁴ Ngò gi, yhangmoq lé, Náng é mungdang byi bê nghut lê; haú mingkan gi, yhangmoq lé a jú nghut ri; hkâsu mù gâ le, Ngò gi, mingkan mâ é a nghut é su, yhangmoq le, mingkan mâ é a nghut kô é yanmai nghut ri.

¹⁵ Ngò kyùdung é gi, Nàng, yhangmoq lé mingkan mai shui htoq yù râ matú dúng é a nghut, haú agè ashop su chyáng mai, yhangmoq lé upzúng yù râ matú sheq dúng é ru nghut lê.

¹⁶ Ngò gi, mingkan mâ é a nghut é su, yhangmoq le, mingkan mâ é a nghut kó.

¹⁷ Yhangmoq lé, haú tengmán hkyo èq lhoq sân-yúng yù laq; Náng é mungdang gi, tengmán hkyô nghut ri.

¹⁸ Nàng, Ngo lé, mingkan má nhang hâng kat é su, Ngò le, yhangmoq lé, mingkan má nhang hâng kat é nghut lê.

¹⁹ Yhangmoq lé, tengmán hkyô má wó lhoq sân-yúng yù kó sháng gaq nghù, Ngò gi, yhangmoq é matú, yhumsing gùng lé lhoq sân-yúng yu é nghut lê.

É Matú, Yesuq Kyûdung Byî É Hkyô

²⁰Ngò gi, yhangmoq é matú baú za kyûdung byî é a nghut; Yhangmoq é danglu é yan-mai, Ngo lé lumjǐng kó râ bǎng é matú le, Ngò kyûdung byî é nghut lhê.

²¹Haû mù, yhangmoq banshoq bang gi, rading ralhum za dut nyi kó shǎng gaq. Haû mingkan gi, Nàng, Ngo lé nhang kat é hkyô lé wó lumjǐng shǎng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó shǎng gaq.

²²Ngá hpe gi, ragùng za nghut é su, yhangmoq le, rading ralhum za dut nyi kó shǎng gaq nghû, Ngò gi, Nàng, Ngo lé byî é hpungwup shingkan lé, yhangmoq lé byi bê nghut lhê.

²³Nàng, Ngo lé nhang kat bê hkyô eq Nàng, Ngo lé chyitdap é su, yhangmoq lé chyitdap é hkyô lé, haû mingkan wó sé râ matú, yhangmoq gi, gumjup shoq rading ralhum za wó dut kó shǎng gaq nghû, Ngò gi, yhangmoq má nyi nyi luí, Nàng gi, Ngò má nyi nyi é nghut lhê.

²⁴Áwa ê, haû mingkan lháng a joq shi mai, Nàng, Ngo lé chyitdap luí byi tô é hpungwup shingkan haû lé, Nàng, Ngo lé byi tô é bang, wó myàng kó râ matú le, Ngò nyi é jang má, Ngò eq rahá wó nyi kó râ matú le, Ngò ô nau ri.

²⁵Dingmán é Áwa ê, haû mingkan gi, Nang lé a sé

kôlhang, Ngò gi, Nang lé sê lhê; Nàng, Ngo lé nhang kat é hkyô lé gi, yhangmoq sé akô nghut ri.

²⁶Nàng, Ngo lé chyitdap é chyitdap myit gi, yhangmoq má wó joq nyi râ matú le, Ngò gi, yhangmoq má wó nyi nyi râ matú le, yhangmoq lé, Ngò, Nang é hkyô sé nhâng bê nghut luí, xoq mù sé nhang nyi shirâ nghut lhê." gá ri.

18

Yesuq Chyup Yû Huí É Hkyô

Mht 26:47-56; Mrk 14:43-50; Luk 22:47-53

¹Yesuq gi, haû su ga kyûdung é htàng má, Yhâng é chǎngzô pé eq rahá, Kedron wuìhkung mai lai byit dap ló luí, haû hpoq má joq é hkyâm ralhum má wang e akô nghut ri.

²Hkyâm haû gi, Yesuq eq Yhâng é chǎngzô pé lhaq hui hui kut é jowò nghut é yan-mai, haû Yesuq lé ap pyám râ sù Yudaq le sê ri.

³Haû mù, Yudaq gi, haû hkyangjong agyi pé eq Hparishe pê chyáng mai nhang kat é noqkuq yhùm zúng bang ra-am eq gyezo rajum lé, haû jowò shut shuí wang lé lo ri. Haû bang gi, myihu, myibung eq shâm lhâm pé chung lé lo akô.

⁴Yesuq gi, Yhang má dut lò râ hkyô lhunglháng lé sé gû nghut mù, htoq è luí, yhangmoq lé, "Nungmoq, ó yuq lé ho akô lú?" ga myi ri.

⁵ Haú hkûn, yhangmoq gi, "Nazaret wà byù Yesuq lé ho lhê." ga tâi taí kôjáng, Yesuq gi, "Ngò gi, haú yuq nghut lhê." ga tâi ri. (Yesuq lé ap pyám sù Yudaq le, yhangmoq eq rahá yap tô ri.)

⁶ "Ngò gi, haú yuq nghut lhê." ga Yesuq taí kat é hkûn jáng, yhangmoq gi, nungzut zut mù, myigùng má lêng leq ló bum akô nghut ri.

⁷ Yhang gi, "Nungmoq, ó yuq lé ho akô lhú?" ga, yhangmoq lé dum myî kat jáng, yhangmoq gi, "Nazaret wà byù Yesuq lé ho lhê." ga tâi akô.

⁸ Haú hkûn, Yesuq gi, "Ngò gi, haú yuq nghut lhê nghû, nungmoq lé taí kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tâi ri.

⁹ Haú gi, "Nàng, Ngo lé byî tô é bang rayuq le lháng, Ngò, a lhoq hpyuq pyám." ga, Yhang taí tô é dang dik râ matú nghut ri.

¹⁰ Haú hkûn, Simun Petruq gi, shâm wun tô é nghut luí, shâm shê mù, haú hkyangjong mó é dui-nhâng zôshang é loqyo nohkyap lé zân hpyit kat byî ri. (Dui-nhâng zoshâng haú yuq é mying gi, Malhku gà ri.)

¹¹ Haú mù, Yesuq gi, Petruq lé, "Náng é shâm lé, sham-byâng má xâng pyám aq! Haú Íwa, Ngo lé byî é góm* lé, Ngò a shuq é wó nyî râ lhú?" ga tâi kat ri.

Yesuq Lé, Anna Chyáng Shuî É É Hkyô

Mht 26:57-58; Mrk 14:53-54; Luk 22:54

¹² Hau htâng, gyezo haú jûm eq yhangmoq é gyezau hpó, Yudaq byu pê é mingsuwún wuî gi, Yesuq lé chyup yû mù, tuí akô nghut ri.

¹³ Yhangmoq gi, haú zân má é hkyangjong mó Kayahpaq é yhâng-tsa Anna chyáng hí, Yhang lé shuî ló akô nghut ri.

¹⁴ Kayahpaq gi, byu pê é matú rayuq shí hkám byî le je gè râ nghut lhê ga, haú Yudaq byu pé lé hpaqchyî byî é sù yuq nghut ri.

Yesuq Lé, Petruq Sâng-hi Dam He-ngik Pyám É Hkyô

Mht 26:69-70; Mrk 14:66-68; Luk 22:55-57

¹⁵ Simun Petruq eq gotú chángzo rayuq gi, Yesuq htâng châng e ló akô nghut ri. Gotú chángzo haú yuq gi, hkyangjong mó lé rago sê lhê nghut mù luí, hkyangjong mó é yhumwàng hkaú shut, Yesuq é htâng má châng wang ló ri.

¹⁶ Petruq kúm gi, hkúmdong shinggan má láng yap tô ri. Haú hkyangjong mó lé rago sê é sù, gotú chángzo haú yuq gi, taú htoq ló mù, hkum zúng é myiwe myhí lé taí luí, Petruq lé shuî háng yu ri.

¹⁷ Haú hkûn, haú hkum zúng é myiwe myhí gi, Petruq lé, "Nàng gi, haú yuq é chángzô pé mâ é rayuq a nghut lhú?" ga myi jáng,

* 18:11 Góm lé shuq gà é gi, jamjau hui râ eq shí hkám râ lé, taí nau é nghut lhê.

yang gi, "Ngò a nghut." ga tũ tai ri.

¹⁸ Haũ u lé, gyoq é yan-mai, dui-nhâng zoshâng wui eq noqkuq yhũm zúng bang gi, yangmoq gyoq gâng rã matũ myigyê eq mut tô é my-ihkyóm má, gyoq gang yap nyi bum akô. Petruq le, yangmoq eq rahá gyoq gang yap tô ri.

Yesuq Lé, Hkyangjong Mó Myi Choq Wú É Hkyô

Mht 26:59-66; Mrk 14:55-64; Luk 22:66-71

¹⁹ Haũ u lé, haũ hkyangjong mó gi, Yesuq lé, Yhâng é chángzô pê hkyô eq Yhâng mhoqshit é hkyô eq séng luĩ myĩ ri.

²⁰ Haũ hkũn, Yesuq gi, "Haũ mingkan htoq má, Ngò, de de tái bê nghut lhê. Ngò gi, haũ Yudaq byu pé banshoq bang chôm zing é, tarajong pé má le, noqkuq yhũm má le, ayang mhoqshit é nghut lhê. Ngò gi, haq zaũ luĩ tái é hkyô haĩ le a joq.

²¹ Nang, haĩ mù Ngo lé myi lhê lhú? Haũ, Ngò tái é lé wó gyô é bang lé myi aq; Ngò haĩ tái é hkyô lé, yangmoq gè gè sê akô nghut ri." ga tũ tai ri.

²² Yesuq haũ su ga tái jáng, haũ nãm má nyi tô é noqkuq yhũm zúng sũ rayuq gi, Yhang lé pyuq kat luĩ, "Hkyangjong mó lé wá, Nang, haũ su nghũ dang tũ lhê lhú?" ga tái ri.

²³ Haũ hkũn, Yesuq gi, "Ngò tái shut é nghut le gi, shut é hkyô lé saksé tũn shit aq. Nghut kôlhang, Ngò gi, têng é đông ru tái le nhing, nang, haĩ

mù Ngo lé pyuq lhê lhú?" ga tũ tai ri.

²⁴ Hau htâng, Anna gi, Yhang lé tuĩ to gũ, haũ hkyangjong mó Kayahpaq chyáng dé kat nhang ri.

Yesuq Lé, Petruq Xoq Hengik Pyâm É Hkyô

Mht 26:71-75; Mrk 14:69-72; Luk 22:58-62

²⁵ Haũ Simun Petruq gyoq gang yap tô é hkũn, "Nang gi, Yhâng é chángzô pé mã é rayuq a nghut lhú?" ga, yang lé myi kôjáng, yang gi, "Ngò a nghut." ga, dum he pyâm ri.

²⁶ Haũ Petruq eq nohkyap zãn hpyit pyám byĩ é huĩ su é buinũm nghut é sũ, haũ hkyangjong mó é dui-nhâng zoshâng rayuq gi, yang lé, "Haũ hkyâm má, nang, Yhang eq rahá nghut nyi é lé, ngò a myang é su ngam lhê lhú?" ga tái ri.

²⁷ Haũ hkũn, Petruq gi, xoq he pyám ri; haũ u yang, woq tũn bê nghut ri.

Pilat É Myoq Hí Má, Yesuq Jé Nyi É Hkun Lhê Hkyô

Mht 27:1-2, 11-14; Mrk 15:1-5; Luk 23:1-5

²⁸ Hau htâng, yangmoq gi, Yesuq lé, Kayahpaq chyáng mai, haũ mauzau hpô é yhũmwàng shut shuí e ló akô. Haũ u gi, napsũn noq ashĩ nghut ri. Yangmoq gi, agot a-ũ a dut e za, htungli đông Lhoqlhai Poĩ lé wó zo rã matũ, yhũmhkaũ má a wàng kó nghut ri.

²⁹ Haũ mù luĩ, mauzau Pilat gi, yangmoq chyáng htoq ê mù, "Shĩ yuq lé, nungmoq hai

mara hûn nau akô lú?" ga myí ri.

³⁰ Haú hkûn, yhangmoq gi, "Shí yuq, a ge é muzó kut é a nghut le gi, Yhang lé, náng é loq má ngamoq lé ap byi rá a nghut." ga tú taí akô.

³¹ Pilat gi, "Yhang lé, nungmoq yhang shuí ló mù, nungmoq é tarâ dông ló jéyáng keq." ga taí jáng, haú Yudaq byu pé gi, "Nghut kôlháng, ngamoq gi, ó yuq lé sat rá ahkáng le a wó é nghut lê." ga tú taí akô nghut ri.

³² Haú su dut é hkyô gi, Yesuq, Yhang hká dông shí rá ga taí é dang lé lhoq dik rá matú nghut lê.

³³ Haú mù, Pilat gi, yhúmhkaú má taú wang ló mù, Yesuq lé wut yù luí, "Nàng gi, Yudaq byu pé é hkohkâm nghut lê lú?" ga myí ri.

³⁴ Haú hkûn, Yesuq gi, "Haú gi, náng é myít dông taí é nghut lê lú? A nghut jáng, góbang mai, nang lé, Ngá é hkyô taí kyo luí nghut lê lú?" ga taú myí ri.

³⁵ Pilat gi, "Ngò gi, Yudaq byù nghut lê lú? Haú Náng é byù myú eq Náng é hkyangjong agyi pé sheq, Nang lé, ngá loq má ap byí é ru nghut lê. Nàng gi, haí kut é nghut lê lú?" ga dum myí ri.

³⁶ Haú hkûn, Yesuq gi, "Ngá é mingdán gi, mingkan shí eq a sêng. Mingkan shí eq sêng é ru nghut le gi, haú Yudaq byu pé, Ngo lé a wó chyup yu lo shoq, Ngá é dui-nhâng zoshâng wui, Ngo lé

chôm hung yù kó rá nghut lê. Nghut kôlháng, Ngá é mingdán gi, mingkan shí eq a sêng é ru nghut lê." ga taí ri.

³⁷ Haú mù, Pilat gi, "Haú jáng, Nàng gi, hkohkâm nghut bê lú?" ga myi jáng, Yesuq gi, "Ngo lé, hkohkâm nghut lê ga, nàng taí nyi é jô ri. Gè gè ga jáng, Ngò gi, hau é yanmai hku lé lo é sù nghut lê; haú tengmán hkyô lé saksé hkám rá matú, Ngò, mingkan htoq má jé lé é nghut lê. Haú tengmán hkyô eq sêng é sù ó yuq le, Ngá é dang lé gyô ri." ga tú taí ri.

³⁸ Haú hkûn, Pilat gi, "Tengmán hkyô gâ é gi, haí jung lú?" ga myí ri. Yhang gi, haú su ga myi luí, haú Yudaq byu pé chyáng dum htoq ê mù, "Shí yuq chyáng mara hûn rá hkyô, ngò a myàng nghut ri.

³⁹ Nghut kôlháng, haú Lhoqlhai Poí u lé, nungmoq é matú, ngò, htóng byù rayuq nhang htoq kat byi byi kut é htûng, nungmoq wó akô. Haú mù, 'Yudaq byu pé é hkohkâm' lé, nhang htoq kat byi rá lé, nungmoq ô nau akô lú?" ga myí ri.

⁴⁰ Haú hkûn, yhangmoq gi, "Haú yuq lé a nghut! Barabaq lé sheq nhâng byi aq." ga, garú kat akô. Barabaq gi, damyaq nghut ri.

19

Yesuq Lé, Tapzîng Má Jén Sat Rá Matú Doqdân É Hkyô Mht 27:15-31; Mrk 15:6-20; Luk 23:13-25

1 Haù mù luí, Yesuq lé lêng she yù mù, nhuq bat rã matú, Pilat hkunmó hkyô ri.

2 Haù gyezô pé gi, zujan-má saí yù kôluí, Yesuq é ulhum má tsung byi kômù, Yhang lé, buhîng nè hut byi akô nghut ri.

3 Hau htâng, yhangmoq gi, Yhâng chyáng dum huí ê ê kut luí, "Yudaq byu pé é hkohkâm ê! Chyung hîng xê hîng nyi sháng gaq ô!" ga taí kômù, Yhâng é myoqdong má pyuq byi akô nghut ri.

4 Pilat gi, haù Yudaq byu pé chyáng radàm dum htoq ê mù, "Wú keq, shí yuq chyáng mara hûn rã hkyô, ngò a myang é lé nungmoq sé sháng nghú, Yhang lé, ngò nungmoq chyáng shuí htoq lé byi lhê." ga taí ri.

5 Yesuq gi, haù zumuq tsûng tô é eq bu nè hîng wut to mù htoq lé jáng, Pilat gi, yhangmoq lé, "Wú keq, Yhang, shí yuq nghut lhê." ga taí ri.

6 Haù hkyangjong agyi pé eq yhangmoq é noqkuq yhúm zúng bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garû bum akô.

Nghut kôlhang, Pilat gi, "Nungmoq shuí yù mù, tapzîng má jén sat keq. Ngò gi, Yhâng chyáng mara hûn rã hkyô a myàng." ga tũ taí ri.

7 Haù hkûn, haù Yudaq byu pé gi, "Ngamoq chyáng tarã rahkat joq lhê; tarã haù đông ga jang, Yhang gi, shí gíng

bê nghut ri; hkâsu mù gã le, Yhang gi, Garai Gasâng é Yhangzo haù nghut lhê gã ri." ga xoq taí akô.

8 Pilat gi, dang haù lé wó gyo jáng, je gyô gyuq luí,

9 yhúmhaù shut dum wang ló mù, Yesuq lé, "Nàng, hkâmã é sũ nghut lhê lú?" ga myí ri. Nghut kôlhang, Yesuq gi, dang rahkun lháng a tũ taí byi nghut ri.

10 Haù hkûn, Pilat gi, "Nàng, ngo lé a tũ taí kut lhê lú? Ngò gi, Nàng lé, wó lhoq lhut kat é eq tapzîng má wó jén sat pyám é ahkáng wó sũ nghut é lé, Nàng a sé lú?" ga myí ri.

11 Yesuq gi, "Nàng lé, haù ahtoq mai ahkáng byi e za a nghut le gi, nàng, Ngo lé haí kut rã a-tsam le wó rã a nghut. Haù mù luí, Ngo lé, náng é loq má ap byi é sũ gi, mara je bo é nghut lhê." ga tũ taí ri.

12 Haù hkûn mai, Pilat gi, Yesuq lé lhoq lhut kat byi nau nyi bê nghut ri. Nghut kôlhang, haù Yudaq byu pé gi, "Nàng, haù yuq lé nhang pyám é nghut jáng, nàng gi, hkoséng Kehta q é luzúm a nghut lo; yhumsing gùng lé, hkohkâm gã é sũ gi, hkoséng Kehta q eq shai lhum é sũ nghut lhê." ga, ru jâng garû nyi bum akô nghut ri.

13 Haù lé wó gyo jáng, Pilat gi, Yesuq lé shuí htoq ê mù, Hebre myíng đông Gabahta gã é Luqgok hkâng myhang to jang nghu é jowò mã é tarã jéyáng tanghkuq má zung tô ri.

14 Haú u gi, Lhoqlhai Poí é matú, Hên Lajâng é Buinyì nyí-káng raxe í hkyíng nghut ri.

Pilat gi, haú Yudaq byu pé lé, "Nungmoq é hkohkâm lé wú keq." ga taí ri.

15 Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garû bum akô.

Haú hkûn, Pilat gi, "Nungmoq é hkohkâm lé wá, ngò, tapzîng má jén sat pyám râ lhu?" ga myi jáng, haú hkyangjong agyi pé gi, "Haú hkoséng Kehta q mai lai lui, gotû hkohkâm ngamoq a wó." ga, tú taí akô nghut ri.

16 Hau htâng má, Pilat gi, Yesuq lé tapzîng má jén sat pyám râ matú, yhangmoq é loq má ap byí kat bê nghut ri. Haú mù lui, yhangmoq gi, Yesuq lé shuí ló bekô nghut ri.

Tapzîng Má Jén Pyâm É Hkyô

Mht 27:32-44; Mrk 15:21-32; Luk 23:26-43

17 Yesuq gi, yhumsing é tapzîng lé waq mù, Hebre myíng dông Golgahta gâ é, Ugyap joq é Jowò gâ é jang má htoq jé e ri.

18 Yhangmoq gi, haú má, Yesuq lé tapzîng htoq má jén tap pyám akô; Yhang eq rahá, gotû í yuq lé le, rahkyam shut rayuq kut jén to kô é nghut lui, Yesuq gi, gyoro má nghut ri.

19 Pilat le, masat laiká kâ yù lui, haú tapzîng htoq má tap

tô ri. Haú má gi, "YUDAQ BYU PÊ É HKOHKÂM, NAZARET WÀ BYÛ YESUQ" gâ tô ri.

20 Yesuq lé jén tô é jowò gi, myuq eq chyâng lhûm é htoq agó, haú masat laiká gi, Hebre dông le, Latin dông le, Grik dông le, kâ tô é yanmai, haú Yudaq byu pé myo myo gi, masat laiká haú lé nghap bum akô nghut ri.

21 Haú Yudaq byu pé é hkyangjong agyi pé gi, Pilat lé, "Yudaq byu pé é hkohkâm' nghû hkáká, 'Ngò gi, Yudaq byu pé é hkohkâm nghut lê ga, Yhang taí ri.' nghû lui sheq ká aq." ga taí akô.

22 Haú hkûn, Pilat gi, "Ngò kâ é dông, ngò kâ to bê nghut lê." ga tú taí ri.

23 Haú gyezô pé gi, Yesuq lé tapzîng má jén tap pyâm é htâng má, Yhâng é mebu pé lé yù mù, myí hkyam gàm lui, rayuq rahkyam yu akô; haú ahte bu lé le, gàm râ dâ akô; nghut kôlhang, haú gi, hkyup-shi a bo e za, awang mai ah-pyo hpyot kut woq tô é nghut ri.

24 Haú mù, yhangmoq gi, "Bu shí lé gi, a lêng cheq e za, ó yuq myang yù ang râ laq, hkyîn shosé she wú sháng." ga, rayuq eq rayuq taí lhum akô.

Haú gi,

"Yhangmoq, Ngá é mebu lé chô m gam yù kó râ; Ngá é ahtê bû é matú, hkyîn shosé shê kó râ nghut lê."*

gâ é Chyúmdang lé lhoq dik râ matú dut é nghut lhê. Haû mù, gyezô pé gi, haû su kut bekô nghut ri.

²⁵ Haû Yesuq é tapzîng nàm má gi, Yhângnu, Yhângnû é yhanggu byizo eq, Klopa é yhangmyi Mariq eq Magadalaq wà mâ é Mariq pé, yap tô bum akô.

²⁶ Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, "Ánu ê* nung zo lé wú aq." ga taí mù,

²⁷ chángzo haû lé le, "Náng nu lé wú aq." ga taí ri. Haû hkûn mai, chángzo haû yuq gi, Yesuq é yhângnu lé, yhâng é yhûm shut shuí ló bê nghut ri.

Yesuq Soqkâng Byit É Hkyô Mht 27:45-56; Mrk 15:33-41; Luk 23:44-49

²⁸ Hau htâng, Yesuq gi, ahkuí, muzó bàn bê nghut é lé sé luí, haû Chyúmdang lhoq dik râ matú, "Ngò, wuì shit ri." ga taí ri.

²⁹ Haú má, tsibiyiq wing chyîn rayambú joq tô ri; haû mù, yhangmoq gi, wuìmaù lé tsibiyiq wing chyîn haú má jum yù luí, jàm-yang ahyo má tuí tap mù, Yhâng é nhutwuí jé shoq yhun byí akô nghut ri.

³⁰ Yesuq gi, tsibiyiq wing chyîn haú lé shuq yù mù, "Mù bàn bê." ga taí ri. Yhang, haû su ga taí eq yhang, ulhum nghuq ló mù, kâng byit bê nghut ri.

³¹ Htang nyí gi, ahkyak é Bánno buinyì nghut luí, haû nyí gi, Hên Lajang Buinyì nghut ri. Haû mù, Yudaq byu pé gi, Bánno buinyì má, mâng pé lé tapzîng htoq má a joq to nhâng naù kô é yanmai, hkyí pé lé bat hkyuí pyám mù, mâng pé lé yù hkyô pyám nhâng râ matú, Pilat chyáng dúng tôngbán akô.

³² Haû mù luí, gyezô pé gi, lé mù, Yesuq eq jén hui su nhik mâ é, rayuq é hkyí lé hí bat hkyuí pyám mù, rayuq é hkyí lé dum bat hkyuí pyám akô nghut ri.

³³ Nghut kôlhang, yhangmoq gi, Yesuq chyáng jé é hkûn, Yhang shi to lánng bê nghut é lé myàng kômù, Yhâng é hkyí lé a bat hkyui byi kó nghut ri.

³⁴ Nghut kôlhang, gyezo rayuq gi, Yesuq é namcham má lham èq htaù kat byi jáng, radá dâm sui eq wuì yui htoq lo ri.

³⁵ Haû lé myàng é sù gi, saksé hkám byí ri; yhâng saksé hkám é hkyô gi, tengmán ri. Haû yhang taí kyô é hkyô gi, têng é lé, yhang sé mù, nungmoq le wó lumjíng kó sháng gaq ga, saksé hkám byí é nghut ri.

³⁶ Haú hkyô pé dut é gi, "Yhâng é showui rahkat lháng a lhoq hkyui râ nghut lhê."* gâ é Chyúmdang haû lhoq dik râ matú nghut lhê.

³⁷ Chyúmdang gotù ralhum má le, "Yhangmoq èq htau

* **19:26** Ánu ê, gâ é lé, Grik đông gi, "myiwe myhí ê" ga bo tô é nghut lhê. ☆ **19:36** Htoq Ló 12:46; Gyung So 9:12; Hkya-on 34:20

htông é sù lé, yhangmoq tu wú kó râ nghut lhê."☆ gâ é bo tô ashî nghut ri.

Yesuq Lé, Myhup Yhum É Hkyô

Mht 27:57-61; Mrk 15:42-47; Luk 23:50-56

38 Hau htâng, Yesuq é chángzo dut nyi é Aramahti myuq byû Yosep gi, haû Yudaq byu pé lé gyuq é yanmai, tsik za Pilat chyâng Yesuq é gungsôm lé, lé dúng ri. Pilat èq ahkáng byî kat jáng, yhang gi, gungsôm haû lé, lé yu ló bê nghut ri.

39 Yhang gi, hí hkûn, myín lé, Yesuq lé ê huî é sù, Nikodema eq rahá lé é nghut ri; Nikodema gi, mura eq achyo nyhò tô é namngón jung sum xê joí kô yu lé ri.

40 Yhangnhik gi, Yesuq é gungsôm lé yù mù, Yudaq byu pé é màng yhum htông eq rajung za, namngón jung eq rahá, pán yúng èq htup yup to byî akô.

41 Haû Yesuq lé tapzîng má jén sat pyâm é jowò nàm má, hkyâm ralhüm joq ri; ó yuq lé le a lheq wú shî é, lup sik ralhüm hkyâm hkaû má joq tô ri.

42 Haû nyí gi, Yudaq byu pé é Hên Lajang Buinyî nghut é yanmai le, lup haû le chyâng é yanmai le, yhangnhik gi, Yesuq lé, haû má ê lheq tô akô nghut ri.

20

Lup Akôm

Mht 28:1-10; Mrk 16:1-8;

Luk 24:1-12

1 Bánno buinyî htâng, napsûn noq le mau a bó shimá, Magadalaq wà má é Mariq gi, haû lup má ê jé le, lup hkum má é luqlong huî hpyuq to lánq é lé myang ri.

2 Haû mù, yhang gi, Simun Petruq eq Yesuq chyitdap é chángzo góyuq chyáng din jé ló mù, "Haû Yhumsîng lé, lup mai yu htoq ló byuq bekô; hkâmá ê kat to kô é lé, ngamoq a sé." ga taí ri.

3 Haû mù, Petruq eq chángzo haû gi, lup shut e ló akô.

4 Yhangnhik í yuq é din akô; nghut kôlhang, chángzo haû gi, Petruq htoq má wó dân luî, lup má hí din jé e ri.

5 Haû mù, yhang gi, ahkaû shut ngóm wú kat é hkûn, haû pán yúng htui leq tô é lé myang ri; nghut kôlhang, yhang gi, a wang ê nghut ri.

6 Hau htâng, Simun Petruq gi, châng jé luî, lup hkaû shut wang e ri; haû hkûn, yhang gi, haû má pán yúng htui joq tô é lé le,

7 haû Yesuq é ulhum má htup é panchoq lé le, myang ri. Panchoq haû gi, pán yúng htui eq rahá a nghut e za htui jup leq tô ri.

8 Haû lup má hí jé é chángzo le, ahkaû má wang ê luî, myàng jáng, lumjîng bê nghut ri.

9 (Yesuq gi, shi é mai dum dui toq lô râ nghut lhê ga bo tô é Chyúmdang lé, yhangnhik gi, a sê gyo shi kó nghut ri.)

¹⁰ Hau htâng, haû chángzô nhik gi, yhûm taû ló bekô nghut ri.

Magadalaq Wà Mâ É Mariq Lé, Yesuq Htoq Shit É Hkyô

Mrk 16:9-11

¹¹ Nghut kôlhang, Mariq gi, lup shinggan má ngau yap tô ri. Yhang gi, ngaû uchyang lup hkaû má ngóm wú kat ri.

¹² Haú hkûn, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyî htâng shut rayuq, umhtúng shut rayuq, zung to kô é lé, myang ri.

¹³ Yhangnhik gi, "Myiwe myhí ê, nàng, haî mù ngau nyi lê lú?" ga myi kôjáng, yhang gi, "Ngá é Yhumsîng lé yù ló hpyuq kôluî, Yhang lé hkâmá ló lheq to kô é lé, ngò a sê é yanmai nghut lê." ga tâ ri.

¹⁴ Haû su ga luî, yhang, lhang wú kat é hkûn, Yesuq yap tô é lé myàng kôlhang, Yesuq nghut é lé yhang a wú sé nghut ri.

¹⁵ Yesuq gi, "Myiwe myhí ê, nàng, haî mù ngau nyi lê lú? Nàng gi, ó yuq lé ho wún lê lú?" ga myi jáng, yhang gi, hkyâm saí zo sù su ngam pyám mù, "Sarâ ê, nàng, Yhang lé waq htot pyâm é nghut le gi, hkâmá ê lheq tô é, ngo lé taî kyo laq, ngò, Yhang lé yu ló râ." ga tâ ri.

¹⁶ Haú hkûn, Yesuq gi, yhang lé, "Mariq ê" ga wut kat ri.

Mariq gi, Yhâng shut lêng mù, Hebre myíng dông, "Raboni!" ga wut kat ri. (Haû gi, "Sarâ ê" gâ é lichyúm nghut ri.)

¹⁷ Yesuq gi, "Ngo lé hkâzáng shi; hkâsu mù gâ le, Ngò gi, haû Íwâ chyáng a taû doq ló shí é nghut lê. Nàng gi, Ngá é gumang wui chyáng ló mù, yhangmoq lé, 'Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lê.' gâ ri nghû, ló taî kyo aq." ga, yhang lé taî kat ri.

¹⁸ Magadalaq wà mâ é Mariq gi, chángzô pé chyáng ló mù, "Yhumsîng lé, ngò myàng bê!" ga taî luî, yhang lé shit kat é pé lé, taî kyô ri.

Yesuq, Yhâng É Chángzô Pé Lé Htoq Shit É Hkyô

Mht 28:16-20; Mrk 16:14-18; Luk 24:36-49

¹⁹ Haú nyí, Bánno buinyî htang myìn lé, haû chángzô pé gi, Yudaq byu pé lé gyuq kô é yanmai, hkum tsing myhî pyám mù, zîng tô bum kô é u lé, Yesuq gi, lé jé mù, yhangmoq é agùng má yap to luî, "Nungmoq nguínón yuqyo nyi sháng gaq!" ga tâ ri.

²⁰ Yhang gi, haû su ga taî é htâng má, yhangmoq lé, Yhâng é loq pé eq namcham lé tûn shit ri. Chángzô pé gi, haû Yhumsîng lé myàng kôjáng, gyai gabú bùm bekô nghut ri.

²¹ Yesuq gi, "Nungmoq nguínón yuqyo nyi sháng gaq!"

Haû Îwa gi, Ngo lé nhang kat é su, Ngò gi, ahkuî, nungmoq lé nhang kat é nghut lhê." ga dum taî ri.

²² Haû su ga taî mù, Yhang gi, yhangmoq é ahtoq má soq mut luî, "Haû Chyoiyúng Woinyí lé hap yù keq.

²³ Ó yuq é mara pé lé nghut kôle, nungmoq hkyut byî é nghut jáng, mara haú pé gi, hkyut pyám byî é hui râ nghut lhê; nungmoq a hkyut byî é nghut jáng, mara haú pé gi, hkyut pyâm é hui râ a nghut." ga taî ri.

Htomaq Lé, Yesuq Htoq Shit É Hkyô

²⁴ Haû chángzo raxe í yuq má bo é, Zozûm le gâ é Htomaq gi, Yesuq lé jé é hkûn, haû chángzô pé eq rahá a nyi to nghut ri.

²⁵ Haû mù luî, gotû chángzô pé gi, yhang lé, "Haû Yhumsîng lé, ngamoq myàng bê." ga taî kyô akô.

Nghut kôlhang, yhang gi, yhangmoq lé, "Ngò gi, Yhâng é loq pé mâ é shamtoq zuhkô lé myàng mù, ngá é loqnyhuí èq joí wú é eq, Yhâng é namcham má, ngá é loq èq myang lap wú é za a nghut jáng, haû lé ngò lumjîng râ a nghut." ga taî ri.

²⁶ Rabat myáng jáng, chángzô pé gi, haû yhúmkaû má dum nyi tô akô; Htomaq le, yhangmoq eq rahá nghut nyi ri. Haû hkum pé myhî to kôlhang, Yesuq gi, lé jé mù, yhangmoq é agùng má yap to luî, "Nungmoq nguínón

yuqyo nyi sháng gaq!" ga taî ri.

²⁷ Hau htâng, Yhang gi, Htomaq lé, "Náng é loqnyhui, shî má lé joí mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjîng nyi aq." ga taî ri.

²⁸ Haú hkûn, Htomaq gi, "Ngá é Yhumsîng, ngá é Garai Gasang ê!" ga Yhang lé taî ri.

²⁹ Yesuq gi, yhang lé, "Nàng gi, Ngo lé myang é yanmai, lumjîng é a nghut lhú? A myàng kôlhang, lumjîng é bang gi, hkungsô wó nyi ri." ga taî ri.

³⁰ Laiká buk shî má a kê tô é limik kumlhá pé gotû myo myo lé le, Yesuq gi, Yhâng é chángzô pé hí má kut shit bê nghut ri.

³¹ Nghut kôlhang, Yesuq gi, Garai Gasâng é Yhangzo Hkrisduq nghut é lé, nungmoq wó lumjîng râ matú eq, lumjîng é yanmai, nungmoq Yhâng é myìng má asak wó kó râ matú, shí hkyô pé lé kê tô é nghut lhê.

21

Ngozo Wó Chyup Yu É Limik Kumlhá

¹ Hau htâng má, Yesuq gi, Tiberi nhông yàm má, Yhâng é chángzô pé lé dum htoq shit ri. Yhang htoq shit é hkyô gi, a-ô mâ é đông nghut ri.

² Simun Petruq, Zozûm le gâ é Htomaq, Galile mau Hkanaq và mó mâ é Nah-tanelaq, Zebedi é yhangzo

nhik eq gotû chángzo í yuq pé gi, rahá nyì to bum akô.

³ Haú hkûn, Simun Petruq gi, yhangmoq lé, "Ngò gi, ngozo kóng ê râ." ga tai jáng, yhangmoq gi, "Ngamoq le châng lé râ." ga tai akô. Haú mù luí, yhangmoq gi, htoq ê mù, haú lhai má wàng bekô nghut ri; nghut kôhang, haú myîn, radu lhang a wó kóng kó nghut ri.

⁴ Htang napkyó maubó lo é hkûn, Yesuq gi, wuiyàm má yap tô ri; nghut kôhang, haú chángzô pé gi, Yesuq nghut é lé a wú sé kó nghut ri.

⁵ Yesuq gi, yhangmoq lé, "Luzúm wui ê, nungmoq, ngozo wó akô lhu?" ga, wut myi kat jáng, yhangmoq gi, "A wó." ga tai akô.

⁶ Haú hkûn, Yhang gi, "Nungmoq é gùn lé, haú lhai é loqyo hkyam shut dú hkyô kat keq; haú jáng, nungmoq wó kóng yù kó râ nghut lhê." ga tai ri. Haú mù, yhangmoq gi, gùn dú hkyô kat é hkûn, ngozo lúm myô é yanmai, haú gùn lé lhang a wó lhang yù lo kó nghut ri.

⁷ Haú mù luí, haú Yesuq chyitdap é chángzo gi, Petruq lé, "Yhumsing ru nghut ri." ga tai ri. Simun Petruq gi, "Yhumsing ru nghut ri." gâ é lé wó gyo eq yhang, yhang gi, mebu hkyut pyâm tô é yanmai, buhîng mó lé, yhang é gùng má baíyup yù mù, wui hkaú má byam wang ló bê nghut ri.

⁸ Haú chángzo góbang gi, wuiyàm eq ngo xê làm kô za

wê é yanmai, ngozo byíng tô é gùn lé, wuiyàm shut lhai mai she jé lo akô nghut ri.

⁹ Yhangmoq gi, wuiyàm má jé dap ló kô é hkûn, myigye gyúng é myihkyóm htoq má ngozo nyhîn tô é lé le, muk ratsuí joq tô é lé le, myang akô.

¹⁰ Yesuq gi, yhangmoq lé, "Haú, ahkuí za nungmoq wó kóng yu é ngozo, ra-am yù lé keq." ga tai ri.

¹¹ Haú mù, Simun Petruq gi, lhai má doq ji luí, kô é ngozo rasho ngó xe súm du yhang bo é gùn lé, dùng yàm má she htoq tô ri. Ngozo haú myhó myo kôhang, gùn gi, a jeq nghut ri.

¹² Yesuq gi, yhangmoq lé, "Napzang lé zo keq." ga tai ri. Chángzô pé gi, Yhang, haú Yhumsing nghut é lé sé kô é yanmai, ó yuq lhang, "Nàng, ó yuq nghut lhê?" ga, a wám myi kó nghut ri.

¹³ Yesuq gi, lé mù, muk lé é yù luí, yhangmoq lé byí ri; ngozo lé le, haú su kut ri.

¹⁴ Yesuq gi, shi é mai lhoq dui toq yù huí é htang, Yhang é chángzô pé lé htoq shit é má, shí gi, sum dâm nghû râ dâm nghut ri.

Yesuq Eq Petruq

¹⁵ Yhangmoq bàn zô bùm kô é htang má, Yesuq gi, Simun Petruq lé, "Yohan é yhangzo Simun ê, nàng gi, shí bang htoq má, Ngo lé teng za je chyitdap lhê lhu?" ga myi jáng, yhang gi, "Nghut lhê; Yhumsing ê, ngò, Nàng lé chyitdap é hkyô lé, Nàng sé

lhê." ga tũ tai ri. Haú hkũn, Yesuq gi, "Ngá é sau zô pé lé, baú aq." ga, yhang lé tai ri.

16 Hau htâng, Yesuq gi, "Yohan é yhangzo Simun ê, nàng gi, Ngo lé teng za chyitdap lhê lú?" ga dum myi jáng, yhang gi, "Nghut lhê; Yhumsing ê, ngò, Nàng lé chyitdap é hkyô lé, Nàng sê lhê." ga tũ tai ri. Haú hkũn, Yesuq gi, "Ngá é sau pé lé, rém aq." ga tai ri.

17 Dum radàm, Yesuq gi, yhang lé, "Yohan é yhangzo Simun ê, nàng gi, Ngo lé chyit lhê lú?" ga myi ri.

Haú hkũn, Petruq gi, "Nàng gi, ngo lé chyitdap lhê lú?" ga, yhang lé Yesuq èq sùm dam dàt tai é yanmai, yhang myit nò luí, "Yhumsing ê, Nàng gi, lhunglhang lé sê lhê; ngò, Nàng lé chyitdap é hkyô lé, Nàng sê lhê." ga tai ri.

Haú hkũn, Yesuq gi, "Ngá é sau pé lé, baú aq.

18 Ngò, nàng lé teng za tai lé, nàng, zorâm nghut é hkũn gi, yhumsing gùng yhumsing hpyihit baíyup* yù mù, ê nau é jowò hkanmó má wó é é nghut lhê; nghut kôlhang, nàng mang jáng gi, loq í loq lham luí, nang lé góyup èq hpyihit baíyup byi mù, nàng a é nau é jowò shut shuí ê rã nghut lhê." ga tai ri.

19 (Yesuq haú su ga tai é gi, haú Petruq, hkâsu kut shi é dông mai, Garai Gasâng é hpungwup shingkan lé dan hu nhâng rã nghut é lé, tai

nau é nghut ri.) Hau htâng, Yesuq gi, yhang lé, "Ngá htâng cháng aq." ga tai ri.

20 Haú hkũn, Petruq gi, lhung wú kat le, haú Yesuq chyitdap é chángzo, yhang-moq htâng châng wún é lé myàng ri. Chángzo haú gi, hí hkũn, myinzang zô é u lé, Yesuq chyáng leq ngè mù, "Yhumsing ê, Nang lé ap pyám rã sũ gi, ó yuq lú?" ga, myi wú é sũ nghut ri.

21 Petruq gi, haú yuq lé myàng jáng, Yesuq lé, "Yhumsing ê, shí yuq gi, hkâsu dut rã lú?" ga myi ri.

22 Yesuq gi, "Ngò jé lé é hkũn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lú? Nàng gi, Ngá htâng cháng aq." ga tũ tai ri.

23 Dang hau é yanmai, chángzo haú yuq a shí rã nghut lhê gâ é danglám gi, haú gumang wui chyáng byo myín to bê nghut ri. Nghut kôlhang, Yesuq gi, haú yuq a shí rã hkyô lé tai é a nghut, "Ngò jé lé é hkũn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lú?" ga, tai é ru nghut lhê.

24 Shí pé lé saksé hkám mù, shí pé lé kã tô é sũ gi, chángzo haú yuq nghut lhê. Yhâng é saksé gi, têng é lé, ngamoq sê lhê.

25 Yesuq gi, gotũ muzó myo myo le kut ashí nghut ri. Muzó haú pé lhum jup lé, kã htoq yu é ru nghut le gi,

* 21:18 Hpyihit baíyup gâ é lichyúm gi, mebu wut luí ri ri kut tô é lé gâ lhê.

kâ tô é laiká buk haú pé gi,
míngkan gón má lháng ngo râ
a nghut nghû, ngò wó myit ri.

LAGYO Laiká (Acts)

*Yesuq, Mauhkûng Má Shuí
Yù Huí É Hkyô*

¹ Htohpiluq ê, Yesuq yhang hkyin yu tô é lagyô pé lé, Chyoiyúng Woi-nyí wum-o èq dang ban pying tô é htâng má, Garai Gasang yhang lé mauhkûng shut shuí yu é buinyì jé shoq,

² Yhang kut shit é hkyô pé eq, mhoqshit é hkyô pé ban-shoq lé, hí lhê é laiká buk má ngò kê kat bê nghut lhê.

³ Yesuq gi, shí hkâm é htâng má, Yhang dui toq bê hkyô lé, lungíng é saksé myo myô èq yhangmoq lé tân shit mù, buinyì myi xê nyí gyoro má yhangmoq chyáng lé htoq shit shit kut luí, Garai Gasâng é mingdán hkyô lé hko kyô ri.

⁴ Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ ê danggidiq byí tô é chyunghuq lé láng nyí keq.

⁵ Hkâsu mù gâ le, Yohan gi, wui èq wui-myhup hkám byí é nghut lhê; nghut kôlhang, nungmoq kúm gi, buinyì hkâ-myháng a myáng má, Chyoiyúng Woi-nyí mai baptisma wó hkam yù kó râ nghut lhê." gâ ri.

⁶ Lagyô pé gi, Yhang eq rahá chôm zup míng tô é

hkûn, Yhang lé, "Yhumsîng ê, nàng, haù Israelaq byu pé lé mingdán dum xuq byi râ gi, ahkuí yhang nghut bê lhú?" ga myí akô.

⁷ Yesuq gi, "Áwa gi, Yhâng é ahkáng ayá èq kut to bê é ahkyíng yam-yoq pé lé, nungmoq sé nó a ra.

⁸ Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yù mù luí, Yerusalem wà mó eq Yuda mau banshoq, Samariq mau eq maumyí htáng shoq, ngá é saksé pé dut kó râ nghut lhê." ga luí, yhangmoq lé tai ri.

⁹ Dang haù ban tai é htâng má, yhangmoq wú nyi le, Yhang gi, mauhkûng shut shuí yu é hui mù, yhangmoq hí mai Yhang lé a myàng loshoq, mhut èq htup ló byuq bê nghut ri.

¹⁰ Yesuq doq ló nyi é u lé, yhangmoq mauhkûng shut ru wú tsuq nyi bum ashí le, hpyu é mebu wut é byù í yuq gi, radá dâm yhangmoq nàm má htoq yap lò mù,

¹¹ "Galile byu pé ê, haì mù luí mauhkûng shut wú tsuq nyi akô lhú? Nungmoq é hí mai mauhkûng shut shuí yù huí é, haù Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhê." ga tai akô.

*Yudaq É Jowò Má, Mahtiaq
Lé Hkyin Kat É Hkyô*

¹² Hau htâng má, yhangmoq gi, Tsanlun Bùm mai, Yerusalem wà mó shut taù ló

bekô.* Haú gyoro gi, Bánno buinyì má ge sô é í za wê ri.

13 Yhangmoq jé ló kôjáng, yhangmoq nyi nyi kô é yhúm ahtoq pyâm mâ é wap shut doq ló akô; haú bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô.

14 Yhangmoq lhunglhâng bang gi, myiwe wui le, Yesuq é yhângnu Mariq le, yhanggu pé le kut mù, i-myt rahkat za kyû chôm dung dung kut nyi akô.

15 Buinyì haú yoq má, Petruq gi, lumjínq é gumang gu-nhá† wui rasho í xê yuq kô zup zîng tô é gung gûng má, toq yap mù,

16 "Gumang gu-nhá wui ê, Yesuq lé chyup é bang lé hkyô shuî hî é sù Yudaq eq séng luî, hí hpyang Dawiq é nhut mai Chyoiyúng Woi-nyí taî tô é Chyúmdang gi, dik byuq bê nghut ri.

17 Yhang gi, nga-nhúng má nghap lhôm é hui mù, hpúng sará ayá wó bê sù nghut kôlháng shí hkyô dut bê nghut ri." ga taî ri.

18 (Yudaq gi, yhang kut é agè ashop é muzó mai wó é ahaú èq myigùng ratóng wui yu é htâng, haú má yhang, a-nghop dông byit gyó mù wam buq goq luî, û banshoq buq myín byuq bê nghut ri.

19 Haú hkyô lé Yerusalem wà mó má nyi é lhunglhâng bang wó gyo kôjáng, myigùng haú lé yhangmoq é myíng dông, 'Akeladama' ga myhíng akô; haú gi, 'Sui myigùng', gâ é nghut ri.)

20 Petruq xoq taî é gi, "Hkâsu mù gâ le, Hkya-on Kungtôn Laiká má,

'Yhâng é jowò chamchyuyiui dut byuq sháng gaq; haú má ó le a nyi kó sháng gaq.'*

ga luî le, dum

'Yhang wó é ayá lé byù góyuq wó yu pyám byi sháng gaq.'*

ga luî le, bo tô ri.

21-22 Haú mù luî, Yohan bapisma byî hi é hkûn mai, Yesuq lé nga-nhúng chyáng mai shuî yu é buinyì jé shoq, Yhumsíng Yesuq nga-nhúng eq rahá htoq htoq wàng wàng kut nyi é buinyì banshoq pé má, nga-nhúng eq yhang zum nyi sù rayuq lé, hkyin kat rá dut ri. Haú yuq gi, Yesuq dum dui toq é hkyô lé nga-nhúng eq rahá saksé dut rá sù nghut lhê." gâ ri.

23 Haú hkûn, yhangmoq gi, Yustu ga le myhíng é, Barsabaq gâ é Yosep eq Mahtiaq nhik lé hkyin tô akô.

24-25 Haú mù, yhangmoq kyûdung kô é gi, "Byù banshoq é i-myt lé sê é Yhumsíng ê, Yudaq Iskarut gi, yhang ló gíng é jowò shut ló rá ga, tô pyâm tô é yhâng é lagyo ayá

* 1:12 Tsanlun bùm eq Yerusalem gyoro gi, déng rawuí hkup kô we ri. † 1:15 Gumang gu-nhá gâ é lé, Grik má gi, gumang za gâ to lhê. * 1:20 Hkya-on 69:25

* 1:20 Hkya-on 109:8

é matú shí nhik mâ é nàng hkyin tô é sù lé tûn shit laq ò." ga akô.

²⁶ Hau htâng, yhangmoq, byù hkyin shosé she le, Mah-tiaq chyáng ang bê. Haû mai, Mahtiaq lé gi, haû lagyo raxe rayuq má jat kat bê nghut ri.

2

Chyoiyúng Woi-nyí Jé Gyó Lo É Hkyô

¹ Penteko-ti* buinyí jé jáng, lumjínq bang banshoq gi, jowò ralhum má za, chôm zup míng nyi tô akô.

² Haû hkûn, laidun mó lo é su gâ é htê gi, byodàn ratung, mauhkûng mai myíng htoq lô mù luí, yhangmoq zing tô é yhûm byíng shoq dut to bê nghut ri.

³ Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri.

⁴ Yhangmoq lhunglhâng bang gi, Chyoiyúng Woi-nyí byíng lo bùm kômù, Woi-nyí eq taí nhang é eq rajung za, laklaí dang đông nyo lo bum akô.

⁵ Haû u lé, mauhkûng ô má joq é mingdán hkangmó mâ é, tarâ hkunggâ é Yudaq byu pé gi, Yerusalem wà mó má bíng nyi bum akô.

⁶ Haû myíng é htê lé wó gyo kôjáng, byù rajùm rayò zíng lé lô kômù, ó le ô é myíng đông sê gyô yù kô é yanmai, maú úng-âng byuq bùm kôluí,

⁷ maú bûm uchyang taí kô é gi, "Wú keq, ahkuí dang taí nyi é byù shí bang lhunglhâng gi, Galile byu pé chyat a nghut kô lúhú?

⁸ Haû nghut é wa, hkâsu mù nga-nhúng ó le ô é yhumsing mau mâ é myíng đông sê gyô yu lhê lúhú?

⁹ Parhti, Medi, Elam mau mâ é bang eq Mesopotamiaq mau, Yuda eq Kapadokia mau, Pontuq eq Asia,

¹⁰ Hprugi eq Pamhpuli, Egutuq ming má nyi é bang eq Kuruni myuq nâm má nyi é Libya ming mâ é bang, Romaq myuq mai lé bíng nyi é Yudaq byu pé eq Yudaq noqkuq htúng má lhing wang lò bang,

¹¹ Kreti zinlóng eq Arabiq mau mâ é bang, nga-nhúng gi, yhangmoq hko kyô é Garai Gasâng é mauhpo muzó hkyô lé, yhumsing mau mâ é myíng đông yhang wó sê gyô yu ri-nhung." gâ ri.

¹² Yhangmoq banshoq bang gi, maú úng-âng byuq kômù, "Shí gi, haí wá nghut lhê lúhú?" ga le, rayuq eq rayuq myí lhûm bum akô.

¹³ Nghut kôlhâng, byù ra-am gi, "Shí bang gi, í shuq wut é bang nghut akô." ga luí, taí jihpoi bum akô nghut ri.

Petruq Hko Kyô É Mung-dang

¹⁴ Haû hkûn, Petruq gi, lagyo góbang raxe rayuq eq toq yap mù, htê mó eq byù haû bang lé taí é gi, "Yudaq

* **2:1** Penteko-ti gâ é gi, Lhoqlhai Poi láí é htâng ngo xê nyi jé é buinyí má, kut é poi lé gâ lhê.

byu pé eq Yerusalem wà mó má nyi nyi é lhunglhâng bang ê, rago gyô wú keq! Ngò, nungmoq lé, shí hkyô taí kyo kôlé.

¹⁵ Shí bang gi, nungmoq sù-ngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashí.

¹⁶ Shí hkyô kúm gi, myiqh-toi Yoelaq taí tô é eq rajung za dut é nghut ri.

¹⁷ Yhang taí tô é gi,

'Garai Gasang ísu gâ ri: Ló htâng é buinyi pé má, Ngò Ngá é Woi-nyí lé byù lhunglhâng bâng é ahtoq má hut gyun rã nghut lhê.

Haù mù, nungmoq é yuqzo byizô pé gi, myiqh-toi htoi kó rã; nungmoq é zorâm wuì gi, myoqwup shing-rán myàng kó rã; nungmoq é hpaù mâng pé gi, yhupmoq myàng kó rã nghut lhê.

¹⁸ Buinyi haù pé má, Ngá é dui-nhâng zoshâng hpô pé eq dui-nhâng zoshâng myhí pé é ahtoq má lhâng, Ngò Ngá é Woi-nyí lé hut gyun mù luí, yhangmoq gi, myiqh-toi htoi kó rã nghut lhê.

¹⁹ Ngò gi, ahtoq mauhkûng htoq má mauhpo muzó pé lé, a-ô myigùng htoq má, kumlhá pé lé, sui eq, myí eq, myihkau dùm

pê eq kut mù tân shit rã.

²⁰ Haù Yhumsing é kô hkikhkam é buinyi a jé shimá, bui gi, mauchut byuq, lhamó gi, sui dut byuq é hí dut rã nghut lhê.

²¹ Haù hkûn, Yhumsing é myìng lé lãng é bang yuq hkangmó gi, hkyi yu é hui kó rã nghut lhê.^{1*}

gã ri.

²² Israelaq byu pé ê, dang shí lé gyô yù keq, nungmoq sê é eq rajung za, Nazaret wà byù Yesuq nungmoq é hí má tân shit é, laklaí kumlhá, mauhpo muzó eq kumlhá pé gi, Yhang lé Garai Gasang nhang kat é saksé dut bê nghut ri.

²³ Shí yuq gi, Garai Gasang myit hpyit tô é hkyô eq, hí te sê é hpaqchyí dông, nungmoq chyáng ap pyâm é hui mù, nungmoq gi, agè ashop byu pé é loq eq, Yhang lé tapzing htoq má jén sat pyám nhâng bekô nghut ri.

²⁴ Nghut kôlhâng, haù shí-nò hkyô gi, Yhang lé wó hkûm zing jung a nghut é yanmai, Garai Gasang gi, Yhang lé shí-nò jamjau mó mai, lhut pyám byi luí lhoq dui toq yù bê nghut ri.

²⁵ Dawiq gi, shí yuq eq séng luí taí é má,

'Haù Yhumsing gi, ngá é myoq hí má hkâ-nhám le nyi nyi é lé ngò myàng bê.

Yhang ngá é loqyo hkyam má nyi nyi é yanmai, ngo lé wó lhoq nhún râ a nghut lo.

26 Haû mù, ngá i-myyit gi, ngu-ingón nyí luí, ngá nhut shô gabú hkyá-ôn nyi ri;

ngá é gungdu le myit myoqbyù jowò má nyi nyi râ nghut lhê.

27 Hkâsu mù gâ le, nàng, ngá é woi-nyí lé mo-sumhking má tô pyâm to râ a nghut.

Nàng, náng é Chyoiyúng Sû lé bup byuq é hui nhâng râ a nghut.

28 Nàng, ngo lé asak dui é hkyô sé nhâng bê.

Náng é myoq hí má, nàng, ngo lé gabú hkyô lhoq pyíng byi râ nghut lhê.*

gâ ri.

29 Gumang wuì ê, nga-nhûng é íchýí íké Dawiq kâng byit mù, myhup pyám hui bê hkyô lé le, yhâng é lup gi, hkû-nyí jé shoq nga-nhûng chyáng joq tô é lé le, ngò, nungmoq lé a gyuq a kyum wám tai lhê.

30 Dawiq gi, myiqhtoi rayuq nghut é yanmai, yhâng é awut ashín mâ é rayuq lé, yhâng é hkohkâm tanghkuq má zùng nhâng râ ga Garai Gasang byi tô é danggidiq lé sé to mù,

31 'Hkrisduq† gi, mo-sumhking má pyâm to a hui râ eq, Yhâng é gungsho a bup byuq é za, dum dui toq ló râ

nghut lhê.', gâ é hkyô lé te sé to luí tai tô ri.

32 Garai Gasang gi, haû Yesuq lé lhoq dui toq yù bê. Ngamoq banshoq bang gi, haû hkyo é saksê pé nghut nyi ri.

33 Haû mù, Garai Gasang gi, Yesuq lé Yhâng é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuí nungmoq shí su wó myâng, wó gyo bekô nghut ri.

34-35 Hkâsu mù gâ le, Dawiq gi, mauhkûng htoq tsáng myhâng má a doq ló wú kôlhang, yhang gi,

'Haû Yhumsing Garai gi, ngá é Yhumsing lé,

"Ngò, náng é gye pé lé, náng é hkyî nang tanghkuq kut pyám byí é hkyíng jé shoq,

Ngá é loqyo hkyam shut zung nyi shi aq." gâ ri.*

ga luí, tai ri.
36 Hau é yanmai, Garai Gasang gi, nungmoq èq tapzîng má jén sat pyâm é haû Yesuq lé, Yhumsing eq Hkrisduq dut nhang é hkyô, Israelaq byu pé lhunglhâng bang hkyak sé nyi kó sháng gaq ô." gâ ri.

Sâng-hi Lumjîng É Bang

37 Yhangmoq gi, haû lé wó gyô bùm kôjáng, yhangmoq é i-myyit má záng kô é nghut mù luí, "Gumang wuì ê, ngamoq

* 2:28 Hkyá-on 16:8-11 † 2:31 Grik dong *Hkrisduq* gâ é gi, xù but hui Sû gâ é lichyúm nghut mù, Hebre dong *Mesaia* gâ é eq rajung za nghut lhê. * 2:34-35 Hkyá-on 110:1

hkâsu kut lo râ l hú?" ga lui, Petruq eq lagyo góbang lé myí akô.

³⁸ Petruq gi, "Nungmoq yuq hkanmó myit l hng mù, Yesuq Hkrisduq é mying mai wui-myhup hkâm yù keq; Haú jáng, nungmoq é yubak hkyut pyám byí é hui kó râ nghut lhê. Haú hkûn, Chyoiyung Woi-nyí gâ é chyunhuq lé, nungmoq wó yú kó râ nghut lhê.

³⁹ Hkâsu mù gâ le, dang-gidiq haú gi, nga-nhung é Yhumsing Garai Gasang ji yù râ bang banshoq nghut é, nungmoq eq nungmoq é yhangzo yhangshû pé eq le, mau we má nyí é lhunglhang bang eq le, sêng lhê." ga lui, yhangmoq lé tai kyô ri.

⁴⁰ Yhang gi, dang gotû myo myô èq le saksé hkâm mù, "Shí agè ashop é amyû mai wó lut htoq lo keq ô!" ga lui, yhangmoq lé lhoq pun lhoq kyíng ri.

⁴¹ Dang haú lé guq yu é bang gi, wui-myhup hkâm yu bùm kôluí, haú nyí má byù sum hkyíng kô jat wàng lo bum bekô nghut ri.

Lumjng Bang Zùm Yap É Hkyô

⁴² Haú bang gi, lagyô pé mhogshit é hkyô, zùm yap é hkyô, muk hpê gam é hkyô[‡] eq akyú dúng é hkyô má, i-myit rahkat za chôm châng nyí akô.

⁴³ Lagyo pé kut shit é mauhpo muzó eq limik kumlhá pé myo myô é yanmai, lhunglhang bang gi, gyuq maú nyi bum akô nghut ri.

⁴⁴ Lumjng é lhunglhang bang gi, rawò má za zup zing to mù, azing zè banshoq lé chôm chung nyi akô.

⁴⁵ Yhangmoq gi, yhumsing é sutzè pé lé, ùng pyám mù, yuq hkanmó lé, yhang râ tô é eq rajung za gàm byí akô.

⁴⁶ Yhangmoq gi, nyí wuí myit rahkat zâ èq noqkuq yhûm wàng má nyi nyi akô. Yhumsing é yhûm pé má le muk hpê gam é hkûn,

⁴⁷ Garai Gasang lé hkya-on kungtôn uchyang, gabú é eq myit huí é èq chôm zo chôm shuq nyi bum akô; byù banshoq bâng é hí má le myoqdong wó bum akô. Haú Yhumsing gi, nyí wuí yhangmoq chyáng hkyi yù hui bang jat lò nhang ri.

3

Hkyi Hten Sû Rayuq Lé, Petruq Lhoq Gé Byí É Hkyô

¹ Ahkuí, Petruq eq Yohan gi, myinhâng zó sum hkyíng lhê é kyûdung nám má, noqkuq yhûm shut doq e ló akô.

² Haú hkûn, ínû unghkaú mai hkyí hten lugù dut é byù rayuq lé, noqkuq yhûm má wang lé lô bâng chyáng mai dung zo sháng gaq ga, Yunglho hkum ga myhng é hkúmdong má nyí hkan nyí

[‡] 2:42 Muk hpê gam hkyô gâ é lé lichyúm í dông wó yu lhê - radông gi, rahá chôm zo chôm shuq é lé gâ lhê; radông gi, Poído chôm zô é lé gâ lhê.

mó waq lé lô mù, lé nyhi to to kut akô.

³ Yhang gi, Petruq eq Yohan, noqkuq yhûm haú má wang e ló é lé, myàng luí, lhom dúng nyi ri.

⁴ Petruq eq Yohan kúm gi, yhang lé chôm wú tsuq to mù, "Nga-nhik lé tu wú aq." gâ akô.

⁵ Haú mù, yhang, yhangnhik chyáng mai rajung jung wó yú râ lé myit myoqbyù luí, yhangnhik lé rago za saí wú tô ri.

⁶ Petruq kúm gi, "Ngùn, hîng gi, ngò a wó; nghut kôlhang, ngò wó é nang lé byi lé: Nazaret wà byù Yesuq Hkrisduq é myîng mai toq sô ló aq." ga taí uchyang,

⁷ yhâng é loqyo loq má zui mù lîng toq kat ri; haú hkûn jâng, yhâng é hkyî kochangchap pé wúm bo lò bê nghut ri.

⁸ Haú mù, yhang gi, radá dâm toq yap mù sô kat luí, so uchyang, byâm uchyang Garai Gasang lé hkya-on mù, yhangnhik eq rahá noqkuq yhûm má wang ló ri.

⁹ Yhang sô e ló nyi é eq Garai Gasang lé hkya-on kungton nyi é lé, lhunglhang bang chôm myang akô.

¹⁰ Haú yuq gi, noqkuq yhum é Yúngl hó hkum gâ é hkúmdong má zung to mù, dung zo sù nghut é lé yhangmoq matsîng kô é nghut mù luí, yhâng chyáng dut lò bê hkyo é yanmai, maú hong byuq bum akô nghut ri.

Petruq Hkô Kyô É Mungdang

¹¹ Petruq eq Yohan chyáng haú dung zo sù byîn châng tô é hkûn, shiwa byu pé gi, wú maú uchyang, Sholumon jiroop shut, yhangmoq chyáng din yán wang lé lo bum akô.

¹² Petruq haú lé myàng jâng, shiwa byu pé lé taí é gi, "Israellaq byu pé ê, shí yuq é hkyô lé haí mù luí maú nyi akô l hú? Nga-nhik é dingmán hkyô eq wum-o a-tsâm èq, shí yuq lé wó so nhang é su ngâm luí, ngá-nhik lé wú tsuq bum akô l hú? Haú dông a nghut.

¹³ Abraham, Isak eq Yakup pê é Garai Gasang, nganhûng é îchyí îwa pê é Garai Gasang gi, Yhâng é dui-nhâng zoshâng Yesuq lé hpungwup shingkang lhoq htoq byî é nghut ri; nungmoq kúm gi, Yhang lé sat hui shoq ga ap pyám kômù luí, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má yhang, Yhang lé he-ngik pyâm akô nghut ri.

¹⁴ Haú chyoiyúng dingmán é Sù lé nungmoq he-ngik pyám kômù, byù sat sù lé sheq dúng htoq yú kôluí,

¹⁵ Asak Yhumsîng lé gi, sat pyám bekô. Garai Gasang kúm gi, haú yuq lé shi é mai lhoq dui toq yú bê nghut ri; ngá-nhik gi, haú hkyo é saksé nghut nyi l hê.

¹⁶ Yesuq é myîng lé lumjîng é yanmai, haú lumjîng myit mai za, shí nungmoq myang é sê é sù lé wum-o lhoq pyîng byi bê nghut ri; nghut bê,

Yesuq lé lumjínq é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

17 Ahkuî, gumang wui ê, nungmoq é uphkâng bang kut é su, nungmoq le haú hkyô lé a sé mù kut pyâm é hkyô lé ngò sê nyi lê.

18 Nghut kôlhang, haú hkyô gi, Garaî é Hkrisduq shî-nò jamjau hui râ nghut lê ga lui, myiqhtoi banshoq bang lé hí hí mai taí nhang tô é Garaî Gasang yhang, lhoq dik é nghut ri.

19 Hau é yanmai, haú Yhumsing chyáng mâ é nguínqón é ahkyínq yàm yoq jé lô râ matú le,

20 nungmoq é matú hkyin tô é Hkrisduq nghut é Yesuq lé, Yhang nhang kat byi râ matú le, nungmoq é yubak mara hkyut pyám byí é hui râ matú le, nungmoq gi, myit lhing mù Garaî Gasâng chyáng lhing lò keq.

21 Garaî Gasang gi, a-nham pyat mai, Yhâng é chyoiyúnq myiqhtoi pé é nhut mai, taí nhang to bê eq rajung za, nyi mi-nyì, joq mijoq lé asik dum saí é pyat jé shoq, Yesuq lé mauhkûng htoq má nyi nhang to râ nghut lê.

22 Hkâsu mù gâ le, Mosheq taí tô é le, 'Haú Yhumsing Garaî Gasang gi, nungmoq é yhanggu yhangmâng pè chyáng mai, nungmoq é matú ngò sù é myiqhtoi rayuq pô htoq lô nhâng râ nghut lê; haú yuq taí mitaí nungmoq

gyo ra râ nghut lê.

23 Myiqhtoi hau é dang lé a gyo sù ó yuq nghut kôlhang, yhumsing é byù myû mai chyung hpyit pyâm é hui râ nghut lê.[✧] gâ ri.

24 Gè gè yhang, Samuelaq mai, yhâng é htâng má châng pô htoq lo é myiqhtoi pé banshoq bang hko kyô lo é má le, buinyì shí pé eq séng mù taí to bekô nghut ri.

25 Nungmoq gi, haú myiqhtoi pé é dang silí wunlí eq, Garaî Gasang mai, Abraham lé, 'Náng é awut ashîn é yanmai, mingkan htoq mâ é byù myû chângiup hkungsô wó kó râ nghut lê![✧] gâ é eq rajung za, nungmoq é îchyí îwâ pé eq tô tô é danggidiq lé wó hkam yù râ bang nghut akô.

26 Garaî Gasang gi, nungmoq yuq hkangmó lé yhumsing agè ashop é hkyô mai wó lhing taú lò nhang é dông, shimân byi râ matú, Yhâng é dui-nhâng zoshâng lé pô htoq lô nhâng lui, nungmoq chyáng hí nhang kat byi bê nghut ri." gâ ri.

4

Petruq Eq Yohan Nhik Chyup Huí É Hkyô

1 Hkyangjông pé, noqkuq yhûm zúng é suwún hpó eq Saduke pé gi, Petruq eq Yohan shiwa byu pé lé dâng nyo nyi é hkûn, htoq lé lô kômù,

² yhangnhik, shiwa byu pé lé mhoqshit é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taí nyi kô é yanmai, yhangmoq gyai yhang myit myô nyi bum akô.

³ Haû mù, yhangmoq gi, yhangnhik lé chyup yû luí, myinhâng mauchut lô bê nghut é yanmai, htang napkyó jé shoq htóng má lhúng tô akô.

⁴ Nghut kôlhâng, mungdang lé wô gyô yu é bang myo myo gi, lumjíng kômù luí, yuqgè ngo hkyíng kô jé shoq myô jat lò bekô nghut ri.

Yudaq Byìn Tú Wapdoq Má, Yhangnhik Lé Myî Jep Wú É Hkyô

⁵ Htang nyí, yhangmoq é zau wuî, suwún wuî eq tarâ sará pé gi, Yerusalem wà mó má chôm huí zup akô.

⁶ Hkyangjong mó Anna, Kayahpaq, Yohan, Alesander pé eq hkyangjong mó é amyû pé banshoq le, haú má bo tô akô.

⁷ Haû mù, yhangmoq gi, Petruq eq Yohan lé gung gúng má nyhi to luí, "Nungnhik gi, haí a-tsam, ó yuq é myíng mai mù shí lé kut akô lhú?" ga myí akô.

⁸ Haú hkûn, Petruq gi, Chyoiyúng Woi-nyí byíng tô é nghut mù luí, yhangmoq lé taí é gi, "Mingbyû wuî é zaugun suwún wuî ê,

⁹ hkyî hten sù shí yuq lé lhoq gè byí é jeju yanmai, yhang hkâsu kut lhoq ge yû

huí é hkyô lé, hkû-nyí nungmoq ngá-nhik lé myí gôn wú naû kô é nghut le gi,

¹⁰ nungmoq lhunglhâng bang eq Israelaq byu pé banshoq lé sé nhâng kôlé, nungmoq eq tapzîng má jén sat pyám mù, Garai Gasâng eq shi é mai lhoq dui toq yu é, Nazaret wà byû Yesuq Hkrisduq é myíng mai, shí yuq gi, nungmoq é hí má îsu wáng wáng zán zán yap tô é nghut ri.

¹¹ 'Yhûm saí bang nungmoq hkyin htoq pyâm é luqgok gi, htungchyûn má é ahkyak dik é luqgok dut bê.^{1*}

gâ é gi, Yesuq lé taí é dông nghut ri.

¹² Hkyi yû hkyô gi, Yhang mai lai luí gotû a nyi lo, hkâsu mù gâ le, nga-nhúng hkyi yu é hui râ matú, mauhkûng a-ô má, Yhâng é myíng mai lai luí, xângzo byu pé lé byí tô é myíng gotû a joq lo é yanmai nghut ri." gâ ri.

¹³ Yhangmoq kúm gi, Petruq eq Yohan nhik a gyuq a kyum taí é lé myàng kôjáng, yhangnhik, jong a doq wú é, mayû byû za nghut é hkyô lé sé to kô é yanmai, maú nyi bum akô; nghut kôlhâng, hí hpyang Yesuq eq zum wún wú sù nhik nghut é lé, yhangmoq bûn kat akô nghut ri.

¹⁴ Hau htoq agó, lhoq gè byí é hui sù le, yhangnhik eq rahá yap tô é lé, yhangmoq myàng kô é nghut mù luí, taí

râ hkyô haî le a joq lo kó nghut ri.

¹⁵ Haû mù, yhangnhik lé, haû Yudaq byìn tú wapdoq* mai lhoq htoq to mù, yhangmoq rayuq eq rayuq hpyê lhum kô é gi,

¹⁶ "Shî nhik lé hkâsu kut lé gè râ lhu? Yhangnhik kut shit e laklai kumlhá gi, Yerusalem wà mó má nyi é lhunglhang bâng é hí má de za dut bê nghut é yanmai, nga-nhúng haû lé a wó hê lo nghut ri.

¹⁷ Nghut kôlhâng, mingbyû wui má shí hkyô je riyhang a byo myín ló sháng gaq, ahkuî mai myìng haû lé lang mù ó lé le a taî kyo lo râ matú, yhangnhik lé kyuq hkúm pyám sháng." gâ bum akô.

¹⁸ Haû mù, yhangnhik lé dum wut hâng yù luî, Yesuq é myìng lé lang mù, haî le hkâtaí, hkâ-mhoqshit kó ga chôm hkúm akô.

¹⁹ Petruq eq Yohan kúm gi, "Garai Gasâng é mungdang lé gyo râ htoq má, nungmoq é dang gyo le gi, Garai Gasâng é hí má gè râ, a gè râ lé, nungmoq yhang doqdân yù keq.

²⁰ Nga-nhik kúm gi, myàng yù, wó gyô yù bê é hkyô pé lé, a taî é, a wó nyî nghut lhê." ga luî, yhangmoq lé dum tú taî akô.

²¹ Haû hkûn, yhangmoq gi, dut lai lò bê hkyo é yanmai, shiwa byu pé Garai Gasang lé hkya-on kungton nyi bùm kôluî, yhangnhik lé dâm byi râ hkyô a myàng kó é nghut mù luî, yhangnhik lé dum tân

kyuq luî nhang pyám bekô nghut ri.

²² Hkâsu mù gâ le, haû laklai kumlhá đông lhoq gê byi huî é sù gi, asak myi xê zàn chyân bê sù nghut é yanmai nghut ri.

Lumjúng Bâng É Kyûdung Dang

²³ Yhangnhik gi, nhang kat pyám é huî kôjáng, yhangnhik é luzúm wui chyáng taû ló kômù, hkyangjong agyi pé eq suwún wui eq yhangnhik lé hkyîm é dang banshoq lé, ló taî kyo akô nghut ri.

²⁴ Haû hkyô lé wó gyo kôjáng, yhangmoq gi, myit rahkat zâ eq yhumsing é htê lhoq ko mù, Garai Gasang lé kyûdung kô é gi, "Mauhkúng eq myigùng, wuîshuq lungau eq, haû pé má, nyi mi-nyî lé hpan tô é, ahko ahkáng lhunglhang wó é Yhumsing ê,

²⁵ Nàng, náng é dui-nhâng zoshâng, ngamoq é îchyí îké Dawiq é nhut mai, Chyoiyúng Woi-nyî eq taî tô é gi,

'Haî mù luî, tûngbau amyû pé gi, nhikjum yô akô? haî mù luî, byu pé gi, akôm dâ pyám akô lhu?

²⁶ Haû Yhumsing eq Yhâng é Hkrisduq lé gumlau toq râ matú, mingkan hkohkâm pé gi, toq mù, zau suwún wui eq rahá zup zîng bum akô.*

gâ ri.

²⁷ Gè gè yhang, Herut eq Pontu Pilat nhik gi, tûngbau pé eq Israelaq byu pé le mù,

* 4:15 Yudaq byìn tú wapdoq lé Grik đông gi, San-hedrin gâ lhê. ✧ 4:26 Hkya-on 2:1-2

wà mó shî má chôm zîng to kôluí, nàng xû but byi é sù,[†] náng é Chyoiyúng dui-nhâng zoshâng Yesuq lé gumlau toq râ dô nyi akô.

²⁸ Náng é wum-o a-tsam eq nàng ô nau é đông dut râ matú, hí hkûn mai nàng myit hpyit doqdân tô é hkyô lé, yhangmoq gi, kut pyám bekô nghut ri.

²⁹ Yhumsîng ê, ahkuí yhangmoq taí kyuq nyi é dang lé myàng byi laq ô! Náng é dui-nhâng zoshâng wui, a gyuq a kyum é myit eq náng é dang lé taí râ matú wum-o byi laq!

³⁰ Náng é wum-o bo é loq lhâm kat luí, noli nojàng lé lhoq gê byi mù, náng é Chyoiyúng dui-nhâng zoshâng Yesuq é myìng mai, limik kumlhá eq mauhpo muzó pé lé kut shit laq ô!" gâ akô.

³¹ Haú su, kyû ban dung kôjáng, yhangmoq zîng tô é jowò gi, dui nún lô mù, yhangmoq lhunglhâng bang gi, Chyoiyúng Woi-nyi byíng lô luí, Garai Gasâng é mung-dang lé a gyuq a kyum é za taí bùm bekô nghut ri.

Azîng Zê Lé Chôm Gam Chûng Kô É Hkyô

³² Haú lumjîng é lhunglhâng bang gi, i-myit rahkat za nghut nyi akô; ó yuq le, yhumsîng wó é zè lé ngá é a gâ é za, banshoq eq chôm gam chung nyi akô.

³³ Lagyô pé le, haú Yhumsîng Yesuq dum dui toq

é hkyô lé a-tsam mó eq saksé hkâm nyi kô é nghut mù luí, yhangmoq banshoq bâng é ahtoq má jeju myo myo joq nyi ri.

³⁴ Yhangmoq chyáng a wó a lom é byù rayuq le a nyi kó. Hkâsu mù gâ le, maumyí ratóng wó é, a nghut jáng, yhûm wó é bang ó yuq nghut kôlhâng, haú pé lé adàm dàm ûng pyám luí wó yu é ngùn le gi,

³⁵ lagyô pê é hkyî wang má lé to byi akô. Haú mù luí, a wó a lòm sù ó yuq lé le ra tô é eq rajung za gàm byi akô nghut ri.

³⁶ Haú hkûn, Barnaba ga luí lagyô pê eq myhíng byi é, Kupru ming mâ é Lewiq byù Yosep le, yhang wó é maumyí ratóng lé ung luí, wó yu é ngùn lé lagyô pê é hkyî wang má, lé to byi ri.

³⁷ Barnaba gâ é dang lichyúm gi, myit wum byi su é yhangzo gâ é lichyúm nghut lhê.

5

Anani Eq Sahpira Nhik É Hkyô

¹ Nghut kôlhâng, Anani ga sù gi, yhangmyi Sahpira eq rahá, yháng nhâm wó é maumyí ratóng lé ûng pyám luí,

² yhangmyi le bo sê é đông, ngùn haú ra-am lé gi, haq myhit yu to mù, ra-am lé za lagyô pê é hkyî wang má lé to byi akô.

[†] 4:27 Xû but é hkyô gi, Yudaq byu pê htûng đông xû but byi jáng, rajung jung kut râ matú hkyin masat yu é hkyô nghut lhê. Xû but byi é sù gi, Grik đông Mesaia gâ é nghut lhê.

³ Haû mù luí, Petruq gi, "Anani ê, Chyoiyúng Woi-nyí lé mhaû pyám râ matú eq, maumyî hpau mâ é ra-am lé haq yu to râ matú, haí mù luí, náng é myit má Tsadán le byíng nhang tô lhê lú?"

⁴ Maumyî haû joq tô le, náng é zè nghut lhê a nghut lú? Wó ung é ngùn le náng é zè nghut ashî, a nghut lú? Haí mù luí, náng haû dông dâ lhê lú? Byù lé mhaû é a nghut, Garai Gasang lé mhaû pyám bê nghut ri." ga taí ri.

⁵ Anani gi, dang haû lé wó gyo jáng, lêng mù, shi byuq bê nghut ri. Haú hkyô lé wó gyô é bang banshoq le, gyai yhang gyuq bùm bekô nghut ri.

⁶ Haú hkûn, zorâm wuì gi, toq mù, yhâng é mâng lé htup luí, ê waq myhup pyám akô.

⁷ Hau htâng, sum hkyíng kô myáng jáng, yhangmyi le, wang lé lo ri. Haú su dut é hkyô lé gi, yhang a sé nghut ri.

⁸ Haú hkûn, Petruq gi, "Ngo lé taí kyô wú aq. Nungnhik ûng é maumyî hpau gi, shí gû za nghut lhê lú?" ga myi jáng, yhang gi, "Nghut lhê, haú gû za nghut bê." ga tû taí ri.

⁹ Petruq gi, "Nungnhik gi, haú Yhumsing é Woi-nyí lé îsu kut chyam wú râ matú, hkâsu mù chôm myit huí akô lú? Wú aq, náng é yhumsing hpó lé ê myhup pyám bang gi, haú hkúmdong má jé bê; yhangmoq gi, nang lé le waq htoq pyám kó râ nghut lhê." ga taí ri.

¹⁰ Radá dâm, yhang le lagyo hpô é hkyi wang má lêng shi byuq bê. Zorâm wuì le wang lo wú le, myiwe haû shi to lánng é lé myàng kôluí, waq é mù, yhanglang é nàm má, é myhup pyám bekô.

¹¹ Hau é yanmai, haú hkun lhê é hpúng byù banshoq bang eq, haú su dut ê hkyô lé wó gyo má wó gyô é bang gi, gyai yhang gyuq bùm bekô nghut ri.

Byù Myo Myo Lé, Lagyo Pé Lhoq Gê Byí É Hkyô

¹² Ahkuí, lagyo pé gi, ming-byû wui é hí má limik kumlhá eq mauhpo muzó myo myo lé, kut shit nyi akô. Haú lumjíng bang gi, i-myit rahkat zâ eq, Sholumon jirop má chôm hui hui kut bum akô.

¹³ Shiwa byu pé gi, yhangmoq lé hkunggâ nyi bùm kôlháng, yhangmoq lé a wám é zum bùm kó.

¹⁴ Nghut kôlháng, haú Yhumsing lé lumjíng é myiwe yuqgè wuì gi, myo sheq myô jat lò kômù, yhangmoq chyáng je myô jat lò bê nghut ri.

¹⁵ Haú mù luí, byu pé gi, Petruq laí lo é hkûn, yhâng é wupzo za lháng rayuq yuq é ahtoq má zang sháng gaq ga, nõhpyo huí é bang lé, wà mâ é hkyô yàm má waq htoq é mù, yhuphpú pé eq taphkang pé má lhez tô akô.

¹⁶ Hau htoq agó, Yerusalem awui ayàm mâ é wà pé mai le, byù ajùm ayò gi, no é bang eq agè ashop é nat wang zing-ri huí é bang lé shuí jé lé bum

akô; haú bang lhunglhang gi, lhoq gê lhoq yô byî é huî bum akô nghut ri.

Lagyô Pé Zing-ri Huî É Hkyô

¹⁷ Hkyangjong mó eq yhâng é luzúm wuî, Saduke hpúng mâ é byu pé kúm gi, gyaî yhang wú manon bùm kôluî, toq mù,

¹⁸ lagyô pé lé chyup yû luî, wà mâ é htóng má lhûng tô akô.

¹⁹ Nghut kôlhang, haú myín lé, Yhumsîng é maumang lagyo rayuq gi, htóng hkum pé lé hpông pyám mù, yhang-moq lé shuî htoq yû uchyang,

²⁰ "Nungmoq htoq ló mù, noqkuq yhûm má ê yap to luî, duî é asak hkyô sik eq sêng é danglù banshoq, shiwa byu pé lé taî kyo keq." ga taî ri.

²¹ Napsûn myoqmyàng zó lé, yhangmoq gi, noqkuq yhûm má wàng mù yhang-moq wó gyô yu é eq rajung za, shiwa byu pé lé, mhoqshit hi ló akô.

Haú u lé, hkyangjong mó eq yhâng é luzúm wuî gi, Israelaq byu pé é suwún wuî lhunglhang bang lé ji yù mù, Yudaq byîn tú wapdoq chô m zung yù luî, lagyô pé lé é shuî yù râ matú htóng shut byù nhang kat akô.

²² Haú bang kúm gi, htong má jé é hkûn, lagyô pé lé a myàng kôjáng, dum taû lò mù lo taî kyo kô é gi,

²³ "Htóng hkum le ging ging myhî to láng ri, htóng zúng bang le hkum yâm má yap tô akô. Nghut kôlhang, hpông wú

le, ahkaû má ó le a nyi to lo nghut ri." gâ ri.

²⁴ Noqkuq yhûm zúng é zau hpó eq hkyangjong agyî wuî gi, dang haú lé wó gyo kôjáng, "Shí hkyô haî dut lô râ lhú?" ga, gyaî gyuq maú bum akô.

²⁵ Haú hkûn, byù rayuq wang lé lô mù, "Wú keq, nungmoq èq htóng má lhûng tô é bang gi, noqkuq yhûm má yap to mù byu pé lé mhoqshit nyi bum akô." ga luî, yhang-moq lé taî kyô ri.

²⁶ Haú mù luî, zau hpó haú gi, yhâng é a-ô má é bang eq é mù, lagyô pé lé é shuî yu akô. Nghut kôlhang, shiwa byu pé luqgok èq dú lô kó râ lé gyuq kô é yanmai, htân htân a wám kut kó nghut ri.

²⁷ Lagyô pé lé shuî jé lô kôjáng, Yudaq byîn tú wapdoq hí má yhangmoq lé nyhi tô akô. Haú hkûn, hkyangjong mó gi,

²⁸ "Yesuq é myìng lé lang luî a mhoqshit râ matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jàm shoq, nungmoq kut bekô nghut luî, Yesuq é sui lé, ngamoq é ahtoq má ke byi râ dâ nyi akô." ga luî, yhangmoq lé taî akô.

²⁹ Haú hkûn, Petruq eq gotú lagyô pé tù taî kô é gi, "Ngamoq gi, byù dang lé gyo ra htoq má Garai Gasâng é mungdang lé je luî gyo râ dut lhê.

³⁰ Nga-nhûng é îchyí îwâ pé é Garai Gasang gi, nungmoq èq tapzîng má lhang sat pyâm

é Yesuq lé, shi e mai lhoq dui toq kat bê nghut ri.

³¹ Israelaq amyû lé, myit lhîng hkyô eq mara hkyut byi hkyô hpóng byi râ matú, up é ahkáng wó Sú eq hkyi yù Sú kut nhâng râ ga, Garai Gasang gi, Yhang lé, Yhâng é loqyo loq* má waq toq to bê nghut ri.

³² Ngamoq le shí hkyo é saksé pé nghut nyi lhê; mung-dang lé gyô yù luí châng é bang lé Garai Gasang byi tô é Chyoiyúng Woi-nyí le, shí pê é saksé nghut lhê." ga akô.

Gamalelaq Hpaqchyî Byî Ê Hkyô

³³ Yhangmoq gi, dang haû lé wó gyo kôjáng, lûm gyo nhik-yo naû kômù, lagyo pé lé sat pyám râ lháng myit akô.

³⁴ Nghut kôlhang, mingbyû banshoq bâng é hí má aróng wó é tarâ sará Gamalelaq gâ é Hparishe rayuq, haû Yudaq byin tú wapdoq má toq yap mù, lagyo pé lé razup zo lhoq htoq to nhâng luí,

³⁵ yhang taí é gi, "Israelaq byu pé ê, shí bang lé hkâsu kut râ hkyô, rago za hí myit wú keq.

³⁶ Hkâsu mù gâ le, hí hpyang Htudaq gâ é byù rayuq pô htoq lô mù, yhânggùng yhang byù mó rayuq yuq nghut lhê ga taí jáng, byù myi shô kô yhâng chyáng châng wú bekô. Yhang sat pyám é hui luí, yhang htâng châng é lhunglhâng bang le byo myín

byuq kômù, haí le a wó kut dut byuq akô nghut ri.

³⁷ Hau htâng, myìng jihpán guq yu é buinyì má, Yudaq gâ é Galile byù rayuq pô htoq mù, mingbyû wui lé yhâng hkyam shut mhoq hpyoq yu ri. Yhang le sat pyám é hui mù, yhang htâng châng é lhunglhâng bang le, byo myín byuq bekô nghut ri.

³⁸ Ahkuí le, shí bang lé haí le hkâgon ko, yhangmoq kâm é dông nghut nyí kó sháng gaq; yhangmoq kut nyi é hkyô eq dâ nyi é hkyô pé gi, byù myit dông kut é nghut jáng, htên byoq byuq râ za nghut lhê.

³⁹ Nghut kôlhang, Garai Gasâng chyáng mâ é nghut le gi, nungmoq wó lhoq hkyíng pyám kó râ a nghut. Garai Gasâng é gyè sheq dut lò kó râ nghut lhê." gâ ri.

⁴⁰ Dang haû lé yhangmoq gyô htuk bum akô. Haû mù, lagyo pé lé wut yù mù luí, nhuq bat yù kômù, Yesuq é myìng lé lang luí mhoqshit é hkyô a ge kut râ nghut lhê ga taí kômù, nhang pyám akô nghut ri.

⁴¹ Lagyo pé kúm gi, Yesuq é myìng é yanmai ru hpuzô é hkyô gi, gingdán nyi ri, ga myit yù kômù, Yudaq byin tú wapdoq haû mai gabú myit èq htoq lô bekô.

⁴² Hau htâng, yhangmoq gi, nyí wuì làng noqkuq yhûm má le, rayhûm htâng rayhûm má le, Yesuq gi, Hkrisduq

* 5:31 Garai é loqyo loq gâ é gi, hpautap hkungga gíng é jowò lé taí nau é nghut lhê.

nghut é hkyô gabú danglù lé mhoqshit hkô kyô nyi akô nghut ri.

6

Garúm Râ Byù Nyhit Yuq Lé Hkyin Yu É Hkyô

¹ Ahkuî, chángzô pé myô jat lo nyi é buinyì pé má, Grik dang nyo é Yudaq byu pé gi, yhangmoq é chuimó myhî pé lé, nyi wui lhê é gàm tso gàm huq é hkyô má rago a wó kut kô é yanmai, Hebre myíng mu é Yudaq byu pé lé mara hûn dang taí bum akô.

² Haú hkûn, lagyo raxe í yuq gi, chángzô pé lhunglhang bang lé wut yù mù, "Ngamoq, Íwa Garai Gasâng é mungdang hko kyô é muzó lé rap pyâm to mù, zangbó amû lé za lajang nyi é nghut le gi, a htuk râ nghut lhê.

³ Haú mù luí, gumang wui ê, Choyiyúng Woi-nyí byíng é eq hpaqchyí byéng-yá bo é nhik bo byù nyhit yuq lé nungmoq chyáng mâ é hkyin to keq. Haú bang lé muzó shí lhum hun to râ nghut lhê.

⁴ Ngamoq kúm gi, kyûdûng é hkyô eq mungdang hkô é hkyô lé za, noqzuq tung kut nyí râ nghut lhê." ga taí akô.

⁵ Dang haú lé shiwa byù lhunglhang bang gyô htuk kômù luí, lumjîng myit kô é, Choyiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htûng má lhing wang lò bê sù

Antioku wà mó mâ é Nikolaq pé lé hkyin yù mù,

⁶ lagyô pé chyáng shuî lô akô; lagyô pé gi, kyûdung byi kômù, yhangmoq lé loq ke byí akô nghut ri.

⁷ Garai Gasâng é mungdang gi, je myô jam lò luí, Yerusalem wà mó má chángzô pé gyai myô jat lawán lo é htoq agó, hkyangjông pé myo myo le, haú lumjîng hkyô má châng nyi bum akô.

Stehpan Chyup Yû Huí É Hkyô

⁸ Ahkuî, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pé é hí má mauhpo muzó pé eq limik kumlhá mó pé tún shit ri.

⁹ Haú hkûn, luthkyô ga bâng é tarajong eq sêng é Kuruni, Alesander eq Kiliki, Asia mau mâ é bang ra-am gi, toq mù, Stehpan eq dang chyin chyin lhûm akô.

¹⁰ Nghut kôlhang, Stehpân é dang gi, Choyiyúng Woi-nyí lom é hpaqchyí dang nghut é yanmai, yhangmoq a ûng kó nghut ri.

¹¹ Haú mù, yhangmoq gi, "Shí yuq, Mosheq eq Garai Gasang lé rhoi dang taí nyi é lé, ngamoq wó gyô ri." ga luí, mhaú taí nhâng râ byù haq lung tô akô.

¹² Haú mù, yhangmoq gi, mingbyû wui eq nhik bô suwún wui, tarâ sará pé lé, chun htau mù, Stehpan lé chyup yû nhâng luí, Yudaq

byìn tú wapdoq má shuí nyhi tô akô.

¹³ Mhaû é saksé byu pé lé le lhoq hâng kat luî, haú bang gi, "Shí yuq, shí chyoiyúng jowò* eq jep é tarâ lé shut shai é dang ru taî nyi ri.

¹⁴ Nazaret wà byù Yesuq ga sù gi, jowò shí lé hpyoq pyám mù, nga-nhúng lé Mosheq èq byî tô é htunghking lé htaî pyám râ nghut lhê ga luî, yhang taî é dang lé ngamoq wó gyô é nghut lhê." ga taî akô.

¹⁵ Haú Yudaq byìn tú wapdoq má zung to bang ban-shoq, yhang lé chôm wú tsuq nyî kô é hkûn, yhâng é myoqdong gi, maumang lagyô é myoqdong su dut é lé, yhangmoq myang akô nghut ri.

7

Stehpan Taî É Dang

¹ Haú hkûn, hkyangjong mó gi, "Dang haú pé têng lhê lú?" ga luî, yhang lé myi jáng,

² Stehpan tû taî é gi, "Gumang wuì eq íwa wuì ê, gyô wú keq, nga-nhúng lhunglhâng bâng é íchyí Abraham gi, Haran wà má a ló nyî shi lé, Mesopotamiaq mau má nyi tô ashî hkûn, hpungwup shingkang bo é Garai Gasang gi, yhâng chyáng lé htoq shit mù,

³ 'Náng é ming eq náng é amyû mai htoq ló luî, ngò tûn shit râ ming shut e ló aq.'* ga luî, yhang lé taî ri.

⁴ Haû mù, yhang gi, Hkaldea byu pé é mau mai htoq ló luî, Haran wà má ló nyi nyi ri. Yhâng wa shi byuq é htâng má, Garai Gasang gi, ahkuî, nungmoq nyi nyi é ming shí má yhang lé htot lô nhâng bê nghut ri.

⁵ Garai Gasang gi, shí ming má yhang lé silí wunlí nghû râ, hkyî rahkô nang î é myigùng lháng a byî é nghut kôlhâng, yhang, zodù lháng a wò shi mai, yhang lé le, yhâng é awut ashín pé lé le, maumyí shí byi râ ga danggidiq byî to bê nghut ri.

⁶ Hau htoq agó, shí hkyô lé Garai Gasang xoq taî é gi, 'Náng é awut ashín pé, tûngbaù ming má bíng nyî mù, haú ming bâng èq myi shô zàn jùn zô é eq zing-rî é lé hui kó râ.

⁷ Nghut kôlhâng, yhangmoq lé jùn zô é amyû lé le, ngò jéyáng râ nghut lhê.' gâ ri. 'Haú hkûn, yhangmoq gi, haú ming mai htoq lô mù, jowò shí má ngo lé noqkuq kó râ nghut lhê.* ga le, Garai Gasang taî ri.

⁸ Hau htâng, yhang lé ahpyo-kuq hpyit byi râ hkyô eq sêng é dangshikaq le, byî ri. Haû mù, Abraham gi, Isak lé hku é htâng shit nyí buinyi má ahpyo-kuq hpyit byî ri; Isak gi, Yakup lé hkû mù, Yakup gi, íchyí íwa achyûng raxe í yuq lé hku kat bê nghut ri.

⁹ Haû íchyí íwâ pé gi, Yosep lé manôn kôluî, Egotuq ming

* **6:13** Shí chyoiyúng jowò gi, Yerusalem noqkuq yhûm lé gâ lhê. ✱ **7:3** Apûn 12:1

✱ **7:7** Apûn 15:13-14

shut jùn đông ùng kat akô. Nghut kôhlang, Garai Gasang gi, yhang eq rahá nghut nyi mù luí,

¹⁰ wuîhke jamjau banshoq mai yhang lé lhoq lhut yù mù, Egutuq hkohkâm Hpara-uq é hí má le myoqdong wó, hpaqchyí byéng-yá le bò nhang é yanmai, hkohkâm haú gi, Egutuq ming eq, yhâng é hkohkâm-wâng banshoq lé up nhang ri.

¹¹ Haú u lé, Egutuq ming eq Hkanan ming banshoq má mutmó gyó lô mù, wuîhke jamjau mó hui bekô. Nga-nhông é íchyí íwâ pé le zoshuq a myang hô zo lo dut byuq bekô nghut ri.

¹² Ahkuí, Yakup gi, Egutuq ming má guqzo joq é hkyô lé wó gyo jáng, nga-nhông é íchyí íwâ pé lé sâng-hí dàm é nhang ri.

¹³ Htang dàm dum ê é hkûn, Yosep gi, yhanggu yhangmâng pé lé yhang ó nghut é hkyô taí kyô ri. Hpara-uq le Yosep é yhumbyù ikun hkyô lé sê yù byi bê nghut ri.

¹⁴ Hau htâng, Yosep gi, yhâng wa Yakup eq yhumbyù banshoq nyhit xe ngo yuq lé, yhâng chyáng pying yù bê nghut ri.

¹⁵ Yakup le Egutuq ming má jé gyó lô luí, yhang eq nga-nhông é íchyí íwâ pé gi, banshoq haú ming má shí lô byuq bekô nghut ri.

¹⁶ Yhangmoq é mâng lé gi, Shehkem wà má yu taú lô mù, Shehkem wà má é Hamora é yhangzo yhangshu pé chyáng

mai, Abraham eq ngùn byi mù wui hpyit tô é lupdùng má lô myhup tô akô nghut ri.

¹⁷ Abraham lé Garai Gasang byí tô é danggidiq dik râ ahkying jé lo nyi é u lé,

¹⁸ nga-nhông é amyû gi, Egutuq ming má Yosep lé a sê é hkohkâm pô htoq é pyat jé shoq, myoluq jebe lò bekô nghut ri.

¹⁹ Hkohkâm hpó haú gi, nga-nhông é amyû htoq má a ge é hpaqchyí da luí, ny-heqnú pé lé shi byuq sháng gaq ga, dú pyám nhang é đông mai nga-nhông é íchyí íwâ pé lé zing-ri bê nghut lhê.

²⁰ Haú u má, Mosheq lé hkû to bê. Yhang gi, Garai Gasang é hí má gyai yúnglô é sù nghut ri; yhang gi, yhângwâ é yhûm má lhamó sum hkyap baú tô é hui mù,

²¹ htot tô tô é hui jáng, yhang lé Hpara-uq é byizô eq xe yù mù, zosîng kut yù luí, hku kô ri.

²² Mosheq gi, Egutuq ming má é hpaqchyí byéng-yá banshoq lé mhoq yù luí, nhut shô a-tsam eq hkyí loq a-tsam gyai bò sù nghut ri.

²³ Yhang asak myi xê zàn jé lò jáng, yhâng é gumang Israe-laq byu pé chyáng é kûm wú râ matú wó myit htoq kat ri.

²⁴ Ê jé jáng, zing-ri hui nyi é sù rayuq lé é myâng luí, haú yuq lé búng mù, zing-rí nyi é Egutuq byù lé, loqchoq hpuq é đông sat pyâm ri.

²⁵ Mosheq gi, yhâng é byu pé lé yhâng é loq đông Garai Gasang hkyi yù hkyô byi nyi é

lé, yhang é amyû pé sê gyo byi nhô ngàm kôlhang, yhangmoq a sê gyo byi kó nghut ri.

²⁶ Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyîn nau luí, 'Ahkaû nhik ê, gumang yhangchang sheq ru nghut lê nhîng, haî mù rayuq eq rayuq byoq lhum nyi akô lú?' ga taî ngón wú ri.

²⁷ Luzúm hpó lé zing-rî nyi sù yuq gi, 'Ngamoq é ahtoq má zau eq tarâ agyi kut râ matú, nàng lé ó yuq hkyin tô é lú?' ga luí he-ngik pyâm é Mosheq lé yhang, mhanpúng má htoq shit é maumang lagyo đông mai, Garai Gasang gi, yhangmoq é zau eq hkyi yù sù kut nhâng luí, taû nhang kat é nghut ri.

²⁸ A-nyí nap Egotuq byù lé sat pyâm é su, ngo lé le sat pyâm nau ri lú?'[☆] ga luí, tú taí uchyang yhang lé dùn chyûn pyâm ri.

²⁹ Mosheq gi, dang hau é yanmai, hpâng luí Midian ming má é nyi byuq ri. Haû má yuqzo í yuq é wó ri.

³⁰ Haû ming má myi xê zàn lai jáng, Sinaq Bùm yàm, yoso hkaû mâ é myi gyúng tô é mhanpúng mai, maumang lagyo rayuq gi, Mosheq lé htoq shit ri.

³¹ Mosheq gi, haû lé myàng jáng, hau é yanmai maú luí, wú wú râ ga huí e ló le, Yhumsîng é htê htoq lo é gi,

³² 'Ngò gi, náng îchyí îwâ pé é Garai Gasang, Abraham, Ísak, Yakup é Garai Gasang nghut nyi lê.'[☆] gâ ri. Mosheq kúm gi, gyuq nán luí, a wám tu wú nghut ri.

³³ Haû Yhumsîng gi, 'Náng

é hkyî-tsung hkyut pyâm aq, nàng yap tô é jowò gi, chy-oiyúng é myigùng nghut lê.

³⁴ Egotuq ming má ngá é amyû pé zik zo huí nyi é hkyô lé, ngò gè gè yhang myàng bê; yhangmoq é ngaù nhik ngaù htê lé ngò wó gyo bê; yhangmoq lé hkyi yù râ matú ngò gyó lé é nghut lê; ahkuí, lé aq, ngò, nang lé Egotuq ming shut nhang taû kat râ.'[☆] ga luí, yhang lé dum taî ri.

³⁵ Yhangmoq eq, 'Nang lé zau eq tarâ agyi kut râ matú, ó yuq hkyin tô é lú?' ga luí he-ngik pyâm é Mosheq lé yhang, mhanpúng má htoq shit é maumang lagyo đông mai, Garai Gasang gi, yhangmoq é zau eq hkyi yù sù kut nhâng luí, taû nhang kat é nghut ri.

³⁶ Haû Mosheq yhang, Egotuq ming má le, Nhong Nè má le, yoso hkaû pé má le, myi xê zàn gyoro má mauhpo muzó pé eq limik kumlhá pé tûn shit uchyang, yhang é byù myû pé lé Egotuq ming mai shuî htoq ló ri.

³⁷ Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pô htoq lô nhâng râ nghut lê.'[☆] ga luí, taî tô é sù le Mosheq yhang nghut ri.

³⁸ Yoso hkaû má nghut nyi ashî hkûn lé, shiwa byù hpúng má, Sinaq Bùm má yhang lé dang taí é maumang lagyo eq le, nga-nhông é îchyí

îwâ pé eq le rahá nghut sù gi, yhang yhang nghut nyi ri; nga-nhúng lé ap byi râ asak dui é mungdang lé lom yu é sù le, yhang nghut nyi ri.

39 Nghut kôlhang, nga-nhúng é îchyí îwâ pé kúm gi, yhâng é dang lé a kâm gyo kômù, yhang lé he pyám luí, Egutuq ming shut taú nau é myit bo bum akô.

40 Haû mù, Arun lé, 'Egutuq ming mai nga-nhúng lé shuí htoq lo é Mosheq gi, haî dut byuq bê hkyô lé, ngamoq a sé lo; haû mù, nga-nhúng hí má so byi râ hpara lâhò pé saí byi aq.'[✧] ga taí akô.

41 Haú buinyì pé má, yhangmoq gi, nojúng zo lâhò saí mù, alhô haû lé hkungga nhông byi uchyang, yhangmoq é loq èq saí tô é muzó jizó má gabú nhik dik nyi akô.

42 Haû mù luí, myiqhtoí pé é laiká má kâ tô é gi, 'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byi é nghut akô lúh?

43 Nungmoq gi, nungmoq noq râ matú saí yu é alhô, Molak é zúm eq Rehpan hpara é kyî lé sheq, waq lhing wún ko é yanmai,

Babelon lai shoq ngò nungmoq lé lhoq lhâm pyám râ nghut lhê.[✧]

ga luí, bo tô é eq rajung za, Garai Gasang gi, yhangmoq chyáng mai myoqdong lhing

pyám mù, mauhkûng htoq mâ é bui, kyî, lhamó pé lé noqkuq râ matú ap pyám bê nghut ri.

44 Mosheq lé, nàng myang é azòng eq rajung za saí aq ga, Garai Gasang taí é dông saí tô é saksé zúm lé, haû yoso má nga-nhúng é îchyí îwâ pé wó yû bekô nghut ri.

45 Haû mù, nga-nhúng é îchyí îwâ pé gi, yhangmoq é myoq hí mai Garai Gasang èq hkat htoq pyám byi é byù myû pé é mau má, Yoshuq eq rahá wang nyi lô kô é hkûn, saksé zúm haû lé yu wang lô akô. Haû gi, Dawiq é pyat jé shoq joq to bê nghut ri.

46 Dawiq kúm gi, Garai Gasâng hí má myoqdong wó sù nghut mù luí, Yakup é Garai Gasâng matú nyi jowò saí râ ahkáng dung kôlhang,

47 Sholumon èq sheq saí bê nghut ri.

48 Nghut kôlhang, Myhang htáng htum Sù gi, byu é loq èq za saí é yhùm má nyi é a nghut, haú hkyô eq séng luí myiqhtoí wá taí tô é gi,

49 'Mauhkûng gi, ngá é zùng tanghkuq, myigùng gi, ngá é hkyî nang jang nghut nyi lhê;

ngá é matú hkasû é yhùm saí byi shi kó râ lúh? Ngò nô yù râ jang gi, hkâmá nghut kó râ lúh?

50 Haû banshoq lé ngá é loq èq baú saí tô é a nghut kó lúh? ga luí, haû Yhumsîng taí ri.[✧]

gâ ri.

51 I-myyit htân mù, i-myyit eq nohkyap má ahpyo-kuq a hpyit é bang* ê, nungmoq gi, nungmoq é íchyí îwâ pé su, Chyoiyúng Woi-nyí lé hkâ-nhâm le lhom he-ngik pyâm nyi akô;

52 Nungmoq é íchyí îwa pé èq a zing-rî wú é myiqhtoi, ó yuq wá nyi lê lhú? Haû Dingmán Sû pô htoq râ hkyô lé hko kyô é bang lé, yhangmoq sat pyâm é chyat nghut akô; ahkuí, nungmoq le, haû Dingmán Sû lé ap pyâm é bang eq sat pyâm é bang nghut nyi akô.

53 Maumang lagyo èq shit kyo byi é tarâ lé nungmoq wó yú kôhang, haû lé a cháng kó nghut ri." gâ ri.

Stehpan Lé Luqgok Èq Dù Sat É Hkyô

54 Haû hkyô lé yhangmoq wó gyo kôjáng, yhangmoq é nhiklhum má lùm htaû záng kô é yanmai, Stehpan lé, zui wang ngat kyáng shoq wú nhik-yô nyi akô.

55 Stehpan kúm gi, Chyoiyúng Woi-nyí byíng mù, mauhkûng shut tu wú kat le, Garai Gasâng é hpungwup shing kang lé le, Garai Gasâng é loqyo hkyam shut Yesuq yap tô é lé le, myang ri.

56 Haû mù, yhang gi, "Wú keq, mauhkûng hpông tô é lé le, Garai Gasâng é loqyo hkyam shut haû Byu Yhangzo yap tô é lé le, ngò myàng ri." ga tai kat ri.

57 Haû hkûn, yhangmoq gi, htê mó o mó garu uchyang, yhumsing é nohkyap xaû pyâm mù, radá dâm yhang lé chôm htim kômù,

58 yhang lé wà mai she htoq ló kôluí, luqgok èq chôm dú ló bekô nghut ri; saksé kut é bang gi, Sholuq gâ é zoram é hkyí wang má yhangmoq é buhîng pé lé hkyut bum tô akô.

59 Luqgok èq dú nyi bùm kô é u lé, Stehpan gi, "Yhumsing Yesuq ê, ngá é woi-nyí lé hap yù laq." ga kyûdûng ri.

60 Hau htâng, yhang gi, hkyihput htuq mù, "Yhumsing ê, yhangmoq kut é mara haû lé hkyut pyâm byi laq." ga luí, htê mó èq wut dûng ri; haû ban tai jáng, yhang kâng byit byuq bê nghut ri.

8

Hpúng Byû Lé Sholuq Zing-rî É Hkyô

1 Sholuq gi, haû má nyi to mù, Stehpan lé sat pyâm é muzó má myit bo huí ri.

Haû nyí mai, Yerusalem wà mó mâ é noqkuq hpúng gi, zing-ri mó huí lo é nghut mù luí, lagyo pé mai lai luí, lumjîng bang lhunglhang gi, Yuda mau eq Samariq mau jowò hkanmó má byo myín ló bekô.

2 Nghut kôhang, tarâ hkunggâ é bang gi, Stehpan lé yhum pyâm é htâng má, yhang é yanmai iyon mó huí nyi akô nghut ri.

* 7:51 I-myyit eq nohkyap má ahpyo-kuq a hpyit é bang gâ é gi, Garaí dang lé a lùm a châng é bang lé gâ lhê.

³ Sholuq kúm gi, rayhum htâng rayhùm wàng mù, myiwe yuqgè lé she hkyut htoq yû luí, htóng má lhùng tô é dông mai, noqkuq hpúng haú lé lhoq hpyoq ló nyi ri.

Samariq Wà Má, Gabú Danglù Hkô Kyô É Hkyô

⁴ Byo htoq ló é bang kúm gi, jé é jowò hkangmó má mung-dang lé hkô kyô ló akô.

⁵ Haú hkùn, Hpilip gi, Samariq mau mâ é myuq ramyuq shut e ló mù, Hkrisduq é hkyô lé hkô kyô ri.

⁶ Byù ajùm ayò gi, Hpilip taí kyô é hkyô lé wó gyô é eq, yhang tún shit é limik kumlhá lé myàng kôjáng, i-myit rahkat za eq yhâng é dang chôm gyô nyi bum akô.

⁷ Nat wang júng é byù myo myô pê chyáng mai, agè ashop é nat pé wut garu uchyang htoq ló byuq bum akô; gùngjum shi é bang eq hkyí htên é bang myo myo le, ge ló byuq bum akô.

⁸ Haú mù luí, haú myuq má gabú hkyô gyai yhang wó bekô nghut ri.

Myoqheq Sará Simun É Hkyô

⁹ Simun gâ é byù rayuq gi, hí lé haú myuq má myoqheq hpaqchyí kut shit mù, Samariq byu pé lé lhoq maú luí, yhâng gùng lé yhang, lak-láí sù nghut lhê gâ ri.

¹⁰ Byù tiq ko banshoq le, "Byù shí yuq gi, 'haú a-tsam mó' gâ é, Garaí chyáng mai hpungwup a-tsam wó yû sù

nghut ri." ga luí, yhâng é dang lé gyô bum akô.

¹¹ Haú yuq gi, myáng myáng yhâng é myoqheq hpaqchyí eq yhangmoq lé lhoq maú lo é yanmai, yhâng dang lé chôm lum bum akô.

¹² Nghut kôlhang, Hpilip hko kyô é Garaí Gasâng é mingdán hkyô eq, Yesuq Hkrisduq é myìng eq sêng é gabú danglù hkyô lé, lumjìng kôjáng, myiwe yuqgè wui-myhup hkâm yu bum akô.

¹³ Simun yhang yhang le lumjìng mù luí, wui-myhup hkâm yù mù, Hpilip htâng châng wún ri. Hpilip é kumlhá mó eq laklaí kumlhá pé lé myàng jáng, yhang gi, gyai maú byuq ri.

¹⁴ Garaí Gasâng é mung-dang lé Samariq byu pé, lhom hap yù bê hkyô lé, Yerusalem wà mó má nyi é lagyô pé wó gyô bùm kôjáng, yhangmoq gi, Petruq eq Yohan nhik lé haú má nhang kat akô.

¹⁵ Yhangnhik gi, lé jé jáng, byù haú bang Chyoiyúng Woi-nyí wó yû rà matú kyúdung byí akô.

¹⁶ Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyó lô shi; Yhumsìng Yesuq é myìng mai wui-myhup hkâm yu é za ru nghut bùm ashí.

¹⁷ Haú mù luí, lagyô nhik yhangmoq é ahtoq má loq ke byi jáng, yhangmoq gi, haú Chyoiyúng Woi-nyí lé wó hkâm yù bekô nghut ri.

¹⁸ Lagyô nhik é loq ke kat jáng Chyoiyúng Woi-nyí wó

hkâm yu é lé, Simun myàng jáng, yhang gi, yhangnhik lé ngùn ê byi wú mù,

19 "Hká yuq é ahtoq má nghut kôlhang, ngò loq ke byi jáng, haú yuq gi, Chyoiyúng Woi-nyí wó yú râ matú, haú su é a-tsam ngo lé le byi kó laq." ga dung ri.

20 Petruq kúm gi, "Garai Gasâng é chyunghuq lé ngun eq wó wui yù râ nghut lhê ga luí, myit é yanmai, náng é ngùn gi, nàng eq rahá htên byoq byuq sháng gaq.

21 Nàng gi, Garai Gasâng é hí má myit a dínq sù nghut é yanmai, shí hkyô má nàng wó bo lhóm râ a nghut.

22 Haú mù luí, shí agè ashop é hkyô mai myit lhing mù, Yhumsing Garai chyáng dúng tôngbán aq. Haú hkûn, náng é unghkaú má myit pyâm é hkyô lé, mara hkyut pyâm byi abe.

23 Nàng gi, ladu lai shoq nhikhko zo mù, yubak marâ eq tuí zing to huí é lé, ngò myàng ri." ga yhang lé taí ri.

24 Haú hkûn, Simun gi, "Nungnhik taí é hkyô haí le ngá chyáng a jé sháng gaq, ngá é matú haú Yhumsing chyáng kyûdung byi kó laq." ga tú taí ri.

25 Yhangnhik kúm gi, haú Yhumsing é mungdang lé saksé hkâm mù ban hko kyo jáng, Samariq byu pê é wà myo myo má, haú gabú danglù lé hko kyo uchyang, Yerusalem wà mó shut dum taú lò bekò nghut ri.

Hpilip Eq U-nuk Nhk É Hkyô

26 Ahkuí, Yhumsing é mau-mang lagyo gi, Hpilip lé, "Toq aq, Yerusalem wà mó mai Gaza shut ló é hkyô jé shoq, maupyí shut nyâng za e ló aq. Hkyô haú gi, yoso hkyô nghut lhê." ga taí ri.

27 Haú hkûn, yhang toq mù e ló ri. Haú u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhâng é sutzè ban-shoq lé zúm é, Ehtiopi byù u-nuk rayuq gi, noqkuq râ ga Yerusalem wà mó má ê mù,

28 dum taú lo é hkûn, yhâng é myanglhêng má zùng luí, myiqhtoi Esai-aq laiká lé ng-hap nyi ri.

29 Woi-nyí gi, Hpilip lé, "Myanglhêng shut chyáng e ló aq." ga taí ri.

30 Haú mù, Hpilip gi, din ê mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri lú?" ga luí, yhang lé myí ri.

31 Haú yuq gi, "Mhoqshit sù yuq a nyi le, ngò hkâsu kut sê gyo râ lú?" ga tú taí mù, yhang eq rahá lo doq zùng aq ga Hpilip lé lung ri.

32 Yhang nghap é Chyúmdang gi, "Sat râ sau lé su, Yhang lé she e ló bê nghut ri;

sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

33 Yhânggùng lé lhoq shôm pyâm to huí é hkûn,

Yhang lé a tara é dông doqđân pyám bekô;

Yhâng é asak lé myigùng htoq mai yù pyám bekô nghut mù luí, Yhâng é awut ashín lé ó yuq wó gôn kyo râ lúhú?"*

gâ ri.

³⁴ Haú hkûn, haú u-nuk wa gi, Hpilip lé, "Haú nghut le gi, ngo lé taí kyo laq! Myiqhtoi shí yuq gi, ó lé lhoq ang luí, taí é nghut lhê lúhú? Yhânggùng lé taí é nghut lhê lúhú? Haú a nghut jáng, góyuq é hkyô lé taí é nghut lhê lúhú?" ga myí ri.

³⁵ Haú hkûn, Hpilip gi, Chyúmdang haú lé yù mù, Yesuq eq sêng é gabú danglù lé taí kyô ri.

³⁶ Haú su e ló kô le, wuì joq é má jé jáng, haú u-nuk hpó gi, "Wú aq, shí má wuì joq tô ri, wui-myhup hkâm yù râ matú ngo lé hkúm râ jang haí joq ashí lúhú?" ga taí ri.

³⁷ Hpilip gi, "Náng i-myt banshoq eq, nàng lumjíng bê nghut le gi, hkâm yu le ge lhê." ga taí ri; yhang le, "Yesuq Hkrisduq gi, Garai Gasâng é Yhangzo nghut é lé, ngò lumjíng bê." ga tû taí ri.*

³⁸ Haú hkûn, yhâng é myanglhêng hkying nhâng mù, yhangnhik wuì má gyó wâng luí, Hpilip gi, u-nuk hpó lé wui-myhup hkâm byí ri.

³⁹ Wuì hkaú mai htoq ló kô é hkûn, haú Yhumsing é Woi-nyí gi, Hpilip lé myhik za shuí ló byuq mù, u-nuk hpó le Hpilip lé dum a myàng lo;

nghut kôlhang, yhang gi, e ló é hkyô shut gabú myit eq xoq sô e ló bê nghut ri.

⁴⁰ Hpilip kúm gi, Azutu wà má lo htoq jé kat mù luí, Kesare wà mó jé shoq haú mau mâ é myuq pé wà pé hkangmó má gabú danglù hkô kyô wún ri.

9

Sholuq Lhik Wang Lo É Hkyô

¹ Haú u lé, Sholuq kúm gi, Yhumsing é chángzô pé lé hkat kyuq nha râ eq sat pyám râ ga, nhikmó-yô nyi é nghut mù luí, hkyangjong mó chyáng ê mù,

² Yhumsing é Hkyô lé lumjíng é myiwe yuqgè myàng mi-myàng lé chyup yú luí, Yerusalem wà mó shut wó she ló râ matú, Damaskuq myuq mâ é tarajong pé má byi râ laiká pé lé dúng chùng ri.

³ Yhang e ló le, Damaskuq myuq eq chyáng ló nyi é hkûn, yhâng é lhíngkyuq má mauhkung mai dàn loq tung duqbó htoq ló ri.

⁴ Yhang myigùng má lêng ngop tô é u lé, "Sholuq, Sholuq, nàng ngo lé haí mù zing-rí nyi lhê lúhú?" ga luí, yhang lé taí é htê wó gyô ri.

⁵ Haú hkûn, yhang gi, "Yhumsing ê, nàng gi, ó yuq nghut lhê lúhú?" ga myi jáng, haú Yhumsing gi, "Nàng zing-rí nyi é Yesuq nghut lhê,

* 8:33 Esai 53:7-8 * 8:37 Bun zo 37 shí lé Chyúmlaiká ra-am má gi, bo lhê; ra-am má gi, a bò.

⁶ toq aq, myuq shut wang ló aq. Nàng zui sai rã hkyô lé lhom tã kyo rã nghut lhê." ga tũ tã ri.

⁷ Yhang eq rahá e ló é luzúm wuĩ gi, htê haũ wó gyo kôhang, ó yuq lé le a myàng kô é yanmai, maũ hong yap tó bum akô.

⁸ Sholuq toq mù, myoq hpông kat wú le, haĩ lé le a myàng dut byuq mù luĩ, yhangmoq gi, yhang lé loq mai shê mù Damaskuq myuq shut shuí wang ló akô.

⁹ Sholuq gi, sum nyĩ tup myoqjit byuq mù luĩ, a zo a shuq é nyi byuq ri.

¹⁰ Damaskuq myuq má Anani gã é chángzo rayuq nyi ri. Yhumsĩng gi, yhang lé, "Anani ê." ga shing-rán đông wut ri.

Yhang gi, "Yhumsĩng ê, shĩ má nyi lhê." ga tũ tã ri.

¹¹ Haũ Yhumsing dum tã é gi, "Toq aq, Hkyô-Nyàng gã é wã hkyô shut ê mù, Yudaq é yhũm má, Tarshu byũ Sholuq lé ê hô aq, yhang gi, kyũdũng nyi ri.

¹² Yhang gi, Anani ga sũ wang lé lô mù, yhang é myoq dum myàng sháng gaq ga, yhang é ahtoq má loq ke byĩ é lé, shing-rán đông myàng bê nghut ri." gã ri.

¹³ Anani kũm gi, "Yhumsĩng ê, shĩ yuq gi, Yerusalem wã mó má, náng é sãn-yũng bang lé a ge é đông hkã-myhó kut laĩ lo é hkyanglũ lé ngò myo myo wó gyô wũ bê;

¹⁴ Shĩ pé má le, náng é myìng lé lãng é bang banshoq lé chyup rã ga, hkyangjong

agyi pê chyáng mã é ahko ahkáng wó yu to sũ nghut ri." ga tũ tã ri.

¹⁵ Nghut kôhang, Yhumsĩng gi, "Ru ê aq, shĩ yuq gi, tũngbaũ pé eq yhangmoq é hkohkam pê é hí má le, Israelaq byu pê é hí má le, ngá é myìng lé wũn waq rã matú, ngò chũng rã nghũ luĩ hkyin to sũ nghut lhê;

¹⁶ Ngá myìng é yanmai hkã-ĩ hpuzo ra hkyô lé, Ngò, yhang lé tũn shit rã nghut lhê." ga tã ri.

¹⁷ Hau htâng, Anani gi, jé ê mù, yhũm haũ má wàng luĩ, Sholuq é ahtoq má loq kê to mù, "Gumang Sholuq ê, náng myoq dum wó myàng mù, Chyoiyũng Woi-nyĩ byĩng sháng gaq ga, náng lé lo é hkyô má, náng lé htoq shit é Yhum-sing Yesuq eq ngo lé nhang kat é nghut lhê." ga tã ri.

¹⁸ Haũ hkũn jáng, Sholuq é myoq mai akyap sũ é wuĩ gyô byuq mù, yhang myoq dum wó myàng bê. Haũ hkũn, yhang gi, toq mù wui-myhup hkãm yũ luĩ,

¹⁹ zoshuq lé zo mù, wum-o dum lhoq pyĩng yũ bê nghut ri.

Sholuq, Damaskuq Myuq Má Mungdang Hko É Hkyô

Hau htâng, yhang gi, Damaskuq myuq mã é chángzô pé eq rahá rayoq zo zũm yap nyi uchyang,

²⁰ Yesuq gi, Garai Gasâng é Yhangzo nghut é hkyô, haũ hkũn jáng tarajong pé má hko kyô nyi bê nghut ri.

21 Sholuq é dang lé wó gyô é lhunglhang bang gi, maú byuq bùm kômù, "Shí yuq gi, Yerusalem wà mó má myìng haù lêng é bang lé lhoq hten lhoq hpyoq sù nghut lhê, a nghut kó lú? Ahkuí, shí má le, haù su é bang lé chyup yù mù, hkyangjong agyi pè chyáng ló ap rã da luí jé lé é sù a nghut kó lú?" ga myi bum akô.

22 Sholuq kúm gi, a-tsam je bo lò mù, Damaskuq myuq má nyi é Yudaq byu pé lé taí hpyi kyo luí, Yesuq gi, Hkrisduq yhang nghut nyi é hkyô lé saksé tûn shít ri.

23 Buinyí tsómra myáng é htâng má, Yudaq byu pé gi, yhang lé sat pyám rã matú haq dâ akô.

24 Nghut kôlhang, yhangmoq dâ é hkyô lé Sholuq sê pyám ri. Yhangmoq gi, yhang lé wó sat pyám shoq ga, nyí lé myín lé myuq hkum pé má lhom nyi akô.

25 Sholuq é chángzô pé kúm gi, myín má yhang lé shuí yù mù, manghkoq má lúng nhâng luí, wà kyám xewâm mai lhoq nyhum hkyô kat akô nghut ri.

Sholuq, Yerusalem Wà Mó Má Taú Jé Lo É Hkyô

26 Hau htâng, yhang gi, Yerusalem wà mó má jé lo é hkûn, chángzô pé eq zùm yap rã matú shikut wú kôlhang, yhang gi, chángzo dut bê hkyô lé a jíng kô é yanmai, lhunglhang bang gi, yhang lé gyuq bum akô.

27 Barnaba kúm gi, Sholuq lé lagyo pé chyáng shuí lò mù, Sholuq, hkyô má Yesuq eq hkâsu kut huí é hkyô lé le, Yesuq eq yhang lé taí é dang wó gyô é hkyô lé le, Damaskuq myuq má Yesuq é myìng mai gyuq myit a bo é za hkâsu kut hko kyô é hkyô lé le, yhangmoq lé taí kyô ri.

28 Haù mù, Sholuq gi, yhangmoq eq rahá Yerusalem wà mó má htoq htoq wàng wàng kut nyí uchyang, Yhumsíng é myìng mai a gyuq a kyum é za hko kyô nyi ri.

29 Grik dang nyo é Yudaq byu pé eq le, taí he lhûm nyi akô; nghut kôlhang, yhangmoq gi, yhang lé sat pyám rã dâ akô.

30 Haù hkyô lé, gumang wuì sé kôjáng, yhang lé Kesare wà mó má jé shoq dé mù, Tarshu myuq shut nhang kat akô nghut ri.

31 Yuda mau, Galile mau eq Samariq mau jowò hkanmó mâ é noqkuq hpúng gi, haù yoq pé má, lhoq ging lhoq tîng é hkyô wó yù mù, ngu-ingón nyi akô; haù Yhumsíng lé gyuq hkunggá é hkyô má le, Chyoiyúng Woi-nyí eq lhoq pun lhoq kyíng é hkyô pé má le châng nyi mù, myô jat lo bùm bekô nghut ri.

Ainea Ge Byuq É Hkyô

32 Haù hkûn, Petruq gi, haù mau pé má hkat kúm wún uchyang, Ludaq wà mó má nyi é sân-yúng bâng chyáng é jé ri.

³³ Haú wà má, gùngjum shí luí shit zân tup yhupjang mai a wó toq é Ainea gâ é byù rayuq lé ê myang ri.

³⁴ Haú mù, Petruq gi, "Ainea ê, Yesuq Hkrisduq, nang lé lhoq gê byi bê nghut ri, toq mù, náng é yhuphpú hen yù aq." ga luí, yang lé taí ri. Haú hkûn jáng, Ainea wó toq yap bê nghut ri.

³⁵ Ludaq eq Sharon pá má nyi é lhunglhâng bang gi, haú yuq lé myàng mù luí, Yhumsîng Yesuq chyáng lhing wang lo bum akô.

Dorka Ga Sû Dum Dui Lo É Hkyô

³⁶ Ahkuí, Yopa myuq má Tabihta gâ é chángzo myiwe rayuq nyi ri; myîng haú lé Grik dang dông gi, Dorka* gâ é nghut lhê. Myiwe haú gi, ge é muzó kut nyi é sù eq, asho awuí bang lé alu byí nyi é sù nghut ri.

³⁷ Haú u lé, yang gi, nõhpyo hui mù shi ló bê nghut ri. Yhâng mâng lé gi, chí mù luí ahtoq gok má jang tô akô.

³⁸ Ludaq wà mó gi, Yopa myuq eq chyáng é yanmai, haú myuq má Petruq nyi é lé chángzô pé wó gyo kôjáng, yangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

³⁹ Haú hkûn, Petruq gi, toq mù, haú nhik htâng châng e ló ri. Yang jé jáng, ahtoq pyâm gok má shuí hâng yu akô. Chuimó myhî pé lhunglhâng

bang gi, yhâng nàm má yap mù ngaù uchyang, yangmoq eq rahá nyi tô ashí hkûn Dorka hkyup é buhîng eq gotû mebu pé lé tûn shit nyi akô.

⁴⁰ Petruq kúm gi, lhunglhâng bang lé htoq ló nhâng mù, hkyihput htuq luí, kyûdung mù, mâng shut lhing wú luí, "Tabihta ê, toq aq!" ga taí ri, haú hkûn myiwe haú myoq hpóng lô mù, Petruq lé myàng jáng, toq zung lo ri.

⁴¹ Petruq gi, loq lhâm kat mù yang lé lâng toq yù luí, lumjîng bang eq chuimó myhî pé lé wut yù mù, duì gû ap byí ri.

⁴² Haú hkyô lé, Yopa myuq mâ é bang banshoq wó gyô ló kômù luí, byù myo myo gi, haú Yhumsîng Yesuq lé lumjîng bum akô nghut ri.

⁴³ Haú mù, Petruq gi, shokuq loqmú saí é Simun ga sù eq rahá, Yopa myuq má rayoq zo nyi nyi ri.

10

Koneli É Shing-rán

¹ Ahkuí, Kesare wà mó má gyezo rashô up é Koneli gâ é gyezau rayuq nyi ri. Yang gi, Itali gyedap mâ é nghut lhê.

² Yang gi, tarâ hkungga myit bò luí, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myûng bang lé alu myo myo byi uchyang, Garai Gasang lé hkâ-nhám le kyûdung nyi ri.

* 9:36 Dorka gâ é lichyúm gi, "chochî" gâ é nghut lhê.

³ Ra-nyí lé, myinhâtang sum hkyíng kô má, Garai Gasâng é maumang lagyo rayuq gi, yhang chyáng jé mù, "Koneli ê." ga luí, yhang lé wut é lé, shing-rán mai de de myang ri.

⁴ Haú mù, haú yuq lé wú tsuq to mù, "Yhumsîng ê, hai hkyô nghut lhê lúhú?" ga gyuq myit eq myî ri.

Maumang kúm gi, "Náng é kyûdung dang eq alu byí é hkyô gi, Garai Gasâng é hí má, hkungga masat dông hkyâng bê nghut ri.

⁵ Ahkuí, Yopa myuq shut byù nhang kat mù, Petruq gâ é sù Simun lé ê shuí lò nhâng aq.

⁶ Yhang gi, wuimau yàm mâ é, shokuq hkyup zô é Simun yhûm má bíng nyi ri." ga taí ri.

⁷ Koneli gi, yhang eq dang taí é maumang lagyo ló byuq jáng, dui-nhâng zoshâng í yuq eq, yhang chyáng hkâ-nhám le châng nyi bang mâ é, tarâ hkunggâ é gyezo rayuq lé ji yù mù,

⁸ dut laí lo é hkyô banshoq, yhangmoq lé taí kyo luí, Yopa myuq shut nhang kat ri.

Petruq É Shing-rán

⁹ Htang nyí nyí-káng u lé, yhangmoq, Yopa myuq jé ló yâm má, Petruq gi, kyûdung râ ga, yhumhkûng shut doq ló ri.

¹⁰ Haú hkûn, yhang gi, zòmut luí rajung jung zô nau nyi ri; nghut kôlhang, zoshuq ru gaí nyi ashí le, yhang moq byuq ló mù myoqwup shing-rán myang é gi,

¹¹ mauhkûng bóng lô mù, hpajóng mó sù é lé, myi chyûn má zui luí myigùng shut lhoq hkyô kat é azíng lé myang ri.

¹² Haú hkaú má, myigùng htoq mâ é hkyî myi hkyî dap é jung dusak ahú hú eq dô yê é jung ahú hú, mau má dang é nghoq ahú hú, lúng tô ri.

¹³ "Petruq ê, toq mù, sat zo aq." gâ é danghtê le mying htoq lo ri.

¹⁴ Petruq kúm gi, "Yhumsîng ê, haú gi, a wó dut, achauq achyut é eq a sansêng é zè lé, ngò hkâ-nhám le a zô wú." ga tú taí ri.*

¹⁵ Haú hkûn, "Garai Gasang lhoq san lhoq séng bê zè lé, a sanséng hkâ-nghû." ga luí, yhang lé dum taí kat ri.

¹⁶ Haú su ga sum dâm taí é htâng má, zè haú lé radá dâm mauhkûng shut wup yu ló bê nghut ri.

¹⁷ Ahkuí, Petruq gi, yhang myang é shing-rán lé haí wá nghut lhê lúhú ga luí, myit maú nyi é hkûn, haú Koneli nhang kat é bang gi, Simun é yhûm lé myang hô kômù, hkumtot má yap to luí,

¹⁸ Petruq gâ é sù Simun, yhûm haú má nyi a nyi é lé, wut myî wú akô.

¹⁹ Petruq gi, shing-rán haú lé ru myit wú nyi ashí le, Woi-nyí gi, "Wú aq, byù sum yuq nang lé ho nyi akô, toq mù gyó ló aq;

²⁰ yhangmoq gi, ngò nhang kat é bang nghut é yanmai, myit haí a úng-âng é za,

* 10:14 Nhang 11 lé wú aq.

yhangmoq eq rahá bo ló aq." ga taí ri.

²¹ Haú mù, Petruq gi, haú bâng chyáng gyó ló luí, "Nungmoq hô nyí é sù gi, ngò nghut lhê, haí ra luí lé kô é lhú?" ga myí ri.

²² Yhangmoq taí é gi, "Dingmán é, Garai Gasang lé gyoq hkunggá é, Yudaq amyû lhunglhâng bâng é hí má myoqdong wó é, shô up gyezau Koneli gi, nang lé yhâng é yhûm má ji hâng yù mù, nàng taí é dang gyo yù râ matú, yhang lé chyoiyúng maumang lagyô èq taí shit kyô é hkyô lé wó yû luí, ngamoq lé nhang kat é nghut lhê." ga akô.

²³ Haú mù luí, Petruq gi, yhangmoq lé wut hâng yù mù, bíng nhang ri. Hau htang nyí, yhang gi, toq mù, yhangmoq eq rahá bo ló ri; Yopa myuq mâ é gumang wuì ram le châng akô nghut ri.

Koneli Lé Petruq Huí É Hkyô

²⁴ Hau htang nyí, yhangmoq gi, Kesare wà mó shut wang ló akô. Koneli gi, yhâng é gumang wuì eq buinùm jimyí wuì lé ji tsing to mù, yhangmoq lé lánng nyí ri.

²⁵ Petruq wang ló jáng, Koneli gi, te yù mù, yhâng é hkyí wang má pãì gop noqkuq ri.

²⁶ Petruq kúm gi, "Toq aq, ngò le byù ru nghut lhê." ga luí, taí uchyang yhang lé tu toq ri.

²⁷ Haú mù, Petruq gi, yhang eq dang nyô uchyang wang ló

wú le, byù myo myo zup zing tô bum é lé myang ri.

²⁸ Haú hkûn, yhang gi, yhangmoq lé, "Yudaq byù rayuq gi, noqkuq htung dong tungbau rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôlhâng, ó yuq lé le achayut dut ri, a sanséng dut ri ngû a ge taí é hkyô lé gi, Garai Gasang, ngo lé tân shit bê.

²⁹ Hau é yanmai, nungmoq ngo lé ji kat é hkûn, ngò a he pyâm é za châng lé lo é nghut lhê. Haú mù luí, haí ra kô é yanmai, ngo lé ji akô ngû ngò myí nau ri." ga taí ri.

³⁰ Haú hkûn, Koneli gi, "Lai lò bê myi nyí nyí, myinhtang sum hkyíng má, ngá é yhûm má, ngò kyûdung nyi le, danso loq, duqbó é mebu wut é byù rayuq ngá é hí má yap htoq shit mù,

³¹ 'Koneli é, Garai Gasang gi, náng é kyûdung danghtê lé le gyo byi bê; nàng alu byí é hkyô lé le, bun byi bê nghut ri.

³² Hau é yanmai, Yopa myuq shut byù nhang kat mù, Petruq gá é Simun lé ji nhâng aq. Haú yuq gi, wuimau yàm mâ é shokuq hkyup zô é Simun yhûm má bíng nyi ri.' ga taí ri.

³³ Haú mù luí, haú hkûn jáng ngò náng chyáng byù nhang kat bê nghut lhê. Ahkuí, nàng jé é gi, gyai gè bê nghut ri. Yhumsing yhang nang lé taí nhang é gû banshoq gyô yù râ matú,

ahkuî ngamoq lhunglhâng bang Garai Gasâng é hí má nghut nyi lhê." ga taî ri.

Petruq Hko Kyô É Mungdang

³⁴ Haú hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuî ngò gè gè yhang sé bê.

³⁵ Byù myû chângjup má, Yhang lé gyuq hkunggâ é eq tengmán é muzó jizó saí é sù gi, Yhang é hí má myoqdong wó nyi ri.

³⁶ Nyi mi-nyì, joq mijoq é Yhumsîng, Yesuq Hkrisduq é yanmai, ngingón hkyô eq sêng é gabú danglù lé hko kyo sháng gaq ga, Israelaq byu pê chyáng Garai Gasang hun kat é mungdang eq rajung za,

³⁷ baptisma hkyô lé, Yohan hko é htâng, Galile mau mai Yuda mau banshoq má taî pyo ló é hkyô lé, nungmoq sé gû nghut nyi lhê.

³⁸ Haù gi, Garai Gasâng èq Chyoiyúng Woi-nyí eq wum-o a-tsam byì to bê sù, Nazaret wà byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat èq zing-ri huì é bang banshoq lé lhoq gè byì wún ri.

³⁹ Haù mù, Yudaq byu pê é ming má le, Yerusalem wà mó má le, yhang zui saí bê muzó banshoq é saksê pé gi, ngamoq nghut nyi lhê. Haù yuq lé yhang, yhangmoq sik zîng má jén sat pyám bekô nghut ri.

⁴⁰ Garai Gasang kúm gi, sum nyí nghû râ buinyì má, haù yuq lé lhoq dui toq kat é nghut mù luì, byù banshoq é hí má a nghut e za, saksé kut râ matú Garai Gasang hkyin to gù nghut é bang ngamoq é hí má za htoq shit bê nghut ri.

⁴¹ Yhang shi é mai dum dui toq ló é htâng má, ngamoq yhang, Yhang eq rahá razo rashuq wó kut yu é nghut lhê.

⁴² Yhang gi, asak dui é bang eq shì bê bâng é tarâ agyì kut râ matú, Garai Gasâng èq Yhang lé hkyin tô é sù nghut é hkyô lé, byu pé lé hko kyo râ eq, saksé hkám râ matú, ngamoq lé hkunmó hkyô to bê nghut ri.

⁴³ Yhang lé lumjîng é bang yuq hkangmó gi, Yhâng é mying é yanmai, yubak hkyut pyám byì é hui kó râ nghut lhê.' ga luì, taì é myiqhtoi banshoq gi, Yhâng é hkyô lé saksé hkam byì é bang nghut nyi akô." ga taî ri.

Chyoiyúng Woi-nyí Lé, Tungbaù Pé Wó Hap Yu É Hkyô

⁴⁴ Petruq gi, haù hkyô lé ru taì nyi ashì le, dang haù wó gyô é banshoq bâng ahtoq má Chyoiyúng Woi-nyí gyó jé lo ri.

⁴⁵ Tungbaù pê é htoq má lháng Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjîng bang Yudaq byu pé gi, maù bum akô.

⁴⁶ Hkâsu mù gâ le, yhangmoq gi, laklaí dang nyo é lé le,

Garai Gasang lé hkyá-on kô é lé le, wó gyô bùm kô é yanmai nghut ri.

47 Haû mù, Petruq gi, "Ng-amoq su Chyoiyúng Woi-nyí hkâm yù bê bang lé, baptisma a byi nhâng râ gi, wui lé ó yuq wó hkûm to râ lúh?" ga taí ri.

48 Haû htâng, yhang gi, yhangmoq lé Yesuq Hkrisduq é mying lang luí wui-myhup hkâm yù rá matú pyíng tó ri. Haû hkûn, yhangmoq gi, Petruq lé buinyí ra-í nyí, nyí gyó shi aq ga chôm hkûm akô.

11

Petruq, Yhang Kut É Muzó Lé Shit Kyô É Hkyô

1 Tûngbaù pé le, Garai Gasâng é mungdang lhom yù bê gâ é hkyô lé, lagyo pé eq Yuda mau pé mâ é gumang wui wó gyô akô.

2 Haû mù, Petruq, Yerusalem wà mó má doq ló é hkûn, ahpyo-kuq hpyit hkyô lé myit zuq é lumjíng bang gi,

3 "Nàng gi, ahpyo-kuq a hpyit é bâng é yhûm má wàng mù, yhangmoq eq razo rashuq kut ri." ga luí, yhang lé mara lhom taí hun bum akô.

4 Haû hkûn, Petruq gi, haû dut lò bê hkyô lé awang mai ahpyo hpyot, yhangmoq lé taí sân kyô hi kat é má,

5 "Ngò gi, Yopa myuq má kyûdûng nyi le, moq byuq ló mù shing-rán myang é gi, mauhkûng mai hpajóng mó sù é myi chyûn shut zui luí, ngá shut lhoq hkyô kat é zè gyó jé lo é lé, myang ri.

6 Haû lé rago za saí wú le, myigùng htoq má hkyí myi hkyí dap é jung dusak, yosô zè, dô yê é jung eq, maulat nghoqzô pé bo tô é lé, ngò myàng luí, myit wú nyi é hkûn,

7 'Petruq ê, toq mù, sat zo aq.' gâ é danghtê lé, ngò wó gyô ri.

8 Ngò kúm gi, 'Yhumsing ê, haû gi, a wó dut, achayut é eq a sansêng é zè, ngá é nhut má hkâ-nhám le a wang wú.' nghû taí kat é nghut lhê.

9 Haû hkûn, 'Garai Gasang lhoq san lhoq yúng bê zè lé, a sansêng hkâ-nghû.' ga luí, mauhkûng mai dum taí kat ri.

10 Haû su ga sum dâm taí é htâng má, haû pé banshoq lé mauhkûng shut dum wup yu ló bê nghut ri.

11 Haû hkûn jáng, Kesare wà mó mai, ngá chyáng nhang kat é byù sum yuq gi, ngò nyi é yhûm hkumtot má jé nyi tô akô.

12 Chyoiyúng Woi-nyí gi, ngo lé myit a úng-âng é za, yhangmoq htâng châng ê aq ga taí ri; shî gumang hkyuq yuq le ngò eq rahá ê mù, Koneli é yhûm má ngamoq wang é.

13 Haû hkûn, haû yuq gi, yhang é yhûm má maumang lagyo lé htoq shit é hkûn, yhang hkâsu myang é hkyô lé le; maumang lagyo èq yhang lé, 'Yopa myuq shut byù nhang kat mù, Petruq gâ é sù Simun lé ê jî nhâng aq;

14 nàng eq náng yhumbyù lunglhang bang hkyi yù hui râ danglù, yhang, náng chyáng wun lé lô byi râ nghut lhê.' ga taí é hkyô lé le, ngamoq lé taí kyô ri.

15 Ngò dang taí hi ló nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri.

16 Haú hkûn sheq, ngò gi, 'Yohan gi, wui èq wui-myhup hkám byí ri; nungmoq kúm gi, Chyoiyúng Woi-nyí èq wui-myhup hkám byí é hui kó râ nghut lhê.' ga luí, Yhumsing taí é dang lé bûn kat ri.

17 Haú mù luí, Yhumsing Yesuq Hkrisduq lé lumjing é hkûn, ngamoq lé Garai Gasâng jeju chyunghuq byí é su, Yhang, yhangmoq lé le byí é nghut le gi, ngò gi, hkasû é byù nghut luí, Garai Gasang lé wó lhom hkûm pyám râ lhú?" ga taí ri.

18 Yhangmoq gi, haú hkyô lé wó gyo kêjáng, taíjang a joq lo kômù, "Ó! Nghut bê, Garai Gasang gi, tûngbaù pé lé le, asak duì râ matú myit lhang hkyô byi bu-nhung!" ga luí, Garai Gasang lé chôm hkyôn akô nghut ri.

Antioku Wà Mâ É Noqkuq Hpung

19 Ahkuí, Stehpan lé sat pyám kô é htang má, zing-ri hui kô é yanmai, byo myín ló é bang gi, Hpinisi mau, Kupru zinlóng eq Antioku wà mó jé shoq byo ló kômù, Yudaq byu

pé lé baú za, mungdang haú hko kyô akô nghut ri.

20 Nghut kôlhang, yhangmoq mâ é Kupru byù eq Kuru ni byù ra-am gi, Antioku wà mó má châng jé ló kômù, Yhumsing Yesuq é gabú danglù lé, Grik pé lé le taí kyô bum akô.

21 Haú Yhumsing é loq gi, yhangmoq eq rahá nghut nyí mù luí, byù myo myo gi, lumjing mù, Yhumsing chyáng lhang wang lo bùm bekô nghut ri.

22 Haú bâng é hkyô lé, Yerusalem noqkuq hpung é no má hkyang jé ló é nghut mù luí, yhangmoq gi, Barnaba lé Antioku wà mó jé shoq nhang kat akô.

23 Yhang jé é hkûn, Garai Gasâng jeju bo nyi é lé myàng jáng, yhang gi, gabú luí, yhangmoq é myit nhikhum banshoq èq haú Yhumsing má lhumzui nyi râ matú, lunglhang bang lé myit wum byí ri.

24 Hkâsu mù gà le, Barnaba gi, byù gè nghut mù, Chyoiyúng Woi-nyí le, lumjing myit le bying tô é sù nghut nyi ri. Haú mù, byù myo myo gi, haú Yhumsing chyáng jat wang lo bùm bekô nghut ri.

25 Hau htang, Barnaba gi, Sholuq lé ê hô râ ga Tarshu myuq shut ê mù, yhang lé myàng jáng, Antioku wà mó má shuí lo ri.

26 Haú mù, yhangnhik gi, razàn gôn noqkuq hpung haú eq rahá zum nyi kô é nghut mù luí, byù myo myo lé wó

mhoqshit akô. Chángzô pé gi, Hkristan gâ é myìng lé, Antioku wà mó má sâng-hi wó yù bekô nghut ri.

²⁷ Haú u lé, myiqhtoì pé ram gi, Yerusalem wà mó mai, Antioku wà mó má lé jé bum akô.

²⁸ Haú bang mâ é Agabu gâ é sù gi, toq yap mù, Romaq mingkan tìng má mutmó gyó lô râ nghut é hkyô lé, Woinyí èq tún shit é dông taì kyô ri; (Haú gi, hkohkâm Klodi é pyat má dut bê nghut lhê.)

²⁹ Haú mù luì, chángzô pé gi, Yuda mau mâ é gumang wui lé, ó le ó wó dut é myhó garum kat râ ga, myit hpyit yu bum akô.

³⁰ Haú eq rajung za kut kômù, yhangmoq gi, chyunghuq haú pé lé Barnaba eq Sholuq nhik é loq mai suwún wui pé chyáng hun kat bekô nghut ri.

12

Petruq, Htóng Mai Wó Lut Htoq Lo É Hkyô

¹ Haú u lé, Herut hkohkâm gi, hpúng byû ra-am lé chyup yù mù, zing-ri râ ga ngantsâ nyi ri.

² Haú mù, Yohan é yhang-mang Yakuq lé sham èq sat pyám nhang ri.

³ Haú hkyô lé Yudaq byu pé wú gabú é lé myàng jáng, yhang gi, Petruq lé le, jâng chyup yu ri. Haú dut é gi, mún a kat é muk zo poì u lé nghut ri.

⁴ Herut gi, Lhoqlhai Poì lai jáng sheq, mingbyû wui hí má

jéyáng râ ga myit tô é yanmai, yhang lé chyup yu é htâng má, htóng má lhùng to mù, yhang lé zúng râ matú, gyè myi yuq yuq kut myi hpúng lé ap tô ri.

⁵ Haú mù, Petruq gi, htóng má lúng tô ri; hpúng byû wui kúm gi, yhang é matú Garai Gasâng chyáng kyû gyai chôm dung byi nyi akô nghut ri.

⁶ Petruq gi, Herut èq yhang lé jéyáng râ matú she htoq yû râ hì myìn lé, shamtoq-tui í hkat èq tuì é hui luì, gyezo í yuq é gyoro má yhup myhì tô ri; zúng é bang le htóng hkum má zúng nyi bum akô.

⁷ Haú hkùn, Yhumsing é maumang lagyo rayuq lé htoq shit mù, gok haú má duqbó lo ri. Maumang lagyo haú gi, Petruq é namcham má ê hpuk kat mù, "Myap toq wú aq." ga nhaú ri; haú hkùn, Petruq é loq mâ é toqjâng tui pé le gyut gyó ló bê nghut ri.

⁸ Maumang dum taì é gi, "Hpyihit hit mù, hkyi-tsung tsung aq." gâ ri; Petruq le taì é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum taì ri.

⁹ Haú hkùn, yhang gi, htóng mai yhâng htâng châng htoq ló ri; nghut kôlhang, maumang lagyo kut é muzó haú gi, gè gè nghut é lé, yhang a sé mù, shing-rán myang é nghut ri ga myit yu ri.

¹⁰ Ahkuì, yhangnhik gi, zúng tô é jowò í wô lai mù, wà má htoq é shamtoq hkum má jé jáng, hkum haú le yhang baú bóng lô mù, yhangnhik

htoq luí, wà hkyô rahkat má sô lô le, maumang lagyo gi, haú hkûn jáng, yhâng chyáng mai gâng lô byuq bê nghut ri.

11 Ahkuí, Petruq gi, dum bûn gyîng lò jáng, "Yhumsîng gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyù tô é hkyô banshoq mai, ngo lé hkyi yù bê nghut é lé, ahkuí ngò gè gè sé bê." ga taí ri.

12 Haú hkyô lé myit sê kat jáng, yhang gi, byù myo myo zing mù, kyûdûng nyi é jowò, Markuq gâ é Yohan é yhângnu Mariq é yhûm má jé lô ri.

13 Haú mù, yhang gi, yhûm wàng hkum lé lô bat é hkûn, Roda gâ é dui-nhâng zoshâng myiwe zo rayuq gi, gyô wú râ ga htoq lé lo ri.

14 Yhang gi, Petruq é htê nghut é lé sê gyô kat jáng, lûm gabú luí hkum a hpóng byi shí é za, yhúm hkaú shut ðin wang lô mù, "Petruq gi, hkum mhó lut má lo yap tô ri." ga lô taí kyô ri.

15 Yhangmoq kúm gi, "Nàng na bê nghut ri." ga yhang lé taí akô. Yhang gi, gè gè nghut ri ga ru taí nyi ri. Dum, yhangmoq gi, "Yhâng é maumang lagyo nghut âng ri." ga taí akô.

16 Nghut kôlhang, Petruq gi, hkum ru bat nyi mù, yhangmoq hpông kat é hkûn, yhang lé myàng kôjáng, chôm maú byuq bum akô.

17 Yhang gi, yhangmoq lé zim za nyi keq ga loq lik shit mù, yhang lé Yhumsîng eq htóng mai hkâsu kut shuí htoq

yu é hkyô lé taí kyo luí, "Shí hkyô lé Yakuq eq gumang wui lé taí kyô kat keq." ga taí ri. Hau htâng, yhang htoq lô luí, jowò gó shut e lô bê nghut ri.

18 Ahkuí, maubó jáng, gyezô pé gi, Petruq haí dut byuq é hkyô lé a sé kô é yanmai, gyai maú gabyông bum akô.

19 Herut kúm gi, Petruq lé ho wú le a myàng jáng, zúng é bang lé myi gôn wú mù, yhangmoq lé sat pyám râ matú hkunmó hkyô ri.

Herut Hkohkâm Shi Byuq É Hkyô

Hau htâng, yhang gi, Yuda mau mai Kesare wà mó má gyó lô mù lô nyi nyi ri.

20 Haú gyoro má, Herut hkohkâm gi, Turuq eq Sidun byu pé lé gyai nhik-yô nyi ri. Haú mù luí, yhangmoq gi, myit rahkat zâ eq yhâng chyáng ê mù, Blastu gâ é, hkohkâm wa lum tô é suwún hpó lé ê lûm hkaú mù, simsaq hkyô ê ðung akô. Hkâsu mù gâ le, yhangmoq é zoshuq wó râ matú gi, Herut é ming lé lùm hkaú nyi kô é yanmai nghut ri.

21 Haú hkûn, ðing lhûm tô é buinyi má, Herut gi, hkohkâm hking wut chûng mù, hkohkâm tanghkuq má zùng luí, yhangmoq lé hkohkâm mungdang byi ri.

22 Haú jáng, mingbyû wui gi, "Htê shí gi, waxâng byu é htê a nghut, garai wá é htê sheq nghut ri." ga garú bum akô.

23 Radá dâm, Herut gi, Garai Gasâng é hpungwup shing kang lé a tê byî é yan-mai, Yhumsing é maumang lagyo gi, yhang lé dâm byi lui, yhang gi, luq eq hkê é hui mù, shi byuq bê nghut ri.

24 Haû Garai Gasâng é mung dang gi, sê é bang myô jat lò mù, je riyhang byo myín lô bê nghut ri.

25 Barnaba eq Sholuq nhik gi, Yerusalem wà mó má yhangnhik saî tûm nyi é muzó ban saî jáng, Markuq gâ é Yohan lé shuí chûng mù, Antioku wà mó shut taû lô bekô nghut ri.

13

Barnaba Eq Sholuq, Hkyin Nhang Kat Huî É Hkyô

1 Ahkuî, Antioku wà mó mâ é noqkuq hpúng má, myiqh-toî pé eq sará pé le lom nyi akô. Haû bang gi, Barnaba, Niger* gâ é Simeon, Kuruni byû Luki, (Herut zau hpó eq zum kô lò sù) Manaen eq Sholuq pé nghut akô.

2 Yhangmoq gi, zoshuq gám lui Yhumsing lé noqkuq do-jau nyi é hkûn, Chyoiyung Woi-nyî gi, "Ngá é mû wùn waq râ matú ji tô é Barnaba eq Sholuq nhik lé, hkyin to keq." ga taî ri.

3 Haû mù lui, yhangmoq gi, zoshuq gám lui kyûdung mù, yhangnhik ahtoq má loq ke byi kô é htâng, yhangnhik lé nhang htoq kat akô nghut ri.

Kupru Zinlóng Má Dut É Hkyô

4 Haû mù, yhangnhik gi, Chyoiyung Woi-nyî eq nhang kat é eq rajung za, Seluki wà shut gyó lò mù, haû mâ é lhai ji lui, Kupru zinlóng má jé lò lui,

5 Salami wà mó má nyi nyi é hkûn, Yudaq byu pé é tarajong pé má, Garai Gasâng é mung dang hko kyô akô. Markuq gâ é Yohan le yhangnhik lé htuqluq htuqbang kut nyi ri.

6 Yhangmoq gi, haû zinlóng mai lai byit e lò mù Pahpu wà mó jé lò kô é hkûn, myiqhtoi pyoq nghut sù Bara-Yesuq gâ é Yudaq byû myoqheq sará rayuq eq htung hui akô.

7 Haû yuq gi, Sergi Poluq gâ é, myit hpaqchyî kung é ginwáng zau hpó é byû rayuq nghut lhê. Minggyi hpó haû gi, Garai Gasâng é mung dang gyô yù naù mù, Barnaba eq Sholuq nhik lé ji yu ri.

8 Haû hkûn, myoqheq sará gâ é lichyûm dông myhîng é Eluma le gâ é Bara-Yesuq kúm gi, ginwáng zau hpó lé haû lumjing hkyô má a jau lò nhâng nau é nghut mù lui, yhangnhik lé lhom he tang pyâm ri.

9 Haû hkûn, Poluq le gâ é Sholuq gi, Chyoiyung Woi-nyî byíng mù, yhang lé wú tsuq to lui,

10 "Myit goí é hkyô eq hpuq lò lhik é hkyô banshoq byíng tô é, nat é yhangzo nghut sù, tengmán hkyô hkangmó

* 13:1 Grik dong Niger gâ é gi, byû noq gâ é nghut lhê.

é gyè hpó ê, Yhumsing é tengmán hkyô lé a lhoq hpyoq é a wó nyí lhú?

11 Ahkuí, wú aq, Yhumsing é loq gi, náng chyáng jé mù, nàng gi, rayoq zo builoq a wó myang é za, myoqjit byuq râ nghut lhê." ga taí ri.

Haú hkûn jáng, yhâng é myoq gi, myhì-myhà ga luí mauchut tuq dut lò byuq ri; haú mù, yang lé shê râ byù ho sop lhíng wún ri.

12 Haú hkyô lé ginwáng zau hpó myàng jáng, Yhumsing eq sêng é mhogshít é hkyô lé wú maú luí lumjíng bê nghut ri.

Antioku Wà Mó Má Dut É Hkyô

13 Hau htâng, Poluq eq yhâng luzúm wuí gi, Pahpu wà mó mai lhai ji mù, Pamhpuli mau mâ é Perga wà má jé ló akô. Markuq gâ é Yohan kúm gi, yangmoq eq gang luí, Yerusalem wà mó shut taú lú byuq bê nghut ri.

14 Dum, yangmoq gi, Perga mai toq e ló le, Pesidi ginwáng mâ é Antioku wà mó má jé ló akô. Bánno buinyì má, yangmoq gi, tarajong má wang zung tô akô.

15 Haú hkûn, Mosheq é tarâ laiká eq myiqhtoi laiká pé lé ban nghap jáng, tarajong má up bang gi, "Gumang wuí ê, mingbyù wuí lé myít wum byi dang joq kô é nghut le gi, ahkuí taí lo keq." ga luí, yangmoq chyáng taí nhang kat ri.

16 Haú hkûn, Poluq gi, toq yap mù, zím byuq kó sháng gaq ga loq tù luí, "Israelaq

byu pé eq Garai Gasang lé gyuq hkunggâ é byu pé ê, chôm gyô yù keq.

17 Israelaq byu pé é Garai Gasang gi, ngamoq é íchýí íkê pé lé hkyin yù bê nghut mù luí, Egutuq ming má byùbing dut nyi to ashí hkûn, yangmoq lé kô myhâng nhâng mù, hpungwup a-tsam bo é loq èq haú mau mai shuí htoq ló ri.

18 Dum, myi xê zàn kô, yoso pé má yangmoq é a-kyang lé jân pyám byi mù,

19 Hkanan ming mâ é byuhú nyhit hú lé lhoq htên pyám luí, haú bâng é mingdán mâ é silí wunlí yangmoq lé gàm byí ri. Haú gi, myi shô ngo xê zàn kô myáng ri.

20 Hau htâng má, Garai Gasang gi, myiqhtoi Samuelaq é pyat jé shoq tarâ agyì pé lé to byí ri.

21 Hau htâng má, yangmoq mai hkohkâm dung kômù, Garai Gasang gi, yangmoq lé, Ben-yamyin amyú mâ é, Kisha é yangzo Sholuq lé byi luí, yang gi, myi xê zàn up bê nghut ri.

22 Hau htâng, Sholuq lé lhoq hkyô pyám mù, Dawiq lé, yangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yangzo Dawiq lé myàng bê; yang gi, ngò kut nhang é hkyô banshoq lé kut râ nghut lhê.' gâ ri.

23 Garai Gasang gi, Yhâng é danggidíq joq é eq rajung za, Israelaq byu pé é matú, haú yuq é awut ashín mai, hkyi yù

Sû Yesuq lé, pô htoq nhâng bê nghut ri.

²⁴ Yesuq a jé lé shimá, Yohan gi, Israelaq byu pé banshoq lé myit lhîng hkyô eq sêng é baptisma hkyô lé hko kyo bê nghut ri.

²⁵ Dum Yohan gi, yhang zuí é muzó ban ló é u lé, 'Ngo lé ó nghut é su ngâm tô akô lúhú? Ngò gi, haú yuq a nghut, wú keq, ngá é htâng má rayuq jé râ nghut lhê, haú yuq é hkyî-tsung tui hpyî râ lháng ngò a gíng.' ga taí ri.

²⁶ Abraham é yhangzo yhangshû pé eq Garai Gasang lé gyuq hkunggâ é tûngbaù, gumang wui ê, shî hkyi yù hkyô mungdang lé, nga-nhûng chyáng byi kat bê nghut ri.

²⁷ Yerusalem và mó mâ é bang eq, yhangmoq é zau suwún wui gi, Yhang hkyi yù sù nghut é lé le, Bánno buinyi hkangmó nghap é myiqhtoí pé é dang lé le, a sê gyo kô é yanmai, Yesuq lé sat râ do-qdân é hkûn, myiqhtoí pé é dang lé lhoq dik pyám bekô nghut ri.

²⁸ Yhâng chyáng shî gíng é mara a myàng kôlhang, Yhang lé sat pyám nhâng râ matú, Pilat chyáng dúng akô.

²⁹ Yhangmoq gi, yhang eq séng luí, kê to má kê to ban lhoq dik kôjáng, Yhang lé tapzîng mai yu hkyó mù, lup má kat tô akô nghut ri.

³⁰ Garai Gasang kúm gi, Yhang lé shi é mai lhoq dui toq yú bê nghut lhê.

³¹ Yhang gi, Galile mau mai Yerusalem và mó jé shoq, hí lé Yhâng htâng châng é bâng chyáng buinyi tsómra myáng shoq htoq shit shit kut ri. Haú bang gi, ahkuí, nga-nhûng Israelaq byu pé é hí má, Yhâng é saksé dut bekô nghut ri.

³² Haú mù, í dam lhê é Hkya-on Kungtôn Laiká má, 'Nàng gi, Ngá Zo nghut ri. Hkû-nýí, Ngò gi, Náng Wa dut bê nghut lhê.'[☆]

ga luí, kê tô é eq rajung za, ³³ Garai Gasang gi, íchyí íwâ pé lé byi tô é danggidiq lé, Yesuq lé lhoq dui toq byí é dông, yhangmoq é yhangzo yhangshu ngamoq é matú, lhoq dik byí é gabú danglù lé, nungmoq chyáng ngamoq wun lé byi bê.

³⁴ Hau htoq agó, Yhang htên byoq é hkâ-nhám a hui shoq, shi é mai lhoq dui toq yú râ hkyô eq séng luí, Garai Gasang taí é gi,

'Dawiq lé byí tô é danggidiq eq rajung za, chy-oiyúng é eq lumgíng é jeju lé, ngò nungmoq lé byi râ nghut lhê.'[☆]

gâ ri.

³⁵ Hkya-on Kungtôn Laiká gó wô má le,

'Náng é Chyoiyúng Sû lé, Nàng htên byoq nhâng nau râ a nghut.'[☆]

ga taí tô ri.

³⁶ Ahkuí, Dawiq gi, yhâng é pyat banshoq má Garai Gasang ô nau é dông ban wùn waq jáng, shi byuq luí, íchyí íwâ pé eq rahá myhup pyám

☆ 13:32 Hkya-on 2:7 ☆ 13:34 Esai 55:3

☆ 13:35 Hkya-on 16:10

hui mù, htên byoq byuq é hui bê nghut ri.

³⁷ Garai Gasang lhoq dui toq yu é sù kúm gi, htên byoq huí é a nghut.

³⁸ Haû nghut é yanmai, gumang wui ê, haú yuq mai yubak wó hkyut pyám byí é hkyô lé, nungmoq lé hko kyô nyi é nghut é le, sê nyi keq.

³⁹ Hau htoq agó, Mosheq é tarâ èq mara hkyut san byí é a hui kôlhang, haú yuq lé lumjìng é bang gi, hkyô lhumjup má mara hkyut san byí é hui râ nghut lhê.

⁴⁰ Hau é yanmai, "Wú keq, jihpoi é bang ê, maú mù luí htum byuq keq; nungmoq é buinyi pé má ngò rajung jung kut htoq râ nghut lhê;

⁴¹ haú hkyô lé, rayuq yuq, nungmoq lé hkaí kyo kôlhang, jìng kó râ a nghut."✧

ga luí, myiqhtoí pé taí é dang, nungmoq má a ang sháng gaq, sidiq nyi keq." ga hko kyô nyi ri.

⁴² Ahkuí, Poluq eq Barnaba nhik tarajong mai htoq ló le, htâng lhê é Bánno buinyi má le, haú pé lé dum hkaí kyo râ matú yhangmoq chôm dũng akô.

⁴³ Chôm byo htoq ló kô é hkùn, Yudaq byu pé eq Yudaq noqkuq htũng má lhing wang lo é tarâ hkunggâ é byù myo myo gi, yhangnhik é htâng má châng bùm kô é nghut mù luí, Garai Gasang jeju má gĩng nyi râ matú, yhangnhik gi,

yhangmoq lé lhoq pun lhoq kyĩng akô nghut ri.

Tũngbaù Pê Chyang Lhing Lo É Hkyô

⁴⁴ Hau htang lhê é Bánno buinyi má, Garai Gasang é mungdang gyô yù râ matú, rawa bang aluq shoí ban-shoq, lé zup zĩng to bum akô.

⁴⁵ Yudaq byu pé kúm gi, byù moq mó haú lé myàng jáng, manon myit baú byĩng bùm kômù luí, Poluq taí é dang lé taí htĩng é eq nhĩng pyám akô.

⁴⁶ Poluq eq Barnaba le gyuq myit a bo é dông taí é gi, "Garai Gasang é mungdang lé, nungmoq lé hí taí kyo râ dut é yanmai, ngá-nhik taí bê nghut lhê. Nghut kôlhang, nungmoq gi, haú lé lhom he-ngik pyám kômù, ahtum abyuq é asak eq gingdán é dông yhumsing gũng lé a myit yù kô é yanmai, wú keq, ahkuí, ngá-nhik gi, tũngbaù pê shut lhing ló berá nghut lhê.

⁴⁷ Hkâsu mù gâ le, haú Yhumsing gi,

"Hkyi yù hkyô lé maumyí htum shoq wó chũng jé râ matú, Ngò, nàng lé tũngbaù pê é maubó dut nhâng bê."✧

ga luí, ngamoq lé hkunmó hkyó kat bê." gâ ri.

⁴⁸ Tũngbaù pé gi, dang haú lé wó gyo kôjáng, gabú é eq Yhumsing é mungdang lé hkya-on kungtôn nyi bum akô. Ahtum abyuq é asak lé wó râ matú hkyin to huí é

lhunglhang bang le, lumjing bum akô nghut ri.

⁴⁹ Yhumsing é mungdang gi, haú ming gón jam lò bê nghut ri.

⁵⁰ Yudaq byu pé kúm gi, Poluq eq Barnaba nhik lé zing-ri râ matú, aróng wó é myiwe wui mâ é tarâ hkungga bang eq, haú wà mâ é suwún wui lé, nhik lhoq yo kôluí, yhangnhik lé maukyo mai chôm hkat htoq pyâm akô.

⁵¹ Yhangnhik gi, yhangmoq lé a nau é hkyô tûn shit é dông, yhumsing é hkyí mâ é hpuil-haú lé yhangmoq chyáng ko hkyô pyâm to kômù, Ikoni wà mó shut lò byuq bekô nghut ri.

⁵² Chángzô pé kúm gi, gabú é htoq agó, Chyoiyúng Woinyí byíng nyi bum akô nghut ri.

14

Poluq Eq Barnaba Nhik, Ikoni Wà Mó Má Ló Jé É Hkûn Lhê Hkyô

¹ Ahkuí, Ikoni wà mó má nghut nyi é hkûn, Poluq eq Barnaba nhik gi, Yudaq byu pé é tarajong má rahá wàng mù, Yudaq byu eq tûngbaù pé ajùm ayò lumjing bùm kó shoq, wum kat hko kyô akô.

² Nghut kôlhang, a lumjing é Yudaq byu pé gi, lumjing é gumang wui lé a ngui râ dông tûngbaù pé lé mhoq hpyoq yù mù, shuí gumlaù akô.

³ Haú mù luí, yhangnhik gi, tsómra myang shoq haú má nyi mù, haú Yhumsing é matú gyuq myit a bo é za hko

kyô akô; Yhang Yhumsing le yhangnhik é loq mai limik kumlhá eq mauhpo muzó dut nhang é dông, Yhang é jeju mungdang lé saksé hkám byi nyi ri.

⁴ Haú wà mâ é bang kúm gi, myit byo lò bùm kô é nghut mù luí, Yudaq byu pé chyáng ra-am, lagyo pé chyáng ra-am, lom byuq lò akô.

⁵ Ahkuí, tûngbaù pé le, Yudaq byu eq yhangmoq é uphkang bang le, yhangnhik lé rhoí mù luqgok eq dú sat râ ga htím lo bum akô.

⁶ Nghut kôlhang, yhangnhik gi, haú hkyô lé bûn sê kat kôjáng, Lukaoni ginwáng mâ é Lustra eq Derbe wà mó eq, hau é awui ayàm wà tiq wà zo pé shut hpanq e lò akô.

⁷ Haú pé má le, gabú danglù xoq hko kyô wún akô nghut ri.

Lustra Wà Mó Má Ló Jé É Hkûn Lhê Hkyô

⁸ Ahkuí, Lustra wà mó má, înu unghkaù mai hkyí hten mù luí, hkâ-nhám le hkyô a wó sô wú é sù rayuq zung tò ri.

⁹ Yhang le Poluq taí é dang lé gyô nyi ri. Poluq gi, haú yuq lé wú tsuq kat é hkûn, wó lhoq gê byi hui râ nghut lhê gâ é lumjing myit yhang chyáng bo tô é lé, myàng byi ri.

¹⁰ Haú mù, Poluq gi, "Toq yap aq!" ga luí, htê mó èq yhang lé taí kat jáng, yhang gi, byam toq kat mù, wó so bê nghut ri.

¹¹ Haú mù, Poluq kut é muzó lé shiwa byu pé

myàng kôjáng, yhangmoq gi, Lukaoni dang đông, "Nat hparà pé gi, byù gùng đông kut luí ngamoq chyáng gyó lô bekô nghut ri." ga luí, wut garu bum akô.

¹² Hau htâng, Poluq gi, dang myô tái sủ nghut é yanmai, yhang lé Herme ga, Barnaba lé gi, Zeu ga myhíng byí akô.

¹³ Haû wà yàm mã é Zeu hparà noqkuq yhúm hkyangjong hpó gi, wà hkum má nohtó pé eq ban hkóng pé yu lé mú, shiwa byu pé eq rahá yhangnhik lé hkungga nhông byi rá hen akô.

¹⁴ Nghut kôlhang, lagyo nhik Barnaba eq Poluq gi, haû lé wó gyó kôjáng, yhumsing é mebu lâng cheq pyám kôluí, shiwa hpong gung gùng shut din wang é kômù, garú tái kô é gi,

¹⁵ "Hkaû pé ê, haí mù haû su kut lo akô lú? Nga-nhik le nungmoq eq rajung za, xângzo byù za nghut lhê, akyú a bo é hkyô shí pé lé tô pyâm to mù, mauhkúng eq myigùng, wuìshuq lung-aû eq haú pé má nyi mi-nyì, joq mi-joq lé hpan to sủ, rû dui nyi é Garai Gasâng chyáng lhing wang lò kó sháng gaq nghú luí sheq, nungmoq lé gabú danglù hko kyô é nghut lhê.

¹⁶ Garai Gasang gi, byù myû chângjup lé hí hpyang lhê é pyat bán má ó le ó kâm é đông kut nhâng bê nghut ri.

¹⁷ Nghut kôlhang, Yhang gi, mauhkúng mai mau wô nhâng luí, kyôshi zúí nhang é ahkyíng yam-yoq byi mù,

nungmoq lé zoshuq agùn agó byí é eq, nungmoq lé i-myit ngón nhang nyi é đông, Yhang ge é hkyô lé tũn shít mù, Yhang nyi é hkyô lé saksé hkâm nyi ri." ga akô.

¹⁸ Haû su ga tái kô le lhang, yhangnhik lé shiwa byu pé mai hkungga nhông byi rá hkyô lé, yhangnhik gi, gyai wuihke luí sheq wó hkũm pyâm akô nghut ri.

¹⁹ Hau htâng, Antioku wà mó eq Ikoni wà mó pé mã é Yudaq byu pé ra-am lé jé kômù, shiwa byu pé lé shuí-u luí, Poluq lé luqgok eq chôm dú kômù, yhang lé shi byuq bê su ngàm kô é yanmai, wà shinggan shut shê hkyut htoq pyâm akô.

²⁰ Nghut kôlhang, Poluq gi, yhâng é lhĩnghkyuq má chángzô pé yap tô kô é hkũn, toq mù wà shut tau wang lò ri. Hau htang nyí, yhang gi, Barnaba eq rahá Derbe wà mó shut e lò bekô nghut ri.

Antioku Wà Mó Mã Taû Jé Ló É Hkyô

²¹ Haú wà mã yhangnhik eq gabú danglù hkô kyo kô é yanmai, byù myo myo gi, chángzô pé dut lo akô. Hau htâng, yhangnhik gi, Lustra, Ikoni, Antioku wà mó hkyô dum taû lò kômù,

²² chángzô pé lé myit lhoq ging byi uchyang, haû lumjĩng hkyô má ru gĩng nyi rá matú myit wum byí akô. "Nga-nhúng gi, Garai Gasâng é mingdán má wàng rá matú, wuĩhke jamjau myo

myo hui ra râ nghut lâ." ga le, mhoqshit akô.

²³ Yhangnhik gi, noqkuq hpúng hkangmó má, hpúng suwún kut râ bang lé hkyin yù mù, zoshuq gám luí kyúdung mù, yhangmoq lumjǐng nyi é Yhumsǐng Garai chyáng ap byi tô akô.

²⁴ Hau htâng, yhangnhik gi, Pesidi ginwáng mai lai byit ló mù, Pamhpuli ginwáng má jé ló akô nghut ri.

²⁵ Haú ginwáng mâ é Perga wà mó má mungdang hko kyo luí, Atali wà mó shut lai gyó ló akô nghut ri.

²⁶ Haú mai, lhai ji mù, ahkuí yhangnhik wún waq lai ló bê muzó é matú, Garai Gasang jeju má ap luí yhangnhik lé nhang kat é Antioku wà mó má dum jé lò bekô nghut ri.

²⁷ Jé lo é hkún, yhangnhik gi, hpúng byú wui lé wut tsǐng yù mù, yhangnhik dông mai Garai Gasang kut é hkyô ban-shoq lé le, tǔngbaù pé lé haú lumjǐng hkyô hkum hpóng byi é hkyô lé le, shit kyô akô.

²⁸ Haú mù, yhangnhik gi, haú wâ má chángzô pé eq tsómra myang shoq nyi nyi akô nghut ri.

15

Ahpyo-kuq Hpyit Hkyô Eq Sêng É Manghkáng

¹ Ahkuí, Yuda mau mâ é byù ra-am gi, Antioku wà mó má lé jé mù, gumang wui lé, "Nungmoq gi, Mosheq é htǔngtarâ eq rajung za, ahpyo-kuq a hpyit é nghut

jang, hkyi yu é hui râ a nghut." ga luí, mhoqshit bum akô.

² Hau é yanmai, myit a huí lhúm é hkyô htoq lô mù, Poluq eq Barnaba nhik gi, haú bang eq gyai yhang myǐng myô lhúm akô; haú mù luí, gumang wui gi, Yerusalem wà mó má nyi é lagyô pé eq suwún wui chyáng, haú hkyô lé ló hpyê lhum râ matú, Poluq, Barnaba nhik eq rahá, yhangmoq chyáng mâ é ra-am lé, nhang kat râ ga hkyin tô akô.

³ Haú mù, hpúng byú wui yhangmoq lé dé kat kôjang, yhangmoq gi, Hpinisi mau eq Samariq mau gyoro mai sô lai ló uchyang, tǔngbaù pé lhing wang lò bê hkyô lé tai kyô akô. Haú mâ é gumang wui lé gyai yhang gabú nhang akô nghut ri.

⁴ Yhangmoq, Yerusalem wà mó má jé kô é hkún, hpúng byú wui, lagyô pé eq suwún wui gi, yhangmoq lé lhom hkúlum yù kô é nghut mù luí, yhangmoq gi, yhangmoq dông mai Garai Gasang kut é hkyô lunglhang lé, haú bang lé shit kyô akô.

⁵ Haú hkún, Hparishe hpúng mâ é lumjǐng bang ra-am gi, toq mù luí, "Tǔngbaù pé lé, ahpyo-kuq hpyit nhâng râ eq, Mosheq é tarâ dông cháng nhâng râ gi, ra yhang râ lâ." ga tai bum akô nghut ri.

Yerusalem Wà Mó Má Kut É Byin Tú Wap Hpong

⁶ Ahkuí, lagyô pé eq hpúng suwún wui gi, shí hkyô lé

chôm myit wú rã ga, zup tô bum akô.

⁷ Shí hkyô lé gyai yang dang rhâng lhùm bùm kô é htâng má, Petruq gi, toq mù luí, "Gumang wuì ê, Garai Gasang gi, ngá nhut mai taí é, haù gabú danglù lé, tûngbaù pé gyô yù mù lumjìng kó sháng gaq ga, hí hkûn nung-moq chyáng mai ngo lé hkyin yù bê hkyô lé, nungmoq sé lugù nghut bê.

⁸ Haù mù, myit nhiklhùm lé sé byi sù Garai Gasang gi, nga-nhúng lé byí é eq rajung za, yangmoq lé le Chyoiyúng Woi-nyí byí é dông, yangmoq lé hap yù bê hkyô lé saksé tûn shit bê nghut ri.

⁹ Garai Gasang gi, yangmoq lumjìng luí, yangmoq é myit nhiklhùm lé lhoq san lhoq yúng byi bê nghut é yan-mai, nga-nhúng eq yangmoq é gyoro má gamhkuí é hkyô a joq nhâng lo nghut ri.

¹⁰ Haù nghut le gi, íchý íwã pê èq le, nga-nhúng èq le a ung é wòlai lé, haù chángzô pê é lingzing má ke byí é dông mai, haí mù, ahkuí Garai Gasang lé chyam wú nyi akô lhú?

¹¹ Nghut kôlhang, ngamoq gi, yangmoq eq rajung za, Yhumsing Yesuq é jeju mai za hkyi yu é huí é hkyô lé lumjìng é bang nghut lhê." ga luí, yangmoq lé taí ri.

¹² Haù hkûn, zup míng tô é bang lunglhang gi, zim za kut luí, Barnaba eq Poluq nhik mai, tûngbaù pê chyáng,

Garai Gasâng eq yangnhik é loq dông limik kumlhá pé eq mauhpo muzó pé kut shit é hkyô, taíkyô nyi é lé chôm gyô nyi akô.

¹³ Yangnhik dang ban taí kôjáng, Yakuq gi, "Gumang wuì ê, ngá dang lé gyô wú keq.

¹⁴ Garai Gasang gi, tûngbaù pê chyáng mai Yhâng mying é matú byù ra-myû hkyin yù rã ga, yangmoq lé sâng-hi mai hkâsu kut lé kûm nyi é hkyô lé, Simun taí kyo bê nghut ri.

¹⁵⁻¹⁶ Shí hkyô gi,

'Hau é htâng má gi, ngò dum taù lò mù luí, lêng gyop byuq bê Dawiq é yhùm* lé dum saí rá nghut lhê.

Haù byoq htên tô é pé lé saí saí mù, haù lé dum lhoq toq rã nghut lhê.

¹⁷ Haù hkûn sheq, ngá mying mai ji yu é tûngbaù pé eq, myit gyo tô é byù lunglhang bang gi, Yhumsing Garai lé hô kó rã nghut lhê ga,

¹⁸ a-nham mau htoq xâng hkun mai, shí hkyô pé lé sé nhang é Yhumsing Garai taí ri.*

ga myiqhtoí pé kã tô é dang eq rajung za nghut ri.

¹⁹ Haù mù luí, ngò taí nau é gi, tûngbaù pê chyáng mai Garai Gasâng shut lhing lo é bang lé, gotù haí le a lhoq wuì é za,

²⁰ hparà lhô pé lé kyáng byí é a sansêng é zoshuq pé lé

* **15:15-16** Dawiq é yhùm gã é gi, Dawiq eq yhâng é awut ashin pé up é hkyô lé gã é nghut lhê. ☆ **15:18** Amo 9:11-12

le, ashop é đông gungsho zùm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám râ matú za, yhangmoq lé, nga-nhúng laiká mai wó shit kat lhê.

²¹ Hkâsu mù gâ le, gó hkûn mai yhang, Mosheq é tarâ lé wà hkgámó má hko kyô lô kômù, Bánno buinyì hkgámó tarajong pé má nghap kyo kyo kut bùm kô é nghut lhê." ga tâi ri.

Lumjîng É Tungbaù Pé Chyáng Hun Kat É Laiká

²² Haú hkûn, lagyô pé, suwún wuê eq, hpúng byû wuê lhunglhâng bang gi, Poluq, Barnaba nhik eq rahá Antioku wà mó shut nhang kat râ byù lé, yhangmoq chyáng mai hkyin yù râ matú chôm myit hpyit akô. Haú eq rajung za, yhangmoq gi, gumang wui chyáng mâ é nhik bô suwún nhik Barsabaq gâ é Yudaq eq Sila lé hkyin yu akô nghut ri.

²³ Yhangnhik é loq má, hun kat kô é laiká gi,

"Antioku wà mó, Suriq mau eq Kiliki mau pé má nyi é, tungbaù gumang wuê ê, nungmoq é gumang wuê nghut é, ngamoq lagyô pé eq suwún wuê gi, nguingón dang shit kyô kat lhê.

²⁴ Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dang èq lhoq byok pyám luí, nungmoq é myit lé lhoq nhúng

byi nyi é hkyô lé, ngamoq wó gyo bê.

²⁵ Haú mù, ngamoq lhunglhâng bang gi, byù ra-am lé hkyin yù mù,

²⁶ nga-nhúng é Yhumsing Yesuq Hkrisduq é matú, yhumsing asak lé lhang a hâ é nga-nhúng chyitdap é Barnaba, Poluq nhik eq rahá, nungmoq chyáng nhang kat râ matú chôm myit hui bê.

²⁷ Haú mù luí, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang tâi kyo kô râ nghut lhê.

²⁸ Nungmoq é matú gi, hparà ló pé lé tung byi é zoshuq eq sui, lingzing mai myhik sat é dusak sho eq ashop é đông gungsho zùm yap é hkyô pé lé, koi pyám râ hkyô mai lai luí, gotû wòwùn hùn râ hkyô a joq nghû luí, Choyiyúng Woi-nyi le, ngamoq le, myit huí to bê.

²⁹ Nungmoq haú pé lé koi pyâm nyi kôjáng gi, gè râ nghut lhê.

Nguingón wángzán nyi kó sháng gaq ô!" ga kê tô ri.

³⁰ Yhangmoq lé nhang kat kôjáng, yhangmoq gi, Antioku wà mó má gyó jé lô kômù, hpúng byû wuê lé ji tsing to kôluí, haú hùn kat é laiká lé ap byi akô nghut ri.

³¹ Hpúng byû wuê gi, laiká haú lé ban nghap kôjáng, wum-o byi é danglù hau é yanmai, gabú nyi bum akô.

³² Yudaq eq Sila gi, myiqh-

toí nhik le nghut kômù luí, gumang wui lé mungdang myo myô eq lhoq pun lhoq kying kômù, wum-o lhoq gîng to byí akô.

³³ Rayoq zo haú má nyi nyi kô é htâng má, gumang wui gi, yhangmoq lé nhang kat é bâng chyáng, ngui ngui ngón ngón dum tau ló nhâng bekô nghut ri.

³⁴ (Sila kúm gi, yhang ô nau é dông nyi gyó tô ri.)†

³⁵ Poluq eq Barnaba kúm gi, Antioku và mó má nyi gyó to kômù, Yhumsîng Yesuq é mungdang lé, góbang myo myo eq, mhoq kyo hko kyô akô nghut ri.

Poluq Eq Barnaba Nhik Gâng Lhum É Hkyô

³⁶ Hau htâng, buinyì tsómra myáng jáng, Poluq gi, Barnaba lé, "Yhumsîng é mungdang hko kyô lai lo wú bê, và hkyap hkgámó má é gumang wui chyáng taû lò luí, yhangmoq hkâsu dut nyi é hkyô lé, ló dum kúm wú lo goq." ga taí ri.

³⁷ Barnaba gi, Markuq gâ é Yohan lé le shuí chûng nau ri.

³⁸ Nghut kôlhang, Poluq gi, haú yuq lé a kâm shuí chûng naù nghut ri; hkâsu mù gâ le, yhang gi, Pamhpuli mau má yhangnhik lé tô pyâm to mù, yhangnhik eq rahá muzó a kâm xoq zui nau é sù nghut é yanmai nghut ri.

³⁹ Hau é yanmai, yhangnhik gi, gyai yhang taí shai lhum kômù, rayuq eq rayuq

gâng lhum bekô nghut ri. Barnaba gi, Markuq lé shuí chûng luí, lhai ji mù Kupru zinlóng shut e ló byuq bê nghut ri.

⁴⁰ Poluq kúm gi, Sila lé hkyin yù mù, gumang wui eq yhang lé Yhumsîng Garaí é jeju má ap kat kô é htâng má, yhangnhik gi, htoq e ló byuq bekô.

⁴¹ Haù mù, Poluq gi, Suriq mau eq Kiliki mau mai sô lai ló uchyang, haú má é noqkuq hpûng pé lé wum-o lhoq gîng byí wún bê nghut ri.

16

Poluq Eq Sila Nhik Chyáng Timohti Châng É Hkyô

¹ Poluq gi, Derbe và mó má jé é htâng, Lustra và mó má dum jé ri. Haú và má, Timohti gâ é chángzo rayuq nyi ri. Yhâng nu gi, Yesuq lé lumjîng é Yudaq myiwe myhí nghut ri; yhâng wa kúm gi, Grik amyû nghut ri.

² Timohti gi, Lustra và mó eq Ikoni và mó má nyi é gumang wui eq hkya-ôn é hui sù nghut ri.

³ Poluq gi, hkyowui má yhang lé shuí chûng naù mù luí, ahpyo-kuq hpyit byí ri. Hkâsu mù gâ le, yhâng wa gi, Grik nghut é hkyô lé haù má é Yudaq byu pé lhunglhang bang sé kômù, haú bang lé myit tê byí é yanmai nghut ri.

⁴ Haù mù, yhangmoq gi, rawa htâng rawà mai lai ló uchyang, Yerusalem và

† 15:34 Bun zo shí lhum gi, Grik Chyúmlaiká myo myo má a bò nghut lhê.

mó mâ é lagyô pé eq hpúng suwún wuî, chôm myit hpyit tô é hkyô lé, cháng kó sháng gaq ga, yhangmoq lé taî kyô akô.

⁵ Haû mù luî, hpúng byû wuî gi, lumjîng hkyô má wum-o bo lò kômù, ra-nyí èq ra-nyí byû du myô jat lo nyí ri.

*Makedoni Byû Rayuq Lé,
Poluq Shing-rán Myang É
Hkyô*

⁶ Ahkuî, yhangmoq gi, Asia mau má mungdang é hko kyo râ hkyô lé Chyoiyúng Woi-nyí èq yhangmoq lé hkùm pyâm é yanmai, Hprugi mau eq Galatiq mau dông sô lai lô mù,

⁷ Musi mau kyo má jé lô kôjáng, Bihtuni mau shut wang lô râ dá akô; nghut kôlhang, Yesuq é Woi-nyí gi, yhangmoq lé ahkáng a byi nghut ri.

⁸ Haû mù, yhangmoq gi, Musi mau mai sô lai lô luî, Troa myuq má gyó jé lô akô.

⁹ Haû má, myin lé, Poluq gi, Makedoni byû rayuq lé yap to mù, "Makedoni mau shut dap lé luî, ngamoq lé le garúm yû laq." ga luî, yhang lé dung wut nyi é shing-rán myang ri.

¹⁰ Shing-rán haû lé Poluq myang é eq, Makedoni byu pé lé gabú danglù hko kyo râ matú, ngamoq lé Garai Gasang wut yù bê nghut ri nghû myit yù luî, haû hkûn yhang, ngamoq gi, Makedoni mau shut dap é râ matú rì rì kut lô bê nghut lhê.

*Ludia Gâ É Myiwe Myhi
Hpúng Byû Dut Lo É Hkyô*

¹¹ Haû mù luî, ngamoq gi, Troa myuq mai Samohtake zinlóng ang ang shut lhai ji é mù luî, htang nyí gi, Neapoli wà má jé bê nghut lhê.

¹² Haû mai lai jáng, Make-doni mau má, Romaq byu pé xuq tô é, haû ginwáng mâ é ahkyak wà mó nghut é, Hpilipi myuq má ngamoq jé mù, haû má rayoq zo nyi nyi é nghut lhê.

¹³ Bánno buinyi jé jáng, ngamoq gi, kyûdung jowò joq nhô ngam mù, wà hkum shinggan mâ é, wuilàng yâm shut htoq é luî, haû má zîng to lánng é myiwe wuî lé, zung gyó mù nyo hi é nghut lhê.

¹⁴ Haû dang gyo nyi é bang má, Garai Gasang lé noqkuq é, Htuatira myuq byû, pán nê ung zo sù Ludia gâ é myiwe myhí rayuq bo ri; Yhumsîng Garai gi, Poluq taî kyô é hkyô lé rago gyô yù sháng gaq ga, yhang lé myit hkum hpóng byi ri.

¹⁵ Yhang gi, yhang eq yhâng yhumbyû wuî wui-myhup ban hkâm yù kôjáng, "Nungmoq gi, ngo lé haû Yhumsîng Yesuq má lumjîng bê sù nghut é dông, myit yù byi kô é nghut jáng, ngá yhûm má lé bíng keq." ga luî, ngamoq lé zuq zuq ji yu ri.

*Poluq Eq Sila Nhik Htóng
Lúng É Hkyô*

¹⁶ Ra-nyí lé, ngamoq gi, haû kyûdûng é jowò shut e lô nyi le, nat wang júng luî

gumhpân hpan é jùnmyhí rayuq ngamoq lé lhom huí ri. Haú yuq gi, gumhpân hpan é đông yhâng yhumsîng wuì lé ngunzè gyai yhang hô byí é sù nghut lê.

17 Myiwe haú gi, Poluq eq ngamoq htâng má châng to mù, "Shí bang gi, nungmoq lé hkyi yù hkyô tai kyô wún é, Myhang Htâng é Garai Gasâng é dui-nhâng zoshâng wuì nghut bum akô ô!" ga wut garú ri.

18 Buinyì myo myo haú su chyat châng garú wún é yan-mai, Poluq gi, gyai yhang myit hpêbu byuq mù, lhing wú kat luí, nat haú lé, "Yesuq Hkrisduq é myìng lang luí ngò nang lé hkunmó hkyô kat lê, yhâng chyáng mai htoq ló byuq aq." ga luí, nat haú lé, nhik-yô kat ri. Haú hkûn jáng, nat haú gi, yhâng chyáng mai htoq ló byuq bê nghut ri.

19 Ahkuí, myiwe hau é yhumsîng wuì gi, ngunzè myàng zo rá myoqbyù jowò a joq lo é hkyô lé sé kôjáng, Poluq eq Sila nhik lé chyup yù mù, gài mâ é suwún wui chyáng she hkyut e akô.

20 Dum, yhangmoq gi, yhangnhik lé tarâ agyì pé chyáng shuí é mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé mhoqshit byí nyi é đông,

21 nga-nhông é myuq lé gunjâng nyi akô nghut ri." ga tai akô.

22 Haú mù luí, shiwa byu pé gi, yhangnhik lé chôm htim

akô. Tarâ agyì pé gi, yhangnhik é mebu lé lêng hkyut pyám luí, wumchûm hkat èq bat rá matú, hkunmó hkyô kat akô.

23 Yhangmoq gi, yhangnhik lé gyai yhang nhuq bat yu é htâng, htong má lhung kat mù, rago za wú zúng rá matú htóng suwún lé hkunmó hkyô tô akô.

24 Htóng suwún hpó gi, haú sù é hkunmó lé wó jáng, yhangnhik lé hkyi kyum hut luí, htóng mâ é, je ahtê gok má lhung tô ri.

Htóng Suwún Hpó Hkyi Yù Huí É Hkyô

25 Nghut kôlhang, gunggàm yoq lé, Poluq eq Sila nhik gi, kyûdung luí, Garai Gasang lé mahkôn hkya-ôn nyi kô é hkûn, htóng byù góbang gi, yhangnhik é htê lé chôm gyô nyi bum akô.

26 Haú hkûn, byodàn ratung layàng mó nún lô mù htóng yhúm gón le nún lô luí, hkum pé banshoq le radá dâm bóng hâ lo bum ri; dum nghut jáng, yuq hkangmó mâ é toqjâng tui pé le gyut gyô byuq bê nghut ri.

27 Htóng suwún hpó gi, yhup bûn lò mù, htóng hkum pé bóng hâ tô bum é lé myang kat jáng, htóng byu pé ban hpang byuq bùm bekô rá nghut lê ga myit yù luí, sâm shê mù, yhânggùng yhang sat shí rá dâ ri.

28 Nghut kôlhang, Poluq gi, "Ê, náng gûng yhang nàng haú su hkâkut, ngamoq banshoq

shî má nyi tô lhê." ga luí, htê mó eq wut garu taí kat ri.

²⁹ Haú hkûn, yhang gi, duq é myibung lé dúng yù mù, ahkaú shut din wang ló luí, Poluq eq Sila nhik é hí má gyuq nán é eq ngóm gop tô ri.

³⁰ Hau htâng, yhang gi, yhangnhik lé shuí htoq yú luí, "Sarâ nhik ê, ngò hkyi yu é hui râ matú, haí kut ra râ lúhú?" ga myi kat ri.

³¹ Haú hkûn, yhangnhik gi, "Yhumsing Yesuq lé lumjǐng jǎng, nǎng eq nǎng yhumbyù lhunglhâng bang hkyi yu é hui râ nghut lhê." ga taí akô.

³² Hau htâng, yhangnhik gi, haú htóng suwún hpó eq yhâng yhumbyù lhunglháng lé, Yhumsing é mungdang hko kyô akô.

³³ Haú myîn haú u lé yhang, htóng suwún hpó gi, yhangnhik lé shuí ê mù, yhangnhik é dàm pé lé tsing chí pyám byi luí, haú htâng, yhang eq yhâng yhumbyù banshoq bang wui-myhup hkâm yù bekô nghut ri.

³⁴ Hau htâng, yhang gi, yhangnhik lé, yhâng é yhúmkaú má shuí wang ló mù, zoshuq hkang byi ri. Yhang eq yhâng yhumbyù banshoq bang gi, Garai Gasang lé wó lumjǐng bekô nghut é yanmai, gyai gabú nyi bum akô nghut ri.

*Haq Nhang Pyám Râ Lé A
Dông É Hkyô*

³⁵ Ahkuí, maubó jǎng, tarâ agyi wui gi, "Haú nhik lé nhang pyám aq." ga, htóng

suwún hpô chyáng pyata pé lé taí nhang kat akô.

³⁶ Haú hkûn, htóng suwún hpó gi, "Nungnhik lé nhang pyám aq ga, tarâ agyi wui mai byù nhang kat ri; haú mù, ahkuí, nungnhik gi, ngón za htoq ló lo keq." ga luí, Poluq lé taí ri.

³⁷ Poluq kúm gi, "Nga-nhik gi, Romaq mingdán byú sheq ru nghut le wa, myi gôn wú é hkyô le a bo é, byu pê hí má ngá-nhik lé nhuq bat mù, htóng má hkyô kat kôluí nhing, ahkuí tsik za haq nhang pyám râ dá akô hung lhi? A wó dut, yhangmoq yhang sheq lé shuí htoq yú kó sháng gaq." ga luí, yhangmoq lé tú taí kat ri.

³⁸ Pyata pé gi, tarâ agyi wui lé dang haú pé ló taí kyo kôjǎng, tarâ agyi wui gi, Poluq eq Sila nhik Romaq mingdán byù nghut é hkyô lé wó gyo kôjǎng, gyô gyuq kôluí,

³⁹ yhangmoq yhang, yhangnhik chyáng lé mù, tôngbán luí, shuí htoq yú mù, wà haú mai htoq ló byuq râ matú chôm dúng akô.

⁴⁰ Haú mù, Poluq eq Sila nhik gi, htóng mai htoq ló é htâng, Ludia é yhúm má wang ló akô; haú má, gumang wui eq le hui kômù, yhangmoq lé wum-o byi luí, htoq ló bekô nghut ri.

17

*Htesaloni Wà Mó Má
Mungdang Hko Kyô É Hkyô*

¹ Hau htâng, yhangmoq gi, Amhipoli wà mó eq Apolon

wà mó mai sô lai lô mù, Htesaloni và mó má jé akô. Haú và má gi, Yudaq byu pê é tarajong ralhùm joq ri.

² Poluq gi, yhang lhaq kut nyi é eq rajung za, tarajong má wàng luí, Bánno buinyi sum nyí yhang, Chyúmdang má bo é eq séng mù, yhangmoq eq chòm mîng lhum uchyang.

³ Hkrisduq wuîhke jamjau hui mù, shî bê mai dum dui toq lô râ hkyô lé taí hkoq san kyo luí, "Nungmoq lé, ngò hko kyô nyi é haú Yesuq gi, Hkrisduq nghut lhê." ga taí ri.

⁴ Yudaq byu pé mâ é ram gi, gyô jîng kômù, Poluq eq Sila nhik chyáng lé xoq yu akô; haú eq rajung za, Garai Gasang lé hkunggâ é Grik pé myo myo eq, ahkyak é myiwe wui tsómra myo shoq le, gyô jîng kômù, lé xoq yu akô.

⁵ Nghut kôlhang, a gyô jîng é Yudaq byu pé gi, manôn kôluí, gai mâ é byùgang jùm ram lé lung yù mù, byù moq mó tsîng yù luí, rawa é shuî gabyong kômù, shiwa byu pê é hí má Poluq eq Sila nhik lé wó shuî htoq shit shoq ga, Yason é yhùm má htîm e lô akô.

⁶ Nghut kôlhang, yhangnhik lé a myàng kôjáng, yhangmoq gi, Yason eq gumang wui ram lé, yhangmoq é và suwún wui chyáng lêng she ê kômù, "Mingkan gón lé atau ahú kut é byù shí nhik, ahkuí shî má jé jáng, Yason gi, yhâng é yhùm má lhom hkûlum yu ri.

⁷ Yhangmoq lhunglhang bang gi, Yesuq gâ é hkohkâm

góyuq nyi lhê ga kôluí, hkoséng Kehtaq é tarâ lé lhoq shai é đông kut é bang nghut akô." ga taí garû bum akô.

⁸ Shiwa byu pé eq và suwún wuî gi, dang haú lé wó gyo kôjáng, myit wui myit hke dut nyi bum akô.

⁹ Hau htâng, yhangmoq gi, manghkáng a lhoq htoq râ matú Yason eq góbang lé danggidiq zè byi nhâng mù, nhang pyám bekô nghut ri.

Beria Và Mó Bang, Mungdang Lé Lhom Yu É Hkyô

¹⁰ Haú myîn jáng yhang, gumang wui gi, Poluq eq Sila nhik lé Beria và mó shut nhang kat akô; yhangnhik gi, haú và má jé jáng, Yudaq byu pê é tarajong má wang lô akô nghut ri.

¹¹ Haú Beria và mó byu pé gi, Htesaloni và mó byu pê htoq má je riyhang nhik bo bum akô; haú mù, danglù haú lé gyai ô nau é myit èq hap yù mù, danglù shî teng a têng é hkyô lé wó sé shoq ga, nyí wuî Chyúmdang lé chòm nghap wú nyi akô nghut ri.

¹² Haú mù luí, Yudaq byu pé myo myo gi, lumjîng bum akô, haú eq rajung za, aróng wó é Grik myiwe wui eq yuqgè wui myo myo le, lumjîng bùm bekô nghut ri.

¹³ Poluq gi, Beria và mó má le, Garai Gasâng é mungdang hko kyô nyi é hkyô lé, Htesaloni và mó mâ é Yudaq byu pé sé kôjáng, yhangmoq gi, haú má lé kômù, và byù wui lé mhoq hpyoq luí, gabyông lò nhang akô.

14 Haú hkûn, gumang wui gi, Poluq lé wuimau yàm jé shoq, radá dâm dé kat akô; nghut kôhlang, Sila eq Timohti nhik gi, Beria wà mó má nyi gyó tô akô nghut ri.

15 Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng ló rá matú pying kat é dang lé wun chûng mù, dum taû lò bekô nghut ri.

Poluq, Ahten Myuq Má Nyi É U Lhê Hkyô

16 Ahkuí, Poluq gi, Ahten myuq má haú nhik lé láng nyi tô é u lé, haú wâ má rawa é hparà lhô baú dut tô é lé myàng mù luí, yhang i-myyit gyai yhang a ngón dut byuq ri.

17 Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggâ é Grik pé eq le, gai pé má hui mihui bang eq le, nyí wui taí sân kyô lhûm nyi akô nghut ri.

18 Haú mù luí, Epikuri hpaqchyí eq Sto-i hpaqchyí* lé sê é, myit wú hpaqchyí bo é bang ra-am gi, yhang eq dang chyin chyin lhûm akô; haú hkûn, yhang gi, Yesuq é hkyô eq dum dui toq hkyo é gabú danglù lé hko kyô é yanmai, ra-am gi, "Byù pyok shí yuq gi, haí wá taí nyi lhê lú?" ga; ra-am gi, "Góming hparà pê é hkyô lé taí kyo sù nghut sam ri." ga, taí bum akô nghut ri.

19 Hau htâng, yhangmoq gi, Aripagu gâ é byìn tú wap shut Poluq lé shuí doq ló mù, "Nang mhoqshit é hkyô asik, ngamoq lé sé nhang le a gè lú?"

20 Nang eq taí é maú nhô za gâ é hkyô lé ngamoq wó gyô ri; haú é dang kyîng lé ngamoq sé nau ri." ga taí bum akô.

21 (Ahten byu pé eq haú má nyi é góming byu pé lhunglhâng bang gi, dang sik lù sik haú lé taí kún gyô kún mù, yhangmoq é ahkyîng lé lhoq pán nyi bum akô nghut ri.)

Poluq, Aripagu Zuphpong Má Mungdang Hko É Hkyô

22 Haú u lé, Poluq gi, Aripagu zuphpong má toq yap mù, "Ahten byu pé ê, nungmoq gi, hkyô hkat hkangmó má hparà lhô pé lé gyai yhang dat gyuq hkungga kô é lé, ngò myang ri.

23 Hkâsu mù gâ le, ngò sô lhing wún mù nungmoq jaú é ze pé lé rago wú wú lé, 'A sê é Garaí matú.', ga luí, kâ tô é hkungga gyap ralhum lé myang záng ri; haú nungmoq a sê é za jaú nyi é Garaí hkyô lé, ngò, nungmoq lé hkaí kyo kôlê.

24 Myidàm htoq eq haú má joq mijoq lé hpan tô é Garai Gasang gi, mauhkûng eq myigùng é Yhumsîng le nghut lhê mù luí, byu loq eq saí é noqkuq yhûm má nyi rá a nghut.

* 17:18 Epikuri hpaqchyí gi, htang pyat a joq, ahkuí ngón yû rá za ahkyak gâ é nghut lhê. Sto-i hpaqchyí gi, haí wá dut kôhlang i-myyit zim za kut mù, htang pyat matú chiq a ra gâ é nghut lhê.

²⁵ Yhang gi, byù lhunglhang bang lé asak, soq, ra mira gumjup shoq byi to sù nghut nyi é yanmai, rajung jung râ é sù lé su, byu loq èq dojaù râ sù a nghut.

²⁶ Yhang gi, gunchyung rayuq mai za byuhú chângjup myô lò nhâng mù, myidàm htoq jàm shoq má nyi nhâng luí, yhangmoq é matú hí hí mai ahkyíng yam-yoq eq nyi râ jowò masat to byi bê nghut ri.

²⁷ Yhang gi, nga-nhúng yuq hkgámó eq a we to kôle, byu pé yhang lé châng hô mù, myang hô kó sháng gaq ga shí hkyô lé kut é nghut ri.

²⁸ Hkâsu mù gâ le, nung-moq é jihkyang kat bang, 'Nga-nhúng le yhang é awut ashîn pé nghut nyi lhê.' ga taí tô bum é eq rajung za, nga-nhúng gi, Yhang é yanmai wó nyi, wó dui é eq ísu wó dut é nghut lhê.

²⁹ Haù mù, nga-nhúng gi, Garai Gasâng é yhangzô pé nghut nyi é yanmai, Garai gùng gi, byu é hpaqchyí loq èq kyûng kê tô é híng, ngùn, luqgok pé eq pûng lhê nghu luí hkâ-myt yù kó.

³⁰ Laí lò bê haù myoq a bóng shi é pyat lé, Garai Gasang gi, haí le a ga lhai pyâm to kôlhang, ahkuí gi, jowò hkgámó mâ é byù lhunglhang bang lé, myit lhiêng keq ga hkunmó hkyô to bê nghut ri.

³¹ Hkâsu mù gâ le, Yhang hkyin to sù mai mingkan gón lé tara é dông jéyáng râ buinyi

ra-nyí masat to bê nghut ri. Shí hkyô lé, byù lhunglhang bâng é hí má wó lum é saksé dut sháng gaq ga, Yhang haù yuq lé shi é mai lhoq dui toq yú bê nghut ri." ga taí ri.

³² Shí é mai dum dui toq lo é hkyô lé wó gyô bùm kôjáng, ra-am gi, taí hpoí pyám byi akô; ra-am kúm gi, "Nàng shí hkyô taí é lé ngamoq dum gyô wú nau ashí." ga taí akô.

³³ Hau htâng, Poluq gi, haù zuphpong mai htoq ló byuq bê nghut ri.

³⁴ Nghut kôlhang, byù ra-am gi, Poluq é htâng cháng kômù, lumjíng bang dut bekô nghut ri. Haù bang má, Aripagu zuphpong má bo é Dionisi ga sù le bo ri. Hau htoq agó, Damari gâ é myiwe rayuq eq gotú byu pé le, bo bum akô nghut ri.

18

Poluq, Korinhtuq Myuq Má Nyi É U Lhê Hkyô

¹ Hau htâng má, Poluq gi, Ahten myuq mai htoq luí, Korinhtuq myuq má jé lo ri.

² Haù má, yhang gi, Romaq myuq mai Yudaq byù lhunglhang bang htoq ló byuq râ dut lhê ga, hkohkâm Klodi èq hkunmó hkyô é yanmai, a myáng shi lé Itali ming mai yhangmyi Priskila eq htoq jé lo é, Pontuq mau byù nghut é, Akula gâ é Yudaq byù rayuq lé hui luí, yhangnhik chyáng ê ri.

³ Yhangmoq gi, jonghpang saí zo bang chyat nghut kô é yanmai, muzó pûng kôluí,

Poluq gi, yhangnhik eq rahá nyi nyi mù, muzó chôm sai akô.

4 Bánno buinyi hkangmó, Poluq gi, tarajong má Yudaq byu eq, Grik pé lé, tai sân kyo lui, lhoq pun lhoq kyíng yu ri.

5 Ahkuí, Sila eq Timohti nhik Makedoni mau mai châng jé jáng, Poluq gi, mungdang hkô hkyô má za wum kat lui, haú Yesuq gi, Hkrisduq yhang nghut lhê ga, Yudaq byu pé lé saksé hkâm kyô ri.

6 Nghut kôlháng, Yudaq byu pé gi, lhom he-ngik pyám kômù, yhang lé rhoi dang tai pyám akô; haú mù, Poluq gi, yhâng mebu ko shit é dông yhangmoq lé a nau é hkyô tân shit uchyang, "Nungmoq é sui mara gi, nungmoq é ulhum má jé sháng gaq, ngò eq haí a séng lo; ahkuí mai, ngò gi, tûngbau pé chyáng e ló berâ nghut lhê." ga lui, yhangmoq lé tai ri.

7 Hau htâng, yhang gi, tarajong mai htoq lui, jong haú eq yhep nghut é, Garai Gasang lé noqkuq é Titu Yustu ga su é yhum má wang ló ri.

8 Krispu gâ é tarajong má up sù gi, yhâng yhumbyù lhunglhâng bang eq rahá, Yhumsing lé lumjíng akô. Korinhtuq myuq byu pé myo myo le, Poluq é dang lé gyô yù mù, lumjíng lui, wui-myhup hkâm yu bum akô nghut ri.

9 Ra-myìn lé, shing-rán rahum má Yhumsing mai Poluq lé tai é gi, "Hkâgyuq, tai aq, zim za hkâ-nyí.

10 Ngò nàng eq rahá nghut nyi lhê, nàng lé ó yuq eq le haí wó kut râ a nghut, hkâsu mù gâ le, myuq shí má, ngá é byù myo myo nyi bum lhê." gâ ri.

11 Haú mù lui, Poluq gi, Garai Gasang é mungdang mhoqshit uchyang, razàn eq lhamó hkyuq hkyap yhang, haú myuq má nyi nyi ri.

12 Galio ga sù, Ahkaia mau má é ginwáng zau kut nyi é u lé, Yudaq byu pé gi, myit rahkat zâ eq Poluq lé chôm chyup yù kôlui, tarâ hpyit wap má she háng kômù,

13 "Byù shí yuq gi, jep é tarâ eq shai lhùm é dông, Garai Gasang lé noqkuq râ matú, byu pé lé mhoq hpyoq wún ri." ga mara hún akô.

14 Haú hkûn, Poluq tû tai râ dâ lò jáng, Galio gi, Yudaq byu pé lé, "Yudaq byu pé é, muzó shí gi, tarâ lu lai é muzó, haú a nghut jáng, agè ashop é muzó mai, dut lo é nghut le gi, nungmoq lé ngò gyo byi râ hkyô joq lhê.

15 Nghut kôlháng, muzó shí gi, nungmoq é tarâ eq séng lui, dang eq séng lui, myìng eq séng lui, tai lhum kô é hkyô nghut é yanmai, nungmoq yhang ru ló hpyit lhum keq. Haú sù é muzó má, ngò gi, tarâ agyi kut byi râ a nghut." ga tai mù,

16 tarâ hpyit wap mai yhangmoq lé hkat htoq pyám nhang ri.

17 Haú hkûn, yhangmoq lhunglhâng bang gi, tarajong má up sù Sositeni lé chyup yù mù, tarâ hpyit wap hí má

chôm bat akô. Galio kúm gi, haú hkyô lé hai gùn a kut byi nghut ri.

Poluq, Antioku Wà Mó Má Dum Taú Jé É hkyô

18 Poluq gi, Korinhtuq myuq má buinyì tsómra myáng shoq lumjǐng bang eq nyi nyi ri. Hau htâng, yang gi, haú bang lé shi-kyâm to luí, Priskila eq Akula nhik lé byinzùm kut mù, lhai ji luí Suriq mau shut e ló akô. Hau hí má, yang gi, danggidiq tô tô é yanmai, Kenhkrea wà má xâm nyhâm pyâm ri.*

19 Yhangmoq Ehpesu myuq má jé kô é hkûn, Poluq gi, Priskila eq Akula nhik lé nyhi pyâm to luí, yang baú tarajong má wàng mù, Yudaq byu pé lé taí sán kyo byi ri.

20 Haú mâ é bang gi, yangmoq eq rahá rayoq zo nyi shi râ dông yang lé dung kô é nghut kôlhang, yang gi, a nhô lo nghut ri.

21 Haú mù, yang gi, Ehpesu myuq mai lhai ji mù htoq ló uchyang, "Garai Gasang ô nau é hkyô nghut le gi, ngò nungmoq chyáng dum jé lé râ nghut lhê." ga, yangmoq lé danggidiq byi tô ri.

22 Ahkuí, Poluq gi, Kesare wà mó má ló jé dap jáng, Yerusalem wà mó shut doq ló mù, noqkuq hpúng lé ló huí tô é htâng, Antioku wà mó má dum gyó ló ri.

23 Yhang gi, haú wà má rayoq zo nyi é htâng, htoq ló mù, Galatiq mau eq Hprugi mau mai sô lai ló uchyang, rawa htâng rawà mâ é chángzô pé lé wum-o lhoq ging byi ri.

Apolo Zui Saí É Muzó

24 Ahkuí, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyí bò sù nghut é htoq agó, Chyúmdang le gyai kûng é sù nghut ri.

25 Yhang gi, Yohan é bap-tisma hkyô lé za sé sù nghut kôlhang, Yhumsing é hkyô lé mhoq yû bê nghut luí, Yesuq é hkyô pé lé mhoq yu to bê eq rajung za wum zuq tung ga luí, hkyak hkyak mhoqshit byi ri.

26 Ahkuí, yang gi, gyuq kyûm myit a bo é za tarajong má taí hi ló ri. Haú hkûn, Priskila eq Akula nhik gi, haú lé wó gyo kôjáng, yang lé ji yù mù, Garai Gasâng é mung-dang hkyô lé azó tung taí sán kyo byi akô nghut ri.

27 Apolo gi, Ahkaia mau shut dap e ló nau é hkûn, gumang wui gi, yang lé wum saí byi mù, yang lé lhom hkûlum yù râ matú, chángzô pé chyáng laiká ká byi kat akô; yang gi, jé jáng, Garai Gasâng jeju mai lumjǐng bê bang lé, gyai yang wó garúm sù dut bê nghut ri.

* 18:18 Xâm nyhâm pyâm é gi, Yudaq htùng dông rajung jung kut râ matú danggidiq to luí, haú lé ban kut jáng, yhumsing xâm lé nyhâm pyâm é nghut lhê.

28 Hkâsu mù gâ le, yhang mai, Yesuq gi, Hkrisduq yhang nghut nyi ri ga luî Chyúmdang má tân shit uchyang, byu pê hí má Yudaq byu pé lé, wum kat wó taí ung pyâm é yanmai nghut ri.

19

Poluq, Ehpesu Myuq Má Nyi U Lhê Hkyô

1 Ahkuî, Apolo gi, Korinhtuq myuq má nyi tô é hkûn, Poluq gi, mau káng mai sô laí ló mù, Ehpesu myuq má jé ri. Haú má, yhang gi, chángzô pé ra-am eq hui luî,

2 yhangmoq lé, "Nungmoq gi, lumjǐng é hkûn, Chyoiyúng Woi-nyí lé, wó yû bekô lhú?" ga myí ri.

Haú hkûn, yhangmoq gi, "Chyoiyúng Woi-nyí nyi lhê gâ é lháng, ngamoq a wó gyô wú." ga tú taí akô.

3 Haú mù, Poluq gi, "Haú nghut jáng, nungmoq gi, haí jung baptisma hkam yû kô é lhú?" ga luî, yhangmoq lé myi jáng, yhangmoq gi, "Yohan é baptisma hkam yu é nghut lhê." ga tú taí akô.

4 Haú hkûn, Poluq gi, "Yohan é baptisma nghu é gi, myit lhíng mù wui-myhup hkâm yu é hkyô lé gâ lhê. Yohan gi, yhang é htâng má jé lé râ sù, haú Yesuq lé sheq lumjǐng râ lhê ga shiwa byu pé lé taí ri." ga taí ri.

5 Yhangmoq gi, dang haú lé wó gyo kôjáng, Yesuq é myǐng lang luî baptisma byí é lé, hkam yu bum akô.

6 Poluq gi, yhangmoq é htoq má loq ke byi jáng, haú Chyoiyúng Woi-nyí gi, yhangmoq htoq má jé lé mù, yhangmoq gi, laklaí dang nyo lo é htoq agó myiqhtoi le htoi lo bum akô.

7 Haú bang lhunglháng gi, yuqgè raxe í yuq kó nghut ri.

8 Hau htâng, Poluq gi, tarajong má wàng luí, gyuq kyûm myit a bo é za lhamó sum hkyap Garai Gasâng é mingdán hkyô lé taí sân kyo mù, lhoq pun lhoq kyǐng yu ri.

9 Nghut kôlháng, ra-am gi, myit htan lo bùm kôluí a kâm lumjǐng kô é htoq agó, haú Yhumsing é Hkyô lé byu pê hí má lhoq hpoî pyâm byi kôjáng, Poluq gi, yhangmoq chyáng mai htoq luí, chángzô pé lé shuí chùng mù, Turanu gá su é hpaqchyî mhoq jong má, nyí wuî taí sân kyô lhùm nyi akô.

10 Haú su kut í zân yhang mhoqshit nyi é yanmai, Asia mau gón mâ é Yudaq byu pé eq Grik pé lhunglháng bang gi, Yhumsing é mungdang lé wó gyô yu bum akô nghut ri.

Skewa É Yhangzo Nyhit Yuq É Hkyô

11 Garai Gasang gi, Poluq é loq dông laklaí kumlhá kut ri.

12 Haú mù, Poluq chyáng mâ é hpajet eq hpyihit rajung jung lé, nò bâng chyáng yu ló mù, ló záng byi jáng lháng, yhangmoq é nõhpyo ge ló byuq é eq, agè ashop é nat pé lé yhangmoq chyáng mai htoq ló byuq bum akô.

13 Haú u lé, nat hkat htoq wun é Yudaq byu pé ra-am gi, agè ashop é nat pé lé, "Poluq hko taí é Yesuq é myìng mai, ngò, nungmoq lé hkat htoq lhê." ga, agè ashop é nat wang júng to bâng é ahtoq má, Yhumsing Yesuq é myìng lé lang luí, hkat chyam wú akò.

14 Skewa gâ é, Yudaq hkyangjong agyì rayuq é yuqzo nyhit yuq le haú su kut wun akò.

15 Ra-nyí lé, agè ashop é nat gi, yhangmoq lé, "Yesuq lé ngò sê lhê; Poluq é hkyô lé le ngò sê lhê; nghut kôlhang, nungmoq gi, ó pé nghut akò?" ga tú taí mù,

16 agè ashop é nat haú wang júng é byù gi, yhangmoq htoq má byam doq jì to luí, nhuq bat yù mù yhangmoq lé ung pyâm ri. Yhangmoq gi, yhùm haú mai gùngchîn sui nê yang yang hpang htoq ló bekò nghut ri.

17 Haú hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglhang bang gi, chôm gyô gyuq bum akò. Yhumsing Yesuq é myìng gi, hkyá-on lhoq toq é huí bê nghut ri.

18 Lumjínng bê bang myo myo gi, lé mù, yhumsing kut shut é agè ashop hkyô lé, myo myô hí má yín yu akò.

19 Myoqheq hpaqchyí kut zô é bang le, yhangmoq é laiká lé yu lé kôluí, shiwa byu pé hí má nyhê hkyô pyâm akò. Mausau haú pé é ahpau lé sôn wú le, ngùn chap ngo mun

záng ri.

20 Haú đông mai, haú Yhumsing é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

21 Shí pé ban dut lai htâng má, Poluq gi, Makedoni mau eq Ahkaia mau đông sô lai lò mù, Yerusalem wà mó má lò jé râ ga myit hpyit yù luí, "Haú má lò jé tô é htâng má, ngò, Romaq myuq má le, jé wú râ dut ashí." ga taí ri.

22 Haú mù, yhang lé htuqbang garúm é Timohti eq Erastu nhik lé hí Makedoni mau shut nhang kat luí, yhang gi, Asia mau má rayoq rabun zo nyi gyó tô ri.

23 Haú yoq lé, haú Yhumsing é Hkyô yanmai gyai yhang gabyông lo bum akò.

24 Demetri gâ é ngùn bat zo sù rayuq gi, Artemi hpara é ngùn yhùm zông zo sai luí, mù sai luzúm wuí lé wó sùt nhang nyi ri.

25 Yhang gi, yhâng é ngùn bat zo luzúm wuí eq haú jung amù kut é góbang lé le jì tsing to mù, taí é gi, "Luzúm wuí é, muzó shílhùm é yanmai, nganhúng nyi ngón yuqyo nyi é hkyô lé, nungmoq sê lhê.

26 Nghut kôle, ahkuí gi, Ehpesu myuq má za le a nghut lo, Asia mau lhang aluq jam shoq, byu loq èq sai é zè lé, garaí pé a nghut ga, shí Poluq ga sù mai byù myo myo lé mhoq hpyoq yù mù, hkyô shuílhoq nghoq nyi é hkyô lé,

nungmoq wó myâng, wó gyô nyi akô.

²⁷ Haû mù luí, nga-nhông é muzó shî gi, hpoi byuq râ lé chiq râ é za a nghut, hparà myhí mó Artemi é noqkuq yhûm gi, haí a dut byuq luí, Asia mau gón eq mingkan gón mai noq é hparà myhí é shingkang hpoi byuq râ lé le myit chiq râ dut bê." gâ ri.

²⁸ Yhangmoq gi, dang haû lé wó gyô bùm kôjáng, nhik mó gyô yo kôluí, "Ehpesu myuq byu pé é Artemi gi, kô nyi sháng gaq ô!" ga chôm garû bum akô.

²⁹ Hkâ-myháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aristakuq nhik lé chyup she yù mù, yhangmoq é poi wàng mó shut radá dâm chýn chyap wang ló bum akô.

³⁰ Poluq gi, moq hpúng hau hí má htoq shit naú kôlhang, chángzô pé gi, yhang lé a wàng nhâng kó nghut ri.

³¹ Poluq é luzúm wuí nghut é, haú mau mâ é suwún wuí ra-am lhang, yhang lé poi wàng hkaû má a ê râ matú, hkûm pyám nhang akô nghut ri.

³² Zíng tô é bang gi, hai hú háng le a sé lo dut byuq kômù luí, ra-am rajung ga garû bum akô. Myo mi-myô gi, haí mù luí yhangmoq haú má nyi tô é lé lhang a sê bùm kó nghut ri.

³³ Yudaq byu pé gi, Alexander lé hí má chôm chýn htoq kat kôluí, shiwa hpong

mai ra-am gi, yhang hká dông taí râ hkyô lé mhoq byi kat akô. Alesander le shiwa hpong lé taí san kyo naú luí, zim byuq râ matú loq tu ri.

³⁴ Nghut kôlhang, Alexander, Yudaq byù nghut é lé sé kôjáng, yhangmoq lhunglhang bang gi, rahtê za kut kôluí, "Ehpesu myuq byu pé é Artemi gi, kô nyi sháng gaq ô!" ga hkyíng hkum í hkum kô garû bum akô.

³⁵ Haû, myuq chyare hpó gi, shiwa moq mó lé lhoq zim luí taí é gi, "Ehpesu myuq byu pé ê, Ehpesu myuq shí gi, Artemi myhí mó é noqkuq yhûm eq mauhkûng mai byit gyó lo é yhâng é alhô lé, wú zúng nyi é wà nghut é hkyô lé, mingkan má a sê é ó yuq wa nyi lhê lhu?

³⁶ Haû mù luí, shí hkyô pé gi, wó he pyâm jung a nghut é yanmai, zim za nyi le ge lhê, hân so hân dùn hkâkut ko.

³⁷ Shí nhik gi, noqkuq yhûm lé hpyoq zo su nhik le a nghut, nga-nhông é hparà myhí lé lhoq hpoi su nhik le a nghut kô é le nhîng, nungmoq shuî lé bekô nghut ri.

³⁸ Demetri eq yhâng é ngùn bat zo luzúm wuí gi, rayuq yuq é ahtoq má mara hûn râ hkyô joq kô é nghut jáng, tarâ rûng pé hpông tô lhê. Tarâ agyì pé nyi lhê. Haú má yhangmoq ê kó sháng gaq.

³⁹ Nungmoq taí nau é gó hkyô rajung jung joq é nghut le kúm gi, tarâ wang zuph-pong mó má chôm taí pyám râ nghut lhê.

⁴⁰ Hkû-nyí gabyông é mû shí má, mû htoq wang a bo é yan-mai, nga-nhúng lé mara hùn râ chiq râ ri. Shí su kut chôm míng é hkyô lé, hai é yanmai nghut lhê nghû, nga-nhúng a wó taí kyo nghut ri." gâ ri.

⁴¹ Shí pé ban taí é htâng má, yhang gi, shiwa moq mó lé lhoq pyo kat bê nghut ri.

20

Makedoni Mau Éq Grik Mau Đông Lai Lô É U Lhê Hkyô

¹ Haû gabyông é hkyô zîm byuq é htâng má, Poluq gi, chángzô pé lé ji yù luí, yhang-moq lé wum byi dang taí to mù, shi-kyâm to luí, Makedoni mau shut htoq e lô bê nghut ri.

² Yhang gi, haû mau mai sô lai lô uchyang, byu pé lé wum byí é dang myo myo taí luí, Grik mau má lô jé bê.

³ Yhang haû má lhamó sum hkyap nyi yù mù, lhai ji luí Suriq mau shut ê râ hen nyi é hkûn, Yudaq byu pé gi, yhang lé gyám nyí kô é yan-mai, yhang gi, Makedoni mau đông tau lò râ lé myit hpyit bê nghut ri.

⁴ Yhang eq rabyìn za châng é bang gi, Beria và mó mâ é Purú yhangzo Sopata, Htesaloni và mó mâ é Aristakuq eq Sekundu nhik, Derbe và mó mâ é Ge-u, Timohti, Asia mau mâ é Tuhkiku eq Trohpimu nhik pé nghut akô.

⁵ Yhangmoq gi, hí so lánq luí, ngá-nhik lé Troa myuq má lô lánq nyi akô.

⁶ Nghut kôlhang, ngá-nhik gi, Azuma Poî* lai é htâng má, Hpilipi và mó mai lhai ji lô le, ngo nyí nghû jánq, Troa myuq má yhangmoq lé hui luí, haû má nyhit nyí chôm nyi é nghut lhê.

Troa Và Má, Utuhku Ga Sû Lhoq Tui Toq Huí É Hkyô

⁷ Rabat é sâng-hi nyí lé, ngamoq gi, muk hpê gâm râ matú lé chôm zup zîng tô é hkûn, Poluq gi, htang nyí lô byuq râ ga hen tô é yan-mai, chángzô pé lé gunggâm jé shoq hko kyô nyi ri.

⁸ Ngamoq zup zîng nyi é haû ahtoq pyâm wap má, myibung myo myo le duq tô ri.

⁹ Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haû yuq gi, yhupmó myi byuq luí, yhúm sum tsáng mai byit gyó mù, yhang lé bún toq wú le shi byuq bê nghut ri.

¹⁰ Haû hkûn, Poluq gi, gyó lô mù, po ngop to luí, "Hkâdân ko, yhang soq bo ashî." ga taí ri.

¹¹ Haû mù, yhang gi, dum tau doq lô luí, muk lé hpé mù, zo luí, maubó shoq yhang-moq eq dang nyo kún mù htoq lô bê nghut ri.

¹² Zorâm zo haû lé duì gù shuí lô kômù, nhik tîng é gyai yhang hui bekô nghut ri.

* 20:6 Múnchi a bo é Muk zo Poí lé, Azuma Poí le gâ lhê.

Troa Wà Eq Melitu Wà Gyoro Mâ É Hkyowui

¹³ Poluq gi, myì hkyô lô râ matú hen tô é yanmai, yhang lajang byì é eq rajung za, yhang lé Asu wà má lhaì lhom shuì ji râ matú, ngamoq gi, lhaì ji mù hí lô láng bê nghut lhê.

¹⁴ Haù mù, yhang gi, Asu wà má ngamoq eq hui luì, ngamoq gi, yhang lé lhaì má shuì jì chùng mù, Mitulene myuq shut e lô bê.

¹⁵ Htang nyi, ngamoq gi, haù mai lhaì ji mù, Kiu zinlóng yâm mai laì lô luì, hau htang nyí gi, Samu zinlóng má laì dap lô luì, htang nyí gi, Melitu wà mó má jé lô bê nghut lhê.

¹⁶ Poluq gi, wó dut é nghut jáng, Penteko-ti buinyì lé Yerusalem wà mó má wó jé shoq gâ é yanmai, Asia mau má buinyì a kâm lhoq htum naù mù luì, Ehpesu myuq lé lhaì pyâm to râ matú, myit hpyit to bê nghut ri.

Ehpesu Hpúng Suwún Wuí Lé, Poluq Shi-kyâm Tô É Dang

¹⁷ Poluq gi, Melitu wà mó mai Ehpesu shut byù nhang kat luì, hpúng suwún wuì lé é jì nhang ri.

¹⁸ Haù bang jé lé kôjáng, yhang yhangmoq lé taì é gi, "Ngò, Asia mau má sâng-hi jé é buinyì mai, nungmoq eq hkâsu kut nyi nyi é ahkyíng banshoq lé le;

¹⁹ Yudaq byu pé jeq hô luì, ngò wuìhke jamjau hui zo kôlhang, haù Yhumsing é

muzó lé, ngò myit gyai lhoq nyhùm é eq ngaubyi ngaù nhap é eq wùn waq é hkyô lé le;

²⁰ nungmoq é matú akyû bo é hkyô banshoq lé, a myhit to loshoq taì é hkyô lé le; shiwa byu pé hí eq rayhùm htâng rayhùm má ngò nungmoq lé mhoqshit é hkyô lé le;

²¹ ngò gi, Yudaq byu pé eq Grik pé lé, myit lhíng mù Garai Gasâng chyáng lhing lò ra eq, nga-nhùng é Yhumsîng Yesuq lé lumjîng ra hkyô lé, saksé hkâm kyo lugù nghut bê lé le, nungmoq sé nyi akô.

²² Ahkuì, ngò gi, Woi-nyí má tuì tô é hui bê yanmai, Yerusalem wà mó má e lô lhê; haù má, ngò haì lô dut râ lé kúm gi, a sé nghut ri.

²³ Ngò gi, htóng eq wuìhke jamjau hkyô ngo lé láng tô ri ga, wà hkangmó má Chyoiyúng Woi-nyí eq lhoq pùn é hkyô lé za sê nyi lhê.

²⁴ Nghut kôlhang, ngò gi, òn râ hkyô ban òn râ eq, Garai Gasâng jeju eq sêng é gabú danglù lé saksé hkâm râ matú, Yhumsîng Yesuq ngo lé byi tô é muzó lé ban wùn waq râ za nghut jáng, ngá asak lé ratsuí le a myit ha lô é nghut lhê.

²⁵ Garai Gasâng é mingdán hkyô lé hko kyô wùn é hkùn, ngò eq hui é nungmoq lunglhang bang gi, htâng nùng má ngo lé a myàng lo kó râ nghut é lé, ahkuì ngò sê to bê.

²⁶ Haù mù luì, ó yuq nghut kôlhang, yubak mara má shi byuq lô é nghut le, haù yuq é

sui chyin gi, ngò má a dap lô é hkyô lé, hkû-nyí, ngò saksé hkám tô lhê.

²⁷ Hkâsu mù gâ le, Garai Gasang ô nau é hkyô banshoq nungmoq lé hko kyo râ matú, ngò zaú tô é hkyô a joq wú é yanmai nghut lhê.

²⁸ Nungmoq gi, yhumsing gùng lé le, nungmoq lé Chyoiyúng Woi-nyí èq up zúng nhang é sau hpúng† lhunglhang lé le, zúng nyí keq. Garai Gasang Yhâng suí èq wui tô é noqkuq hpúng lé le, rém zúng nyí keq.

²⁹ Ngò ló byuq é htâng má, sau hpúng lé a shogyô é, ashop é wamhkuí gi, nungmoq chyáng jé râ nghut é hkyô lé, ngò sê lhê.

³⁰ Hau htoq agó, chángzô pé lé wó mhoq hpyoq yú shoq ga, shut é đông taí é byu pé lhang nungmoq chyáng mai htoq lô râ nghut lhê.

³¹ Haú mù luí, nungmoq yuq hkangmó lé, ngò sum zân tup ngaubyi ngau-nhap eq nyí myín a hkying loshoq, lhoq pun lhoq kyíng tô é dang pé lé, nungmoq gi, myit bun mù machya nyí keq.

³² Ahkuí, ngò gi, nungmoq lé, Garai Gasang chyáng le, nungmoq lé wó lhoq ging lhoq títng mù, lhoq chyoiyúng é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê.

³³ Ngò gi, ó yuq é hîng, ngùn, mebu pé lé le a myoqnoq wú.

³⁴ Ngá é loq shí í loq gi, ngò

eq ngá htâng châng é bang ra châ é lé kut byi bê hkyô lé, nungmoq yhang sé gû nghut lhê.

³⁵ Ngò kut é muzó banshoq gi, nungmoq é alik dut bê nghut luí, shí su kut shikut é đông mai, nga-nhúng gi, wum-o nyhóm bang lé htuq bang luí, 'Lhom yu é htoq má byí é gi, je riyhang hkungsô wó nyi ri.' ga luí, Yhumsing Yesuq taí é dang lé bún nyí sháng." gâ ri.

³⁶ Poluq gi, haú su ga ban taí jáng, hkyihput htuq mù, yhangmoq lhunglhang bang eq rahá za kyúdúng ri.

³⁷ Yhangmoq lhunglhang bang gi, yhang lé po to luí, bopuq puq mù, chôm ngau akô.

³⁸ Htâng nùng má, yhang lé dum myàng râ a nghut lo gâ é dang yanmai, yhangmoq gi, je riyhang yón kuq bum akô. Yhang lé, lhai má jé shoq lé châng dé kat akô nghut ri.

21

Yerusalem Wà Mó Shut Doq Ló Nyi É U Lhê Hkyô

¹ Ngamoq gi, yhangmoq lé kang pyâm to luí, lhai jí chúng mù, nyàng za Kusa zinlóng má jé é nghut lhê. Hau htang nyí gi, Rode zinlóng má jé mù, haú mai Patara wà má dum jé bê.

² Haú wâ má Hpinisi mau shut dap ló é lhai lé, ngamoq myàng luí, haú mai chôm jí chúng bê.

† 20:28 Sau hpúng gâ é gi, lumjíng é bang lé gâ lhê.

³ Haú hkûn, ngamoq gi, Kupru zinlóng lé myàng jáng, hau é loqyo hkyam đông lái ló luí, Suriq mau shut e ló le, hpugá zê lé hkyó râ matú, Turuq myuq má nô é nghut lhê.

⁴ Haú wâ má, chángzô pé lé myang hô luí, yhangmoq chyáng nyhit nyí bíng yu é. Chángzo haú bang gi, Chyoiyúng Woi-nyí eq lhoq pún é đông Poluq lé Yerusalem và mó shut a ló râ matú, chôm hkûm akô.

⁵ Nghut kôlhang, nyhit nyí haú lai jáng, ngamoq gi, ngamoq é hkyowuì shut dum xoq sô htoq ló bê. Chángzô pé lhunglhang bang gi, yhangmoq é myi zo wuì eq rahá, ngamoq lé và shinggan jé shoq châng dé kôluí, ngamoq gi, yhangmoq eq rahá wuiyàm má hkyihput htuq mù, kyù chôm dung bê nghut lhê.

⁶ Hau htâng, rayuq eq rayuq ban shi-kyâm lhum jáng, ngamoq gi, lhai má wàng bê; yhangmoq gi, yhûm shut dum tau ló byuq bekô nghut ri.

⁷ Ngamoq gi, Turuq myuq mai lhai jî chùng mù, Toleme và má jé ló bê. Ngamoq gi, haú wâ má é gumang wuì lé shichyên yù mù, yhangmoq eq rahá ra-nyí chôm nyi kûn é nghut lhê.

⁸ Htang nyí gi, ngamoq haú wâ mai htoq ló mù, Kesare và mó má dum jé bê. Haú wâ má, haú htuqluq htuqbang nyhit yuq* má bò sù, gabú

danglù hko taí é Hpilip gá su é yhûm má, ngamoq wang bíng bê nghut lhê.

⁹ Yhang gi, yhang hku tô é byizo zomyi myiqhtoi myi yuq wó ri.

¹⁰ Ngamoq gi, haú yhûm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri.

¹¹ Yhang gi, ngamoq chyáng jé lé luí, Poluq é hpyihit lé yù mù, yhânggùng yhang loq eq hkyí pé má tui mù luí, taí é gi, "'Shî hpyihit yhumsîng lé, Yerusalem và mó má é Yudaq byu pé mai shî su kut lhom tui luí, tûngbàu pé é loq má ap pyám kó râ nghut lhê;' ga luí, Chyoiyúng Woi-nyí taí ri." gâ ri.

¹² Dang haú lé wó gyo jáng, haú má é bang eq ngamoq gi, Poluq lé Yerusalem và mó má a doq ló râ matú, gyai yhang chôm hkúm bê nghut lhê.

¹³ Nghut kôlhang, Poluq gi, "Nungmoq gi, hai mù luí ngaubyi ngau-nhap kut é eq, ngo lé myit wum gyui râ đông kut nyi akô lú? Ngò gi, Yhumsîng Yesuq é yanmai, Yerusalem và mó má, tui é hui râ za a nghut, shî hkâm râ matú le rì rì nghut lhê." ga tui taí pyâm ri.

¹⁴ Yhang lé wó taí hkúm râ su a dut lo jáng, ngamoq gi, "Garai Gasang ô nau é đông nghut sháng gaq." nghu luí, zim za chôm nyi bùm bê.

¹⁵ Hau htâng má, ngamoq gi, zè món chùng mù

* 21:8 Lagyo 6:1-6

Yerusalem wà mó shut doq ló bê nghut lhê.

¹⁶ Kesare wà mó mâ é chángzô pé ra-am le, ngamoq eq rabyìn za nghut kôluí, yhangmoq gi, ngamoq lé Kupru byù Manason ga sũ, hí hí lhê é chángzo rayuq é yhùm má shuí ló mù, yhâng chyáng bíng nhang akô.

Yerusalem Wà Mó Má, Yakuq Lé Ê Huí É Hkyô

¹⁷ Yerusalem wà mó má ngamoq jé é hkûn, gumang wuì gi, ngamoq lé gabú tung lhom hkûlum yu akô.

¹⁸ Htang nyí, Poluq eq ngamoq gi, Yakuq lé ê huí le, hpúng suwún wuì le zîng nyi tó láng akô.

¹⁹ Poluq gi, yhangmoq eq ban shichyen jáng, yhang wùn waq lai lo é hpúng mù dông mai, Garai Gasâng èq tûngbaù pé chyáng kut byi bê hkyô pé lé, jihkùm nuqguq shit kyô ri.

²⁰ Yhangmoq gi, haù lé wó gyo kôjáng, Garai Gasang lé hkya-ôn akô. Hau htâng, Poluq lé taí kô é gi, "Âmang ê, Yudaq byu pé má lumjîng é bang hkâ-myhó hkyîng mun nghut bê lé, nàng sê lhê. Haù bang lhunglhâng gi, jep é tarâ má myit zuq to bê bang chyat nghut bum akô.

²¹ Nghut kôlhang, yhangmoq lhunglhâng bang gi, tûngbaù pé chyáng nyó lûng tô é Yudaq byù banshoq bang lé, nàng, yhumsing yhangzo yhangshù pé é matú ahpoykuq hpyit a ra nghu é eq nganhûng é htûng tarâ lé châng

nyì a ra nghu luí, Mosheq é tarâ lé tô pyám rã dông mhoqshit ri gã é dang lé, wó gyô yu bùm bekô nghut ri.

²² Nàng jé bê hkyô lé, yhangmoq wó gyo berã za nghut lhê. Ahkuí, ngamoq hkâsu kut lo rã lúh?

²³ Haù mù, ngamoq taí é dông kut aq, ngamoq chyáng danggidiq mó byi bê byù myi yuq nyi lhê.

²⁴ Nàng gi, haù bang lé ji yù mù, yhangmoq eq rahá lhoq san lhoq yúng yû aq, yhangmoq lé u wó wuq yù rã matú, ahpau le htoq byi aq. Haù hkûn sheq, byù lhunglhâng bang gi, yhangmoq wó gyô tô é hkyô a têng byuq é eq, nàng yhang lháng, jep é tarâ lé, châng kut nyì sũ nghut é hkyô lé, sé kó rã nghut lhê.

²⁵ Lumjîng é tûngbaù pé é matú kùm gi, hparã lhô pé lé tîng byi é zoshuq, sui, lingzing mai myhik sat é dusak sho eq ashop é dông gungsho zùm yap é hkyô pé lé, yhangmoq koi pyám rã matú, ngamoq chôm doqdan luí, kã hùn kat bê nghut lhê." ga akô.

²⁶ Haù mù luí, Poluq gi, hau htang nyí haù bang lé ji yù luí, yhangmoq eq rahá, lhoq san lhoq yúng yû mù, noqkuq yhùm má wàng luí, yhangmoq yuq hkanmó é matú hkungga wó byi shoq ga, yhangmoq é lhoq san lhoq yúng buinyì ngap bê hkyô lé, taí kyô ri.

Poluq Chyup Yû Huí É Hkyô

27 Buinyì nyhit nyí haù ngap rã yàm má, Asia mau mã é Yudaq byu pé ra-am gi, noqkuq yhùm mã Poluq lé myàng kômù, shiwa byu pé lé shuí gabyong luí, yhang lé chyup yú mù, garú taí kô é dang gi,

28 "Israelaq byu pé ê, garúm yú keq, shí yuq gi, nga-nhùng byuhú lé le, jep é tarã lé le, jowò shí lé le, shut shai é dông jowò hkangmó mã é byù ban-shoq lé mhoqshit sù nghut ri. Hau htoq agó, noqkuq yhùm mã Grik pé lé shuí háng é eq, chyoyúng jowò shí lé achaq achyut kut é sù nghut ri." gã akô.

29 (Hkãsu mù gã le, yhang-moq gi, Ehpesu myuq byù Trohpimu ga sù eq Poluq wã hkaù mã rahá nghut kô é lé, myàng kômù, haù yuq lé no-qkuq yhùm shut shuí háng nhô ngam pyám kô é yanmai nghut ri.)

30 Rawà gón gabyông lo mù, shiwa byu pé lhinghkyuq mai din lé lô kôluí, Poluq lé chyup zing to uchyang, noqkuq yhùm shinggan shut she hkyut htoq ló akô. Haù hkùn jáng, hkum pé lé myhí pyám akô nghut ri.

31 Poluq lé yhangmoq sat rã dã nyí kô é hkùn, Yerusalem wã gón gabyông nyí akô gã é hkyô lé, Romaq dap up zaú é no mã, lò jé ri.

32 Haù mù, yhang gi, radá dãm shô up gyezau ra-am eq gyezô pé lé shuí chùng mù, byù hpúng shut, din yán gyó ló akô. Yhangmoq gi, gyezau

eq gyezô pé lé lhom myàng kôjáng, Poluq lé nhuq nyí é mai hkying byuq akô nghut ri.

33 Haù hkùn, dap up zau hpó gi, Poluq chyáng ê jé mù, yhang lé chyup yú luí, toqjáng tui í hkat eq tuí to nhang ri; hau htâng, yhang ó yuq nghut é hkyô lé le, haì kut shut é hkyô lé le myí wú ri.

34 Shiwa byu pé kúm gi, rayuq rajung ga garú bum akô. Haù mù, gyezau hpó gi, lùm garu kô é yanmai, têng é hkyô lé rago a wó sê yù jáng, Poluq lé gyewap mã shuí ló nhang ri.

35 Poluq gi, zumhtâng wang mã jé lo é hkùn, byù moq mó lùm htim chyin chyap lô kô é yanmai, gyezô pé gi, yhang lé waq doq ló akô.

36 Shiwa byu pé gi, "Yhang lé sat pyám keq." ga châng garú nyí akô nghut ri.

Poluq, Yhumsing Gùng Mara A Bo É Lé Taí Sân Kyô É Hkyô

37 Gyezô pé gi, Poluq lé gyewap mã shuí wàng rá za nghut é hkùn, Poluq gi, dap up zau hpó lé, "Ngò nàng lé dang wó nyô rã lú?" ga myí jáng, dap up zau hpó gi, "Nàng, Grik myíng dat mu lھے lú?"

38 Nàng gi, hí hkùn gumlau kut mù, byù sat wún bang myí hkying lé, yoso shut shuí htoq ló é sù, Egutuq byù a nghut lú?" ga tau myí ri.

39 Haù hkùn, Poluq gi, "Ngò gi, Kiliki mau Tarshu myuq mã é Yudaq byù nghut lhê; ngò nyí é wã gi, wã chyap wã

zo za a nghut, jeju mai, byù shí bang lé ngò dang tái rã ahkáng byi laq." ga dũng ri.

⁴⁰ Gyedap up zau hpò ahkáng byi jáng, Poluq gi, zumhtâng má yap to mù, shiwa byu pẽ shut loq he ri. Haú hkũn, yhangmoq lunglhang bang zim byuq kômù, Poluq, yhangmoq lé Hebre myíng dõng tái é gi,

22

¹ "Gumang wuì eq ìwa pé ê, ahkuì, ngò mara a bõ nghu tái é dang lé gyô wú shi keq." gã ri.

² Yhangmoq gi, yhang Hebre myíng dõng tái é dang lé wó gyô bùm kôjáng, gyai yhang zím byuq bekô. Haú mù, Poluq xoq tái é gi,

³ "Ngò gi, Yudaq byù rayuq nghut lhê. Kiliki mau Tarshu myuq má choq hpyit kôlhang, wã mó shí má nyi kô lò sũ nghut lhê. Ngò gi, nga-nhũng ìchyí ìwa pẽ é jep é tarã lé, Gamalelaq é loq má jihkùm nuqguq mhoq yũ luí, hkũ-nyí lhê é nungmoq lunglhang bang su, Garai Gasang lé gyai myit zìng zuq é sũ nghut lhê.

⁴ Ngò gi, shí Hkyô cháng bang lé shí é jé shoq, zing-rí wú é sũ eq, myiwe yuqgè ó yuq lé nghut kôlhang, chyup yũ mù htóng má lhũng pyâm wú bê sũ nghut lhê.

⁵ Hkyangjong mó eq byìn tú wap suwún wuì lunglhang bang gi, ngá é saksê pé nghut akô. Ngò gi, Damaskuq myuq má nyi é yhangmoq é Yudaq gumang wuì lé byí rã laiká yhangmoq chyáng mai wó yu

chũng luí, haú mã é bang lé le Yerusalem wã mó mã dam byi rã matú, chyup tuí lò rã nghũ, Damaskuq myuq shut e é nghut lhê.

⁶ Nyigũng tũ zó lé, ngò Damaskuq myuq shut sô chyáng lò nyi é hkũn, maubó gi, ngá é lhũnghkyuq má mauhkũng mai byodàn tung duqbó to bê nghut ri.

⁷ Haú mù, ngò myigũng mã lêng gop tô le, wó gyô kat é danghtê gi, 'Sholuq, Sholuq, nàng ngo lé haí mù zing-rí nyi lhê lhú?' gã ri.

⁸ Ngò le, 'Yhumsĩng ê, nàng ó nghut lhê lhú?' nghu myí kat jáng, 'Ngò gi, nàng zing-rí wún é sũ, Nazaret wã byù Yesuq nghut lhê.' ga luí, Yhang tũ tái kat ri.

⁹ Ngò eq rahá e lò é bang kúm gi, maubó lé myàng kôlhang, ngo lé tái é danghtê lé a sê gyo kó nghut ri.

¹⁰ Dum, ngò gi, 'Yhumsĩng ê, ngò haí kut ra rã lhú?' nghu myi jáng, haú Yhumsĩng gi, 'Toq mù, Damaskuq myuq má wang lò aq, nàng kut rã matú wò byí tô é hkyô pé lunglhang, nang lé haú mã lhom tái kyo berã nghut lhê.' ga ngo lé dum tái ri.

¹¹ Haú maubó é shingkang é yanmai, ngò myoqjit byuq mù, ngá é byinzùm wuì gi, Damaskuq myuq shut ngo lé loq mai she wang lò akô.

¹² Haú hkũn, Anani gã é yuqgè rayuq ngá chyáng lé huí ri. Yhang gi, jep é tarã lé gyuq hkunggã é eq, haú mã nyi é Yudaq byũ lunglhang

bâng é hí má myoqdong gyai wó é sũ nghut ri.

¹³ Yhang gi, ngá nâm má yap to luí, 'Gumang Sholuq ê, náng myoq myàng aq hkoi!' ga taí ri. Haú hkũn jáng yhang, yhang lé ngò wó myang kat bê nghut lhê.

¹⁴ Yhang dum xoq taí é gi, 'Nga-nhũng íchyí íwa pê é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sũ lé wó myàng luí, Yhâng é nhut mâ é mungdang lé wó gyo sháng gaq ga luí le, hkyin to bê nghut ri.

¹⁵ Haú mù, nàng gi, nàng myang é eq wó gyô yu é hkyô pé lé, byù lhunglhâng bâng é hí má, Yhâng é matú saksé hkám byi râ su dut râ nghut lhê.

¹⁶ Ahkuí, nàng haí lé lánng nyi ashí lú? Toq aq, Yhâng é myìng lé lang luí wui-myhup hkâm yu é eq, náng é yubak mara pé lé chí sân pyám aq.' gâ ri.

¹⁷ Hau htàng, ngò gi, Yerusalem wà mó má dum taú jé ló mù, noqkuq yhũm má kyũ é dũng nyi le, moq byuq ló mù,

¹⁸ Nàng, ngá é hkyô lé saksé hkám râ dang lé, yhangmoq a lhom hap yù kó râ nghut é yanmai, Yerusalem wà mó mai hân htoq ló aq.' ga Yhumsing ngo lé taí nyi é lé, myoqwup shing-rán dõng myang ri.

¹⁹ Haú mù, ngò gi, 'Yhumsing ê, tarajong ralhũm htàng ralhũm má nang lé

lumjìng bang lé, htóng má chyup lhũng pyám é eq, hkat bat lhing wún é hkyô lé, yhangmoq sê bum akò.

²⁰ Náng é saksé Stehpan sat hui luí suí shun u lé, ngò nâm má yhang yap to mù, haú hkyô lé myit bo hui luí, yhang lé sat pyám bâng é mebu lé zúng byí é nghut lhê.' nghũ tú taí bê.

²¹ Haú hkũn, Yhumsing gi, 'Ê aq, ngò, nang lé, wê gâng é tũngbaù pê chyáng nhang kat râ.' ga, ngo lé taí ri." gâ ri.

Poluq, Romaq Mingdán Byù Nghut É Hkyô

²² Shiwa byu pé gi, dang haú hkun jé za gyô yù kômù, "Shí sũ é byù gi, myigũng htoq má nyi a gíng, sat pyám keq." ga, htê mó èq garũ bum akò.

²³ Yhangmoq gi, haú su garu uchyang, yhumsing buhìng lé hkyut dú pyám lhê, hpuilhup lé mauhkũng shut kyaq tâng lhê, kut nyí kôjáng,

²⁴ dap up zau hpó gi, Poluq lé gyewap má shuì hâng yù nhâng mù, yhang lé shiwa byu pé haí mù shí su ga garũ bũm kô é hkyô lé wó sé shoq ga, nhuq bat nhâng luí, myí choq nhang ri.

²⁵ Nhuq bat râ matú shokuq tuí eq tui kôjáng, Poluq gi, nâm má yap tô é shô up gyezau lé, "Romaq mingdán byũ ru nghut sũ lé nhĩng, lháng a jéyáng shimá, nungmoq nhuq bat le gi, tarâ wang akò lú?" ga taí ri.

²⁶ Rashô up gyezau gi, dang haú lé wó gyo jáng, dap up zaú chyáng ló mù, "Nàng haí

23

kut râ dô nyi lê lú? Shí yuq gi, Romaq mingdán byû sheq ru nghut ri." ga luí, yhang lé ló taí kyô ri.

²⁷ Haú mù, dap up zau gi, Poluq chyáng ê mù, "Nàng gi, Romaq mingdán byû nghut lê lú? Taí kyô wú laq." ga myí ri.

Poluq gi, "Ngò, Romaq mingdán byû nghut lê." ga tû taí ri.

²⁸ Haú hkûn, dap up zau hpó gi, "Ngò lhang ahpau myo myo byí pyám luí sheq, Romaq mingdán byû ru wó dut é nghut lê." ga tû taí jáng, Poluq gi, "Ngò kúm gi, Romaq mingdán byû dut gû hku lé ló é sù nghut lê." ga taí ri.

²⁹ Yhang lé myí choq wú râ gâ é bang gi, haú hkûn jáng, yhang chyáng mai huí zut ló bûm bekô. Gyedap up zau hpó le, Poluq gi, Romaq mingdán byû nghut é lé sé jáng, yhang lé tuí pyám bê nghut é yanmai, gyuq byuq bê nghut ri.

Yudaq Byìn Tú Wapdoq Suwún Wuí Gam Hkoq Byuq É Hkyô

³⁰ Htang nyí, dap up zau hpó gi, Yudaq byu pé mai Poluq lé hun é mara haí nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byìn tú wapdoq suwún wuí lhunglhang lé jì tsíng to luí, yhangmoq é gung gung má Poluq lé shuí wàng mù, shap to bê nghut ri.

¹ Haú hkûn, Poluq gi, Yudaq byìn tú wapdoq suwún wuí lé wú tsuq to mù, "Ngá gumang wuí ê, ngò gi, hkû-nyí jé shoq Garai Gasâng é hí má sansêng é i-myt eq asak dui nyi bê nghut lê." ga taí ri.

² Haú mù luí, hkyangjong mó Anani gi, Poluq nâm má yap to bang lé, yhang nhut má bat byi keq gâ ri.

³ Haú hkûn, Poluq gi, yhang lé, "But hpyu tô é xewâm* nàng ê, nàng lé sheq Garai Gasâng eq bat râ nghut lê. Nàng gi, tarâ eq rajung za ngo lé jéyáng râ matú shí má zung to luí nhíng, haí mù tarâ eq shut shai é dông ngo lé bat nhang lê lú?" ga taí ri.

⁴ Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lê lú?" ga luí, chôm taí akô.

⁵ Poluq gi, "Gumang wuí ê, yhang gi, hkyangjong mó nghut é lé ngò a sê pyám mù nghut bê. Chyúmdang má le, 'Náng amyû lé up é sù lé wó rhoi râ a nghut.'* ga le kê tô é nghut lê." ga tû taí ri.

⁶ Hau htang, haú zîng tô é bang mâ é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byìn tú wapdoq suwún wuí lé, "Gumang wuí ê, ngò gi, Hparishe awut ashín mâ é, Hparishe rayuq nghut lê. Shí bê bang dum dui toq lô râ hkyô lé myit myoqbyù é

* 23:3 But hpyu tô é xewâm gâ é gi, gegùn labyoq kut bang lé gâ lê. ☆ 23:5 Htoq Ló 22:28

yanmai, ngò jéyáng é huí nyi ri." ga luí, garû taí kat ri.

⁷ Yhang haú su ga taí kat jáng, Hparishe pé eq Saduke pé gi, dang jet jet lhùm lò kômù, Yudaq byìn tú wapdoq hpong gi, gam hkoq ló byuq bekô nghut ri.

⁸ (Hkâsu mù gà le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga taí bum akô. Hparishe pé kúm gi, haú pé joq lhê ga, lumjíng bang nghut akô.)

⁹ Haú mù luí, gyai yhang taí garû bum akô. Haú hkûn, Hparishe hpúng mâ é tarâ sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taí bê nghut jáng gi, hkâsu nghû kó rá lhú?" ga luí, zuq zuq taí htíng lhùm akô nghut ri.

¹⁰ Haú su kut gyai yhang taí htíng lhùm lò kôjáng, dap up zau hpó gi, Poluq lé lâng myha pyám kó rá lé chiq é yanmai, yhangmoq chyáng gyó ê mù, Poluq lé haú bâng é gung gûng mai é lú shuí lò luí, gyewap má shuí wang ló rá matú, gyezô pé lé nhang kat ri.

¹¹ Haú myîn, Yhumsîng gi, Poluq é nàm má yap to luí, "Hkâgyuq, Yerusalem wà mó má nang ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhê." ga, yhang lé taí ri.

Poluq Lé Sat Râ Haq Dâ É Hkyô

¹² Htâng napkyó, Yudaq byu pé gi, Poluq lé sat rá hpaqchyí chôm da kômù, yhang lé a wó sat sat gi, a zo a shuq rá nghut lhê ga, ó le ó dakam yu akô nghut ri.

¹³ Hpaqchyí shí lé chôm dâ é bang gi, myi xê yuq chyân nghut bum akô.

¹⁴ Yhangmoq gi, hkyangjong agyi pé eq suwún wui chyáng ê kômù, "Poluq lé a wó sat sat gi, ngamoq haí le a zo nghû, chôm dakam yu to bê nghut lhê.

¹⁵ Hau é yanmai, ahkuí nungmoq gi, Yudaq byìn tú wapdoq suwún wuí eq rahá kut luí, Poluq é hkyô lé rago za myí gon wú rá nghu mhaú é dông, yhang lé nungmoq chyáng wut yù rá matú, dap up zaú chyáng dúng kat keq. Haú hkûn, ngamoq gi, hkyolat má yhang lé lhom sat pyám rá rì rì kut to rá nghut lhê." ga taí akô.

¹⁶ Nghut kôlhang, haú lhom haq sat kó rá gà é hkyô lé, Poluq é yhâng nhammó é yhangzo yuqgè zo wó gyô yù luí, yhang gi, gyewap má wang ê mù, Poluq lé ê taí kyô ri.

¹⁷ Haú hkûn, Poluq gi, shô up gyezau rayuq lé ji yù mù, "Zorâm shí lé dap up zaú chyáng shuí ê aq, yhang, yhang lé shit kyo rá hkyô rajung joq lhê ga." ga taí ri.

¹⁸ Haú mù luí, shô up gyezau hpó gi, zorâm haú lé dap up zaú chyáng shuí ê mù, "Zorâm shí nang lé shit kyo

râ hkyô rajung joq lê gê ri ga, yhang lé náng chyáng shuí lé râ matú, htóng byû Poluq gi, ngo lé ji yù mù tâi ri." ga, yhang lé tâi ri.

19 Haû jáng, dap up zau hpó gi, jauwò má zorâm haû lé yhang loq mai she ê mù, "Nàng ngo lé hái jung shit kyo nau ri lú?" ga, yhang lé baú tsik za myí ri.

20 Haû hkûn, zorâm haû gi, "Yudaq byu pé gi, Poluq lé rago za saí myí wú râ su kut mhaú mù, napmá, Yudaq byin tú wapdoq má shuí yù râ matú, náng chyáng dung kó râ ga, myit chôm huí to bekô nghut ri.

21 Haû mù luí, yhangmoq ô nau é dông hkâgyo byí, hkâsu mù gê le, Poluq lé a wó sat sat gi, hái le a zo a shuq râ nghut lê ga, byù myi xê yuq chyân yhang, ó le ó dakam yù bekô nghut ri. Haû bang gi, yhang lé lhom chyup yù râ matú haq lhom to lánng kó râ nghut lê. Ahkuí lhang, yhangmoq gi, mù haû kut râ matú rì rì nghut bùm bekô; náng é ahkáng lé za lánng nyi bum akô nghut ri." ga shit kyô ri.

22 Haû hkûn, dap up zau hpó gi, zorâm haû lé, "Nàng, ngo lé shí hkyô shit kyo bê hkyô lé, ó yuq lé le hkâtaí kyo." ga, sidiq byi mù, taû nhang kat bê nghut ri.

Mingzau Hpilik Chyáng Poluq Lé Dé Kat É Hkyô

23 Hau htâng, yhang gi, shô up gyezau í yuq lé ji yù mù, "Hkû-myîn sum hkyíng† má Kesare wà mó shut ê râ matú, gyezô pé í shô, myang ji bang nyhit xê, lhâm chûng bang í shô kut mù, rì rì hen to keq.

24 Hau htoq agó, Poluq lé mingzau Hpilik chyáng ngón za wó dé kat râ matú, yhang ji râ myang pé le lajang byi keq." ga, yhangnhik lé pying kat ri.

25 Laiká hun kat é le:

26 "Aróng wó dik é mauzau Hpilik ê, ngò Klodi Lusi gi, nuingón danglù shit kyô kat lê.

27 Shí yuq lé gi, Yudaq byu pé èq chyup yù mù sat pyám râ dâ nyi bekô za nghut lê. Nghut kôlhang, ngò gi, gyezô pé eq rahá ê wú le, yhang Romaq mingdán byû nghut é lé wó sê yu é yanmai, yhangmoq chyáng mai yhang lé hkyi lo é nghut lê.

28 Haû su mù, hái mù yhang lé mara hùn kô é hkyô lé sé nau é yanmai, yhangmoq é Yudaq byin tú wapdoq má yhang lé shuí jé byí wú bê nghut lê.

29 Haû hkûn, yhangmoq é tarâ hkyô eq séng luí za mara hun bùm kô é lé ngò myang ri. Nghut kôlhang, shí gíng é eq htóng lhung gíng é mara hái le a bò nghut ri.

30 Shí yuq lé sat pyám râ hpaqchyí da kô é hkyô, ngo lé shit kyo kô é hkûn, radá dâm, yhang lé ngò náng chyáng dé

† 23:23 Myín sum hkyíng gi, nga-nhùng é myín gau hkyíng nghut lê.

nhang kat bê. Yhang lé mara hûn nau é bang lé gi, nang hí má yhang hun lhum keq nghû pying kat bê nghut lhê." gâ ri.

³¹ Haû mù luí, gyezô pé gi, haû pying kat é dang eq ra-jung za, myín lé yhang, Antipatri wà mó jé shoq Poluq lé dé kat bekô nghut ri.

³² Htang nyí, myang ji bang lé ê châng dé nhâng kômù, yhangmoq gi, gyewap shut dum taú lô bekô nghut ri.

³³ Myang jì é gyezô pé gi, Kesare wà mó má jé kô é hkûn, mauzau hpó lé laiká byi mù, Poluq lé lé jâng ap byí akô nghut ri.

³⁴ Haû hkûn, mauzau hpó gi, laiká haû lé ban nghap jáng, Poluq hká mau mâ é byù nghut é hkyô lé myí wú luí, Kiliki mau mâ é byù nghut é lé sé jáng,

³⁵ "Nang lé mara hûn bang jé jáng sheq, náng mù lé ngò gôn wú râ." ga taí ri. Hau htâng, yhang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

24

Poluq, Mara Hûn Huí É Hkyô

¹ Hau htâng, ngo nyí lai jáng, hkyangjong mó Anani gi, suwún wuî ra-am eq tarâ sé sù Tertulu lé shuí gyó lô mù, mauzau hpô hí má Poluq lé mara lé taí hun bum akô.

² Haû hkûn, Poluq lé hí má ji hâng tô é nghut mù, Tertulu, yhang lé mara hûn dang taí

hi é gi, "Aróng wó dik é Hpilik ê, ngamoq gi, nyi-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nàng sê up sê hkang é jeju lé, byù myú shí wó hkâm zô nyi é yanmai,

³ ngamoq gi, haû lé hkyô hkat hkangmó eq jowò hkangmó má jeju bûn é myit eq hkam yu nyi bê nghut lhê.

⁴ Nghut kôlhang, ngò nang lé lhoq hkyik é dông a dut sháng gaq, taí râ dang ratot zo lé, myit hîng hîng to mù gyo byi laq nghû dúng tôngbán lhê ô!

⁵ Shí yuq gi, byù lé gunjang sù, mingkan gón mâ é Yudaq byu pé lhunglhang lé shuí gabyong sù eq, haû Nazaret hpúng mâ é hkyô-u shê sù nghut é lé, ngamoq myang ri.

⁶ Hau htoq agó, yhang gi, noqkuq yhûm lé achayut kut râ dâ nyi luí, yhang lé ngamoq chyup yû mù, (ngamoq é tarâ dông jéyáng râ hen nyi é hkûn,

⁷ dap up zau Lusi gi, lé lô mù, ngamoq é loq mai yhang lé lé lú shuí yù luí, yhang lé mara hûn bang lé, náng chyáng jé keq ga hkunmó hkyô tô é nghut lhê.)

⁸ Haû mù, nàng, yhang lé myí wú jáng, ngamoq yhang lé hun é mara banshoq têng é hkyô lé, nàng wó sé râ nghut lhê." gâ ri.

⁹ Yudaq byu pé le, haû pé gi, têng lhê ga bô chôm taí akô nghut ri.

Poluq, Mara A Bò É Lé Taí Hung É Hkyô

10 Mingzau hpó gi, Poluq lé dang taí râ đông loq lik kat jáng, Poluq taí é gi, "Zau ê, shí mau bâng é ahtoq má, nàng zanwut myo myo jéyáng byí nyí é hkyô lé, ngò sê é yanmai, ngò gabú myit eq yhumsing matú, mara a bo é hkyô taí bá.

11 Ngò, Yerusalem wà mó má noqkuq râ matú doq e é buinyì raxe í nyí lhang a chyân shi é gi, nàng lui za wó sé râ nghut lhê.

12 Noqkuq yhûm má ngò ó yuq eq taí htîng lhûm é lé lhang, tarajong, a nghut jáng, wà hkaû hká jowò má le byu pé lé shuí gabyông é lé lhang, ngò lé mara hun é bang gi, a myàng kó.

13 Ahkuî, ngo lé yhangmoq hun é mara pé lé, náng hí má yhangmoq saksé lhang a wó tân shit kó nghut ri.

14 Nghut kôlhang, náng hí má ngò yín yû râ hkyô rahkat gi, yhangmoq eq shut shaí hkyô ga myhîng tô é Hkyô lé cháng lui, ngamoq é îchyí îwâ pé é Garai Gasang lé noqkuq nyi lhê. Jep é tarâ eq myiqhtoi laiká pé má kê tô é lunglhang lé le lumjîng lhê.

15 Ngò gi, dingmán é bang eq a dingmán bâng é dum dui toq lô râ hkyô joq é lé, yhangmoq eq rajung za Garai Gasang má myit myoqbyu nyi é sù nghut lhê.

16 Haû mù lui, Garai Gasang eq byu é hí má, ngò gi, râ é hkyô a bo é za, myit é hkyô san za wó dut nyi shoq, shikut nyi lhê.

17 Zanwut tsómra lai é htâng

má, ngò gi, ngá é byù myû mâ é myûng bang lé chyunghuq byi râ eq alu kat râ matú, Yerusalem wà mó shut lô jé bê nghut lhê.

18 Haû su kut nyi é hkûn, ngò eq rahá hai byù moq mó le a nyi, hai jung gabyông é hkyô le a htoq, ngò noqkuq yhûm má lhoq san lhoq yúng yû bê hkyô lé za, yhangmoq myang akô.

19 Nghut kôlhang, Asia mau mâ é Yudaq byù ra-am gi, haú má nyi tô é nghut lhê; yhangmoq mai ngo lé mara hûn râ hkyô joq kô é nghut le gi, shí náng é hí má yhangmoq lé jé kó ra nghut lhê.

20-21 Haû a nghut jáng, shí má nyi tô é bang gi, ngò Yudaq byin tú wapdoq hí má yap to mù, 'Shi byuq bâng é dum dui toq râ hkyô é yanmai, hkû-nyí nungmoq ngo lé jéyáng nyi akô.' nghû lui, garû é dang hkûn mai lai lui, ngò má gotû mara myàng shi kô é nghut le gi, yhangmoq yhang taí kyo kó sháng gaq." gâ ri.

22 Hpilik gi, Hkyô haû lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi râ nghut lhê." ga lui, yhangmoq lé ahkýing htot kat byí ri.

23 Poluq lé le, zúng za zúng to mù, yhâng é buinùm ji-myi wui mai yhang ra châ é hkyô lajang byi naû kô é bang nyi le gi, ahkáng byi keq ga lui, shô up gyezau lé hkunmó hkyô kat ri.

24 Buinyì rayoq zo lai é

htâng má, Hpilik gi, Yudaq myiwe myhí nghut é sũ yhangmyi Drusila eq jé lé mù, Poluq lé ji lò nhâng luí, yhang, Hkrisduq Yesuq lé lumjíng hkyô taí kyô é le gyô yu ri.

²⁵ Poluq gi, dingmán hkyô, yhumsing gùng lé hkang é hkyô eq, jé lô râ tarâ dara hkyô lé mhoqshit jáng, Hpilik gi, gyô gyuq mù, "Nàng ahkuí wó ló bê, ngò jìn jáng sheq nang lé dum ji yù râ nghut lhê." ga taí ri.

²⁶ Hpilik kúm gi, Poluq èq ngùn haq byi râ lé myit myoqbyù mù, yhang lé anum num ji yù luí, yhang eq nyo lhum lhum kut ri.

²⁷ Zanwut í zân lai jáng, Hpilik é mauzau ayá má Porku Hpestu lé htaí kat pyâm akô. Nghut kôlhang, Hpilik gi, Yudaq byu pê é hí má myoqdong wó nau é yanmai, Poluq lé htóng má jâng lhùng pyâm to bê nghut ri.

25

Poluq, Kehtaq Chyang Jé Râ Matú Dúng È Hkyô

¹ Hpestu gi, haú mau má jé é sum nyi lai jáng, Kesare wà mó mai Yerusalem wà mó shut doq ló ri.

² Haú hkùn, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit kômù,

³ yhangmoq gi, Poluq lé hkyolat má lhom haq sat pyám râ dâ to kômù luí, jeju ralhum kut byí é đông Poluq

lé Yerusalem wà mó shut dé kat byi râ matú, Hpestu lé lhom dúng akô.

⁴ Nghut kôlhang, Hpestu gi, "Poluq lé Kesare wà mó má sheq ru lhùng tô lhê, hkâm-yhâng a myáng má, ngò yhang le haú má dum taú ló râ nghut lhê.

⁵ Haú mù, nungmoq má é hkyô-u shê bang ra-am, ngò eq rahá gyó ló mù, haú yuq kut shut é hkyô bo é nghut jáng gi, yhang lé mara lé hùn kó sháng gaq." ga tũ taí ri.

⁶ Hau htâng, yhang gi, shit nyi, raxê nyi kô yhangmoq chyáng nyi yù luí, Kesare wà mó má taú ló mù, htang nyí gi, tarâ tanghkuq má zùng luí, Poluq lé yhâng hí má shuí wang lò râ matú hkunmó hkyô kat ri.

⁷ Poluq jé jáng, Yerusalem wà mó mai gyó lo é Yudaq byu pé gi, yhâng é lhinghkyuq má yap to kôluí, saksé a wó tân shit é mara mó myo myo lé, yhâng é ahtoq má chôm taí hun akô nghut ri.

⁸ Haú hkùn, Poluq gi, "Yudaq byu pê é jep é tarâ eq shai é đông le, noqkuq yhùm lé shut é đông le, Kehtaq* lé shut é đông le, ngò a kut wú." ga luí, mara a bo é hkyô taí ri.

⁹ Nghut kôlhang, Hpestu gi, Yudaq byu pê é hí má myoqdong wó naú mù, Poluq lé, "Nàng, Yerusalem wà mó má doq ló luí, shí hkyô pé lé ngò haú má doqdan byi râ matú, nàng dóng lhê lú?" ga myí ri.

* 25:8 Kehtaq gâ é gi, "hkoséng" gâ é nghut lhê.

10 Poluq kúm gi, "Ngò gi, doqdan hui râ nghut jáng, shî doqdan é jowò, Kehtaq é tarâ hpyit wap má ahkuí yap to bê nghut lhê. Nàng sê é eq rajung za, ngò gi, Yudaq byu pé lé haí lhang a shut wú sũ nghut lhê.

11 Laqma mù, shî gíng é mara lé, ngò kut shut pyâm é nghut le gi, shî hkám râ hkyô lé ngò a he pyám; nghut kôlhang, shî Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byi râ ahkáng wó râ a nghut, ngò gi, Kehtaq chyáng wang taí râ nghut lhê." ga tũ taí ri.

12 Haú hkûn, Hpestu gi, yhang é byìn tú wap bang eq ban hpyê lhum jáng, "Nàng Kehtaq chyáng wang taí râ ga bê nghut lhê, Kehtaq chyáng wang ló aq hkoí!" ga taí kat ri.

Poluq Lé, Hkohlâm Agripa Hí Má Shuí Hâng Yu É Hkyô

13 Hau htâng, buinyi hkâ-myháng a myáng má, Hkohlâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé huí nyo akô nghut ri.

14 Haú mù, yhangnhik tâng gi, buinyi tsómra myáng nyi nyi é htâng má sheq, Hpestu gi, haú Poluq é hkyô lé hkohlâm wa eq taí kyô lhùm é gi, "Hpilik, lhùng to lánng é htóng byû rayuq nyi ri.

15 Ngò Yerusalem wà mó má nyi tô é hkûn, hkyangjong agyi pé eq Yudaq byu pé é suwún wuí gi, haú yuq é hkyô lé taí kyo kôluí, haú yuq lé

marabyi râ matú ngo lé chôm dúng akô.

16 Haú hkûn, ngò gi, mara hun é hui sũ, mara hun é bang eq chyung chyog yoq kut luí, yhangmoq hun é mara lé yhumsing matú mara a bo é hkyô a wó taí shi lé, ó yuq lé ap byi pyám râ le, Romaq htúng a joq nghũ luí yhangmoq lé taí kyo bê nghut lhê.

17 Yhangmoq ngá htâng châng gyó lô kô é hkûn, ngò gi, a nô yu é za, htang nyí jáng tarâ tanghkuq má zúng luí, haú yuq lé shuí wang lò râ matú hkunmó hkyô kat é.

18 Haú hkûn, haú yuq lé yhangmoq mara chôm hun bùm kôle, ngò myit ngàm tô é su mara ralhum le a hun htoq lô kó nghut ri.

19 Yhangmoq é noqkuq htúng hkyô eq, haú dui nyi ri ga Poluq èq taí é, shi byuq bê Yesuq é hkyô lé za dang jet jet lhùm bum akô.

20 Haú mù, ngò gi, haú hkyô lé hká dông gon yù râ le a sé lô é yanmai, haú hkyô lé Yerusalem wà mó má doqdan é ló hkam yù râ matú, yhang dóng a dóng é hkyô lé myí wú le,

21 Poluq yhang sheq, Hkoséng mó chyáng jé râ ga taí é yanmai, Kehtaq chyáng a dé kat shi é u lé, yhang lé zúng nyí shirâ matú, ngò hkunmó hkyô kat é nghut lhê." gâ ri.

22 Haú hkûn, Agripa gi, "Ngò le haú yuq é dang gyó wú nau ri." ga, Hpestu lé taí jáng, yhang gi, "Napmá, nàng

wó myang gyo râ nghut lê." ga tâ tai ri.

23 Htâng nyí, Agripa eq Bernike nhiktâng gi, shing kang bò bò za lé lô mù, dap up zau wuî eq wà mâ é agyì suwún wuî eq rahá, rûng gok mó má wang zung tó bùm kô é hkûn, Hpestu hkunmó hkyô kat jáng, Poluq lé shuí hâng tô akô.

24 Haú hkûn, Hpestu tai é gi, "Hkohkâm Agripa eq ahkuî shí má zup zîng tô é lhunglhâng bang ê, Yerusalem wà mó eq shí wà mâ é Yudaq byu pé banshoq bang, ngá chyáng lé tai kôluî, shí yuq lé asak a wó duì nhang to lo ga garú bùm é gi, ahkuî nungmoq myang é shí yuq yhang nghut bê.

25 Nghut kôlhâng, shí yuq zui sai é má shí gîng é mara haí lé lhang ngò a myàng nghut ri. Yhang gi, Hkosêng chyáng wâng râ ga tai é yanmai, yhang lé Romaq myuq shut dé kat râ matú ngò myit hpyit to bê.

26 Dé kat bá nghû jáng le, ngá é yhumsîng Hkosêng chyáng yhang é hkyô jihkúm nuqguq kê hun kat râ haí le a bò nghut ri. Haú mù luî, yhang lé ban myî gôn wú jáng sheq, ká râ hkyô rajung jung hkâlhâng ngò myàng abe nghû, nungmoq banshoq bâng é hí má le, je riyhang nàng Hkohkâm Agripa é hí má le, yhang lé ngò lhoq htoq shit é nghut lê.

27 Hkâsu mù gâ le, htóng byú rayuq yuq lé dé kat é

hkûn, yhang lé hun é mara a wó tân shit lé gi, a htuk nghû luî, ngò myit lê." gâ ri.

26

Poluq É Hí Hpyang Lê É Nyi Yap Hkyô

1 Haú hkûn, Agripa gi, Poluq lé, "Nàng, nâng matú dang tai râ ahkâng wó bê." ga tai ri.

Haú mù luî, Poluq loq tú kat mù mara a bo é hkyô tai é gi,

2-3 "Hkohkâm Agripa ê, nâng gi, Yudaq byu pé é htunghking banshoq eq tai hting lhum é hkyô hkat hkanmó lé, gyai sê to sù nghut é yanmai, Yudaq byu pé ngo lé hun é mara hkat hkanmó lé, ngò hkû-nyí nâng é hí má mara a bò é hkyô myang tai é gi, ngá matú gabú hpo yhang nghut ri nghû myit yu nyi lê; haú mù luî, ngá dang lé myit hing é èq gyô yu byi laq nghû, dúng tôngbán kat lê.

4 Ngò gi, zoshâng hkûn mai, ngá amyû má le, Yerusalem wà mó má le, hkâsu kut nyi kô lo é hkyô lé, Yudaq byu pé lhunglhâng bang gi, sé gú nghut akô.

5 Yhangmoq gi, ngo lé hí hkûn mai sé kô é yanmai, ngò, ngamoq é noqkuq htung mâ é tarâ htan dik é hpúng má bo é Hparishe rayuq nghut é hkyô lé, saksé hkâm naú kô é nghut jáng, yhangmoq wó hkâm lê.

6 Nghut kôlhâng, doqdân é hui zo râ matú, ahkuî ngò shí má yap tô é gi, Garai Gasang

èq ngamoq é îchyi îwa pé lé byî tô é danggidiq lé myit myoqbyù nyi é yanmai nghut lhê.

⁷ Ngamoq é byù myû raxe í hú gi, danggidiq jeju haù lé wó hkam yù shoq ga, Garai Gasang lé nyí myín noqkuq dojaú shikut nyi bum akô; Hkohlâm wa ê, myit myoqbyù hkyô hau é yanmai, ngo lé Yudaq byu pé mara hun bum akô nghut ri.

⁸ Garai Gasang gi, shî bê bang lé dum lhoq tui lhê gâ é hkyô lé, a wó lûm nghû, haì mù myit yu akô lúhú?

⁹ Ngò le, Nazaret wà byù Yesuq é mying eq shai lhum é đông myo myo wó kut râ nghut lhê nghû, gè gè yhang myit yu wú bê nghut lhê.

¹⁰ Gè gè haù đông le Yerusalem wà mó má kut wú bê nghut lhê; hkyangjong agyi pè chyáng mâ é ahkáng wó yù luí, ngò gi, sân-yúng bang myo myo lé htóng má kat pyâm é eq, yhangmoq sat hui kôjáng le, ngò myit bo hui wú bê nghut lhê.

¹¹ Ngò gi, tarajong banshoq má a lhing lhing yhangmoq lé dam byi luí, Yesuq lé rhoi dang taí kó shoq shikut wú bê nghut lhê; nhik mó góng yo luí, gó mau mâ é wà pé lhang jé shoq, yhangmoq lé châng zing-rî wú bê nghut lhê.

Poluq Hpúng Byù Dut Lo É Hkyô

¹² Haù hkûn, radàm lé, ngò gi, hkyangjong agyi pè chyáng mai ahko ahkáng eq hkunmó lé yu chûng mù,

Damaskuq myuq shut e ló nyi le,

¹³ Hkohlâm wa ê, nyigûng tu ló zó lé, buì htoq má je duq é maubó gi, haù hkyô má, ngò eq ngá é luzúm wui é lhinghkyuq má, mauhkung mai duq bó htoq lo é lé myang ri.

¹⁴ Haù hkûn, ngamoq banshoq bang myigûng má lêng gop tô bum le, Hebre mying đông, 'Sholuq, Sholuq, nàng, ngo lé haì mù zing-rî nyi lhê lúhú? Zuchûn lé pik le gi, náng é matú gyai yhang wui lhê.' ga luí, ngo lé taí é danghtê lé ngò wó gyô kat ri.

¹⁵ Haù mù, ngò gi, 'Yhumsing ê, nàng gi, ó yuq nghut lhê lúhú?' nghû luí, myi jáng, haù Yhumsing tui taí é gi, 'Nàng zing-rî nyi é Yesuq nghut lhê.

¹⁶ Ahkuí toq yap aq, hkâsu mù gâ le, ahkuí, nàng, ngo lé myàng bê hkyô eq, ngò, nang lé tûn shit shirâ nghut é hkyô pè é matú, ngá é mù wùn râ byù eq saksé dut nhâng râ đông nang lé hkyin to râ nghû, ngò náng chyáng lé htoq shit é nghut lhê.

¹⁷ Náng é amyû pè é loq mai le, tûngbau pè é loq mai le, ngò, nang lé hkyi yù nyi râ nghut lhê.

¹⁸ Yhangmoq, yubak hkyut pyám byî é jeju wó yù râ eq, ngo lé lumjing é yanmai, lhoq sân-yúng hui é bang eq rahá silí wunlí wó hkam yù kó sháng gaq nghû, yhangmoq é myoq lhoq hpóng byi mù, mauchut hkaù mai

maubó shut, Tsadán é a-tsam hkaû mai Garai Gasâng shut yhangmoq lhing lô râ matú, ngò, nàng lé yhangmoq chyáng nhang kat râ nghut lhê.' gâ ri.

Poluq Kut É Muzó Hkyô

¹⁹ Haû mù luí, hkohkâm Agripa ê, ngò gi, mauhkûng mâ é myoqwup shing-rán haû lé a gyô é a wó é nyí nghut lhê.

²⁰ Ngò gi, yhangmoq myit lhing luí, Garai Gasang shut lhing taû lò mù, myit lhing bê hkyô lé, hkyî zó loq zó đông mai tân shit kó sháng gaq nghû, sâng-hi má Damaskuq myuq má nyi é bâng chyáng mai hî luí, Yerusalem wà mô mâ é bâng chyáng má le, Yuda mau gón mâ é bâng chyáng má le, tûngbaù pè chyáng má le, hkô kyo bê nghut lhê.

²¹ Hau é yanmai, Yudaq byu pé gi, ngo lé noqkuq yhúm má chyup yû luí, sat pyám râ da kô é nghut lhê.

²² Nghut kôlhang, ngò gi, hkû-nyí jé shoq Garai Gasâng èq garúm é lé wó yû luí, ahkuí shí má yap to mù, tiq ko ban-shoq bang lé saksé wó hkâm kyô é nghut lhê.

²³ Ngò taí é má, Hkrisduq gi, hpuzo luí, shí bê bang mai sâng-hi dui toq lô mù, Yhâng é amyû eq tûngbaù amyû pé lé maubó é hkyô lé wó taí kyo râ nghut lhê ga luí, dut lò râ hkyô lé, myiqhtoí pé eq Mosheq taí tô é hkyô mai lai luí, ngò gotû haí le a taí é nghut lhê." gâ ri.

²⁴ Yhang haû su ga mara a bo é hkyô taí é lé, Hpestu gi, "Poluq ê, nàng na bê! Lûm mhoq myô yu é yanmai na bê nghut ri." ga luí, htê mó eq dang lat taí hpyit kat ri.

²⁵ Poluq kúm gi, "Aróng wó dik é Hpestu ê, ngò gi, nâ é a nghut, ngò taí é dang gi, tengmán é dang eq dang gyíng nghut lhê.

²⁶ Shí hkyô lé hkohkâm wa yhang le sê to gù nghut lhê mù, yhâng é hí má ngò a gyuq a kyum taí é nghut lhê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, haí le a joq ra nghut lhê nghû, ngò myit lum nyi lhê.

²⁷ Hkohkâm Agripa ê, nàng gi, myiqhtoí pé é dang lé lumjíng lhê lúh? Nàng lumjíng é hkyô lé ngò sê lhê." ga tú taí ri.

²⁸ Haú hkûn, Agripa gi, Poluq lé, "Razup za má, nàng, ngo lé Hkristan rayuq wó dut nhâng nhô ngam ri lúh?" ga taí ri.

²⁹ Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nàng za a nghut, hkû-nyí ngò taí é dang lé gyô nyi é lhunglhang bang, ngò su dut râ matú, ngò gi, Garai Gasang lé kyûdûng nyi lhê." ga tú taí ri.

³⁰ Haú hkûn, hkohkâm wa gi, ginwáng zau hpó eq Bernike le mù, haú má zùng tô é bang eq rahá toq yap ri.

³¹ Yhangmoq htoq lô kô é hkûn, "Shí yuq gi, sat gíng é

mara eq htóng lhung gíng é mara haî le a kut shut nghut ri." ga, rayuq eq rayuq taî lhum bum akô nghut ri.

³² Agripa gi, Hpestu lé, "Shí yuq gi, yhang mai Kehtaq chyáng jé râ ga a taî tô é nghut le gi, yhang lé wó nhang pyám berâ nghut lhê." ga taî ri.

27

Poluq, Romaq Myuq Shut Wuî-sanghpo Mai E Ló É Hkyô

¹ Ahkuî, ngamoq lé Itali ming shut wuî-sanghpo mai gû dap ló nhâng râ matú myit hpyit to kôluî, yhangmoq gi, Poluq eq htongbyû góbang ram lé, Augustuq Hkosêng é gyewap mó mâ é, Yuliu gâ é shô up gyezaû é loq má ap byî kat akô.

² Haú hkûn, Asia mau mâ é wuimau gin-gau cháng luî wà pé má wang jón ló é, Adramuti myuq mai toq é wuî-sanghpo má ngamoq wang ji bê nghut lhê. Htesaloni wà mó mâ é Aristakuq gâ é Makedoni byù rayuq le ngamoq eq rahá nghut lhê.

³ Htang nyí, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhâng chyáng râ é hkyô lé yhâng é buinùm wuî mai lhom lajang byi kó sháng gaq ga, yhangmoq eq ê hui râ matú ahkáng byî kat ri.

⁴ Haú mai dum toq ló é hkûn, laî tau mut é yanmai, Kupru zinlóng lé lai hkaû uchyang jî laî ló mù,

⁵ Kiliki eq Pamhpuli mau mâ é wuimau dông laî byit ló le, Laiki mau mâ é Mura myuq má jé bê nghut lhê.

⁶ Haú má, shô up gyezau hpó gi, Itali ming shut dap e ló é, Alesandru myuq mâ é wuî-sanghpo lé myang hkyup luî, ngamoq lé haú má ji nhâng bê nghut ri.

⁷ Haú mai buinyi myo myo yhó yhó lé za jî e ló luî, awui ahke yhang Kidu wà mó eq ang má wó jé ló jáng, laî tau mut é yanmai, hí shut a wó laî ló lo mù, ngamoq gi, laî lé cháng luî, Kreti zinlóng lé lai hkaû mù, Salamone kongzô é tû tap âng é mai laî ló é nghut lhê.

⁸ Haú mâ é wuiyàm mai awui ahke jî ló lé, Lasea wà eq a wê lhùm é Yuqyo é Guhkan gâ é jowò má jé ri.

⁹ Ahkuî, buinyi tsómra lhoq lhaî pyám luî, haú Zoshuq gám poî lai bê nghut é yanmai, wuî-sanghpo mai sô wún le gi, gyuq chiq râ nám jé bê nghut ri. Haú mù, yhangmoq lé Poluq taî pun taî kyíng é gi,

¹⁰ "Âhkaû pé ê, shí dàm lhê é wuî hkyô gi, wuîhke mó hui luî, wuî-sanghpo eq zè pé sùm pyám râ htoq agó, nga-nhûng é asak lháng sum râ dut é hkyô lé, ngò byu myang ri." gâ ri.

¹¹ Nghut kôlhang, shô up gyezau hpó gi, Poluq é dang lé gyo râ malaî, wuî-sanghpo hkáng sù eq wuî-sanghpo yhumsing é dang lé, je lum ri.

* **27:12** Gyoqmyò lé, haú mau má laidun mó lò lò dut mù, yông wún le gyuq chiq nám nghut lhê.

12 Guhkan haû gi, gy-oqmyò* wó lhoq hai râ su a dut é yanmai, myo hpyang gi, Hponik guhkan má wó jé le jé mù, haû má gyoqmyò ló nyi hai râ matú chôm myit huî akô. Guhkan haû gi, Kreti zinlóng má maupyî buiwàng hkyam eq mautsûng buiwàng hkyam shut hu tô é jowò nghut ri.

Wuimau Má, Laidun Mó Htûng Huî É Hkyô

13 Maupyî shut mâ é lai yhò le hik lô jáng, yhangmoq myit tô é má hkyak nghut bê su ngam pyám kôluí, shamtoq goknghe lé lhoq toq yû kômù, Kreti zinlóng yâm dông jî e ló bê nghut lhê.

14 Nghut kôlhang, hkâm-yháng a myáng má, Buihtoq mautsûng lai gâ é laidun mó gi, haû zinlóng mai mut lò luí,

15 wuì-sanghpo lé lo mut htûng é yanmai, hí shut a wó ló lo jáng, ngamoq gi, lai mut ló é shut châng yông ló bê nghut lhê.

16 Ngamoq gi, Koda gâ é zinlóng zo lé lai hkaû uchyang yông ló nyi é hkûn, haû sakhkyîlhai lé gyai shikut é èq wó lêng yù luí,

17 wuì-sanghpo ahtoq má lêng toq to bê. Wuì-sanghpo lé gi, a byoq lo shoq tuí èq tuí kîng to bê nghut lhê. Dum, yhangmoq gi, Surti gâ é semuí bùm má ló kê gyâm to râ lé chiq kô é yanmai, wuì-sanghpo mâ é panlong pé lé lhoq nyhum hkyô yù mù, châng yông ló bekô nghut ri.

18 Laidun mó lûm htan é yanmai, htang nyi yhangmoq gi, hpugá zê pé lé hkyom dú hkyô pyám bekô nghut ri.

19 Sum nyi nghu é nyi má, yhangmoq gi, wuì-sanghpo zè pé lé yhumsing é loq èq yhang hkyô pyám bekô.

20 Buinyi myáng myáng, bui lé le, kyí pé lé le a myáng é eq, laidun mó za ru mut nyi é yanmai, wó lut râ nghu myit myoqbyu tô é hkyô lé, ngamoq tô pyám bê nghut lhê.

21 Yhangmoq zoshuq a zô é, buinyi tsómra myáng lô bê nghut mù luí, Poluq gi, yhangmoq é gung gûng má yap to mù, "Âhkaú pé ê, nungmoq ngá é dang gyo luí, Kreti zinlóng mai a htoq ló é nghut le gi, shî su htên byoq é marop hui zo râ a nghut.

22 Ahkuí nghut kôlhang, ngò taí é dang lé gyô yù mù myit wum yù keq; nungmoq mâ é hká yuq lé asak sum râ a nghut, wuì-sanghpo za sheq htên byoq byuq râ nghut lhê.

23 Hkâsu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé taí é gi,

24 Poluq ê, hkâgyuq, Kehtaq é hí má nàng wó yap râ nghut lhê. Wuì-sanghpo shî má nàng eq rahá jî tô é lhunglhang bâng é asak lé, Garai Gasang gi, náng é yanmai, lai lai byi râ nghut lhê.' gâ ri.

25 Hau é yanmai, âhkaú pé ê, myit wum yù keq, ngo lé taí kyô é eq rajung za dut lò râ nghut lhê nghu luí, Garai

Gasang lé ngò lumjúng nyi lhê.

²⁶ Nghut kôlhang, nga-nhúng gi, zinlóng ralhum lhum má ló htúng chyap to râ nghut lhê." ga luí, yhangmoq lé i-myt taí tng ri.

²⁷ Buinyì raxe myi nyí myín má, gunggàm yoq lé, ngamoq gi, Adria wuimau má yông lhing wún é hkûn, sanghpo hkâng bang gi, dùng yàm eq chyâng lo nyi é su gâ é lé sê gyo kat akô.

²⁸ Haû su mù, wuì nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myàng akô nghut ri.

²⁹ Haû mù luí, luqmó má ló záng htung râ lé chiq kômù, yhangmoq gi, wuì-sanghpo htâng shut mâ é shamtoq goknghe myí lhum lé lhoq hkyô kat luí, mau hân bó sháng gaq ga kyûdùng nyi bum akô nghut ri.

³⁰ Wuì-sanghpo hkâng bang gi, wuì-sanghpo lé tô pyâm to luí hpâng râ dâ é myit eq, wuì sanghpo-u shut mâ é shamtoq goknghe pé lé lhoq hkyó râ su kut mhaú luí, sakhkyílhaí lé wuì má lhoq hkyô nyi bum akô.

³¹ Haû mù, Poluq gi, shô up gyezau eq gyezô pé lé, "Shí bang wuì-sanghpo má a nyi le gi, nungmoq wó lut râ a nghut." ga taí ri.

³² Haú hkûn, gyezô pé gi, sakhkyílhaí lé tuí tô é tui lé zân hpyit kat kôluí, sakhkyílhaí gi, byit gyó byuq bê nghut ri.

³³ Maubó lô jáng, Poluq gi, yhangmoq banshoq bang lé zang zo râ matú myit wum byí é gi, "Nungmoq gi, myit chiq luí, zoshuq haí le a zô é, hkû-nyí raxe myi nyí myáng lô bê.

³⁴ Haû mù luí, zoshuq rajung jung zo keq! Haû gi, nungmoq wó lut râ matú nghut lhê. Nungmoq chyâng mâ é ó yuq é xâm rahkat lhang byuq râ a nghut." gâ ri.

³⁵ Haû su ga ban taí é eq, yhang gi, muk lé yù luí, yhangmoq banshoq bâng é hí má Garai Gasâng jeju lé hkya-on mù, muk lé hpé luí, zô hí bê nghut ri.

³⁶ Haú hkûn sheq, banshoq bang gi, myit wum wó yù kômù, zoshuq zô bùm bekô nghut ri.

³⁷ Wuì-sanghpo haû mâ é byù lhunglhang gi, í sho nyhit xe hkyuq yuq nghut lhê.

³⁸ Yuq hkangmó bàn zô gyí é htâng má, wuì-sanghpo sóm râ matú, sungso pé lé wuì má dú kat pyâm akô nghut ri.

Wuì-Sanghpo Htên Gyop Byuq É Hkyô

³⁹ Myoq san za myàng jáng, yhangmoq gi, jowò haú lé a sé kôlhang, semuì-jàng chyûn ralhum lé byu myàng kôluí, wó dut é nghut jáng, haú má sanghpo lé kôn gyam râ matú chôm doqdân yu akô nghut ri.

⁴⁰ Haû mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yù luí, wuì-sanghpo ulhum mâ é panlong lé lhoq

toq yû mù, lai hkyô cháng luí wuiyàm shut mut ló bê nghut ri.

⁴¹ Nghut kôlhang, semuî lo bum tô é jowò ralhum má, wuì-sanghpo ló htông chyap byuq luí, sanghpo u gi, a wó duí lo mù, sanghpo htâng lé gi, wuìheng èq lò bat hkyop myha pyám bê nghut ri.

⁴² Haú hkûn, gyezô pé gi, htongbyû pé wuìlî lî hpang byuq kó râ lé gyuq kô é yan-mai, yhangmoq lé sat pyám râ chôm dâ akô.

⁴³ Nghut kôlhang, shô up gyezau hpó gi, Poluq lé hkyi yù naù luí, yhangmoq dâ é hkyô lé hkúm pyám mù, wuìlî dat li bang gi, wuì má byam gyó luí wuiyàm shut hí li dap ló kó sháng ga luí le,

⁴⁴ góbang gi, siklong eq wuì-sanghpo mâ é gotû zè pé má zuí mù, gu dap ló sháng ga le, hkunmó hkyô kat ri. Haú dông mai lunglhang bang gi, wuiyàm shut rago wó jé dap ló bekô nghut ri.

28

Malata Zinlóng Má Jé Nyi Tô É U Lhê Hkyô

¹ Ngamoq wó lut dap ló jáng sheq, zinlóng haù gi, Malata gâ é lé sê ri.

² Zinlóng byu pé gi, ngamoq lé shogyo myit gyaì lhom tân shit akô. Mau ru jâng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkûlum yu akô.

³ Haú hkûn, Poluq gi, htang rawaq guq tsíng yù mù, myihkyóm má kat kat é hkûn, myi soq htan lò jáng, duq htân lhangmuì radu gi, htoq ló mù, yhâng é loq má htê zing tô ri.

⁴ Zinlóng byu pé gi, Poluq é loq má lhangmuì haù htê lhang tô é lé myàng kôjáng, "Shí yuq gi, gè gè yhang byù sat é sù teng râ dut ri; wuì mai wó lut ló kôlhang, yhang asak dui nyi râ matú, Tengmán tarâ gi, a dóng lo nhung!" ga luí, rayuq eq rayuq taì lhum bum akô nghut ri.

⁵ Poluq kúm gi, lhangmuì haù lé myihkyóm má ko hkyô kat luí, haì le a dut é za nyi tô ri.

⁶ Yhangmoq gi, yhânggùng wâm lò berâ, haù a nghut jáng, byodàn ratung shi hkyaq léng ló berâ, ga myit lánng nyi bum akô. Nghut kôlhang, myáng myáng lánng wú nyi bum le, yhang má haì le a dut lo é lé myàng kôjáng, yhangmoq é i-myt dum htaì pyám kôluí, shí yuq gi, hparà rayuq sheq nghut ri ga dum taì bum akô nghut ri.

⁷ Hau é nàm má, zinlóng agyì hpó Popli sing é maumyí pé joq tô ri. Haú yuq gi, ngamoq lé lhom te yù mù, yhâng yhùm má sum nyi yhang lalúm la-nye lhom hkûlum yu ri.

⁸ Haú u lé, Popli é yhângwa gi, alì nyé no nyi é eq wui-wam shun leq tô ri. Poluq gi, haú yuq chyáng wàng mù, kyúdung byi luí, yhâng é ahtoq má loq ke byi mù, yhang lé

lhoq gê byî ri.

⁹ Haû su dut é yanmai, zinlóng mâ é nò byù góbang banshoq le, lé luí lhoq gê byî é hui bekô nghut ri.

¹⁰ Yhangmoq gi, ngamoq lé a hkyô hkyô dông hkungga kôluí, ngamoq wuì-sanghpo ji mù, dum toq ló râ hkûn, ngamoq râ é gû lé châng byi kat akô nghut ri.

Romaq Myuq Má, Poluq Jé É Hkyô

¹¹ Lhamó sum hkyap lai jáng, Alesandru myuq mâ é, "Hparà zozûm nhiktâng" gâ é alhô dap é wuì-sanghpo má, ngamoq wang jî htoq ló bê nghut lhê. Wuì-sanghpo haû gi, gyoqmyò lé zinlóng haû má joq lai é nghut ri.

¹² Surakusa wà mó má jé jáng, haû má ngamoq sum nyí nô yu é nghut lhê.

¹³ Haû mai jî xoq lhing ló le, ngamoq gi, Regi wà mó má jé ri. Htang nyí gi, maupyî lai hik lô mù luí, í nyí nyí má nghut jáng, Potioli wà mó má jé lô bê nghut lhê.

¹⁴ Haû mâ é gumang wuì ra-am eq hui luí, ngamoq lé nyhit nyí no râ matú lùng kômù, ngamoq gi, nô yù bê; hau htâng, Romaq myuq má jé ló bê nghut lhê.

¹⁵ Haû mâ é gumang wuì gi, ngamoq jé lo nyi é hkyô lé wó gyo kôjáng, te yù râ ga, Api Gàl gâ é wà eq Bìng Yhùm Sùm Lhum gâ é wà jé shoq lé akô. Poluq gi, haû bang lé lhom myàng jáng, Garai Gasang lé

hkyá-on kungtôn mù, myit wum wó yù bê nghut ri.

¹⁶ Ngamoq, Romaq myuq má jé wang ló é hkûn, Poluq gi, yhang lé zúng râ gyezo rayuq eq gotú san nyi râ matú, ahkáng wó ri.

Poluq, Romaq Myuq Má, Mungdang Hko Kyô É Hkyô

¹⁷ Buinyi sum nyí lai é htâng má, Poluq gi, haû mâ é Yudaq suwún wuì lé ji yu ri. Yhangmoq jé lé bùm kôjáng, yhang gi, "Gumang wuì ê, ngò gi, nga-nhông é amyú lé le, íchý íwa pè é htunghking lé le, shut shai é dông haí le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pè é loq má ap byi kat é hui bê nghut lhê.

¹⁸ Romaq zau wuì kúm gi, ngo lé ban jep gôn wú jáng, ngá chyáng shí gíng é mara lé a myàng kô é yanmai, ngo lé nhang kat nau akô nghut ri.

¹⁹ Nghut kôlhang, haû lé Yudaq byu pé a dóng kô é yanmai, ngò hkâsu a dat kut lo mù, Kehtaq chyáng jé râ matú dúng é nghut lhê. Haû nghut kôle, ngá amyú lé mara hùn râ jowò joq é yanmai gi, a nghut.

²⁰ Haû mù luí, Israelaq amyú é myit myoqbyù hkyô* é yanmai, shí shamtoq-tuî èq tuî é ngò hui zô é hkyô eq séng luí, nungmoq eq nyo kún râ matú, ngò, nungmoq lé ji kat é nghut lhê." ga luí, yhangmoq lé taí ri.

* **28:20** Israelaq amyú é myit myoqbyù hkyô gi, Mesaia gâ é hkyi yù sù lé myoqbyù nyi é nghut lhê.

21 Haú hkûn, yhangmoq gi, "Náng é hkyô eq séng luí Yuda mau mâ é laiká ngamoq a wó yû nghut ri. Haú mai lé é gumang wuì ó yuq le, nàng eq séng é a ge é luhkyang lé shit kyô é a bò kó nghut ri.

22 Nghut kôlhang, shí nàng lom é hpúng gi, jowò hkanmó má taí he pyâm é huí é hkyô lé, ngamoq sê é yanmai, nàng byu myang é hkyô lé ngamoq gyô wú nau ri." ga tú taí akô.

23 Yhangmoq gi, yhang eq huí kún râ buinyì ding to kôluí, yhang bíng é yhûm má byù myo myo lé zîng bum akô. Haú hkûn, yhang gi, napkyó mai myín htâng jé shoq, Garai Gasâng é mingdán hkyô lé saksé hkâm kyô é eq, Mosheq é tarâ eq myiqhtoí pê é dang má cháng mù, yhangmoq lé shikut luí, Yesuq é hkyô taí pun taí kyîng ri.

24 Yhang taí é hkyô lé, ram gi, lumjîng bum akô; ram kúm gi, a lumjîng kó nghut ri.

25 Yhangmoq rayuq eq rayuq haú su myit a huí lhûm bùm kô é yanmai, Poluq gi, yhangmoq lé, "Chyoiyúng Woi-nyí, Myiqhtoí Esai-aq é nhut mai nungmoq é íchyí íwâ pé lé taí é dang gi, gyai yhang têng ri. Dang haú gi,

26 "Byù haú hú chyáng é mù, "Nungmoq gyô tsuq to kôlhang, sê gyo kó râ a nghut; wú tsuq to kôlhang, wú sé kó râ a nghut.", nghû é

taí aq.

27 Hkâsu mù gâ le, amyû shi é i-myt gi, htan byuq luí, yhangmoq é nohkyap gi, htu byuq bê nghut ri; yhangmoq é myoq gi, chûm byuq bê nghut ri;

haú a nghut le gi, yhangmoq é myoq eq myàng mù, yhangmoq é nohkyap eq wó gyo luí, yhangmoq é i-myt má sê hkyâng kômù,

ngá chyáng lhing lò kôluí, ngò yhangmoq lé lhoq gê byi berâ nghut lhê.*

gâ ri.

28 Haú mù luí, shí Garai Gasâng é hkyi yù hkyô lé, tûngbau pê chyáng byí kat bê nghut luí, yhangmoq lhom gyô yù berâ hkyô lé, nungmoq yhang sê nyì keq ô!" ga luí, danghkun haú taí kat é htâng má, yhangmoq gi, htoq ló byuq bùm bekô nghut ri.

29 (Poluq haú su ga taí é htâng má, Yudaq byu pé gi, yhangmoq yhangchang dang jet jet lhum uchyang ló byuq bekô nghut ri.)

30 Poluq gi, yhang nghô lúng é yhûm má í zân tup nyi é u lé, yhâng chyáng lé má lé é bang lé lhom hkûlum yu ri.

31 Haú mù, a gyuq a kyum é za, Garai Gasâng é mingdán hkyô lé hko taí kyô é eq, Yhumsîng Yesuq Hkrisduq eq séng é hkyô lé mhoqshit byí ri; yhang lé, ó le a hkúm zing to kó nghut ri.

* 28:27 Esai 6:9,10

ROMAQ

Pê Chyáng Hun Kat é Laiká (Romans)

¹ Hkrisduq Yesuq é dui-nhâng zoshâng eq lagyo dut râ matú, Garai Gasâng eq ji yu é hui luí, chyoyúng Chyúmdang pé má,

² Garai Gasang gi, hí hí mai Yhâng é myiqhtoí pé dông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huí é sù, ngò Poluq gi, Romaq myuq má nyi é, Garai Gasâng eq chyt-dap é hui luí, sân-yúng bang dut râ matú jí yu é bang ban-shoq lé, dang kyô kat lhê.

³ Yhâng é Yuqzo haú gi, byù hkyam dông ga jáng, Dawiq é awut ashín nghut ri;

⁴ Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoyúng hkyo é Woi-nyí dông mai, hpungwup a-tsâm eq sé nhâng bê nghut ri. Yhang gi, nga-nhúng é Yhumsing Yesuq Hkrisduq nghut ri.

⁵ Yhang dông mai le, Yhâng myíng é matú le, ngamoq gi, byù myú chângjup mai byù jí yù mù, lumjíng hkyô lé châng nyi nhâng râ matú, jeju eq lagyo ayá lé wó hkam yù bê nghut lhê.

⁶ Nungmoq le, Yesuq Hkrisduq eq séng râ matú jí yù huí é bang má lòm bekô nghut ri.

⁷ Nga-nhúng é Íwa Garai Gasang eq Yhumsing Yesuq Hkrisduq chyáng má é jeju eq nguínón hkyô gi, nungmoq chyáng ru joq nyí sháng gaq ô!

Poluq, Romaq Myuq Má Ló Kum Nau É Hkyô

⁸ Nungmoq é lumjíng hkyô lé, mingkan gón má tai pyo ló bê nghut é yanmai, sân-hi má, ngò gi, Yesuq Hkrisduq é myíng mai, nungmoq ban-shoq bâng é matú, ngá é Garai Gasang lé, jeju hkya-on lhê.

⁹ Ngá é kyúdung dang pé má, ngò, nungmoq lé hkâ-nhám le bûn nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhiklhum ban-shoq eq dojaú é Garai Gasang gi, ngá é saksé nghut lhê;

¹⁰ Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé râ hkyô htong byi râ matú, ahkuí, ngò kyúdung lhê.

¹¹ Ngò gi, nungmoq lé, woi-nyí hkyô eq sêng é chyunghuq wó gâm byi mù, nungmoq lé wum-o wó lhoq kíng byi râ matú, nungmoq lé gyaí yhang myàng nau nyi ri.

¹² Haú su nghu é gi, nga-nhúng rayuq eq rayuq é lumjíng hkyô dông mai, nungmoq eq ngò, myit wum byí é hui râ matú nghut lhê.

¹³ Gumang wui ê, ngò gi, haú tûngbau pé chyáng mai ashi wó yu é eq rajung za, nungmoq chyáng mai le ashi wó yú râ matú, nungmoq chyáng lé jé râ nghú adàm dàm dâ wú é nghut kôhang,

ahkuî jé shoq hkûm tang pyám huî é hkyô lé, nungmoq lé sé nhâng nau ri.

¹⁴ Ngò gi, Grik pé lé le, Grik a nghut bang lé le, hpaqchyî bò bang lé le, hpaqchyî a bò bang lé le, chyîn dap to sù nghut lhê.

¹⁵ Haû nghut é yanmai, ngò gi, Romaq myuq mâ é bang nungmoq lé le, haû gabú danglù gyai yang hko kyo nau nyi é nghut lhê.

¹⁶ Haû gabú danglù hkyô má, ngò gi, a hoq é nghut lhê; hkâsu mù gâ le, haû gi, sâng-hi má Yudaq byu pé, hau htâng tûngbaù pé má, lumjîng é sù yuq hkangmó lé hkyi yu é wó huî nhâng râ nghut é, Garai Gasâng é hpungwup a-tsam nghut lhê.

¹⁷ Hkâsu mù gâ le, lumjîng myit mai wó yù luî, lumjîng myit má gîng nyi é, Garai Gasâng chyáng mâ é dingmán hkyô lé gi, gabú danglù háu má hpông shit bê nghut ri. Haû gi, "Haû dingmán sù gi, lumjîng myit mai asak duì râ nghut lhê."* ga kê tô é eq rajung za nghut ri.

Xângzo Byu Pê Htoq Má Garai Nhkmo-yô É Hkyô

¹⁸ Haû tengmán hkyô lé, yhumsing é agè ashop hkyo eq zik hkûm pyâm é byu pé é agè ashop hkyô eq garai a bo é hkyô pé banshoq htoq má, mauhkûng mai Garai Gasâng é nhikmo-yo hkyô lé hpông shit bê nghut ri.

¹⁹ Haî mù gâ le, Garai Gasang gi, Yhang eq sêng é

hkyô, yhangmoq lé san za tûn shit bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri.

²⁰ Hkâsu mù gâ le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsam eq Garaî é myit sâmlai lé gi, san za wó myâng, wó sê gyô é nghut lhê. Haû mù luî, byu pé gi, mara mai wó he lut râ hkyô a joq lo nghut ri.

²¹ Haî mù gâ le, yhangmoq gi, Garai Gasang lé sê to kôlhang, Yhang lé Garaî dông a shigyaú kô é eq, jeju a hkya-on kó nghut ri; yhangmoq myit é hkyô pé gi, akôm dut byuq é eq, nhik a gyîng é yhangmoq é myit nhiklhum gi, chut byuq bê nghut ri.

²² Yhangmoq gi, hpaqchyî bò bang nghut lhê ga kôlhang, a-ngok é bang dut byuq bekô nghut ri.

²³ Haû mù, htên byoq a sê é Garai Gasâng é hpungwup shingkang lé, htên byoq sê é byù zòng, nghoq lhô, dusak lhô eq yê jung dusak lhô pé eq, htaî lhik pyám bekô nghut ri.

²⁴ Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó râ matú, a sansêng é gungsho zùm-yap hkyô kut râ nghut é, yhangmoq é yut yut ô nau é i-myit má, yhangmoq lé ap pyám bê nghut ri.

25 Yhangmoq gi, haû Garai Gasâng é tengmán hkyô lé, mhaû é hkyo eq htaî lhik pyám kômù, hpân Sû lé noqkuq dojaú râ malaî, mhaû hkyô nghut é hpan tô é zè pé lé noqkuq mù, dojaú akô nghut ri. Hpân Sû haû gi, ahtum abyuq hkya-on hui sù nghut ri. Amen.

26 Haû nghut é yanmai, Garai Gasang gi, yhangmoq lé, ahoq ahî é yut yut ô nau hkyô má ap pyám bê nghut ri. Yhangmoq é myiwe wuì lháng gi, htûng akying lé tô pyám kômù, haû eq shai é dông htaî lhik pyâm nyi akô nghut ri.

27 Haû eq rajung za, yuqgè wuì le, myiwe wuì eq zum é htûng akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-û hkyô kut shut lhum kôluî, yhangmoq kut shut é eq gingdán é yubak dam lé, yhumsing gùng yhumsing hkam yu nyi bekô nghut ri.

28 Hau htoq agó, haû Garai Gasang lé sê é hkyô gi, akyû bo é a nghut ga yhangmoq myit yù kô é yanmai, a kut âng é hkyô kut nhâng râ matú, Garai Gasang gi, yhangmoq lé, htên byoq sê é myit má ap pyám é nghut lhê.

29 Yhangmoq gi, agè agau hkyô ajung jung, agè ashop hkyô, myoqnoq hkyô eq a jú lhùm é hkyô pé bying jup tô é bang dut bekô nghut ri; manon é, byù sat é, mabyoq

jishûm htoq é, mhaû zô é eq myit goi bo é pé le bying bum ri.

30 Yhangmoq gi, lumu é bang, gansang é bang, Garai lé a jú é bang, byù rhoi é bang, nghutbùn é bang, gyáng é bang, agè ashop kut râ hkyô lhoq htoq é bang, mó wui é jino a gyô é bang nghut akô.

31 Yhangmoq gi, a gying a hâng é bang, gidiq a zung é bang, chyit myit a bo é bang, shogyo nhikmyin a sê é bang nghut akô.

32 Haû pé lé kut é bang gi, shî gíng lhê gâ é, Garai Gasâng é dingmán tarâ joq é lé, yhangmoq sê to kôlhâng, haû pé lé, yhangmoq xoq kut nyi kô é htoq agó, haû hkyô lé kut é bang lé le, hkya-on waq toq akô nghut ri.

2

Garai Gasang Tarâ Jéyáng É Hkyô

1 Haû mù luî, góyuq lé tarâ jéyáng é sù nàng ê, nàng gi, mara mai wó he lut râ hkyô a joq lo; hkâsu mù gâ le, nàng yhang jéyáng nyi luî, mù haû pé lé, nàng kut nyi é yanmai, byù góbang lé jéyáng é hkûn, náng gûng nàng mara byi nyi bê nghut ri.

2 Haû dông kut nyi é bang lé, Garai Gasang gi, tengmán é dông tarâ jéyáng é lé, nganhung sê nyi lhê.

3 Haû mù, byù za nghut to luî, góbang lé gi, jéyáng mù, yhumsing gi, haû dông roq châng kut nyi é sù nàng ê, nàng gi, Garai Gasâng é tarâ

jéyáng hkyô mai wó hpang lut
râ su ngam nyi lê lú?

⁴ Haû a nghut jáng, nàng gi,
Garai Gasâng é ge é hkyo eq
nang lé myit wó shuí lêng
nhang é lé a sê é za, Yhâng
é agùn agó é ge é hkyô lé le,
myit hing é hkyô eq jân shi-
rang é hkyô lé le, wú tiq pyâm
nyi lê lú?

⁵ Nghut kôlhang, náng é
myit htân hkyô eq myit a
lêng é nhiklhum é yanmai,
haû Garai Gasang dingmán
é đông tarâ jéyáng shít râ
nghut é, Yhâng é nhikmo-
yô é buinyi má hkâm zo râ
nhikmo-yo hkyô lé, yhums-
ing gùng yhang hkong tô nyi
bê nghut ri.

⁶ Garai Gasang gi, yuq
hkanmó lé, ó le ó kut é má
cháng luí, hkâm zo nhâng râ
nghut lê.

⁷ Jân shirâng mù, ge é hkyô
kut nyi é đông, hpungwup
shingkan lé le, aróng eq htên
byoq a sê é hkyô lé le, ho
é bang lé, Yhang gi, ahtum
abyuq é asak byi râ nghut lê.

⁸ Nghut kôlhang, haû yhum-
sing wuízat hkyô za hô luí,
tengmán hkyô lé he-ngik
pyám mù, agè ashop hkyô
lé cháng bâng é matú gi,
nhikmo-yo hkyô eq nhikjum
yo hkyô jé râ nghut lê.

⁹ Wuíhke hkyô eq iyon
yon hkyô gi, agè ashop kut
é xângzo byù yuq hkanmó
chýáng jé râ nghut lê; sâng-
hi má Yudaq byu pè chýáng jé
mù, tûngbaù pè chýáng le jé râ

nghut lê.

¹⁰ Nghut kôlhang, hpung-
wup shingkan, aróng eq
nguínón hkyô gi, haû ge
é hkyô kut é bang yuq
hkanmó chýáng jé râ nghut
lê: sâng-hi má Yudaq byu
pè chýáng jé mù, tûngbaù pè
chýáng le jé râ nghut lê.

¹¹ Hkâsu mù gâ le, Garai
Gasang gi, myoqdong a hkyin
é Sû nghut lê.

¹² Haû jep é tarâ lé a sê
é mara kut shut é bang
lunglhang gi, jep é tarâ đông
a nghut é za htên byoq kó
râ nghut lê. Haû jep é tarâ
hkaû má mara kut shut é
bang lunglhang gi, jep é tarâ
đông jéyáng é hui zo kó râ
nghut lê.*

¹³ Hkâsu mù gâ le, haû jep é
tarâ lé wó gyô é bang lé, Garai
Gasâng é hí má dingmán bang
gâ é a nghut é za, jep é tarâ
lé châng kut é bang za sheq,
dingmán bang gâ é hui râ
nghut lê.

¹⁴ Haû jep é tarâ lé a wó é
tûngbaù pé gi, jep é tarâ hkyô
lé, yhang baù yhang châng
nyi kô é hkûn, jep é tarâ lé
a wó kôlhang, yhumsing gùng
yhumsing é matú tarâ dut
bekô nghut ri.

¹⁵ Yhangmoq gi, haû jep é
tarâ hkyô pé lé, yhangmoq
é i-myit unghkaû má kê to
bê nghut é lé, tûn shít bekô
nghut mù, yhangmoq é myit
má hkâm zô é hkyô le, haû
lé saksé hkâm byi nyi é eq,
yhangmoq myit é hkyô gi,

* 2:12 Haû jep é tarâ lé a sê bang gâ é gi, tûngbaù pé lé gâ é nghut luí, haû jep é tarâ
hkaû má é bang gâ é gi, Yudaq byu pé lé gâ é nghut lê.

ahkuî mara hun kat, ahkuî mara hkyut kat kut nyi ri.

16 Haú hkyô gi, ngò taí pyo é gabú danglù eq rajung za, byu pê é zaú nghop tô é hkyô pé lé, Hkrisduq Yesuq dông mai Garai Gasâng èq tarâ jéyáng é buinyi má dut râ nghut lhê.

Yudaq Byu Pé Eq Jep É Tarâ

17 Nghut kôlhang, nàng gi, náng gûng nàng Yudaq byù rayuq nghut lhê ga mù, haú jep é tarâ lé lumhkau nyi é eq Garai Gasang lé xoq é hkyô má nghutbùn nyi é sù;

18 Yhâng ô nau é hkyô lé sê é eq haú jep é tarâ mhoqshit é hkyô wó yû bê nghut é yanmai, je ahkyak é hkyô lé sê gàm hkoq é sù;

19 haú jep é tarâ má, hpaqchyî eq tengmán hkyo é alik wó sù nghut é yanmai, haú myoqjit bâng é matú hkyô-u shê sù eq mauchut hkaû mâ é bâng é matú maubó nghut sù;

20 byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi,

21 nàng, góbang lé mhoq byi sù nhîng, yhumsing gùng yhumsîng a mhoq yû lhú? A wó hkau ga hko taí luî nhîng, nàng gi, hkaû lhê a nghut lhú?

22 Su-myi sulàng lú hkyô a wó kut ga byu pé lé taí luî nhîng, nàng gi, su-myi sulàng lú hkyô kut lhê a nghut lhú? Hpara lô lé a jú dik sù nàng gi, noqkuq yhûm lé hpyoq zo

hpyoq shuq nyi lhê a nghut lhú?

23 Jep é tarâ eq séng luî nghutbun sù nàng gi, haú jep é tarâ lé lu laî é dông, Garai Gasang lé a hkungga kut lhê a nghut lhú?

24 Haú gi, "Garai Gasâng é myîng gi, nungmoq é yanmai, tûngbau pê chyáng lhoq hpoî pyâm é huî ri."* ga kê tô é eq rajung za nghut ri.

25 Haú jep é tarâ lé nàng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhang, nàng, jep é tarâ lé lu laî é nghut jáng, a hpyit é eq rajung za dut bê nghut ri.

26 Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang dông ge són byi lhê a nghut kó lhú?

27 Kê tô é tarâ lé wó mù, ahpyo-kuq hpyit hkam to gù nghut é, tarâ lu laî é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hûn râ nghut lhê.

28 Hkâsu mù gâ le, shing-gan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit kyîng a nghut.

29 Ahte myit hkaû má Yudaq byù nghut sù za, Yudaq byù kyîng nghut lhê. Kê tô é tarâ dông a nghut é za, Woinyí èq myit má ahpyo-kuq hpyit é gi, ahpyo-kuq hpyit kyîng nghut bê. Haú yuq é

hkyá-on kungtôn hkyô gi, byù mai lo é a nghut, Garai mai lo é ru nghut lâ.

3

Garai É Lhumzui Hkyô

¹ Haú dông ga jang, Yudaq byù rayuq dut nyi é gi, hai akyû hkâm zo râ lú? Ahpyo-kuq hpyit hkyô gi, hai akyû bò râ lú?

² Hkyô hkangmó má gyai akyû bò lâ! Je hí má gi, haú Garai Gasâng é mungdang lé yhang, yhangmoq lé ap byi bê nghut ri.

³ Yhangmoq mâ é ra-am lumjǐng myit a bo é nghut le gi, hkâsu kó lú? Yhangmoq lumjǐng myit a bo é yanmai, Garai Gasâng é lhumzui hkyô lé akyû a bò nhâng wó dut râ lú?

⁴ Hká dông le a wó dut!

"Haú mù, nàng dang taí é hkûn, dingmán é hkyô wó lhoq htoq râ eq, nàng jéyáng huí é hkûn, ùng râ nghut lâ."*

ga kâ tô é eq rajung za, byù yuq hkangmó gi, byù-mhaú dut kôlhang, Garai Gasang gi, tengmán nyí sháng gaq.

⁵ Nghut kôlhang, nga-nhúng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lâ; haú nghut jáng, nga-nhúng hkâsu nghû taí râ lú? Nga-nhúng lé Garai Gasang nhikmo-yô é hkyô gi, Yhang a tarâ mù nghut lâ lú? (Ngò gi, byù hkyam dông taí hting é nghut lâ.)

⁶ Ratsuí lhang a nghut! Haú su ru nghut le gi, haú mingkan lé, Garai Gasang hkâsu wó jéyáng râ lú?

⁷ Rayuq yuq, "Ngò mhaú é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkang lé je wó lhoq hu nhang é nghut le nhing, haí mù luí, ngò, yubak byù rayuq dông mara byí é hui zô nyi ra shirâ lú?" ga taí dang-rháng râ nghut lâ.

⁸ "Ge é hkyô htoq sháng gaq, nga-nhúng, agè ashop hkyô kut sháng." nghû haí mù a taí kô é lú? Dang haú lé ngamoq taí é nghut lâ ga luí, ngamoq lé lumù gansang é dông byù ra-am taí akô. Haú bang gi, mara dam byí é hui zo gǐng bang nghut akô.

Dingmán Byù A Nyi

⁹ Haú jáng, hkâsu nghû lo râ lú? Nga-nhúng gi, je gè bang nghut lâ lú? Ratsuí lhang a nghut. Yudaq byù nghut nghut, tǔngbau pé nghut nghut, yubak mara hkaú mâ é bang chyat nghut lâ nghû, ngamoq taí san kyô wú bê nghut lâ.

¹⁰ Chyúmdang má kâ tô é le, "Dingmán é byù a nyi, rayuq lhang a nyi nghut ri;

¹¹ Sê gyô é byù rayuq le a nyi, Garai Gasang lé ho é byù le a nyi nghut ri;

¹² Lhunglhang bang gi, lhing ló byuq bekô; yhangmoq gi, hpau a dap

bang chyat dut byuq
bekô nghut ri.

Ge é kut sù ó a nyi, rayuq
lhang a nyi nghut ri."☆

gâ ri.

13 "Yhangmoq é hkyung gi,
hpông tô é lup pé nghut
akô; yhangmoq é shô
gi, mhaû akô."☆

"Yhangmoq é nhutwuí pé má
gi, shíduq bò lhangmui
é duq dap bum ri."☆

gâ tô ri.

14 "Yhangmoq é nhut pé gi,
nhing myíng nhing htê
eq myit nô danghko
baú byíng zan tô ri."☆

gâ tô ri.

15 "Yhangmoq é hkyî pé gi,
byù sat sui lhoq htoq râ
matú, lawán nau akô;

16 Yhangmoq sô nyi é hkyô
pé gi, htên byoq é eq
wuihkê é ahkô tông tô é
nghut mù,

17 nguóngón é hkyô lé
gi, yhangmoq a sé kó
nghut ri."☆

gâ tô ri.

18 "Yhangmoq é myoq hí má
Garai Gasang lé gyuq
hkunggâ é hkyô, a bò
kó nghut ri."☆

gâ tô ri.

19 Byù yuq hkanmó é
nhut gi, tû táí jang a joq dut
byuq mù, mingkan gón gi,
Garai Gasang é hí má mara
bo é bang dut nyi sháng gaq
ga, haû jep é tarâ má táí é
lhunglhang gi, jep é tarâ ô
má nyi é bang lé táí é nghut
é hkyô lé, nga-nhúng sê lhê.

20 Haû mù luí, jep é tarâ lé
châng é đông mai, ó yuq le,
Yhâng é hí má dingmán sù gâ
é wó hui râ a nghut; jep é
tarâ đông gi, yubak mara bo
é hkyô lé wó sê yu é za nghut
lhê.

*Lumj́ng Jáng, Dingmán Sù
Wó Dut É Hkyô*

21 Ahkuí kúm gi, jep é tarâ
đông a nghut é za, haû jep é
tarâ eq myiqhtoi laiká pé mai
saksé hkâm tô é Garai Gasang
chyáng mâ é dingmán hkyô lé,
sé nhâng bê nghut ri.

22 Garai Gasang chyáng mâ
é dingmán hkyô haû gi, Yesuq
Hkrisduq lé lumj́ng é đông
mai nghut mù, lumj́ng bang
banshoq htoq má jé é nghut
lhê. Gamhkuí é hkyô a joq.

23 Hkâsu mù gâ le,
lhunglhang bang gi, yubak
mara kut shut bê bang chyat
nghut mù, Garai Gasang é
hpungwup shingkan lé a
hkyit hkap byuq lo kó nghut
ri.

24 Ahkuí kúm gi, Hkrisduq
Yesuq mai lo é hkyi yù hkyô
đông, Garai Gasang é jejú èq,
mara hkyut san byi é laí laí
wó hui bê nghut ri.

25 Garai Gasang gi, Yesuq
é sui lé lumj́ng bâng matú,
shíhtáí gunglik hkungga ral-
hum đông, Yesuq lé byi pyám
bê nghut ri. Haû gi, laí lò bê
yubak mara lé lhut pyám byi
shoq, Garai Gasang myit hîng
byi bê nghut é yanmai, Yhâng
é tengmán hkyô lé tûn shit é
nghut ri.

26 Garai Gasang haû su kut é gi, Yhânggùng yang dingmán Sû nghut é eq, Yesuq lé lumjǐng é sũ lé mara hkyut san byĩ é Sû nghut râ matú, ahkuĩ lhê ipyat má, Yhâng é tengmán hkyô lé shit byĩ é nghut lhê.

27 Haû su nghut jǎng, nghutbun jowò joq ri lhú? A joq. Hai tarâ mai a joq dut byuq é lhú? Haû jep é tarâ châng é yanmai nghut lhê lhú? A nghut, lumjǐng hkyo é yanmai sheq a joq dut byuq é nghut lhê.

28 Hkâsu mù gâ le, byù gi, haû jep é tarâ châng é dǒng a nghut é za, lumjǐng luĩ, mara hkyut san byi huĩ é hkyô lé, ngameq lum nyi lhê.

29 Garai Gasang gi, Yudaq byu pê é Garai Gasang za nghut lhê lhú? Tǔngbaù pê é Garai Gasang le a nghut lhú? Nghut lhê, tǔngbaù pê é Garai Gasang le nghut lhê.

30 Hkâsu mù gâ le, Garai Gasang gi, rayuq za nghut é yanmai, rajung za lumjǐng luĩ, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê.

31 Haû nghut jǎng, nga-nhúng gi, lumjǐng myit hau eq, jep é tarâ lé lhoq hpoĩ pyám râ lhú? Ratsuí lháng a nghut! Nga-nhúng gi, jep é tarâ haû lé lhoq gǐng tǐng é bang ru nghut lhê.

4

Abraham, Mara Hkyut San

Huĩ É Hkyô

1 Haû su nghut jǎng, nga-nhúng é ìchyĩ íwa Abraham gi, haû hkyô mai haĩ wó sê yu ri nghũ, taĩ râ lhú?

2 Abraham gi, zui saĩ é dǒng mai, mara hkyut san byi huĩ é ru nghut le gi, yang nghutbun jang joq râ nghut lhê; nghut kǒlhang, Garai Gasang é hí má gi, yang haû dǒng a nghut.

3 Chyúmdang má hkâsu gâ tô ri lhú gâ le, "Abraham gi, Garai Gasang lé lumjǐng bê nghut mù, yang lé, dingmán sũ ga sǒn byi bê nghut ri."* gâ ri.

4 Zui saĩ é sũ gi, yhâng é zuihpau lé, chyunghuq dǒng wó yu é a nghut é za, wó yũ gǐng luĩ, wó yu é ru nghut lhê.

5 Nghut kǒlhang, zui saĩ é hkyô dǒng a nghut é za, haû agè ashop hkyô lé mara hkyut san byĩ é Garai Gasang lé lumhkau é sũ gi, yhâng é lumjǐng myit é yanmai, dingmán sũ ga sǒn byi huĩ é nghut lhê.

6 Haû eq rajung za, yang zui saĩ é hkyô dǒng a nghut é za, Garai Gasang eq dingmán sũ ga sǒn byi huĩ é, Garai Gasang chyáng mã é shimân jeju wó é sũ eq séng luĩ, Dawiq taĩ é gi,

7 "Tarâ lu laĩ é lé mara hkyut pyám byi huĩ é eq yubak mara lé nghop pyám byi huĩ é bang gi, hkungsô wó nyi ri.

8 Bo tô é mara lé, Yhumsing eq mara a sǒn byĩ é huĩ

sû gi, hkungsô wó nyi ri."☆
gâ ri.

9 Haû sù é jeju gi, ahpyo-kuq hpyit hkâm bâng é matú za nghut lhê lhú? Ahpyo-kuq a hpyit bâng é matú le nghut lhê lhú? Hkâsu mù gâ le, Abraham é lumjǐng myit lé, dingmán sù ga són byi bê nghut lhê nghû, ngamoq taí nyi bê nghut lhê.

10 Haû su són byí é gi, hkâ-nhám nghut lhê lhú? Ahpyo-kuq hpyit hkâm é htàng má lhú? A nghut jáng, hí má lhú? Haû gi, ahpyo-kuq hpyit hkâm é htàng má a nghut é za, hí má ru nghut lhê.

11 Hau htoq agó, Abraham gi, yhang, ahpyo-kuq hpyit a hkam yù shí é hkûn mai, lumjǐng luí wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haû mù, yhang gi, haû ahpyo-kuq hpyit a hkam yù kôhang, lumjǐng é lunglhang bang lé dingmán bang ga són byí é wó hui râ matú, haû bâng é îwa dut bê nghut ri.

12 Haû ahpyo-kuq hpyit hkâm é za a nghut, nga-nhûng é îwa Abraham, ahpyo-kuq hpyit a hkam yù shí má wó é lumjǐng hkyô é hkyî-kám lé cháng luí ahpyo-kuq hpyit bâng é îwa le, yhang nghut ri.

13 Mingkân é amyû hkûng xoq pé dut râ ga, Abraham eq yhâng é awut ashín pé lé byi tô é danggidiq gi, jep é tara é yanmai a nghut é za, lumjǐng

hkyô mai lo é dingmán hkyô dông ru nghut lhê.

14 Hkâsu mù gâ le, jep é tarâ dông nyi yap é bang gi, amyû hkûng xoq pé nghut é nghut jáng, lumjǐng hkyô gi, akyû a bo é eq, danggidiq gi, hpau a dap é dut byuq lhê.

15 Haû jep é tarâ gi, nhikmo-yo hkyô lhoq htoq é nghut lhê; nghut kôhang, jep é tarâ a joq jáng gi, tarâ lu lai hkyô le joq râ a nghut.

16 Haû mù luí, danggidiq gi, Abraham é awut ashín lunglhang bâng chyáng, jeju mai za lo é eq gingtǐng nyi é dut sháng gaq ga, lumjǐng hkyô mai lo é nghut lhê. Haû gi, jep é tarâ má lôm bâng é matú baú za a nghut, Abraham é lumjǐng hkyô má lôm bâng é matú le nghut lhê. Abraham gi, nga-nhûng lunglhang bâng é îwa nghut ri.

17 "Ngò gi, nang lé, byù myû myo myô é îwa dut nhâng bê."☆ ga kê tô é eq rajung za, haû shi byuq bê bang lé wó lhoq dui é eq a joq wú é zè lé joq shoq wó kut é, yhang lumjǐng é sù Garai Gasâng hí má, Abraham gi, nga-nhûng é îwa nghut lhê.

18 "Náng é awut ashín pé le, haû eq rajung za myô lò râ nghut lhê."☆ ga yhang lé taí kyô to bê eq rajung za, yhang gi, myit myoqbyù jowò haí a joq kôhang, lumjǐng luí myoqbyu nyi é nghut mù, byù myû myo myô é îwa dut bê nghut ri.

19 Yhang gi, rashô zàn kô jé byuq bê nghut mù, yhânggùng gi, shi é gyá dut é hui zô é eq Sarah é zoyhùm shibó le shum byuq kôlhang, yhang gi, lumjínq myit a yom byuq nghut ri.

20 Hau htoq agó, Garai Gasâng é danggidiq eq séng luí, a lumjínq a dut é eq hê myit mhô myit a dut é za, yhâng é lumjínq myit lé saí lhoq ging títq mù, Garai Gasang lé hkya-on kungtôn luí,

21 Garai Gasang gi, Yhang byí tô é danggidiq eq rajung za wó kut râ a-tsam bò sù nghut é lé, yhang myit zing nyi ri.

22 Hau é yanmai, "Yhang lé, dingmán sù ga són byi bê nghut ri."* gâ tô é nghut lhê.

23 "Yhang lé, són byi bê." ga, kâ tô é dang gi, yhang é matú za a nghut,

24 nga-nhúng é Yhumsíng Yesuq lé, shi é mai lhoq dui toq yû sù Garai Gasang lé lumjínq luí, Yhang èq dingmán bang ga són byi râ nghut é, nga-nhúng é matú le nghut lhê.

25 Yhumsíng Yesuq gi, nga-nhúng é yubak marâ é matú, shí hkám byi râ đông ap pyâm é hui luí, nga-nhúng, mara hkyut san byí é hui râ matú, lhoq dui toq é hui bê nghut ri.

5

Nguingón Hkyô Eq Gabú Hkyô

* 4:22 Apûn 15:6

1 Haû mù luí, nga-nhúng gi, lumjínq é đông mai mara hkyut san byí é hui bê nghut é yanmai, nga-nhúng é Yhumsíng Yesuq Hkrisduq đông, Garai Gasang eq buinùm wó xoq yû bê nghut lhê.

2 Yesuq é yanmai, nga-nhúng gi, ahkuí wó yu to bê jeju shí má, lumjínq luí wó wâng bê nghut mù, Garai Gasâng é hpungwup shingkang lé myoqbyù luí gabú gumrong nyi lhê.

3 Haû za a nghut, nga-nhúng gi, wuîhke jamjau hkyô pé má le gabú gumrong nyi lhê. Hkâsu mù gâ le, wuîhke jamjau hkyô gi, hkam jan hkyô lhoq htoq ri;

4 hkam jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhúng sê lhê.

5 Myoqbyu to hkyô haû gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhâng é chyitdap myit lé, Yhang mai, nga-nhúng lé byí tô é Chyoiyúng Woi-nyí đông, nga-nhúng é i-myt unghkaû má hut kat byi bê nghut ri.

6 Hkâsu mù gâ le, nga-nhúng gi, a-tsam a bò dut tô ashí u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shí hkám byi bê nghut ri.

7 Gè gè ga jáng, dingmán su é matú shí hkám byi râ byu

gi, shau râ nghut lâhê; nghut kôlhang, byù gè rayuq é matú kúm gi, wám shî hkâm é byù nyi sê lâhê.

⁸ Nghut kôlhang, nga-nhúng gi, yubak dap bang nghut nyi ashî hkûn, nga-nhúng é matú Hkrisduq shî hkâm byî é má, Garai Gasang gi, Yhâng é chyitdap myit, nga-nhúng lé shit byi bê nghut ri.

⁹ Nga-nhúng gi, ahkuî, Yhâng é sui mai mara hkyut san byî é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui râ nghut lâhê.

¹⁰ Hkâsu mù gâ le, nga-nhúng gi, Garai Gasâng é gye pé nghut nyi ashî u le, Yhâng Zo shî hkâm byî é dông, Garai Gasang eq buinùm wó xoq yu é hui bê nghut lâhê. Wó xoq yu to bê nghut jáng, nga-nhúng gi, Yhâng é asak dông mai, gè gè yhang hkyi yu é hui râ nghut lâhê.

¹¹ Haû su za a nghut, nga-nhúng gi, nga-nhúng é Yhumsîng Yesuq Hkrisduq dông mai, buinùm wó xoq yu é jeju lé, ahkuî wó yu to bê nghut mù, Yhâng é yanmai, Garai Gasang má le, gabú gumrong nyi lâhê.

*Shi É Gi, Adam É Yanmai,
Dui É Asak Gi, Hkrisduq É Yanmai*

¹² Byù rayuq dông mai, yubak mara gi, mingkan má jé wâng bê nghut luí, shî-nò hkyô gi, yubak marâ é yanmai châng jé bê nghut ri; haú dông mai, byù lhunglhang

bang gi, yubak dap bang chyat nghut byuq mù, shî-nò hkyô gi, byù lhunglhang bâng chyáng jé bê nghut ri.

¹³ Hkâsu mù gâ le, haû jep é tarâ lé a byi shimá, yubak mara gi, mingkan má joq to bê nghut lâhê. Nghut kôlhang, jep é tarâ a joq shî é hkûn gi, yubak mara lé mara su a ngàm shî é nghut lâhê.

¹⁴ Haû su ga kôlhang, Adam su hkunmó lé lu laí é dông mara a kut shut bâng é ah-toq má lhang, shî-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azòng nghut ri.

¹⁵ Nghut kôlhang, jeju chyunghuq gi, haû mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung!

¹⁶ Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tarâ jéyáng é hkyô gi, byù rayuq é mara má cháng mù, mara dam byî é hkyô lhoq htoq é nghut lâhê; nghut kôlhang, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lâhê.

¹⁷ Hau htoq agó, byù rayuq tarâ lu lai luí, haû rayuq

é yanmai, shî-nò hkyô up nyi bê nghut lâ, ahkuî kúm, haû Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak ùi hkyô má uphkanq nyi kó râ nghut lâ.

¹⁸ Haû mù luî, tarâ lu lai é hkyô ralhûm é yanmai, byù lhunglhang bang gi, mara dam byî é hui zo kô é su, dingmán hkyo é muzó ralhûm é yanmai, byù lhunglhang bang gi, asak ùi hkyô eq sêng é mara hkyut san byi hkyô lé wó bê nghut ri.

¹⁹ Hkâsu mù gâ le, byù rayuq jîno a gyô é yanmai, myo myo gi, yubak dap bang dut byuq é su, byù rayuq jîno gyô é yanmai, myo myo gi, dingmán bang gâ é hui kó râ nghut lâ.

²⁰ Haû jep é tarâ jat é gi, tarâ lu lai hkyô je myo râ matú nghut lâ. Nghut kôlhang, yubak mara myô jat é hkûn, jeju gi, je riyhang myô jat lo é nghut lâ.

²¹ Haû mù, yubak mara gi, shî-nò hkyô dông uphkâng bê su, jeju gi, nga-nhúng é Yhumsîng Yesuq Hkrisduq é yanmai, ahtum abyuq é asak wó byî é dingmán hkyô dông up râ nghut lâ.

6

Hkrisduq Eq Rading Ralhum

¹ Haû nghut jáng, nga-nhúng gi, hkâsu nghû tai râ lú? Jeju myô jat lò sháng

gaq nghû, nga-nhúng, yubak mara kut xoq nyi râ lú?

² Haû su a nghut sháng gaq! Nga-nhúng gi, yubak mara eq shi gang bê bang nghut lâ; hkâsu mù haû má wó ùi nyi lo râ lú?

³ Hkrisduq Yesuq eq rading ralhum za dut râ matú, wui-myhup hkâm yù bê bang nga-nhúng banshoq gi, Yhâng é shî hkám hkyô má le rading ralhum za dut râ matú, wui-myhup hkâm yù bê nghut é lé, nungmoq a sé kó lú?

⁴ Haû mù luî, Hkrisduq gi, Îwâ é hpungwup shingkâng eq, shî bê mai lhoq ùi toq huî é su, nga-nhúng le, asak asik dông wó ùi nyi sháng gaq nghû, nga-nhúng gi, wui-myhup hkâm é dông, Yhang eq rahá, shî hkâm é eq myhup yhum é hui bê nghut lâ.

⁵ Nga-nhúng gi, Yhang shî hkám é hkyô má, Yhang eq rading ralhum za dut bê nghut jáng, Yhâng é dum ùi toq hkyô má le, Yhang eq rading ralhum za hkyak dut râ nghut lâ.

⁶⁻⁷ Hkâsu mù gâ le, shî bê sù gi, yubak mara mai lhoq lhut é hui bê nghut é yanmai, nga-nhúng gi, yubak marâ é jùn dut nó a ra lo mù luî, yubak mara gùng gi, lhoq htên pyâm é hui râ matú, nga-nhúng é byù xau gi, Yhang eq rahá jén sat pyâm é hui bê nghut é hkyô lé, nga-nhúng sê lâ.

⁸ Haû mù, nga-nhúng gi, Yhang eq rahá shî hkám bê nghut jáng, Yhang eq rahá ùi nyi râ nghut lâ nghû,

lumjǐng lhê.

⁹ Hkâsu mù gâ le, Hkrisduq gi, shî bê mai lhoq dui toq é hui bê nghut mù, Yhang gi, dum wó shi lo râ a nghut é lé, nga-nhúng sê lhê; shî-nò hkyô gi, Yhang lé hkâ-nhám le wó sing to râ a nghut lo.

¹⁰ Yhang shî hkâm é shî-nò hkyô gi, banshoq bâng é matú, yubak mara eq séng luí radâm za shî hkâm byi bê nghut ri; nghut kôlhang, Yhang dui nyi é asak gi, Garai Gasâng hí má dui nyi é nghut lhê.

¹¹ Haû eq rajung za, nungmoq gi, yubak mara eq shi gang luí, Hkrisduq Yesuq dông Garai Gasâng é matú asak dui nyi lhê nghû, sôn yù keq.

¹² Haû mù luí, nungmoq é htên byoq sê é gungdu má, yubak mara lé hkâ-uphkâng nhâng, uphkâng nhâng kô é nghut jáng, gungdu yut yut ô nau é agè ashop hkyô lé, nungmoq châng é nghut bê.

¹³ Nungmoq é gungdu showui showang pé lé, agè ashop hkyo é chûng zè pé dông yubak mara má hkâ-ap byi pyám kó, shî bê mai lhoq dui toq yû huí é bang su, yhumsing gùng yhumsing, Garai Gasâng chyáng kúm ap byi keq; nungmoq é gungdu showui showang pé lé, dingmán hkyo é chûng zè pé dông, Garai Gasâng chyáng ap byi keq.

¹⁴ Hkâsu mù gâ le, nungmoq gi, jep é tarâ hkaû má a nghut lô é za, jeju hkaû

má nghut nyi bekô yanmai, yubak mara gi, nungmoq lé sîng sù wó dut râ a nghut lo.

Dingmán Hkyo É Jùn Pé

¹⁵ Haû jáng gi, hkâsu kó lúh? Nga-nhúng gi, jep é tarâ hkaû má a nghut lo é za, jeju hkaû má nghut nyi bekô yanmai, mara wó kut shut kó râ lúh? Haû su a wó kut!

¹⁶ Nungmoq gi, rayuq yuq é jino gyo râ matú, yhumsing gùng lé jùn pé dông ap pyâm é hkûn, shî-nò hui râ nghut é yubak marâ é jùn dông nghut kôlhang, dingmán hkyô wó râ nghut é jino gyo hkyô nghut kôlhang, nungmoq châng nyi é nghut le gi, nungmoq, haû é jùn dut bê lé, a sé kó lúh?

¹⁷ Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mhoqshit hkyô lé, nungmoq é myit nhiklum banshoq èq cháng bekô nghut é yanmai, Garai Gasâng lé jeju hkyo-on sháng.

¹⁸ Nungmoq gi, yubak mara mai lhoq lhut é hui bang nghut kômù, dingmán hkyo é jùn dut bekô nghut ri.

¹⁹ Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ dông ngò tái râ ga jáng: nungmoq gi, nungmoq é gungdu showui showang pé lé, a sansêng é hkyô eq agè ashop hkyô myô jat nhang é má jùn dông lhang ap byi wú bekô nghut é su, ahkuí gi, chyoiyúng hkyô wó yû râ matú, haû pé lé, dingmán hkyô má jùn dông ap byi keq.

20 Nungmoq gi, yubak marâ é jùn dut nyi kô é hkûn, dingmán hkyo èq uphkanq é mai lut nyi kô é nghut lhê.

21 Ahkuí, nungmoq hoqjung nghû wú htoq é pé gi, haú u lé, hai akyû wó yû kô é lhú? Hau pé gi, shi byuq é má htûm é chyat nghut ri.

22 Nghut kôlhang, ahkuí gi, nungmoq, yubak mara mai lhoq lhut é hui bekô nghut mù, Garai Gasâng é jùn dut bekô nghut ri; hau é akyû gi, chyoiyúng hkyô wó yu é nghut mù, ahtum abyuq é asak wó râ nghut lhê.

23 Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasâng é chyunghuq gi, nga-nhûng é Yhumsîng Hkrisduq Yesuq é yanmai, ahtum abyuq é asak nghut ri.

7

Tarâ Mai Lut É Hkyô

1 Gumang wuê, ngò gi, tarâ lé sê é bang nungmoq lé tâi nyi lhê: haú tarâ gi, byù rayuq lé, yhang, asak dui nyi é u lé za wó uphkanq é lé, nungmoq a sé kó lhú?

2 Dangké, ikun wàng bê myiwe myhí rayuq gi, yhâng é yhumsîng hpó asak dui nyi é ahkyíng má, tarâ èq up zing tô é hui ri; nghut kôlhang, yhâng é yhumsîng hpó shi byuq é nghut jáng gi, haú ikun wàng tarâ mai, yhang wó lut bê nghut ri.

3 Haú nghut é yanmai, yhâng é yhumsîng hpó asak

dui nyi ashî u lé, yuqgè góyuq eq hâng lhûm é nghut jáng gi, yhang lé, sulàng lú sù ga kó râ nghut lhê. Nghut kôlhang, yhâng é yhumsîng hpó shi byuq é nghut jáng gi, yhang, tarâ haú mai lut bê nghut luí, yuqgè góyuq eq hâng lhum kôlhang, sulàng lú sù a nghut lo.

4 Haú mù luí, ngá é gumang wuê, nungmoq le, haú shi byuq é mai lhoq dui toq yù hui bê sù Yuqgè chyáng wó xoq mù, nga-nhúng gi, Garai Gasang lé ashî wó zui byi sháng gaq ga, Hkrisduq é gungdu dông mai, jep é tarâ eq shi gang bê nghut lhê.

5 Hkâsu mù gâ le, nga-nhúng, yubak gungsho má nghut nyi é hkûn, nga-nhúng gi, shî-nò hkyo é ashî zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhúng é gungdu pé má mù zui nyi é nghut lhê.

6 Nghut kôlhang, ahkuí gi, nga-nhúng lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kê tô é hkyô xau dông a nghut é za, Woi-nyí é hkyô sik dông nga-nhúng dojau nyi é nghut lhê.

Jep É Tarâ Eq Yubak Mara

7 Haú jáng, nga-nhúng hkâsu táí râ lhú? Jep é tarâ gi, yubak mara nghut lhê lhú? Ratsuí lháng a nghut! Gè gè ga jáng, haú jep é tarâ dông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq

myit hkâbô[☆] ga jep é tarâ má a taí tô é nghut jáng, myoqnoq é hkyô lé, ngò sé râ a nghut.

⁸ Nghut kôlhang, yubak mara gi, hkunmó é ahkáng lé chùng mù, ngò má myoqnoq hkyô jung hkangmó lhoq htoq byi ri; hkâsu mù gâ le, jep é tarâ hkaú má a nghut jáng, yubak mara gi, shi é za nghut lhê.

⁹ Ngò gi, tarâ hkaú má a nghut é za asak dui wú bê nghut lhê; nghut kôlhang, haú hkunmó htoq lô jáng, yubak mara gi, dui lò mù, ngò gi, shi bê nghut lhê.

¹⁰ Haú mù luí, asak dui nhâng râ matú nghut é hkunmó haú gi, shi-nò hkyô dut byuq é lé, ngò wó sê é nghut lhê.

¹¹ Hkâsu mù gâ le, yubak mara gi, hkunmó é ahkáng lé chùng mù, ngo lé mhaú yù luí, hau eq ngo lé shi nhang ri.

¹² Hau pé lé wú jáng, jep é tarâ gi, chyoiyúng ri; haú hkunmó gi, chyoiyúng, dingmán é eq ge é nghut ri.

¹³ Haú nghut jáng, ge é hkyô haú gi, ngá é matú shi-nò hkyô dut byuq bê lú? Haú đông a nghut! Nghut kôlhang, yubak mara lé gi, yubak mara đông hkyak wó lhoq htoq shit râ matú, haú ge é hkyô đông mai, yubak mara gi, ngò má shi-nò hkyô lhoq htoq bê nghut luí, yubak mara gi, gè gè yhang agè ashop dut é lé, hkunmó đông mai tân shit é nghut lhê.

¹⁴ Hau htoq agó, jep é tarâ

gi, woi-nyí eq sêng é hkyô nghut é lé, nga-nhúng sê lhê; nghut kôlhang, ngò má gi, gungsho eq sêng é hkyô za bo é nghut luí, yubak mara má jùn đông ung zô é hui bê nghut lhê.

¹⁵ Ngò haí kut nyi é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê.

¹⁶ Ngò a kut nau é lé kut é nghut jáng gi, haú jep é tarâ ge é lé, ngò myit huí é nghut lhê.

¹⁷ Ahkuí gi, haú lé ngò yhang kut nyi é a nghut lo, ngò má lúng tô é haú yubak sheq kut é ru nghut lhê.

¹⁸ Ngò má, nghut bê, ngá é yubak gungsho má ge é hkyô haí le a bo é lé, ngò sê lhê. Hkâsu mù gâ le, ge é hkyô lé kut nau é myit ngò má bò kôlhang, haú lé a wó kut htoq nghut ri.

¹⁹ Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri.

²⁰ Ahkuí, a kut nau é hkyô lé ngò kut nyi é nghut jáng, haú lé ngò yhang kut nyi é a nghut lo é za, ngò má lúng tô é haú yubak sheq haú lé kut nyi é ru nghut lhê.

²¹ Haú mù, ge é hkyô lé ngò kut nau é hkûn, ngò má agè ashop hkyô htoq lô lô mù é tarâ lé, ngò myang ri.

²² Hkâsu mù gâ le, ngò gi, Garai Gasâng é tarâ lé, ngá é i-myit unghkaú má myit ngui

gabú nyi lê.

²³ Nghut kôlhang, ngá é gungdu showui showang pé má bo é gotû tarâ gi, ngá é i-myt tarâ eq majan zân lhùm é nghut luí, ngá é gungdu showui showang hkaû má mù zui nyi é yubak é tarâ má, ngo lé shúmbyû dut nhang é lé, ngò myang ri.

²⁴ Ngò gi, shogyo rayhup dut sù nghut ri-nhung! Shî nhang é gungdu shî mai, ó yuq wá, ngo lé wó hkyi yù râ lú?

²⁵ Nga-nhúng é Yhumsîng Yesuq Hkrisduq dông mai wó lut bê nghut mù, Garai Gasang lé jeju hkya-ôn nyi lê!

Haû mù luí, ngò yhang, myit é dông gi, Garai Gasâng é tarâ lé châng lhê, nghut kôlhang, yubak gungsho dông gi, yubak é tarâ lé châng lhê.

8

Haû Woi-nyí Mai Asak Dui É Hkyô

¹ Haû mù luí, ahkuí, Hkrisduq Yesuq má nghut nyí bâng é matú gi, mara byí é hkyô a joq lô é nghut lhê.

² Hkâsu mù gâ le, asak duì hkyô eq sêng é Woi-nyí é tarâ gi, Hkrisduq Yesuq dông, yubak mara eq shî-nò hkyo é tarâ mai, ngo lé lhoq lhut yû bê nghut lhê.

³ Haû jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkungga dut nhâng râ matú, yubak byu é gungghkyâng

dông, Yhang Zo sîng lé nhang kat é dông kut pyám bê nghut ri.

⁴ Haû mù, Garai Gasang gi, yubak gungsho dông asak a dui é za Woi-nyí dông asak duì bang nghut é nga-nhúng má, haû jep é tarâ má bo é hkyô pé lé, wó lhoq dik râ matú, gungsho ralhum má, mara lé doqđân pyám bê nghut ri.

⁵ Haû yubak gungsho dông asak dui é bang gi, gungsho yut yut ô nau é hkyô pé lé myit zuq nyi akô; haû Woi-nyí dông asak dui é bang kúm gi, Woi-nyí ô nau é hkyô pé lé myit zuq nyi akô nghut ri.

⁶ Haû yubak byu é myit gi, shi é hkyô nghut ri; haû Woi-nyí eq hkgang to huí su é myit kúm gi, asak eq ngu-ingón hkyô nghut ri.

⁷ Haû yubak myit gi, Garaí é tarâ ô má a nyi é htoq agó, haû lé a wó châng kut é yanmai, Garaí é gye nghut ri.

⁸ Haû yubak gungshô eq hkgang tô é huí bang gi, Garai Gasang lé a wó gabú nhâng kó nghut ri.

⁹ Nghut kôle, Garai Gasâng é Woi-nyí gi, nungmoq chyáng lúng nyí bê nghut jáng, nungmoq gi, haû yubak gungshô eq hkgang to huí é bang a nghut lô é za, Woi-nyí eq hkgang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê.

¹⁰ Nghut kôlhang, nàng má Hkrisduq nyi nyi é nghut jáng, náng é gungdu gi, yubak

marâ é yanmai shî kôlhang, náng é woi-nyí gi, dingmán hkyo é yanmai dui nyi ri.

¹¹ Hau htoq agó, Yesuq lé shi é mai lhoq dui toq yû Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yû Sû gi, nungmoq má nyi nyi é, Yhâng é Woi-nyí dông mai, nungmoq é, shî sê é gungdu pé lé le, asak dui nhâng râ nghut lhê.

¹² Haû mù luí, Gumang wui ê, nga-nhúng gi, yubak gungsho dông asak dui râ matú, wó wó é bang a nghut.

¹³ Hkâsu mù gâ le, haû yubak gungsho dông asak dui kô é nghut jáng, nungmoq gi, shî râ nghut lhê; nghut kôlhang, haû gungshô é shut shaí hkyô lé, Woi-nyí eq sat pyám kô é nghut jáng, nungmoq gi, asak dui râ nghut lhê.

¹⁴ Garai Gasâng é Woi-nyí eq shuí u é hui bang gi, Garai Gasâng é yhangzô pé nghut lhê.

¹⁵ Hkâsu mù gâ le, nungmoq gi, gyuq râ matú, nungmoq lé jùn dum taú dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haû mù, nga-nhúng gi, Yhang é yanmai, "Aba,* Áwa ê" nghû wut é nghut lhê.

¹⁶ Nga-nhúng gi, Garai Gasâng é yhangzô pé nghut é lé, Woi-nyí haû gi, nga-nhúng é woi-nyí eq rahá saksé hkâm nyi ri.

¹⁷ Ahkuí, nga-nhúng gi, zo wui nghut bê yanmai, Hkrisduq eq rahá, Garai Gasâng é amyû hkûngxoq pé wó dut é nghut lhê. Nga-nhúng gi, Hkrisduq é wuihke jamjau pé lé, gè gè yhang bo hui zô é nghut jáng, Yhâng é hpungwup shing kang lé le, bo myang hkam yù râ nghut lhê.

Htângnùng Lhê É Hpungwup Shing kang

¹⁸ Nga-nhúng é ahkuí lhê é wuihke jamjau hkyô pé gi, nga-nhúng lé shit râ nghut é hpungwup shing kang eq whuí râ a gingdán nghû, ngò wó myit ri.

¹⁹ Haû hpan to huí é lhunglhang gi, Garai Gasâng é yhangzô pé lé lhoq htoq shit byi râ lé, gyai yhang myit láng nyi akô nghut ri.

²⁰ Hkâsu mù gâ le, haû hpan to huí é lhunglhang gi, akyû a bo é chyat dut byuq bê nghut ri. Haû gi, yhumsîng hkyin yu é dông a nghut é za, haû su dut nhâng Sû ô nau é dông kut é nghut ri.

²¹ Haû hpan to huí é lhunglhang gi, htên byoq byuq râ matú shúm dut é mai lhoq lhut é hui luí, Garai Gasâng é yhangzo pé é hpungwup bo é luthkyô má wó wâng râ matú, myoqbyu tô é nghut lhê.

²² Haû hpan to huí é lhunglhang gi, ahkuí hkyíng

* 8:15 *Aba* gâ é gi, Aramaik dang dông "âwa" gâ é lichyûm nghut lhê.

je shoq, zohkû-nò no é su nò-kying kyîng nyî kô é lé, nga-nhúng sê lhê.

²³ Haû pé za a nghut, Woi-nyí é sâng-hi ashi† lé wó yû bê bang nga-nhúng le, zo pé đông yín yu é jeju lé láng uchyang, i-myt unghkaû má nò-kying kyîng é nghut lhê. Zo pé đông yín yu é jeju haû gi, nga-nhúng é gungdu hkyi xe yû hkyô nghut lhê.

²⁴ Hkâsu mù gâ le, nga-nhúng gi, myit myoqbyù hkyô haû mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsîng myang to bê é lé, ó yuq wá myit myoqbyù shirâ lhú?

²⁵ Nghut kôlhang, nga-nhúng gi, a wó shî é lé myit myoqbyu é nghut jáng, myit hîng hîng kut láng é nghut lhê.

²⁶ Haû eq rajung za, Woi-nyí gi, nga-nhúng wum nyhôm é hkyô má garúm byî ri. Nga-nhúng gi, haî dung râ é lé a sé kôlhang, haû Woi-nyí yhang gi, dang mai a wó tai htoq é nò-kying htê đông, nga-nhúng é matú bo dúng xoq byî ri.

²⁷ Nga-nhúng é i-myt unghkaû lé gôn wú é Sû gi, haû Woi-nyí myit é hkyô lé sê lhê, hkâsu mù gâ le, haû Woi-nyí gi, Garai Gasang ô nau é đông, sân-yúng bâng é matú bo dúng xoq byî ri.

Banshoq Lé Je Wó Ung

† 8:23 Woi-nyí é sâng-hi ashi gâ é gi, Woi-nyí gi, Garai Gasang byî é chyunghuq pé má é sâng-hi lhum nghut lhê.

Pyám Râ Hkyô

²⁸ Garai Gasang gi, Yhang myit sôn tô é eq rajung za, ji yû luí, Yhang lé chyitdap bâng é matú, lhunglhang lé ge é đông chyat kut é hkyô lé, nga-nhúng sê lhê.

²⁹ Hkâsu mù gâ le, Yhang Zo gi, gumang wùi myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó pûng nhâng râ matú, hí mai masat to bê nghut ri.

³⁰ Hau htoq agó, Yhang, hí mai masat to bê bang lé gi, ji yu ri; ji yù bê bang lé gi, mara hkyut san byî ri; mara hkyut san byî é hui bang lé gi, hpungwup shing kang bò nhang ri.

³¹ Haû jáng gi, shí hkyô eq séng luí, nga-nhúng haî tai shirâ lhú? Garai Gasang gi, nga-nhúng hkyam shut nghut jáng, nga-nhúng lé, ó yuq wá gyê wám kut râ lhú?

³² Yhumsîng é Yhangzo lé lhang a ha bûn é za, nga-nhúng banshoq bâng é matú ap byî pyâm é Sû gi, Yhang lé le, lhunglhang lé le, rahá lai lai byi râ a nghut lhú?

³³ Garai Gasang eq hkyin yu to bê bang lé, ó yuq wá mara wó hûn râ lhú? Garai Gasang gi, mara hkyut san byi Sû nghut ri.

³⁴ Hkrisduq Yesuq gi, shí hkâm luí, shí hkâm é htoq agó, shi é mai lhoq dui toq yu é hui mù, Garai Gasang é loqyo hkyam má nghut nyí luí, nga-

nhùng é matú bo dúng xoq byi
nyì bê nghut é yanmai, ó yuq
wá mara wó byi râ l hú?

³⁵ Hkrisduq é chyitdap
myit mai, nga-nhúng lé, hai
eq wá wó lhoq kang râ l hú?
Gunjang huí é hkyo èq luq?
Wuìhke huí é hkyo èq luq?
Zing-ri huí é hkyo èq luq?
Mutmó huí é hkyo èq luq?
Gùng chín dut huí é hkyo èq
luq? Gyuyq jung èq luq? Sham
èq luq?

³⁶ Haù gi,

"Náng é yanmai, ngamoq, nyí
wuì sat pyâm é huí nyi
ri;

sat râ matú nyhi tô é sau
pé lé su, ngamoq lé
myit pyâm akô."^{*}

ga kâ tô é eq rajung za nghut
ri.

³⁷ A wó lhoq kang; nga-nhúng
lé chyitdap Su é yanmai, nga-
nhúng gi, haù pé banshoq lé
je wó ung pyâm é nghut lhê.

³⁸ Hkâsu mù gâ le, shî kôlhang,
byùn kôlhang, maumang
lagyô pé nghut kôlhang, agè
ashop é nat pé nghut kôlhang,
shí ipyat nghut kôlhang, htang
pyat nghut kôlhang, hai jung
a-tsam pé nghut kôlhang,

³⁹ htoq tsáng mâ é nghut
kôlhang, a-ô tsáng mâ é nghut
kôlhang, hpan tô é gotû hai
nghut kôlhang, nga-nhùng é
Yhumsîng Hkrisduq Yesuq
má bo é Garai Gasâng é
chyitdap myit mai, nga-
nhúng lé wó lhoq kang pyâm
râ a nghut nghû, ngò gi,
hkyak wó sê yu ri.

9

*Garai Gasang Hkyin Yu É
Israelaq Byu Pé*

¹ Ahkuí, ngò gi, Hkrisduq
má tengmán é dangtaí râ; ngò
a mhaù é lé, haù Chyoiyúng
Woi-nyí gi, ngá é unghkaù
myit má hkyak saksé hkâm
nyi ri.

² Ngò gi, ngá é myit nhikl-
hum má, gyai yhang yón kuq
nyi é eq ayang hpuzô nyi lhê.

³ Hkâsu mù gâ le, ngò gi,
ngá é byuhú, ngá é gumang
wui é matú, nhing é hui lui
Hkrisduq eq gang le l háng gè
râ su gâ ri.

⁴ Haù bang gi, Israelaq
byu pé nghut lhê. Zo yín
yú huí é hkyô le, hpungwup
shingkang le, dangshikaq pé
le, tarâ lé myang hap yu é
hkyô le, noqkuq yhûm má
noqkuq é hkyô le, danggidiq
pé lé le, yhangmoq wó yu akô
nghut ri.

⁵ Haù myìng hú é îchyí îwâ
pé gi, yhangmoq é îchyí îwâ
pé nghut lui, byu é hkyam
dông gon jáng, Hkrisduq gi,
yhangmoq amyú mâ é nghut
ri. Yhang gi, lhungl háng lé
up é, ahtum abyuq hkya-on
huí é Garai Gasang nghut ri!
Amen.

⁶ Haù gi, Garai Gasâng é
danggidiq akôm dut byuq bê
nghû nau é a nghut. Hkâsu
mù gâ le, Israelaq byu pé
banshoq bang gi, Israelaq
byù akying chyat a nghut kó
nghut ri.

⁷ Abraham é awut ashín
banshoq bang gi, yhang é zo

^{*} 8:36 Hkya-on 44:22

wuî akying chyat nghû a wó taí é nghut lhê. Hau é malaí, "Isak đông mai lo é lé, náng é awut ashín nghû són byi rã nghut lhê."* gâ tô ri.

⁸ Radông taí sháng ga jáng, gungsho mai hku é zo wuî gi, Garai Gasâng é zo wuî akying a nghut kó, danggidiq eq sêng é zo wuî za sheq, Abraham é awut ashín pé đông són byi é nghut lhê.

⁹ Hkâsu mù gâ le, "Masat tô é ahkyíng má, ngò dum taú lé mù, Sarah gi, yuqzo hkú rã nghut lhê."* ga taí tô é danggidiq é yanmai nghut lhê.

¹⁰ Haú za a nghut, Rebeka é yhangzô nhiktang é íwa gi, nga-nhúng é íwa nghut su Isak rayuq za nghut lhê.

¹¹⁻¹² Nghut kôlhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yù Su é yanmai nghut é lé, wó gîng nyi sháng gaq ga, haú zozúm nhik a hku lé shí é htoq agó, ge é eq a ge é muzó haí lhang a kut shimá, "Haú ko sù yuq gi, tiq sù yuq lé dojaú rã nghut lhê."* ga, Rebeka lé taí kyô tô é nghut lhê.

¹³ Haú gi, "Yakup lé, ngò chyitdap lhê, nghut kôlhang, Eso lé gi, a ngui é nghut lhê."* ga kâ tô é eq rajung za nghut ri.

¹⁴ Haú nghut é yanmai, nga-nhúng hkâsu nghû taí rã? Garai Gasang gi, a tará é sù nghut lhê lú? Ratsuí lhang a nghut!

¹⁵ Hkâsu mù gâ le,

"Ngò, shogyo nhikmyin naù sù lé, shogyo nhikmyin rã nghut lhê;

Ngò, jeju byi naù sù lé, jeju byi rã nghut lhê."*

ga, Mosheq lé Yhang taí ri.

¹⁶ Haú mù luí, haú hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasâng é shogyo nhikmyin é yanmai za nghut lhê.

¹⁷ Hkâsu mù gâ le, Chyúmdang má, "Náng chyáng Ngá é a-tsam wó tún shit rã eq mingkan gón má Ngá é myìng lhoq pyo é hui rã matú sheq, Ngò, nang lé lhoq toq kat é nghut lhê."* ga, Hpara-uq lé taí ri.

¹⁸ Haú mù luí, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byi ri.

¹⁹ Nungmoq mâ é rayuq yuq, "Haú jáng, Garai Gasang gi, ngamoq lé haí mù mara hun nyi ashí lú? Yhang ô nau é hkyô lé, ó yuq wá wó hkúm pyâm lhê lú?" ga, ngo lé taí kó rã nghut lhê.

²⁰ Nghut kôlhang, Garai Gasang lé dang tu sù byù nàng gi, ó yuq wá nghut lhê lú? Saí to hui bê é zè pé gi, "Nàng, haí mù ngo lé shí su kut saí tô lhê lú?" nghû saí é Sù lé wó taí rã lú?

²¹ Tso-au saí sù gi, tsohtung rallhum mai za, hkik é tso-au pé eq a hkik é tso-au pé saí

râ ahkáng wó lhê a nghut kô lú?

²² Garai Gasang gi, Yhâng é nhikmo-yo hkyô tún shit lú, Yhang é a-tsam lé sé nhâng naù kôlhang, htên byoq râ matú hen tô é, nhikmo-yo gíng é tso-au pé lé, myit hîng hîng shirang pyâm nyi é hkyô lé, taí râ jang haí joq ashî lú?

²³ Hpungwup shingkâng é matú noq mai hen to bang nghut é, Yhang shogyo nhikmyin huí é bang lé, Yhâng é agùn agó é hpungwup shingkang lé sé nhâng naù mù, Yhang haù su kut é nghut jáng, taí râ haí joq ashî lú?

²⁴ Haù bang gi, Yudaq byu pé mai za a nghut, tûngbaù pé mai le ji yù huí é bang nga-nhúng nghut lhê.

²⁵ Haù eq rajung za, Hosea laiká má Yhang taí tô é gi,

"Ngá é byù myû a nghut é bang lé, 'Ngá é byù myû' nghû;

Ngò a chyit é byizo lé 'Ngò chyit sù' nghû wut râ nghut lhê."^{*}

gâ ri.

²⁶ Haù mù,

"Nungmoq gi, ngá é byù myû pé a nghut.' nghû yhangmoq lé taí é jowò má yhang,

yhangmoq gi, 'Rû dui nyi é Garai Gasâng yhangzô pé' ga wut é hui kó râ nghut lhê."^{*}

gâ ri.

²⁷ Esai-aq le, Israelaq byu pé eq séng lú garu taí é gi,

"Israelaq yhangzo yhangshû pé gi, wuìshuq lung-aù yàm mâ é semuì su myo kôlhang, myit gyó tô é bang za sheq hkyi yu é hui kó râ nghut lhê.

²⁸ Hkâsu mù gâ le, haù Yhumsîng gi, myidàm htoq má Yhâng é tarâ jéyáng hkyô lé hân hân lhoq dik lhoq htûm pyám râ nghut lhê."^{*}

gâ ri.

²⁹ Haù eq rajung za, hí lé Esai-aq taí tô é gi,

"A-tsam dik shoq bò sù haù Yhumsîng za, nga-nhúng lé, awut ashín a myhit to byî é nghut jáng,

nga-nhúng gi, Sodom wà su dut byuq luí, Gomoraq myuq eq pung byuq râ nghut lhê."^{*}

gâ ri.

Israelaq Byu Pé A Lumjîng Kô É Hkyô

³⁰ Haù mù, nga-nhúng hkâsu nghû taí râ lú? Dingmán hkyô lé a châng hkat é tûngbaù pé gi, haù lé wó yù bekô; haù gi, lumjîng hkyo é yanmai wó yu é dingmán hkyô nghut ri.

³¹ Nghut kôlhang, tarâ eq sêng é dingmán hkyô lé châng hkat é Israelaq byu pé gi, haù lé a wó yù kó nghut ri.

³² Haí mù a wó yù kô é lú? Yhangmoq gi, lumjîng myit eq châng hkat kô é a nghut é za, muzó pê eq châng hkat kô é

yanmai, a wó yû kô é nghut ri. Yhangmoq gi, "htung htê râ luqgok" má htung leng bekô nghut ri.

³³ Haû,

"Wú keq, htung leng râ luqgok eq myit leqbat nhâng râ luqmó cham lé, Ngò, Zi-un bùm má lheq to luí,

Yhang lé lumhkaû sù gi, hkâ-nhám le hoq hpu é hui râ a nghut."[☆]

ga kâ tô é eq rajung za nghut ri.

10

¹ Gumang wui ê, ngò gi, haû Israelaq byu pé hkyi yu é hui kó sháng gaq nghû, gyai yhang myit shirông luí, Garai Gasâng chyáng yhangmoq é matú kyûdung byí nyi lê.

² Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lê; nghut kôlhang, yhangmoq myit zuq é hkyô gi, hpaqchyí bo é dông a nghut kó.

³ Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsing dingmán bûn é hkyô lé za ho shikut nyi kô é yanmai, Garai Gasâng é dingmán hkyô hkaû má a nyi kó nghut ri.

⁴ Hkrisduq gi, lumjúng bang yuq hkangmó, dingmán é má wó jé kó sháng gaq ga, jep

é tarâ ló htum jang dut bê nghut ri.

⁵ Mosheq gi, "Haû pé dông châng é sù gi, haû pé mai asak dui râ nghut lê."[☆] ga, jep é tarâ eq sêng é dingmán hkyô lé kâ sân kyô tô é nghut lê.

⁶ Nghut kôlhang, lumjúng hkyô eq sêng é dingmán hkyô gi, "Náng é myit nhiklhum má, 'Mauhkûng má, ó yuq doq ló râ lú?'[☆] (Haû gi, Hkrisduq lé shuí gyó lò râ gâ nau é nghut lê),

⁷ haû a nghut jáng, 'Nik é jang má, ó yuq gyó wâng râ lú?'[☆] (Haû gi, Hkrisduq lé, shi é mai dui toq nhâng râ gâ nau é nghut lê.), nghû hkâtaí kó." gâ tô ri.

⁸ Haû jáng, hkâsu gâ tô ri lú? "Haû mungdang gi, nàng eq chyâng nyi ri; náng é nhut má le, náng é myit nhiklhum má lé nghut nyi ri."[☆] gâ tô ri. Haû gi, ngamoq hko taí é lumjúng hkyô eq sêng é mungdang nghut lê.

⁹ Haû mù, "Yesuq gi, Yhumsing nghut ri." nghû náng é nhut èq yín yû mù, Garai Gasang gi, Yhang lé, shi é mai dui toq nhâng bê nghut lê nghû, náng é myit nhiklhum má lumjúng é nghut jáng, nàng gi, hkyi yu é hui râ nghut lê.

¹⁰ Hkâsu mù gâ le, byù gi, myit nhiklhum má lumjúng jáng, mara hkyut san byí é hui mù, nhut mai yín yû jáng, hkyi yù huí é nghut lê.

¹¹ Haû Chyúmdang taí é gi,

[☆] 9:33 Esai 8:14; 28:16 [☆] 10:5 Nhung 18:5 [☆] 10:6 Tarâ Pun 30:12 [☆] 10:7 Tarâ Pun 30:13 [☆] 10:8 Tarâ Pun 30:14 [☆] 10:11 Esai 28:16

"Yhang lé lumhkau é sù ó yuq le, hkâ-nhám lháng hoq hpû é hui râ a nghut."*¹² gâ ri.

¹² Hkâsu mù gâ le, Yudaq byù eq tûngbaù pé é gyoro má gam hkoq é hkyô haí le a joq é za, haù Yhumsing gi, banshoq bâng é Yhumsing nghut lhê mù, Yhang lé wut dung bang lunglháng lé, agùn agó shimân byî ri.

¹³ Hkâsu mù gâ le, "Haù Yhumsing é mying lé lîng é bang yuq hkangmó gi, hkyi yu é hui râ nghut lhê."*¹⁴ gâ tô ri.

¹⁴ Haù nghut lé gi, yhangmoq a lumjîng é sù lé nhîng, hkâsu wó wut dung kó râ lhú? Yhangmoq a wó gyô wú é sù lé nhîng, hkâsu wó lumjîng kó râ lhú? Hko kyô é sù a nyi le nhîng, hkâsu wó gyo kó râ lhú?

¹⁵ Nhang kat é a hui le gi, yhangmoq hkâsu kut wó hko kyo kó râ lhú? Haù eq rajung za, "Gabú danglù pé hko kyo bâng é hkyî-kâm pé gi, hkâ-í yhang yúng ri myhi-nhung!"*¹⁶ ga kê tô ri.

¹⁶ Nghut kôlhang, Israelaq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsing ê, ngamoq é danglù lé ó yuq wá lumjîng é lhú?"*¹⁷ ga taí ri.

¹⁷ Haù nghut mù luí, lumjîng myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê.

¹⁸ Nghut kôlhang, ngò myi kó lé: yhangmoq gi, a wó gyô wú kô é nghut lhê lhú? Yhangmoq gi, wó gyo gù za nghut lhê, haù eq rajung za,

"Yhangmoq é htê gi, myidàm htoq banshoq má jam bê nghut ri;

yhangmoq é mungdang pé gi, mingkan htungchyûn hkangmó má jé bê nghut ri."*¹⁹

gâ tô ri.

¹⁹ Ngò dum myi kó lé: Israelaq byu pé gi, a sê gyo kô é nghut lhê lhú? Mosheq sâng-hi má taí é gi,

"Byù rahú lháng a nghut bang eq, Ngò, nungmoq lé manôn nhâng râ;

sê gyo nyan a bo é amyú eq, Ngò, nungmoq lé wú nhik-yo nhâng râ nghut lhê."*²⁰

gâ ri.

²⁰ Hau htoq agó, Esai-aq a gyuq a wàm taí é gi,

"Ngo lé a ho é bang gi, Ngo lé myang hô bekô nghut ri;

Ngá hkyô lé a myí é bang lé, Ngò htoq shit bê nghut lhê."*²¹

gâ ri.

²¹ Nghut kôlhang, Israelaq byu pé eq séng luí, Yhang taí é gi,

"Ngò gi, jîno a gyô é eq ngegáng-htu é byù myú lé, nyí wuí Ngá loq lham mù ji nyi lhê."*²²

gâ ri.

* 10:13 Yol 2:32 * 10:15 Esai 52:7 * 10:16 Esai 53:1 * 10:18 Hkya-on 19:4

* 10:19 Tarâ Pun 32:21 * 10:20 Esai 65:1 * 10:21 Esai 65:2

11

Israelaq Byu Pé Lé A He-ngik Pyám

1 Haû mù luî, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lú? Ratsuí lháng a nghut! Ngò yhang le, Israelaq byu myû nghut luî, Abraham é awut ashín eq Ben-yamyin hú mâ é sù nghut lhê.

2 Garai Gasang gi, Yhang te sê to gû nghut é, Yhâng é byu pé lé a he-ngik pyám é nghut lhê. Eliyaq eq sêng é hkyô Chyúmdang má bo tô é lé, nungmoq a sé kó lú? Garai Gasang é hí má, yhang, Israelaq byu pé lé mara hûn é gi,

3 "Yhumsîng ê, yhangmoq gi, Náng é myiqhtoî pé lé sat pyám kô é eq Náng é hkungga gyap pé lé tu lhêng pyám akô nghut ri; ngò rayuq za myit gyó tô é nghut luî, ngo lé sat râ matú le yhangmoq ho nyi akô nghut ri."* gâ ri.

4 Garai Gasang gi, yhang lé, hkâsu ga tû taî é nghut lhê lú? Haû gi, "Balaq hpara é hí má hkyihput a htuq shî é byù nyhit hkyíng lé, Ngá é matú myhit to lhê."* gâ é nghut lhê.

5 Haû eq rajung za, ahkuî gi, jeju yanmai hkyin yù huí é bang za myit gyó tô é nghut lhê.

6 Jeju yanmai nghut é nghut le gi, muzó é yanmai a nghut lo; muzó dông ru nghut le gi, jeju gi, jeju a nghut lo.

7 Haû nghut jáng, hkâsu lú? Israelaq byu pé gyai ho shikut kôhang, a wó kô é lé, hkyin htoq yù huí é bang kúm gi, wó bekô nghut ri. Góbang gi, myit lhoq htân byî é hui akô nghut ri;

8 haû gi,

"Garai Gasang gi, hkû-nyí jé shoq, yhangmoq lé nhikshî jit é woi-nyí lé le, a wó myang é myoqjí lé le, a wó gyô é nohkyap lé le, byî to bê nghut ri."*

ga kâ tô é eq rajung za nghut ri.

9 Dawiq taî é le,

"Yhangmoq é zangbó gi, yhangmoq é matú, dumzo eq lhaí, myit leqbat jowò eq lató hpuq hkyô dut sháng gaq;

10 Yhangmoq myoq a wó myâng shoq, myoqjí lhoq chut pyám byî é hui sháng gaq;

yhangmoq é nunghkûng gi, ayang wôlai wun goí nhang é hui sháng gaq."*

gâ ri.

Tûngbàu Pé Lé Hkyi Yu É Hkyô

11 Ngò dum myi kó lé: Israelaq byu pé gi, a wó dum gè râ í leqbat byuq bekô lú? Ratsuí lháng a nghut! Yhangmoq é tarâ lu lai hkyo é yanmai, yhangmoq lé manôn nhâng râ matú, hkyi yù hkyô gi,

tûngbaù pê chyáng jé byuq é nghut lhê.

12 Nghut kôlhang, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyâm é hkyô gi, tûngbaù pê é matú wó sùt hkyô dut é nghut jáng, yhangmoq é byíng jup hkyô gi, je riyhang kô é wó sùt hkyô dut râ nghut ri-nhung!

13 Nungmoq tûngbaù pé lé ngò taí nyi lhê: ngò gi, tûngbaù pê é lagyo nghut nyi é u má, ngá é hpungmû lé hpautap nyi lhê.

14 Haù gi, ngá é amyû pé lé manôn myit wó bô nhâng mù, yhangmoq ra-am lé wó hkyi yù râ lé myit myoqbyu é hkyô nghut lhê.

15 Hkâsu mù gâ le, yhangmoq lé he-ngik pyâm é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é đông dut bê a nghut lhi?

16 Hau htoq agó, sâng-hí ashi đông nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haù amyit gi, chyoiyúng é nghut jáng, akoq pé le chyoiyúng é nghut lhê.

17 Haù tsanlun akoq pé* ra-am gi, lhoq hkyui pyâm é hui luí, yosô tsanlun a-nyuq† nghut sù nàng gi, haù pé má xoq é hui mù, haù tsanlun amyit é xù lé bo shuq lom é nghut jáng,

18 akoq haù pé lé hkâwú tiq pyám kó. Nungmoq haù su kut é nghut jáng, nungmoq gi, haù amyit lé htuoq é a nghut é za, amyit haù sheq nungmoq lé htuoq é hkyô lé, nungmoq myit sé keq.

19 Nungmoq kúm gi, "Ngò, haù má xoq é hui râ matú sheq, akoq haù pé gi, lhoq hkyui pyâm é hui é ru nghut lhê." ga taí râ nghut lhê.

20 Haù su gi, nghut lhê. Nghut kôlhang, yhangmoq gi, a lumjíng é yanmai, lhoq hkyui pyâm é hui kômù, nungmoq kúm gi, lumjíng é yanmai, wó ging tûng nyi é nghut lhê. Hká gumrong nyi, gyuq kyum nyi keq.

21 Hkâsu mù gâ le, Garai Gasang gi, akoq akying pé lé a ha bún é nghut le gi, nungmoq lé le ha bun râ a nghut.

22 Haù mù luí, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyám kôlhang, nungmoq gi, Yhâng é shogyo nhikmyin hkyô má xoq nyi nyi é myháng, nungmoq lé gi, shogyo nhikmyin nyi râ nghut lhê. Haù a nghut jáng, nungmoq le, zân hpyit pyâm é hui râ nghut lhê.

23 Yhangmoq gi, a lumjíng hkyô lé tô pyám kô é nghut jáng, dum xoq yu é hui kó râ nghut lhê; hkâsu mù gâ le, Garai Gasang gi, yhangmoq lé dum wó xoq yu é Sù nghut lhê.

* 11:17 Tsanlun akoq pé gi, Israelaq byu pé lé taí nau é nghut lhê. † 11:17 Yosô tsanlun a-nyuq gi, tûngbaù pé lé taí nau é nghut lhê.

24 Haî mù gâ le, yosô tsanlun gàm akoq nghut gù nungmoq lé hpyit yû mù, htông a nghut é dông, hô é tsanlun agàm má xoq é nghut le gi, haû akoq akying pé nghut é yhangmoq gi, ó le ó é tsanlunngut akying má xoq yu é lé je riyhang hui râ nghut lhê ô!

Israellaq Byu Pé Hkyi Yu É Hui Râ Hkyô

25 Haû mù, gumang wui ê, nungmoq a nghutbun kó sháng gaq nghû, zau tô é hkyô shî lé, nungmoq a sé dut râ lé, ngò a ô nau é nghut lhê: haû gi, tûngbaù pé wang lo é laké byíng é hkûn jé shoq, Israellaq byu pé ra-am gi, myit lhoq htan é huí é hkyô nghut lhê.

26 Hau htâng sheq, Israellaq amyû banshoq bang hkyi yu é hui râ nghut lhê. Haû gi, "Hkyi yû Sû gi, Zi-un bùm mai htoq lô râ nghut lhê; Yhang gi, Garai lé nunghtáng tô pyâm é hkyô lé, Yakup é awut ashín mai huí sêng pyâm byi râ nghut lhê.

27 Ngò, yhangmoq é yubak mara lé huí sêng pyám byi jáng, haû gi, yhangmoq lé Ngò byi tô é Ngá é dangshikaq nghut lhê. ✠ ga kê tô é eq rajung za nghut ri.

28 Haû gabú danglù eq séng luí ga jang, yhangmoq gi, nungmoq é matú gyè nghut akô; nghut kôhang, hkyin htoq yû hkyô eq séng luí ga jang, yhangmoq gi, myìng

hû é îchyí îwa pê é yanmai, chyitdap é huí akô nghut ri;

29 hkâsu mù gâ le, Garai Gasâng é chyunghuq pé eq Yhang ji yu é hkyô lé gi, wó htaî lhik pyâm é a nghut.

30 Nungmoq gi, Garai Gasâng é jìno a gyô é bang radàm dut wú kô é nghut kôhang, yhangmoq jìno a gyô é yanmai, ahkuí kúm, shogyo nhikmyin hkyô wó hkam yû bekô nghut é su,

31 ahkuí, yhangmoq gi, nungmoq wó hkam yu é Garai Gasâng é shogyo nhikmyin hkyo é yanmai, shogyo nhikmyin hkyô lé wó hkam yû kó sháng gaq ga, yhangmoq le, ahkuí, jìno a gyo bang dut bekô nghut ri.

32 Hkâsu mù gâ le, Garai Gasang gi, byù lunglhang bang lé, shogyo nhikmyin hkyô wó tûn shit shoq ga, lunglhang bang lé, jìno a gyo hkyo é shúm dut nhang to bê nghut ri.

Hkya-on Kungtôn Dang

33 Ô! Garai Gasâng é agùn agó é sùt nghut é, hpaqchyí byéng-yá eq nyan hpaqchyí gi, hkâ-í yhang nik ri-nhung!

Yhâng é tarâ jéyáng hkyô gi, ung sê jung a nghut nhung!

Yhang kut é hkyô pé gi, hkâ-í yhang ho htoq wuí jung nghut ri-nhung!

34 "Haû Yhumsing é myit lé, ó yuq wá ung sê lhê lú? "

Yhâng é hpaqchyî byi sù gi, ó yuq wá dut wú é lhú?"[☆]

gâ ri.

³⁵ "Garai Gasâng èq jeju dum tau byi râ dut shoq, ó yuq wá, Garai Gasang lé byi wú é lhú?"[☆]

gâ ri.

³⁶ Hkâsu mù gâ le, joq mijoq gi, Yhâng chyáng mai nghut mù, Yhang đông mai nghut luî,

Yhâng é matú chyat nghut ri. Haû hpung-wup shing kang gi,

Yhâng chyáng ahtum abyuq ru joq nyî sháng gaq ô! Amen.

12

Dui É Hkungga Pé Dut Râ Hkyô

¹ Haû mù luî, gumang wuì é, nungmoq é gungdu pé lé, Garai Gasang myit nguì ô nau é eq chyoyíung é, dui é hkungga đông nhông byi keq nghû, Garai Gasâng é shogyo nhikmyin hkyô mai, ngò, nungmoq lé wum byi kat lhê. Haû gi, woi-nyí hkyô đông nungmoq noqkuq dojaú é hkyô nghut lhê.

² Míngkan shí lhûm é sâmlai đông a cháng lo é za, myit sik wó yû râ đông nungmoq é a-kyang lé htaí pyám byi nhâng keq. Haû hkún sheq, Garai Gasâng é ge é, myit nguì é eq gumjup é ô naù hkyô lé, nungmoq wó chyâm, wó sê gàm hkoq yû kó râ nghut lhê.

³ Hkâsu mù gâ le, ngo lé byi tô é jeju yanmai, nungmoq yuq hkangmó lé ngò táí kôlé: nungmoq gi, yhumsing gùng lé lai shoq a nghutbùn é za, ó le ó lé, Garai Gasâng èq lumjínng myit tsing gàm byi to bê eq rajung za, myit yù gíng é í za myit yù keq.

⁴ Nga-nhúng yuq hkangmó é gungdu ralhum má gi, gungdu showui showang pé myo myo bo é nghut luî, gungdu showui showang haû pé banshoq gi, jai chùng jang a pung é nghut lhê.

⁵ Haû eq rajung za, myo myo nghut é nga-nhúng le, Hkrisduq má gungdu ralhum za dut luî, yuq hkangmó gi, rayuq eq rayuq gungsho sêng lhûm é bang chyat nghut lhê.

⁶ Nga-nhúng lé byi tô é jeju yanmai, nga-nhúng wó é chyunghuq gi, gotû tû nghut lhê. Byù rayuq é chyunghuq gi, myiqhtoi htoí é nghut jáng, yhâng é lumjínng hkyô eq rajung za htoi sháng gaq;

⁷ dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq;

⁸ myit wum byi é nghut jáng, myit wum byi sháng gaq; ra châ é bang lé garúm byi é nghut jáng, a ha bûn é za byi sháng gaq; shuí u é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit èq kut sháng gaq.

Chyitdap Myit

⁹ Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuí nyí keq.

¹⁰ Rayuq eq rayuq, gumang chyitdap myit mai lhumzuí lhum keq. Rayuq eq rayuq, yhumsing gùng htoq je hpau-tap lhum keq.

¹¹ Myit zuq hkyô má, hkâ-nhám le wum a lhoq shôm é za, nungmoq é woi-nyí hkyô má myit toq nyí mù, haú Yhumsîng lé dojaú nyí keq.

¹² Myit myoqbyù hkyô má gabú keq; wuîhke hkyô má hkam jan keq; kyûdung hkyô má lhumzui keq.

¹³ Ra châ tô é Garai Gasâng é byu pé lé gàm byi keq. Bîng hkulum é lé rago kut keq.

¹⁴ Nungmoq lé zing-rî é bang lé shimân byi keq; shimân byi keq, hkâ-nhing kó.

¹⁵ Gabú é bang eq rahá bo gabú keq; yón é bang eq rahá bo yón keq.

¹⁶ Rayuq eq rayuq byìn hpyé gohut huí nyi keq. A nghutbùn é za, nyi yap hkyô nyhûm bang eq zùm yap keq. Hpaqchyí bo é sù su hkâ-myit ngàm kó.

¹⁷ Ó yuq lé le, agè ashop é yanmai, agè ashop é dông lató hkâhpuq kó. Yuq hkanmó é myoq hí má ge é lé kut râ rago myit keq.

¹⁸ Wó dut é nghut jáng, nungmoq wó dut é í, yuq hkanmó eq nguingón shoq nyi keq.

¹⁹ Ngá é buinùm wui ê, lató a hpuq é za, Garai Gasâng é

nhikmo-yo hkyô lé sheq láng nyí keq. Hkâsu mù gâ le, "Ngò sheq lató hpuq râ sù nghut lhê; ngò lató hpuq râ."* ga, haú Yhumsîng taí ri ga kâ tô ri.

²⁰ Haú mù, "Nungmoq lé gyè kut sù zòmut é nghut le gi, byi tso keq; yhang wuîshit é nghut le gi, rajung jung byi huq keq.

Haú dông kut jáng, nàng, yhâng é ulhum htoq má gyúng é myigye bum to byí é nghut lhê.*

ga le kâ tô ri.

²¹ Agè ashop é gi, nungmoq lé a ung pyám sháng gaq, ge é hkyo eq agè ashop é lé ung pyám keq.

13

Ahkáng Ayá Wó Bâng Ô Má Nyi Râ É Hkyô

¹ Yuq hkanmó gi, up é ahkáng ayá wó bâng é a-ô má nyi ra râ nghut lhê; hkâsu mù gâ le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng eq byí tô é chyat nghut lhê.

² Hau é yanmai, up é ahkáng ayá lé gumlau toq é sù gi, Garai Gasang byí tô é up é ahkáng ayá lé gumlau toq é sù nghut ri; haú su kut é bang gi, tarâ jéyáng é hui zo râ hkyô lé ho yù nyi é bang nghut akô.

³ Hkâsu mù gâ le, uphkanq é bang gi, ge é hkyô kut bâng é matú gyuq nán hpo a dut é za, shut shaí hkyô kut bâng é matú sheq dut é ru nghut lhê. Up é ahkáng wó sù lé gyuq é mai lut nau lhê a nghut lí? Haú jáng, ge é hkyô kut aq, haú hkûn, yhang, nang lé hkya-on râ nghut lhê.

⁴ Hkâsu mù gâ le, yhang gi, náng é matú ge é akyû kut byi râ nghut é, Garai Gasâng é dui-nhâng zoshâng nghut lhê. Nghut kôlhang, nâng, shut shaí hkyô kut é nghut le gi, gyuq nán nyí aq; haí mù gâ le, yhang gi, shâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaí hkyô kut sù lé dam byi râ matú nhikmo-yo Su é gunglik nghut lhê.

⁵ Haú mù luí, dam byi râ lé chiq é yanmai za a nghut, yhumsîng nhik bô râ é yanmai le, haú up é ahkáng ayá wó bâng é a-ô má nyí râ dut lhê.

⁶ Nungmoq hkansê kat râ é gi, hau é yanmai le nghut lhê; hkâsu mù gâ le, haú up é ahkáng ayá wó bang gi, Garai Gasâng é dui-nhâng zoshâng wui nghut lhê mù, uphkanq é mù lé, ahkyíng byíng shoq wùn waq nyi akô nghut ri.

⁷ Yuq hkanqmó lé byi âng é eq rajung za byi keq; hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq

kyum keq; hkungga ang sù lé gi, hkungga keq.

Rayuq Eq Rayuq Chyitdap Lhum Râ Hkyô

⁸ Rayuq eq rayuq chyitdap lhûm é chyín mai lai luí, hai chyín le hkâdap lhum kó; hkâsu mù gâ le, góyuq lé chyitdap é sù gi, haú jep é tarâ lé lhoq dik bê sù nghut ri.

⁹ "Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq,"* gâ tô é hkunmó pé eq gotû hkunmó haí nghut nghut, "Náng gûng lé nâng chyitdap é su, nâng é chyangnâm mâ é bang lé le chyitdap aq."* gâ é tarâ má lo jup to bê nghut lhê.

¹⁰ Chyitdap myit gi, chyangnâm mâ é byù lé a ge é haí le a kut é nghut lhê. Haú mù luí, chyitdap myit gi, haú jep é tarâ lé lhoq dik é hkyô nghut ri.

¹¹ Haú mù, ahkuí lhê é ahkyíng yàm-yoq lé sê gyo luí, haú hkyô lé kut keq. Nungmoq yhup mui é mai bûn gyíng râ ahkyíng jé bê; haí mù gâ le, nga-nhûng é hkyi yù hkyô gi, lumjîng hi é hkun lhê htoq má ahkuí je chyáng bê nghut ri.

¹² Haú myín ahkyíng gi, lai byuq ló râ za nghut bê; nyí ahkyíng gi, jé lô berâ nghut lhê. Haú mù luí, mauchut é muzó lé tô pyám mù, maubó é gyehking lé wut to sháng.

¹³ Ye lhaí é eq shuq wut é, ashop é đông gungsho zùm yap é eq shut é đông nyi zô lhúm nau é myit bo é, mabyoq

jishûm htoq é eq manon é pé a kut é za, nyí-kâng lhê su, ge é a-kyang dông nyi yap sháng.

¹⁴ Hau htoq agó, Yhumsîng Yesuq Hkrisduq lé, mebu su wut to keq; yubak gungsho ô nau é dông lhoq dik râ matú hkâ-myt kó.

14

Gumang Wui Lé A Jéyáng Râ Hkyô

¹ Lumjîng myit má wum nyhóm sù lé, myíng myo nhô zâ é hkyô pé lé a jéyáng byî é za hap yù keq.

² Byù rayuq é lumjîng myit gi, jung hkangmó zô ri; nghut kôlhang, lumjîng myit nyhóm sù gotû rayuq gi, mhan-haq hpoqnoq za zô ri.

³ Jung hkangmó zo sù gi, a zo sù lé a ge wú tiq pyám; jung hkang jung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé hap yu to bê nghut ri.

⁴ Nàng gi, ó yuq wá nghut mù, góyuq é dui-nhâng zoshâng lé jéyáng lhê lú? Yhang, yap ging kôlhang, leqbat kôlhang, yhâng é yhumsing myit za nghut lhê. Yhang gi, wó yap ging râ nghut lhê; hkâsu mù gâ le, haû Yhumsîng gi, yhang lé wó yap ging nhâng Sù nghut lhê.

⁵ Rayuq myit é gi, buinyi ra-nyí gi, gó nyi htoq je ge lhê gâ ri; dum rayuq myit é gi, nyí wuí rajung za nghut lhê gâ ri. Yuq hkangmó gi, yhumsîng myit yu é lé a úng-âng nyi sháng gaq.

⁶ Buinyi ra-nyí lé, ahkyak lhê ga myit yù sù gi, haû Yhumsing é matú kut é nghut ri. Zô é sù gi, Garai Gasang lé jeju hkya-ôn é yanmai, haû Yhumsîng lé bun luí zô nyi ri; a zo sù le, haû Yhumsîng lé bun luí Garai Gasang lé jeju hkya-ôn nyi ri.

⁷ Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut.

⁸ Nga-nhúng asak dui nyi le gi, haû Yhumsing é matú dui é ru nghut lhê; nga-nhúng shi byuq le gi, haû Yhumsing é matú shi é ru nghut lhê. Haû mù, asak dui nyi kôlhang, shi byuq kôlhang, nga-nhúng gi, haû Yhumsîng eq sêng é bang nghut lhê.

⁹ Haû su mù, Hkrisduq gi, shi byuq bang eq asak dui bâng é Yhumsîng dut sháng gaq ga, shî hkám mù dum dui toq é nghut lhê.

¹⁰ Haû mù, nàng gi, haí mù náng é gumang hpó lé jéyáng nyi lhê lú? Haí mù náng é gumang hpó lé wú tiq nyi lhê lú? Nga-nhúng lhunglhang bang gi, Garai Gasang é tarâ jéyáng tanghkuq hí má yap râ bang chyat nghut lhê.

¹¹ Hkâsu mù gâ le,
"Haû Yhumsîng gi, 'Ngò rû dui nyi é eq rajung za, Ngá é hí má hkyih-put hkangmó htuq râ nghut lhê;
Garai Gasang lé, shô hkangmó eq yín yú kó

râ nghut lâhê.' ga tai
ri."☆
ga kê tô ri.

12 Haû mù luî, nga-nhúng yuq
hkanmó gi, yhumsing kut lai
lo é hkyô lé, Garai Gasâng
chyáng shit ra râ nghut lâhê.

13 Haû nghut mù, nga-
nhúng gi, rayuq eq rayuq
tarâ jéyáng lhum é hkyô lé
tô pyám sháng. Ó yuq nghut
kôlhang, yhumsing é gumâng
é hkyowuî má, myit leqbat
jowò eq htung htê jowò a to
byi râ matú, myit sidiq keq.

14 Haû Yhumsing Yesuq má
nghut nyi é sù ngò gi, hai jung
zoshuq nghut kôlhang, yhang
baú yhang a sansêng a dut é
hkyô lé, hkyak wó sé luî, jing
nyi lâhê. Nghut kôlhang, ó yuq
le, rajung jung lé a sansêng ga
myit yu é nghut jáng, yhang é
matú, zè haû gi, a sansêng é
nghut lâhê.

15 Nang zô é zoshuq yan-
mai, náng é gumang hpó myit
a ngón é nghut le gi, nang,
chyitdap myit mai sô nyi é
sù a nghut lo. Hkrisduq
shî hkám byi bê sù nghut é,
náng é gumang hpó lé, nang
zoshuq é đông mai hkâlhoq
hten pyám.

16 Nang, ge ri nghu myit yu
é hkyô lé, agè ashop é đông
hkâtai pyám nhâng.

17 Hkâsu mù gâ le, Garai
Gasâng é mingdán gi, zo zo
shuq shuq hkyô a nghut é
za, dingmán hkyô, nguingón
hkyô eq Choyiyúng Woi-nyí
má gabú é hkyô ru nghut lâhê.

18 Haî mù gâ le, shí hkyô

đông mai Hkrisduq lé dojaú é
sù gi, Garai Gasâng ô nau é sù
eq byu pê eq hkya-ôn é hui sù
nghut ri.

19 Haû mù luî, nguingón
hkyô má nyi râ eq, rayuq eq
rayuq wum byi lhum râ hkyô
lé, shikut nyi keq.

20 Zoshuq é yanmai,
Garai Gasâng é muzó lé
hkâlhoq hten pyám. Zoshuq
lunglhang gi, sansêng é
chyat nghut lâhê; nghut
kôlhang, góyuq lé myit leqbat
nhang é jung lé zô é sù gi, shut
é nghut lâhê.

21 Tsiyiq wing shuq é
eq sho zô é hkyô má nghut
kôlhang, gotû hai jung kut
é nghut kôlhang, náng é
gumang hpó lé myit leqbat
nhang é nghut le gi, a kut le je
ge lâhê.

22 Haû mù, haú pé eq séng
luî, nang lumjing é hai nghut
kôle, nang eq Garai Gasâng
gyoro má za joq nyi sháng
gaq. Yhumsing ge lâhê gâ é
èq, yhumsing gùng yhumsing
mara byi jang a joq é sù gi,
hkungsô wó nyi ri.

23 Nghut kôlhang, úng-âng é
myit eq zô é nghut le gi, mara
byi é hui ri, hai mù gâ le,
yhang zô é gi, lumjing myit
mai a nghut; lumjing myit
mai a kut é hai nghut kôlhang,
mara nghut ri.

15

*Góyuq Lé Myit Ngón Nhâng
Râ Hkyô*

1 Lumjing hkyô má wum-o
bo é nga-nhúng gi, yhumsing

myit ngón rã hkyô lé a ho é za, wum-o a bò bãng é wum nyhóm hkyô lé, hkam jan byi nyi rã dut lhê.

² Nga-nhúng yuq hkgamó gi, yhumsing é chyangnâm mâ é su é ge é hkyô dut rã matú, yang wó kô myhang lò shoq, yang lé lhoq ngón byi nyi sháng.

³ Hkâsu mù gâ le, Hkrisduq lhang gi, Yhânggùng yang lhoq ngón é a nghut; haú gi, "Nang lé rhoi bãng é dang gi, Ngá chyáng gyó ke bê nghut ri."* ga, kã tô é eq rajung za nghut ri.

⁴ Hkâsu mù gâ le, lai lò bê hkún kã tô é lhunglhang gi, nga-nhúng lé mhoq byi rã matú chyat kã tô é nghut lhê; haú gi, Chyúmdang mâ é hkam jan hkyô eq myit wum byi hkyô dông mai, nga-nhúng myit myoqbyù hkyô wó rã matú nghut lhê.

⁵ Haú hkam jan hkyô eq myit wum byi hkyô lé byi é Garai Gasang gi, nungmoq, Hkrisduq Yesuq é htâng châng nyi é u lé, nungmoq yangchang rading ralhum za dut é woi-nyí byi sháng gaq;

⁶ haú jáng sheq, nungmoq gi, i-myt rahkat eq nhut htê ralhum eq za, nga-nhúng é Yhumsing Yesuq Hkrisduq é Yhângwa nghut Sû, Garai Gasang lé, wó hkya-on kungtôn kó rã nghut lhê.

⁷ Haú mù lui, Hkrisduq gi, nungmoq lé hap yù bê é eq

rajung za, Garai Gasang é hpungwup shingkang lé lhoq htoq shit rã matú, nungmoq le, rayuq eq rayuq hap yu lhum keq.

⁸ Hkâsu mù gâ le, ngò, nungmoq lé tai kôlé, haú mying hú é ichyí iwã pé lé byi tô é danggidiq pé lé lhoq ging rã matú, Hkrisduq gi, Garai Gasang é tengmán hkyo é malaí, Yudaq byu pé é dui-nhâng zoshâng dut bê nghut ri.

⁹ Haú mù, Garai Gasang é shogyo nhikmyin hkyo é yanmai, haú tungbaù pé, Garai Gasang lé wó hkya-on kungtôn kó rã nghut lhê. Haú hkyô gi,

"Haú mù lui, tungbaù pé chyáng má, Nang lé, ngò hkya-on rã nghut lhê;

Náng é mying lé, ngò hkya-on mahkôn rã nghut lhê."*

ga kã tô é eq rajung za nghut ri.

¹⁰ Dum,

"Tungbaù pé ê, Yhâng é byu pé eq rahá gabú nyi keq."*

gã tô ri.

¹¹ Dum,

"Nungmoq tungbaù pé lhunglhang bang ê, haú Yhumsing lé hkya-on keq, byù myú lhunglhang bang ê, Yang lé hkya-on mahkôn hkôn keq."*

gã tô ashí nghut ri.

12 Hau htoq agó, Esai-aq taí é gi,

"Yese é Amyit gi, yuq htoq lô luí, Yhang gi, byù myû chângiup é ahtoq má up râ sù nghut lhê;

tûngbaù pé gi, Yhang má myit myoqbyù kó râ nghut lhê."[☆]

gâ ri.

13 Haù myit myoqbyù hkyô byí é Garai Gasang gi, Yhang lé lumhkau nyi é bang nungmoq lé, gabú hkyô banshoq eq nguínón hkyô lhoq pyíng byi sháng gaq; haù jáng sheq, nungmoq gi, Chyoiyúng Woi-nyí é wum-o a-tsâm èq, myit myoqbyù hkyô wó byíng mui nyi kó râ nghut lhê.

A Gyuq A Wam É Za, Poluq Laiká Kâ É Hkyô

14 Ngá é gumang wui ê, nungmoq gi, ge é hkyô byíng jup é bang, hpaqchyí má gumjup é bang, rayuq eq rayuq mhoqshit lhûm é má kûng é bang nghut é lé, ngá gûng ngò yhang hkyak lumjínghê.

15 Ngò gi, nungmoq lé dum lhoq pûn é dông, ahkyak é pé ra-am lé a gyuq a wàm kâ kat bê nghut lhê.

16 Hkâsu mù gâ le, tûngbaù pé gi, Chyoiyúng Woi-nyí dông mai lhoq sân-yúng é hui luí, Garai Gasâng èq hap yù gíng é hkungga wó dut kó sháng gaq ga, Garai Gasâng é gabú danglù lé hkò râ hkyangjong é wò dông, tûngbaù pè chyáng, Hkrisduq

Yesuq é hpungmû wùn sù dut râ matú, Garai Gasang, ngo lé jeju byí é yanmai nghut lhê.

17 Haù mù luí, ngò gi, Garai Gasang lé dojaú é hkyô eq séng luí, Hkrisduq Yesuq má nghutbûn nyi lhê.

18 Ngò gi, ngò taí é eq zui saí é muzó dông le, haù Woi-nyí é a-tsam chûng mù, kumlhá pé eq laklaí kumlhá pé dông le, tûngbaù pé lé, Garai Gasâng é jîno gyo shoq shuí ú é má, ngo lé Hkrisduq nhang é muzó hkyô lé taí é mai lai luí, gotú haí lé le wám taí é a nghut.

19 Haù mù luí, ngò gi, Yerusalem wà mó mai Il-urihkam mau jé shoq é hkyô awui ayàm jam shoq, Hkrisduq é gabú danglù lé hko kyo bê nghut lhê.

20 Ngò hkâ-nhám le myit tuí nyi é hkyô gi, góyuq hí tô é apûn awang má dum a puq saí pyâm é za, Hkrisduq lé a sé shi é jowò má gabú danglù hko kyo râ hkyô nghut lhê.

21 Haù gi,

"Yhâng é hkyô lé, taí kyô é a hui shí é bang, myàng kó râ nghut luí,

a wó gyô wú é bang, sê gyo kó râ nghut lhê."[☆]

ga kâ tô é eq rajung za nghut ri.

22 Haù mù luí, ngò, nungmoq chyáng lé jé râ lé, anum num hkyikyo luqlhum dut nyi é gi, muzó hau é yanmai nghut lhê.

Romaq Myuq Lé Ló Kum Râ Sôn É Hkyô

²³ Nghut kôlhang, ahkuí gi, shí mau pé má ngò zui sai râ jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za,

²⁴ ngò, Sipin ming shut ló é hkûn, nungmoq chyáng wàng râ sôn tô lhê. Ngò gi, lai ló é hkûn, nungmoq lé lò sô kum mù, nungmoq eq rayoq zo zùm yap ngón é htâng má sheq, ngá é hkyowui matú, nungmoq haú mai htuqbang kat râ lé, ngò myoqbyu tô lhê.

²⁵ Ahkuí, ngò kúm gi, Yerusalem wà mó mâ é sân-yúng bang lé dojaú râ matú, haú wâ shut e ló é hkyolat má nghut nyi lhê.

²⁶ Hkâsu mù gâ le, Make-doni eq Ahkaia mau mâ é bang gi, Yerusalem wà mó mâ é sân-yúng bâng chyáng mâ é myùng bâng é matú, garúm chyunghuq hkyui tsing nau bùm bekô nghut ri.

²⁷ Yhangmoq gi, haú su kut nau bùm bekô nghut ri, gè gè ga jáng, haú gi, yhangmoq chyín dap tô é đông ru nghut lhê. Hkâsu mù gâ le, haú Yudaq byu pê é woi-nyí eq sêng é shimân jeju lé, tûngbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chôm chùng râ chyín dap tô é đông nghut lhê.

²⁸ Haú mù luí, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htâng má, Sipin ming shut ló râ nghut mù, lai ló uchyang,

nungmoq chyáng lé sô kum râ nghut lhê.

²⁹ Ngò gi, nungmoq chyáng lé jé é hkûn, nungmoq é matú Hkrisduq é shimân jeju byíng jup é èq jé lé râ nghut é lé, ngò sê lhê.

³⁰ Gumang wui ê, ngá é matú Garai Gasang chyáng kyûdung byí é đông, ngò wum kat yhang shikut é hkyô má nungmoq bo wàng lôm râ matú, nga-nhùng é Yhumsing Yesuq Hkrisduq eq Woi-nyí é chyitdap myit é yanmai, ngò, nungmoq lé wum tai tsuq kat lhê.

³¹ Yuda mau mâ é a lumjúng bâng chyáng mai, ngò hkyi yu é wó hui luí, Yerusalem wà mó má ngò wùn waq é muzó lé, haú mâ é sân-yúng bang hap yù gíng é wó dut râ matú kyû bo dung byi keq.

³² Haú jáng sheq, ngò gi, Garai Gasang ô nau é đông mai, gabú myit èq nungmoq chyáng wó jé lé mù, nungmoq eq rahá wum-o wó yù râ nghut lhê.

³³ Haú nguingón hkyo é Garai Gasang gi, nungmoq banshoq bang eq rahá rû nyi nyi sháng gaq ô. Amen.

16

Shi-kyám Dang

¹ Ngò gi, Kenhkrea noqkuq hpúng mâ é hpungtê, nga-nhùng é gu-nhá Hpobe lé, nungmoq chyáng shichyen byí kat lhê.

² Nungmoq gi, sân-yúng bang kut gíng é eq rajung za, haú Yhumsing má yhang

lé hap yù luî, yhang râ tô é hkyô haî nghut kôle, yhang lé htuoqbang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sù nghut lhê.

³ Hkrisduq Yesuq má ngò eq mù wùn luzúm nhik nghut é, Priskila eq Akula lé bo shi-kyám byi keq.

⁴ Yhangnhik gi, ngá é asak é matú, yhangnhik é asak sum râ í yhang dut wú kô é nghut mù, ngò za a nghut, tûngbaù pé é noqkuq hpúng pé banshoq le, yhangnhik lé jeju bûn lhê.

⁵ Yhangnhik é yhûm má chô m huî zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjîng wang lo é, ngò chyitdap é Epanetu lé bo shi-kyám byi keq.

⁶ Nungmoq é matú gyai yhang shikut wú bê sù nghut é Mariq lé bo shi-kyám byi keq.

⁷ Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyî shi le nyî bê sù nhik nghut akô.

⁸ Haû Yhumsîng má, ngò chyitdap é sù, Ampliatu lé bo shi-kyám byi keq.

⁹ Hkrisduq má, ngamoq é mù zui luzúm nghut é Orban eq ngá é chyitdap luzúm Staku lé, bo shi-kyám byi keq.

¹⁰ Hkrisduq má chyam é hui mù, wó lûm bê sù, Apele lé bo shi-kyám byi keq.

Aristobulu eq sêng é yhum-byù wui lé bo shi-kyám byi keq.

¹¹ Ngá é buinùm Herudion lé bo shi-kyám byi keq.

Haû Yhumsîng má nghut nyî bê bang, Narkiso é yhum-byù wui lé bo shi-kyám byi keq.

¹² Haû Yhumsîng má mù zui shikut é myiwê nhik, Truhpena eq Truhposa lé bo shi-kyám byi keq.

Haû Yhumsîng má mù zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

¹³ Haû Yhumsîng má hkyin yu é hui bê sù, Ruhpu lé le, ngá nu dông nghut wú bê nghut é Ruhpû é yhângnu lé le, bo shi-kyám byi keq.

¹⁴ Asunkritu, Hpelegon, Herme, Patroba, Herma eq yhangmoq eq rahá nyi é gumang wui lé, bo shi-kyám byi keq.

¹⁵ Hpilologu, Yulia, Nerea eq yhâng é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

¹⁶ Rayuq eq rayuq, chyoiyúng bopuq é eq shi-kyám lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akô nghut ri.

¹⁷ Gumang wui ê, nungmoq é lumjîng hkyô má, nungmoq mhoq hkam yù bê nghut é

mhoqshit hkyô eq shai lhâm é, gam hkoq hkyô pé eq myit leqbat hkyô pé lhoq htoq é bang lé sidiq keq nghû, wum taî tsuq kat lhê. Yhangmoq lé koi pyám keq.

¹⁸ Hkâsu mù gâ le, haû sù é bang gi, nga-nhûng é Yhumsîng Hkrisduq lé dojaú é bang a nghut é za, yhum-sing é wamdaû matú dojaú é bang nghut akô. Yhangmoq gi, myit nú-nhâm é bang lé, dang ngón dang nguî dông mhaú zô akô nghut ri.

¹⁹ Nungmoq, jîno gyo kô é hkyô lé, yuq hkangmó wó gyo bê nghut ri; haû mù, ngò gi, nungmoq é matú gyai yhang gabú nyî lhê; nghut kôlhâng, ge é hkyô eq séng luî gi, nungmoq hpaqchyî bò mù, agè ashop hkyô eq séng luî gi, nungmoq a bo lòm rà lé, ngò ô nau ri.

²⁰ Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám rà nghut lhê.

Nga-nhûng é Yhumsîng Yesuq é jeju gi, nungmoq eq rahá nghut nyî sháng gaq ô.

²¹ Ngá é mù zui luzúm Tim-ohti gi, nungmoq lé shi-kyám dang sang kat ri; haû eq rajung za, ngá é buinùm wuî Luki, Yason eq Sosipata pé le, shi-kyám dang sang kat akô nghut ri.

²² Laiká shî lé bo ká sù ngò Tertiu gi, haû Yhumsîng má nungmoq lé shi-kyám kat lhê.

²³ Ngo lé le, noqkuq hpúng gón lé le, bíng hkulum é sù

Ge-u gi, nungmoq lé shi-kyám dang sang kat ri.

Haû wa mâ é ngùnzuî sù Erastu eq nga-nhûng é gumang hpó Kuartu gi, nungmoq lé shi-kyám dang sang kat akô.

²⁴ Nga-nhûng é Yhumsîng Yesuq Hkrisduq é jeju gi, nungmoq lhunglhâng bang eq rahá nghut nyî sháng gaq. Amen.*

²⁵ Byù myû chângjup bang lumjîng luî, Yhang é jîno gyo sháng gaq ga, a-nham pyat mai haq tô é hui kôlhâng,

²⁶ ahkuî, ahtum abyuq é Garai Gasâng é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wuî é hkyo é shing-rán má cháng luî, ngá é gabú danglù eq Yesuq Hkrisduq é hkyô taî pyo é dông, nungmoq lé wó lhoq ging tíng byî é,

²⁷ rayuq za é hpaqchyî bo sù Garai Gasâng chyáng, Yesuq Hkrisduq dông mai, hpungwup shíngkang gi, ahtum abyuq ru joq nyî sháng gaq ô! Amen.

* 16:24 Chyúmding ra-am má chyúmbun 24 shî a bo é nghut lhê.

KORINHTUQ Pê Chyáng Hî Dàm Hun Kat é Laiká (1 Corinthians)

¹ Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, ngamoq é gumang hpó Sositeni gi,

² jowò hkangmó má nga-nhông é Yhumsîng Yesuq Hkrisduq é myìng lé lêng é bang eq rahá, chyoyúng bang dut râ matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq mâ é, Garai Gasâng é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsîng nghut lhê.

³ Nga-nhông é Íwa Garai Gasang eq Yhumsîng Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyí sháng gaq ô.

Hkrisduq É Yanmai Wó É Jeju

⁴ Garai Gasâng jeju lé Hkrisduq Yesuq dông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê.

⁵ Hkâsu mù gâ le, nungmoq gi, Hkrisduq dông mai, nungmoq dang taí é hkyô ban-shoq eq nungmoq é sumsé hpaqchyí ban-shoq má je lhoq gumjup é hui bekô nghut ri.

⁶ Haù gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê.

⁷ Haù mù, nga-nhông é Yhumsîng Yesuq Hkrisduq dum htoq shit râ lé, nungmoq gyai myoqbyu lêng nyi é u má, nungmoq gi, woi-nyí hkyô eq séng é chyunghuq haí lé le langhpyut kó râ a nghut.

⁸ Nga-nhông é Yhumsîng Yesuq Hkrisduq é buinyi má, nungmoq lé mara hùn râ hkyô a bò shoq, Hkrisduq gi, nungmoq lé, htáng shoq gingtíng nhang nyi râ nghut lhê.

⁹ Nga-nhông é Yhumsîng nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

Noqkuq Hpúng Má Gam Hkoq Lhùm É Hkyô

¹⁰ Gumang wuì ê, nungmoq hkaù má gam hkoq lhùm é hkyô pé a joq é za, nungmoq é myit eq myit sôn wú é hkyô má gumjup shoq rading ralhum za dut nyi sháng gaq, nungmoq lunglêng bang rayuq eq rayuq byìn hpyé gohut huí nyi keq nghú, ngò, nungmoq lé, nga-nhông é Yhumsîng Yesuq Hkrisduq é myìng mai dúng tôngbán kat lhê.

¹¹ Ngá é gumang wuì ê, Hkloe é yhùm byù wuì gi, nungmoq hkaù má mabyoq htoq hkyô joq é lé, ngo lé hkyáng lo shit akô.

12 Ngò haû su nghû taî é gi, nungmoq mâ é rayuq yuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga, dum rayuq gi, "Ngò gi, Kehpa htâng châng lhê." ga, dum góyuq gi, "Ngò gi, Hkrisduq htâng châng lhê." ga, taî bùm kô é yanmai nghut lhê.

13 Hkrisduq gi, gam hkoq é hui bê lú? Ngò Poluq gi, nungmoq é matú tapzîng má jén sat é hui bê lú? Nungmoq gi, ngá é myîng mai wui-myhup hkâm yù kô é lú?

14 Ngò gi, Krispu eq Ge-u nhik mai lai lú, nungmoq ó yuq lé le wui-myhup a hkâm byî wú é yanmai,

15 nungmoq ó yuq le, ngá é myîng mai wui-myhup hkâm yù bê nghû a wó taî é nghut mù, ngò, Garai lé jeju hkya-ôn lhê.

16 (Stehpana é yhumbyù wui lé le, ngò wui-myhup hkâm byî é nghut lhê, haû mai lai lú gotú ó lé hkâm byî zâng ashî laq, ngò a myit bun lo nghut ri.)

17 Hkâsu mù gâ le, Hkrisduq, ngo lé nhang kat é gi, wui-myhup hkâm byî râ matú a nghut, gabú danglù hko kyo râ matú sheq nhang kat é ru nghut lhê; nghut kôlhang, waxâng zô wui é hpaqchyî byéng-yá dang đông hko kyô é a nghut mù, Hkrisduq é tapzîng é a-tsam gi, akôm a dut byuq é nghut lhê.

Hpaqchyî Byéng-yá Gi, Hkrisduq

18 Hkâsu mù gâ le, tapzîng má Yesuq shî hkâm é hkyô eq sêng é danglù gi, htên byoq hui râ bâng é matú, danggang dut byuq ri; nghut kôlhang, hkyi yu é huî nyî bang nga-nhông é matú gi, Garai Gasâng é a-tsam nghut ri.

19 Hkâsu mù gâ le, Chyúmdang má kê tô é gi,

"Hpaqchyî bò bâng é hpaqchyî byéng-yá lé, Ngò lhoq htên pyám râ nghut lhê; nyan bò bâng é nyan lé, Ngò, ajè dut pyám nhâng râ nghut lhê."*

ga ri.

20 Hpaqchyî byéng-yá bò bang gi, hkâmá lú? Hpaqchyî laiká kung bang gi, hkâmá lú? Ipyat shi é dang taî kung bang gi, hkâmá lú? Garai Gasang gi, mingkân é hpaqchyî byéng-yá lé lhoq ngok pyám bê a nghut lú?

21 Hkâsu mù gâ le, Garai Gasâng é hpaqchyî byéng-yá mai ga jang, mingkan zo wui gi, yhumsing é hpaqchyî byéng-yá đông mai Garai Gasang lé a wó sé kô é yanmai, danggang gâ pyám byi kô é mungdang lé hko kyô é đông lumjîng bang lé hkyi yù râ matú, Garai Gasang myit hpyit é nghut lhê.

22 Yudaq byu pé gi, limik kumlhá pé lé dúng akô; Grik byu pé gi, hpaqchyî byéng-yá lé ho akô nghut ri.

Garai É A-tsam Eq

²³ Nghut kôlhang, ngamoq gi, tapzîng má jén sat huí é Hkrisduq é hkyô lé hko kyô lhê. Haû gi, Yudaq byu pê é matú myit leqbat jowò eq tûngbaù pê é matú danggang dut byuq ri.

²⁴ Nghut kôlhang, Garai Gasâng èq ji yù huí é Yudaq byu pé eq Grik byu pê é matú, Hkrisduq gi, Garai Gasâng é a-tsam eq Garai Gasâng é hpaqchyî byéng-yá nghut ri.

²⁵ Hkâsu mù gâ le, Garai Gasâng é ngok hkyô gâ é lháng gi, byu é hpaqchyî byéng-yá htoq má je gyaú ri; Garai Gasâng é wum nyhóm hkyô gâ é lháng gi, byu é wum-o htoq má je gyaú ri.

²⁶ Gumang wuì ê, Garai Gasang, nungmoq lé ji yu é hkùn, nungmoq hkâsu dut nyi é hkyô lé myit wú keq. Waxâng zô wuì é nyi yap a-tsáng dông hpaqchyî byéng-yá bo é bang, ahkáng ayá wó é bang, zaugun suwún amyû mâ é bang a myô é nghut lhê.

²⁷ Nghut kôlhang, Garai Gasang gi, hpaqchyî byéng-yá bò bang lé hoq lhoq hpu râ matú, mingkan mâ é ngok bang gâ é lé hkyin yu é nghut lhê; Garai Gasang gi, wum bò bang lé hoq lhoq hpu râ matú, mingkan mâ é wum nyhóm bang gâ é lé hkyin yu é nghut lhê.

²⁸ Yhang gi, mingkân èq ahkyak tô é lé lhoq htên pyám râ matú, haí a nghut é lé le, mingkan mâ é aróng a bo é eq wú tiq pyám huí é lé le, hkyin

yu é nghut lhê.

²⁹ Haû gi, ó yuq le, Yhâng é hí má a ge nghutbun râ matú nghut ri.

³⁰ Garai Gasâng é yanmai, nungmoq gi, Hkrisduq Yesuq má nghut nyi bekô nghut ri; Hkrisduq gi, nga-nhûng é matú, Garai Gasâng chyáng mâ é hpaqchyî byéng-yá dut bê nghut ri. Haû gi, nga-nhûng é dingmán hkyô, chyoiyúng hkyô eq hkyi yù hkyô nghut ri.

³¹ Haû mù luí, "Gumrong é sù gi, haû Yhumsíng má gumrông sháng gaq."* ga kâ tô é eq rajung za nghut ri.

2

Woi-nyí Mai Lo É Garai Gasâng É Hpaqchyî Byéng-yá

¹ Gumang wuì ê, ngò gi, Garai Gasang eq sêng é saksé hkyô lé nungmoq chyáng tai pyô râ matú jé lé é hkùn, dang tai kûng é eq hpaqchyî byéng-yá mó bo é dông lé é a nghut.

² Hkâsu mù gâ le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huí é hkyô mai lai luí, jung hkanmó lé tô-myhî pyám râ nghû myit hpyit yû bê nghut lhê.

³ Ngò gi, nungmoq chyáng jé lé é hkùn, wum nyhóm é eq gyai yhang gyuq nán é nghut lhê.

⁴ Ngá é danglù eq ngò hko kyô é hkyô gi, hpaqchyî bo é eq mhuí yu é dang pé dông a nghut é za, Woi-nyí é a-tsâm

èq nungmoq lé shit é dông ru nghut mù,

⁵ nungmoq é lumjúng myit gi, byù é hpaqchyí byéng-yá má a nghut é za, Garai Gasâng é hpungwup a-tsam má nghut nyi lê.

⁶ Nghut kôlhang, ngamoq gi, myit ðing bê bang lé hpaqchyí byéng-yá dông nyo lê; shí pyat lê é hpaqchyí byéng-yá eq htên byoq nyi huí é shí pyat mâ é zaú wui é hpaqchyí byéng-yá dông kúm a nghut.

⁷ Ngamoq taí é gi, haq tô é eq, ahkyíng nghu é lhang a joq shí mai nga-nhung é hpungwup shingkang é matú Garai Gasang tô to byí é hpaqchyí byéng-yá nghut é, Garai Gasâng é zaú tô é hpaqchyí byéng-yá lé taí é ru nghut lê.

⁸ Shí pyat lê é zau wui gi, hpaqchyí byéng-yá haú lé rayuq lhang a sê gyo kó nghut ri; yhangmoq sê gyo kô é ru nghut le gi, hpungwup shingkang bo é Yhumsing lé tapzing má jén sat pyám kó râ a nghut.

⁹ Nghut kôlhang, Chyúmdang má,

"Ó yuq èq le a myang wú, ó yuq èq le a wó gyô wú, ó yuq èq le a bún myit wú é hkyô lé, Garai Gasang gi, Yhang lé chyitdap bang é matú lajang to byi bê nghut ri."✧

ga kâ tô é eq rajung za nghut ri.

¹⁰ Nghut kôlhang, Garai

Gasang gi, haú hkyô lé, Yhang é Woi-nyí dông nga-nhung lé hpông shit bê nghut ri.

Woi-nyí haú gi, jung hkgámó lé ho gôn wú é nghut luí, Garai Gasâng é zaú tô é hkyô lé lhang ho gôn wú é sù nghut ri.

¹¹ Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lê lhu? Haú eq rajung za, Garai Gasâng é Woi-nyí za a nghut jáng, Garai Gasang myit é hkyô lé, ó yuq le wó sê é a nghut.

¹² Nga-nhung gi, mingkân é woi-nyí lé hap yu tô é a nghut é za, Garai Gasâng èq nga-nhung lé byí to bê jeju lé, ngamoq wó sê gyo râ matú, Garai Gasâng chyáng mâ é Woi-nyí lé sheq hap yu tô é ru nghut lê.

¹³ Haú mù luí, ngamoq gi, waxâng zô wui é hpaqchyí byéng-yá èq mhoq byí é dang dông taí é a nghut, Garaí é Woi-nyí èq mhoq byí é dang dông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang dông taí sân kyô é nghut lê.

¹⁴ Haú Woi-nyí lé a wó é sù gi, Garai Gasâng é Woi-nyí mai lo é hkyô pé lé a hap yu é nghut lê; haí mù gâ le, haú pé gi, yhang é matú ngok é hkyô nghut luí, woi-nyí hkyô dông mai haú hkyô lé a wú é yanmai, yhang gi, haú pé lé a wó sê gyo nghut ri.

¹⁵ Woi-nyí eq sêng é byù gi,

lhunglhang lé wó jéyang lhê, nghut kôlhang, yhang lé kúm gi, ó yuq èq le wó jéyang é a nghut.

¹⁶ Chyúmdang má,

"Hkâsu mù gâ le, ó yuq wá, haù Yhumsing é myit lé sé mù, Yhang lé wó mhoqshit wú é lhú?"*
ga kê tô ri. Nghut kôlhang, nga-nhúng gi, Hkrisduq é myit lé wó é bang nghut lhê.

3

Noqkuq Hpúng Má Gam Hkoq Lhâm É Hkyô

¹ Gumang wuì ê, hí hkûn, ngò gi, nungmoq lé, Woi-nyí eq sêng é bang lé dông wó taí é a nghut; mingkan eq sêng é bang dông nghut kômù, Hkrisduq má zonú su dut bang lé dông sheq taí wú é nghut lhê.

² Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naù byi huq é nghut lhê.* Ahkuí lhang, nungmoq gi, zoshuq apat lé a wó zo shi kó nghut ri.

³ Nungmoq gi, mingkan eq sêng é bang ru nghut nyi ashí kó nghut ri. Hkâsu mù gâ le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wuì su nyi yap bum lhê a nghut kó luq?

⁴ Rayuq gi, "Ngò gi, Poluq htâng châng lhê." ga, góyuq gi,

"Ngò gi, Apolo htâng châng lhê." ga taí nyi bum kô é nghut jáng, nungmoq gi, mingkan zo wuì nghut nyi bum lhê a nghut kó luq?

⁵ Apolo gi, ó wá nghut lhê? Poluq gi, ó wá nghut lhê? Nga-nhik gi, Garaí é dui-nhâng zoshâng za nghut luí, ó le ó lé, haù Yhumsing èq hun tô é muzó eq rajung za wùn waq é nghut luí, nungmoq gi, ngá-nhik dông mai wó lumjáng kô é ru nghut lhê.

⁶ Ngò gi, gabú danglù amyui lé hô kat, Apolo gi, wuì hpyun byi, nghut kôlhang, yuq kô lò nhang é gi, Garaí Gasang za ru nghut lhê.

⁷ Haù mù, amyui hô kat sù eq wuì hpyun byi sù gi, ahkyak mó a nghut, yuq kô lò nhang é Garaí Gasang za sheq ahkyak ru nghut lhê.

⁸ Amyui hô kat sù eq wuì hpyun byi su nhik myoqbyu tô é hkyô gi, rajung za nghut ri; nghut kôlhang, yhumsing shikut é eq rajung za, ó le ô é shigyaú chyunghuq wó yú kó râ nghut lhê.

⁹ Hkâsu mù gâ le, ngamoq gi, Garaí Gasâng é mù zui luzúm wuì nghut lhê; nungmoq gi, Garaí Gasâng é yò, Garaí Gasâng é yhùm nghut nyi akò.

¹⁰ Garaí Gasang, ngo lé byi to bê jeju eq rajung za, yhùm saí kung sù rayuq dông, ngò gi, yhùm apûn awang hí to bê nghut lhê; gotû byù gi, hau é ahtoq má saí toq jat nyi é

* 2:16 Esai 40:13 * 3:2 Nungmoq lé naù byi huq é, gâ é gi, lui é hkyô pé lé hí mhoq byi é lé gâ lhê.

nghut lhê. Nghut kôlhang, yuq hkangmó gi, yhumsîng saî é má rago sidiq râ lhê.

11 Hkâsu mù gâ le, hi to gù nghut é, Yesuq Hkrisduq nghu é yhûm apûn awang mai lai luî, ó yuq le, gotû yhûm apûn awang lé wó saî é a nghut.

12 Yhûm apûn awang hau é ahtuq má, hîng, ngùn, hpau-dap luqgok pé, sik, mhan, hkowá pé lé chúng mù saî jat kô é nghut jáng,

13 yuq hkangmó é muzó hkâsu nghut é hkyô lé lhoq htoq shit é hui râ nghut lhê. Haî mù luî gâ le, haû Yesuq é Buinyî gi, haû lé byu-myàng nhâng mù, haû buinyî lé gi, myî èq lhoq htoq shit râ nghut lhê. Haû myî gi, yuq hkangmó saî é muzó hkasû é nghut é lé chyâm râ nghut lhê.

14 Rayuq yuq saî é yhûm gi, ru gîng nyi é nghut jáng, haû yuq gi, yhang é shigyau chyunghuq wó yû râ nghut lhê.

15 Nghut kôlhang, yhûm haû nyé gyó byuq é nghut jáng, yhang gi, yhûm sûm byuq é hui zo râ nghut lhê; yhang gi, asak lut kôlhang, myishâm mai wó lut é byù su dut râ nghut lhê.

16 Nungmoq gi, Garai Gasâng é noqkuq yhûm nghut luî, Garai Gasâng é Woi-nyî gi, nungmoq má lúng nyî bê hkyô lé a sé kó lúh?

17 Rayuq yuq, Garai Gasâng é noqkuq yhûm lé lhoq htên

é nghut jáng, Garai Gasang gi, haû yuq lé lhoq htên pyám râ nghut lhê. Hkâsu mù gâ le, Garai Gasâng é noqkuq yhûm gi, chyoyúng lhê; nungmoq gi, noqkuq yhûm haû nghut akô.

18 Nungmoq gi, yhums-ing gùng yhumsîng hkâlhoq nghoq kó. Nungmoq mâ é rayuq yuq, shí ipyat mâ é byù nyi a-tsáng đông hpaqchyî byéng-yá bò sù ga myit é nghut jáng, hpaqchyî byéng-yá akying bò sù wó dut sháng gaq, yhang gi, a-ngok sù dut râ lhê.

19 Hkâsu mù gâ le, mingkan shî mâ é hpaqchyî byéng-yá gi, Garai Gasâng é hí má ngok é hkyô nghut ri. Haû gi, "Garai Gasang gi, hpaqchyî byéng-yá bò bang lé, yhang-moq é hpaqchyî má yhang myí to nhang ri."* ga kê tô é eq rajung za nghut ri.

20 Hau htoq agó, "Haû Yhumsîng gi, hpaqchyî byéng-yá bò bang myit é hkyô pé akôm nghut é lé sê lhê."* ga le kê tô ri.

21 Haû mù luî, ó yuq le, byù eq sêng é hkyô má gyáng é dang a taí kó sháng gaq! Lhunglhang gi, nungmoq é chyat nghut lhê.

22 Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htàngnùng mâ é hkyô le, banshoq gi, nungmoq é chyat nghut ri.

23 Nungmoq gi, Hkrisduq é nghut akô; Hkrisduq gi, Garai

Gasâng é nghut ri.

4

Hkrisduq É Lagyô Pé

¹ Haû mù luî, byu pé gi, ngamoq lé, Hkrisduq é dui-nhâng zoshâng wui đông eq Garai Gasâng é zaû tô é hkyô pé lé taí pyô râ matú ap byi tô é hui bang đông sôn yù râ lê.

² Haû đông nghut jáng, ap byi tô é hui bang gi, yhumsing lhumzui hkyô lé saksé shit râ dut lê.

³ Nungmoq eq nghut nghut, waxâng zô wui é tarâ rùng mai nghut nghut, ngo lé jéyáng kô le, ngá é matú atiq azo za nghut lê; gè gè ga jáng, ngá gung ngò lhang a jéyáng é nghut lê.

⁴ Haî mù gâ le, ngá gung ngò mara a bò bún é nghut kôlhang, haû gi, ngo lé wó lhoq sân-yúng byi é a nghut. Ngo lé jéyáng é sù gi, haû Yhumsing nghut lê.

⁵ Haû mù, masat tô é ahkying a jé shimá haî lé le a jéyáng é za, haû Yhumsing jé lé shoq, lánng nyi keq. Yhang gi, mauchut hkaû má haq tô é pé lé byu-myàng nhâng mù, byu pé é myit nhiklhum má lúng é hkyô lé lhoq htoq shit râ nghut lê. Haû hkûn, yuq hkangmó gi, ó le ó wó gíng é hkya-ôn hkyô lé, Garai Gasâng chyáng mai wó yù râ nghut lê.

⁶ Gumang wui ê, ngò gi, "Kâ tô é gú mai hkâlai." gâ é sanghkyâng é lichyúm lé, ngamoq chyáng mai nungmoq wó mhoq yù sháng gaq nghû,

nungmoq é akyu é matú, ngò eq Apolo má haû pé lé yù mù dangtú kut é nghut lê. Haû hkûn, nungmoq gi, nghutbun é đông, rayuq lé gi, wú ko, góyuq lé gi, wú shóm, a kut kó râ nghut lê.

⁷ Ó yuq wá, nang lé, góyuq eq shaî shoq kut lê lú? Nang hap yu é a nghut le gi, wó râ lú? Nang, hap yu é nghut le gi, a hap yu é đông haî mù nghutbun nyi lê lú?

⁸ Nungmoq gi, râ é lhunglhang gumjup bang nghut bekô hung! Nungmoq gi, wó bang dut gù nghut bekô hung! Ngamoq a lom é za, nungmoq gi, hkohkam pé dut bekô hung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lê, ngò hkâ-í yhang ô nau nyi lê ô!

⁹ Nghut kôlhang, sat râ matú doqdan huî é shúm byu pé lé su, Garai Gasang gi, lagyô pé nghut é ngamoq lé de de kut htoq shit bê nghû, ngò wó myit ri. Ngamoq gi, nyi mi-nyi, joq mijoq, maumang lagyô pé eq waxâng zô wui é hí má, wú kûn jung đông dut nhang é huî nyi gù bê nghut lê.

¹⁰ Ngamoq gi, Hkrisduq é yanmai ngok é bang đông sôn yu é hui kôlhang, nungmoq kúm gi, Hkrisduq má hpaqchyî gyaí bo é bang đông dut bekô hung! Ngamoq gi, wum nyhôm é bang đông sôn yu é hui kôlhang, nungmoq

kúm gi, wúm bo é bang đông dut bekô nhung! Nungmoq gi, hkunggâ é huí akô; ngamoq kúm gi, hkunggâ é a hui nhung!

¹¹ Shí hkyíng shí u jé shoq, ngamoq gi, zòmut wuìshit huí é, mebu ajeq amyhâ dut huí é, nhuq bat huí é, yhumsing é nyì jowò a wó é bang nghut nyì lhê.

¹² Ngamoq gi, yhumsing loq èq yhang mù zui wum kat nyì lhê. Ngamoq gi, nhíng pyám é hui jáng, shimân byi, zing-rî é hui jáng, jân pyám kut lhê.

¹³ Ngamoq gi, lumù gansang é hui jáng, dang ngón dang nguì tû nyo lhê. Ngamoq gi, ahkuí jé shoq, myidàm htoq mâ é hpoqkyuq hpoqpyâng eq mingkân é buzaq pé đông sôn yu é huí nyì lhê.

¹⁴ Ngò gi, nungmoq lé hoq lhoq hpu rá matú haú pé lé kâ é a nghut, ngá é chyitdap zo wuì lé đông lhoq pûn kyíng rá matú ru nghut lhê.

¹⁵ Nungmoq gi, Hkrisduq má mhòqshit bang ra mun wó kô é nghut kôlhang, íwâ pé myo shoq wó kô é a nghut; hkâsu mù gâ lé, ngò gi, haú gabú danglù đông mai, Hkrisduq Yesuq má nungmoq é íwa dut é nghut lhê.

¹⁶ Haú mù luí, ngò kut é su cháng keq nghû, ngò, nungmoq lé lung kat lhê.

¹⁷ Hau é yanmai, ngò gi, haú Yhumsing má lhumzui sù nghut é, ngò chyitdap é ngá zo đông nghut sù Timohti

lé, nungmoq chyáng nhang kat é nghut lhê. Yhang gi, Hkrisduq Yesuq mâ é ngá é asak duì hkyô lé, jowò hkangmó mâ é noqkuq hpúng hkangmó lé ngò mhòq byí é eq rajung za, nungmoq lé lhoq pun byi rá nghut lhê.

¹⁸ Nungmoq mâ é ra-am gi, nungmoq chyáng ngò a dum jé lé rá su ngam pyám kômù, nghutbûn byuq bekô nghut ri.

¹⁹ Nghut kôlhang, haú Yhumsing gyô é nghut jáng, ngò gi, nungmoq chyáng hân za jé lé rá nghut lhê; haú hkûn, ngò gi, nghutbûn é byù haú bang haí taí é hkyô lé za a nghut, yhangmoq hai a-tsam wó é hkyô lé le gôn htoq rá nghut lhê.

²⁰ Hkâsu mù gâ le, Garai Gasâng é mingdán gi, taí é dang má bo é a nghut, a-tsam má sheq ru nghut lhê.

²¹ Nungmoq hká đông ô nau akô lhú? Ngò gi, nungmoq chyáng, nuichûm hkat èq, a nghut jáng, chyitdap é eq nú-nhâm é myit mai lé lô ra rá lhú?

5

*Ashop É Đông Gungsho
Zùm Yap É Hkyô Kut É Sù Lé
Lhoq Htoq Pyám Râ Hkyô*

¹ Nungmoq chyáng, ashop é đông gungsho zùm yap é hkyô joq é lé, hkyak taí hù lò bekô; haú gi, a lumjíng bâng chyáng lhang a dut wú é hkyô nghut é, yuqgè rayuq gi, yhangwâ é myiwe eq nyì zô lhum nyì é hkyô nghut ri.

² Nghut kôle, nungmoq gi, nghutbûn nyi bum akô nhung! Haú dông a nghut é za, nungmoq gi, yón é myit tân shit mù, haú su kut é byù lé, nungmoq é hpúng mai lhoq htoq pyâm le, a gè kó lú?

³ Ngò gi, ngá gungdu, nungmoq eq rahá a nyi to kôlhang, ngá é i-myit gi, nungmoq eq rahá nghut nyi luí, gungdu jé nyi tô é dông mai, haú hkyô kut é sù lé jéyáng doqdan gù nghut lhê.

⁴ Nungmoq gi, nga-nhông é Yhumsing Yesuq é mying mai zup zing mù, ngá é i-myit gi, nungmoq eq rahá nghut nyi luí, nga-nhông é Yhumsing Yesuq é a-tsam le, nungmoq eq rahá nghut nyi é hkûn,

⁵ byù haú yuq lé, Tsadán é loq má ap byi pyám keq.* Haú jáng, Yhumsing é buinyi má, yhâng é woi-nyí gi, hkyi yu é hui râ matú, yhâng é yubak gungsho gi, lhoq htên pyâm é hui râ nghut lhê.

⁶ Nungmoq é nghutbun hkyô gi, ge é a nghut. Mún† ra tsuí zo gi, muk long gón lé wó lhoq daú nhang é lé, nungmoq a sé kó lú?

⁷ Nungmoq gi, múnchi a bo é bang nghut nyi kô é eq rajung za, múnchi a bo é muk htung asik su wó dut kô sháng gaq, múnchi axau lé lhuí pyám keq. Hkâsu mù gâ le, nga-nhông é Lhoqlhai Poí

sauzo, Hkrisduq gi, hkungga nhong é hui bê nghut lhê.

⁸ Haú mù luí, nga-nhông gi, agè agaú hkyô eq hpuzo nhâng hkyô nghut é múnchi axau bo é dông a nghut é za, lhumzui hkyô eq tengmán hkyô é muk nghut é, múnchi a bo é muk eq, Poí haú lé kut nyi sháng.

⁹ Ashop é dông gungsho zùm yap é bang eq hkâzùm kó nghũ, ngò, nungmoq lé, ngá é laiká má kê kat byi bê nghut lhê.

¹⁰ Nghut kôlhang, mingkan shi eq sêng é, ashop é dông gungsho zùm yap é bang, myoqnoq é bang, mhaú zô é bang eq hparà noq é bang lé hkâzùm yap kó nghũ é gi, a nghut. Haú su ru nghut le gi, mingkan htoq shi mai nungmoq htoq ló byuq ra kô râ nghut lhê.

¹¹ Nghut kôlhang, yhânggùng yhang gi, gumang ga kôle, ashop é dông gungsho zùm yap é, myoqnoq é, hparà noq é, lumù gansang é, i shuq wut é, mhaú zô é sù ó yuq eq le a ge zùm yap kô râ nghut lhê nghũ, ahkuí, ngò, nungmoq lé kê kat nau é nghut lhê. Haú sù é byù eq gi, rahá lhang hkâzo kó.

¹² Haú noqkuq hpúng shinggan mã é bang lé jéyáng râ gi, ngò eq haí sêng lhê lú? Nghut kôlhang, hpúng ahkaú mã é bang lé nungmoq jéyáng râ dut lhê.

* **5:5** Tsadán é loq má ap byi pyám keq gâ é gi, hpúng byù wui eq a zùm yap nhâng lo râ lé taí é nghut lhê. † **5:6** Mún gâ é gi, yubak mara lé taí nau é nghut lhê. Lhoqlhai Poí jé jáng, Israelaq byu pé gi, yhangmoq wó é múnchi banshoq lé lhuí pyám mù, múnchi a bo é muk sai kô é nghut lhê.

13 Hpúng shinggan mâ é bang lé gi, Garai Gasang jéyáng râ nghut lhê. Nghut kôlhang, "Haû agè agaú é sù lé, nungmoq chyáng mai lhoq htoq pyám keq."* gâ tô ri.

6

Lumjǐng Bāng Hkaû Má Jéyáng Lhûm É Hkyô

1 Nungmoq mâ é rayuq yuq gi, gumang góyuq eq dang-rhâng lhûm tô é nghut jáng, haû hkyô lé jéyáng nhâng râ matú, haû sân-yúng bāng é hí má táí râ malaí, Garai a wó bāng é hí má wám táí râ lú?

2 Haû sân-yúng bang gi, mingkan lé jéyáng râ nghut é hkyô lé, nungmoq a sé kó lú? Nungmoq gi, mingkan lé jéyáng râ bang nghut kôle nhâng, tiq é mù pé lé wó jéyáng é bang a nghut kó lú?

3 Nga-nhúng gi, maumâng pé lé jéyáng râ nghut é hkyô lé, nungmoq a sé kó lú? Haû mù, shí pyat mâ é hkyô pé lé, gè gè yhang wó jéyáng kô râ nghut lhê ô!

4 Haû mù lú, nungmoq gi, dang-rhâng lhûm é mù pé joq é nghut jáng, noqkuq hpúng má ahkyak a nghut é bang lé tará agyì kut nhâng kô râ lú?

5 Ngò, haû su nghú táí é gi, nungmoq lé hoq hpu nhâng râ matú nghut lhê. Lumjǐng bāng chyáng dang-rhâng lhûm é hkyô lé wó jéyáng râ hpaqchyí luq shoq bo é byù, nungmoq chyáng rayuq lhang a nyì dut kô râ lú?

6 Nghut kôlhang, nungmoq gi, gumang yhangchang rayuq eq rayuq, a lumjǐng bāng é hí má lhang rùng shok lhum akô hung!

7 Nungmoq hkaû má mù jéyáng lhûm é hkyô joq é nghut jáng, nungmoq gi, sum lugù nghut bê. Góyuq eq shut le lhang rú ge lhê a nghut kô lú? Mhaú zô é huì le lhang rú gè lhê a nghut kô lú?

8 Nghut kôle, nungmoq yhang gi, mhaú zo kô é eq shut kô é nghut lú, haû gi, nungmoq é gumang wuì lé kut é nghut lhê.

9 Agè agaú é bang gi, Garai Gasâng é mingdán mâ é shimân jeju a myang hkam yù kó râ nghut é hkyô lé, nungmoq a sé kó lú? Hkâ-nâ nyì kó. Ashop é dông gungsho zùm yap é bang le, hparà noq é bang le, su-myi sulàng lú é bang le, shiwa hpó kut é bang le, yuqgè yhangchang nyì zô lhûm é mara kut shut é bang le,

10 hkau bang le, myoqnoq bang le, î shuq wut bang le, lumù gansang é bang le, mhaú zô é bang le, Garai Gasâng é mingdán mâ é shimân jeju lé myang hkam yù kô râ a nghut.

11 Nungmoq mâ é ra-am gi, haû su kut kô é bang nghut akô. Nghut kôlhang, nungmoq gi, nga-nhúng é Garai Gasâng é Woi-nyí eq Yhumsing Yesuq Hkrisduq é mying mai, mara hkyut san byí é, lhoq sân-yúng é eq chí

sân pyám byí é hui bekô nghut ri.

Ashop É Đông Gungsho Zùm Yap É Hkyô

12 "Jung hkanmó kut râ ahkáng ngò wó lâ." Nghut kôlhang, jung hkanmó gi, akyû byí é a nghut. "Jung hkanmó kut râ ahkáng ngò wó lâ." Nghut kôlhang, hái jûng eq le ngo lé wó sing pyám râ a nghut.

13 "Zoshuq gi, wamdaû é matú nghut mù, wamdau gi, zoshuq é matú nghut ri." ga nungmoq ra-am tái kó râ nghut lâ. Nghut kôlhang, Garai Gasang gi, haû í jûng é lé lhoq htên pyám râ nghut lâ. Gungdu gi, ashop é đông gungsho zùm yap hkyô é matú a nghut é za, haû Yhumsing é matú nghut mù, haû Yhumsing gi, gungdû é matú nghut ri.

14 Garai Gasang gi, Yhâng é a-tsâm eq, haû Yhumsing lé, shi é mai lhoq dui toq yû bê nghut mù, nga-nhúng lé le lhoq dui toq yû râ nghut lâ.

15 Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kô lú? Haû nghut le nhîng, Hkrisduq é gungsho showui showang pé lé yù mù, shiwa myhî pé eq rading ralhum za kut pyám nhâng kô râ lú? Hkâ-nhám le a ge dut nhâng!

16 Shiwa myhí eq gungsho zum é sù gi, yhang eq gungsho ralhum za dut bê hkyô lé, nungmoq a sé kô lú?

Hkâsu mù gâ le, "Yhangnhik gi, gungsho ralhum za dut kô râ nghut lâ."* ga tái tô ri.

17 Nghut kôlhang, haû Yhumsing eq rading ralhum za dut é sù gi, woi-nyí má Yhang eq ralhum za dut bekô nghut ri.

18 Ashop é đông gungsho zùm yap é hkyô lé koi pyám keq. Byù rayuq kut shut é gotû mara pé banshoq gi, yhâng é gungdu shinggan tái nghut lâ; nghut kôlhang, ashop é đông gungsho zùm yap é hkyô kut shut é sù gi, yhumsing gùng lé mara shut é sù nghut ri.

19 Nungmoq é gungdu gi, Garai Gasâng chyáng mai nungmoq wó yû bê nghut é, nungmoq tái lúng nyi é Chyoiyung Woi-nyí é noqkuq yhûm nghut é lé, nungmoq a sé kô lú? Nungmoq gi, yhumsing gùng lé sing é bang a nghut.

20 Hkâsu mù gâ le, nungmoq gi, ahpau ralhum byi mù wui hpyit tái é hui bê bang nghut akô. Haû mù luí, nungmoq é gungdû eq, Garai Gasang lé, hkunggâ é hkyô shit nyí keq.

7

Myí Yu É Eq Sêng É Hkyô

1 Ahkuí, nungmoq tái kat é hkyô pé eq séng luí ga jang, yuqgè rayuq gi, myi a yu le gè ri.

2 Nghut kôlhang, ashop é đông gungsho zùm yap é hkyô gyai myô é yanmai,

yuqgè hkangmó gi, yhumsing é myiwe wó râ lhê; myiwe hkangmó gi, yhumsing é yuqgè wó râ lhê.

³ Haû yhumsing hpó gi, wò joq é eq rajung za, yhâng yhumsing myhí eq zùm sháng gaq; haû dông za, yhumsing myhí le, yhâng yhumsing hpó eq zùm sháng gaq.

⁴ Haû yhumsing myhí é gungdu gi, yhânggung yhang za sêng é a nghut, yhâng é yhumsing hpó eq le sêng lhê. Haû eq rajung za, yhumsing hpó é gungdu gi, yhânggung yhang za sêng é a nghut, yhâng é yhumsing myhí eq le sêng lhê.

⁵ Nungmoq myit huí lhum luí, kyûdùng é má rago ap nóng râ ahkyíng ayoq za a nghut jáng gi, rayuq eq rayuq hkáhe lhum kó. Nungmoq yhumsing gùng lé a wó hkang é yanmai, Tsadán èq gunglaú é a hui kô sháng gaq, ahkyíng ayoq haû lai jáng, rahá dum zùm keq.

⁶ Ngò, haû su nghú taí é gi, hkunmó hkyô é dông a nghut, ahkáng byí kat é dông ru nghut lhê.

⁷ Byù banshoq bang gi, ngò su nyi râ lé ô nau ri. Nghut kôlhang, yuq hkangmó gi, ó le ô é chyunghuq lé Garai Gasâng chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

⁸ Ahkuí, myiwe a yù lô é bang eq chuimó pé lé ngò taí kôlé, ngò su, haû dông jáng nyi pyám kô é nghut le, yhang-

moq é matú ge é hkyô nghut ri.

⁹ Nghut kôlhang, yhumsing gùng lé a wó hkang kô é nghut le gi, yhangmoq, myi yù myi ló râ lhê; hkâsu mù gâ le, myi su nyé luí ô nau nyi râ malaí, myi yu myi ló le je ge lhê.

¹⁰ Myi yù bê bang lé, ngò, hkunmó hkyô kôlé, shí gi, ngò dông hkyô é a nghut, Yhumsing chyáng mâ é ru nghut lhê: Yhumsing myhí gi, yhâng é yhumsing hpó chyáng mai a ge gang râ nghut lhê.

¹¹ Nghut kôlhang, yhang gâng é nghut jáng, myi a dum ló é za nyi râ lhê, haû a nghut jáng, yhâng é yhumsing hpó eq dum xoq yù râ lhê. Yhumsing hpó le, yhâng é yhumsing myhí lé a ge kâng pyám râ nghut lhê.

¹² Góbang lé ngò shí su nghú taí kôlé, shí gi, Yhumsing chyáng mâ é a nghut, ngò dông mai taí é ru nghut lhê. Gumang rayuq yuq gi, lumjíng sù a nghut é yhumsing myhí wó é nghut le, myiwe haû, yhang eq rahá nyi nau é nghut jáng, yhang lé a ge kâng pyám râ nghut lhê.

¹³ Myiwe rayuq gi, lumjíng sù a nghut é yhumsing hpó wó é nghut le, yuqgè haû, yhang eq rahá nyi nau é nghut jáng, yhang eq a ge gang râ nghut lhê.

¹⁴ Hkâsu mù gâ le, haû a lumjíng sù yhumsing hpó gi, yhâng yhumsing myhí dông mai lhoq sân-yúng é hui bê nghut mù, a lumjíng sù yhumsing myhí le, lumjíng

sû nghut é yhâng é yhumsîng hpó dông mai lhoq san lhoq yúng é hui bê nghut ri. Haû a nghut jáng, nungmoq é zo wuî gi, a sanséng dut kô râ nghut lê; nghut kôlhang, yhangmoq gi, haû dông mai, chyoyúng bekô nghut ri.

15 Nghut kôlhang, haû a lumjîng sù gâng lô naû jáng gi, gâng lô sháng gaq. Lumjîng é yuqgè nghut nghut, myiwe nghut nghut, haû sù é hkyô pé má gi, hkûm zing tô é hkyô a joq é nghut lê. Garai Gasang gi, nga-nhúng lé, nguínón shoq nyi sháng gaq ga ji yù bê nghut lê.

16 Yhumsîng myhí ê, náng é yhumsîng hpó lé wó hkyi yù râ nghû, hkâsu wó sé râ lú? Yhumsîng hpó ê, náng é yhumsîng myhí lé wó hkyi yù râ nghû, hkâsu wó sé râ lú?

17 Hká dông nghut kôlhang, yuq hkanmó gi, Garai Gasang, yhang lé ji yu tô é hkûn, haû Yhumsîng mai yhang lé nyi nhang tô é dông asak dui nyi râ lê. Haû gi, noqkuq hpúng pé banshoq má ngò tô to byí é tarâ nghut lê.

18 Byù rayuq gi, ji yu é huí é hkûn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sù dông a dut byuq sháng gaq. Byù rayuq gi, ji yu é huí é hkûn, ahpyo-kuq hpyit a hkam yu to shí é nghut jáng, ahpyo-kuq hpyit a hkam yù sháng gaq.

19 Ahpyo-kuq hpyit hkâm hkyô gi, haî ahkyak a nghut; ahpyo-kuq hpyit a hkâm hkyô

gi, haî ahkyak a nghut. Garai Gasâng é hkanmó pé lé châng nyi é za sheq ahkyak nghut lê.

20 Yuq hkanmó gi, yhang lé Garai Gasâng èq ji yu é hkûn lê su xoq nyi nyi râ lê.

21 Nàng gi, ji yù huí é hkûn jùn dut nyi é lú? Haû hkyô lé hkâ-myt chiq. Nghut kôlhang, nàng gi, luthkyô wó yu é nghut jáng, haû dông nyi aq.

22 Hkâsu mù gâ le, haû Yhumsîng èq ji yu é huí é hkûn, jùn dut nyi é sù gi, haû Yhumsîng èq lhoq lhut yu é byù nghut bê. Haû eq rajung za, ji yu é huí é hkûn, luthkyô wó é sù gi, Hkrisduq é jùn nghut ri.

23 Nungmoq gi, Garai Gasâng èq ahpau byi mù wui hpyit yu é hui bê bang nghut akô. Haû mù, byu pé é jùn hkâdut kó.

24 Gumang wuî ê, yuq hkanmó gi, yhumsîng lé Garai Gasâng èq ji yu é huí to bê dông, Yhâng é hí má xoq nyi nyi râ lê.

25 Ahkuî, zomyi zorâm wui é hkyô tai kôlé. Haû Yhum-sîng chyáng mâ é hkanmó gi, ngò a wó; nghut kôlhang, Yhumsîng é shogyo nhikmyîn é yanmai, lungíng sù rayuq nghut nyi é dông, ngò, nung-moq lé hkyô shit râ nghut lê.

26 Ahkuî hui zô é wuîhke hkyô é yanmai, nungmoq gi, yhumsîng nyi to é su xoq nyi nyi le je ge ri nghû, ngò wó myit ri.

27 Nàng, myiháng bê a nghut lhi? Lhoq kang râ

hkâda lo. Nàng, myi a háng shi a nghut lhi? Myi hkâhô lo.

²⁸ Nghut kôlhang, nàng, myihâng é nghut le gi, mara a nghut. Zomyi gi, myi lô é nghut jáng, mara a nghut. Nghut kôlhang, myihâng é bang gi, shí pyat má wuîhke hkyô pé myo myo hui kó râ nghut mù, ngò, nungmoq lé haû mai hkyi yù nau ri.

²⁹ Gumang wuî ê, ngò taí nau é lichyúm gi, ahkyíng tot byuq bê nghut mù, ahkuî mai, myi wó é bang gi, a wó é bang đông nyi kó sháng gaq.*

³⁰ Yón ngaû huí é bang gi, a huí é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su;

³¹ haû mingkan zè pé lé chung é bang gi, haú pé lé a myit tuí é bang su, nghut kó sháng gaq. Hkâsu mù gâ le, shí mingkân é ahkuî lâ é azòng isâm gi, laí lô nyi é nghut lâ.

³² Ngò gi, nungmoq lé a myit myo nhâng nau. Myi a yù shí é sù gi, haû Yhumsíng lé hkâsu wó gabú nhâng râ matú, haû Yhumsing é muzó lé myit chiq nyi ri.

³³ Nghut kôlhang, myi yú bê sù gi, yhâng é yhumsíng myhí lé hkâsu wó gabú nhâng râ matú, mingkan shi é muzó eq séng luí myit chiq nyi ri.

³⁴ Haû mù, yhâng shirong é myit gi, byo myín nyi ri. Myi a lô é myiwe nghut nghut, zomyi gyíng nghut nghut gi,

yhâng é gungdu eq woi-nyí má haû Yhumsíng lé rago wó ap nóng râ matú, Yhumsing é muzó pé eq séng luí myit chiq nyi ri. Nghut kôlhang, myi lô bê myiwe gi, yhâng é yhumsíng hpó lé hkâsu wó gabú nhâng râ matú, mingkan shi é muzó eq séng luí myit chiq nyi ri.

³⁵ Ngò, haû su nghu taí é gi, nungmoq é matú ge é hkyô nghut lâ; nungmoq lé tara èq zuí zing é a nghut é za, myit a byò lo shoq Yhumsíng lé wó ap nóng râ matú, jô é đông asak wó duí kô sháng gaq nghu é hkyô ru nghut lâ.

³⁶ Nghut kôlhang, rayuq yuq gi, yhang dúng tô é zomyi gyíng lé a htuk é đông kut nyi é su wó myit ngàm jáng, myiwe haû asak kô lo nyi mù, háng yù râ dut bê nghu myit é nghut le gi, yhang ô nau é đông kut sháng gaq. Yhang mara kut é a nghut. Yhangn-hik gi, háng lhum râ lâ.

³⁷ Nghut kôlhang, yhang gi, haû hkyô lé yhâng é myit mai wó lhoq zím pyâm é nghut mù, yut yut ô nau hkyo é ahkaû má a nghut é za, yhumsíng ô nau é hkyô lé wó hkúm zing pyâm é sù nghut luí, haû zomyi gyíng lé a háng yù râ matú wó myit hpyit bê sù nghut é nghut jáng, yhang gi, ge é hkyô kut bê nghut ri.

³⁸ Haû mù luí, zomyi gyíng haû lé háng yu é sù gi, jô é hkyô kut bê nghut ri; nghut kôlhang, zomyi gyíng haû lé a

* 7:29 A wó é bang đông nyi kó sháng gaq gâ é gi, Garaí mù lé je myit zuq nyi sháng gá nau é nghut lâ.

hâng yu é sù gi, je ge é hkyô kut bê nghut ri.

³⁹ Myiwe rayuq gi, yhâng é yhumsîng hpó rû dui nyi nyi, yhang eq xoq tô ashî nghut lâ. Nghut kôlhang, yhâng é yhumsîng hpó shi byuq é nghut jáng, yhang gi, myi lô râ ahkáng dum wó bê nghut lâ, nghut kôle, haú yuq gi, Yhumsîng eq sêng é sù dut râ lâ.

⁴⁰ Ngò jéyáng é dông ga jáng, myi a dum lô é wó nyi le gi, yhâng é matú je gabú hkyô dut râ nghut lâ. Ngò le, Garai Gasâng é Woi-nyi wó sù nghû wó myit ri.

8

Hparà Lhô Lé Tîng Byî É Zoshuq

¹ Ahkuî, hparà lâ pé lé tîng byî é zoshuq hkyô: nga-nhúng banshoq bang gi, haú hkyô eq séng luî sê lâ. Sê é hkyô gi, nghutbun sê lâ; nghut kôlhang, chyitdap myit gi, lhoq kô myhang lâ.

² Byù rayuq yuq gi, rajung jung lé sé bún é nghut le, yhang sé âng é lé lhang a sé shi nghut ri.

³ Nghut kôlhang, Garai Gasang lé chyitdap é sù gi, Garai Gasâng eq sê é sù nghut ri.

⁴ Haú mù luî, hparà lâ pé lé tîng byî é zoshuq lé zô é eq séng luî gi: hparà lâ gi, mingkan má haî lhang a nghut é hkyô lé le, Garai Gasang gi, Yhang rayuq mai lai luî gotú a nyi é lé le, nga-nhúng sê lâ.

⁵ Hkâsu mù gâ le, mauhkûng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsing pé" myo myo nyi kôlhang

⁶ nga-nhúng é matú gi, Îwa nghut é Garai Gasang rayuq za nyi é nghut mù, lhunglhang gi, Yhang mai hpan é nghut luî, nga-nhúng gi, Yhâng é matú asak dui nyi é nghut lâ. Yesuq Hkrisduq nghu é Yhumsîng rayuq za nyi é nghut mù, lhunglhang gi, Yhang dông mai hpan é nghut luî, nga-nhúng gi, Yhang dông mai asak dui nyi é nghut lâ.

⁷ Nghut kôlhang, yuq hkangmó gi, haú hkyô lé sê gam hkoq yu é a nghut. Ra-am gi, ahkuî jé shoq hparà lâ pé má mán byuq kô é yanmai, haú sù é zoshuq lé yhangmoq zô é hkûn, hparà lâ lé tîng byî é zoshuq dông myit sôn yu akô. Yhangmoq myit sôn sê é hkyô wum nyhôm é yanmai, mara wó bún akô nghut ri.

⁸ Nghut kôlhang, zoshuq gi, nga-nhúng lé, Garai Gasâng shut shuî chyâng e é a nghut. Nga-nhúng a zô é nghut le gi, je sùm byuq lô é a nghut, zô é nghut le gi, je ge lo é a nghut.

⁹ Haú su ga kôlhang, nung-moq a htung a htê zô é hkyô gi, lumjîng myit wum nyhóm bâng é matú myit leqbat jowô a dut shoq sidiq keq.

¹⁰ Hkâsu mù gâ le, sumsé

hpaqchyî wó é bang nungmoq gi, hparà lho é noqkuq yhûm má zô nyî kô é lé, haû myit sôn sê é hkyô má wum nyhôm é sù rayuq yuq myang é nghut jáng, hparà lhô pé lé tîng byî é zoshuq lé, yhang wám zo râ lé wum byî é a dut kó râ lúh?

¹¹ Haû mù, Hkrisduq shî hkám byi bê nghut é, wum nyhôm é gumang hpó haú yuq gi, nungmoq é sumsé hpaqchyî eq lhoq htên pyâm é hui berâ nghut lhê.

¹² Nungmoq gi, haú hkyô dông mai, nungmoq é gumang wuì lé mara kut shut é eq, yhangmoq é myit sôn sê é hkyô wum nyhôm é lé nò nhang é hkûn, Hkrisduq lé mara kut shut é nghut bekô.

¹³ Haû mù luí, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhám le, sho lé a zo lo râ nghut lhê.

9

Lagyo Rayuq É Ahko Ahkáng

¹ Ngò gi, lut sù a nghut lúh? Ngò gi, lagyo rayuq, a nghut lúh? Ngò gi, nga-nhûng é Yhumsîng Yesuq lé myang wú bê sù, a nghut lúh? Nungmoq gi, haû Yhumsîng má, ngò zui saí é muzó é ashi pé chyat, a nghut kô lúh?

² Ngò gi, góbâng chyáng lagyo a nghut kôlhang, nungmoq chyáng gè gè nghut lhê! Hkâsu mù gâ le, nungmoq

gi, haû Yhumsîng má, ngò lagyo nghut é hkyô saksé dizik nghut bum akô.

³ Ngá ahtoq má jéyáng bang lé, ngá gûng ngò taí hung kat kôlé.

⁴ Ngamoq gi, zo râ shuq râ ahko ahkáng a wó é bang nghut lhê lúh?

⁵ Gotû lagyô pé eq Yesuq é yhanggu yuqzô pé eq Kehpa kut é su, lumjîng sù nghut é yhumsîng myhí shuí chûng râ, ngamoq, ahko ahkáng a wó é nghut lhê lúh?

⁶ Ngò eq Barnaba baú za, asak duì hkyo é matú mù zui ra râ lúh?

⁷ Ó yuq wá, yhumsîng zoshuq wùn luí, gyè mù wùn waq râ lúh? Ó yuq wá, tsibiyiq hkyâm saí mù, haú mâ é tsibiyiq shi a zo kut râ lúh? Ó yuq wá, sau rém mù, sau naú a shuq kut râ lúh?

⁸ Ngò gi, shí hkyô pé lé xângzo hkyam dông za taí é nghut lhê lúh? Haû tarâ má le, rajung za taí tô lhê, a nghut lúh?

⁹ Hkâsu mù gâ le, haû Mosheq é tarâ má, "Guq nâng nyî é no lé nhuttsung hkâ-tsûng to byi."* ga kâ tô ri. Garai Gasang gi, no eq séng luí za chiq é nghut lhê lúh?

¹⁰ Gè gè yhang, yhang gi, nga-nhûng é matú taí é a nghut kô lúh? Nghut lhê, haû gi, nga-nhûng é matú kâ to byî é nghut lhê. Haí mù gâ le, yò hpuq sù, yò hpuq é eq, guq bat sù, guq bat é gi, kyô chòm

shû yù râ lé myoqbyù luî, kut kô é nghut lhê.

11 Ngamoq gi, nungmoq chyáng woi-nyí amyui sân kat bê nghut mù, nungmoq chyáng mâ é mingkan zè lé shû yu é nghut jáng, lùm myô é dut byuq bekô lúh?

12 Góbang gi, nungmoq chyáng mai garúm é ahko ahkáng wó kô é nghut jáng, ngamoq gi, haú lé je wó râ lhê a nghut kó lúh?

Nghut kôlhang, ngamoq gi, ahko ahkáng haú lé a yu é nghut lhê. Haú yù râ malaî, Hkrisduq é gabú danglù gi, hkûm zing pyâm é a hui râ matú sheq, jung hkangmó lé ngamoq hkam jân nyi lhê.

13 Haú noqkuq yhûm má mù zuí é bang gi, yhangmoq é zoshuq lé haú noqkuq yhûm mai wó é hkyô eq, hkungga gyap má dojaú é bang gi, hkungga gyap má nhông byí é ra-am lé myàng zô é hkyô lé, nungmoq a sé kô lúh?

14 Haú eq rajung za, gabú danglù hko kyô é bang gi, gabú danglù hkyô mai yhangmoq é asak baú râ lhê ga, haú Yhumsing hkunmó hkyô to bê nghut ri.

15 Nghut kôlhang, ngò gi, ahko ahkáng haú pé haî lé le a yu é nghut lhê. Nungmoq, ngo lé haú su lhom kut byi râ lé myoqbyù mù, ngò, shí hkyô lé kâ é a nghut. Hkâsu mù gâ le, ngò haú su gumrong é hkyô lé, rayuq yuq lhoq htên pyâm byi râ htoq má, ngò shí byuq le lhang je ge ri.

16 Nghut kôlhang, gabú danglù lé ngò hko kyô é hkûn, ngò gumrông jang a joq; hkâsu mù gâ le, haú gi, ngò a kut a ge é ngá wô nghut lhê. Haú gabú danglù lé ngò a hko kyô é nghut le gi, ngò dingnyé wó râ nghut lhê.

17 Yhumsing nau é myit mai ngò hko é nghut jáng, shigyaú chyunghuq wó râ nghut lhê; yhumsing nau é myit mai a nghut jáng gi, ngo lé lùm luî ap tô é lé, agon za wùn waq nyi é dut râ nghut lhê.

18 Haú mù luî, ngá é shigyaú chyunghuq gi, haî nghut lhê lúh ga jang, haú gabú danglù lé hko kyô é hkûn, ngò gi, ahpau a yu é za wó ap nóng luî, gabú danglù hko kyo hkyô mâ é ngá é ahko ahkáng pé lé ngò a yu é amyat nghut lhê.

19 Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gûng ngò, yuq hkangmó é jùn kut nyi lhê.

20 Ngò gi, Yudaq byu pé lé shuí lhing yù râ matú, Yudaq byu pé chyáng nghut nyi é hkûn, Yudaq byù rayuq đông dut nyi lhê. Ngò gi, tarâ hkaú má nyi sù a nghut kôlhang, tarâ hkaú mâ é bang lé shuí lhing yù râ matú, tarâ hkaú má nyi bâng chyáng nghut nyi é hkûn, tarâ hkaú mâ é byù rayuq đông dut nyi lhê.

21 Ngò gi, tarâ a wó bang lé shuí lhing yù râ matú, tarâ a wó bâng chyáng nghut nyi é hkûn, tarâ a wó sù rayuq đông dut nyi lhê. Nghut kôlhang, gè

gè ga jáng, Garai Gasâng é tarâ mai a lut htoq é za, Hkrisduq é tarâ hkaû má nyi sù nghut lhê.

²² Ngò gi, wum nyhóm bang lé shuí lling yù râ matú, wum nyhóm bâng chyáng nghut nyi é hkûn, wum nyhóm sù rayuq dông dut nyi lhê. Ngò gi, wó dut é hkyô dông mai byù ra-am lé wó hkyí sháng gaq nghû, byù lhunglhang bâng chyáng, byù ajà jà dông nyi nyi lhê.

²³ Ngò gi, gabú danglù mai wó é shimân jeju pé lé wó chôm hkam yù sháng gaq nghû, gabú danglù é yanmai haú pé banshoq lé kut é nghut lhê.

²⁴ Din shingjóng poi má din râ bang banshoq din kôlhang, rayuq za shigyaú chyunghuq wó é hkyô lé, nungmoq a sé kô lhu? Chyunghuq wó râ matú din keq.

²⁵ Sup poi má shingjóng lhûm é bang yuq hkangmó gi, yhumsing gùng yhumsing tarâ htan é dông lhoq mhân yù râ lhê. Yhangmoq gi, gîng nyi râ a nghut é janmaú wó râ matú, haú su kut é nghut akô; nghut kôlhang, nga-nhung gi, ahtum abyuq gingting nyi râ nghut é janmaú wó râ matú shikut é nghut lhê.

²⁶ Haú mù luí, ngò gi, jum dân dân é byù rayuq su dân é sù a nghut. Ngò gi, lài lé bat é byù rayuq su, akôm má bat é sù le a nghut.

²⁷ Ngò gi, góbâng chyáng

mungdang hko é htâng má, ngá gûng ngò, shigyaú chyunghuq eq a gingdán sù a dut sháng gaq nghû, ngá gûng lé gyai yhang lhoq mhân yù mù, ngá gung lé jùn kut yu nyi lhê.

10

Israelaq Pê É Labaú Mai Sidiq Byí É Hkyô

¹ Gumang wui ê, ngò gi, dut lai lo é hkyô lé, nungmoq lé a sé a dut nhâng nau é nghut lhê; hí hkûn, nga-nhung é íchýí íwa pé banshoq bang gi, mhutdûm ô má nyi mù, Nhong Nè mai wó lai byit kô é nghut lhê.*

² Yhangmoq banshoq bang gi, mhutdûm eq Nhong Nè má, Mosheq é chángzô pé dông bapisma hkam yu é bang chyat nghut bekô.

³ Yhangmoq banshoq bang gi, rajung zâ é woi-nyí zang zo kô é eq,

⁴ rajung zâ é woi-nyí wui shuq kô é nghut lhê; hkâsu mù gà le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó haú gi, Hkrisduq nghut bê.

⁵ Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhîn so san kut pyâm é hui bekô nghut ri.

* **10:1** Bun zo ralhumi mai raxê lhumi gi, Htoq Ló Laiká má bo é Mosheq htâng cháng bâng é hkyô lé kâ tô é nghut lhê.

6 Haú hkyô pé dut htoq é gi, agè ashop hkyô má yhang-moq myit tuí bùm é su, nga-nhúng a myit tuí nyi râ matú nga-nhúng é azòng dut bê nghut ri.

7 "Byu pé gi, zùng mù, zo luí shuq luí, a lumjíng bang kut é dông, toq mù, ye bum akô."* ga kê tô é eq rajung za, yhang-moq mâ é ra-am hparà noq é bang dut byuq é su, nungmoq hkâdut kó.

8 Yhangmoq mâ é ra-am gi, ashop é dông gungsho zùm yap é hkyô shut kômù, ra-nyí má za í mûn sum hkyíng yuq shi byuq é su, ashop é dông gungsho zùm yap é hkyô le, nga-nhúng gi, a ge kut shut râ nghut lê.

9 Yhangmoq mâ é ra-am gi, haú Yhumsíng lé chyâm luí, lhangmuí pê èq hte sat é huí bùm kê é su, haú Yhumsíng lé, nga-nhúng gi, a ge chyâm râ nghut lê.

10 Yhangmoq mâ é ra-am gi, nhutluq shô-myo kôluí, lhoq htên é maumâng èq sat pyâm é hui kê é su, nungmoq gi, nhutluq shô-myo hkâkut kó.

11 Yhangmoq chyáng wú yû râ azòng dông haú pé dut htoq luí, ló htáng râ ipyat pé má nyi âng to bang nga-nhúng é matú sidiq byi râ dông kê to bê nghut ri.

12 Haú mù luí, nungmoq gi, yap gíng nyi bê su ngàm kê é nghut jáng, a leqbat râ matú sidiq nyi keq!

13 Byu chyáng htoq sê é gunglaú hkyô za nungmoq

hui râ nghut lê. Garai Gasang gi, lhumzui sù nghut lê mù, nungmoq a wó jân é gunglaú hkyô lé hui nhâng râ a nghut. Nghut kôlhâng, nungmoq gunglaú huí é hkûn, Yhang gi, haú lé nungmoq wó jan râ matú, hkyô htong byi râ nghut lê.

Hparà Lhô Noq Hkyô Lé Koi Pyám Râ Hkyô

14 Haú mù luí, ngò chyitdap é luzúm wui ê, hparà lô noq hkyô lé koi pyám keq.

15 Nhik gyíng bang lé ngò taí lê; ngò haí taí nyi é hkyô lé nungmoq gùng myit sôn yù keq.

16 Nga-nhúng, jeju bûn nyi é jeju góm lé shuq é hkûn, Hkrisduq é sui má chôm zùm bê a nghut kó lú? Nga-nhúng, myhik hpê é muk lé zô é hkûn, Hkrisduq é gungdu má chôm zùm bê a nghut kó lú?

17 Haí mù gâ le, muk htung ralhum za nghut mù, nga-nhúng gi, myo myo nghut kôle ragùng za nghut nyi lê. Hkâsu mù gâ le, nga-nhúng banshoq bang gi, haú rah-tung zâ é muk lé chôm gàm zô é bang chyat nghut lê.

18 Israelaq byu pê é hkyô lé myit wú keq. Haú hkungga lé zô é bang gi, hkungga gyap má chôm lom é bang nghut lê, a nghut kó lú?

19 Hparà lô, a nghut jáng, hparà lô lé tîng byí é hkungga gi, rajung jung nghut lê nghú, ngò taí é lú?

20 Haû su taî é a nghut, a lumjîng bâng é hkungga gi, Garai Gasang lé nhông byî é a nghut, nat gâng pé lé tîng byî é ru nghut lhê. Ngò gi, nungmoq, nat gâng pé eq chôm zum nyi bang dut râ lé a ô nau é nghut lhê.

21 Nungmoq gi, haû Yhumsing é góm lé le, nat gâng pé é góm lé le, ge shuq râ a nghut; nungmoq gi, haû Yhumsing é zangbó má le, nat gâng pé é zangbó má le, rahá ge bo lòm râ a nghut.

22 Nga-nhúng gi, haû Yhumsing lé manôn nhâng nau é bang dut râ a nghut kô lúh? Nga-nhúng gi, Yhâng htoq je wúm bo é bang nghut lhê lúh?

Lumjîng Su É Luthkyô

23 "Jung hkanmó kut râ ahkáng wó lhê." nghut kôhang, jung hkanmó gi, akyû wó é a nghut. "Jung hkanmó kut râ ahkáng wó lhê." nghut kôhang, jung hkanmó gi, byù lé wó kô làm nhang é a nghut.†

24 Ó yuq le, yhumsing é gè hkyo matú ho é a nghut é za, góbâng é gè hkyo é matú hô râ dut lhê.

25 Sho ûng gài má ûng é haî lé lé, úng-âng é myit eq a myî gôn é za zo keq.

26 Hkâsu mù gâ le, "Myidàm htoq eq haû má joq é jung hkanmó gi, Yhumsing é chyat nghut lhê."* gâ tô ri.

27 A lumjîng bang ra-am, nungmoq lé zang zo jì mù,

nungmoq ê nau é nghut jâng, úng-âng é myit eq a myî gôn é za, nungmoq hí má to byî é gû lé zo keq.

28 Nghut kôhang, rayuq yuq, nungmoq lé, "Shî gi, hparà lhô lé tîng byi bê nghut lhê." ga taî kyô é nghut jâng, nungmoq lé taî kyo su é yanmai le, myit úng-âng é yanmai le, haû lé hkâzo kó.

29 Úng-âng é myit haû gi, nungmoq é a nghut, góyuq é úng-âng é myit lé taî nau é ru nghut lhê. Ngá é luthkyô lé, haî mù góyuq é úng-âng é myit eq jéyáng é huî nhang lhê lúh?

30 Ngò jeju bûn é myit mai bo zo bo shuq yu é nghut jâng, Garai Gasang lé jeju hkya-on bê nghut é zoshuq hau é yanmai, haî mù lumu pyâm é ngò hui râ lúh?

31 Haû mù luî, nungmoq zo kôhang, shuq kôhang, haî kut kôhang, Garai Gasang é hpungwup shingkâng é matú chyat kut keq.

32 Ngò gi, yuq hkanmó lé, hkyô hkanmó má shikut luî myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasang é noqkuq hpúng mã é byù lé nghut nghut, ó yuq lé le myit hkâleqbat nhâng kó.

33 Hkâsu mù gâ le, ngò gi, yhangmoq hkyi yu é wó hui kó sháng gaq nghû, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

† 10:23 Bun zo 23 mã é dangngô gi, Korinhtuq byu pé lhaq taî é dang nghut lhê.

* 10:26 Hkya-on 24:1

11

1 Ngò gi, Hkrisduq é alik châng é su, nungmoq gi, ngá é alik châng keq.

Noqkuq É Má Htap Htuk Râ Hkyô

2 Nungmoq gi, hkyô hkanmó má ngo lé bûn nyi kô é yanmai le, nungmoq lé ngò hai byi bê mhoqshit hkyô pé lé myhik zing nyi kô é yanmai le, ngò, nungmoq lé hkyâ-ôn lê.

3 Ahkuî, ngò, nungmoq lé sê hkyâng nhâng nau é hkyô gi: yuqgè hkanmó é ulhum gi, Hkrisduq nghut ri; myiwe hkanmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri.

4 Yuqgè hkanmó gi, kyûdûng le nghut nghut, myiqhtoi htoî le nghut nghut, yhâng é ulhum lé nghop tô é nghut jáng, yhâng é ulhûm é aróng lé lhoq hpoî pyâm é nghut bê.

5 Myiwe hkanmó gi, kyûdûng le nghut nghut, myiqhtoi htoî le nghut nghut, yhâng é ulhum lé a nghop tô é nghut jáng, yhâng é ulhûm é aróng lé lhoq hpoî pyâm é nghut bê. Haû gi, yhâng é ulhum lé wuq pyâm é eq rajung za nghut ri.

6 Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyâm ra râ nghut lê. Nghut kôhang, xâm nyhâm pyâm é nghut nghut, xâm wuq pyâm é nghut nghut,

myiwe rayuq é matú aróng hpoî lê nghut jáng, yhang gi, yhâng é ulhum lé nghop to ra râ nghut lê.

7 Yuqgè gi, Garai Gasâng é azông isâm eq hpungwup shingkang nghut é yanmai, yhâng é ulhum lé a nghop râ é nghut lê. Myiwe kúm gi, yuqgè é hpungwup shingkang nghut ri.

8 Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lê.*

9 Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqgè é matú hpan tô é ru nghut lê.

10 Haû nghut é yanmai le, maumang lagyo pé é yanmai le, myiwe gi, ahko ahkáng kumlhá dông yhâng é ulhum lé nghop râ dut lê.

11 Nghut kôhang, haû Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lê.

12 Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lê. Nghut kôhang, jung hkanmó gi, Garai Gasang mai lo é nghut lê.

13 Myiwe rayuq, ulhum a nghop é za Garai Gasang lé kyûdûng é gi, htuk kô râ lúh? Nungmoq, yhumsing gung é matú doqdân yù keq.

14 Yuqgè xâm hîng tô é nghut jáng, yhâng é matú aróng hpoî é hkyô dut é nghut kôle,

15 myiwe xâm hîng tô é nghut jáng, yhâng é matú hpungwup shíngkang nghut é hkyô lé, htûnglî êq nungmoq lé mhoqshit lhê, a nghut kô lú? Hkâsu mù gâ le, xâm hîng tô é gi, nghop râ zê dông yhang lé byî tô é nghut lhê.

16 Rayuq yuq, haú hkyô lé tai dang-rháng nau é nghut jáng, ngamoq chyáng le, Garai Gasâng é noqkuq hpûng pê chyáng le, gotû htûnglî a joq é nghut lhê.

Yhumsing É Myinzang

17 Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut.

18 Sâng-hi má, noqkuq hpûng ralhú dông nungmoq zup zîng é hkûn, nungmoq hkaú má gam hkoq hkyô joq é lé wó gyô é nghut luí, têng é le bò râ nghû, ngò lumjîng lhê.

19 Ô pé gi, Garai Gasang o é hkyam shut nghut é lé wó shit râ matú, nungmoq ahkaú má gam hkoq lhum hkyô joq râ dut lhê.

20 Nungmoq rahá zup zîng kô é hkûn, nungmoq gi, haú Yhumsing é myinzang zô é a nghut kó.

21 Hkâsu mù gâ le, nungmoq zô é hkûn, góyuq lé le a lánng é za, ó le ó hí yù zô akô. Haú mù, rayuq gi, zo mut huí nyì, góyuq gi, shuq wut to dut akô nghut ri.

22 Nungmoq gi, zo jang shuq jang yhûm a wó bang

nghut akô lú? Garai Gasâng é noqkuq hpûng lé wú tiq pyám kô é eq, a wó bang lé hoq hpu nhâng kô é, nghut akô lú? Nungmoq lé ngò hkâsu nghû tai kô râ lú? Haú pê é yanmai, ngò, nungmoq lé hkya-on râ lú? Ratsuí lhang a wó dut!

23 Hkâsu mù gâ le, haú Yhumsing chyáng mai ngò wó hap yu é gû lé, nungmoq lé lhai byi bê nghut lhê: Haú Yhumsing Yesuq gi, Yhang lé ap pyám huí é myìn má, muk lé yù mù,

24 jeju hkya-ôn é htâng má, haú lé myhik hpé mù, tai é gi, "Shî gi, nungmoq é matú Ngá é gungsho nghut lhê; Ngo lé bûn nyì râ matú, shî su kut nyí keq." gâ ri.

25 Haú eq rajung za, myinzang bàn zô é htâng má, Yhang gi, góm lé le yù mù, "Góm shî gi, Ngá é sui má é dangshikaq asik nghut lhê; hkâ-nhám le, nungmoq shî shuq é hkûn, Ngo lé bûn nyì râ matú shî su kut keq." gâ tai ri.

26 Hkâsu mù gâ le, nungmoq gi, muk shî lé zo luí, góm shî lé shuq é hkangmó, haú Yhumsing shî hkâm é hkyô lé, Yhang jé lé shoq, shit kyô nyì râ lhê.

27 Haú mù luí, ó yuq nghut kôle, a gingdán é dông Yhumsing é muk haú lé zo mù, góm haú lé shuq é nghut jáng, haú Yhumsing é gungdu eq sui lé shut é mara wó bê nghut lhê.

28 Haú mù, ó yuq le, muk zo góm shuq râ hí má, yhumsing gùng yhumsing jep wú ra râ

nghut lhê.

²⁹ Hkâsu mù gâ le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhânggùng yhang mara zô bô shuq bo yu é nghut lhê.

³⁰ Haû nghut é yanmai, nungmoq mâ é byù myo myo gi, wum nyhôm é, nòhpyo huí é nghut bum akô. Ra-am gi, shi ló byuq bekô nghut ri.

³¹ Nghut kôlhang, nga-nhúng gi, yhumsing gùng yhumsing hí sôn sê yu é nghut jáng tarâ jéyáng é hui râ a nghut.

³² Nga-nhúng gi, mingkan eq rahá, mara byí é a hui zo sháng gaq ga, nga-nhúng lé haû Yhumsing eq jéyáng é hkûn, nga-nhúng gi, mho-qshit é huí nyí gù bê nghut lhê.

³³ Haû mù luí, ngá é gumang wuì ê, nungmoq gi, zo râ nghû rahá zup zîng é hkûn, rayuq eq rayuq lánq lhum keq.

³⁴ Nungmoq rahá zup zîng é hkûn, jéyáng é a hui zo kó sháng gaq, rayuq yuq zòmut é nghut jáng, yhúm má zô chûng râ lhê.

Gotû myit tô é hkyô pé gi, ngò jé lé é hkûn sheq shit kyo râ nghut lhê.

12

Woi-nyí Hkyô Eq Sêng É Chyunghuq Pé

¹ Gumang wuì ê, woi-nyí hkyô eq sêng é chyunghuq pé

lé, nungmoq a sê gyo râ lé ngò a ô nau é nghut lhê.

² Nungmoq gi, a lumjîng bang nghut nyí kô é hkûn lé, dang a nyo é hparà lhô noq râ matú hkyô shuí ngoq é hui kô é hkyô lé, nungmoq sê lhê.

³ Haû mù luí, "Yesuq gi, nhîng pyâm é hui sháng gaq." ga, Garai Gasâng é Woi-nyí mai taí é byù ó yuq le a nyí é eq, haû Chyoiyúng Woi-nyí mai za a nghut jáng, "Yesuq gi, Yhumsing nghut lhê." ga, ó yuq le a wó taí é nghut lhê nghû, ngò, nungmoq lé taí kyô é nghut lhê.

⁴ Woi-nyí hkyô eq sêng é chyunghuq ajung jung joq lhê; nghut kôlhang, Chyoiyúng Woi-nyí mai chyat nghut lhê.

⁵ Dojaú é hkyô ajung jung joq lhê; nghut kôlhang, Yhumsing rayuq lé za dojaú é nghut lhê.

⁶ Zui saí é hkyô ajung jung joq lhê, nghut kôlhang, Garai Gasang yhang za, byù lhunglhang bang má, haú pé banshoq lé kut é nghut lhê.

⁷ Woi-nyí é hpông shit hkyô gi, byù pê é gè hkyô matú, yuq hkangmó lé byí bê nghut ri.

⁸ Rayuq lé gi, Woi-nyí haû mai, hpaqchyí byéng-yá byíng é danglù byí é nghut ri; góyuq lé gi, Woi-nyí hau eq za, sumsé hpaqchyí byíng é danglù byí é nghut ri;

⁹ góyuq lé gi, Woi-nyí hau eq, lumjîng myit byí é nghut ri; dum góyuq lé gi, Woi-nyí hau eq, nò lhoq ge é chyunghuq byí é nghut ri;

10 dum, góyuq lé gi, hpung-wup a-tsam pé; dum, góyuq lé gi, myiqhtoi htoî é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haú pé é lichyúm taí sân kyô é ahkáng, byî é nghut ri.

11 Chyunghuq haú pé banshoq gi, Woi-nyí hau eq za kut é loqmú chyat nghut mù, Yhang myit hpyit é đông yuq hkangmó lé haú pé tsing gàm byî é nghut ri.

Gungbun Myo Kôlhang, Ra Gùng Za

12 Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haú eq rajung za, Hkrisduq eq le haú đông nghut ri.

13 Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yù bê bang nghut lhê.

14 Haú gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê.

15 Haú hkyí gi, "Ngò, loq a nghut é yanmai, gungdu eq a

sêng é nghut lhê." gâ é nghut jáng, hau é yanmai, gungdu eq a séng wó dut é a nghut.

16 Dum, haú nohkyap gi, "Ngò, myoqjí a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut.

17 Ragùng dû é gi, myoqjí za nghut é nghut jáng, gyô é hkyô gi, hkâmá nghut râ lú? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lú?

18 Nghut kôlhang, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri.

19 Gungsho showui showang gi, ra bun za nghut é nghut jáng, gungdu gi, hkâmá nghut râ lú?

20 Hkyak ga jang, gungsho showui showang pé myo kôlhang, gungdu gi, ragùng za nghut ri.

21 Haú myoqjí gi, loq lé, "Ngò, nang lé a ra!" nghû a ge taí. Haú ulhum gi, hkyí lé, "Ngò, nang lé a ra!" nghû a ge taí.

22 Haú za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lhê.

23 Hau htoq agó, hpau a lûm tap râ su myit ngam é gungsho showui showang pé lé, nga-nhúng je hpautap râ lhê. Haú a shit é jung gungsho pé lé, nga-nhúng hpautap é đông

rago nghop râ lâhê.

²⁴ Nga-nhông é wó shit é gungsho pé kúm gi, haú hkyô a ra nghut ri. Nghut kôlhang, Garai Gasang gi, gungdû é gungsho showui showang pé lé pong to mù, aróng nyhum é lé, je riyhang aróng byi bê nghut ri.

²⁵ Haú mù, gungdu má gamhkuí lhùm é hkyô a bo é za, gungsho showui showang pé ralhum eq ralhum, rajung za kut wó myit tê byí lhum kó râ nghut lâhê.

²⁶ Haú gungsho showui showang ralhum jamjau huí é nghut jáng, lhum hkgangmó bo jamjau râ nghut lâhê. Ralhum hpautap huí é nghut jáng, lhum hkgangmó bo gabú é nghut lâhê.

²⁷ Ahkuí, nungmoq gi, Hkrisduq é gungdu nghut kôluí, nungmoq yuq hkgangmó gi, haú é gungsho showui showang pé nghut akô.

²⁸ Garai Gasang gi, noqkuq hpúng má, sâng-hi lé, lagyô pé, í lhum nghû râ má, myiqhtoí pé, sùm lhum nghû râ má, mhoqshit bang, hau htâng má, laklaí kumlhá pé kut râ bang, nò wó lhoq gê râ chyunghuq wó é bang lé le, góbang lé wó garúm é bang, shuî-u râ chyunghuq wó é bang, laklaí dang ahú hú ge taí é bang lé, masat to bê nghut ri.

²⁹ Banshoq bang gi, lagyô pé nghut lâhê lhú? Banshoq bang gi, myiqhtoí pé nghut lâhê lhú? Banshoq bang gi,

mhoqshit bang nghut lâhê lhú? Banshoq bang gi, laklaí kumlhá kut akô lhú?

³⁰ Banshoq bang gi, nò lhoq ge é chyunghuq wó é nghut lâhê lhú? Banshoq bang gi, laklaí dang ahú hú ge taí lâhê lhú? Banshoq bang gi, dang haú pê é lichyúm ge taí sân kyô lâhê lhú?

³¹ Nghut kôlhang, nungmoq gi, je gyaú é chyunghuq lé gyai yhang ô nau nyi keq.

Chyitdap Myit

Hau htoq agó, ahkuí, ngò, nungmoq lé, je gyaú dik é hkyô ralhum shit kôlé.

13

¹ Ngò gi, byu pê é eq mau-mang lagyô pê é myíng pé lé sê taí é nghut kôlhang, chyitdap myit a bo é nghut jáng, mying hung htê bo é ut eq mying tui htê bo é chapchéng su za dut byuq râ nghut lâhê.

² Ngò gi, myiqhtoí htoí é chyunghuq, zaú tô é hkyô pé banshoq lé sê gyô é nyan, sumpsé hpaqchyí banshoq lé wó é eq, bùm pé lé wó htot nhang é lumjíng myit bo é nghut kôlhang, chyitdap myit a bo é nghut jáng, ngò haí a nghut sù dut berâ nghut lâhê.

³ Ngò gi, wó é sutzè banshoq myùng bang lé byí pyâm é eq, ngá é gungdu lé nyhê pyám râ matú ap pyâm é nghut kôlhang, chyitdap myit a bo é nghut le gi, hai akyû a bò nghut ri.

⁴ Chyitdap myit gi, myit hing lâhê, nú-nhâm lâhê. Chyitdap myit gi, a manôn, gyáng

dang a taí, a nghutbûn é nghut lâ.

⁵ Chyitdap myit gi, hpau a dap é hkyô a kut, yhumsing é akyû baú za a hô, lui za nhikjum a yo, shut é mara a matsing é nghut lâ.

⁶ Chyitdap myit gi, agè ashop é má a gabú é za, haú tengmán hkyô má gabú nyi ri.

⁷ Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

⁸ Chyitdap myit gi, hkâ-nhám le htûm byuq é a nghut. Myiqhtoi htoí é hkyô pé gi, byuq byuq râ nghut lâ; laklaí dang ahú hú ge taí é hkyô gi, zim byuq râ nghut lâ; sumsé hpaqchyí hkyô gi, lai lô byuq râ nghut lâ.

⁹ Hkâsu mù gâ le, nga-nhúng sê é gi, ra-am rahtâng ru nghut lâ. Nga-nhúng myiqhtoi htoí é gi, ra-am rahtâng ru nghut lâ.

¹⁰ Nghut kôlhang, gumjup hkyô jé lé é hkûn, a gumjup hkyô gi, byuq byuq râ nghut lâ.

¹¹ Ngò, zoshâng nghut ashí hkûn gi, zoshâng dông dang taí, zoshâng dông myit, zoshâng dông myit sôn wú é nghut lâ. Ngò, suwún nghut jáng gi, zoshâng nyi yap hkyô pé lé tô pyám bê nghut lâ.

¹² Ahkuí, nga-nhúng gi, myoqjâm hkaú mâ é rago a sân é wupzo lé za myàng é nghut lâ; nghut kôlhang, htâng má, myoqdong hkyûm wó myâng râ nghut lâ.

Ahkuí, ngò gi, ra-am rahtâng za sê é ru nghut lâ; nghut kôlhang, Garai Gasang gi, ngo lé gumjup shoq sê é su, ngò le, htâng má, gumjup shoq sé râ nghut lâ.

¹³ Ahkuí, lumjing myit, myit myoqbyu hkyô, chyitdap myit shi sùm lhum myit tô ri. Nghut kôlhang, haú pé mâ é kô dik é gi, chyitdap myit nghut ri.

14

Myiqhtoi Htoi É Chyunghuq Pé Eq Laklaí Dang Nyo É Chyunghuq Pé

¹ Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyi keq. Myiqhtoi htoí é chyunghuq lé je riyhang myit o nyi keq.

² Hkâsu mù gâ le, laklaí dang ahú hú nyo é sù ó yuq le, byu lé nyo é a nghut é za Garai Gasang lé nyo é ru nghut lâ. Yhang lé ó yuq eq le a sê gyo byi, zaú tô é hkyô pé lé haú Woi-nyí eq nyo htoq é nghut ri.

³ Nghut kôlhang, myiqhtoi htoí é sù yuq hkangmó gi, byu pé lé wum byi dang eq nhik tít dang taí ri.

⁴ Laklaí dang rahú nyo é sù gi, yhumsing gùng lé htuqbang byi ri, nghut kôlhang, myiqhtoi htoí é sù gi, noqkuq hpúng lé htuqbang byi ri.

⁵ Ngò gi, nungmoq yuq hkangmó laklaí dang ahú hú pé nyò râ lé ô nau ri, nghut kôlhang, nungmoq myiqhtoi

htoi râ lé je ô nau é nghut lhê. Hkâsu mù gâ le, laklai dang ahú hú nyo é sù gi, haû noqkuq hpúng lé wó htuqbang râ matú, lichyúm lé taí sâs kyô é za a nghut jáng, myiqhtoi htoi sù gi, yhang htoq je gyaú é nghut lhê.

⁶ Ahkuí, gumang wui ê, ngò gi, nungmoq chyáng lé jé mù, laklai dang pé nyo é nghut kôle, shing-rán nghut nghut, sumsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a taí kyô é nghut le gi, nungmoq é matú ngò hai akyú htoq râ lúh?

⁷ Htê lhoq htoq é asak a bo jung zè pé má lhang gi, sampyi nghut nghut, ting nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé râ lúh?

⁸ Dum, tut htê le gam hkoq é dông a mut kyô é nghut jáng, majan htoq râ rì rì ó yuq wá hên râ lúh?

⁹ Nungmoq chyáng le haú dông nghut lhê. Nang, laklai dang ahú hú nyo le, sê gyô é danghkun mai nyo é za a nghut jáng, nang haí taí nyi é lé ó yuq wá hkâsu wó sé râ lúh? Nungmoq gi, maulat má za taí hâng pyâm nyi kó râ nghut lhê.

¹⁰ Míngkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê.

¹¹ Haû mù luí, rayuq yuq haí taí nyi é lichyúm lé ngò a

dat chyup é nghut jáng, ngò gi, haû dang taí su é matú maigan byù dut mù, yhang gi, ngá é matú maigan byù dut é nghut lhê.

¹² Nungmoq chyáng le haú dông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi bekô nghut mù, haû noqkuq hpúng lé kô myhâng nhang é chyunghuq pé lé je ho shikut nyi keq.

¹³ Haû nghut é yanmai, laklai dang ahú hú taí é sù ó yuq le, yhang haû taí é lichyúm wó taí sâs kyo sháng gaq, kyúdung râ dut lhê.

¹⁴ Hkâsu mù gâ le, laklai dang ahú hú dông ngò kyúdung é nghut jáng, ngá é woi-nyí mai dúng é nghut lhê; nghut kôhang, ngá é myitnyân é matú, hai akyú a wó nghut ri.

¹⁵ Haû mù, ngò hkâsu kut râ lúh? Ngò gi, ngá é woi-nyí mai le kyúdung râ, ngá é myitnyan mai le kyúdung râ nghut lhê; ngò gi, ngá é woi-nyí mai le mahkôn hkôn râ, ngá é myitnyan mai le mahkôn râ nghut lhê.

¹⁶ Nungmoq gi, nungmoq é woi-nyí mai za Garai Gasang lé hkya-on kô é nghut jáng, a sê gyô é bang mâ é rayuq gi, nungmoq haí taí é lé a sê é nghut mù, nungmoq jeju hkya-ôn é hkûn, "Amen" ga hkâsu wó taí râ lúh?

¹⁷ Nungmoq gi, ge dik shoq jeju hkya-on kô é abe, nghut kôhang, góbang gi, htuqbang é a hui kó nghut ri.

18 Ngò gi, nungmoq ban-shoq bâng htoq má laklaí dang ahú hú je wó taí é yanmai, Garai Gasang lé jeju bûn ri.

19 Nghut kôlhang, noqkuq hpúng má, laklaí dang rahú đông danghkun ramun ngò taí rả htoq má, góbang lé mhoqshit rả akyû bo é dang ngo hkun taí rả lé ngò je ô nau ri.

20 Gumang wuì ê, zoshâng wuì su myit nyi é lé nô pyám keq. Agè ashop hkyô eq sêng é má gi, nyheqnú đông kut mù, nungmoq myit é hkyô má gi, ko bang đông kut keq.

21 Haû jep é tarâ má kê tô é gi,

"A wó gyô wú é dang đông mai le, góming byu pè é nhutwuì đông mai le, byù shí bang lé ngò taí rả nghut lê;

nghut kôlhang, yhangmoq gi, ngá dang gyo kó rả a nghut.'

ga Yhumsîng taí ri."☆
gâ ri.

22 Haû mù, laklaí dang ahú hú nyo é hkyô gi, lumjîng bâng matú kumlhá a nghut é za, a lumjîng bâng matú sheq ru nghut lê. Myiqhtoi dang kúm gi, a lumjîng bâng matú a nghut é za, lumjîng bâng matú sheq ru nghut lê.

23 Haû nghut mù, noqkuq hpúng gón chôm zing mù, yuq hkangmó laklaí dang ahú hú nyò kô é nghut jáng, a sê gyô é bang nghut nghut, a lumjîng é bang nghut nghut, wang lé kô

é hkûn, yhangmoq gi, nungmoq nâ bùm bekô ga a taí kó rả nghut lê lú?

24 Nghut kôlhang, yuq hkangmó, myiqhtoi dang taí nyi é u má, a lumjîng sủ nghut nghut, a sê gyô é sủ nghut nghut, wang lé é nghut jáng, yhang gi, yubak dap sủ rayuq nghut é lé, banshoq èq lhoq pûn kyîng é hui rả eq, banshoq èq jéyáng é hui rả nghut é htoq agó,

25 yhâng é i-myt má zaú tô é hkyô pé lé de de lhoq htoq shit é hui rả nghut lê. Haû mù, yhang gi, ngóm gop luí, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga taí pyo htoq kat rả nghut lê.

Shuq Shuq Tap Tap Za Noqkuq Rả Hkyô

26 Haû jáng, gumang wuì ê, nga-nhúng haí taí rả lú? Nungmoq rahá lé chôm zîng é hkûn, yuq hkangmó gi, Garai hkya-on mahkôn nghut nghut, mhoqshit é dang nghut nghut, shing-rán nghut nghut, laklaí dang ahú hú nyo é hkyô nghut nghut, taí sân kyô é nghut nghut pé lé, wó le ge ri. Haû pé banshoq gi, noqkuq hpúng lé wum-o byi rả matú chyat kut é dut rả lê.

27 Rayuq yuq, laklaí dang ahú hú nyo é nghut jáng, í yuq eq myô htum sum yuq mai a lai é za, rayuq htâng rayuq nyò rả dut é htoq agó, rayuq

yuq haû lé taî sân kyo ra râ dut lê.

²⁸ Taî san kyô é sù a nyi é nghut jáng, laklaí dang ahú hú nyo é sù gi, noqkuq hpúng má zim za nyi râ dut mù, yhânggùng yhang eq Garai Gasang lé za nyo râ dut lê.

²⁹ Myiqhtoi í yuq nghut nghut, sum yuq nghut nghut taî kyo râ dut lê; góbang gi, haî taî é lé rago gyô chyam wú râ dut lê.

³⁰ Nghut kôlhang, zung tô é sù rayuq yuq chyáng shing-rán jé é nghut jáng, hí taî nyi é sù gi, nô byuq râ dut lê.

³¹ Hkâsu mù gâ le, yuq hkanmó gi, mhoqshit é eq myit wum byi é wó hui kó sháng gaq, nungmoq banshoq bang gi, rayuq htâng rayuq myiqhtoi wó htoi é nghut lê.

³² Haû myiqhtoi pê é woi-nyí pé gi, myiqhtoi pé uphkan é a-ô má nghut nyi ri.

³³ Hkâsu mù gâ le, Garai Gasang gi, atau ahú dut é Garai Gasang a nghut é za, nguingón hkyo é Garai Gasang ru nghut lê.

Sân-yúng bâng zing tô é hpúng banshoq mâ é eq rajung za,

³⁴ myiwe wui gi, noqkuq hpúng pé má zim za nyi râ dut lê. Yhangmoq gi, dang taí ahkáng a wó é nghut mù, haû jep é tarâ má bo é eq rajung za a-ô má nyi kó sháng gaq.

³⁵ Yhangmoq gi, rajung jung sé naú kô é nghut jáng, yhúm má yhangmoq é yhumsing hpô pê chyáng myi

kó sháng gaq; hkâsu mù gâ le, myiwe rayuq noqkuq hpúng má dang taî é gi, ahoq ahí hkyô nghut ri.

³⁶ Haû Garai Gasang é mungdang gi, nungmoq chyáng mai htoq lo é nghut lê lú? Haû gi, nungmoq chyáng za lé jé bê nghut lê lú?

³⁷ Rayuq yuq, yhang gi, myiqhtoi, a nghut jáng, woi-nyí chyunghuq byi é hui sù nghut lê ga myit é nghut jáng, ngò, nungmoq lé ká byi é pé gi, haû Yhumsing é hkanmó nghut é lé, yhang sê yù sháng gaq.

³⁸ Yhang gi, haû lé haî su a ngàm kut é nghut jáng, yhânggùng le, haî su a ngàm kut é hui zo râ nghut lê.

³⁹ Haû mù luí, ngá é gumang wui ê, myiqhtoi htoi râ lé ô nau nyi mù, laklaí dang ahú hú nyo é lé hkâhkûm pyám kó.

⁴⁰ Nghut kôlhang, jung hkanmó gi, htuk é đông eq shuq shuq tap tap zâ é hkyô đông kut é dut râ lê.

15

Hkrisduq É Dui Toq Hkyô

¹ Gumang wui ê, ngò, nungmoq lé hko kyo bê nghut mù, nungmoq le hap yù luí, nungmoq yap gîng tô é jowò nghut é gabú danglù hkyô lé, ahkuí, ngò, nungmoq lé lhoq pùn kat nau ri.

² Ngò, nungmoq lé hko kyo bê é mungdang lé, nungmoq ging ging myhik zing nyi kô é nghut jáng, nungmoq gi, gabú

danglù hau é yanmai hkyi yù huí é nghut akô. Haù a nghut jáng, nungmoq lumjínng é gi, akôm dut bê nghut lhê.

³ Ngò hap yu tô é pé lé, sâng-hi ahkyak é dông, ngò, nungmoq lé hai byi bê nghut lhê. Haù pé gi: Chyúmdang eq rajung za, Hkrisduq gi, nganhung é yubak marâ é matú shí hkám byi bê gâ é nghut ri;

⁴ Yhang gi, myhup yhùm é hui luí, Chyúmdang eq rajung za sum nyí nghu é nyí má lhoq dui toq é hui bê nghut mù,

⁵ Petruq lé htoq shit luí, haù lagyo raxe í yuq lé le htoq shit ri.

⁶ Hau htâng má, Yhang gi, ra-u má za, gumang wui ngo shô yuq chyân lé htoq shit ri. Haù bang má é myo hpyang gi, ahkuí jé shoq asak dui nyi bum akô; ra-am kúm gi, shi ló byuq bekô nghut ri.

⁷ Hau htâng, Yhang gi, Yakuq lé htoq shit mù lagyô pé banshoq bang lé htoq shit ri.

⁸ Ló htâng má, Yhang gi, hkú buinyi a jé shí é má hku é dông nghut sù ngo lé le htoq shit bê nghut ri.

⁹ Hkâsu mù gâ le, ngò gi, lagyô pé má é tiq dik sù nghut lhê. Haù Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghû râ lhang a gingdán é sù nghut lhê.

¹⁰ Nghut kôlhang, ngò ahkuí ísu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi,

yhangmoq banshoq bâng htoq má je riyhang mù wùn waq shikut lhê. Haù gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê.

¹¹ Haù mù luí, ngò nghut nghut, yhangmoq nghut nghut, ngamoq hko kyô é gi, haù hkyô chyat nghut lui, nungmoq lumjínng é le, haù hkyô nghut ri.

Shi Byuq Bâng É Dui Toq Hkyô

¹² Nghut kôlhang, haù Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq mâ é ra-am gi, shi byuq bâng é dui toq hkyô a joq nghû, hkâsu wó taí kó râ lhu?

¹³ Shi byuq bâng é dui toq hkyô a joq é ru nghut le gi, Hkrisduq le lhoq dui toq é hui berâ a nghut.

¹⁴ Hau htoq agó, Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumjínng hkyô gi, akôm dut byuq râ nghut lhê.

¹⁵ Hau htoq agó, Garai Gasang gi, haù Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq râ za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat râ a nghut.

¹⁶ Hkâsu mù gâ le, haù shi byuq bang lhoq dui toq é a

huí é nghut jáng, Hkrisduq le, lhoq dui toq é hui berâ a nghut.

17 Hkrisduq gi, lhoq dui toq é a huí é nghut jáng, nungmoq é lumjینگ hkyô gi, akôm dut lui, nungmoq gi, nungmoq é yubak mara hkaú má ru nyi nyi shi kó râ nghut lê.

18 Haú nghut jáng, Hkrisduq má shi ló byuq bê bang le, htên byoq byuq râ za nghut lê.

19 Nga-nhúng gi, shí ipyat lê é matú za, Hkrisduq má myit myoqbyù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó râ nghut lê.

20 Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi ló byuq bâng é sâng-hi ashi dut bê nghut ri.

21 Hkâsu mù gâ le, shí-nò hkyô gi, byù rayuq đông mai lò bê nghut é eq rajung za, shi byuq bâng é dui toq hkyô le, byù rayuq đông mai lo é nghut lê.

22 Hkâsu mù gâ le, lunglhang bang gi, Adam é yanmai shi byuq é su, lunglhang bang gi, Hkrisduq eq rading ralhum za nghut é yanmai lhoq dui toq é hui râ nghut lê.

23 Nghut kôlhang, yuq hkangmó gi, ó le ó âng é hkùn lhoq dui toq é hui râ nghut lê: Hkrisduq gi, sâng-hi lhoq dui toq huí é sù nghut lê. Hau htâng má, Yhang jé lé é

hkùn, Yhang eq sêng é bang lhoq dui toq é hui râ nghut lê.

24 Hau htâng, jhtâm jé râ nghut lê; haú hkùn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haú Íwa nghut sù Garai Gasang lé mingdán ap byi râ nghut lê.

25 Hkâsu mù gâ le, Yhang gi, Yhâng é gye pé banshoq lé, Yhâng é hkyí wang ô má tô pyâm é hkùn jé shoq up nyi ra râ nghut lê.

26 Haú lhoq htên pyâm é hui râ nghut é ló htâng é gye gi, shí-nò hkyô nghut ri.

27 Hkâsu mù gâ le, "Garai Gasang gi, jung hkangmó lé, Yhâng é hkyí wang ô má tô pyám bê nghut ri."* gâ Chyúmdang má kê tô ri. "Jung hkangmó lé" Yhâng é a-ô má tô pyám bê ga tai é hkùn, jung hkangmó lé Hkrisduq é a-ô má tô pyám bê sù Garai Gasang yhang kúm a lom é hkyô, san za nghut nyi ri.

28 Yhang gi, haú hkyô ban kut é htâng má, haú Zo yhang le, jung hkangmó lé Yhâng é a-ô má to byi bê sù Garai Gasâng é a-ô má nyi sù dut nhang é hui râ nghut mù, Garai Gasang gi, lunglhang htoq má gyaú sù nghut lui, lunglhang lé sîng sù nghut râ nghut lê.

29 Dui toq hkyô a joq é ru nghut le gi, shi byuq bê bâng é matú wui-myhup hkám byi bùm kê é gi, hai akyú bò kó râ

lhub? Hahu shi byuq bang lhoq dui toq e a hui ko e ru nghut le gi, yhangmoq matu hai mu byu pe wui-myhup hkam yu ko ra lhu?

³⁰ Ngamoq gi, ngamoq e matu, hkying hkanmo hai mu chiq ra jowo ma nyi ra lhu?

³¹ Gumang wui e, ngo gi, nyi wui aluq shoi shoi shi e hui zo e nghut lhu. Hahu su nghu e gi, nga-nhung e Yhumsing Hkrisduq Yesuq ma, nungmoq e hkyo le ngo hkyak wo gumrong e yanmai nghut lhu.

³² Ngo gi, xangzo hkyam dong mai za, Ehpesu myuq ma tan jung dusak pe le ma-ja-nan nyi e nghut jang, nga e matu hai akyu bo ra lhu? Shi byuq bang lhoq dui toq e a hui e ru nghut le gi,

"Nga-nhung gi, napma shi ra nghut e yanmai,

zo shang, shuq shang."^{*}

nguhu ra za nghut lhu.*

³³ "A ge e zum yap luzum wui gi, ge e nyi yap samlai le hten nhang e nghut lhu." ga e sanghkyang eq rajung za, hkyo shui ngoq e hkahui zo ko!

³⁴ Nungmoq gi, tau bun gying lo mu, mara hkakut shut lo ko; hkasu mu ga le, Garai Gasang le a se e byu ra-am nyi ako. Ngo hahu su nghu tai e gi, nungmoq hoq bun ra matu nghut lhu.

³⁵ Nghut kolang, rayuq yuq gi, "Hahu shi byuq be bang, hkasu kut lhoq dui toq e hui ko ra lhu? Yhangmoq gi, hkasu e gungdu nghut ko ra lhu?" ga myi ra nghut lhu.

³⁶ Hahu-i nghu su e! Nang ho hkyo kat e pe gi, shi byuq e za a nghut jang, yuq htoq lo ra a nghut mhai.

³⁷ Nang, kyô hkyo e hkun, yuq lo ra nghut e agam le ho hkat e a nghut e za, sungso amyui nghut nghut, gotu amyui rajung jung nghut nghut le za ho kat e ru nghut lhu.

³⁸ Nghut kolang, Garai Gasang gi, Yhang myit hpyit to be eq rajung za hau le gungdu ralhum byi mu, kyoshi myui hkanmo le, o le o e gungdu byi ri.

³⁹ Gungsho lunglhang gi, rajung za a nghut. Byu pe e gungsho gi, rajung, dusak pe e gi, go jung, ngoq pe e gi, go jung, ngozo pe e gi, go jung ru nghut lhu.

⁴⁰ Mauhkung gung pe le joq e nghut lui, myidam gung pe le joq ri; nghut kolang, mauhkung gung pe e shinkang gi, rajung, myidam gung pe e shinkang gi, go jung ru nghut lhu.

⁴¹ Hahu bui ma bo e shinkang gi, rajung, lhamo ma e gi, go jung, kyi pe ma e gi, go jung ru nghut lhu; kyi racham eq racham e shinkang le gotu tu shai lhum lhu.

⁴² Hahu mu, shi byuq be

Dui Toq E Gungdu

^{*} 15:32 Esai 22:13

^{*} 15:32 Dang ngho shi gi, a lumjing bang tai e dang nghut

bâng é dui toq hkyô le, haù eq rajung za nghut ri. Haù hô hkyô kat é gungdu gi, htên byoq sê é nghut luî, lhoq dui toq huî é gungdu kúm gi, htên byoq a sê é nghut lhê.

⁴³ Hô hkyô kat é hkûn gi, aróng a bò, lhoq dui toq huî é hkûn gi, hpungwup shingkang bo ri. Hô hkyô kat é hkûn gi, wum nyhóm mù, lhoq dui toq huî é hkûn gi, a-tsam bo ri.

⁴⁴ Gungsho gungdu gi, hô hkyô é hui mù, woi-nyí gungdu gi, lhoq dui toq é huî ri.

Gungsho gungdu joq é nghut le gi, woi-nyí gungdu le joq é nghut lhê.

⁴⁵ Haù nghut mù, "Haù sâng-hi yuq byù Adam gi, asak dui é xângzo dut bê nghut ri."* ga kê tô ri. Haù ló htâng é Adam kúm gi, asak byí é woi-nyí nghut ri.†

⁴⁶ Haù woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê.

⁴⁷ Haù sâng-hi yuq byù gi, myidàm mâ é tseyûn lé sai é nghut mù, htang lhê yuq byù gi, mauhkûng htoq mâ é nghut ri.

⁴⁸ Haù myidàm byù nghut sù su, myidàm eq sêng é bang le nghut nyi akô; haù mauhkûng htoq mâ é byù nghut sù su, mauhkûng eq sêng é bang le nghut nyi akô.

⁴⁹ Nga-nhúng gi, myidàm

byù é gungghkyâng isâm lé hkam yù bê nghut é su, mauhkûng htoq mâ é byu é gungghkyâng isâm lé le myang hkam yù râ nghut lhê.

⁵⁰ Gumang wui ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yù râ a nghut, htên byoq sê é le, htên byoq a sê é silí wunlí lé wó yù râ a nghut.

⁵¹ Gyo to keq, zaú tô é hkyô lé, ngò, nungmoq lé tai kyo kôlé: Nga-nhúng ban-shoq bang gi, shi byuq râ a nghut é za, htaí lhik é hui râ ru nghut lhê.

⁵² Haù gi, ló htâng é tut htê mying é hkûn, ralhap za, my-oqkuq ralap má dut râ nghut lhê. Hkâsu mù gà le, tut htê mying râ nghut lhê, haù hkûn, shi byuq bê bang gi, htên byoq a sê é shut lhoq dui toq yu é hui râ nghut mù, nga-nhúng gi, htaí lhik é hui râ nghut lhê.

⁵³ Hkâsu mù gà le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù râ dut é nghut lhê.

⁵⁴ Haù htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkûn sheq, "Shî-nò hkyô gi, ûng budâng èq myui pyâm é hui bê nghut ri."* ga kê tô é eq,

⁵⁵ "Shî-nò hkyô ê, náng é ûng budang gi, hkâmá lúh?

* 15:45 Apûn 2:7 † 15:45 Ló htâng é Adam gi, Yesuq lé tai nau é nghut lhê.

* 15:54 Esai 25:8 * 15:55 Hos 13:14

Shî-nò hkyô ê, náng é nyin gi, hkâmá lúhú?"[☆]
gâ tô é sanghkyang gi, dik râ nghut lhê.

⁵⁶ Haû shî-nò hkyo é nyin gi, yubak mara nghut ri; yubak marâ é a-tsam gi, jep é tarâ nghut ri.

⁵⁷ Nghut kôlhang, Garai Gasang lé jeju hkyâ-ôn lhê! Yhang gi, nga-nhông é Yhumsîng Yesuq Hkrisduq dông mai, nga-nhông lé ûng budang byî é nghut ri.

⁵⁸ Haû mù luî, ngá é chyitdap gumang wuî ê, yap gingting nyî keq. Hai êq le, nungmoq lé hkâlhoq dui nún nhâng kó. Nungmoq gi, haû Yhumsîng má nungmoq wùn waq é muzó akôm a nghut é lé sé kô é nghut lhê yanmai, haû Yhumsing é muzó lé ayang wùn waq shikut nyî keq.

16

Yerusalem Wà Mó Mã É Lumjing Bâng É Matú Alu Hkyuî Râ Hkyô

¹ Ahkuî, Garai Gasâng é byu pê é matú alu hkyuî râ hkyô eq séng luî gi, haû Galatiq mau mã é noqkuq hpông pé lé ngò kut nhang é su kut keq.

² Ngò jé lé é hkûn, alu hkyuî râ hkyô a kut ra râ dông, bat hkangmó mã é sâng-hi nyî má, yuq hkangmó gi, yhumsîng wó ho é mã cháng mù, gam tô to láng keq.

³ Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq

lé, Yerusalem wà mó mã é dé nhâng râ nghut lhê.

⁴ Ngò le ê ang râ dut é nghut jáng, yhangmoq gi, ngá é byinzùm kut râ nghut lhê.

Poluq Lum Kat É Hkyô Pé

⁵ Ngò gi, Makedoni mau lai byit é htâng, nungmoq chyáng jé lé râ nghut lhê. Hkâsu mù gâ le, ngò gi, Makedoni mau lai byit râ za nghut lhê.

⁶ Ngò hkâmá ê kôlhang, ngá é hkyowuî má nungmoq wó garúm kat kó râ matú, ngò gi, rayoq zo nghut nghut, gy-oqmyò lhang lai shoq nghut nghut, nungmoq eq rahá nyî abe.

⁷ Ngò gi, lai ló uchyang za nungmoq lé lé kum râ nghut mù, ahkuî wó myâng râ lé a nau é nghut lhê; ngò gi, haû Yhumsîng dông é nghut jáng, nungmoq eq rahá rayoq nyî râ lé myit myoqbyu lhê.

⁸ Nghut kôlhang, ngò gi, Penteko-ti poi buinyî jé shoq Ehpesu myuq mã nyî râ nghut lhê.

⁹ Hai mù gâ le, ngo lé htug htîng é bang myo myo nyî é nghut kôlhang, akyû htoq é muzó é matú hkum mó ngo lé hpông to byî é yanmai nghut lhê.

¹⁰ Timohti jé lé jáng, yhang, nungmoq eq rahá nyî é u má, gyuq é hkyô hai le a joq râ matú wú byi keq; hkâsu mù gâ le, yhang gi, haû Yhumsing é muzó lé, ngò su wùn waq wún é sù nghut lhê.

¹¹ Haû mù, ó yuq le, yhang lé hkâwú shóm kó. Yhang gi, ngá chyáng wó dum taû jé

sháng gaq, yhâng é hkyowuì má nguìngón é dông nhang kat keq. Haû gumang wuì eq rahá lò kó râ lé, ngò myit láng nyi lhê.

¹² Ahkuì, nga-nhûng é gumang Apolo é hkyô eq séng luí ga jang: yhang gi, haû gumang wuì eq rahá nungmoq chyáng lé râ lé, ngò, gyai yhang wum taí tsuq lhê. Yhang kúm gi, ahkuì lé nau é myit a dê bò shi, nghut kôlhang, yuqyo é ahkyíng wó jáng, yhang lé lô râ nghut lhê.

¹³ Machya nyi keq; lumjíng hkyô má ging ging tíng tíng yap nyi keq; gyuq kyum myit hkâbô kó; wum bo nyi keq.

¹⁴ Jung hkangmó lé, chytidap myit eq zui saí keq.

¹⁵ Stehpana eq yhâng é yhumbyù wuì gi, Ahkaia ming má sâng-hi hpúng wâng bang nghut luí, yhangmoq gi, yhumsíng gùng lé, haû sânyúng bâng é dojaú hkyô má ap nóng bekô lé, nungmoq sê akô nghut ri. Gumang wuì ê, ngò, nungmoq lé wum taí tsuq kat kôlé,

¹⁶ haû sù é bâng é a-ô má le, haû muzó má bo wang lòm mù, mù zui shikut bang yuq hkangmó é a-ô má le, nyi keq.

¹⁷ Ngò gi, Stehpana, Hportunatu eq Ahkaiku pé jé lo é hkûn, gyai gabú é nghut lhê, haí mù gâ le, yhangmoq gi, nungmoq a kut byí é hkyô lé, lhoq pyíng byi bekô nghut ri.

¹⁸ Hkâsu mù gâ le, yhangmoq gi, ngá é woi-nyí eq nungmoq é woi-nyí lé lhoq

ngón byi bekô nghut ri. Haû sù é bang lé, hpautap nyi keq.

Ló Htâng É Shi-kyám Dang

¹⁹ Asia mau má é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhûm má chôm huì é noqkuq hpúng lé, haû Yhumsíng má nungmoq lé gyai yhang shi-kyâm kat akô.

²⁰ Shí má nyi é gumang wuì banshoq bang gi, nungmoq lé shi-kyâm kat akô. Rayuq eq rayuq chyoiyúng é chytipuq eq shi-kyâm lhum keq.

²¹ Ngò, Poluq gi, shi-kyám dang shí lé, ngá é loq eq yhang ká é nghut lhê.

²² Rayuq yuq, haû Yhumsíng lé a chytidap é nghut jáng, haú yuq gi, nhíng pyâm é huì sháng gaq. Yhumsíng ê, jé lé aq hkoi!

²³ Haû Yhumsíng Yesuq é jeju gi, nungmoq eq rahá nghut nyi sháng gaq.

²⁴ Ngá é chytidap myit gi, Hkrisduq Yesuq má nungmoq banshoq bâng chyáng joq nyi sháng gaq. Amen.

KORINHTUQ Pê Chyáng Htang Dàm Hun Kat é Laiká (2 Corinthians)

1 Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhông é gumang Tim-ohti le kut, Korinhtuq myuq mâ é, Garai Gasang é noqkuq hpúng lé le, Ahkaia mau gón mâ é sân-yúng bang banshoq chyáng le, dang kyô kat lhê:

2 Nga-nhông é Îwa nghut é Garai Gasang eq haû Yhumsîng Yesuq Hkrisduq chyáng mà é jeju eq nguingón hkyô gi, nungmoq chyáng ru joq nyí sháng gaq.

Nhik tíng hkyô banshoq é Garai Gasang

3 Nga-nhông é Yhumsîng Yesuq Hkrisduq é Yhângwa eq Garai Gasang, shogyo nhikmyin hkyô é Îwa eq nhik tíng hkyô banshoq é Garai Gasang gi, hkya-on kungton é huí nyí sháng gaq.

4 Garai Gasang chyáng mai ngamoq wó yú bê nghut é nhik tíng hkyô eq, hkasû é wuîhke hkyô hui bang lé le nga-nhông wó nhik tíng byí sháng gaq ga, Yhang gi, ngamoq é wuîhke hkyô banshoq má nhik tíng byí ri.

5 Hkâsu mù gâ le, Hkrisduq hui zô é jamjau hkyô myo myo lé ngamoq bo huí zô é su, Hkrisduq dông mai, ngamoq

é nhik tíng hkyô le byíng mui nyi é nghut lhê.

6 Ngamoq, myit myo uhkyí é huí é nghut jáng, nungmoq é nhik tíng hkyô eq hkyi yù hkyo é matú nghut nyi ri; ngamoq, nhik tíng é huí é nghut jáng, nungmoq é nhik tíng hkyô é matú nghut luí, haû gi, ngamoq jamjaû é eq rajung za nghut é jamjau hkyô lé, myit hing é dông mai wó jân pyám râ a-tsam, nungmoq chyáng lhoq htoq byí é nghut lhê.

7 Haû mù, ngamoq é jamjau hkyô pé má nungmoq bo lòm bekô nghut é su, ngamoq é nhik tíng hkyô má le nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

8 Gumang wuî ê, Asia mau má, wuîhke jamjaû é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lhang htum shoq hpuzô é nghut luí, ngamoq gi, asak duì lo râ lhang a myit myoqbyù lô é nghut lhê.

9 Gè gè yhang, ngamoq gi, sat hui berâ nghû, ngamoq é i-myt má lumjîng pyâm é nghut lhê. Nghut kôlhang, haû gi, ngamoq gùng ngamoq a lumhkau é za, shí bê bang lé lhoq duì toq sù Garai Gasang lé lumhkaû râ matú dut é nghut lhê.

10 Garai Gasang gi, haû sù é shí râ hkyô mai hkyi yù bê nghut mù, ngamoq lé hkyi

yù rã za nghut lhê. Yhang gi, ngamoq é matú nungmoq kyûdung byî nyi é u má, xoq luí ngamoq lé hkyi yù rã za nghut lhê nghû, ngamoq gi, Yhang lé myit myoqbyu to bê nghut luí,

¹¹ myo myo kyûdung byî é lé gyo byî é má ngamoq shimân jeju wó mù, byù myo myo gi, ngamoq wó é shimân jeju é yanmai Garai Gasang lé jeju hkya-on kó rã nghut lhê.

*Poluq, Hen Tô É Muzó Htaí
Pyâm É Lé Tai Hung É Hkyô*

¹² Ngamoq nghutbûn é gi, Garai Gasang chyáng mâ é chyoiyúng hkyô eq lhumzui hkyô má, mingkan zo wuí eq ngamoq asak duì bê hkyô lé le, je luí nungmoq eq zùm yap é hkyô lé le, ngamoq é myit sôn sê é hkyo eq, saksé hkám byî é hkyô nghut lhê. Ngamoq haû su kut é gi, mingkan hpaqchyî byéng-yá dông mai kut é a nghut é za, Garai Gasang é jeju dông mai kut é ru nghut lhê.

¹³ Hkâsu mù gâ le, ngamoq gi, nungmoq a dat nghap é eq a sê gyô é haí le a ká byî kat é nghut lhê. Ngò, myit myoqbyu kat é gi,

¹⁴ nungmoq gi, ngamoq é hkyô ra-am lé wó sê gyô yù bê eq rajung za, haû Yhumsing Yesuq é buinyi má nungmoq é hkyô lé ngamoq nghutbun rã nghut é su, ngamoq é hkyô lé nungmoq wó nghutbun rã matú, nungmoq, banshoq lé sê gyo kó rã nghut lhê.

¹⁵ Haû hkyô lé, ngò hkyak myit lum to bê nghut é yanmai, nungmoq gi, akyû í dam wó hkam yù kó sháng gaq nghû, ngò gi, nungmoq chyáng hí lé kum rã matú hen to bê nghut lhê.

¹⁶ Ngò gi, Makedoni mau shut e ló é hkyowuì má nungmoq lé hí lé kum mù, Makedoni mau mai nungmoq chyáng dum taû lò luí, Yuda mau shut e é hkyowuì má, nungmoq, ngo lé garúm kat kó rã lé myit lum to bê nghut lhê.

¹⁷ Ngò gi, haû hkyô hen é hkûn, agon za hen hkyut é nghut lhê lúh? Haû a nghut jáng, ngò hen é pé gi, ra-u má za, "Nghut lhê, nghut lhê." nghû é eq, "A nghut, a nghut." nghu é wó tá rã matú, mingkan myit dông hen é nghut lhê lúh?

¹⁸ Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" nghu é a nghut.

¹⁹ Hkâsu mù gâ le, ngo eq le, Sila eq le, Timohti eq le, nungmoq chyáng hko kyo bê nghut é sù, Garai Gasang é Yhangzo Yesuq Hkrisduq gi, "Nghut lhê" nghu é eq "A nghut" nghu é sù a nghut é za, Yhang má gi, hkâ-nhám le "Nghut lhê" nghu é za joq lhê.

²⁰ Hkâsu mù gâ le, Garai Gasang gi, danggidiq hkâ-myhó to kôle, haû pé gi, Hkrisduq má "Nghut lhê" chyat nghut lhê. Haû mù,

Garai Gasâng é hpungwup shingkâng é matú, Yhâng đông mai, nga-nhúng gi, "Amen" nghũ tai é nghut lhê.

²¹ Ngamoq eq nungmoq lé Hkrisduq má yap gingtúng nhang é sũ gi, Garai Gasang nghut ri. Yhang gi, nga-nhúng lé masat é xũ but byi mù,

²² Yhang sing lhê gâ é dizik, nga-nhúng lé htung tap byi lui, jé lô râ hkyô pé hkyak joq lhê nghu é masat zè đông, Yhâng é Woi-nyí lé nga-nhúng é i-myt unghkaũ má kat byi bê nghut ri.

²³ Ngò gi, nungmoq hkyamsa râ matú, Korinhtuq myuq má a dum taũ lé é hkyô têng é lé, ngá é saksé dut râ đông Garai Gasang lé wut dúng lhê.

²⁴ Haũ gi, nungmoq é lumjúng hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chôm zui sai é ru nghut lhê; haĩ mù gâ le, lumjúng myit mai za nungmoq wó yap gíng nyi bùm kô é ru nghut lhê.

2

¹ Haũ mù lui, ngò gi, nungmoq lé myit nò nhâng é dut râ đông, lé dum kũm é a kut râ nghũ, myit hpyit to bê nghut lhê.

² Hkâsu mù gâ le, nungmoq lé ngò yón kuq nhang é nghut le gi, ngò yón kuq nhâng bê bang nungmoq mai lai lui, ó yuq wá ngo lé wó gabú nhâng râ lú?

³ Ngò jé lé é hkũn, ngo lé gabú nhâng râ âng é bâng èq, ngo lé myit nò nhang é a hui sháng gaq nghũ, ngò gi, ngò kut é eq rajung za laiká kâ kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghũ, nungmoq banshoq bang lé ngò hkyak myit lum tô lhê.

⁴ Hkâsu mù gâ le, ngò gi, nungmoq lé laiká kâ é hkũn, myit myo uhkyí mó èq le, myit má yón kuq é èq le, ngaubyi ngau-nhap é èq le, kâ kat bê nghut lhê. Haũ gi, nungmoq lé yón kuq é hui nhâng râ matú a nghut é za, nungmoq lé ngò hkâ-í chyitdap é hkyô lé sé nhâng râ matú ru nghut lhê.

Mara Hkyut Byí Lhum Râ Hkyô

⁵ Yón kuq hkyô lhoq htoq é sũ gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haũ hkyô eq séng lui, ngò gyai wá yhang zuq zuq a tai nau é nghut lhê.

⁶ Nungmoq myo hpyâng èq yhang lé mara dam byí é hkyô gi, yhâng é matú gé bê nghut ri.

⁷ Nghut kôlhang, ahkuĩ, nungmoq gi, yhang a wó jan loshoq myit yón é a hui zo râ matú, yhang lé mara hkyut pyám byi mù, nhik títng byi keq.

⁸ Haũ mù lui, nungmoq é chyitdap myit gi, yhang é ah-toq má dum lhoq gíng shit nyí

keq nghû, nungmoq lé ngò wum taí tsuq kat lhê.

⁹ Ngò, nungmoq lé haí mù laiká ká byí kat é hkyô gi, nungmoq chyam wú huí é hkyô lé wó jân é hkyô eq jung hkanmó má jino gyo hkyô bò a bo é lé, wó sé râ matú le nghut lhê.

¹⁰ Nungmoq, rayuq yuq lé mara hkyut byí é nghut le gi, ngò le, haú yuq lé mara hkyut byí lhê. Mara hkyut râ rajung jung joq é nghut jáng, ngò mara hkyut é gi, Tsadán eq nga-nhúng lé a wó ùng râ matú, nungmoq é yanmai, Hkrisduq é myoq hí má ngò mara hkyut byi bê nghut lhê.

¹¹ Hkâsu mù gâ le, Tsadán hen é hkyô pé lé nga-nhúng a sê é a nghut.

Dangshikaq Asik Mâ É Hpungmû Wùn Bang

¹² Ngò gi, Hkrisduq é gabú danglù hko kyo râ matú, Troa myuq má ê jé é hkûn, haú Yhumsing gi, ngo lé hkum hpóng byí é lé, ngò myang ri.

¹³ Nghut kôlhang, ngò gi, ngá é gumang Tituq lé haú má a myang ho é yanmai, myit myo mù, yhangmoq lé shi-kyâm to luí, Makedoni mau shut xoq e ló é nghut lhê.

¹⁴ Nghut kôlhang, Hkrisduq má, ngamoq lé hkâ-nhám le ùng budang hkyô shut shuí-û yù mù, Hkrisduq lé sê é sumsé hpaqchyi é nam ngón shôm lé, ngamoq đông mai jowò hkanmó má taí pyo é sù, Garai Gasang gi, jeju hkyâ-ôn é huí nyi sháng gaq.

¹⁵ Hkâsu mù gâ le, ngamoq gi, hkyi yu é huí nyi bâng chyáng le, htên byoq ló é huí nyi bâng chyáng le, Garai Gasâng é matú Hkrisduq é nam ngón shôm nghut nyi lhê.

¹⁶ Ngamoq gi, htên byoq nyi bâng é matú shî-nò hkyo é shôm dut mù, hkyi yù huí nyi bâng é matú nghut jáng, asak hkyo é nam ngón shôm dut é nghut lhê. Haú mù, ó yuq wá muzó shî eq htuk râ lúh?

¹⁷ Ngamoq gi, amyat wó râ matú Garai Gasâng é mung-dang lé hkat ung zô é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé đông lhumzui myit mai taí é nghut lhê.

3

¹ Ngamoq gi, yhumsing gùng yhumsing dum owaq hi ló é nghut lhê lúh? Byù ra-am kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq?

² Nungmoq gùng yhang gi, ngamoq é myit nhiklhum má kâ tô é, yuq hkanmó eq ng-hap luí sê yu é laiká gùng pé nghut akô.

³ Nungmoq gi, nungmoq chyáng ngamoq hpungmû wùn waq é yanmai, Hkrisduq chyáng mâ é laiká nghut kô é hkyô lé shit nyi akô. Haú gi, kâ jung chí eq kâ tô é đông a nghut é za, rû dui nyi é Garai

Gasâng é Woi-nyí èq kê tô é nghut é htoq agó, luqlong pé má kê tô é đông a nghut é za, xângzo byu é myit nhiklhum long pé má kê tô é ru nghut lê.

⁴ Haû su nghû hkyak wó myit lum é hkyô gi, Garai Gasâng é hí má, Hkrisduq đông mai ngamoq wó yu é nghut lê.

⁵ Ngamoq gi, yhumsing gùng haí lé le wó kut lê nghu é a nghut, ngamoq é a-tsam gi, Garai Gasâng chyáng mai lo é nghut lê.

⁶ Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haû gi, tarâ laiká mai lo é a nghut é za, Woi-nyí mai lo é ru nghut lê. Hkâsu mù gâ le, laiká gi, shî dàm byi lê, Woi-nyí kúm gi, asak byí é nghut lê.

Dangshikaq Asik É Hpungwup Shingkaq

⁷ Ahkuí, haû Mosheq é myoqdong mâ é hpungwup shingkaq é yanmai, haû Israelaq byu pé gi, yhâng é myoqdong lé a wó wú tsuq to kó nghut ri. Hpungwup shingkaq haû shûm lo byuq sê é nghut kôlhang, luqlong má dok kê tô é, shî-nò hkyô lhoq htoq é tarâ muzó gi, hpungwup shingkaq eq rahá jé lé é nghut lê.

⁸ Haû su nghut jáng, haû Woi-nyí é muzó gi, hpungwup shingkaq je riyhang dut râ a nghut kó lú?

⁹ Gè gè yhang, haû byù lé mara byí é tarâ muzó lhang,

hpungwup shingkaq bo é nghut le gi, dingmán nhang é hkyô sik gi, je riyhang hpungwup shingkaq bo é nghut lê ô!

¹⁰ Hkâsu mù gâ le, hpungwup shingkaq bo é tarâ muzó gi, hpungwup shingkaq je bo é dangshikaq asik eq whuí é hkûn, hpungwup shingkaq a bò lo dut byuq bê nghut ri.

¹¹ Shum byuq ló é tarâ lhang gi, hpungwup shingkaq eq rahá lé jé bê nghut le gi, ru gîng nyi é dangshikaq asik é hpungwup shingkaq gi, je riyhang gyaú râ nghut lê ô!

¹² Haû mù luí, ngamoq gi, haû sù é myoqbyù hkyô wó é yanmai, gyuq kyum myit a bo é hkyô shit é nghut lê.

¹³ Ngamoq gi, Mosheq su a nghut. Yhang gi, duqbang é hkyô shûm byuq ló é hkûn, haû Israelaq byu pé haû lé a wú tsuq râ matú, yhâng é myoqdong lé myoqgo èq nghop pyâm é sù nghut ri.

¹⁴ Nghut kôlhang, yhangmoq é myit gi, lhoq chut byí é hui bekô nghut ri; hkâsu mù gâ le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byí ashí nghut ri. Haû gi, huí sêng pyâm é a hui shi, haí mù gâ le, Hkrisduq đông za haû lé wó yu pyâm é nghut lê.

¹⁵ Hkû-nyí jé shoq lhang, Mosheq é laiká lé nghap é hkûn, yhangmoq é myit nhiklhum má myoqgò èq

nghop tô é nghut ri.

¹⁶ Nghut kôlhang, ó yuq le, Yhumsîng chyáng hká u lêng ló kôlhang, haú hkûn jáng, myoqgò gi, hí pyám byí é hui râ nghut lhê.

¹⁷ Yhumsîng gi, haú Woi-nyí nghut mù, Yhumsing é Woi-nyí nyi é jowò má, luthkyô le joq lhê.

¹⁸ Haú Yhumsîng é hpungwup shingkang lé lhoq htoq shit é bang banshoq nghut é myoqdong má myoqgò a nghop é bang nga-nhúng gi, ru myo jat nyi é hpungwup shingkang lhoq htoq byi hkyô nghut é, Yhâng é isâm shut htaí lhik wang é huí nyi bê nghut lhê. Haú hkyô gi, haú Woi-nyí nghut sù Yhumsîng chyáng mai lo é nghut lhê.

4

Tseyam Pé Má Bo É Sutzè

¹ Ngamoq gi, Garai Gasâng jeju mai muzó hkyô haú wó é nghut mù, myit wum a gyuí é nghut lhê.

² Ngamoq gi, zaú tô é eq hoq htoq é hkyô pé lé tô pyám luí, mhaú zô é hkyô le a kut, Garai Gasâng é mungdang lé le ahpuq alhik a kut é bang nghut lhê. Haú su kut râ malaí, ngamoq gi, haú tengmán hkyô lé san za lhoq htoq shit é dông, Garai Gasâng é hí má yuq hkgámó é myit sôn sê é hkyô má, yhumsing gùng yhumsîng htuk shoq nyi lhê.

³ Ngamoq é gabú danglù gi, myoqgo eq nghop pyâm é huí é nghut jáng, haú gi, htên byoq nyi bâng chyáng za nghop pyám huí é ru nghut lhê.

⁴ Haú Garai Gasâng é azòng isâm nghut sù, Hkrisduq é hpungwup shingkang bo é gabú danglù é maubó lé, a lumjîng bang a wó myâng kó sháng gaq ga, ipyat shi é garai* gi, yhangmoq é myit lé lhoq chit byi bê nghut ri.

⁵ Haú nghut é yanmai, ngamoq gi, yhumsing gùng eq séng luí hko kyô é a nghut é za, Yesuq Hkrisduq gi, Yhumsîng nghut é hkyô lé le, Yesuq é matú, ngamoq gùng yhang gi, nungmoq é jùn pé nghut é hkyô lé le, hko kyô é ru nghut lhê!

⁶ Hkâsu mù gâ le, "Mauchut hkaú mai maubó htoq lô sháng gaq."☆ ga taí é Garai Gasang gi, Yesuq Hkrisduq é myoqdong mâ é Garai Gasâng é hpungwup shingkang é maubó lé sê gyô é nyan lé, nga-nhúng lé byí é dông, Yhâng é maubó lé, nga-nhúng é i-myt unghkaú má duqbó nhâng bê nghut ri.

⁷ Nghut kôlhang, ngamoq gi, sutzè haú bo é tseyam pé† nghut nyi lhê. Haú gi, gyaú dik é a-tsam mó gi, ngamoq chyáng mâ é a nghut é za Garai Gasâng chyáng mâ é nghut é hkyô lé tân shit râ matú nghut lhê.

⁸ Ngamoq gi, wuîhke hkyo

* 4:4 Ipyat shi é garai gâ é gi, Tsadán lé gâ é nghut lhê. ☆ 4:6 Apùn 1:3 † 4:7 Tseyam pé gâ é gi, nga-nhúng é wum nyhôm é gungdu lé gâ é nghut lhê.

èq lhîngħkyuq mai gyai yhang nhê zik é hui kôlhang, a gyop byuq é nghut lhê; myit lhoq nhûng pyâm é hui kôlhang, myit a htûm byuq é nghut lhê;

⁹ zing-rî é hui kôlhang, kâng pyâm huí é a nghut; bat lhêng pyâm é hui kôlhang, htên byoq huí é a nghut.

¹⁰ Haû Yesuq é asak duì hkyô le, ngamoq é gungdu má lhoq htoq shit é hui sháng gaq nghû, ngamoq gi, Yesuq shi é hkyô lé, hkâ-nhâm le, ngamoq é gungdu má wùn waq wún é nghut lhê.

¹¹ Hkâsu mù gâ le, Yesuq é asak duì hkyô gi, nga-nhûng é shi sê é gungdu má lhoq htoq shit é hui sháng gaq nghû, asak duì nyi é bang ngamoq gi, Yesuq é matû é yanmai, hkâ-nhâm le, shi byuq hkyô shut ap pyâm é huí nyi ri.

¹² Haû mù luí, shi byuq hkyô gi, ngamoq má mù zuí nyi ri; asak duì hkyô kúm gi, nungmoq má mù zuí nyi é nghut ri.

¹³ "Ngò gi, lumjîng bê nghut lhê, haû mù, ngò taí é nghut lhê."* ga kê tô é eq rajung za, ngamoq le, lumjîng hkyô hau èq yhang, lumjîng bê nghut mù taí é nghut lhê.

¹⁴ Haí mù gâ le, haû Yhumsîng Yesuq lé shi é mai lhoq dui toq é Sû gi, ngamoq lé le, Yesuq eq rahá lhoq dui toq mù, nungmoq eq rahá, ngamoq lé Yhâng é hí má shuí jê râ nghut é lé, ngamoq sê lhê.

¹⁵ Haû jeju wó é byu pé gi, je riyhang myô jat lò mù, Garai Gasâng é hpungwup shingkâng é matú, jeju hkya-ôn é hkyô gi, byíng mui nyi sháng gaq ga, haû pé banshoq gi, nungmoq é akyu é matú nghut nyi ri.

¹⁶ Haû mù luí, ngamoq gi, myit wum a gyuí é nghut lhê. Ngamoq é shinggan gungdu gi, htên byoq ló nyí kôlhang, i-myit unghkaú gi, ra-nyí eq ra-nyí asik dut nhang é huí nyi ri.

¹⁷ Hkâsu mù gâ le, ngamoq é tiq é eq razup zâ é wuîhke hkyô pé gi, ngamoq é matú haû pê htoq gyai hkik é ahtum abyuq é hpungwup shingkang lé, wó yû nhang ri.

¹⁸ Haû mù, nga-nhûng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

5

Mauhkûng Htoq Mâ É Yhûm

¹ Haû myidàm zúm nghut é nga-nhûng lúng nyi é gungdu gi, htên byoq sê é nghut kôlhang, byu loq èq saí é a nghut é za, mauhkûng htoq má joq é ahtum abyuq é yhûm* nghut é, Garai Gasâng

* 4:13 Hkya-on 116:10 * 5:1 Mauhkûng htoq má joq é ahtum abyuq é yhûm gâ é gi, nga-nhûng, mauhkûng mingdán má jê é hkûn wó rà gungdu asik lé gâ é nghut lhê.

chyang mâ é yhûm lé, nga-nhúng wó é hkyô lé, nga-nhúng sê lhê.

² Nghut kôlhang, ahkuí, nga-nhúng gi, nga-nhúng é mauhkúng yhûm lé tù hut byí é lé gyai yhang hui naû mù, nò-kying su kyíng nyi lhê.

³ Haí mù gà le, nga-nhúng gi, hut byí é hui jáng, gungdu a bò bang a dut lo râ nghut lhê.

⁴ Hkâsu mù gà le, nga-nhúng gi, zúm shí má lúng nyi é u lé, wòlai wùn mù, nò-kying su kyíng nyi lhê; haû gi, shí byuq sê é lé, asak dui é eq wó htaí lhiq pyám sháng gaq nghû, nga-nhúng gi, a hut byí é hui râ lé a ô nau é za, nga-nhúng é mauhkúng yhûm lé tù hut byí é hui râ lé ô nau é yanmai nghut lhê.

⁵ Ahkuí kúm, jeju haû hkam yù râ matú, nga-nhúng lé lajáng to byí é sủ gi, Garai Gasang nghut mù, jé lô râ hkyô gi, hkyak joq lhê nghû é masat zè đông, nga-nhúng lé haû Woi-nyí byi bê nghut ri.

⁶ Haû mù luí, ngamoq gi, hkâ-nhám le hkyak lum tô lhê. Gungdu shí má yhûm đông ru lúng nyí nyí gi, haû Yhumsing eq wê gâng nyi ashí nghut é lé ngamoq sê nyi lhê.

⁷ Ngamoq gi, byu-myang é đông mai a nghut é za, lumjíng myit mai asak dui é ru nghut lhê.

⁸ Ngamoq gi, hkyak myit lum tô lhê nghû, ñò taí lhê, haû mù, gungdu shí mai wê gang luí, haû Yhumsing eq rahá nyi râ lé ngamoq je riy-

hang ô nau é nghut lhê.

⁹ Haû mù, ngamoq gi, gungdu shí má yhûm đông lúng nyi é nghut nghut, haû mai wê gâng é nghut nghut, ngamoq myit myoqbyu tô é jowò gi, Yhang lé gabú nhâng râ matú nghut lhê.

¹⁰ Hkâsu mù gà le, yuq hkgangmó gi, gungdu shí má yhûm đông lúng nyi é u lé, ge é nghut nghut, a ge é nghut nghut, kut é eq rajung za hkam yù râ matú, Hkrisduq é tarâ jéyang tanghkuq hí má, nga-nhúng banshoq bang htoq shit ra râ nghut lhê.

Nguingón Hkyô Xoq É Muzó

¹¹ Haû mù, Yhumsing lé gyuq hkungga râ hkyô haí nghut é lé ngamoq sê é nghut luí, ngamoq gi, byu pé lé taí pún kyíng shikut lhê. Ngamoq haí nghut é gi, Garai Gasang chyang san za nghut nyí mù, nungmoq é myit sôn sê é hkyô má le san za nghut râ lé, ñò myit lum lhê.

¹² Haû myit nhikhlum má bo é lé gumrông râ malaí, byu-myang é lé gumrong é bang lé, nungmoq wó tù taí kó sháng gaq nghû, ngamoq gi, nungmoq chyang yhumsing gùng lé dum owaq shikut é a nghut é za, ngamoq é hkyô lé, nungmoq wó gumrông râ ahkáng, nungmoq lé byí é ru nghut lhê.

¹³ Ngamoq a gyíng é đông nghut le gi, Garai Gasang é matú a gyíng é nghut lhê; ngamoq gyíng é đông nghut le

gi, nungmoq é matú gyîng é nghut lâ.

¹⁴Hkâsu mù gâ le, Hkrisduq é chyt dap myit eq ngamoq lé kut nhang nyi é nghut lâ. Haû gi, banshoq bâng é matú rayuq shî hkám byi bê nghut mù, banshoq bang shi é đông nghut bê nghû, ngamoq hkyak sê gyô é yanmai nghut lâ.

¹⁵Yhang gi, asak dui nyi é bang, yhangmoq yhumsing gung é matú a duì lô é za, yhangmoq é matú shî hkám byi luî, lhoq dui toq é huí Su é matú duì kó sháng gaq ga, banshoq bâng é matú shî hkám byi bê nghut ri.

¹⁶Haû mù, ngamoq gi, ahkuí mai, ó yuq eq séng luî le, mingkan hkyam đông mai a wú lô é nghut lâ. Ngamoq gi, hí hkûn Hkrisduq lé haû đông wú é nghut kôlhang, haû su hkâ-nhám le a kut lô é nghut lâ.

¹⁷Haû nghut mù luî, rayuq yuq gi, Hkrisduq má nghut nyi é nghut jáng, yhang gi, asik hpân hui sù dut bê nghut ri; haû axau gi, byuq byuq mù, lunglhang asik dut bu-nhung!

¹⁸Haú pé banshoq gi, Garai Gasâng chyáng mã é chyat nghut lâ. Yhang gi, Hkrisduq đông mai nga-nhúng lé Yhânggùng eq nguingón hkyô xoq yû luî, nguingón hkyô xoq é muzó ngamoq lé byi bê nghut ri.

¹⁹Haû gi, Garai Gasang gi, byu pé é mara lé a matsíng byi

é za, Hkrisduq đông mingkan lé Yhânggùng eq nguingón hkyô xoq yû bê nghut luî, Yhang gi, nguingón hkyô xoq yu é mungdang haû lé, ngamoq lé ap byi to bê nghû nau é nghut lâ.

²⁰Haû mù luî, ngamoq gi, Hkrisduq é gunglik pé nghut lâ mù, Garai Gasang gi, ngamoq đông mai nungmoq lé lhoq pûn kyîng nyi é nghut lâ. Garai Gasang eq nguingón hkyô xoq yû keq nghû, ngamoq gi, Hkrisduq é gunglik đông nungmoq lé dúng tôngbán nyi lâ.

²¹Nga-nhúng gi, Hkrisduq đông mai Garai Gasâng é dingmán bang wó dut kó sháng gaq ga, Garai Gasang gi, yubak mara a bò Sû lé, nga-nhúng é matú yubak mara hkungga dut nhâng bê nghut ri.

6

¹Ngamoq gi, Garai Gasâng é mù zui byinzùm wuì nghut nyi é eq rajung za, Garai Gasâng jeju lé akyû a bo é đông hkâhap yù kó nghû, nungmoq lé wum taí tsuq kat lâ.

²Hkâsu mù gâ le,

"Ngò ô nau é ahkyíng má, nang lé ngò gyo byi bê nghut mù, hkyi yù hui rá buinyi má, nang lé ngò garúm bê nghut lâ."*

ga luî, Yhang taí ri. Ngò, nungmoq lé taí kyo kôlé, ahkuí gi, Garai Gasang ô nau

é ahkyíng, ahkuí gi, hkyi yu é buinyì nghut ri.

Poluq É Wuíhke Hkyô Pé

³ Ngamoq é hpungmû gi, taí hpoí pyâm é a hui sháng gaq nghû, ngamoq gi, ó yuq é hkyô má le, leqbat jung a to byí é nghut lâhê.

⁴ Haû kut râ malaí, ngamoq gi, Garai Gasâng é dui-nhâng zoshâng wuì nghut é hkyô lé, hkyô hkanmó má yhum-sing gùng yhumsing shit nyi lâhê. Gyai hkam jân é hkyô má le, jamjau hkyô pé má le, wuíhke hkyô pé má le, myit myo uhkyi hkyô pé má le shit nyi lâhê.

⁵ Nhuq bat huí é pé má le, htóng lhúng huí é eq toq gabyông é má htim é huí é má le, mù zui shikut é má le, a myang yhup é myín pé má le, zòmut huí é má le, shit nyi lâhê.

⁶ Sân-yúng é má le, sê gyô é hkyô má le, myit hing é eq myit ge é má le, Chyoiyúng Woi-nyí eq chyitdap myit akying má le,

⁷ tengmán é mungdang hko é má le, Garai Gasâng é atsam má le, loqyò loqpai má dingmán hkyô nghû é laknak pé dông le, shit nyi lâhê.

⁸ Hpungwup shingkang byí é hui kô é dông eq a hkunggâ é hui kô é dông nghut kôle, a ge é luhkyang eq ge é luhkyang taí kôle, shit nyi lâhê. Ngamoq gi, tengmán kôlhâng, mhaú zo bang dông sôn yu akô nghut ri.

⁹ Ngamoq lé sé kôlhâng, a sê é dông kut akô nghut ri; shi lô nyí kôlhâng, rû dui nyi é bang nghut lâhê; nhuq bat é hui kôlhâng, sat pyâm é a hui shí é bang nghut lâhê.

¹⁰ Yón hkyô byíng nhâng kôlhâng, hkâ-nhám le gabú nyi lâhê; myùng kôlhâng, byù myo myo lé wó sùt nhâng nyi lâhê; haí le a wó kôlhâng, jung hkanmó lé sing é dông nghut lâhê.

¹¹ Korinhtuq bang ê, ngamoq gi, nungmoq lé san za taí bê nghut luí, ngamoq é myit nhiklum lé, nungmoq é matú làm shoq hpông to byi bê nghut lâhê.

¹² Ngamoq gi, ngamoq é chyitdap myit lé, nungmoq chyáng mai lâng taû yu nyi é a nghut, nungmoq sheq, ngamoq chyáng mai lâng taû yu nyi kô é ru nghut lâhê.

¹³ Nungmoq le, myit nhiklum lé làm shoq dum taû hpông keq nghû, ngò gi, ngá zô pé lé dông taí lâhê.

A Lumjínq Bang Eq A Nhunghkut Râ Hkyô

¹⁴ A lumjínq bang eq rahá kandang hkâwaq kó. Hkâsu mù gâ le, dingmán é hkyô eq agè ashop é hkyô gi, haí sêng lhum lâhê lúhú? Maubó eq mauchut gi, hkâsu wó zùm yap kó râ lúhú?

¹⁵ Hkrisduq eq Beliala* gi, hkâsu kut myit wó huí lhum kó râ lúhú? Lumjínq sù rayuq eq a lumjínq sù gi, hkâsu wó pung lhum kó râ lúhú?

* 6:15 *Beliala* gâ é gi, Tsadán é myìng rajà nghut lâhê.

16 Garai Gasâng é noqkuq yhûm eq hparà lhô pé gi, hkâsu wó húm râ lhú? Hkâsu mù gâ le, nga-nhúng gi, rû dui nyi é Garai Gasâng é noqkuq yhûm nghut lhê. Haû gi, "Ngò gi, yhangmoq eq rahá nyi mù, yhangmoq chyáng sô nyi râ nghut luí, Ngò gi, yhangmoq é Garai Gasang dut mù, yhangmoq gi, Ngá é byu pé dut kó râ nghut lhê."* ga Garai Gasang taí tô é eq rajung za nghut ri.

17 "Haû mù luí, yhangmoq chyáng mai htoq lô mù, gotû san za nyi keq. A sansêng é zè lé hkâzáng kó, haú hkûn, Ngò, nungmoq lé lhom hap yù râ nghut lhê."* ga haû Yhumsing taí ri.

18 "Ngò gi, nungmoq é Îwa dut mù, nungmoq gi, Ngá é byizo yuqzô pé dut kó râ nghut lhê."* ga haû wum-o a-tsam dik shoq bò Sû Yhumsing taí ri.

7

1 Chyitdap é luzúm wuì ê, nga-nhúng gi, danggidiq haú pé lé wó tô é bang nghut é yanmai, gungdu eq woi-nyí lé agot a-û dut nhang é jung hkangmó mai, yhumsing gùng yhumsing lhoq sân-yúng yù luí, Garai Gasang lé gyuq hkunggâ é myit eq chyoiyúng hkyô má lhoq gumjup yu nyi sháng.

Poluq É Gabú Hkyô

2 Nungmoq é i-myit unghkaû má ngamoq lé jowò

byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaú zô wú é nghut lhê.

3 Ngò gi, nungmoq lé mara byi râ matú haû su taí é a nghut. Ngamoq gi, asak dui kôle, shî kôle, nungmoq eq rahá wó dut shoq, nungmoq gi, ngamoq é i-myit unghkaû má lúng nyi é nghut lhê nghû, hí hkûn ngò taí wú bê nghut lhê.

4 Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byi é gyai yhang huí ri; jamjau hkyô pé myo myo ngamoq hui kôlhang, ngò, gyai yhang gabú nyi lhê.

5 Hkâsu mù gâ le, ngamoq gi, Makedoni mau má jé é hkûn, ngamoq é gungdu gi, zim za a myang nyi é htoq agó, hkyô hkangmó má ngamoq wuîhke jamjau hui zô é nghut lhê. Shinggan má gi, mabyoq htoq, ahkaû má gi, gyuq kyum nyi é nghut lhê.

6 Nghut kôlhang, nhik ngê bang lé nhik títng é Garai Gasang gi, Tituq lé jé lé nhang é dông mai, ngamoq lé nhik títng byi bê nghut ri.

7 Yhang jé lé é dông mai za a nghut, yhang lé nungmoq nhik títng byi é hkyô dông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuí nyi é hkyô, nungmoq gyai yhang

* 6:16 Nhung 26:12; Yer 32:38; Ezk 37:27

* 6:17 Esai 52:11; Ezk 20:34,41

* 6:18 2 Sam 7:14

shut bûn é hkyô, ngá é matú nungmoq gyai myit chiq byî é hkyô pé lé, ngamoq lé tâi kyo bê nghut ri.

⁸ Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê.

⁹ Nghut kôlhang, ngò gi, ahkuí gabú lhê; haú gi, nungmoq lé yón hui nhang é yanmai a nghut é za, nungmoq é yón hkyo èq, nungmoq lé myit lhîng nhang é yanmai ru nghut lhê. Nungmoq gi, Garai Gasang ô nau é dông yón huí é bang dut bekô nghut mù, nungmoq lé, ngamoq èq hai akyû le a lhoq yôm byî é nghut lhê.

¹⁰ Hkâsu mù gâ le, Garai o é dông yón kuq huí é hkyô gi, nungngham wó hkyô a bo é za, hkyi yù hkyô wó shoq, myit lhîng nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri.

¹¹ Garai o é dông, nungmoq chyáng akyû lhoq htoq byî é yón kuq hkyô lé wú wú keq! Haú gi, gyai yhang myit zuq é hkyô, yhumsing gùng mara a bo é lé tûn shit râ lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byî é hkyô, tengmán hkyô kut râ rì rì nghut é hkyô pé nghut lhê. Nungmoq gi, haú hkyô má mara a bo é lé hkat hkgangmó

má saksé tûn shit bekô nghut ri.

¹² Haú mù luí, ngò, nungmoq lé kê kat é nghut kôlhang, kut shut su é yanmai le a nghut, kut shut é hui zo su é yanmai le a nghut é za, ngamoq lé nungmoq hkâ-í ap nóng byî é hkyô lé, Garai Gasâng hí má nungmoq gùng nungmoq wó myâng râ matú kê kat é sheq ru nghut lhê.

¹³ Haú pé banshoq dông mai, ngamoq gi, myit wum byî é huí ri.

Ngamoq myit wum byi huí é htoq agó, Tituq hkâ-í yhang gabú é lé myàng mù, ngamoq gi, je riyhang myit gabú é nghut lhê. Haí mù yhang gabú é gâ lé, nungmoq banshoq bâng èq yhâng é myit lé lhoq nguingón byi kô é yanmai nghut ri.

¹⁴ Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpû é nghut lhê. Nungmoq lé ngamoq tâi é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê.

¹⁵ Nungmoq banshoq bang jîno gyo kômù, gyuq nán é myit mai yhang lé lhom hap yù kô é lé, yhang myitbûn é hkûn, yhang nungmoq lé chyitdap é myit gi, je riyhang kô dik nyi ri.

¹⁶ Ngò gi, nungmoq lé banshoq wó lum to bê lé sê é yanmai, gabú nyi lhê.

Byî É Hkyô

¹ Gumang wuê ê, ahkuî, ngamoq gi, Makedoni mau mâ é noqkuq hpûng pé lé Garai Gasang byî é jeju eq sêng é hkyô, nungmoq lé sé nhâng nau ri.

² Yhangmoq gi, wuîhke jam-jau hkyô myo myô èq chyam lik é huî é nghut kôlhang, yhangmoq é a ung tai loshoq gabú é hkyô eq yhangmoq é gyai yhang myung é hkyô gi, agùn agó byí nau é myit bò nhang ri.

³ Hkâsu mù gâ le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lháng byi kô é hkyô lé, ngò saksé hkám lhê. Yhangmoq gi, yhangmoq é myit hkaû mai yhang haû su kut kô é nghut ri.

⁴ Yhangmoq gi, haû sân-yúng bang lé wó bo dojaú râ matú, ngamoq lé gyai yhang ahkáng dung kô é nghut ri.

⁵ Yhangmoq gi, ngamoq myit ngam tô é htoq má lháng lai shoq, Garai Gasang ô nau é hkyô lé châng é dông, yhangmoq gùng lé hí haû Yhumsîng lé ap byí pyám kômù, hau htâng sheq ngamoq lé ap kô é nghut ri.

⁶ Haû mù luî, Tituq yhang hí kut hi nyi bê nghut é yan-mai, ngamoq gi, jeju haû lé nungmoq chyáng le shuí lhoq byíng jup byi râ matú, yhang lé wum byi bê nghut lhê.

⁷ Nungmoq gi, lumjîng myit má, dang nyo é hkyô má le, sumsé hpaqchyî hkyô má

le, myit zuq hkyô banshoq eq ngamoq lé nungmoq chyitdap é hkyô má le, jung hkanmó má agùn agó dut bekô eq rajung za, nungmoq gi, byí nau é jeju shí má le agùn agó dut râ lé, bún nyi keq.

⁸ Ngò gi, nungmoq lé hkunmó hkyô é a nghut, nghut kôlhang, góbâng é myit zuq é hkyô eq whuí wú é dông, nungmoq é chyitdap myit jet é hkyô lé chyam wú nau luî sheq ru nghut lhê.

⁹ Hkâsu mù gâ le, nungmoq gi, nga-nhûng é Yhumsîng Yesuq Hkrisduq é jeju lé sê akô nghut ri. Yhang gi, Yhâng é myùng hkyô dông mai nungmoq wó bang dut kó sháng gaq ga, jung hkanmó wó sù nghut kôlhang, nungmoq é matú é yanmai, myùng sù dut bê nghut ri.

¹⁰ Shí hkyô eq sêng é má, nungmoq é matú ge dik é hkyô ngò hpaqchyî byi kôlê: A-nhik, nungmoq gi, sân-gi, byí hí kô é za a nghut, haû su kut nau é myit bo é bang le nghut akô.

¹¹ Nungmoq wó dut é eq rajung za, haû lé lhoq pân é dông nungmoq é gyai yhang kâm kut é myit lé wó lhoq dik ko sháng gaq, ahkuî, muzó haû lhoq pân keq.

¹² Hkâsu mù gâ le, byí nau é myit bo é nghut jáng, chyunghuq haû gi, yhang a wó é má cháng luî a nghut é za, yhang wó é má cháng luî, hap yù gíng é nghut lhê.

¹³ Nungmoq é matú gi,

wòlai dut, góbang gi, hkyamsâ nyi râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê.

¹⁴ Nungmoq haî râ tô é lé, yhangmoq agùn agó wó é mâ é wó dum taû htuqbang byi kó sháng gaq, ahkui lhê é ahkýing má, yhangmoq haî râ tô é lé, nungmoq agùn agó wó é mâ é htuqbang byi keq. Haû jáng sheq, wuí wuí za wó dut kó râ nghut lhê.

¹⁵ Haû gi, "Myo myo tsíng yu é sũ gi, lúm myo shoq wó é a nghut, shau za tsíng yu é sũ gi, lúm shau shoq wó é a nghut."* ga kê tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶ Nungmoq é matú ngò myit chiq byi é eq rajung zâ é myit lé, Tituq é i-myit má kat byi é Garai Gasang lé, ngò jeju hkya-ôn lhê.

¹⁷ Hkâsu mù gâ le, Tituq gi, ngamoq dúng tôngbán é lé za lhom hap yu é a nghut, gyai yhang myit toq mù, yhânggùng yhang myit hpyit yû luí, nungmoq chyáng lé lô gù za nghut ri.

¹⁸ Ngamoq gi, haû gabú danglù lé dojaú é má noqkuq hpûng pé banshoq èq hkya-on huí é gumang hpó haû lé le, yhang eq rahá nhang kat lhê.

¹⁹ Hau htoq agó, ngamoq garúm râ myit bo nyi é hkyô lé tân shit mù, haû Yhumsíng lé hkungga râ matú ngamoq wú gôn nyi hkyô nghut é, alu lé

ngamoq yu chung é hkûn, ngamoq é byinzùm kut râ matú, noqkuq hpûng pé èq hkyin yu é sũ le yhang nghut lhê.

²⁰ Ngamoq gi, myit lòm luí byi é chyunghuq shî lé ngamoq wú gôn nyi é hkyô má, ó yuq èq le mara hô râ hkyô a htoq shoq sidiq nyi lhê.

²¹ Hkâsu mù gâ le, jô é hkyô kut râ matú ngamoq shikut nyi é gi, haû Yhumsing é myoq hí má za a nghut, byu pé é myoq hí má le nghut lhê.

²² Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sũ, ngamoq é gotû gumang hpó lé le yhangnhik eq rahá nhang kat lhê. Yhang gi, ahkuí lháng, nungmoq lé gyai yhang myit lum tô é yanmai, shirông myit je riyhang bo nyi ri.

²³ Tituq é hkyô ga jáng, yhang gi, ngá é zùm yap luzùm eq ngò eq rahá nungmoq chyáng mù zui sũ nghut ri. Nga-nhúng é gumâng nhik é hkyô ga jáng, yhangnhik gi, noqkuq hpûng pé é gunglik eq Hkrisduq é aróng nghut akô.

²⁴ Haû mù luí, haû noqkuq hpûng pé wó myâng kó sháng gaq, nungmoq má ngamoq haî mù gumrong é hkyô eq nungmoq é chyitdap myit é saksé lé, haû bang lé tân shit keq.

9

¹ Ngò gi, haû sân-yúng bang lé htuqbang râ hkyô eq séng

luí, nungmoq lé kê kat râ a ra nghut ri.

² Hkâsu mù gâ le, nungmoq gyai garúm nau é myit lé ngò sê lhê, haú mù, ngò gi, Makedoni mau bang lé, haú hkyô eq séng luí gumrong kyo mù, a-nhik mai yhang, Ahkaia mau má nungmoq byi râ rì rì nghut bê hkyô lé, yhangmoq lé taí kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htugbang nau é myit nhaú toq byi bê nghut ri.

³ Nghut kôlhang, shí hkyô má nungmoq eq séng luí ngamoq gumrong é gi, hká đông le dangsôm a dut byuq sháng gaq, ngò taí bê eq rajung za nungmoq rì rì wó hen to râ matú, ngò gi, gumang wui lé nhang kat é nghut lhê.

⁴ Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu râ a nghut, ngamoq le, nungmoq lé lûm yhang lum pyâm é yanmai, hoq bo hpu râ nghut lhê.

⁵ Haú mù luí, nungmoq danggidiq byi to bê nghut é, chyunghuq lé rago wó lajâng pân to râ matú, gumang wui lé wum taí tsuq mù, nungmoq lé hí, lé kum nhâng râ gi, ra yhang râ lhê nghû ngò wó myit ri. Haú hkûn sheq, a nau é đông byi é a nghut é za, byi nau é chyunghuq đông hen tô é dut râ nghut lhê.

Agùn Agó Byi É Hkyô

⁶ Shau za sân hkyó sù gi, shau za shû yù râ nghut mù, agùn agó sân hkyó sù gi, agùn agó shû yù râ nghut lhê gâ é dang lé, myitbûn nyi keq.

⁷ Yuq hkanmó gi, a kâm byi é eq byi nhang é đông a nghut é za, yhumsing myit má byi nau é myhó lé myit hpyit yù mù byi é đông dut râ lhê. Hkâsu mù gâ le, Garai Gasang gi, gabú myit eq byi sù lé chyitdap ri.

⁸ Haú mù, ahkýing hkanmó jung hkanmó má, nungmoq râ é banshoq wó mù, ge é muzó hkanmó lé nungmoq je myo wó kut kó sháng gaq ga, Garai Gasang gi, jeju lhungháng lé, nungmoq lé wó byi é sù nghut lhê.

⁹ Haú gi,

"Yhang gi, a ha bûn é za myung bang lé yhâng é chyunghuq tsing gâm byi bê nghut ri; Yhâng é dingmán hkyô gi, ahtum abyuq gíng nyi ri."[☆]

ga kê to eq rajung za nghut ri.

¹⁰ Kyô hkyó sù lé kyôshi, zoshuq matú muk byi é Sù gi, nungmoq lé kyôshi byi mù, lhoq myô jat byi râ eq, nungmoq é dingmán hkyô é ashi lé myô lò nhâng râ nghut lhê.

¹¹ Nungmoq gi, ayoq abun hkanmó má agùn agó byi é bang wó dut kó râ matú, hkyô hkanmó má sùt wó é bang dut é hui kó râ nghut lhê. Nungmoq agùn agó byi é

hkyô lé, ngamoq lhai byi mù, Garai Gasang lé jeju hkyâ-ôn é hkyô dut râ nghut lâ.

¹² Nungmoq dojaú é hkyô shî gi, Garai Gasang é byu pé râ é hkyô lé lajang byí é za a nghut, Garai Gasang lé jeju bûn é dang byíng mui nyí nhang é le nghut lâ.

¹³ Dojaú hkyô hau é yanmai, nungmoq lhumzui hkyô saksé tân shit bekô nghut mù, byu pé gi, Hkrisduq é gabú danglù lé nungmoq yín yû lui jino gyo kô é yanmai le, yhangmoq eq yuq hkanmó lé, nungmoq é a ha bûn é myit mai shuí gam chûng kô é yanmai le, Garai Gasang lé hkyâ-on kó râ nghut lâ.

¹⁴ Hau htoq agó, Garai Gasang gi, nungmoq lé jeju lai shoq byí tô é yanmai nungmoq é matú yhangmoq kyûdung byí é u má, yhangmoq é myit nhikhum gi, nungmoq chyáng htoq jé râ nghut lâ.

¹⁵ A ung htoq taí é Garai Gasang é chyunghuq é yanmai, jeju hkyâ-on hkyô gi, Yhâng chyáng ru nghut nyí sháng gaq ô!

10

Poluq, Yhâng É Hpungmú Lé Tai Hung É Hkyô

¹ Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wàm dut ri ga kô é sù, ngò Poluq gi, Hkrisduq é nûm é hkyô eq núnhâm é hkyô dông mai, nungmoq lé pying kat lâ.

² Shî mingkân é nyí yap a-tsang dông ngamoq asak dui ri ga myit ngam é byù ra-am lé, ngò a gyuq a wam é myit lé shit râ dô tô lâ. Ngò jé lé é hkûn, nungmoq lé hau sù é myit a shit ra sháng gaq, ngò nungmoq lé dúng tóngbán kat lâ.

³ Hkâsu mù gâ le, ngamoq gi, mingkan shî má asak dui nyí kôlhang mingkan byu pé kut é dông majan zân é a nghut.

⁴ Ngamoq majan zân é laknak gi, mingkan shi é laknak a nghut é za, shut shai é dông dang-rháng hkyô nghut é, gingtîng é gyedap pé lé lhoq htên pyám râ matú Garaí é a-tsam byíng é laknak ru nghut lâ.

⁵ Ngamoq gi, dang-rháng rhâng lhûm é hkyô pé eq Garai Gasang lé sê é hkyô lé shut shaí shoq yhumsing gùng yhumsing lhoq myhang mhaú é hkyô hkanmó lé lhoq htên pyám mù, Hkrisduq é jino gyo râ matú, myit sôn é hkyô hkat hkanmó lé shúm kut yu é nghut lâ.

⁶ Nungmoq é jino gyo hkyô gi, gumjup é hkûn, jino a gyô é hkyô hkanmó lé ngamoq dam byi râ rì rì dut râ nghut lâ.

⁷ Nungmoq gi, ahtoq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lâ ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bûn sê nyí sháng gaq.

⁸ Hkâsu mù gâ le, nungmoq lé lêng hkyó râ nó gi, nungmoq lé kô myhâng nhâng râ matú, ngamoq lé haú Yhumsîng byî é ahko ahkáng lé gyai gumrong le lhang, ngò gi, hoq hpû é huí râ a nghut.

⁹ Ngò gi, ngá é laiká pê èq nungmoq lé kyuq é su a dut nhâng nau é nghut lhê.

¹⁰ Hkâsu mù gâ le, ra-am gi, "Yhâng é laiká pé gi, gàng bo é eq wum-o bo é nghut ri; nghut kôlhang, yhânggùng gi, byuwup a bo é nghut mù, yhang taí é dang pé gi, haí a nghut." ga taí akô.

¹¹ Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyî é hkûn, ngamoq zui saí râ nghut é hkyô lé, haú sù é bang sê gyo râ dut lhê.

¹² Ngamoq gi, haú yhumsing gùng yhumsîng owaq é bâng é hpúng má bo lom é hkyô nghut nghut, yhangmoq eq whuî é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chin lhum wú é eq yhangmoq gùng yhangmoq whuî lhum wú kô é hkûn, hpaqchyî a bo é bang dut bekô nghut ri.

¹³ Nghut kôlhang, ngamoq gi, âng é mai lai shoq gumrông râ a nghut é za, ngamoq lé Garai Gasang masat to byî é, nungmoq chyáng lhang hkyit jé shoq nghut é maukyo hkaú má za gumrông râ nghut lhê.

¹⁴ Ngamoq gi, nungmoq

chyáng a jé lé wú é đông mai, gyai yhang gumrong nyî râ a nghut; hkâsu mù gâ le, ngamoq gi, Hkrisduq é gabú danglù chúng mù, nungmoq chyáng lhang lé jé bê nghut lhê.

¹⁵ Dum, ngamoq gi, góbang kut é muzó lé le, âng é mai lai luí gumrong hai é a nghut. Ngamoq myoqbyu é hkyô gi, nungmoq é lumjîng myit kô myhang jat nyî jáng sheq, nungmoq chyáng ngamoq zui saí é jowò gyai wó lhoq lâm râ nghut lhê.

¹⁶ Haú gi, nungmoq é mau lhang lai shoq, gabú danglù lé ngamoq wó hko kyo râ matú nghut lhê. Hkâsu mù gâ le, ngamoq gi, góyuq èq zui saí to bê loqzó eq séng luí, gumrông nau é a nghut.

¹⁷ Nghut kôlhang, "Gumrong é sù gi, haú Yhumsîng má gumrông sháng gaq."☆ ga kâ tô ri.

¹⁸ Hkâsu mù gâ le, yhumsing gùng yhumsîng owaq é sù gi, hap yù huí é a nghut é za, haú Yhumsing èq owaq byî é sù sheq, hap yù huí é ru nghut lhê.

11

Lago Apyoq Pé Eq Poluq

¹ Ngò gi, ngá é ratsuí ngok é dang lé, nungmoq jân pyám byî râ lé myoqbyu é nghut lhê; gè gè yhang, nungmoq gi, haú su kut nyî gù nghut bekô.

² Haí mù gâ le, ngò gi, Garai Gasang mai nungmoq lé magum é myit èq, nungmoq é matú magûm byî lhê.

Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghû, Hkrisduq nghut é yhumsíng hpô chyáng za nungmoq lé byi zo râ nghû, danggidiq byí to bê nghut lhê.

³ Nghut kôlhang, Ewaq gi, lhangmuì hpaqchyí dâ é èq mhaú zô é huì é su, nungmoq myit é hkyô pé gi, Hkrisduq chyáng nungmoq é lhumzui é eq sansêng é i-myit ap nóng é hkyô mai shuí nghoq ló byuq é huì râ lé, ngò myit chiq ri.

⁴ Hkâsu mù gâ le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é đông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haú lé lui lui za lhom hap yu é dut bekô nghut ri.

⁵ Nghut kôlhang, ngò gi, "Ahkyak-lagyô pé" ga bâng é htoq má ratsuí lhang gyamgyi gyó sù a nghut nghû myit ngam é nghut lhê.

⁶ Ngò gi, dang tái hpaqchyí kung sù rayuq a nghut kôlhang, sumsé hpaqchyí bò sù nghut lhê. Ngamoq gi, hkyô hkangmó má, nungmoq lé haú hkyô hkyâng shoq sé nhâng bê nghut lhê.

⁷ Ngò, nungmoq lé, Garai Gasâng é gabú danglù lé ah-pau a yu é za hko kyô é đông, nungmoq lé waq toq râ matú, ngá gùng ngò lhoq nyhum é

gi, ngá é mara dut byuq bê lú?

⁸ Ngò, nungmoq lé dojaú râ matú, gotû noqkuq hpúng pé mai htuqbâng é lé hap yu é gi, haú bâng chyáng mai ngò zik lú yu é đông dut bê nghut lhê.

⁹ Ngò gi, nungmoq eq rahá nyì mù, rajung jung râ é hkûn, ó yuq lé le wòlai a dut nhang é nghut lhê; hkâsu mù gâ le, Makedoni mau mai lé jé é gumang wui gi, ngò haí râ é lé htuqbâng byi kô é yanmai nghut lhê. Hká đông nghut kôlhang, ngò gi, ngá gùng lé, nungmoq é matú wòlai a dut nhâng shoq kut bê nghut mù, xoq lui le haú đông kut nyí râ nghut lhê.

¹⁰ Haú Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mã é bang ó yuq lhang, ngò haú su gumrong é hkyô lé wó hkûm zing râ a nghut.

¹¹ Haí mù lú? Ngò, nungmoq lé a chyitdap é yanmai nghut lhê lú? Ngò, nungmoq lé chyitdap é hkyô lé, Garai Gasang sê lhê.

¹² Ngò gi, yhangmoq zui saí é lé gumrong é hkyô pé má ngamoq eq rawuí za són byi râ ahko ahkáng ô nau é bang lé ahkáng a byi râ matú, ngò kut nyi é su xoq lui kut shi râ nghut lhê.

¹³ Hkâsu mù gâ le, haú sù é bang gi, lagyo apyoq pé, mhaú zô é mù zui bang, Hkrisduq é lagyô pé đông kut mhaú é bang nghut akô.

¹⁴ Haú gi, maú ra hkyô a joq, hkâsu mù gâ le, Tsadán

lhang gi, maubó é maumang lagyo rayuq đông kut mhaû é sù nghut lê.

¹⁵ Haû mù, Tsadán é dui-nhâng zoshâng wui gi, dingmán hkyo é dui-nhâng zoshâng wui đông kut mhaû é nghut jáng, maú dân râ hkyô a joq é nghut lê. Yhangmoq é ló htâng má gi, yhangmoq kut é eq rajung za hui zo kó râ nghut lê.

Yhâng É Wuĩhke Jamjau Hkyô Eq Séng Luĩ, Poluq Gumrong É Hkyô

¹⁶ Ngò puq taí kôlé, ó yuq le, ngo lé byù gò đông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrông sháng gaq, byù gò lé nungmoq hap yu é su, ngo lé hap yù kó laq.

¹⁷ Ngò, haû su gumrong é hkyô gi, haû Yhumsing o é đông ngò taí nyi é a nghut, byù gò rayuq đông taí nyi é ru nghut lê.

¹⁸ Byù myo myo gi, mingkân é hkyô đông gumrong nyi bum lê nghut mù, ngò le gumrông râ nghut lê.

¹⁹ Nungmoq gi, hpaqchyĩ lûm bo kô é nghut mù, byù go pé lé gabú myit èq jân nyi akô nhung!

²⁰ Gè gè yhang, nungmoq gi, nungmoq lé jùn kut é sù lé le, nungmoq lé rhoi zô é sù lé le, nungmoq chyáng akyû hô zô yu é sù lé le, yhang gûng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri.

²¹ Ngamoq gi, nungmoq lé haû hkyô kut râ má wum gyai nyhôm lê nghu yín yû râ lé, ngò, hoq ri!

Rayuq yuq, haî lé wám gumrong é nghut jáng, ngò le, haû lé wám gumrong lê nghu, byù gò rayuq đông ngò taí nyi é nghut lê.

²² Yhangmoq gi, Hebre byu pé nghut akô lúhú? Ngò le nghut lê. Yhangmoq gi, Israelaq byu pé nghut akô lúhú? Ngò le nghut lê. Yhangmoq gi, Abraham é awut ashín pé nghut akô lúhú? Ngò le nghut lê.

²³ Yhangmoq gi, Hkrisduq é dui-nhâng zoshâng wui nghut akô lúhú? (Ngò gi, myit a gyíng é sù đông haû su taí é nghut lê.) Ngò gi, je nghut lê. Ngò gi, mù zui je shikut bê, htóng anum num je lúng wú bê, je riyhang bat é huĩ wú bê, shĩ râ î é adàm dàm huĩ wú bê nghut lê.

²⁴ Ngò gi, Yudaq byu pé nuichum èq bat é myi xê dàm byíng râ radàm ra ra dut é, ngo lêng hui zô wú é nghut lê.

²⁵ Ngò gi, dumbáng èq nhuq huĩ é sum dàm, shĩ sháng gaq ga luqgok èq dú huĩ é radàm, wui-sanghpo byoq huĩ é sum dàm, wuimau má myû byôm é ra-nyĩ ra-myìn hui zô wú bê nghut lê.

²⁶ Ngò gi, xoq xoq hkyowuĩ htoq e ló é hkûn, wui gû é gyuq chiq jung, damyaq huĩ é gyuq chiq jung, ngá é amyû wui chyáng mã é gyuq chiq jung, tûngbaù pê chyáng mã é gyuq chiq jung, myuq

12

hkaû pé mâ é gyuq chiq jung, yoso pé mâ é gyuq chiq jung, wuimau mâ é gyuq chiq jung eq gumang apyoq pê chyáng mâ é gyuq chiq jung pé hui zô wú bê nghut lhê.

27 Ngò gi, mù lé zuí ngu zuí hkyik mù, anum num a myang yhup shoq dut wú bê nghut lhê. Ngò gi, zòmut wui shit huí é eq zoshuq a wó é anum num huí lai lò wú bê nghut lhê. Ngò gi, gyoq hpû é eq gùngchîn dut é huí wú bê nghut lhê.

28 Haú pé lhunglhang htoq má, noqkuq hpûng pé ban-shoq é matú ngò myit chiq byí é hkyô gi, nyí wui ngò má wôlai dut nyi ri.

29 Rayuq yuq wum nyhóm le, ngò le wum a nyhóm râ lhú? Rayuq yuq mara shuí kut shut é hui le, ngò myit a nyé râ lhú?

30 Ngò gumrông râ dut é nghut le gi, ngò wum nyhóm é hkyô lé tún shit é pé lé gumrông râ nghut lhê.

31 Ngò a mhaû nyi é hkyô lé pyat dedu hkya-on huí é sù, haú Yhumsing Yesuq é Íwa eq Garai Gasang sê lhê.

32 Damaskuq myuq má, Hkohkâm Areta é a-ô mâ é mauzau gi, ngo lé chyup râ matú, myuq lé zúng nhang é nghut lhê.

33 Nghut kôlhang, ngò gi, manghkoq má lúng mù, myuq xêwâm mâ é hkohot dong mai lhoq hkyô kat é hui lui, yhang é loq mai wó lut é nghut lhê.

Poluq É Myoqwup Shing-rán Pé

1 Ngò gi, rú gumrông nyi râ za nghut lhê. Akyû wó râ a nghut kôlhang, haú Yhumsing chyáng mai lo é myoqwup shing-rán pé eq hpông shit é shing-rán pé lé gumrông râ nghut lhê.

2 Ngò gi, lai lò bê raxe myi zân hkûn, mauhkûng sum tsáng nghu é má shuí toq yu huí é, Hkrisduq mâ é byù rayuq* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê.

3 Yhang hparadisú má shuí toq yu huí é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê.

4 Yhang gi, byu pé tai kyô htoq râ ahkang a wó é hkyô pé nghut é, a wó tai sân kyô é hkyô pé lé wó gyô ri.

5 Ngò gi, haú yuq sù é byu é hkyô eq séng lui gumrông râ nghut lhê; nghut kôlhang, ngò gi, ngá é wum nyhóm hkyô eq séng lui, gumrông é mai lai lui, ngá gûng ngò gumrông râ a nghut.

6 Ngò gi, gumrông hkyô lé hkyin yù râ dut é nghut jáng lhang, byù gò dut râ a nghut, hai mù gâ le, ngò gi, tengmán hkyô tai nyi râ nghut lhê. Nghut kôlhang, ó yuq le, ngò kut é eq ngò tai é mai myit

* 12:2 Hkrisduq mâ é byù rayuq gâ é gi, Poluq yhanggùng yhang lé tai nyi é nghut lhê.

lum to kô é htoq má, ngo lé, je a myit lo ko sháng gaq nghû, ngò a gumrông kut pyâm nyi lhê.

⁷ Haû laklai dik é đông ngo lé hpông shit é shing-rán mó pé é yanmai, ngò a nghutbun byuq sháng gaq ga, ngo lé gunjang râ matú, Tsadán é lagyo nghut é zu lé, ngá é gungsho má kat byi to bê nghut ri.

⁸ Haû lé ngá chyáng mai yu pyám byi râ matú, ngò, Yhumsing lé sum dâm dưng tôngbán wú bê nghut lhê.

⁹ Nghut kôlhang, Yhang gi, "Ngá é jeju gi, náng é matú luqđun é nghut lhê; hkâsu mù gâ le, Ngá é a-tsam gi, wum nyhôm é hkyô má lhoq gumjup é hui ri." ga luî, ngo lé tai ri. Haû mù luî, Hkrisduq é a-tsam gi, ngò má wó joq nyi sháng gaq nghû, ngò gi, ngá é wum nyhôm é hkyô pé eq séng luî, gabú myit mai je riyhang gumrông râ nghut lhê.

¹⁰ Haû nghut mù luî, ngò gi, Hkrisduq é yanmai, wum nyhôm é hkyô pé má le, rhoi huí é hkyô pé má le, wuihke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik dik nyi lhê. Hkâsu mù gâ le, ngò wum nyhôm é hkûn sheq, ngò wúm bo é nghut lhê.

Poluq Chiq Byi É Hkyô

¹¹ Ngò gi, ngá gûng ngò byù gò lhoq kut yû bê nghut ri, nghut kôlhang, haû gi, nungmoq kut nhang é nghut lhê.

Ngò gi, nungmoq eq owaq é hui ang sù nghut lhê; hkâsu mù gâ le, ngò gi, haî a nghut kôlhang, "Ahkyak lagyo pé" ga bâng é htoq má ratsuí lhang gyamgyi gyó sù a nghut.

¹² Lagyo rayuq é masat kumlhá nghut é, kumlhá pé, mauhpo muzó pé eq laklai kumlhá pé lé, ngò gi, gyai yhang hkam jan mù nungmoq chyáng kut bê nghut lhê.

¹³ Ngò gi, nungmoq é matú, hkâ-nhám le wôlai a dut é nhing, nungmoq gi, hkâsu mù, gotû noqkuq hpûng pé htoq má gyamgyi gyó nyi akô lú? Ngò, haû hkyô má shut é nghut jáng, mara hkyut pyám byi kó laq!

¹⁴ Ahkuî, ngò gi, nungmoq lé, sum lhang nghû râ dâm, lé kum râ rì rì nghut bê mù, nungmoq é matú wôlai gi, a dut râ nghut lhê. Haî mù gâ le, ngò gi, nungmoq é sutzê lé ô nau é a nghut, nungmoq lé sheq ru nghut lhê. Hká đông nghut kôle, zo wui gi, mó wui é matú sutzê hkong to byi râ dut é a nghut, mó wui sheq, zô wui é matú hkong to byi râ dut é nghut lhê.

¹⁵ Haû mù luî, ngò gi, gyai yhang gabú é myit mai, ngò wó é jung hkangmó lé nungmoq é matú chung jai râ nghut mù, ngá gûng lé lhang chûng jai râ nghut lhê. Ngò, nungmoq lé myô chyitdap é yanmai, nungmoq gi, ngo lé shaû chyitdap kó râ lú?

¹⁶ Ngò gi, nungmoq chyáng wôlai a dut é hkyô têng

lê. Nghut kôlhang, ngò gi, hpaqchyî haq da sũ dut mù, mhaũ lhiq é dông nungmoq lé chyup yũ sũ dut byuq bê ga nungmoq ra-am myit akô myhi-nhung!

¹⁷ Ngò gi, nungmoq chyáng nhang kat byî é byù dông, nungmoq chyáng amyat kut zô yũ bê nghut lê lú?

¹⁸ Ngò gi, Tituq lé nungmoq chyáng lé râ matú wum taĩ tsuq mù, ngamoq é gumang lé, yhang eq rahá nhang kat bê nghut lê. Tituq gi, nungmoq chyáng amyat kut zô é nghut lê lú? Nga-nhiq gi, rajung zâ é myit dông chyat kut mù, rajung zâ é hkyô lé chyat châng é su nhik nghut lê, a nghut kó lú?

¹⁹ Ngamoq gi, nungmoq hí má ngamoq gũng ngamoq taĩ hung yu nyi ri nghũ, ahkuĩ jé shoq myit nyi akô lú? Ngamoq gi, Hkrisduq mâ é byu pé dông, Garai Gasâng hí má taĩ nyi é nghut lê. Chyitdap é gumang wui ê, ngamoq kut é jung hkanmó gi, nungmoq é akyu matú chyat nghut lê.

²⁰ Hkâsu mù gâ le, ngo lé jé é hkũn, ngò, nungmoq lé dut nhâng nau é su, nungmoq a wó dut kó râ eq, nungmoq, ngo lé dut nhâng nau é su, ngò a wó dut râ lé, ngò myit gyuq ri. Ngò gi, mabyoq jishũm htoq é, manon é, nhik-ũn buq é, byù hpũng gam é, gansang é, lumu é, gyai nghutbũn é eq atau ahũ dut é hkyô pé joq râ lé gyuq ri.

²¹ Ngò dum lé jé é hkũn, ngá

é Garai Gasang gi, nungmoq é hí má ngo lé myit nyhũm nhâng mù, yhangmoq ô nau é myit châng é má shut é dông nyi zô lhum nau é i-myt, gungsho zũm yap é yubak mara eq a sãn-yũng é hkyô kut shut é mai myit a lhiq bang myo myô é yanmai, yón kuq é hui zo râ lé, ngò myit chiq ri.

13

Ló Htáng Má Sidiq Byî É Dang Pé

¹ Ahkuĩ, ngò, nungmoq chyáng lé kum râ gi, sum lhiq nghũ râ dãm nghut lê. Haũ gi, "Mara hun é hkyô hkanmó lé, í yuq sum yuq saksé hkâm é eq lhoq teng ra râ nghut lê."* ga kâ tô é eq rajung za nghut lê.

² Ngò gi, í lhiq nghũ râ dãm nungmoq eq rahá nyi é hkũn, nungmoq lé sidiq byi gũ bê nghut lê. Ahkuĩ le, nungmoq eq wê gâng tô é u lé, dum taĩ kôlé, ngò dum jé lé é hkũn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo râ nghut lê.

³ Haũ gi, ngò dông mai Hkrisduq dang taĩ nyi é hkyô saksé shit râ lé, nungmoq dũng nyi kômũ nghut lê. Yhang gi, nungmoq é hkyô lé hkâsu kut shui-ũ é hkyô má wum nyhôm é a nghut, nungmoq chyáng a-tsam mó shit sũ sheq ru nghut ri.

⁴ Hkâsu mù gâ le, Yhang gi, wum nyhôm é má jén sat é hui bê nghut kôlhang, Garai

Gasâng é a-tsâm êq dui nyi é gi, hkyak têng lâ. Haû eq rajung za, ngamoq gi, Yhang su wum nyhóm kôlhang, nungmoq lé dojaú râ matú, Garai Gasâng é a-tsâm êq, Yhang eq rahá dui nyi râ nghut lâ.

⁵ Nungmoq gi, lumjúng hkyô má nghut nyi lâ luq, yhumsing gùng yhumsing nyi wú keq. Yhumsing gùng yhumsing chyam wú keq. Nungmoq gi, chyam é má sùm byuq é za a nghut jáng, nungmoq chyáng Hkrisduq Yesuq lúng nyi bê hkyô lé sé kó râ nghut lâ.

⁶ Ngamoq gi, chyam é má a sùm é hkyô lé, nungmoq wó sé kó râ nghut lâ nghú, ngò hkyak lum tô lâ.

⁷ Ahkuí, ngamoq gi, nungmoq shut é hkyô haí a kut kó râ matú, Garai Gasâng chyáng kyûdung byi lâ. Haû gi, ngamoq chyâm hui luí wó lut é hkyô lé byu pé myàng kó râ matú a nghut é za, ngamoq sùm é su dut kôlhang, nungmoq ge é hkyô kut kó râ lé myàng râ matú nghut lâ.

⁸ Hkâsu mù gâ le, ngamoq gi, haû tengmán hkyô eq shaí é dông haí le a ge kut é za, tengmán hkyo é matú za kut râ dut é nghut lâ.

⁹ Ngamoq wum nyhóm kôlhang, nungmoq wúm bo é hkûn, ngamoq gabú é nghut lâ; ngamoq kyûdung é gi, nungmoq gumjup râ matú nghut lâ.

¹⁰ Ngò gi, wê gâng tô é hkûn, haû hkyô pé lé haí mù kê é gâ le, ngò jé lé é hkûn, ahkáng

ayá lé ngò chung é má htân htân a kut râ matú nghut lâ. Ahkáng ayá haû gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haû Yhumsing ngo lé byi é sheq ru nghut lâ.

Ló Htâng É Shi-kyám Dang

¹¹ Ló htáng má ngò tái nau é gi, gumang wui ê, nguingón yuqyo nyi keq. Gumjup hkyô shut sô nyi keq, ngò dúng tôngbán é dang lé gyo keq, myit rahkat za dut nyi keq, nguingón shoq asak dui nyi keq. Haû hkûn, chyitdap hkyô eq nguingón hkyo é Garai Gasang gi, nungmoq eq rahá nyi nyi râ nghut lâ.

¹² Chyoiyúng é bopuq puq é êq, rayuq eq rayuq shi-kyâm lhum keq.

¹³ Sân-yúng bang banshoq gi, nungmoq lé shi-kyâm kat akô.

¹⁴ Haû Yhumsing Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é zùm yap hkyô gi, nungmoq banshoq bâng chyáng ru joq nyi sháng gaq ô.

GALATIQ

Mau Bâng Chyáng Hun Kat é Laiká (Galatians)

1 Byu pê chyáng mai le a nghut, ó yuq eq nhang é le a nghut e za, haû Yesuq Hkrisduq lé shí bê mai dum lhoq dui toq yu é sù Íwa Garai Gasang eq Yesuq Hkrisduq chyáng mai nhang kat é lagyo rayuq nghut sù, ngò Poluq gi,

² ngò eq rahá nyi é gumang wui banshoq bang le mù, Galatiq mau mâ é no-
qkuq hpûng pê chyáng dang kyô kat lhê.

³ Nga-nhûng é Íwa Garai Gasang eq Yhumsîng Yesuq Hkrisduq chyáng mâ é, jeju eq nguîngón hkyô gi, nungmoq chyáng ru joq nyi sháng gaq ô.

⁴ Haû Hkrisduq gi, nga-nhûng é Íwa Garai Gasang ô nau é eq rajung za, agè ashop é ipyat shí mai, nga-nhûng lé xe yù râ ga, nga-nhûng é yubak marâ é matú yhânggùng lé Yhang byi pyám bê nghut ri.

⁵ Haû hpungwup shingkang gi, Garai Gasâng chyáng pyat dedu ahtum abyuq ru joq nyi sháng gaq ô. Amen.

Gotû Gabú Danglù A Joq É Hkyô

⁶ Ngò gi, haû Hkrisduq é jeju mai nungmoq lé jì yù Sù lé, nungmoq haû-í han kâng pyám tò kôluí, shaí é gabú

danglù shut lhing ló nyi kô é hkyô lé, gyai yhang maú nyi ri.

⁷ Danglù haû gi, gabú danglù ratsuí lháng a nghut. Byù ra-am mai nungmoq lé lhoq shuk byi luí, haû Hkrisduq é gabú danglù lé, shikut luí lhoq shai nhang pyám nyi kô é hkyô za nghut lhê.

⁸ Nghut kôlháng, nungmoq lé ngamoq hkô kyo bê gabú danglù mai lai luí, ngamoq nghut nghut, mauhkûng htoq mâ é maumang lagyo rayuq nghut nghut, shaí é gabú danglù, nungmoq lé hko kyô é nghut jáng, haû yuq gi, ahtum abyuq dam byi é hui zo sháng gaq ô!

⁹ Ngamoq taí wú bê eq rajung za, ahkuí le, ngò dum taí kôlé: rayuq yuq mai, nungmoq hap yu to bê é gabú danglù mai lai luí, gotû hko nyi e nghut jáng, haû yuq gi, ahtum abyuq dam byi é hui zo sháng gaq ô!

¹⁰ Haû su nghu taí é gi, ahkuí, ngò, byù é hí má myoqdong wó râ matú shikut nyi é nghut lhê lú? Haû a nghut jáng, Garai Gasâng é hí má myoqdong wó râ matú shikut nyi é nghut lhê lú? Byù lé gabú nhâng râ matú, ngò shikut nyi é nghut lhê lú? Ngò gi, byu pé lé za ru gabú nhâng nau nyi é nghut le gi, Hkrisduq é dui-nhâng zoshâng dut râ a nghut.

Poluq Lé, Garai Gasang Ji Yu É Hkyô

¹¹ Gumang wui ê, ngò hko kyô é gabú danglù haû gi, byu

èq kut htoq é hkyô a nghut é lé, ngò, nungmoq lé sé nhâng nau ri.

¹² Ngò gi, haû lé, byu chyáng mai wó yu é le a nghut, góyuq èq mhoq byî é le a nghut e za, Yesuq Hkrisduq èq shing-rán byî é dông wó hap yu é ru nghut lhê.

¹³ Ngò, Yudaq noqkuq htông má nghut nyi ashî hkûn, Garai Gasâng é noqkuq hpúng lé ladu lai shoq hkâsu kut zing-ri luî, haû lé lhoq htên shikut wún é, ngá é hí hpyang lhê é asak duì hkyô lé, nungmoq wó gyô wú bekô râ nghut lhê.

¹⁴ Ngò gi, ngò eq ra-kyam zâ é Yudaq byu pé myo myô é htoq má, Yudaq noqkuq htông lé je cháng sù nghut é htoq agó, ngá é íchyí íwa pê é htôngli lé ladu lai shoq myit zing zuq sù nghut lhê.

¹⁵ Nghut kôlhang, ngá nû é unghkaû mai yang hkyin to luî, Yang é jeju yanmai ngo lé ji yu é Garai Gasang gi,

¹⁶ haû Yang Zô é hkyô gabú danglù lé, ngò mai tûngbaù pê chyáng hko kyo sháng gaq ga, Yang Zo lé ngá chyáng htoq shit nhâng râ matú myit hpyit yu é hkûn, ngò gi, ó yuq eq le a hpyê yù,

¹⁷ Yerusalem wà mó má doq ló luî, ngá hí má lagyo kut é bang lé le a ló huì e za, radá dâm Arabiq mau shut ê luî, Damaskuq myuq má dum taù ló bê nghut lhê.

¹⁸ Sum zân laî é htông má, ngò gi, Yerusalem wà mó má

doq ló mù, Petruq* lé ló hui luî, yang eq raxe ngo nyi, ló nyi nyi é nghut lhê.

¹⁹ Haû má, Yhumsing é yanggu Yakuq mai lai luî, lagyo góbang lé ngò a myàng nghut ri.

²⁰ Nungmoq lé ngò ká byî kat é má, mhaû é hkyô a bò nghû luî, Garai Gasâng hí má, hkyak, ngò taì lhê.

²¹ Hau htông má, ngò gi, Suriq mau eq Kiliki mau má é jé é nghut lhê.

²² Haù hkûn, haù Hkrisduq má nghut é, Yuda mau má é noqkuq hpúng byû wui gi, ngo lé myoqno a shú kó nghut ri.

²³ Yangmoq gi, "Hí hkûn, nga-nhúng lé zing-ri sù gi, yang mai lhoq hten râ matú radàm shikut wú é lumjúng hkyô haû lé, ahkuí hko nyi ri." gâ é hkyanglù lé wó gyô wú kôluì za,

²⁴ ngá é yanmai, Garai Gasang lé hkya-ôn bum akò nghut ri.

2

Poluq Lé Lagyô Pé Lhom Hap Yu É Hkyô

¹ Raxe myi zân laî é htông má, ngò gi, Barnaba eq rahá Yerusalem wà mó má dum doq ló é hkûn, Tituq lé le shuí chung é nghut lhê.

² Garai Gasang byî é shing-rán eq rajung za doq ló luî, ngò kut wú bê muzó eq ahkuí kut é muzó pé akôm a dut pyám sháng gaq nghû, tûngbaù pê chyáng ngò hko

* 1:18 Petruq lé Kehpa le gâ lhê.

kyô nyi é gabú danglù lé, haû suwún dut bâng é hí má za shap kyô é nghut lhê.

³ Nghut kôlhang, ngò eq rahá nghut é Tituq gi, Grik byù nghut kôle, yhang lé ahpyo-kuq a hpyit nhâng kó nghut ri.

⁴ Haû hkaû wang lo é mhaû é gumang wui gi, Hkrisduq Yesuq má ngamoq wó é luthkyô má jowú luí, ngan húng lé jùn dut nhâng râ dâ kô é yanmai, haú hkyô gabyông htoq lo é nghut ri.*

⁵ Nghut kôlhang, haû gabú danglù é tengmán hkyô gi, nungmoq chyáng joq gîng nyi sháng gaq nghú, razup za lháng, yhangmoq é dang lé ngamoq gyo byí é a nghut.

⁶ Ahkyak é byù su dut é bang gi, yhangmoq hái jung kut kôlhang, ngò eq a séng nghut ri; Garai Gasang gi, du lé wú mù jéyáng é sù a nghut; byù haú bang gi, ngá é mungdang má haí le a jat kat e za,

⁷ Petruq gi, Yudaq byu pé[†] lé, haû gabú danglù hko kyo râ mù má lum tô é hui bê eq rajung za, ngò gi, tûngbaù pé[‡] lé, haû gabú danglù hko kyo râ mù má lum tô é hui bê hkyô lé za, yhangmoq myang akô nghut ri.

⁸ Hkâsu mù gâ le, Yudaq byu pê é matú Petruq lé lagyo ayá dáng byí é sù Garai Gasang gi, tûngbaù pê matú ngo lé le lagyo ayá dáng byi bê nghut lhê.

⁹ Haû hkungmó-zîng su ahkyak é, Yakuq, Petruq eq Yohan pé gi, ngo lé byi tô é jeju lé myang sé kôjáng, ngò eq Barnaba lé, zùm yap hkyô gâ é loqyo loq eq shi-kyâm yù kôluí, yhangmoq gi, Yudaq byu pê shut, ngá-nhik lé gi, tûngbaù pê shut ê râ lhê ga, myit hui bekô nghut ri.

¹⁰ Yhangmoq gi, ngá-nhik mai myùng bang lé ru bûn nyi râ matú za pying kat akô; haû gi, ngò gyai yhang kut nau nyi é hkyô nghut lhê.

Petruq Lé Poluq Htuq Htîng É Hkyô

¹¹ Antioku wà mó má Petruq jé lé é hkûn, yhang lé mara hûn râ hkyô joq é yanmai, ngò gi, byu hí má yhang, yhang lé lhom htuq htîng é nghut lhê.

¹² Hkâsu mù gâ le, Yakuq chyáng mai lé é bang a jé shí é u lé, yhang gi, tûngbaù pé eq rahá chôm zo chôm shuq lhaq kut ri. Nghut kôlhang, haú bang jé é hkûn, yhang gi, ahpyo-kuq hpyit râ lhê gâ é hpúng má lom é bang lé gyuq é yanmai, tûngbaù pê chyáng mai htoq gang luí, yhang baù nyi tô ri.

¹³ Yhang, gegùn labyoq kut é hkyô má, gotú Yudaq byu pé le bo châng kut akô nghut mù luí, Barnaba lháng yhangmoq kut é gegùn labyoq hkyô má bo châng ngoq ló bê nghut ri.

* 2:4 Yudaq byu pé ra-am gi, hpúng asik wang é bang lé Yudaq htûng tarâ cháng nhâng nau akô nghut ri. † 2:7 Grik má ahpyo-kuq hpyit hkam é bang ga bo tô ri.

‡ 2:7 Grik má ahpyo-kuq hpyit a hkam é bang ga bo tô ri.

14 Haû gabú danglu é tengmán hkyô eq rajung za, yhangmoq a cháng kô é lé myàng jáng, ngò gi, yhangmoq banshoq bâng é hí má, Petruq lé, "Nàng gi, Yudaq byù nghut to mù luí, Yudaq byù rayuq đông a nyi e za, tûngbaù rayuq đông nyi luí nhîng, tûngbaù pé lé Yudaq byu pé é htûngli hkâsu kut wó cháng nhâng râ lúhú?

15 Ngamoq gi, yubak dap bang gâ é tûngbaù pé a nghut e za, hkû é buinyi mai yhang, Yudaq byù nghut gû bê nghut lhê.

16 Byù gi, jep é tarâ lé cháng luí mara hkyut san byi huí é a nghut e za, Yesuq Hkrisduq lé lumjîng é yanmai sheq mara hkyut san byi huí é hkyô lé, ngamoq sê lhê. Haû mù luí, ngamoq gi, jep é tarâ lé cháng luí a nghut e za, Yesuq Hkrisduq lé lumjîng é yanmai, mara hkyut sân pyám byí é hui sháng gaq nghû, Yesuq Hkrisduq lé lumjîng bê nghut lhê; hkâsu mù gâ le, ó yuq le, jep é tarâ lé châng é yanmai, mara hkyut san byí é hui râ a nghut.

17 Ngamoq gi, Hkrisduq má ngamoq é mara hkyut san byí é hui râ hkyô ho nyi é hkûn, yubak dap é bang ngamoq nghut é lé myàng é nghut jáng, mara lé gi, Hkrisduq mai kut nhang é nghut lhê lúhú? Ratsuí le a nghut.

18 Ngò gi, ngò hpyoq pyám bê hkyô lé dum sai kut é nghut jáng, tarâ lu lai é byù ngò nghut é lé tûn shit ri.

19 Ngò gi, jep é tarâ eq sêng é má, jep é tarâ é yanmai shî jáng sheq, Garai Gasâng é matú wó dui nyi râ nghut lhê.

20 Ngò gi, Hkrisduq eq rahá jén sat é hui bê nghut mù luí, ngá gûng ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuí, ngò gungsho má asak dui nyi é gi, ngo lé chyitdap luí, ngá é matú yhanggûng lé Yhang byí pyâm é, haû Garai Gasâng é Yhangzo lé lumjîng é yanmai ru nghut lhê.

21 Ngò gi, Garai Gasâng é jeju lé tô pyâm é a nghut, hkâsu mù gâ le, dingmán é hkyô lé, jep é tarâ đông wó yu é ru nghut le gi, Hkrisduq shî hkâm é gi, akôm dut byuq râ nghut lhê." nghû taí é nghut lhê.

3

Lumjîng Myit Lúhú? Jep É Tarâ Lúhú?

1 Galatiq mau mâ é byùbâm pé ê! Yesuq Hkrisduq gi, tapzîng má jén sat hui bê hkyô lé, nungmoq é myoq má bò nhang to bê le nhîng, ó yuq èq wá nungmoq lé lêng nghoq yú bekô lúhú?

2 Nungmoq gi, haû Woi-nyí lé, jep é tarâ cháng luí wó yú kô é nghut lhê lúhú? A nghut jáng, nungmoq wó gyô yu é gabú danglù lé lumjîng luí wó yú kô é nghut lhê lúhú? Haû rahkat lé za, ngò sê yú nau ri.

3 Nungmoq gi, haû-í yhang bâm akô lúhú? Haû Woi-nyí lé lumhkaù mù kut hí kôluí

nhîng, ahkuî, gungsho wum-
o lé lumhkaû mù, yhumsîng
myit tô é hkyô lé lhoq pán râ
matú shikut nyi akô lúh?

4 Nungmoq, myo myo
hpuzô pyâm é gi, akôm nghut
akô lúh? Gè gè yhang, haú gi,
akôm nghut byuq bekô lúh?

5 Garai Gasang, nungmoq
lé Yhâng é Woi-nyí byí é htoq
agó, nungmoq chyáng laklaí
kumlhá kut é gi, jep é tarâ
lé nungmoq châng é yanmai
nghut akô lúh? A nghut jáng,
nungmoq wó gyô é gabú dan-
glù lé, nungmoq lumjîng é
yanmai nghut akô lúh?

6 "Abraham gi, Garai
Gasang lé lumjîng luí, yhang
lé dingmán sù ga sôn yu é huí
bê nghut ri."* ga, Abraham
eq séng luí taí tô é lé myit wú
keq.

7 Haú mù luí, lumjîng myit
bo é bang gi, Abraham é
yhangzô pé* yhang dut bê
nghut é hkyô lé sé keq.

8 Lumjîng myit é yanmai,
tûngbaù pé lé Garai Gasang
mara hkyut san byi râ nghut
lhê ga, Chyúmdang mai hí
byu-myang to bê nghut mù
luí, Abraham lé hí shit kyô
tô é gabú danglù gi, "Nang
é yanmai, byuhú chângjup
gi, shimân jeju wó yú kó râ
nghut lhê."* gâ ri.

9 Haú mù luí, lumjîng myit
bo é bang gi, lumjîng myit bo
é Abraham eq rahá, shimân
jeju lé myang hkam yù kó râ
nghut lhê.

10 Jep é tarâ châng é hkyô
má ngè hkau é lhunglhang
bang gi, nhîng pyâm é huí
bang chyat nghut lhê. Hkâsu
mù gâ le, "Tarâ laiká má kê tô
é lhunglhang lé a xoq kut é sù,
ó yuq nghut kôle, nhîng pyâm
é huí kó râ nghut lhê."* ga luí,
kâ tô ri.

11 Haú htoq agó, "Haú
dingmán sù gi, lumjîng myit
mai asak duí râ nghut lhê."*
ga kê tô é yanmai, ó yuq
nghut kôle, Garai Gasang é
hí má jep é tarâ lé châng luí,
mara hkyut san byí é a huí
é hkyô gi, san za nghut bê
nghut ri.

12 Haú jep é tarâ gi, lumjîng
myit eq haí a sêng é nghut luí,
"Haú pé dông châng é sù gi,
haú pé mai asak duí râ nghut
lhê."* ga kê tô ri.

13 Haú Chyúmdang má, "Sik
zîng má jén lhang to huí é sù ó
yuq nghut kôle, nhîng pyâm é
huí sù nghut ri."* ga kê tô é eq
rajung za, Hkrisduq gi, nga-
nhung é matú nhîng pyâm é
huí sù dut bê nghut é yanmai,
jep é tarâ mâ é nhîng é hkyô
mai nga-nhung lé hkyi yù bê
nghut ri.

14 Haú Abraham lé byí tô
é shimân jeju gi, Hkrisduq
Yesuq é yanmai tûngbaù pé
chyáng le jé sháng gaq ga,
Yhang nga-nhung lé hkyi yu é
nghut ri; haú mù, nga-nhung
gi, danggidiq byí tô é Woi-nyí
haú lé, lumjîng myit mai wó
yú râ nghut lhê.

* 3:6 Apûn 15:6 * 3:7 Abraham é yhangzô pé gâ é gi, Garai Gasang é yhangzô pé
lé gâ é nghut lhê. * 3:8 Apûn 12:3 * 3:10 Tarâ Pun 27:26 * 3:11 Hbk 2:4
* 3:12 Nhong 18:5 * 3:13 Tarâ Pun 21:23

Jep E Tarâ Eq Danggidiq

¹⁵ Gumang wui ê, nyí wui é asak ùi hkyô mâ é lé dangtú yù mù, ngò nungmoq lé taí kôlé, byù mai chô m tô tô é dangshikaq lé, ó yuq èq le wó lhoq hpyoq pyám râ a nghut, ó yuq èq le haú má wó jat kat râ a nghut.

¹⁶ Abraham eq yhâng é awut ashín lé byi tô é danggidiq le haú eq rajung za nghut ri. "Awut ashín pé lé" gâ é dang gi, byù myo myo lé gâ lhê; nghut kôlhang, haú Chyúmdang má, haú lé taí nau é a nghut e za, "náng é awut ashín lé" ga taí nau é ru nghut lhê, haú é lichyúm gi, byù rayuq lé za taí é nghut lhê, haú gi, Hkrisduq nghut ri;

¹⁷ haú mù luí, ngò taí nau é gi, Garai Gasang, dangshikaq tô tô é htâng, myí sho sum xê zàn má lé joq é tarâ gi, dangshikaq haú lé le wó lhoq hpyoq pyám râ a nghut, danggidiq lé le wó lhoq htên pyám râ a nghut.

¹⁸ Hkâsu mù gâ le, haú silí wunlí gi, jep é tarâ eq séng lhúm é nghut jáng, danggidiq eq gi, haí le a sêng lhum lo nghut ri; nghut kôlhang, Garai Gasang gi, Yhâng é jeju yanmai, Abraham lé danggidiq dông silí wunlí haú byí to bê nghut ri.

¹⁹ Haú su nghut jáng, haú jep é tarâ gi, hai akyû bò râ lhú? Haú gi, danggidiq dông lhoq âng tô é Awut ashín nghut é sù jé lé é hkûn jé shoq,

mara kut shut nyi bùm kô é yanmai, jat kat tô é nghut lhê; jep é tarâ haú gi, maumang lagyô pé mai gyoro sô xoq byi sù[†] é loq dông byi tô é ru nghut lhê.

²⁰ Gyoro sô xoq byi sù gi, rahkyam shut má é bang eq baú sêng é a nghut, nghut kôlhang, Garai Gasang gi, rayuq za nghut lhê.

²¹ Haú mù luí, jep é tarâ gi, Garai Gasâng é danggidiq pé eq htuq htîng lhúm lhê lhú? Ratsuí le a nghut. Hkâsu mù gâ le, ùi é asak wó byi é jep é tarâ lé byi to bê nghut le gi, gè gè yhang, dingmán hkyô gi, jep é tarâ mai lò râ nghut lhê.

²² Nghut kôlhang, mingkan gón má é bang gi, yubak marâ é htongbyu pé chyat nghut akô ga Chyúmdang má bo tô ri; haú mù luí, haú byí to bê danggidiq lé gi, Yesuq Hkrisduq lé lumjîng é bang lé byi râ nghut lhê.

²³ Lumjîng hkyô haú a jé shimá, nga-nhúng gi, haú jep é tara èq htongbyu dông lhúng tô é hui luí, lumjîng hkyô haú htoq shit é hkûn jé shoq myhí lhúng tô é hui wú bê nghut lhê.

²⁴ Haú mù luí, nga-nhúng gi, lumjîng é yanmai mara hkyut san byí é hui sháng gaq ga, jep é tarâ gi, nga-nhúng lé Hkrisduq chyáng shuí ê râ matú, nga-nhúng é hkyô-u shê sù dut bê nghut ri.

²⁵ Ahkuí kúm gi, haú lumjîng hkyô jé bê nghut é yanmai, nga-nhúng gi, haú

* 3:16 Apûn 12:7; 13:15; 24:7 † 3:19 Gyoro so xoq byi sù gi, Mosheq nghut ri.

jep é tarâ mai hkyô-u shê é loq hkaû má a nghut lo.

Garai Gasâng É Yhangzô Pé

²⁶ Nungmoq lhunglhâng bang gi, Hkrisduq Yesuq lé lumjîng é yanmai, Garai Gasâng é yhangzô pé nghut bê;

²⁷ Hkrisduq má wui-myhup hkâm bê é bang nungmoq banshoq gi, Hkrisduq lé mebu su wut to bekô nghut ri.

²⁸ Nungmoq lhunglhâng bang gi, Hkrisduq Yesuq má rading ralhûm za nghut é yanmai, Yudaq byù nghû é eq Grik nghu é, jùn nghu é eq luthkyô nghu é, yuqgê nghu é eq myiwe nghu é, a gam hkoq lo nghut ri.

²⁹ Nungmoq gi, Hkrisduq eq séng bekô nghut jâng, Abraham é awut ashîn pé le, haû danggidîq eq rajung za silí wunlí hkam yù bang le, nghut akô nghut ri.

4

¹ Ngò taí nau é lichyúm gi, haû amyû hkûng xoq dut râ sù gi, ikun sutzè banshoq lé sîng ang sù nghut kôlhâng, yhang, zoshâng nghut ashî hkûn gi, jùn hpó eq haî a shaî nghut ri.

² Yhang gi, yhâng wa masat tô é ahkyíng jé shoq, yhang lé zúng é sù eq yhûm lé up su é a-ô má ru lúng nyi ashî nghut ri.

³ Haû eq rajung za, nga-nhúng le zoshâng* nghut é

hkûn gi, mingkan uphkâng tarâ ô má jùn dut nyi é bang nghut lhê.

⁴ Nghut kôlhâng, ahkyíng lo ngap jâng, zo dut râ ahkáng lé byíng shoq, nga-nhúng wó yû sháng gaq ga, Garai Gasang gi, jep é tarâ hkaû mâ é byu pé lé hkyi yù râ matú,

⁵ jep é tarâ hkaû má, myiwe mai hku kat nhang é Yhang Zo lé, nhang kat byi bê nghut ri.

⁶ Hkâsu mù gâ le, nungmoq le, zo wuí nghut bê yanmai, "Aba, Âwa ê." ga dat wut é, Yhang Zô é Woi-nyí lé, Garai Gasang gi, nga-nhúng é i-myt unghkaû má kat byi bê nghut ri.

⁷ Haû mù luí, nàng gi, jùn a nghut lô e za, zo rayuq nghut bê nghut ri; nàng gi, zo rayuq nghut é yanmai, Garai Gasang gi, nang lé Yhâng é amyû hkûng xoq dut nhâng bê nghut ri.

Galatiq Mau Bang Lé Poluq Myit Chiq Byî É Hkyô

⁸ Hí hkûn, Garai Gasang lé nungmoq a sé shî é u lé, nungmoq gi, nat hparà lháng a nghut bâng é a-ô má jùn dut é bang nghut ri.

⁹ Ahkuí kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut le nhîng, nungmoq gi, hkâsu mù, haû wum nyhôm é eq akyû a byî é, mingkan uphkang é tarâ shut dum lhîng taû ló nyi akô lhú?

* **4:3** Bun zo shî má, zoshâng gâ é lichyúm gi, Yesuq lé a lumjîng shî é bang lé gâ lhê.

Nungmoq gi, haú pê êq jùn zô é dum huí zó nau akô lúhú?

¹⁰ Nungmoq gi, buinyì wú, lhohkyap wú, ahkyíng yam-yoq wú, zanwut wú é hkyô pé lé, ahkyak kut nyi ashí kó nhung!

¹¹ Nungmoq chyáng ngò wum kat pyám é hkyô gi, akôm dut bê abe nghû, nungmoq é matú ngò myit chiq nyi ri.

¹² Gumang wuì ê, ngò gi, nungmoq su dut bê nghut é yanmai, nungmoq le ngò su dut keq† nghû, nungmoq lé dúng tóngbán kat lhê. Nungmoq gi, ngo lé haí le a kut shut wú kô é nghut lhê.

¹³ Sâng-hí dàm ngò nungmoq lé gabú danglù hko kyo é hkyô gi, nungmoq sê é eq rajung za, ngò nòhpyo huí é yanmai nghut lhê.

¹⁴ Ngá é nòhpyo gi, nungmoq é matú wuìhke hkyô dut kôlhang, nungmoq gi, ngo lé a wú tiq pyám kô é htoq agó, a wú chaq pyám kó e za, Garai Gasâng é maumang rayuq lé su le, Hkrisduq Yesuq lé su yhang le, ngo lé lhom hap yù kô é nghut lhê.

¹⁵ Haú sù é nhîng, nungmoq é gabú hkyô banshoq gi, haí dut byuq bekô lúhú? Nungmoq gi, ru wó dut é nghut jáng, nungmoq é myoqjí lé choq yù mù, ngo lé wám byí pyám kó râ í dut lai lò bê hkyô lé, ngò saksé wó hkâm lhê.

¹⁶ Ahkuí, ngò gi, nungmoq lé haú tengmán hkyô taí kyô

é yanmai, nungmoq é gyè dut to bê nghut lhê lúhú?

¹⁷ Haú byù góbang gi, nungmoq lé gyai shirong é hkyô tûn shit ri; nghut kôlhang, ge é hkyô haí a bò; yhangmoq ô nau é hkyô gi, yhangmoq lé nungmoq taú shirông kó abe ga, nungmoq lé ngamoq chyáng mai lhoq kâng yù râ matú ru nghut lhê.

¹⁸ Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám le haú su shirong le ge lhê.

¹⁹ Ngò chyitdap é zo wuì ê, Hkrisduq é a-kyang nungmoq má gumjup lo é jé shoq, ngò gi, zo hkû nò no é su radàm dum hkâm zô nyi luí,

²⁰ nungmoq é hkyô lé myit wuìhke tô é yanmai, ahkuí, nungmoq eq rahá myang nyi mù, ngò taí é danghtê wó htaí râ matú, gyai yhang myoqbyu nyi lhê ô.

Hagara eq Sarah Nhik É Hkyô

²¹ Haú jep é tarâ ô má nyi nau é bang ê, nungmoq gi, jep é tarâ má taí é hkyô lé a sê gyo kô é nghut lhê lúhú? Ngo lé taí kyô wú kó laq.

²² Hkâsu mù gâ le, Abraham gi, yuqzo í yuq wó ri; rayuq gi, jùn myhí é yhangzo, rayuq gi, jùn myhí a nghut su é yhangzo, ga kê tô ri.

²³ Haú jùn myhí é yhangzo gi, gungsho dông hku lé é sù nghut kôlhang, jùn myhí a nghut su é yhangzo kúm gi,

† 4:12 Ngò su dut keq gâ é lichyúm gi, nungmoq le ngò su jep é tarâ mai lut htoq keq gá nau é nghut lhê.

danggidiq eq rajung za hku lé é sũ ru nghut lhê.

²⁴ Haũ hkyô pé gi, dangtũ ru nghut lhê, myiwe haũ í yuq gi, dangshikaq í lhum eq wuĩ lhê; dangshikaq ralhum gi, Sinaq Bũm mã é[†] nghut luĩ, jũn dut rã nghut é zo wuĩ lé hku kat é Hagara lé taĩ nau é nghut ri.

²⁵ Hagara haũ gi, Arabiq mau mã é Sinaq Bũm lé taĩ nau é nghut luĩ, ahkui lhê é Yerusalem eq wuĩ nyi ri. Hkãsu mù gã le, Yerusalem haũ gi, yhang zô pé eq rahá, jep é tara é jũn dut nyi kô é yanmai nghut lhê.

²⁶ Nghut kôlhang, ahtoq mã é Yerusalem gi, jũn myhĩ a nghut sũ nghut luĩ, nga-nhũng é ãnu nghut ri.

²⁷ Hkãsu mù gã le,

"Zoshãng a hku é baũdung myhĩ ê, gabũ nyi aq. Zo hkũ nõ a no wũ shĩ é myiwe gi, gabũ luĩ, gabũ garũ nyi aq;

hkãsu mù gã le, haũ cham-chyuiyui dut é myiwe myhĩ gi, lãng wó é myiwê htoq mã zo wuĩ je myô wó bê nghut ri."

ga kã tô ri.*

²⁸ Gumang wuĩ ê, ahkuĩ, nungmoq gi, Isak su, danggidiq byĩ tô é zo wuĩ nghut bê nghut ri.

²⁹ Haũ hkũn lé, haũ gungsho dõng hku lé lo é sũ gi, Woinyĩ wum-o dõng hku lé lo é sũ lé zing-rĩ ri. Haũ eq rajung za, ahkuĩ le dut nyi ri.

³⁰ Nghut kôlhang, Chyũmdang mã hkãsu ga kã tô ri lhũ gã le, "Haũ jũn myhĩ eq yhangzo yuqzo lé hkat htoq pyãm aq; hkãsu mù gã le, haũ jũn myhĩ é yhangzo yuqzo gi, jũn myhĩ a nghut su é yhangzo yuqzo eq rahá, silĩ wunlĩ lé wó chõm hkam yũ rã a nghut."* gã ri.

³¹ Haũ mù luĩ, gumang wuĩ ê, nga-nhũng gi, jũn myhĩ é yhangzô pé a nghut e za, jũn myhĩ a nghut su é yhangzô pé ru nghut lhê.

5

Hkrisduq Mã É Luthkyô

¹ Nga-nhũng luthkyô wó rã matũ, Hkrisduq gi, nga-nhũng lé lhoq lhut kat bê nghut ri. Haũ mù luĩ, haũ mã ru gĩng nyi mù, yhumsing gũng lé jun é wõlai hkaũ mã hkãtaũ bainaĩ nyi kó.

² Ngã dang lé matsĩng yũ keq! Ngò Poluq, nungmoq lé taĩ kyo kôlé, nungmoq ahpyokuq hpyit hkam yũ kô é nghut jãng, Hkrisduq gi, nungmoq é matũ hai akyũ le bò kó rã a nghut.

³ Hau htoq agó, ahpyokuq hpyit hkam yu é sũ ó yuq lé nghut kôle, ahpyokuq hpyit é sũ gi, jep é tarã lhunglhang lé chãng kut rã lhê nghũ, ngò kyô kat lhê.

⁴ Jep é tarã chãng shikut é dõng mara hkyut san byĩ é hui naũ bang, nungmoq gi, Hkrisduq eq gãng lhũm to bekô nghut luĩ, haũ Garaĩ jeju

[†] 4:24 Sinaq Bũm mã é dangshikaq gi, jep é tarã eq sêng é dangshikaq nghut lhê.

* 4:27 Esai 54:1 * 4:30 Apũn 21:10

mai le byit gyó byuq bekô nghut ri.

⁵ Ngamoq kúm gi, myit myoqbyu tô é dingmán hkyô lé, haû Woi-nyí é yanmai lumjǐng myit eq gyai yang lǎng nyi é bang nghut lhê.

⁶ Hkâsu mù gâ le, Hkrisduq Yesuq má gi, ahpyo-kuq hpyit é nghut nghut, ahpyo-kuq a hpyit é nghut nghut, hai akyû a bò nghut ri; chyitdap myit mai htoq lo é lumjǐng myit za sheq, akyû bo lhê.

⁷ Nungmoq gi, rago din wú bekô* nghut é wá, haû tengmán hkyô lé a chǎng shǎng gaq ga, nungmoq lé ó yuq eq hkúm zing pyám kô é lhú?

⁸ Haû su kut mhoq hpyoq yu é hkyô gi, nungmoq lé jǐ yù Su chyáng mai htoq lo é a nghut.

⁹ "Mún ratsuí zo gi, muk long gón lé wó lhoq daû lhê."† gâ é dang joq lhê.

¹⁰ Nghut kôlhang, nungmoq gi, gotû hkyô dông a lhom yù kó râ nghut lhê nghû, Hkrisduq má hkyak ngò myit lum nyi lhê. Nungmoq lé lhoq byok byí é sù, ó yuq nghut kôle, yhumsing é mara eq rajung za dam byí é hui zo râ nghut lhê.

¹¹ Gumang wui ê, ahpyo-kuq hpyit é hkyô lé, ngò rû hko nyi ashî nghut le gi, haî mù luí, zing-rî é lé ngò hui zô nyi râ lhú? Haû su kut é nghut

járng, haû tapzǐng eq séng luí, manghkáng joq râ a nghut lo.

¹² Nungmoq lé lhoq byok nyi é bang gi, hau htoq chyân luí, yhumsing gùng yhumsing banshoq hpyit pyám kó shǎng gaq nghû, ngò wó myit ri.

¹³ Gumang wui ê, nungmoq gi, luthkyô wó râ matú jǐ yù huí é bang nghut akô; nghut kôlhang, nungmoq é luthkyô ahkáng lé, yubak gungsho má hkáchǎng nhǎng kó, chyitdap myit mai kúm gi, rayuq eq rayuq dojaú lhûm nyi keq.

¹⁴ Hkâsu mù gâ le, "Nǎng gûng lé nǎng chyitdap é su, nǎng é chyangnǎm mâ é bang lé le chyitdap aq."* gâ é hkunmó má za, jep é tarâ banshoq lo bo to bê nghut lhê.

¹⁵ Nungmoq, rayuq eq rayuq ngat lhum myui lhûm nyi kô é nghut le gi, rayuq eq rayuq lhoq htên pyâm lhum kó râ nghut é lé, sidiq nyi keq.

Woi-nyí Êq Asak Dui Râ Hkyô

¹⁶ Nghut kôlhang, ngò taí kôlé, Woi-nyí shuí ú é dông asak dui nyi keq; haú hkûn, nungmoq gi, yubak gungsho ô nau é hkyô chǎng kó râ a nghut.

¹⁷ Hkâsu mù gâ le, yubak gungsho ô nau hkyô gi, Woi-nyí eq shai lhûm nyi; Woi-nyí gi, yubak gungsho ô nau hkyô eq shai lhûm nyi, dut ri. Haû í lhum gi, gye dut lhûm ri; haû

* **5:7** Rago din wú bekô gâ é gi, woi-nyí hkyô má kô myhang lai lò bê lé taí nau é nghut lhê. † **5:9** Shut é dông mhoqshit é hkyô ratsuí gi, muk long gón lé mún eq wó lhoq daû é su, nungmoq banshoq lé wó lhoq ngoq yu pyâm lhê. ☆ **5:14** Nhung 19:18

mù, nungmoq gi, yhumsîng ô nau é dông hkâkut kó.

¹⁸ Nghut kôlhang, nungmoq lé Woi-nyí èq hkyô hî é nghut jáng, nungmoq gi, jep é tarâ ô má a nghut lo nghut ri.

¹⁹ Yubak gungsho é muzô gi, de de yhang nghut lhê; haú pé gi, ashop é dông gungsho zùm yap é hkyô, a sân-yúng é hkyô, shut é dông nyi zô lhum nau é myit,

²⁰ hparà noq hkyô, myoqheq mù kut é hkyô, a jú é hkyô, byoq lhum é hkyô, manon é hkyô, nhiksoq sup é hkyô, yhumsing wuizat é hkyô, gânq lhum sê é hkyô, hpúng gam é hkyô,

²¹ ningsû é hkyô, î shuq wut é hkyô, zo yê shuq yê mù achaq achyut kut é hkyô pé eq haú pé su kut é gotû hkyô pé nghut ri; haú su kut nyi yap é bang gi, Garai Gasâng mingdán é silí wunlí lé wó hkam yù râ a nghut nghû, ngò, hí hkûn nungmoq lé taí wú bê eq rajung za, ahkuí lé, nungmoq lé ngò sidiq byi nyi lhê.

²² Nghut kôlhang, Woi-nyí é ashi gi, chyitdap hkyô, gabú hkyô, nguínón hkyô, myit hîng hkyô, nhik-u nú é hkyô, ge é hkyô, lhumzui hkyô,

²³ nûm é hkyô, yhumsing gùng lé wó hkanq é hkyô pé nghut ri. Haú hkyô pé lé hkûm zing pyám râ tarâ haí le a joq nghut ri.

²⁴ Hkrisduq Yesuq eq séng bê bang kúm gi, yubak gungsho ô nau hkyô lé le, hau é yut yut ô nau myit eq shirong é

hkyô pé lé le, tapzîng má jén sat pyám bekô nghut ri.

²⁵ Nga-nhúng gi, Woi-nyí mai asak duì bê nghut mù, haú Woi-nyí htâng châng nyi sháng.

²⁶ Nga-nhúng gi, akôm gyáng dang taí luí, rayuq eq rayuq jeq ho lhum é eq manon lhum é bang, a dut nyi sháng gaq.

6

Lhunglhang Bang Lé, Ge É Hkyô Kut Byi Râ Hkyô

¹ Gumang wuì ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nûm é myit èq haú yuq lé lhoq pun lhoq kyîng yù keq. Nghut kôlhang, nàng gi, gunglaú é a hui sháng gaq, sidiq nyi aq.

² Rayuq eq rayuq é wòlai lé tê byi lhum nyi keq; haú dông mai, nungmoq gi, Hkrisduq é tarâ lé wó lhoq dik kó râ nghut lhê.

³ Rayuq yuq gi, yhumsing gùng haí le a nghut é wá, ahkyak su ngam é nghut jáng, haú yuq gi, yhumsing gùng lé mhaú pyám é sù nghut ri.

⁴ Yuq hkanqmó gi, yhumsîng nyi yap é hkyô lé taú myit wú keq; haú hkûn, yhumsing gùng lé góbang eq whuí nó a râ e za, yhumsing gùng má aróng wó yù râ nghut lhê.

⁵ Hkâsu mù gâ le, yuq hkanqmó gi, ó le ô wò lé wùn waq ra râ dut lhê.

⁶ Haú mungdang lé mhoq yu é sù gi, mhoqshit byi sù

lé, ge é zè banshoq gàm byi sháng gaq.

⁷ Garai Gasang lé gi, wó rhoi râ a nghut, yhumsing gùng yhumsing mhauzô é hkâhui nhâng kó; byù gi, hô kat é eq rajung za, shù yù râ nghut lhê.

⁸ Haù yhumsing é yubak gungsho lé lhoq ngón râ matú hô kat é sù gi, myit haù mai htên byoq é hkyô lé myang hkam yù râ nghut lhê; haù Woi-nyí lé lhoq ngón râ matú hô kat é sù kúm gi, Woi-nyí haù mai ahtum abyuq é asak lé myang hkam yù râ nghut lhê.

⁹ Nga-nhúng gi, ge é hkyô kut é má nú byuq é bang a dut sháng gaq, hkâsu mù gâ le, haù lé nga-nhúng a tô pyâm é nghut jáng, ahkyíng yam-yoq jé é hkûn, nga-nhúng gi, akyû myang hkam yù râ nghut lhê.

¹⁰ Haù mù luí, nga-nhúng gi, kut râ ahkyíng wó tô é u lé, byù lunglhang bang lé ge é hkyô kut byi sháng, haù lumjíng hkyô eq sêng é ikun byu pé lé, je riyhang kut byi sháng.

Ahpyo-kuq Hpyit É Hkyô A Nghut E Za, Byù Sik Hpân Huí É Hkyô

¹¹ Ngò, nungmoq lé, ngá é loq eq hkâ-í kô é laiká cham kâ kat byi é lé, wú wú keq!

¹² Ahtoq pyâm za ge é hkyô lé kut shít nau é bang gi, ahpyo-kuq hpyit kó sháng gaq ga, nungmoq lé zik shikut nyi é bang nghut akó;

yhangmoq haù su kut é hkyô gi, Hkrisduq é tapzing é yanmai zing-ri huí é hkyô lé, koi pyâm râ matú za nghut ri.

¹³ Hkâsu mù gâ le, haù ahpyo-kuq hpyit é bang lhang jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng luí wó gumrông kó sháng gaq ga, nungmoq lé ahpyo-kuq hpyit nhâng nau akô nghut ri.

¹⁴ Ngò kúm gi, nga-nhúng é Yhumsing Yesuq Hkrisduq é tapzing eq séng luí gumrông é mai lai luí, hai má le a gumrông sháng gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê nghut lhê.

¹⁵ Ahpyo-kuq hpyit é hkyô nghut nghut, a hpyit é nghut nghut, hai akyû a bò; byù sik hpân huí é hkyô za sheq, ahkyak é nghut lhê.

¹⁶ Tarâ haù lé châng é lunglhang bâng é ahtoq má le, haù Garai Gasang é Israelaq byu pé* é ahtoq má le, nguínón hkyô eq shogyo nhikmyin hkyô gi, ru joq nyí sháng gaq ô.

¹⁷ Ahkuí mai gi, ó yuq le ngo lé jamjau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhâng zoshâng nghut é saksé damhkô lé wun wún lhê.

¹⁸ Gumang wui ê, nga-nhúng é Yhumsing Yesuq Hkrisduq é jeju gi, nungmoq

* **6:16** Bun zo shí lhum mâ é *Israelaq byu pé* gâ é gi, hpúng byù wui banshoq lé tai nau é nghut lhê.

é woi-nyí eq ru joq nyî sháng
gaq. Amen.

EHPESU Pê Chyáng Hun Kat é Laiká (Ephesians)

¹ Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haû sân-yúng bâng chyáng nguingón dang shit kyô kat lhê.

² Nga-nhùng é Iwa Garai Gasang eq Yhumsing Yesuq Hkrisduq chyáng mâ é, jeju eq nguingón hkyô gi, nung-moq chyáng ru joq nyi sháng gaq ô!

*Hkrisduq Mâ É, Woi-nyí
Hkyô Shimân Jeju Pé*

³ Mauhkung htoq tsáng myhâng má, woi-nyí hkyô eq sêng é shimân jeju jung hkangmó lé, Hkrisduq má nga-nhúng lé shimân byi sù, nga-nhùng é Yhumsing Yesuq Hkrisduq é Yhângwa, Garai Gasang gi, hkungsô wó nyi sháng gaq.

⁴ Hkâsu mù gâ le, nga-nhúng gi, Garai Gasâng é hí má, chyoyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhúng lé hkyin yu to bê nghut ri.

⁵ Hau htoq agó, Yhang, nga-nhúng lé chyitdap é yanmai, Yhang myit ngui ô nau é eq

rajung za, Yesuq Hkrisduq mai yhangzô pé kut yu râ matú, hí mai nga-nhúng lé masat to bê nghut ri.

⁶ Haû mù, Yhang chyitdap é Sù* má, nga-nhúng lé lái lái byi bê nghut é, hpungwup shingkang bo é jeju chyunghuq lé, chôm hkya-on sháng.

⁷ Garai Gasâng é agùn agó é jeju yanmai, nga-nhúng mara hkyut byi é hui luí, Yhang Zô é sui đông mai, nga-nhúng gi, Yhang má hkyi yù hkyô wó yu é nghut lhê.

⁸ Jeju haû lé gi, hpaqchyí byéng-yá eq sê gyô é nyan banshoq le kut, Yhang, nga-nhúng lé agùn agó byi bê nghut lhê.

⁹ Garai Gasang gi, Yhang myit ngui é eq rajung za, Hkrisduq đông mai kut râ matú hen to bê nghut é, Yhâng é zaú tô é hkyô lé, nga-nhúng lé shit bê nghut ri.

¹⁰ Sê gyo wui é hkyô haû gi, lhoq dik râ ahkying jé jáng, mauhkung htoq eq myigùng htoq má é lhunglhang lé, Hkrisduq má rading ralhum za kut râ nghut é hkyô nghut lhê.

¹¹ Hkrisduq má sân-hi myit myoqbyu bang nghut é nga-nhúng gi, Yhâng é hpungwup shingkang lé hkya-on kungtôn sháng gaq ga,

¹² Garai Gasang gi, Yhang myit sôn tô é lhunglhang lé ban kut mù, Yhâng ô nau é

* 1:6 Yhang chyitdap é Sù gâ é gi, Yesuq lé taí nau é nghut lhê.

đông, hí mai myit hpyit do-
qdân to bê eq rajung za, nga-
nhúng lé le, Hkrisduq má
hkyin yu to bê nghut ri.

13 Hau htoq agó, nungmoq
le, nungmoq é hkyi yù hkyo
é gabú danglù gâ é tengmán
mungdang lé wó gyo kô
é hkûn, Hkrisduq eq sêng
é bang dut bekô nghut ri.
Nungmoq gi, Hkrisduq lé
lumjǐng bekô nghut é yanmai,
haû gidiq byî tô é Chyoiyúng
Woi-nyí dizik htung tap byî é
hui bekô nghut ri.

14 Garai Gasang é hpung-
wup shingkang lé hkya-on râ
matú, Yhang eq sêng é byu
pé hkyi xe yù huí é hkyǐng
jé shoq, Chyoiyúng Woi-nyí
haû gi, nga-nhúng é muizè lé
hkyak wó yù râ nghu é masat
nghut ri.

Poluq Kyûdung Byî É Hkyô

15 Haû mù luí, Yhumsǐng
Yesuq lé nungmoq lumjǐng
é hkyô eq sân-yúng bang
lunglhang lé nungmoq
chyitdap é hkyô lé, ngò wó
gyô é yanmai,

16 ngò gi, ngá é kyûdung
dang má nungmoq lé myit
bun uchang, anum yhang,
nungmoq é matú jeju hkya-
ôn nyi lhê.

17 Nga-nhúng é Yhumsǐng
Yesuq Hkrisduq é Garai
Gasang nghut é, hpungwup
shingkang bò sù haû Íwa gi,
Yhang lé nungmoq je sé râ
matú, hpaqchyí byéng-yá wó
byî é eq san za wó sé nhang
é Woi-nyí, nungmoq lé byi

sháng gaq nghû, ngò, Yhâng
chyáng dúng nyi lhê.

18 Hau htoq agó, Yhang,
nungmoq lé ji yu é myit my-
oqbyù hkyô, hkasû é nghut
é lé le, Yhâng é hpungwup
shingkang bo é muizè gi, sân-
yúng bâng chyáng agùn agó
joq nyi é hkyô lé le, Yhâng
é kô dik é a-tsam mó gi,
lumjǐng bang nga-nhúng é
matú nghut é lé le,

19 nungmoq wó sé râ matú,
nungmoq é myit myoqjí lhoq
gyeng byî é hui sháng gaq
nghû, ngò kyûdung byî nyi
lhê. A-tsam mó haû gi, Garai
Gasang, Hkrisduq lé shi é mai
lhoq dui toq yù mù,

20 mauhkúng htoq tsáng
myhâng má, Yhâng é loqyò
hkyam shut zùng nhang é
hkûn, chung é wum-o a-tsam
mó eq rajung za nghut ri.

21 Hkrisduq gi, uphkanq
é, ahkáng ayá wó é, a-tsam
bo é eq up zô é bang ban-
shoq htoq má le, ahkuí pyat
eq htang pyat má myhǐng é
myǐng lunglhang é htoq má
le, je gyaú é sù nghut lhê.

22 Hau htoq agó, Garai
Gasang gi, lunglhang lé
Yhâng é hkyiwa ô má tô to luí,
haû noqkuq hpúng é matú,
Yhang lé, jung hkanqmó é
ushuq dut râ đông masat to
bê nghut ri.

23 Noqkuq hpúng haû gi,
Hkrisduq é gungdu nghut
luí, hkyô hkanqmó má jung
hkanqmó lhoq byǐng jup é
Hkrisduq byǐng nyi é nghut
ri.

2

Hkrisduq Má Asak Dui É Hkyô

¹ Laî ló bê hkûn, nungmoq gi, tarâ lu laî é eq mara kut shut é hkyô pê é yanmai, shi tô é bang dut kô é nghut lhê.

² Haú hkûn, nungmoq gi, mingkan ngón hkyô pé má lhaq châng nyi kô é htoq agó, haú tarâ a châng bâng é myit má ahkuí mù zúi nyi é sobyô nghut é, maulat lé up sù htâng châng nyi kô é bang nghut lhê.

³ Nga-nhúng banshoq bang le, yhangmoq su kut nyi laî lo é bang chyat nghut mù, yubak mara byíng é suisho ô nau gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé dông za châng wú é bang nghut lhê. Haú mù, góbang eq rajung za, nga-nhúng gi, Garai Gasâng é nhikmo-yo hkyô eq gingdán wú é bang chyat nghut lhê.

⁴ Nghut kôlhang, shogyo nhikmyin myit gyaí bo é Garai Gasang gi, nga-nhúng, tarâ lu lai luí shi byuq bê bang dut kôlhang, Yhâng é chyitdap myit mó èq, nga-nhúng lé chyitdap luí, Hkrisduq eq rahá asak duì nhâng bê nghut ri.

⁵ Haú mù, nungmoq gi, Garaí jejú èq za hkyi yu é hui bekô nghut ri.

⁶ Garai Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung tai é Yhâng é jeju lé, htang pyat má wó shit sháng gaq ga,

⁷ nga-nhúng lé, Hkrisduq eq rahá lhoq dui toq yú mù, mauhkûng htoq tsáng myhâng má, Yhang eq rahá zùng nhang to bê nghut ri.

⁸ Hkâsu mù gâ le, nungmoq gi, lumjíng é dông mai Garaí jejú èq za hkyi yu é hui bekô nghut ri. Haú gi, nungmoq chyáng mâ é a nghut, Garaí Gasâng jeju chyunghuq za ru nghut lhê.

⁹ Haú gi, yhumsing é muzó mai wó é a nghut é yanmai, ó yuq le nghutbun râ hkyô a joq.

¹⁰ Hkâsu mù gâ le, nga-nhúng gi, Garaí Gasâng é lo-qmú pé nghut mù, nga-nhúng zui saí râ matú, hí hí mai, Garaí Gasang hen lajâng tô é ge é muzó pé lé zui saí râ matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹ Haú mù luí, nungmoq gi, hí hkûn, hku lé lo é mai yhang tungbaù pé nghut é hkyô lé le, byu loq èq za gungsho má kut é, "ahpyo-kuq hpyit hkâm bang" gâ é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq.

¹² Haú u lé, nungmoq gi, Hkrisduq eq gâng lhûm tô é bang; Israelaq mingbyû a nghut é bang; danggidiq eq sêng é dangshikaq pé má gó ming byù nghut é bang; mingkan htoq má, myoqbyû jowô a joq é eq Garaí a wó é bang nghut é lé, myitbun keq.

13 Nungmoq gi, hí hkûn wê gâng nyi é bang nghut kôhâng, ahkuî kúm, Hkrisduq é sui dông mai Hkrisduq Yesuq má shuí chyâng htep é hui bekô nghut ri.

14 Hkâsu mù gâ le, Yhânggùng yhang gi, nganhûng é ngingón hkyô nghut ri. Yhang gi, gyoro má kyo tô é madin nghut é a naù a wom hkyô lé hpyoq hpyi pyám byi luí, haù í myû* dut nyi é lé, rahú za dut nhâng bê nghut ri.

15 Haù hkunmó pé eq hkang tô é tarâ pé bo é jep é tarâ lé, Yhâng é gungsho má lhoq htûm pyám bê nghut ri. Haù mù, Yhang ô nau é hkyô gi, haù í myû dut tô é lé, Yhânggùng má yhang, byù sik ra-myû za hpan to râ matú nghut ri; haù dông, simsaq hkyô kut byi bê nghut ri.

16 Yhang gi, a naù a wôm lhûm é hkyô lé, haù tapzîng má lhoq htûm pyám byi mù, haù tapzîng dông mai, byù myu í myu é lé ragùng za kut luí, Garai Gasang eq xoq byi bê nghut ri.

17 Yhang gi, wê gâng nyi é bang† nungmoq lé le, chyâng htep nyi é bang‡ lé le, simsaq hkyo é danglù lé hko kyo bê nghut ri.

18 Hkâsu mù gâ le, nganhûng í myû gi, Yhang dông mai, Woi-nyí ralhûm zâ èq, haù íwâ chyáng wàng râ hkyô dong bê nghut ri.

19 Hau é yanmai, nungmoq gi, tûngbaù pé eq byù bíng pé a nghut lô é za, Garaí é byu pé eq rahá, mingbyû wui eq yhumbyù wui chyat nghut bekô nghut luí,

20 haù lagyô pé eq myiqh-toi pé, hi tô é apûn awang htoq má xuq tô é bang chyat nghut akô; Hkrisduq Yesuq yhang, haù mâ é ahkyak é htungchyûn luqgok dut bê nghut ri.

21 Yhang má, wahpang lhûm gón xoq lhûm bùm é nghut mù, haù Yhumsing má chyoiyúng noqkuq yhûm ralhûm dut lò bê nghut ri.

22 Woi-nyí dông mai, Garai Gasang nyi râ jang dut râ matú, nungmoq le, Yhang má, wahpang su tsuq é chôm huí nyi bùm bekô nghut ri.

3

Poluq, Tûngbaù Pê É Tarâ Hkô Sará

1 Haù su nghut mù, Hkrisduq Yesuq é hkyô lé, nungmoq tûngbaù pê chyáng hko kyô é yanmai, htongbyû dut sú, ngò Poluq gi, nungmoq é matú kyûdung byi lhê.

2 Nungmoq lé dojaú râ é matú, ngo lé byi tô é Garai Gasâng jeju ayá shi lé, nungmoq gè gè wó gyô wú bekô râ nghut lhê.

3 Haù gi, hí hkûn, ngò, tot é dông kê tô wú bê eq rajung za,

* 2:14 *I myû gâ é gi, Israelaq byu pé eq tûngbaù pé lé gâ lhê.* † 2:17 *Wê gâng nyi é bang gâ é gi, tûngbaù pé lé gâ lhê.* ‡ 2:17 *Chyâng htep nyi é bang gâ é gi, Israelaq byu pé lé gâ lhê.*

haù zaù tô é hkyô lé, shing-rán đông ngo lé sé nhang é nghut ri.

⁴ Haù hkyô lé, nungmoq ng-hap wú é hkún, Hkrisduq eq sêng é zaù tô é hkyô, ngò rago sé é lé, nungmoq wó sé kó rá nghut lhê.

⁵ Haù lé, lai lò bê ipyat pé mâ é byu pé lé a sé nhang é nghut kôlhang, ahkuí gi, Garai Gasâng é chyoiyúng é, lagyô pé eq myiqhtoí pé lé, haù Woi-nyí eq hpông shit bê nghut ri.

⁶ Zaù tô é hkyô haù gi, gabú danglù đông mai, Hkrisduq Yesuq má, Israelaq byu pé eq rahá, tûngbàu pé le, hkúng xoq bang wó dut luí, gungdu ralhúm é gungsho showui showang pé chyat dut é eq, danggidiq byi tô é lé wó chôm hkam yu é bang dut é hkyô nghut ri.

⁷ Yhâng é hpungwup a-tsam mai, ngo lé byí tô é Garai Gasâng jeju chyunghuq é yanmai, ngò gi, gabú danglù shí tai rá dui-nhâng zoshâng dut é nghut lhê.

⁸ Ngò gi, haù Garai Gasâng é byu pé mâ é tiq dik sù htoq má lhang je tiq sù nghut kôlhang, haù Hkrisduq é a ung htoq tai é wó sùt hkyô lé, tûngbàu pé chyáng hko kyo rá matú le,

⁹ haù lhunglhang lé hpan é Garai Gasang má, lai lò bê ipyat pé má zaù tô é, zaù tô é hkyô haù lé hkâsu kut tô é lé, yuq hkangmó lé tai sân kyo rá matú le, jeju shí, ngo lé byi bê nghut ri.

¹⁰ Haù gi, nga-nhúng é Yhumsîng Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za,

¹¹ haù Garai Gasâng é hpaqchyí mó góng lé, noqkuq hpúng đông mauhkúng htoq tsáng myhâng mâ é uphkâng bang eq ahkáng ayá wó bang lé, ahkuí sé nhâng rá matú nghut lhê.

¹² Nga-nhúng gi, nga-nhúng é Yhumsîng Hkrisduq Yesuq eq rading ralhum za nghut é yanmai le, Yhang lé lumjîng é yanmai le, Garai Gasang chyáng, wám é myit eq a gyuq a wàm é myit eq wó htep ê é nghut lhê.

¹³ Haù mù luí, ngò, nungmoq lé dúng tôngbán nau é gi, nungmoq é matú, ngò wuîhke jamjau hui zô é yanmai, nungmoq i-myt hkâgyui kó; haù gi, nungmoq é matú akyû bò rá hkyô nghut lhê.

Ehpesu Myuq Byu Pé Lé Kyûdung Byí É Hkyô

¹⁴ Haù pè é yanmai, ngò gi, haù Íwâ é hí má hkyihput htuq luí kyûdung é nghut lhê.

¹⁵ Mauhkúng eq myigùng htoq mâ é Yhâng é ikun byu lhunglhang gi, Yhâng chyáng mai myîng wó yu é chyat nghut lhê.

¹⁶ Nungmoq é lumjîng myit mai, nungmoq é i-myt unghkaù má Hkrisduq wó nyí nyí sháng gaq ngû,

¹⁷ Yhang é hpungwup shingkang bo é agùn agó wó sùt é mai, nungmoq é i-myt

unghkaû mâ é sù lé, Yhâng é Woi-nyí dông, hpungwup a-tsâm èq wum-o lhoq kíng byi râ matú, ngò kyûdung byi lhê. Hau htoq agó, nungmoq gi, chyitdap myit má amyit chín to luí, awang hi to mù,

¹⁸ sâ-n-yúng bang eq rahá, hau é apyí, a-tsúng, myhâng, nik, hkâ-í nghut é lé, rago wó sé kôluí,

¹⁹ Garai Gasâng é gumjup é hkyô lhunglhâng èq wó lhoq gumjup yù kó sháng gaq nghú, sê é nyan htoq má gyaú é Hkrisduq é chyitdap hkyô lé, nungmoq wó sé râ matú, ngò kyûdung byi lhê.

²⁰ Ahkuí, nga-nhúng é hkaû má mù zuí nyi é, Yhâng é wum-o a-tsâm é yanmai, nga-nhúng dông é banshoq eq myit é hkyô lhunglháng htoq je wó kut byí é Su chyáng,

²¹ haû noqkuq hpúng é yanmai le, Hkrisduq Yesuq é yanmai le, pyat pyat zái zái, ahtum abyuq, hpungwup shingkang rú bo nyi sháng gaq ô! Amen.

4

Hkrisduq É Gungdu Má Rading Ralhum Za

¹ Haû mù luí, nungmoq gi, nungmoq lé wut yù bê nghut mù, wut yu é hkyô eq gingdán é dông asak duí keq nghú, haû Yhumsing é yanmai, htóng lúng sù ngò Poluq gi, nungmoq lé lhoq pun lhoq kyíng kat lhê.

² Hkyô hkat hkangmó má i-myit lhoq nyhum é eq i-myit

nú-nhâm nyi keq; myit hing é eq chyitdap myit mai rayuq eq rayuq hkam jân lhúm nyi keq.

³ Haû Woi-nyí èq byí é myit hui hkyô lé, nguóngón hkyô dông mai châng nyi râ matú, wó dut é í shikut nyi keq.

⁴ Nungmoq gi, wut yù hui kô é hkûn, myit myoqbyù hkyô rashut za wut yù hui bekô nghut é eq rajung za, gungdu ralhum eq Woi-nyí ralhum za nghut nyi ri.

⁵ Yhumsing rayuq za, lumjing hkyô rahkat za, bapisma ralhum za nghut nyi ri.

⁶ Banshoq bâng é Íwa nghut sù Garai Gasang le, rayuq za nghut nyi ri; Yhang gi, banshoq bâng é ahtóq má nghut luí, lhunglháng dông mai mù kut é eq lhunglhâng é ahkaû má lúng nyi sù nghut ri.

⁷ Nghut kôhang, nga-nhúng yuq hkangmó gi, jeju chyunghuq lé, Hkrisduq mai ké byí é dông wó yu é nghut lhê.

⁸ Hau é yanmai,

"Yhang gi, myhang é jowò shut doq ló é hkûn, shúm zung é bang lé gi, shuî chùng mù, byu pé lé gi, chyunghuq tsing gàm byí ri."*

ga, Chyúmdang má tai tô é nghut lhê.

⁹ Haû "doq ló" gâ é lichyúm gi, myigùng é a-o tsáng má le, Yhang gyó jé bê nghut lhê, gá naú é a nghut lhi?

10 Haû gyó lé é Sû gi, junghkang jungmó lé lhoq byíng Jup râ matú, mauhkûng banshoq é ahtoq má doq ló é Sû yhang nghut lhê.

11 Yhang gi, ra-am lé, lagyô pé, ra-am lé, myiqhtoî pé, ra-am lé, gabú danglù hko kyo râ bang, ra-am lé, hpúng-up pé eq sará pé kut tsing byî to bê nghut ri.

12 Haû bang gi, Garai Gasâng é byu pé lé wùn waq âng é muzó pê é matú, hen lajâng é bang nghut ri. Haû hkûn sheq, Hkrisduq é gungdu gi,

13 haû lumjîng hkyô eq Garai Gasâng é Yhangzo lé sê é hkyô má, nga-nhúng banshoq bang rading ralhum za wó dut mù, kô ðing bang dut luí, Hkrisduq é gumjup é isâm banshoq lé wó yu é hkûn jé shoq, wó kô jat nyi râ nghut lhê.

14 Haû mù, nga-nhúng gi, wuibaù pé èq hí shut htâng shut bat myhû é su dut é eq, byu pé é agè ashop é eq haq dá é mhoq hpyoq hpaqchyî pé eq mhoqshit hkyô laidun hkangmó èq, shí shut hé shut mut tâng é su dut é lé hui zô é zoshâng wui su a nghut lô é za,

15 chyitdap myit mai tengmán é dang lé tai nyi jâng, Hkrisduq nghu é ulhum má hkyô hkangmó kô myhang lò râ nghut lhê.

16 Yhang ðông mai, gungdu gón gi, ralhum eq ralhum htuqbâng é gungsho showui showang pé lé xoq byî to bê nghut mù, gungsho showui showang haû pé gi, yhums-

ing é muzó lé zui saî nyi é nghut jâng, gungdu haû gi, chyitdap myit má, yhânggùng yhang kô lò myhang lò râ nghut lhê.

Byù Sik ðông Asak Dui Râ Hkyô

17 Haû mù luí, haû Yhumsing é ahko ahkáng mai ngò nungmoq lé tai nau é hkyô gi, haû tûngbaù pé gi, akyû a bo é lé myit mù, asak ðui kô é su, nungmoq gi, hkâkut kó.

18 Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, haî le a sé kô é yanmai, Garai Gasang byî é asak eq wê gâng byuq bekô nghut ri.

19 Yhangmoq gi, gyuq hoq hkyô a bo byuq lo kô é yanmai, myoqnoq myit ðông a sansêng é hkyô jung hkangmó lé je wó kut xoq nyi shoq ga, yhumsing gùng lé, gungsho ô nau gadaú é hkyô má ap pyám bekô nghut ri.

20 Nungmoq kúm gi, Hkrisduq é hkyô lé haû ðông mhoq yû kô é a nghut.

21 Nungmoq gi, Yesuq chyáng mã é tengmán hkyô ðông, Yhâng é hkyô lé wó gyô wú é eq mhoq yu wú bekô nghut lhê.

22 Haû mù, nungmoq gi, hí hpyang lhê é nungmoq é nyi yap sâmlai nghut é, ô nau gadaú luí, yhumsing gùng yhumsîng mhaû pyâm é ðông htên byoq ló nyi é nungmoq é byù xau lé tô pyám râ matú mhoq yû bê eq rajung za,

²³ nungmoq é i-myt lé asik htaî pyám nhâng keq;

²⁴ hau htoq agó, nungmoq gi, tengmán é eq sêng é dingmán hkyô eq chyoyúng hkyô má, Garai Gasang eq dù shoq hpan to hui bê nghut é byù sik lé, yu wut to keq.

²⁵ Haû mù, nga-nhúng ban-shoq bang gi, gungdu ralhum é gungsho showui showang pé chyat nghut é yanmai, nungmoq yuq hkangmó gi, mhaû é hkyô lé tô pyám luí, yhumsing é chyangnâm mâ é sù lé, tengmán é dang taí ra râ nghut lhê.

²⁶ "Nungmoq nhikjum yô é hkûn, mara hkâkut kó."* nungmoq gi, buì wàng shoq nhikjum hkâyô nyì kó.

²⁷ Nat Tsadán lé le, jowò hkâbyi kó.

²⁸ Hkau sù gi, a dum hkau lo sháng gaq; râ nyi é bang lé, rajung jung wó gâm byi shoq, yhumsing é loq èq akyû bo é hkyô pé lé kut nyì luí, muzó zuí shikut ra râ nghut lhê.

²⁹ Nungmoq é nhut mai agè agaú é dang hai le hkâhtoq nhâng kó; wó gyô é bang akyû bò shoq, yhangmoq râ tô é má cháng luí, haú bang kô lam lò râ dang za taí keq.

³⁰ Haû hkyi yù râ buinyi é matú, dizik đông nungmoq lé tap to byì é Garai Gasâng é Chyoyúng Woi-nyì lé hkâlhoq yón kó.

³¹ Haû myit tot é, nhikjum yô é, nhik-yô é, byoq lhum byoq cheq é eq lumù gansang é, agè agaú é hkyô pé ban-

shoq lé, nungmoq tô pyám keq.

³² Nungmoq gi, rayuq eq rayuq, ge é hkyô eq shogyo nhikmyin é hkyô tân shit lhum luí, Garai Gasang gi, Hkrisduq má, nungmoq lé mara hkyut byì é su, nungmoq yhangchang le mara hkyut byì lhùm nyì keq.

5

¹ Haû mù, nungmoq gi, chyitdap dik é zoshâng wui nghut é yanmai, Garai Gasang lé alik yu é bang kut keq.

² Hkrisduq gi, Yhânggùng lé namngón jung hkungga eq shigu hkungga đông, nga-nhúng é matú Garai Gasâng chyáng Yhânggùng yhang ap byì pyám shoq, nga-nhúng lé chyitdap é su, nungmoq le chyitdap myit èq asak dui nyì keq.

³ Hau htoq agó, ashop é đông gungsho zùm yap é hkyô, a sansêng é hkyô hkangmó eq myoqnoq é hkyô pé lé, nungmoq taí lhang hkâtaí kó; hkâsu mù gâ le, nungmoq gi, Garai Gasâng é chyoyúng byu pé nghut lhê.

⁴ Haû eq rajung za, a taí gíng é, ahoq ahì dang, dangsôm eq hkunchoq đông gyâ é dang pé lé a taí é za, jeju hkya-on dang za taí nyì keq.

⁵ Hkâsu mù gâ le, ashop é đông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù ó yuq nghut kôlhang, Hkrisduq eq Garai

Gasâng é mingdán má muizè a wó é hkyô lé, nungmoq sê nyi keq.

6 Ó yuq nghut kôle, dangsôm* dông mai nungmoq lé a wó mhaú kó sháng gaq; hkâsu mù gâ le, haú hkyô pê é yanmai, Garai Gasâng é nhikmo-yo hkyô gi, haú jìno a gyo bâng é ahtoq má jé râ nghut lhê.

7 Haú mù luí, haú bâng chyáng hkâbo wang lòm kó.

8 Hkâsu mù gâ le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haú Yhumsîng má maubó pé nghut bekô nghut ri.

9 Haú Yhumsîng ô nau é hkyô haí nghut é lé ho htoq yû mù, maubó é yhangzô pé dông asak dui keq.

10 Hkâsu mù gâ le, haú maubó é ashí gi, ge é hkyô banshoq, dingmán é hkyô eq tengmán hkyô chyat nghut ri.

11 Haú ashí a zuí é mauchut tuq muzó má a bo wang lom é za, yhangmoq é mara lé tân shít keq.

12 Hkâsu mù gâ le, haú jìno a gyo bang haq zaú kut é hkyô lé gi, taí htoq le lháng hoq hpo nghut ri.

13 Nghut kôlhang, junghkang jungmó lé, haú maubó eq tân shít jáng gi, wó byu-myang é chyat dut râ nghut lhê.

14 Hkâsu mù gâ le, junghkang jungmó lé byu-myang nhang é gi, maubó nghut ri. Hau é yanmai,

"Yhup ngón nyi sù ê, toq aq, haú shí é mai dui toq aq hkoi; haú jáng, Hkrisduq gi, nang lé duqbó byi râ nghut lhê."[†]

ga luí taí tô é nghut lhê.

15 Haú mù luí, nungmoq hkâsu kut asak dui é hkyô má gyai sidiq nyi keq; hpaqchyí a bò bang su a nghut é za, hpaqchyí bò bang su kut nyi keq.

16 Buinyi ahkyíng shí pé gi, agè ashop é yanmai, wó é ahko ahkáng banshoq lé ge dik é dông chung jài keq.

17 Hau é yanmai, byù ngok pé a dut é za, haú Yhumsîng ô nau é hkyô gi, haí nghut é lé, sê gyô yu nyi keq.

18 Haú achay achyut é yubak hkyô lhoq htoq é í lé hkâshuq wut kó; Woi-nyí lé kúm byíng nhang nyi keq.

19 Nungmoq gi, hkya-on kungtôn dang dông le, hkya-on mahkôn dang dông le, woi-nyí eq sêng é mahkôn dông le, rayuq eq rayuq dáng nyo lhum luí, nungmoq é i-myit unghkaú mai, haú Yhumsîng lé mahkôn hkôn mù, lhoq ngón nyi keq.

20 Nga-nhông é Yhumsîng Yesuq Hkrisduq é myìng lé lang luí, jung hkgamó é matú, haú Íwa Garai Gasang lé, hkâ-nhám le jeju hkya-ôn nyi keq.

21 Hkrisduq lé hkungga hpautap é myit eq, rayuq eq rayuq hpautap lhúm nyi keq.

* 5:6 Dangsôm gâ é gi, Garai Gasâng é nhikmo-yo hkyô a jé râ ga taí é dang nghut lhê. † 5:14 Dang ngho shí gi, hí lhê é noqkuq hpông pé taí gyó lo é dang nghut lhê.

Myi Eq Làng

22 Ikun myhî pé ê, haû Yhumsîng uphkanġ é dōng chāng é su, nungmoq é ikun hpô pé uphkanġ é dōng chāng nyi keq.

23 Hkâsu mù gâ le, Hkrisduq gi, haû noqkuq hpûng é ulhum nghut é su, haû ikun hpô gi, ikun myhî é ulhum nghut nyi ri; Hkrisduq gi, haû Yhâng gungdu nghut é noqkuq hpûng lé hkyi yù Sû nghut ri.

24 Haû noqkuq hpûng gi, Hkrisduq uphkanġ é dōng chāng é su, ikun myhî pé le, hkyô hkat hkanġmó má, yhangmoq é ikun hpô pé uphkanġ é dōng chāng nyi râ lê.

25 Ikun hpô pé ê, Hkrisduq gi, haû noqkuq hpûng lé chyitdap luî, hau é matú Yhânggùng lé Yhang ap pyâm é su, nungmoq é ikun myhî pé lé chyitdap nyi keq.

26 Yhang haû su kut é gi, haû noqkuq hpûng lé, mungdang dōng wui má chí pyám luî, lhoq sân-yúng yû râ eq,

27 haû noqkuq hpûng gi, agè agau é eq a-ká akōng é hkyô haî le a bo é za, mara hûn râ hkyô a bo é eq chyoiyúng é, hpungwup shingkanġ bo é noqkuq hpûng dōng, Yhânggùng lé wô ap byi râ matú nghut lê.

28 Haû eq rajung za, ikun hpô pé gi, yhangmoq é ikun myhî pé lé, yhumsing gungdu lé su chyitdap râ dut lê. Yhumsing é ikun myhî lé chy-

itdap é sù gi, yhumsing gùng lé le, chyitdap é sù nghut bê.

29 Ó yuq le, yhumsing gùng lé a chyitdap a kut é za, Hkrisduq gi, haû noqkuq hpûng lé kut byi nyi é su, yhumsing gùng lé byi tso byi huq luî, rago wú zúng nyi é nghut lê.

30 Hkâsu mù gâ le, nganhung gi, Yhâng é gungdu é gungsho showui showang pé chyat nghut lê.

31 Haû mù, "Hau é yanmai, yuqgè gi, înu îwa eq gang luî, yhangmyi eq zùm-yap mù, yhangnhik í yuq gi, gungsho ralhum za dut kó râ nghut lê."[☆] gâ tô ri.

32 Haû hkyô gi, gyai yhang zaú tô é hkyô nghut ri. Nghut kôhlang, ngò gi, haû Hkrisduq é hkyô eq noqkuq hpûng é hkyô lé taî nyi é nghut lê.

33 Haû mù, nungmoq yuq hkanġmó gi, yhumsing gùng lé chyitdap é su, yhumsing é ikun myhî lé le chyitdap râ dut lê; haû ikun myhî le, yhâng é ikun hpô lé hkungga râ dut lê.

6*Zo Wuî Eq Mó Wui É Hkyô*

1 Zoshâng wui ê, haû Yhumsîng má, nungmoq é mó wui é jino gyo keq; hkâsu mù gâ le, haû gi, kut gíng é hkyô nghut ri.

2 "Náng é înu îwa lé hkungga aq.

3 Haû jáng, nàng, nyi ngón yuqyò mù, myidàm htoq má náng é asak chyungxe hing nyi râ nghut lê."[☆] gâ é dang

gi, danggidiq lom é sâng-hî lhum hkunmó nghut ri.

⁴ Íwa pé ê, nungmoq é zo wuî lé nhikjum a lhoq yô é za, haû Yhumsing é mhoq kyo hkyô eq mhoqshit lhoq pun hkyô đông yhangmoq lé baú kô nyi keq.

Jùn Pé Eq Junsing Pé É Hkyô

⁵ Jùn pé ê, nungmoq gi, Hkrisduq é jìno gyô é su, gyuq hkunggâ é eq lhumzuî é myit mai, nungmoq é myidàm htoq mâ é junsing pé é jìno gyo keq.

⁶ Nungmoq gi, yhangmoq é hí má za, myoqdong ho é đông kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myit unghkaû mai châng kut nyi keq.

⁷ Byù lé za dojaú é đông a nghut é za, haû Yhumsing lé dojaú nyi é đông le, shirông myit eq dojaú nyi keq.

⁸ Hkâsu mù gâ le, jùn nghut nghut, luthkyô wó sù nghut nghut, ge é hkyô kut nyi é nghut jáng, haû Yhumsing gi, yuq hkangmó lé shigyaú râ nghut é lé, nungmoq sê nyi lhê.

⁹ Junsing pé ê, nungmoq le, nungmoq é jùn pé lé haû eq rajung za kut byî nyi keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsing hpó gi, mauhkung htoq má nyi é nghut luí, Yhang gi, myoqdong hkyin é hkyô a bo é sù nghut lhê.

Garai Gasâng É Gyè Hking

¹⁰ Ló htâng má, taí nau é hkyô gi, haû Yhumsing eq Yhâng é hpungwup a-tsam mó má wum-o bo nyi keq.

¹¹ Haû nat Tsadán wá dâ é hpaqchyî pé lé, nungmoq wó he-ngik pyám kó sháng gaq, haû Garai Gasâng é gyè hking banshoq lé wut to keq.

¹² Hkâsu mù gâ le, nganhúng gi, gungsho eq sui lé htuq htíng é bang a nghut é za, haû uphkang bang, ahkáng ayá wó bang, mauchut tuq dut é mingkan shi é a-tsam pé eq mauhkung htoq tsáng myhâng mâ é agè ashop é byò eq sêng é wum-o pé lé, htuq htíng é bang ru nghut lhê.

¹³ Haû mù luí, Garai Gasâng é gyè hking banshoq lé wut to keq; haû hkûn sheq, nungmoq gi, agè ashop hkyô jé é buinyi má, yhumsing jowò má wó yap gíng to mù, hkyô hkat hkangmó lé ban kut jáng, wó yap gíng tít nyi kó râ nghut lhê.

¹⁴ Haû mù, nungmoq é hpyidum má tengmán hkyô hpyihit hit mù, dingmán hkyô wànggò-long lé gò luí,

¹⁵ nungmoq é hkyî má gi, haû simsaq hkyô byî é gabú danglù hkô râ rì rì kut to mù, gíng gíng yap nyi keq.

¹⁶ Hau htoq agó, haû agè ashop su é myiduq é myoshi lunglhang lé wó sat ung pyám râ matú, lumjít hkyô nghu é golong lé chung to keq.

¹⁷ Hkyi yù hkyô shamtoq

muq lé tsûng to luî, Garai Gasâng é mungdang nghut é, haû Woi-nyî é shâm lé wun chûng keq.

¹⁸ Ahkyíng hkangmó má, kyûdung dang eq dũng tôngbán é dang ajung jũng eq, haû Woi-nyî má kyûdung nyî luî, machya nyî uchyang, sân-yúng bang banshoq é matú, hkâ-nhám le, xoq xoq kyûdung byî nyî keq.

¹⁹ Haû gabú danglu é yanmai, shamtoq-tui hut huî é lagyo rayuq ngò nghut nyî kôlhang, haû gabú danglù nghut é zaú tô é hkyô lé, a gyuq a wàm wó taî kyo luî,

²⁰ ngò taî râ dut é lé, a gyuq a wàm wó taî sân kyo shoq, ngá nhut hpóng hkangmó, ngò taî râ mungdang pé lé byi sháng gaq, ngá é matú le, kyû bo dung byî nyî keq.

Shi-kyám Dang

²¹ Haû Yhumsíng má, chyitdap é gumang eq lhumzuî é dui-nhâng zoshâng nghut sù, Tuhkiku gi, nungmoq lé jung hkangmó taî kyo râ nghut luî, ngò hkâsu nghut nyi é hkyô eq haî kut nyi é hkyô lé, nungmoq wó sé kó râ nghut lhê.

²² Ngamoq hkâsu nghut nyi é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luî, yhang lé, ngò, nungmoq chyáng nhang kat é nghut lhê.

²³ Íwa Garai Gasang eq Yhumsíng Yesuq Hkrisduq chyáng mâ é lumjíng hkyô má bo é chyitdap myit eq nguínón hkyô gi, haû

gumang wui chyáng ru joq nyî sháng gaq ô!

²⁴ A dat htũm é chyitdap myit mai, nga-nhũng é Yhumsíng Yesuq Hkrisduq lé chyitdap é lhunglhâng bang chyáng, Garaî jeju gi, ru joq nyî sháng gaq ô!

HPILIFI Pê Chyang Hun Kat é Laiká (Philippians)

¹ Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sên-yúng bang lunglhang eq, hpúng-up, hpungte pé lé, dang kyô kat lhê.

² Nga-nhung é Îwa Garai Gasang eq Yhumsing Yesuq Hkrisduq chyang mâ é jeju eq ngingón hkyô gi, nungmoq chyang ru joq nyi shang gaq ô.

Jeju Hkya-ôn É Hkyô

³ Ngò gi, nungmoq lé myit bûn kat hkangmó, ngá é Garai Gasang lé jeju hkya-ôn nyi lhê.

⁴ Ngò gi, kyûdung hkangmó, hkâ-nhâm le nungmoq banshoq bang é matú gabú myit eq dung byi nyi lhê.

⁵ Hkâsu mù gâ le, nungmoq gi, sang-hi nyi mai ahkuí jé shoq, gabú danglù má ngò eq chôm zùm yap nyi é yanmai nghut lhê.

⁶ Haû nungmoq má ge é muzó kut hi é sù Garai Gasang gi, Yesuq Hkrisduq é buinyi jé shoq muzó haû lé lhoq pán râ nghut lhê nghû, ngò hkyak myit lum tô lhê.

⁷ Nungmoq banshoq bang gi, ngá é i-myit má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gâ le,

ngò kyum hut huí tô é u lé le, haû gabú danglù hkyô lé taí hung luí, lhoq gíng é u lé le, nungmoq gi, ngò eq rahá Garai Gasang jeju chôm hkâm yu é bang nghut lhê.

⁸ Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

⁹ Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sanséng luí mara a bo é za,

¹⁰ Garai Gasang é hpungwup shingkang eq hkya-on kungtôn hkyo é matú, Yesuq Hkrisduq é yanmai lo é dingmán hkyo é ashi wó byíng nyi shang gaq nghû le;

¹¹ nungmoq é chyitdap myit gi, tengmán é hpaqchyí eq wó sê é nyan banshoq má je riyhang kô jat lò shang gaq nghû le, ngò kyûdung nyi lhê.

Dui Nyi Le Gi, Hkrisduq É Matú

¹² Gumang wui é, ahkuí ngò nungmoq lé sé nhâng nau é hkyô gi, ngò má haí dut lai lò bê hkyô pé gi, gè gè yhang gabú danglù ring jat lò rá matú dut lò bê nghut ri.

¹³ Hau é yanmai, haû hkohkâm-wâng zúng é lunglhang bang eq gotú banshoq bang é hí má, Hkrisduq é yanmai ngò kyum hut huí é hkyô, de de dut htoq bê nghut ri.

¹⁴ Hau htoq agó, ngò htóng lúng é yanmai, haû Yhumsing Yesuq má gumang wui nghut

é myo mi-myo gi, myit wum wó yû kômù, Garai Gasâng é mungdang lé, je riyhang a gyuq a kyum wám hko kyo bekô nghut ri.

¹⁵ Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri.

¹⁶ Ge é myit mai hko é bang gi, gabú danglù lé hûng râ matú ngo lé hkyin é hkyô lé, yhangmoq sé kômù, chyitdap myit eq hko kyô é bang nghut akô.

¹⁷ Haû góbang chyaú gi, sansêng é i-myt eq a nghut é za, ngò kyum wut é hkyô má wuîhke jamjau jat byi râ matú, myit nyi bùm kô é nghut mù luî, Hkrisduq é hkyô lé yhumsing é wuízat é dông za, hko taî nyi bum akô nghut ri.

¹⁸ Nghut kôlhang, haû gi, haî râ ri lhú? Yhumsing wuízat é dông hko é nghut nghut, tengmán é dông hko é nghut nghut, hkyô hkat hkangmó má Hkrisduq é hkyô lé hko pyo kat é nghut mù luî, ngò gi, hau é yanmai, gabú nyi lhê.

Gè gè yhang, ru gabú nyi shirá nghut lhê.

¹⁹ Hkâsu mù gâ le, nungmoq kyûdung byî é eq Yesuq Hkrisduq é Woi-nyí garúm é yanmai, ngò má dut lai lò bê hkyô gi, ngò wó luthkyô dut râ nghut é lé ngò sê lhê.

²⁰ Ngò myit láng tô é eq myit myoqbyù tô é má, ngò gi, hoq

nó haî a râ é za, hí hkun lhê su, ahkuî le, dui nyi kôlhang, shi byuq kôlhang, gyuq kyum myit a bo é hkyô lé wó yû mù luî, Hkrisduq gi, ngá gûng má hkyâ-on waq toq é hui râ nghut lhê.

²¹ Hkâsu mù gâ le, ngò, asak dui nyi le gi, Hkrisduq é matú, shî jáng gi, ngá e amyat nghut ri.

²² Nghut kôlhang, ngò gi, gungsho má rû dui nyi mù, ngò kut é muzó má ashi zuî lo é nghut le gi, hká lhum lé sheq hkyin yu le gè râ lhú?

²³ Ngò gi, hkyô í hkat gyoro má hká hpyang le a hkap dut tô ri; shi lô luî Hkrisduq eq rahá nyi râ lé gi, ngò ô nau ri, hkâsu mù gâ le, haû gi, je ge é hkyô nghut ri.

²⁴ Nghut kôlhang, ngò gungsho má dui nyi le gi, nungmoq é matú akyû je bò râ nghut lhê.

²⁵ Haû mù, ngò gi, shí hkyô lé hkyak myit lum to luî, lumjîng hkyô má nungmoq kô jat lo é eq gabú nyi râ matú, nyi gyó luî, nungmoq lhunglhang bang eq nyi nyi râ hkyô lé, ngò sê lhê.

²⁶ Haû mù luî, ngò nungmoq chyáng dum jé lé é hkûn, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

²⁷ Haî wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haû jáng, ngò, nungmoq chyáng jé mù huî lhûm é hkûn nghut nghut,

we gang lhum tô é hkûn nghut nghut, nungmoq gi, woi-nyí ralhûm má za yap gîng to mù, haû gabú danglù lé lumjîng hkyô má, i-myt rahkat zâ eq shikut nyi kô é hkyô lé le;

²⁸ nungmoq gi, hká hkyô má nghut kôlhang, gyè pè eq kyuq zô é lé a gyuq lò kô é hkyô lé le, ngò sé râ nghut lhê. Haû gi, yhangmoq é matú htên byoq hui râ kumlhá dut lò bê nghut lhê; nghut kôlhang, nungmoq gi, hkyi yù hui râ nghut lhê. Haû gi, Garai Gasang kut é nghut lhê.

²⁹ Hkâsu mù gâ le, Hkrisduq má wó lumjîng râ é jeju za a nghut, Yhang é matú wuîhke jamjau hui râ jeju le, nungmoq hkam yù bekô nghut ri.

³⁰ Haû gi, hí hpyang nungmoq ngò má myang wú é eq, ahkuî nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

2

Yesuq, Myit Lhoq Nyhum É Hkyô

¹ Hkrisduq eq rading ralhûm za nghut nyi é yanmai, myit wum byî é hkyô, Yhâng é chyitdap myit mai nhik tîng é hkyô, Woi-nyí eq zùm yap é hkyô, nú-nhâm é myit eq shogyo nhikmyîn é hkyô rajung jung lé, nungmoq wó yu é nghut le gi,

² nungmoq gi, haû i-myt huî é hkyô rahkat za, chyitdap myit rajung za, myit

nhiklhum eq myit é hkyô má ralhûm za kut nyi é dông, ngá é gabú hkyô lé, byíng jup nhâng keq.

³ Yhumsing é wuizat é dông le, akôm gyáng pyâm é dông le, haî le a kut é za, myit lhoq nyhum nyi mù, góbang gi, nungmoq htoq má je gyaû lhê nghû myit yu nyi keq.

⁴ Nungmoq yuq hkangmó gi, yhumsîng eq sêng é lé za a nghut, góbang eq sêng é lé le, myit byi râ lhê.

⁵ Hkrisduq Yesuq má bo é myit yhang, nungmoq chyáng bò râ dut lhê.

⁶ Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zing nyi râ matú a myit é za,

⁷ Yhânggùng lé lhoq gôm pyám luî, dui-nhâng zôshang é gungghkyâng lé yu chûng mù, xângzo byù gùng roq lé dut bê nghut ri.

⁸ Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luî, haû tapzîng htoq má lháng tap sat pyâm é hui shoq jîno gyô ri.

⁹ Haû mù luî, Garai Gasang gi, Yesuq é myîng lé mauhkûng htoq mâ é hkyihput, myidàm htoq mâ é hkyihput eq moming mâ é hkyihput hkangmó htuoq paí luî,

- 10 haû Íwa Garai Gasâng é hpungwup shingkâng é matú, Yesuq Hkrisduq gi, Yhumsîng nghut lhê nghû, nhut shô hkanmó yín yû sháng gaq ga,
- 11 myhang htâng é jowò má Yhang lé lhoq toq tô é eq, myìng lhunglhâng é htoq má gyaú é myìng haû, Yhang lé byî to bê nghut ri.

Kyî Pé Su Duqbó Nyî Râ Hkyô

12 Haû mù luî, ngò chyitdap é luzúm wuî ê, nungmoq gi, hkâ-nhám le jìno gyô nyi é eq rajung za, ngò, nungmoq eq rahá nyi é u lé su za a nghut, ngò eq wê gâng tô é hkûn le, nungmoq hkyi yù hui bê hkyô lé, gyaì gyuq hkunggâ é myit eq je riyhang lhoq htoq nyi keq.

13 Hkâsu mù gâ le, Garai Gasang gi, Yhang ô nau é hkyô lé, kut naû râ myit èq wó kut râ hkyô lé nungmoq má lhoq htoq byî nyi é sù nghut lhê.

14 Haî kut kôlhang, taí put lhûm é dông, haû a nghut jáng, dang jet jet lhûm é dông hkâkut kó.

15 Haû jáng sheq, myit goí é, agè ashop é pyat hkaû má, nungmoq gi, mara a bo é, sân-yúng é, shut hkyô a bo é, Garai Gasâng é yhangzô pé dut kó râ nghut lhê.

16 Hau htoq agó, nungmoq gi, asak mungdang lé chung htoq uchyang, mauhkûng mâ é kyî pé su, yhangmoq chyáng wó duqbó nyî kó râ nghut lhê. Haú hkûn, ngò gi, ajè a din pyâm é, a nghut jáng, muzó lé akôm a zui pyâm é yan-mai, Hkrisduq é buinyi má gumrông jowò wó berâ nghut lhê.

17 Nghut kôlhang, ngò gi, shuq jung hkungga* ralthum su, nungmoq é lumjîng myit mai nhongjaú byî é shigu hkungga ahtoq má hut gyûn pyâm é hui le lháng, gabú luî, nungmoq banshoq bang eq rahá chôm gabú nyi lhê.

18 Haû eq rajung za, nungmoq le gabú luî, ngò eq rahá chôm gabú nyi râ dut lhê.

Timohti Eq Epahprodi Njik Lé Nhang Kat Râ Gâ É Hkyô

19 Ngò gi, nungmoq chyáng Timohti lé hân za wó nhang kat râ lé, haû Yhumsîng Yesuq má myit myoqbyu nyi lhê; haû hkûn sheq, nungmoq eq sêng é ludang lé ngò wó sé jáng, ngò myit ngón râ nghut lhê.

20 Nungmoq é hkyô lé, yhang su hkyak za ge myit chiq byî é byù gotû rayuq le ngò a wó.

21 Hkâsu mù gâ le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akô nghut ri.

* 2:17 Shuq jung hkungga gâ é gi, tsibiyiq wing ragóm lé myi htoq má hut pyâm é dông Garai lé gyuq hkunggâ é hkyô lé tân shit é nghut lhê. Bun zo shî má shî hkâm é hkyô lé taí nau é nghut lhê.

22 Yhang kúm gi, zo rayuq mai îwa lé htuqbang é su, haû gabú danglù hkyô má ngò eq rahá dojaú é yanmai, yhang lumluq é hkyô tân shit é lé, nungmoq sê nyi lhê.

23 Haû mù luî, ngò gi, ngò má hkâsu dut râ lé sê é hkûn yhang, yhang lé nhang kat râ matú ngò myit myoqbyu nyi lhê.

24 Hau htoq agó, hkâm-yháng a myáng má, ngò yhang le nungmoq chyáng wó jé nhâng râ nghut lhê nghû, haû Yhumsing má hkyak lum nyi lhê.

25 Nghut kôlhang, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò râ é hkyô má wú gon byi râ matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taû kat byi râ lhê nghû, ngò myit hpyit to bê nghut lhê.

26 Hkâsu mù gâ le, yhang gi, nungmoq lunglhang bang lé myàng nau nyi é za a nghut, yhang no é hkyô lé nungmoq wó gyo bekô nghut é yanmai, gyai yhang myit myo myit chiq nyi ri.

27 Gè gè yhang, yhang gi, aluq shoí shî shoq no pyâm é nghut lhê. Nghut kôlhang, Garai Gasang gi, yhang lé shogyo nhikmyîn yu ri; yhang lé baú a nghut, ngò yón htoq yón a dut nyi râ matú, ngo lé le shogyo

nhikmyîn yu ri.

28 Haû mù luî, yhang lé nungmoq lhom dum myàng jáng, nungmoq myang gabú râ matú le, ngò yón é hkyô yom ló byuq râ matú le, yhang lé ngò hân hân nhang kat byi nau ri.

29 Nungmoq gi, gyai yhang gabú é myit eq, haû Yhumsing má yhang lé lhom hkûlum yù mù, yhang su dut é bang lé hkungga keq.

30 Hkâsu mù gâ le, yhang gi, ngo lé nungmoq a wó garúm é hkyô lé garúm râ matú, yhang é asak lé lhang a ha loshoq kut mù, haû Hkrisduq é muzó é yanmai, aluq shoí shoí shi é hui zô ri.

3

Gungsho Má Lumhkaû Râ Hkyô A Joq

1 Hau htoq agó, ngá é gumang wui ê, haû Yhumsing má gabú nyi keq! Rajung zâ é hkyô lé, nungmoq é matú dum puq ká byi râ gi, ngò má wui é hkyô haí a joq, nungmoq é matú akyú dut râ matú sheq ru nghut lhê.

2 Haû, hkuî pé lé le; agè ashop é muzó jizó kut é bang lé le; gungsho yâm é bang lé le; sidiq nyi keq.*

3 Hkâsu mù gâ le, Garai Gasâng é Woi-nyí eq noqkuq é bang, Hkrisduq Yesuq má gabú gumrong nyi é bang, gungsho má a lumhkau é

* 3:2 Bun zo shi lhum gi, ahpyo-kuq hpyit hkyô má noqzuq nyi é bang lé taí nau é nghut lhê. † 3:3 Ahpyo-kuq hpyit hkam yu é bang akying gâ é gi, Garai Gasâng é yhangzo hkyak nghut bê bang lé gâ lhê.

bang, nga-nhúng gi, ahpyo-kuq hpyit hkam yu é bang akying† nghut lhê.

⁴ Ngò kúm gi, gungsho má lumhkaû râ hkyô wó ang sũ nghut lhê.

Góbang rayuq yuq, haû gungsho má lumhkaû râ hkyô wó âng lhê ga myit é nghut le gi, ngò gi, je riyhang wó sũ nghut lhê.

⁵ Ngò gi, hkû lé é htâng shit nyí nghũ râ nyí má ahpyo-kuq hpyit bê sũ; Israelaq amyû mâ é, Ben-yamyin é awut ashín nghut sũ, Hebre byù mà é Hebre rayuq nghut lhê; jep é tarâ đông ga jang, ngò gi, Hparishe rayuq nghut lhê;

⁶ shirong é hkyô eq séng lui ga jang, ngò gi, haû noqkuq hpúng lé zing-rî wú bê nghut lhê; jep é tarâ mà é dingmán hkyô eq séng lui ga jang, ngò gi, shut é hkyô a bo wú sũ nghut lhê.

⁷ Nghut kôlhang, ngá é amyat nghu é pé lhunglhang gi, ahkuí, Hkrisduq é yanmai sũm byuq é chyat nghut bê nghũ myit yù bê nghut lhê.

⁸ Hau htoq agó, ngò gi, ngá é Yhumsing Hkrisduq Yesuq lé wó sê é ko dik é jeju lé sôn kat jáng, jung hkanmó lé buzaq đông myit yù bê. Hkâsu mù gâ le, lhunglhang lé ngò tô pyâm é gi, Yhang é yanmai nghut lhê.

⁹ Ngò gi, Hkrisduq lé wó yù râ eq, Yhang eq rahá wó nghut nyí râ matú, haû jung hkanmó lé buzaq nghũ myit yu pyâm bê. Garai Gasâng

chyáng mai lo é dingmán hkyô lé ngò jep é tarâ đông wó ho yu é a nghut, Hkrisduq lé lumjिंग é yanmai za wó yu é ru nghut lhê; haû gi, lumjिंग myit mai wó é nghut lhê.

¹⁰ Ngò gi, Hkrisduq lé le, Yhang dui toq hkyo é hpungwup a-tsam lé le, Yhang hpuzô é hkyô má wó zùm yap râ lé le, Yhang shî hkâm é hkyô lé wó cháng râ lé le, sé nau ri.

¹¹ Haû jáng gi, ngò le, shi byuq bê mai dum dui toq é hkyô lé wó myoqbyù râ nghut lhê.

Myit Myoqbyu Tô É Jowò Shut Din Nyí Râ Hkyô

¹² Ngò gi, haû pé banshoq lé wó gũ bê le a nghũ naù, ngò gumjup gũ bê le a nghũ naù. Nghut kôlhang, Hkrisduq Yesuq gi, ngo lé lhom yù bê eq rajung za, ngò gi, haû lé wó lhom yù sháng gaq nghũ, châng hkat nyi lhê.

¹³ Gumang wui ê, ngò yhang ngò gi, haû lé wó hap yù bê nghũ a myit; nghut kôlhang, ngò kut é muzó ralhum gi, nunghtáng mà é lé tô-myhî pyâm mù, myoq hí mà é lé wó yù shoq nghũ shikut lui,

¹⁴ Hkrisduq Yesuq má Garai Gasâng eq ngo lé ahtoq shut ji yu é chyunghuq lé wó yù râ matú, myoqbyu tô é jowò shut châng hkat din nyi lhê.

¹⁵ Gumjup bê bang nga-nhúng lhunglhang gi, haû sũ é myit bò râ lhê. Rajung jung má nungmoq myit é hkyô

shai nyi kô é nghut le gi, haû lé le, Garai Gasang gi, nungmoq lé san za tún shit râ nghut lhê.

¹⁶ Hká dông nghut kôlhang, nga-nhung gi, ahkuí jé shoq châng nyi bê hkyô eq rajung za châng kut nyi sháng.

¹⁷ Gumang wui ê, nungmoq gi, ngò kut é dông chôm kut nyi keq, ngamoq mai nungmoq lé kut shit é alik eq rajung za châng é bang lé wú yû keq.

¹⁸ Hkâsu mù gâ le, hí hkûn ngò, nungmoq lé anum num taí kyô wú luí, ahkuí lhang, ngaù byi eq dum taí kyô é eq rajung za, Hkrisduq é tapzîng lé gyè kut é bang myo myo nyi bum akô nghut ri.

¹⁹ Yhangmoq é jìhtûm gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myt gi, mingkan zè htoq má za nghut ri.

²⁰ Nghut kôlhang, nga-nhung é yhummau gi, mauhkûng mingdán má nghut lhê. Nga-nhung gi, haû má é Yhumsîng Yesuq Hkrisduq gâ é hkyi yù Sú lé, myoqbyu lánq nyi é bang nghut lhê.

²¹ Yhang gi, jung hkanmó lé, Yhang uphkan é a-ô má wó kut tô é Yhâng é a-tsâm eq nga-nhung é htên byoq sê é gungdu lé htaí lhik pyám byi luí, Yhâng é hpungwup bo é gungdu su dut nhâng râ

nghut lhê.

4

¹ Haû mù luí, chyitdap é luzúm wui le nghut mù, ngò chyitdap bûn nghâm nyi é, ngá é gabú jowò eq janmaù nghut nyi é, ngá é gumang wui ê, haû gi, Yhumsîng má nungmoq hkâsu kut yap gîng nyi râ hkyô nghut lhê.

Lhoq Pun Lhoq Kyîng É Hkyô

² Ngò gi, Uodia eq Suntuki nhik lé, haû Yhumsîng má rayuq eq rayuq myit huí lhûm nyi râ matú, gyai yhang pying kat lhê.

³ Ngá é mù wùn luzúm kyîng ê, ngò gi, myiwe shí nhik lé garúm yû laq nghû, nang lé le dúng tôngbán kat lhê; yhangnhik gi, Klemen eq le, asak jihpán laiká buk má myîng bo é, ngá é mù wùn luzúm wui góbang eq le, haû gabú danglù hkyô má ngò eq rahá gyai shikut wú bê sú nhik nghut lhê.

⁴ Haû Yhumsîng má hkâ-nhâm le gabú nyi keq! Ngò dum taí lhê, gabú nyi keq!

⁵ Nungmoq nú-nhâm é hkyô, byù banshoq bang lé sé nhâng keq. Haû Yhumsîng gi, chyáng bê nghut ri.

⁶ Haí eq séng luí le, myit hkâ-myo hkâchiq kó; hkyô hkanmó má jeju hkya-on uchyang, kyûdúng é eq dúng tôngbán é dông, nungmoq dúng é hkyô pé lé, Garai Gasang chyáng shit kyô nyi keq.

⁷ Haú hkûn, sé gyô é nyan banshoq htoq má gyaú é, Garai Gasâng é nguingón hkyô gi, nungmoq é myit nhiklum eq nungmoq myit é hkyô lé, Hkrisduq Yesuq má upzúng byi nyi rá nghut lhê.

⁸ Jihtûm má, gumang wui é, tengmán é, hpautap gíng é, dingmán é, sansêng é, wó chyitdap é, hkungga gíng é, haí má nghut kôlhang, aróng wó dik é hkyô rajung jung, a nghut jáng, hkya-on gíng é hkyô rajung jung bo é nghut le gi, haú sù é hkyô pé lé myit nyi keq.

⁹ Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haí lé le châng kut nyi keq. Haú hkûn, nguingón hkyô byi é Garai Gasang gi, nungmoq eq rahá nyi nyi rá nghut lhê.

Jeju Bûn É Hkyô

¹⁰ Ahkuí kúm gi, ngá é hkyô lé nungmoq dum myit chiq byi kô é yanmai, ngò gi, haú Yhumsîng má gyai yhang gabú nyi lhê; gè gè yhang, nungmoq myit chiq byi nyi kôlhang, haú lé tún shit rá ahkáng a wó kó nghut ri.

¹¹ Ngò îsu nghû taí nyi é gi, ngò má rá é hkyô bo tô é yanmai taí é a nghut, hkâsu mù gâ le, ngò gi, ngò hui mihui má, nhik dik nyi rá matú mhoq yù bê nghut lhê.

¹² Ra châ tô u lé, hkâsu kut rá ngò sê lhê; agùn agó wó u lé, hkâsu kut rá ngò sê lhê; hkyô hkangmó eq dut tô é ahkyo lhum jup má, wam gyi

kôlhang, zòmut kôlhang, agùn agó wó tô nyi kôlhang, ra châ to kôlhang, myit dik nyi rá hpaqchyí lé ngò wó mhoq yù bê nghut lhê.

¹³ Ngò gi, ngo lé wum-o atsam byi sù Hkrisduq é yanmai, hkyô hkat hkangmó wó kut lhê.

¹⁴ Nghut kôlhang, ngò wuihke jamjau hui nyi é hkûn, nungmoq garúm yù kô é gi, ge é hkyô kut bekô nghut ri.

¹⁵ Hau htoq agó, Hpilipi byu pé nungmoq sê é eq rajung za, haú gabú danglù lé, ngò hkô mù nungmoq wó gyô yu hi é buinyi pé má, ngò Makedoni mau mai htoq ló rá hkûn, haú byi é hkyô eq lhom yu é hkyô má, nungmoq mai lai lui, noqkuq hpúng gotú ralhum lhang, ngo lé garúm kat é hkyô a bo é nghut lhê.

¹⁶ Ngò Htesaloni wà mó má nyi tô é hkûn lé lhang, nungmoq gi, ngò ra châ é hkyô lé adàm dàm hûn byi bekô nghut ri.

¹⁷ Ngò gi, chyunghuq chyunghtâng lé ho nyi é a nghut, nungmoq mai ashi je myo zuí jat rá matú lé za sheq ho nyi é nghut lhê.

¹⁸ Ngò gi, haí le gúm shoq myang yu é htoq agó, chyân shoq lhang nghut bê. Ahkuí, haú nungmoq hun kat é chyunghuq lé, Epahprodi chyáng mai ngò lhom myang yù lui, ngò má agùn agó nghut nyi bê. Haú pé gi, namgón jung hkungga su, Garai Gasang lé gabú nhang é, hap yù gíng é hkungga ralhum nghut ri.

19 Ngá é Garai Gasang gi, Yhang agùn agó wó sùt nyi é eq rajung za, nungmoq râ é hkyô banshoq lé, Hkrisduq Yesuq má lhoq gúm lhoq jup byi râ nghut lhê.

20 Hpungwup shingkang gi, nga-nhông é Îwa Garai Gasâng chyáng pyat dedu ahtum abyuq ru joq nyi sháng gaq ô! Amen.

Shi-kyám Dang

21 Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wui gi, nungmoq lé shi-kyâm kat akô nghut ri.

22 Sân-yúng bang banshoq gi, nungmoq lé shi-kyâm kat akô; Kehtaq é yhôm mâ é sân-yúng bang gi, je riyhang shi-kyâm kat akô nghut ri.

23 Yhumsîng Yesuq Hkrisduq é jeju gi, nungmoq banshoq bang eq rahá ru joq nyi sháng gaq ô!

KOLOSE Pê Chyáng Hun Kat é Laiká (Colossians)

1 Garai Gasâng èq hkyin yù mù, Hkrisduq Yesuq é lagyo dut sù, ngò Poluq eq nga-nhông é gumang Timohti gi,

2 Kolose wà mó má nyi bang nghut é, Hkrisduq má chyoiyúng bang nghut é, lhumzui é gumang wui chyáng dang kyô kat lhê. Nga-nhông é Iwa Garai Gasâng chyáng mâ é jeju eq nguingón hkyô gi, nungmoq chyáng ru joq nyi sháng gaq.

Jeju Hkya-ôn É Eq Kyûdung É Dang

3 Ngamoq gi, nungmoq é matú kyûdung byi é hkûn, nga-nhông é Yhumsing Yesuq Hkrisduq é Iwa nghut é Garai Gasang lé ayang jeju hkya-ôn lhê.

4 Haì mù gà le, Hkrisduq Yesuq má nungmoq lumjing hkyô eq Yhâng é sân-yúng bang banshoq lé nungmoq chyitdap é hkyô lé, ngamoq wó gyô é yanmai nghut lhê.

5 Lumjing myit eq chyitdap myit haù gi, nungmoq é matú mauhkung htoq má hkong to byi é myit myoqbyù hkyô* mai lo é nghut lhê. Myit myoqbyù hkyô haù lé gi, nungmoq chyáng jé to bê gabú danglù nghut é tengmán mungdang mai,

nungmoq wó gyô to gû nghut lhê.

6 Nungmoq gi, gabú danglù haù lé wó gyo lui, Garai Gasâng jeju eq sêng é tengmán hkyô lé sê hkyang é buinyi mai, nungmoq chyáng ashì zuí é eq kô myhang nyi bê nghut é eq rajung za, gabú danglù haù gi, mingkan gón má ge é ashì zuí nyi é eq kô myhang nyi bê nghut ri.

7 Nungmoq gi, haù hkyô lé, ngamoq é chyitdap byinzum Epahpra chyáng mai mhoq yu é nghut lhê. Yhang gi, ngamoq é gunglik dông, Hkrisduq é lhumzui é hpúng mù wùn sù nghut lhê.

8 Yhang gi, haù Woi-nyí èq nungmoq lé byi tô é chyitdap hkyô lé, ngamoq lé taì kyo sù le nghut ri.

9 Haù nghut é yanmai, ngamoq gi, nungmoq eq sêng é hkyô lé wó gyô é nyi mai, nungmoq é matú ayang kyûdung byi nyi lhê. Garai Gasang ô nau é hkyô lé sé rà hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq dông mai nungmoq chyáng lhoq pying byi sháng gaq nghù, Yhâng chyáng kyûdung byi nyi lhê.

10 Haù su kut kyûdung byi é gi, haù Yhumsing ô nau é hkyô eq gingdán é dông nungmoq asak wó duí lui, hkyô hkangmó má Yhang lé wó gabú nhâng rà matú nghut lhê. Hau dông mai, nungmoq gi, ge é muzó hkangmó má ashì zuí nyi lui, Garai Gasang

* 1:5 Bun zo shí má bo é myit myoqbyù hkyô gi, Yesuq lé taì é nghut lhê.

lé sê é hpaqchyî má kô myhang nyî kó râ nghut lê.

¹¹ Hau htoq agó, nungmoq gi, Yhâng é hpungwup a-tsam đông mai a-tsam banshoq èq wum-o lhoq kỉnh byí é huí nyî kó râ nghut lê. Haû mù, nungmoq gi, gyai hkam jân é hkyô eq myit hing é hkyô lé, gabú myit mai wó yû kó râ nghut lê.

¹² Maubó é mingdán má, sân-yúng bang eq sêng é muizè lé wó bo hkam yû râ matú, nungmoq lé gingdán nhang é sù haû Íwa lé le, jeju wó hkya-on kó râ nghut lê.

¹³ Hkâsu mù gâ le, Íwa haû gi, nga-nhúng lé, mauchut èq up é hkaû mai hkyi htoq yû luí, Yhang chyitdap é Yhang Zô é mingdán má shuí hâng é Sù nghut lê.

¹⁴ Nga-nhúng gi, haû Yhang Zo đông mai, hkyi xe yu é huí mù, yubak mara hkyut pyám byí é huí bê nghut lê.

Jung Hkangmó É Ushuq, Hkrisduq

¹⁵ Hkrisduq gi, myoq èq a byu-myàng é Garai Gasang é gungghkyâng isâm nghut luí, zomún đông hpan tô é lhunglhâng htoq má gyaú é sù nghut ri.

¹⁶ Hkâsu mù gâ le, mauhkung eq myigùng htoq má joq é azíng zê pé, myoq èq byu-myang é eq a byu-myang é pé nghut kôle, hkohkâm ayá pé, a-tsam pé, uphkang bang, ahkáng ayá wó bang nghut kôle, lhunglháng gi, Yhâng èq hpan to huí é chyat nghut lê.

Lhunglháng gi, Yhâng é matú, Yhâng èq hpan to huí é chyat nghut ri.

¹⁷ Yhang gi, lhunglhâng é hí mâ é nghut mù, lhunglháng gi, Yhâng é yanmai joq gíng bum é chyat nghut lê.

¹⁸ Yhang gi, noqkuq hpúng ngu é gungdû é ulhum nghut ri; Yhang gi, jung hkangmó má gyaú dik é ushuq dut sháng gaq ga, sân-hi awang nghut sù eq shí é bang mâ é hí dui toq é zomún dut sù nghut ri.

¹⁹ Hkâsu mù gâ le, Garai Gasang gi, Yhâng é byíng jup hkyô banshoq, Yhang Zo má joq nyî râ lé myit nguî ô nau é nghut mù,

²⁰ haû tapzíng má htoq byí é Yhang Zô é sui đông mai nguínón hkyô kut byí é èq, myigùng htoq mâ é azíng zê nghut nghut, mauhkung mâ é azíng zê nghut nghut, lhunglháng lé, Yhang Zo đông mai, Yhang eq nguínón simsaq hkyô xoq yû bê nghut ri.

²¹ Nungmoq gi, Garai Gasang eq wê gâng é bang dut wú kôluí, nungmoq é agè ashop nyi yap sâmlái é yanmai, nungmoq i-myit má, Yhâng é gye dut wú bekô nghut lê.

²² Nghut kôlhang, ahkuí, Garai Gasang gi, nungmoq lé, râ é hkyô a bo é eq mara hùn râ hkyô a bo é za, chyoiyúng é đông Yhâng é hí má shit râ matú, Hkrisduq é gungsho gungdu shí hkâm é đông, nungmoq eq nguínón

simsaq hkyô xoq yû bê nghut ri.

²³ Haû gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gingtîng nyi mù, nungmoq é lumjîng hkyô má xoq nyi nyi é nghut jâng sheq dut râ nghut lhê. Gabú danglù shî gi, nungmoq wó gyô wú bê nghut é htoq agó, mauhkûng ô má hpan tô é jung hkanmó lé hko kyô nyi bê nghut lhê. Ngò, Poluq le, gabú danglù hau é dui-nhâng zoshâng dut é nghut lhê.

Noqkuq Hpúng É Matú Poluq Wùn Waq É Hkyô

²⁴ Ahkuî, ngò gi, nungmoq é matú jamjau huî é má gabú lhê; hau htoq agó, Hkrisduq é gungdu nghut é, noqkuq hpúng é matú, râ tô ashî nghut é, Yhang hpuzô é hkyô lé, ngá é gùng má ngò lhoq gumjup yu nyi lhê.

²⁵ Ngò gi, Garai Gasâng é mungdang lé, nungmoq chyáng gumjup shoq hko kyo râ matú, Garai Gasang, ngo lé hun tô é wò mai, noqkuq hpúng hau é mù wùn sù dut é nghut lhê.

²⁶ Mungdang haû gi, gohkûn mai apyat pyat haq tô gyó lo é zaú tô é hkyô nghut kôlhâng, ahkuî gi, haû sânyúng bang lé hpông shit bê nghut ri.

²⁷ Garai Gasang, haû su kut é gi, zaú tô é hkyô hau é agùn agó hpungwup shingkan, tûngbaù pè chyáng hkâsu nghut é hkyô, yhangmoq lé sé nhâng râ matú nghut lhê. Zaú

tô é hkyô haû gi, hpungwup shingkan lé myoqbyù é hkyô nghut é, nungmoq má Hkrisduq dui nyi bê hkyô lé gâ é nghut lhê.

²⁸ Hkrisduq má gumjup é dông, byù yuq hkanmó lé wó shuî jé sháng gaq nghû, ngamoq gi, Hkrisduq é hkyô lé taî pyô luî, yuq hkanmó lé, hpaqchyî byéng-yá banshoq èq taî pun taî kyîng é eq mhoqshit nyi é nghut lhê.

²⁹ Ngò, haû-í yhang wó wùn waq shikut é gi, ngò má wum-o a-tsam byíng byíng mù zuî nyi Su é wum-o banshoq èq wùn waq shikut nyi é ru nghut lhê.

2

¹ Ngò gi, nungmoq é matú le, Ladoki wà mó bâng é matú le, ngò eq myoqdong hkyûm a huî wú shî é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri.

² Haû su awui ahke shikut é hkyô gi, yhangmoq, myit má wum-o byî é huî râ eq chyitdap myit má rading ralhûm za wó dut râ matú nghut lhê. Haú hkûn, yhangmoq gi, Garai Gasâng é zaú tô é hkyô nghut é, Hkrisduq lé wó sé râ matú, sê gyô é nyan lhunglhâng é isut byíng shoq lé wó yû kô râ nghut lhê.

³ Haû Hkrisduq má kúm gi, hpaqchyî byéng-yá eq sumsé hpaqchyî gâ é sutzé lhunglháng lé tsîng tô ri.

⁴ Nungmoq lé ngò haû hkyô taî kyô é gi, ó yuq le, dang ngón dang ngui èq mhoq

hpyoq é dông, nungmoq lé a wó mhaú zo râ matú nghut lhê.

⁵ Hkâsu mù gâ le, ngá gungdu nungmoq eq rahá a nyi kôhang, ngá é myit gi, nungmoq eq rahá nghut nyi luí, nungmoq shuq shuq tap tap za nghut nyi kô é eq Hkrisduq lé lumjîng é má hkâ-í gingtîng nyi kô é lé myàng mù, ngò gabú nyi lhê.

Hkrisduq Dông Mai Wó É Gumjup É Asak Dui Hkyô

⁶ Haú mù luí, nungmoq gi, Hkrisduq Yesuq lé Yhumsîng nghû hap yù bekô nghut é eq rajung za, Yhang má asak xoq dui nyi keq.

⁷ Yhang má apûn amyit chîn gîng nyi mù, kô myhang lò luí, nungmoq mhoq yù bê eq rajung za, lumjîng hkyô má wum-o lhoq kîng mù, jeju hkya-ôn é hkyô byîng zan nyi keq.

⁸ Hkrisduq chyáng mâ é a nghut é za, mingkan shî mâ é uphkâng tarâ pé eq xângzo wui é htûngli cháng luí, mhaú zô é myit sôn hpaqchyî eq akyú a bo é dang dông, ó yuq èq le, nungmoq lé a wó shuî nghoq yû kó sháng gaq, sidiq nyi keq.

⁹ Hkâsu mù gâ le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyi mù,

¹⁰ nungmoq gi, a-tsam bo é banshoq eq ahkáng ayá wó

é banshoq é ushuq nghut é Hkrisduq eq sêng é bang nghut kômù, gumjup é bang dut bekô nghut ri.

¹¹ Yhang má, nungmoq gi, byu loq èq kut é ahpyo-kuq hpyit hkyô dông a nghut é za, ahpyo-kuq hpyit é su, Hkrisduq èq yubak gungsho mara lé hkyut sêng pyâm é hkyô lé hkam yù bekô nghut ri.

¹² Nungmoq gi, wui-myhup hkâm é hkûn Hkrisduq eq rahá myhup yhûm é hui bekô nghut mù, Yhang lé shi é mai lhoq dui toq yu é, Garai Gasâng é a-tsam lé nungmoq lumjîng kô é yanmai, Yhang eq rahá lhoq dui toq yu é hui bekô nghut ri.

¹³ Nungmoq é yubak mara pê é yanmai le, nungmoq é yubak gungsho mara lé huí sêng pyâm é a hkam yu é yanmai le, nungmoq shi tô é hkûn, Garai Gasang gi, nungmoq lé, Hkrisduq eq rahá asak dui nhâng bê nghut ri. Yhang gi, nga-nhûng é yubak mara lhunglhang lé hkyut pyám byi luí,

¹⁴ nga-nhúng eq shai lhum mù, nga-nhúng lé htuq htîng é, tarâ pé bo é jéyáng râ jihpán lé huí sêng pyám byi bê nghut ri. Yhang gi, haú lé tapzîng htoq má dok tap pyâm é dông yu pyám byi bê nghut lhê.*

¹⁵ Haú dông mai, a-tsam bò bang eq ahkáng ayá wó bâng a-tsam lé lang hkyut hkyô pyám mù, Yhang gi, tapzing

* 2:14 Yhang gi, haú lé tapzîng htoq má dok tap pyâm é dông yu pyám byi bê nghut lhê gâ é gi, Hkrisduq tapzîng má shî hkâm byi é hkûn, nga-nhûng é yubak mara banshoq lé, Garai Gasâng eq hkyut pyám byi é lé taí nau é nghut lhê.

èq yhangmoq lé ung pyâm é đông, byù pê é hí má yhangmoq lé de de kut to bê nghut ri.

¹⁶ Haû mù luî, nàng haî zo haî shuq é yanmai le, noqkuq htùng eq sêng é poî buinyì, Lhoxan Lhosik poî, Bánno buinyì eq sêng luî le, nungmoq lé, ó yuq èq le a wó jéyáng kó sháng gaq.

¹⁷ Haû pé gi, dut lò râ hkyô pê é wupzo chyat nghut lhê; haû gùng gyíng gi, Hkrisduq yhang nghut nyi ri.

¹⁸ Myit lhoq nyhum mhaû é eq maumang lagyô pé lé noqkuq é lé myit nguì é sù ó yuq èq le, nungmoq lé, chyunghuq eq a gingdán râ đông hkâkut nhâng kó. Haû su é yuq gi, yhumsîng byumyang é lé† za taî shikut mù, yhumsîng é gungsho myit mai, akôm yhang nghut é lé gyáng dang taî é sù nghut ri.

¹⁹ Yhang gi, Garai Gasang kô myhâng nhang é su, gungdu gón é gungsho showui showang pé eq shogyi pé lé htuqbang byì mù rahá lâng tsiing tô é haû ulhum nghut é Hkrisduq eq xoq é hkyô lé byoq ló nhâng bê nghut ri.

²⁰⁻²¹ Nungmoq gi, Hkrisduq eq rahá, mingkan shî mâ é tarâ pé eq shi gang bekô nghut le nhîng, haî mù, haû eq sêng lhum nyi ashí kó lúhú? "Hkâzui, hkâchyâm, hkâzáng." gâ é tarâ ô má nyi nyi ashí kó lúhú?

²² Haû pé gi, waxâng zô wui é hkunmó pé eq mhoqshit hkyô pé nghut é yanmai, jai chung é hkûn, htên byuq râ chyat nghut lhê.

²³ Haû sù é tarâ pé gi, yhumsîng yhang noqkuq shikut é, myit lhoq nyhum mhaû é eq gungdu lé gunjâng é pé nghut luî, hpaqchyî byéng-yá bo é su dut kôlhang, gungshô é agè ashop yut yut ô nau hkyô lé wó hkûm zing pyám râ má, hai akyû a bò nghut ri.

3

Choyiyúng É Đông Asak Dui Râ Hkyô

¹ Haû mù luî, nungmoq gi, Hkrisduq eq rahá lhoq dui toq é hui bekô nghut jáng, Garai Gasâng é loqyo hkyam* má zung tô é Hkrisduq é jowò má joq é, ahtoq mâ é azíng zê pé lé myit ô nau nyi keq.

² Nungmoq gi, myidàm htoq mâ é azíng zê lé myit tuí é a nghut é za, ahtoq mâ é azíng zê lé myit tuí nyi keq.

³ Hkâsu mù gâ le, nungmoq gi, shî bekô nghut luî, ahkuî, nungmoq é asak gi, Hkrisduq eq rahá, Garai Gasang má haq tô é hui bekô nghut ri.

⁴ Nungmoq é asak nghut sù, Hkrisduq htoq shit é hkûn, nungmoq le, Yhang eq rahá, hpungwup shingkang hkaû má htoq shit kó râ nghut lhê.

⁵ Haû mù luî, nungmoq é mingkan hkyô eq sêng é,

† 2:18 *Byu-myang* é lé gâ é gi, yhang myit htoq é shing-rán lé gâ lhê.

* 3:1 *Loqyo hkyam* nguì é gi, ahko ahkáng wó é jowò lé gâ é nghut lhê.

ashop é dông gungsho zùm yap é hkyô, agot a-û nyi zô lhùm é hkyô, ye lhaí nau é hkyô, agè ashop yut yut ô nau é hkyô eq, hparà noq hkyô nghut é myoqnoq hkyô pé haí lé le sat pyám keq.

⁶ Haú hkyô pê é yanmai, Garai Gasâng é nhikmo-yo hkyô gi, jìno a gyo bâng é ahtoq má† jé rà za nghut lhê.

⁷ Laí lò bê hkùn, nungmoq le, haú hkyô pé dông sô wú kô é nghut lhê.

⁸ Nghut kôlhang, ahkuí, nungmoq gi, nhikjum yô é, nhikmo-yô é, agè ashop é dông nò shoq kut é, lumù gansang é eq, nungmoq é nhutwuí mai hkunchoq taí é hkyô shí pé banshoq lé, yhumsing gùng yhumsing tô pyám rà dut lhê.

⁹ Rayuq eq rayuq hkâ-mhaú lhum kó; hkâsu mù gâ le, nungmoq gi, nungmoq é byù xau eq byù xaú é nyi yap hkyô lé hkyut pyám mù,

¹⁰ byù sik lé tû wut yû kô é nghut lhê; byù sik haú gi, sumsé hpaqchyí dông mai, yhang lé hpân Su é gungdu isâm má asik jat lò nhang é huí nyi ri.

¹¹ Byù sik má gi, Grik eq Yudaq byù nghu é, ahpyo-kuq hpyit hkâm bang eq a hkâm bang nghu é, byù bíng eq byù jum nghu é, jùn eq jùn a nghut sù nghu é a nyi lô é za, Hkrisduq gi, banshoq nghut mù, banshoq má nyi nyi ri.

¹² Haú mù luí, Garai Gasâng

èq hkyin yù huí é bang, Yhâng èq gyai yhang chyitdap é huí é chyoiyúng bang dông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhumsing gùng yhumsing mebu su wut to keq.

¹³ Nungmoq yhangchang mara kut shut é hkyô joq é nghut jáng, hkam jan byí lhum luí, rayuq eq rayuq mara hkyut byí lhum keq. Haú Yhumsing gi, nungmoq é mara hkyut pyám byí é su, nungmoq le mara hkyut byi keq.

¹⁴ Haú ge é sâmlai banshoq wó é htoq agó, gumjup é rad-ing ralhum za dut é hkyô má, banshoq lé rahá wó tuí zing tô é chyitdap myit lé puq wut to keq.

¹⁵ Nungmoq gi, nguingón hkyô wó rà matú ji yu é hui bekô nghut mù, gungdu ralhum mâ é bang chyat nghut bekô yanmai, Hkrisduq é nguingón hkyô lé, nungmoq é myit má up nhang nyi keq. Haú mù, jeju hkya-ôn nyi keq.

¹⁶ Nungmoq, rayuq eq rayuq, hpaqchyí byéng-yá banshoq èq mhoqshit é eq lhoq pun lhoq kyíng lhùm é hkùn le, Garai Gasang lé nungmoq jeju bún é myit mai, jihkyang dang, hkya-on mahkôn, woi-nyí eq sêng é mahkôn pé hkon é hkùn le, haú Hkrisduq é mungdang lé, nungmoq é myit nhiklhum má agùn agó bò nhang nyi keq.

† 3:6 *Jìno a gyo bâng é ahtoq má, gâ é dang, chyúmding ra-am má a bò nghut lhê.*

17 Nungmoq haî wá kut kut, dang đông nghut nghut, zui saî é đông nghut nghut, ban-shoq lé Yhumsing Yesuq é mying mai kut é hkûn, haû Íwa nghut é Garai Gasang lé Yhang đông mai jeju hkya-on keq.

Hkristan Ikun Byu Pé Nyi Yap Râ Hkyô

18 Ikun myhî pé ê, ikun hpô pé uphkanq é ahkaû má nyi keq. Haû gi, Yhumsing é hí má kut gíng é hkyô nghut lhê.

19 Ikun hpô pé ê, ikun myhî pé lé chyitdap nyi keq. Yhangmoq lé dang htân hkân-yô kó.

20 Zo wuî ê, jung hkanqmó má nungmoq é mó wui é jìno gyo keq; hkâsu mù gà le, haû gi, Yhumsing ô nau é hkyô nghut lhê.

21 Íwâ pé ê, nungmoq é zo wuî lé myit hkâ-nô nhâng kó, nò nhâng jáng gi, yhangmoq, myit wum gyuí byuq kó râ nghut lhê.

22 Jùn pé ê, hkyô hkanqmó má nungmoq é myidàm htoq mâ é jùn sîng bang uphkanq é ahkaû má nyi nyi keq; yhangmoq é myoq hí má za zui saî luî, myoqdong ho é đông a nghut é za, haû Yhumsing lé gyuq hkunggâ é eq lhumzui é myit mai zui saî nyi keq.

23 Nungmoq haî wá kut kôle, byu é matú kut é a nghut, haû Yhumsing é matú kut nyi é đông, nungmoq é myit nhikhum ban-shoq eq zui saî nyi keq.

24 Haî mù gà le, nungmoq gi, haû Yhumsing chyáng mai, muizè lé chyunghuq đông wó yû kó râ nghut é lé, sé kô é yanmai nghut lhê. Nungmoq dojaú nyi é sù gi, Yhumsing Hkrisduq ru nghut lhê.

25 Kut shut sù gi, yhang kut shut é marâ matú dam byi é hui zo râ nghut lhê, haî mù gà le, Garai Gasang gi, myoqdong hkyin é hkyô a joq.

4

1 Jùn sîng bang ê, nungmoq é jùn pé lé, tengmán é eq gíng âng é đông lajang byi nyi keq; haî mù gà le, nungmoq le, mauhkûng htoq má Yhumsing rayuq wó é lé sé kô é yanmai nghut lhê.

Xoq Lui Pying Kat É Hkyô

2 Nungmoq gi, kyûdûng é má myit zìng zuq nyi mù, machyâ luî, jeju hkya-on nyi keq.

3 Ngò, shamtoq-tui hut huî nyi shoq dut é, Hkrisduq é zaú tô é hkyô lé ngamoq wó taî pyô sháng gaq, Garai Gasang gi, mungdang lé ngamoq taí râ hkyô hkum hpóng byi râ matú kyû bo dung byi kó laq.

4 Haû Hkrisduq é zaú tô é hkyô lé, ngò taí âng é đông san za wó taî pyô sháng gaq, kyû bo dung byi kó laq.

5 Nungmoq gi, a lumjîng bang eq zùm yap é hkûn hpaqchyî bo nyi keq; wó yu é ahkyíng hkanqmó lé rago yhang chung jai keq.

6 Nungmoq gi, yuq hkangmó lé hkâsu tû tai râ hkyô wó sé kó shoq, dáng nyo é má, xô eq nghám nhang é su, hkâ-nhám le jeju byíng é dang bo nyi sháng gaq.

Ló Htâng É Shi-kyám Dang

7 Tuhkiku gi, ngá hkyô eq sêng é danglù banshoq, nungmoq lé tai kyo râ nghut lhê. Yhang gi, ngá é chyitdap gumang, haú Yhumsíng má, lhumzui é hpúng mù wùn sù eq byinzùm nghut lhê.

8 Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé râ eq, nungmoq lé myit wum wó byi râ matú nghut lhê.

9 Yhang gi, nungmoq chyáng mâ é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shí má dut nyi é hkyô jung hkangmó lé tai kyo kó râ nghut lhê.

10 Ngò eq rahá htóng lúng sù Aristakuq gi, nungmoq lé shi-kyâm kat ri. Barnaba é yhang za-aú Markuq le, nungmoq lé shi-kyâm kat ri. (Markuq eq séng lui pying kat é hkyô lé nungmoq wó yù to bê nghut mù, nungmoq chyáng, yhang jé lé é nghut jáng, lhom hkûlum yù keq.)

11 Yustu le gâ é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haú bang za Yudaq byu pé nghut kômù, yhangmoq gi, ngo lé nhik tíng byi é bang nghut akô.

12 Nungmoq chyáng mâ é byù nghut sù eq Hkrisduq Yesuq é mù wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lhunglhang má hkyak lùm to mù, gumjup lui wó gíngtíng nyi sháng gaq ga, Yhang gi, ayang nungmoq é matú kyûdung shikut byi nyi ri.

13 Nungmoq é matú le, Ladoki wà mó eq Herapoli wà mó bâng é matú le, yhang gi, gyai yhang mù zui shikut byi é hkyô lé, yhang é matú ngò saksé hkâm lhê.

14 Ngamoq é chyitdap chi sará Lukaq eq Demaq gi, nungmoq lé shi-kyâm kat akô nghut ri.

15 Ladoki wà mó mâ é gumang wui lé le, Numhpa eq yhang yhùm mâ é noqkuq hpúng lé le, bo shi-kyâm byi keq.

16 Laiká shí lé, nungmoq lé nghap kyô é htâng má, Ladoki byu pé é noqkuq hpúng má le nghap nhâng mù, Ladoki wà bâng chyáng hùn kat é laiká lé le, nungmoq nghap wú keq.

17 "Haú Yhumsíng chyáng mai nàng hap yù to bê é muzó lé rago za lhoq pán pyám aq." nghû, Arhkipo lé tai kyo keq.

18 Ngò, Poluq gi, ngá é loq eq yhang shi-kyâm dang shí lé kê kat é nghut lhê. Ngò, shamtoq-tui wut tô é lé bûn nyi keq. Jeju gi, nungmoq chyáng ru joq nyi sháng gaq ô.

HTESALONI Pê Chyang Hî Dàm Hun Kat é Laiká (1 Thessalonians)

1 Ngò Poluq, Sila* eq Tim-
ohti pé gi, Îwa Garai Gasang
eq Yhumsing Yesuq Hkrisduq
má nghut nyî bê bang, haû
Htesaloni wà mó byu pê é no-
qkuq hpúng lé dang kyô kat
lhê. Garai jeju eq nguingón
hkyô gi, nungmoq chyang ru
joq nyî sháng gaq.

Jeju Hkya-ôn É Hkyô

2 Nungmoq gi, hkâ-nhám
le, nungmoq banshoq bâng
é matú, Garai Gasang lé
jeju hkya-on luí, ngamoq é
kyúdung dang má nungmoq
lé bo dúng lhôm nyi lhê.

3 Nungmoq é lumjینگ myit
mai zui sai é nungmoq é
muzó lé le; chyitdap myit
é yanmai, nungmoq shikut
é hkyô lé le; nga-nhung é
Yhumsing Yesuq Hkrisduq
má myit myoqbyu tô é
yanmai, nungmoq hkam jân
é hkyô lé le, nga-nhung é
Îwa Garai Gasang é hí má,
ngamoq ru bûn nyi lhê.

4 Garai Gasang chyitdap é
gumang wui ê, Yhang nung-
moq lé hkyin yù bê lé, ng-
amoq sê lhê.

5 Hkâsu mù gâ le, ngamoq
é gabú danglù gi, nhutdang
dong za nungmoq chyang jé é
a nghut, wum-o a-tsam dong
le, Chyoiyung Woi-nyí dong

le, tengmán hkyô bying jup é
dong le, jé bê nghut é yan-
mai nghut lhê. Ngamoq,
nungmoq eq rahá nyi é hkûn,
nungmoq é matú hkâsu kut
laí lo é hkyô lé, nungmoq sé
gù nghut lhê.

6 Nungmoq gi, wuîhke jam-
jau myo myo hui zo kôlhang,
Chyoiyung Woi-nyí byí é gabú
myit mai, danglù haû lé lhom
yù kôluí, ngamoq lé le, haû
Yhumsing lé le, alik kut yu é
bang dut bekô nghut ri.

7 Haû mù, Makedoni mau
eq Ahkaia mau mâ é lumjینگ
bang banshoq é alik, nung-
moq dut bekô nghut ri.

8 Nungmoq chyang mai,
Makedoni mau eq Ahkaia
mau má, haû Yhumsing é
mungdang hú htoq ló e za
a nghut, Garai Gasang má
nungmoq lumjینگ hkyô gi,
jowò hkangmó jam ló bê
nghut luí, ngamoq gi, haí le
taí nó a ra lo nghut ri.

9 Hkâsu mù gâ le, ng-
amoq lé nungmoq hká dong
lhom hkulum yu é hkyô lé,
yhangmoq yhang, ngamoq lé
shit kyo akô. Nungmoq gi,
hparà lhô pé lé tô pyám luí,
Garai Gasang shut hkâsu kut
lhing lò mù, rû dui nyi é eq
tengmán é Garai Gasang lé
dojaú nyi é hkyô lé le;

10 mauhkung mâ é haû
Yhang Zo lé lánng nyi é hkyô
lé le, yhangmoq taí kyô akô.
Yhangzo haû gi, Yhang eq shi
é mai lhoq dui toq yu é hui
luí, jé lô râ nhikmó yo hkyô
mai nga-nhung lé hkyi yù sù,

* 1:1 Sila lé gi, Salwanu le gâ lhê.

Yesuq nghut ri.

2

Poluq, Htesaloni Wà Mó Má Garaí Mû Wùn Waq É Hkyô

¹ Gumang wuì ê, nungmoq chyáng ngamoq lé kûm é hkyô gi, akôm a nghut é lé, nungmoq yhang sê lhê.

² Nungmoq sê é eq rajung za, ngamoq gi, hí hkûn, Hpilipi wà mó má wuîhke jamjau eq rhoî é huì wú bê nghut lhê; nghut kôlhang, nga-nhûng é Garaí Gasang garúm é yanmai, gyai lhom htuq htîng é hui kôle, Garaí Gasâng é gabú danglù lé, a gyuq a kyum nungmoq lé wám taî kyô é nghut lhê.

³ Hkâsu mù gà le, ngamoq lhoq pun lhoq kyîng é hkyô gi, shut é, a nghut jáng, a sansêng é i-myt dông eq nungmoq lé mhaù zô é dông a nghut e za,

⁴ haù gabú danglù lé chûng gíng é bang ga, Garaí Gasâng chyáng mai ahkáng wó é dông za, ngamoq taî é nghut lhê. Ngamoq gi, byu pé lé gabú nhâng râ matú a nghut, ngamoq é myit lé chyam wú nyi é Garaí Gasang lé, gabú nhâng râ matú shikut é ru nghut lhê.

⁵ Hkâsu mù gà le, nungmoq sê é eq rajung za, ngamoq gi, lhoq ngón mhaù é dang le hkâ-nhâm a chûng wú, nghop tô é myoqnoq myit le hkâ-nhâm a bò, Garaí Gasang gi, ngamoq é saksé nghut lhê.

⁶ Ngamoq gi, byu pé mai le, nungmoq mai le, gotú ó yuq mai le hkya-on râ lé ho nyi é

a nghut, Hkrisduq é lagyô pé nghut é eq rajung za, nungmoq lé wòlai hûn naù jáng wó hun lhê; nghut kôlhang,

⁷ înu rayuq, yhang é zoshâng zô pé lé hku baù é su, nungmoq chyáng nú-nhâm é dông nyi laì lò bê nghut lhê.

⁸ Ngamoq gi, nungmoq lé gyai yhang chyitdap lui, Garaí Gasâng é gabú danglù za a nghut, ngamoq é asak pé nungmoq lé byí pyâm le lhang nhik dik lhê; hkâsu mù gà le, nungmoq gi, ngamoq chyitdap dik é bang dut bekô nghut é yanmai nghut lhê.

⁹ Gumang wuì ê, nungmoq gi, ngamoq gyai yhang mù zui shikut é hkyô lé, gè gè bun kó râ nghut lhê; Garaí Gasâng é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wòlai a byi sháng gaq nghù, ngamoq gi, nyí lé, myín lé, mù zuì é nghut lhê.

¹⁰ Ngamoq gi, lumjîng bê bang nungmoq é hí má, hkâsu chyoiyúng é eq dingmán é, mara hûn râ a bo é bang dut laì lo é hkyô lé, nungmoq le, Garaí Gasang le, saksé nghut lhê.

¹¹ Hkâsu mù gà le, ngamoq gi, îwa rayuq mai yhumsing yhangzô pé lé kut byí é su, nungmoq yuq hkangmó lé, myit wum byí nyi é hkyô lé le, nhik taî tîng nyi é hkyô lé le,

¹² Yhang é mingdán eq hpungwup shinggang má, nungmoq lé wut yu é Garaí Gasang eq gingdán é dông, nungmoq asak wó dui nyi

sháng gaq nghû, nungmoq lé wum byi nyi é hkyô lé le, nungmoq yhang sê nyi lhê.

13 Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é hkûn, byu é dang lé lhom yu é dông a nghut e za, lumjîng é bang nungmoq má mù zuî nyi é, haû Garai Gasâng é mungdang lé yhang, lhom yù kô é yanmai, Garai Gasang lé xoq xoq jeju hkyâ-ôn nyi lhê.

14 Gumang wui ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpûng pé lé, alik kut yu é bang dut bekô nghut ri. Noqkuq hpûng haú pé gi, Yudaq byu pé zing-rî é lé hui zô é su, nungmoq le, yhumsing mau mâ é byu pé zing-rî é lé hui zô akô nghut ri.

15 Yudaq byu pé gi, haû Yhumsîng Yesuq eq myiqhtoî pé lé sat pyám kôluî, ngamoq lé le hkat htoq akô. Yhangmoq gi, Garai Gasang a ô nau é hkyô kut é bang, byù lhunglhang eq gyè dut é bang nghut akô.

16 Tûngbaù pé hkyi yù hui râ matù, ngamoq hko kyô é hkyô lé, yhangmoq hkûm akô; yhangmoq gi, hkâ-nhám le, yhumsing é mara lé dik shoq haú dông lhoq jat myô yù akô nghut ri. Haû mù, Garai Gasâng é nhikmo-yô é hkyô gi, yhangmoq ahtoq má jé bê nghut ri.

Htesaloni Byu Pé Lé Poluq

Huí Nau Nyi É Hkyô

17 Gumang wui ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bun-nghâm nyi luî, wó myang hui shoq nghû, ngamoq gyai yhang shikut nyi lhê.

18 Nungmoq chyáng ngamoq jé lé nau mù luî, ngò Poluq yhang, adàm dâm shikut wú bê; nghut kôlhang, Tsadán gi, ngamoq lé hkûm tang pyâm ri.

19 Hkâsu mù gâ le, nganhûng é Yhumsîng Yesuq Hkrisduq é hí má, Yhang jé lé é hkûn, ngamoq é myit myoqbyù hkyô, gabú hkyô eq gumrông râ janmaú gi, haí jung wá nghut lhê gâ le, nungmoq yhang nghut nyi lhê a nghut kó lúh?

20 Gè gè yhang, nungmoq gi, ngamoq é gumrông jowò eq gabú hkyô nghut nyi ri.

3

1 Haû mù luî, ngamoq gi, haû lé a wó jân nyi lo jáng, Ahten myuq má ngamoq baú nyi gyó le jé gè râ nghut lhê nghû, myit hpyit yù mù,

2 wuîhke jamjau shí pê é yanmai, ó yuq le, myit a hten kó sháng gaq nghû, nungmoq é lumjîng hkyô má, nungmoq lé wum-o byi râ eq myit wum byi râ matù,

3 Hkrisduq é gabú danglù lé hko kyô é hkyô má, ngamoq é gumang eq Garai Gasâng é mù wùn luzúm nghut é Timohiti lé, nhang kat é nghut lhê.

Nga-nhúng gi, wuĩhke jamjau pé hui zo rã matú, hkyin to huĩ é bang nghut é lé, nungmoq yhang rago sê nyi lhê.

⁴ Nga-nhúng gi, zing-ri hui zo rã nghut lhê nghũ, ngamoq, nungmoq eq rahá nghut nyi é hkũn, noq mai nungmoq lé ngamoq taĩ kyô nyi gù nghut bê. Nungmoq rago sê é eq rajung za, hau dông dut bê nghut ri.

⁵ Hau é yanmai, ngò a wó jân nyi lo jáng, hau gunglau sũ mai nungmoq lé gunglau yũ luĩ, ngamoq wùn waq bê muzó gi, akôm dut byuq rã lé, myit chiq mù, nungmoq é lumjíngh hkyô lé wó sé rã matú, yhang lé ngò nhang kat é nghut lhê. Gunglau sũ gi, nat Tsadán nghut lhê.

Timohti Lo Shit Kyô É Wum Byi Dang

⁶ Ahkuĩ kúm, Timohti gi, nungmoq é lumjíngh hkyô eq chyitdap myit eq sêng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bũn nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo taĩ kyo bê nghut ri.

⁷ Hau mù luĩ, gumang wuĩ ê, ngamoq myit myo uhkyĩ é hkyô eq zing-ri huĩ é hkyô pé banshoq má, nungmoq é lumjíngh hkyô é yanmai, nungmoq eq séng luĩ myit wum byĩ é hkyô lé ngamoq wó yũ bê nghut lhê.

⁸ Ahkuĩ, ngamoq gi, hau Yhumsíngh má nungmoq yap gíngh nyi kô é yanmai, gè gè nyi ngón bê nghut lhê.

⁹ Nga-nhúng é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsu kut jeju ùng hkya-on rã lú?

¹⁰ Ngamoq gi, nungmoq lé dum myàng rã matú eq, nungmoq é lumjíngh myit má langhpyut é hkyô lé wó lhoq hkũm byi rã matú, nyi, myín, gyai yhang lhumzui luĩ kyũdũng nyi lhê.

¹¹ Nungmoq chyáng ngamoq lé rã matú, nga-nhúng é Yhumsíngh Yesuq eq nga-nhúng é Íwa Garai Gasang yhang ngamoq lé hkyô hpóng byi sháng gaq.

¹² Nungmoq lé ngamoq chyitdap nyi é su, hau Yhumsíngh gi, nungmoq é chyitdap myit lé, rayuq eq rayuq é ahtoq má le, yuq hkangmó é ahtoq má le, lhoq kô jat, lhoq pyíngh byi sháng gaq.

¹³ Nga-nhúng é Yhumsíngh Yesuq gi, Yhâng é chyoiyúng bang banshoq eq rahá lé é hkũn, nga-nhúng é Íwa Garai Gasâng é hí má, nungmoq gi, mara hũn jowò a joq é eq chyoiyúng é bang dut rã matú, nungmoq é myit nhiklhum má, hau Yhumsíngh mai wum-o lhoq kíngh byĩ nyi sháng gaq. Yhâng é chyoiyúng bang gâ é gi, byù lé, a nghut jáng, mau-

mang lagyô pé lé, taí záng lhê.

4

Garai Gasang Ô Nau É Đông Asak Dui Râ Hkyô

¹ Xoq luí taí nau é gi, gumang wui ê, ngamoq gi, ahkuí nungmoq cháng nyi é eq rajung za, nungmoq hká đông nyi yap luí, Garai Gasang lé gabú nhâng râ hkyô nungmoq lé mhoqshit byi bê nghut lhê. Ahkuí le, ngamoq gi, shí hkyô lé nungmoq hau htoq je wó châng jat râ matú, Yhumsing Yesuq má nungmoq lé dúng tôngbán luí, myit wum byi kat lhê.

² Hkâsu mù gâ le, nungmoq gi, haú Yhumsing Yesuq é ahko ahkáng đông, ngamoq mai, nungmoq lé mhoqshit to byí é hkyô pé lé, sê akô nghut ri.

³ Garai Gasang ô nau é hkyô gi, haú nungmoq sân-yúng é hui râ matú le, ashop é đông gungsho zùm yap é hkyô lé koi pyám râ matú le;

⁴ nungmoq yuq hkgámó gi, haú Garai Gasang lé a sê é, a lumjínng bang kut é su, gungsho yut yut ô nau é hkyô a châng e za,

⁵ haú chyoyúng é eq hkungga gíng é sù wó dut shoq, yhumsing gùng lé wó hkgang é hkyô mhoq yú râ matú le;

⁶ shí hkyô eq séng luí, ó yuq le, yhumsing é gumang lé, a ge shut, a ge lhúngzo râ matú le nghut lhê. Ngamoq, nungmoq lé taí kyo mù, lhoq pun lhoq kying gù nghut bê

eq rajung za, haú Yhumsing gi, haú hkyô shut é banshoq lé, dam byi râ nghut lhê.

⁷ Hkâsu mù gâ le, Garai Gasang gi, nga-nhúng lé a sân-yúng é bang dut râ matú wut yu é a nghut, chyoyúng é đông asak dui nyi râ matú sheq wut yu é ru nghut lhê.

⁸ Haú mù luí, mhoqshit hkyô shí lé he-ngik pyâm é sù gi, byù lé he-ngik é a nghut, haú nungmoq lé, Yhâng é Chyoyúng Woi-nyí byí tô é sù, Garai Gasang lé he-ngik pyâm é sheq ru nghut lhê.

⁹ Rayuq eq rayuq chyitdap lhum râ matú, nungmoq yhang, Garai Gasang éq mhoqshit é hui bekô nghut é yan-mai, gumang yhangchang chyitdap lhúm é hkyô eq séng luí, ngamoq gi, nungmoq chyáng kê kat byi a ra lo nghut ri.

¹⁰ Haú eq rajung za, nungmoq gi, Makedoni mau gón mâ é gumang wui banshoq lé chyitdap nyi akô nghut ri. Nghut kôlhang, gumang wui ê, haú su je myo kut râ matú nungmoq lé ngamoq wum byí lhê.

¹¹⁻¹² Nungmoq é nyí wui lhê é asak dui hkyô má, gotú byu pé éq hkunggá é wó yú luí, ó yuq lé le, lumhkaú a ra wó dut sháng gaq, hí hkùn nungmoq lé ngamoq taí kyô tô é eq rajung za, num num byù zè râ hkyô lé le, yhumsing eq a séng é hkyô a kut wún râ lé le, yhumsing loq éq zui saí mù nyi râ lé le, nungmoq é myit myoqbyù jowò kut yú keq.

Haû Yhumsîng Gyó Lé Râ Hkyô

13 Gumang wuê, myit myoqbyù hkyô a wó é byù góbang su, nungmoq, iyon ningtsáng a dut kó sháng gaq, haû yhup ngón byuq é bang eq séng luí, nungmoq a sé râ lé, ngamoq a ô nau é nghut lhê. Yhup ngón byuq é bang gâ é gi, lumjîng luí shí ló byuq é bang lé gâ é nghut lhê.

14 Hkâsu mù gâ le, Yesuq shí luí, dum dui toq bê hkyô lé nga-nhúng lumjîng é yan-mai, Garai Gasang gi, Yesuq má yhup ngón byuq é bang lé, Yesuq eq rahá shuí lé râ nghut lhê nghû, nga-nhúng lumjîng é nghut lhê.

15 Haû Yhumsîng taí é dang eq rajung za, nungmoq lé ngamoq taí kyo kôlé, haû Yhumsîng dum lé é hkûn, asak dui nyi é eq myit gyo tô é bang nga-nhúng gi, yhup ngón byuq bê bâng htoq ratsuí le wó hí râ a nghut.

16 Hkâsu mù gâ le, haû Yhumsîng yhang gi, htê mó hkunmó èq le, maumang lagyo mó é hte èq le, Garai Gasâng é tutmó mut hte èq le, mauhkûng mai gyó lé lô luí, haû Hkrisduq má shí ló bê bang hí dui toq râ nghut lhê.

17 Hau htâng, asak dui nyi é eq myit gyo tô é bang nga-nhúng gi, yhangmoq eq rahá mhut htoq má shuí toq yu é hui luí, maulat má haû Yhumsîng eq hui râ nghut lhê. Haû hkûn, nga-nhúng gi, haû Yhumsîng eq ahtum abyuq nyi nyi berâ nghut lhê.

18 Haû mù luí, nungmoq gi, dang shí pé mai rayuq eq rayuq myit wum byí lhûm nyi keq.

5

1 Nghut kôlháng, gumang wuê, ahkyíng buinyi eq séng luí, nungmoq lé ngamoq kâ hûn byi a ra lo nghut ri.

2 Hkâsu mù gâ le, haû Yhumsîng é buinyi gi, myín lé hkau sù wang é su jé lé râ nghut é hkyô lé, nungmoq rago za sê akô nghut ri. Yhumsîng é buinyi gi, Yesuq dum jé lé râ buinyi lé taí nau é nghut lhê.

3 Byu pé gi, 'Nguingón yuqyo ri.' ga taí nyi bùm kô é u lé, gùng lai é myiwe rayuq zohkû-nò no lo é su, htên byoq hkyô gi, byodàn tung yhangmoq chyáng jé luí, hká dông lé yhangmoq wó hpang lut kó râ a nghut.

4 Nghut kôlháng, gumang wuê, nungmoq gi, mauchut hkaû má nyi é bang a nghut é yanmai, buinyi haû gi, hkau sù lé é su, nungmoq é matú byodàn tung dut râ a nghut.

5 Nungmoq lhunglhâng bang gi, maubó é yhangzô pé eq nyí é yhangzô pé nghut lhê. Nga-nhúng gi, myín eq mauchut hkaû eq séng é bang a nghut.

6 Haû mù luí, nga-nhúng gi, byù góbang su a yhup nyi e za, machyâ luí, gyíng gyíng kut nyí sháng.

7 Hkâsu mù gâ le, yhup é bang gi, myín lé yhup akô; í shuq wut é bang le, myín lé shuq wut akô.

⁸ Nghut kôlhang, nga-nhúng gi, nyí eq sêng lhê nghut é yanmai, gying gying kut nyí luí, lumjǐng myit eq chyitdap myit lé gi, wànggò-long lé su gò to, hkyi yù hui râ lé myit myoqbyù tô é hkyô lé gi, shamtoq-muq lé su tsung to, kut sháng.

⁹ Hkâsu mù gâ le, Garai Gasang gi, Yhâng nhikmo-yô é hkyô lé hkâm zo râ matú, nga-nhúng lé hkyin tô é a nghut e za, nga-nhúng é Yhumsǐng Yesuq Hkrisduq mai, hkyi yù hkyô lé nga-nhúng wó yù râ matú hkyin to bê nghut lhê.

¹⁰ Yesuq gi, nga-nhúng yhup bûn nyí kôlhang, yhup ngón to kôlhang, Yhang eq rahá wó nyi nyí sháng gaq ga, nga-nhúng é matú shí hkâm byi bê nghut ri.

¹¹ Haû mù luí, nungmoq gi, ahkuí, nungmoq kut nyí é eq rajung za, rayuq eq rayuq myit wum byí lhum mù, htuqluq htuqbang kut lhùm nyí keq.

Ló Htâng Lhê É Mhoqshit Hkyô

¹² Gumang wuì ê, nungmoq mâ é muzó shikut luí, haû Yhumsǐng má nungmoq lé up nyi é eq lhoq pun lhoq kyǐng nyi é bang lé, nungmoq hkungga râ matú le;

¹³ yhangmoq zui saí é muzó jizó é yanmai, yhangmoq lé chyitdap myit dông gyai yhang hkungga râ matú le, nungmoq lé ngamoq sang kat lhê. Nungmoq le, rayuq

eq rayuq nguingón lhùm nyí keq.

¹⁴ Gumang wuì ê, nungmoq lé ngamoq wum byí kat nau é gi, lagôn é bang lé lhoq pun lhoq kying keq; nhiknge é bang lé myit wum byi keq; wum nyhôm é bang lé htuqluq htuqbang kut keq; yuq hkangmó lé, i-myt hǐng byí nyí keq;

¹⁵ ó yuq lé nghut kôlhang, a ge é hkyo é yanmai, a ge é dông a taû kut râ lé lhoq pun lhoq kyǐng nyí keq; nungmoq rayuq eq rayuq le, góbang banshoq eq le, shikut luí, hkâ-nhám le, ge é hkyô kut byí lhum nyí keq.

¹⁶ Hkâ-nhám le, ru gabú nyí keq;

¹⁷ abyit alan kyûdûng nyí keq;

¹⁸ hkyô hkat hkangmó má jeju hkyâ-ôn nyí keq, hkâsu mù gâ le, haû pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

¹⁹ Haû Woi-nyí lé hkâlhoq jôm pyám kó;

²⁰ myiqhtoi htoí é lé, haí su a ngàm hkâkut kó.

²¹ Jung hkangmó lé, chyam wú luí, ge é hkyô lé zú zing nyí mù,

²² agè ashop é hkyô hkangmó lé, koi pyám keq.

²³ Nguingón hkyo é apûn awang nghut é Garai Gasang yhang, nungmoq lé, lhunglhang lhoq sân-yúng pyám byi sháng gaq; nga-nhúng é Yhumsǐng Yesuq Hkrisduq dum lé é hkûn,

nungmoq é woi-nyí, myit
nhiklhum, gungdu gi, mara
hûn râ hkyô a bò sháng gaq.

²⁴ Nungmoq lé ji yu é Sû
gi, lhumzuí é Sû nghut lhê
mù, Yhang, shí hkyô lé kut râ
nghut lhê.

²⁵ Gumang wuì ê, ngamoq é
matú kyû bo dung byi kó laq.

²⁶ Gumang wuì banshoq
bang lé, chyoiyúng é chyitpuq
puq é dông bo shi-kyám byi kó
laq.

²⁷ Gumang wuì banshoq
bang lé, hun kat é laiká shí ng-
hap kyo râ matú, haû Yhum-
sing é myìng mai, ngò, nung-
moq lé pyìng kat lhê.

²⁸ Nga-nhûng é Yhumsîng
Yesuq Hkrisduq é jeju gi,
nungmoq chyáng ru joq nyí
sháng gaq ô!

HTESALONI Pê Chyáng Htang Dàm Hun Kat é Laiká (2 Thessalonians)

1 Ngò Poluq eq Sila, Timohti pé gi, nga-nhùng é Íwa Garai Gasang eq Yhumsing Yesuq Hkrisduq má nghut nyi bê bang, haù Htesaloni wà mó byu pé é noqkuq hpúng lé dang kyô kat lhê.

2 Haù Íwa Garai Gasang eq Yhumsing Yesuq Hkrisduq chyáng mã é jeju eq nguingón hkyô gi, nungmoq chyáng ru joq nyi sháng gaq ô!

Jeju Hkya-on É Eq Kyúdùng É Hkyô

3 Gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri; haù gi, gíng lhê; hkâsu mù gâ le, nungmoq é lumjíng myit gi, je je kô jat lo nyi luí, nungmoq yuq hkangmó é chyitdap myit le, rayuq eq rayuq é ahtoq má je myô jat lo nyi é yanmai nghut lhê.

4 Haù mù luí, ngamoq gi, nungmoq zing-ri huí é hkyô pé eq wuìhke jamjau huí é hkyô pé banshoq lé, nungmoq wó jân nyi kô é yanmai, nungmoq é hkam jan hkyô eq lumjíng hkyô lé, Garai Gasang é noqkuq hpúng pé é hí mã gumrong nyi lhê.

5 Shí hkyô banshoq gi, haù Garai Gasang dingmán é đông jéyáng é hkyô lé saksé tûn

shit é nghut lhê; haù mù luí, nungmoq gi, Garai Gasang é mingdán é matú wuìhke jamjau hui zo bekô nghut é yanmai, mingdán haù eq gíngdán é bang gâ é hui kó râ nghut lhê;

6 Garai Gasang gi, tengmán Sû nghut lhê; haù mù, nungmoq lé jamjau byi é bang lé, Yhang mai jamjau byi râ eq,

7 jamjau huí nyi é bang nungmoq lé le, ngamoq lé le lhoq lhut byi râ nghut lhê. Shí hkyô gi, haù Garai Gasang lé a sê é bang eq nga-nhùng é Yhumsing Yesuq eq sêng é gabú danglù lé a gyo a châng é bang lé, jéyáng râ matú,

8 haù Yhumsing Yesuq, wum-o a-tsam byíng é Yhâng é maumang lagyô pé eq rahá, myishâm eq mauhkung mai htoq shit é hkûn, dut râ nghut lhê.

9 Yesuq jé lé lô mù, Yhâng é chyoiyúng bang má hpungwup shíngkang wó yu é eq lumjíng bang banshoq mai mauhong é huí é buinyi má, yhangmoq gi, htên byoq hkyô lé ahtum abyuq jéyáng é hui zo kó râ nghut lhê.

10 Hau htoq agó, haù Yhumsing é hí mai le, Yhâng é a-tsam kô làm é mai le, lhoq kâng pyâm é hui kó râ nghut lhê. Ngamoq é saksé dang lé nungmoq lumjíng bekô nghut é yanmai, haù lumjíng bang má nungmoq le lòm bekô nghut lhê.

11 Haù mù luí, nga-nhùng é Garai Gasang gi, nungmoq lé, Yhang ji yu é hkyô eq gíngdán

ri ga rã le, haũ Yhang é wum-o a-tsam mai, nungmoq myit tô é ge é hkyô hkangmó eq nungmoq é lumjıng myit eq sêng é muzó lhumjup lé, lhoq dik byi sháng gaq nghũ le, nungmoq é matú, hkã-nhám le, ngamoq kyũdung byi nyi lhê.

¹² Ngamoq haũ su dung byi nyi é hkyô gi, nga-nhũng é Garai Gasang eq Yhumsıng Yesuq Hkrisduq é jeju yanmai, haũ nga-nhũng é Yhumsıng Yesuq é myıng gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó rã matú nghut lhê.

2

A Tara É Sũ

¹ Gumang wui ê, haũ nga-nhũng é Yhumsıng Yesuq Hkrisduq dum lé rã hkyô, Yhang eq nga-nhũng rahá zup nyi to rã hkyô eq séng luı, nungmoq lé ngamoq pyıng kat nau é gi,

² haũ Yhumsıng é buinyi gi, jé to gũ nghut bê gã é myiqh-toi dang, luhkyang, laiká pé rajung jung, ngamoq chyáng mã é nghut lhê ga nungmoq chyáng jé é nghut jáng, nungmoq é myit lui za hkãduı kó, hkãgyuq dân kó.

³ Hkãsu mù gã le, haũ htên byoq é yhangzo nghut é a tarã Sũ htoq shit luı, haũ gumlau toq é hkyô hí a htoq htoq gi, buinyi haũ jé rã a nghut, haũ mù luı, nungmoq lé, ó yuq èq, hkã dông mai mhaũ kôlhãng hkãjıng kó.

⁴ Haũ yuq gi, Garai ga noqkuq huı é zè lhunglháng lé htıq htıng luı, haũ pé ban-shoq é htoq má yhanggũng yhang lhoq gyaũ yũ rã nghut lhê; haũ mù luı, Garai Gasang é noqkuq yhũm má zung to luı, yhanggũng yhang Garai Gasang nghut lhê ga tai rã nghut lhê.

⁵ Ngò gi, nungmoq eq rahá nyi tô é hkũn, shı hkyô pé lé lhaq tai kyo kyo kut é hkyô lé, nungmoq a bun lo kó lhũ?

⁶ Haũ yuq gi, ahkyıng yam-yoq jé jáng sheq htoq shit sháng gaq ga, ahkuı, yhang lé hai èq hkũm zıng tô é hkyô lé, nungmoq sê lhê.

⁷ Haũ a tara é hkyo é haq dã é a-tsam gi, mũ zui nyi gũ nghut bê; nghut kôlhãng, haũ lé hkũm zıng nyi sũ gi, hui htot pyám huı é hkũn jé shoq, haũ lé hkũm zıng nyi shırã nghut lhê.

⁸ Haũ hui htot pyám huı é hkũn, a tarã Sũ htoq shit rã nghut lhê; haũ Yhumsıng Yesuq kũm gi, Yhãng nhut mã é soq èq yhang lé sat pyám rã eq, Yhang gyó lo u lhê é hpungwup mó èq, yhang lé lhoq htên pyám rã nghut lhê.

⁹ Haũ a tarã Sũ lé lo é gi, Tsadãn a-tsam dông lak-lai kumlhá pé, kumlhá pé, mauhpo muzó pé ajung jung kut mhaũ é eq,

¹⁰ htên byoq huı nyi é bang lé mhaũ zo rã agè ashop é hkyô jung hkangmó lé tũn shit rã nghut lhê. Yhangmoq htên byoq é gi, haũ tengmán hkyô lé chyitdap luı hkyi yũ

hui râ nghut é hkyô lé he-ngik pyám kô é yanmai nghut ri.

11 Hau é yanmai, Garai Gasang gi, haû tengmán hkyô lé a lumjǐng e za agè ashop hkyô má ô nau é lhunglhâng bang mara byí é hui kó sháng gaq ga,

12 mhaû é dang lé jǐng kó râ matú, a-tsam mó bo é lum shut râ hkyô lé, yhangmoq chyáng nhâng byi bê nghut ri.

Mhoqshit é hkyô má gǐng nyi râ hkyô

13 Nghut kôlhâng, haû Yhumsǐng chyitdap é gumang wuì ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri. Hkâsu mù gâ le, haû Woi-nyí eq lhoq sân-yúng nyi é muzó dông le, tengmán hkyô lé lumjǐng é dông le, hkyi yù hui râ matú, Garai Gasang gi, nungmoq lé, sânghi mai hkyin yù bê nghut ri.

14 Yhang gi, nga-nhông é Yhumsǐng Yesuq Hkrisduq é hpungwup shǐngkang má, nungmoq wó bo lôm shoq ga, ngamoq é gabú danglù dông nungmoq lé shí hkyô má ji yù bê nghut lê.

15 Haû mù luí, gumang wuì ê, nhutdang dông nghut nghut, laiká dông nghut nghut, nungmoq lé ngamoq lai byí é mhoqshit hkyô lé zuí gǐng nyi luí, gǐng gǐng yap nyi keq.

16 Yhâng é jeju yanmai, nga-nhông lé, ahtum abyuq é myit wum byi hkyô eq ge é myit myoqbyù hkyô lé byí é,

nga-nhông lé chyitdap é, nga-nhông é Íwa Garai Gasang eq nga-nhông é Yhumsǐng Yesuq Hkrisduq gi,

17 nungmoq é i-myit má wum byi luí, ge é muzó eq ge é nhutdang lhunjup má, nungmoq lé wum-o lhoq kǐng byi sháng gaq ô!

3

Kyû Dung Byi Râ Matú Lung Kat É Hkyô

1 Gumang wuì ê, je htâng má pying kat nau é hkyô gi, nungmoq chyáng dut wú bê eq rajung za, haû Yhumsǐng é mungdang gi, hân hân byo myín ló mù, lhoq gyaú é hui sháng gaq, ngamoq é matú kyû bo dung byi kó laq.

2 Yuq hkangmó gi, lumjǐng myit bo é a nghut é yanmai, haû achayut agè ashop é byu pê chyáng mai ngamoq wó lut râ matú le, kyû bo dung byi kó laq.

3 Nghut kôlhâng, haû Yhumsǐng gi, lhunzuí é sù nghut é yanmai, Yhang nungmoq lé wum-o lhoq kǐng byi mù, haû agè ashop su chyáng mai nungmoq lé hung yù râ nghut lê.

4 Nungmoq gi, ngamoq pying tô é dang pé lé kut nyi mù, xoq luí le kut nyi râ nghut lê nghû, haû Yhumsǐng má ngamoq hkyak myit lum tô lê.

5 Haû Yhumsǐng gi, nungmoq lé Garai Gasang é chyitdap hkyô eq Hkrisduq é hkam jân é hkyô má, shuí wàng sháng gaq ô!

Mû Zui Shikut Râ É Hkyô

⁶ Gumang wuê ê, ngamoq gi, ngamoq chyáng mai nungmoq hap yù bê ngamoq mhoqshit é hkyô dông a nyi yap é eq lagôn é gumang ó yuq eq le, we we nyi keq nghû, haû Yhumsing Yesuq Hkrisduq é mying mai nungmoq lé hkunmó hkyô kat lhê.

⁷ Hkâsu mù gâ le, ngamoq kut é alik lé hká dông cháng râ dut é gi, nungmoq yhang sê lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq agó,

⁸ ó yuq é zoshuq lé le, ngùn a byi é a zo wú é nghut lhê. Nungmoq má ó yuq lé le wòlai a byi sháng gaq nghû, ngamoq gi, muzó shikut hkyô eq wuîhke hkyô má, nyi lé, myín lé, zui saí é nghut lhê.

⁹ Ngamoq gi, nungmoq lé garúm nhâng râ ahkáng a wó é a nghut, yhumsing gùng lé nungmoq cháng râ matú alik dut sháng gaq nghû sheq, haû su kut é ru nghut lhê.

¹⁰ Hkâsu mù gâ le, ngamoq, nungmoq eq rahá nyi é hkûn, "Mû a kâm zui sù gi, a zo sháng gaq." nghû, nungmoq lé ngamoq mai sang to bê nghut lhê.

¹¹ Hkâsu mù gâ le, nungmoq chyáng mâ é byù ra-am lagon luí, haî mù le a zui e za, mù châng lhoq gyô byi wún akô gâ é hkyô lé, ngamoq wó gyô é yanmai nghut lhê.

¹² Ngamoq gi, haû su kut é bang lé, zim za nyi mù zui saí luí, yhumsing é zoshuq ho nyi kó sháng gaq nghû, haû

Yhumsing Yesuq Hkrisduq é mying lé lang luí, hkunmó hkyô kat mù, wum byi kat lhê.

¹³ Gumang wuê ê, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.

¹⁴ Byù rayuq yuq gi, laiká shi má ngamoq mhoqshit é hkyô lé, a châng é nghut jáng, haû yuq lé rago chôm matsing yù mù, yhang hoq bun sháng gaq, yhang eq hkâzûm yap kó.

¹⁵ Nghut kôhang, yhang lé gyè rayuq dông a sôn e za, gumang rayuq dông lhoq pun lhoq kying nyi keq.

Ló Htâng Lhê É Shi-kyám Dang

¹⁶ Haû nguingón hkyo é Yhumsing yhang gi, ahkying hkangmó eq hkyô hkat hkangmó má, nungmoq lé nguingón hkyô byi nyi sháng gaq. Haû Yhumsing gi, nungmoq banshoq bang eq ru nyi nyi sháng gaq.

¹⁷ Ngò, Poluq gi, ngá é loq mai yhang shi-kyám dang shi lé kâ kat lhê; shi gi, ngò kâ é laiká banshoq má kumlhá nghut lhê. Ngò kâ é gi, shi dông chyat nghut lhê.

¹⁸ Nga-nhung é Yhumsing Yesuq Hkrisduq é jeju gi, nungmoq banshoq bâng chyáng ru joq nyi sháng gaq ô!

TIMOHTI **Chyáng Hî Dàm Hun** **Kat é Laiká** **(1 Timothy)**

¹ Nga-nhùng é hkyi yù Sû Garai Gasang eq nga-nhùng é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi,

² haù lumjíngh hkyô má ngá zo sîng nghut sù, Timohti lé dang kyô kat lhê; haù Íwa Garai Gasang eq nga-nhùng é Yhumsîng Hkrisduq Yesuq chyáng mâ é, jeju eq shogyo nhikmyin hkyô, nguingón hkyô gi, náng chyáng ru joq nyí sháng gaq ô.

Sará Pyoq Pé Lé Sidiq Râ Hkyô

³ Ngò, Makedoni mau má jé wang ló é hkùn, pying to hkô é eq rajung za, Ehpesu myuq má nyi to shi aq; haù hkùn sheq, nàng gi, shut shai é mhoqshít hkyô lé mhoqshít é bang a mhoq xoq lo râ matú le,

⁴ myit htoq mhô-myi dang eq a dat htúm é byù xik labaù má yhangmoq a ap nóng râ matú le, haù bang lé hkunmó wó hkyó râ nghut lhê. Haù hkyô pé gi, lumjíngh myit mai kut htoq é Garai Gasâng é muzó lé lhoq htoq râ malai, mabyoq jishúm za sheq lhoq htoq nyi é nghut lhê.

⁵ Haù hkunmó hkyó luí myit myoqbyu tô é hkyô gi, chyitdap myit yhang nghut

ri; chyitdap myit haù gi, sansêng é i-myt, mara a bò bôn é myit eq lumjíngh myit akying mai lo é nghut lhê.

⁶ Byù ra-am gi, haù hkyô pé mai htoq ló kôluí, dangsôm tai é hkyô shut lhing ló byuq bekô nghut ri.

⁷ Haù bang gi, jep é tarâ sará pé dut naù kôlhang, yhangmoq haì tai nyi é hkyô lé le, hkyak, haì lé mhoqshít é hkyô lé le, a sé kó nghut ri.

⁸ Rayuq yuq, jep é tarâ lé rago chung é nghut jáng, jep é tarâ gi, ge é hkyô nghut é lé, nga-nhúng sê lhê.

⁹ Haù jep é tarâ gi, dingmán bâng é matú tô tô é a nghut e za, tarâ lu lai é bang eq gumlau toq bâng é matú, tarâ a hkunggâ é bang eq mara kut bâng é matú, a chyoiyúng é bang eq lumjíngh hkyô a cháng bâng é matú, yhangmoq é yhangwa lé nghut nghut, yhangnu lé nghut nghut, sat pyám bâng é matú, byù sat bâng é matú,

¹⁰ ashop é đông gungsho zùm yap é bang eq yuqgè yhangchang nyi zo lhum bâng é matú, jùn đông byù ung zo bang, mhaù é bang eq dakam mhaù bâng é matú, tengmán mhoqshít hkyô eq shai lhum é lhunglhang bâng é matú sheq, jep é tarâ tô tô é nghut é lé, nga-nhúng sê lhê.

¹¹ Tengmán mhoqshít hkyô haù gi, hkungsô wó é Garai Gasâng eq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

Poluq Chyang Yhumsing É Jeju Joq Nyi É Hkyô

¹² Ngò gi, ngo lé wum-o byi é, nga-nhông é Yhumsing Hkrisduq Yesuq lé jeju hkyá-ôn lê; hkâsù mù gâ le, Yhang gi, ngo lé lhumzui sù rayuq dông sôn yù luí, Yhâng é muzó jizó má hkyin kat yu é yan-mai nghut lê.

¹³ Hí hkûn, ngò gi, Garai Gasang lé taí hpoi sù, zing-ri sù eq byù rhoí sù nghut wú kôlhang, a sé shi mù lumjín myit a bo e za kut é yanmai, shogyo nhikmyîn yu é hkyô lé ngò wó yu é nghut lê.

¹⁴ Nga-nhông é Yhumsing é jeju lé le, Hkrisduq Yesuq eq séng é lumjín myit eq chy-ít-dap myit lé le, ngá chyang agùn agó hut hkyô kat byi bê nghut ri.

¹⁵ Yubak dap bang lé hkyi yù râ matú, Hkrisduq Yesuq gi, mingkan má jé lé bê gâ é dang gi, lumjín é mungdang nghut luí, gè gè yhang lhom yù gín é dang nghut lê. Haú yubak dap bang má, ngò gi, yubak je ko sù nghut é nghut lê.

¹⁶ Nghut kôlhang, Hkrisduq Yesuq gi, Yhang lé lumjín luí ahtum abyuq é asak lé wó yù râ bâng é alik dut râ matú, yubak dap bang má yubak je ko sù nghut é, ngá é ahtoq má, Yhâng é hkam jan hkyô lhunglhang wó tân shit sháng gaq ga, Garai Gasang gi, ngo lé shogyo nhikmyîn yu ri.

¹⁷ Haú mù, haú aróng eq hpungwup shingkang gi, ahtum abyuq é, a dat htên byoq

é, myoq eq a byu-myang é Hkohkâm nghut sù, rayuq zâ é Garai Gasang chyang pyat dedu ahtum abyuq ru joq nyi sháng gaq ô! Amen.

¹⁸ Ngá zo Timohti ê, nàng eq séng luí myiqhtoi dang joq wú é eq rajung za, ngò gi, nang lé haú dông mhoqshit kat lê; haú mù, nàng gi, haú pé lé chung nyi luí, ge é majan zan mù,

¹⁹ lumjín myit eq mara a bò bûn é myit bo nyi sháng gaq. Byù ra-am gi, haú hkyô pé lé he-ngik pyám kô é nghut luí, yhangmoq é lumjín myit gi, wui-sanghpo htên byoq ló é su htên byoq byuq bekô nghut ri.

²⁰ Haú bang má, Humenu eq Alesander le bò kômù, Garai Gasang lé taí hpoi é dang a taí râ matú mhoq yù kó sháng gaq nghù, ngò, yhangnhik lé Tsadán é loq má ap pyám bê nghut lê.

2

Noqkuq Hkyô Eq Séng Luí Mhoqshit Byi É Hkyô

¹ Haú mù luí, ngò, hí pying kat nau é gi, tarâ hkunggâ é eq hkungga gín é hkyô ban-shoq má, nga-nhông wó ngu-íngón yuqyo nyi sháng gaq, hkohkâm pé eq ahkáng ayá wó bang ban-shoq é matú le,

² yuq hkanmó é matú le, dúng tôngbán byi, kyûdung byi, dúng xoq byi, jeju hkyá-on byi, kut aq nghú nau ri.

³ Haú gi, ge é hkyô nghut mù, nga-nhông é hkyi yù Sù

Garai Gasang ô nau é hkyô nghut ri.

⁴ Yhang gi, byù lhunglhang bang hkyi yu é hui mù, tengmán é mungdang lé sê gyo rá lé, ô nau nyi ri.

⁵ Hkâsu mù gâ le, Garai Gasang gi, rayuq za nghut luí, Garai Gasang eq byu é gyoro má sô xoq byi sù le rayuq za nghut lhê; haú yuq gi, xângzo byù nghut é Hkrisduq Yesuq nghut ri.

⁶ Yhang gi, byù lhunglhang bâng é matú shihtai gunglik hkungga đông Yhânggùng lé byi pyám bê nghut ri; haú gi, ahkying yam-yoq jé é hkun, saksé htoq shit bê nghut lhê.

⁷ Ngò gi, tûngbaù pé lé, tengmán é lumjing hkyô mhoqshit rá matú, hkô kyo sù rayuq eq lagyo rayuq đông hkyin tô é hui sù nghut lhê. Ngò, haú su tai é gi, mhaú tai é a nghut, têng é hkyô lé za tai nyi é ru nghut lhê.

⁸ Yuqgè wui gi, nhikjum yô é hkyô eq dang htíng htíng lhùm é hkyô a bo e za, jowò hkanmó má chyoyúng é loq tú mù kyûdung rá lé, ngò ô nau ri.

⁹ Myiwe wui gi, xâm nik nik é, hîng zè, palhé, hpaù jung mebù eq a mhôn chung e za, siri bo é mebu wut chûng mù, tap tap za, shuq shuq za kut luí,

¹⁰ Garai Gasang lé noqkuq é myiwe wui eq gíng shoq, ge é muzó eq yhumsing gùng lé mhôn nyi rá lé le, ngò ô nau ri.

¹¹ Myiwe gi, uphkanng tô é đông châng nyi mù, zim za mhoq yu kó sháng gaq.

¹² Myiwe gi, yuqgè lé mhoqshit rá hkyô lé le, yuqgè lé uphkanng rá hkyô lé le, ngò ahkáng a byi; myiwe gi, zim za kut nyi ra rá nghut lhê.

¹³ Hkâsu mù gâ le, Adam lé hí hpan to mù, Ewaq lé hpan é ru nghut lhê.

¹⁴ Hau htoq agó, Adam gi, mhaú é hui zo sù a nghut; haú myiwe sheq mhaú é hui zo luí, mara kut shut é ru nghut lhê.

¹⁵ Nghut kôlhang, myiwe wui gi, lumjing myit, chyitdap myit eq chyoyúng hkyô má, shuq shuq za kut mù, yhangmoq xoq châng nyi kô é nghut jáng, zoshâng hku é đông mai hkyi yu é hui kó rá nghut lhê.*

3

Hpúng-up Eq Hpungtê Kut Râ Bâng É Hkyô

¹ Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi ri gâ é dang gi, lumgíng é dang nghut nyi ri.

² Haú mù luí, hpúng-up rayuq gi, mara hûn rá hkyô a bo é sù, myiwe rayuq za wó é sù, dat sidiq é sù, yhumsing gùng lé wó hkanng é sù, hkungga gíng é sù, byù bíng lé dat hkulum é sù, dat mhoqshit é sù,

³ Íhpê é jùn a dut é sù, byoq lhum byoq cheq a kut e za nûm é sù, mabyoq jishûm a

lhoq htoq é sù, ngunzè lé a chyitdap é sù, nghut râ lê.

⁴ Yhang gi, yhâng é ikun lé rago dat uphkâng luí, yhang zô pé mai hkungga myit bo é eq yhâng dang lé gyo byí é sù le, nghut râ lê.

⁵ Rayuq yuq, yhumsing é ikun lé lháng a dat uphkang é nghut le gi, Garai Gasâng é noqkuq hpúng lé gi, hkâsu kut wó wú gon râ lúh?

⁶ Chángzo dut é a myáng shi é sù gi, hpúng-up wó kut râ a nghut, kut é nghut jáng, yhang gi, nghutbùn lò luí, jéyáng é hkyô lé nat Tsadán hui zô é su hui zo abe.

⁷ Hpúng-up rayuq gi, tûngbau pê hí má ge é myìng wó é sù le dut râ lê; haû jáng, yhang gi, taí hpoí pyâm é lé le a hui, nat Tsadán é tuihkyó má le a myí, dut râ nghut lê.

⁸ Haû eq rajung za, hpungtê pé gi, hkungga gíng é bang, shô-kó a xân é bang, îhpê é jùn a dut é bang, a tengmán é amyat lé a ho é bang, nghut râ lê.

⁹ Yhangmoq gi, lumjíng hkyô mâ é nik é mauhpo tengmán hkyô pé lé, sansêng é i-myt eq châng nyí ra râ nghut lê.

¹⁰ Yhangmoq gi, chyam é lé hí huí wú kó sháng gaq, hau htâng, yhangmoq lé mara hún râ hkyô haí a bò lo jáng, hpungtê mù lé wùn kó sháng gaq.

¹¹ Haû eq rajung za, yhangmoq é yhumsing myhí pé le, myit no nhang é dang a taí e za, dat sidíq é eq hkyô

hkangmó má lumjíng luí, hkungga gíng é myiwe wui, nghut ra râ dut lê.

¹² Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut ra râ nghut lê.

¹³ Hpungtê mù lé rago za wùn waq bê bang gi, yhumsing é matú aróng lé le, Hkrisduq Yesuq lé yhangmoq lumjíng hkyô má, gyuq kyum é hkyô a bo é myit mó lé le, hkyak wó yu akô nghut ri.

¹⁴ Ngò gi, hkâ-myháng a myáng má náng chyáng lé jé râ matú, myit myoqbyu to kôlháng, ahkyíng du myáng pyâm le,

¹⁵ Garai Gasâng é ikun hkaû má, byu pé hká dông nyí yap râ é hkyô lé, nàng sé sháng gaq nghû, pying kat é dang shi pé lé ká byí kat lê; ikun haû gi, rû dui nyí é Garai Gasâng é noqkuq hpúng nghut luí, tengmán hkyo é hkungmó-zíng eq apûn awang nghut ri.

¹⁶ Tarâ hkungga hkyo é zaú tô é hkyô gi, ko dik é nghut é lé, ó yuq le wó he-ngik pyâm é a nghut;

haû gi, Yhang, byù gungsho má htoq shit mù, haû Woi-nyí mai Yhang lé saksé hkám byi luí, maumang lagyô pé gi, Yhang lé myàng bê nghut ri;

byuhú ahú hú má Yhâng é hkyô lé hko kyo mù, Yhang lé mینگkan byu pé lumjíng luí, hpungwup shing kang

eq Yhang lé mauhkûng
shut shuí toq yû bê
nghut ri.

4

*Timohti Lé Mhoqshit É
Hkyô*

¹ Jihtûm buinyì pé má, byù
ra-am gi, lumjîng hkyô mai
htak htoq ló luí, mhaú zô é
woi-nyí pè htâng cháng kó râ
eq nat gang mai lo é mhoqshit
hkyô pé lé gyo byi kó râ nghut
lhê ga, haú Woi-nyí gi, san za
taí ri.

² Haú sù é mhoqshit hkyô
pé gi, gegùn labyoq kut é
byù-mhaú pè chyáng mai lo é
nghut lhê; haú bâng é myit
nhiklum gi, nyhê nhe tô é
shamtoq èq nyhê man tô é su
dut byuq bê nghut ri.

³ Haú bang gi, hâng lhûm é
hkyô lé hkûm tang é hkyô lé
le, haú lumjîng luí tengmán
hkyô lé sê é bang mai jeju
hkya-on mù hap yù ge é,
Garai Gasang hpan to byí é
zoshuq lé koi pyám nhang é
le, kut akô nghut ri.

⁴ Garai Gasang hpan tô
é lhunglhang gi, ge é chyat
nghut ri; Garai Gasang é
mungdang eq kyûdûng é
dang dông haú pé lé lhoq sân-
yúng nyi é nghut é yanmai,

⁵ jeju hkya-on luí hap yu é
nghut le gi, haí jung lé lhang
he-ngik pyám râ hkyô a bò
nghut ri.

⁶ Haú gumang wui lé, nàng
haú hkyô pé lhoq pun lhoq
kyîng é nghut le gi, nàng
gi, haú nàng cháng bê ge é
mhoqshit hkyô eq lumjîng

hkyô mâ é tengmán hkyô má,
kô myhâng sù nàng nghut râ
htoq agó, Hkrisduq Yesuq é
ge é hpungmû wùn sù le dut
râ nghut lhê.

⁷ Garai a bo é myit htoq
mhô-myi dang eq hpô-myí
mâng pè é mhô-myi dangsôm
lé koi pyám luí, tarâ hkunggâ
é hkyô má yhumsing gùng lé
lhoq kûng yù aq.

⁸ Hkâsu mù gâ le, gungsho
lé lhoq kûng é hkyô gi, akyû
shau za htoq é nghut lhê;
nghut kôlhang, tarâ hkunggâ
é hkyô kúm gi, jung hkangmó
é matú akyû bo lhê nghut mù
luí, shí ipyat má le, htang pyat
má le, akyû bo nyi ri.

⁹ Haú gi, banshoq hap yù
gíng é, lumgíng é mungdang
nghut lhê.

¹⁰ Haú mù luí, xângzo byù
banshoq bâng é hkyi yù Sù
nghut é, je riyhang, lumjîng
bâng é hkyi yù Sù nghut é, rù
dui nyi é Garai Gasang má,
nga-nhúng, myit myoqbyu
to bê nghut é yanmai, nga-
nhúng gi, gyai yhang shikut
nyi lhê.

¹¹ Haú pé lé, hkunmó hkyó
luí mhoqshit byí nyi aq.

¹² Náng é zorâm pyat lé, ó
yuq èq le a wú tiq pyám sháng
gaq, dang taí é má le, nyi yap
é hkyô má le, chyitdap é hkyô
má le, lumjîng hkyô má le,
sansêng é hkyô má le, lumjîng
bâng é matú alik kut shit nyi
aq.

¹³ Náng chyáng ngò jé lé
é buinyì jé shoq, nàng gi,
Chyúmdang nghap kyô é má
le, hko kyô é má le, mhoqshit

é má le, ap nóng nyí aq.

¹⁴ Nàng gi, hpúng suwún wuî náng é ahtoq má loq ke byí é hkûn, myiqhtoi dang đông nang lé Garai Gasang byí to bê nghut é, woi-nyí hkyô eq sêng é chyunghuq lé, haí su a ngàm hkâkut pyám.

¹⁵ Haú hkyô pé lé, myit zìng zuq luí zui saí nyí aq; nàng kô myhang lo é hkyô lé, yuq hkangmó byu-myàng kó sháng gaq, náng gûng ban-shoq haú pé má ap nóng nyí aq.

¹⁶ Náng é asak duì hkyô má le, nàng mhoqshit é hkyô má le, rago sidiq nyí aq. Haú pé má ru gîng nyí aq, hkâsu mù gâ le, nàng haú su kut é nghut jáng, náng é asak lé le, náng chyáng mai gyô yu é bang lé le, nàng wó hkyi yù râ nghut lhê.

5

Suwún Wuî, Chuimó Pé, Jùn Pé Eq Séng Luí Hpaqchyí Byí É Hkyô

¹ Asak ko sù lé dang htân a tân e za, yhumsing é îwa lé su, yhang lé lhoq pun lhoq kying aq. Zorâm wuî lé gi, gumang wuî lé su,

² asak kô é myiwe wuî lé gi, înu pé lé su zùm yap luí, zomyi wuî lé gi, nhammó wuî lé su sansêng é i-myit ban-shoq eq zùm yap nyí aq.

³ Gè gè yhang garúm râ dut é chuimó myhî pé lé, hkunggâ nyí keq.

⁴ Nghut kôhang, chuimó myhí rayuq yuq gi, zoshâng nghut nghut, gashu nghut

nghut, wó é nghut jáng, haú bang gi, yhumsing é ikun lé wú gon luí, înu îwa eq îchyí îwhoí pé lé jeju taû é đông, yhangmoq é lumjîng hkyô lé, zui saí é má lhoq mhán nhâng râ lé hí mhoq yù ra râ nghut lhê; hkâsu mù gâ le, haú gi, Garai Gasang ô nau é hkyô nghut ri.

⁵ Haú lùm râ ó yuq le a wó mù, gè gè yhang râ tô é chuimó myhí gi, Garai Gasâng chyáng myit myoqbyu nyí luí, nyí, myín xoq xoq kyûdung mù, Garai Gasang garúm râ hkyô lé dúng nyi ri.

⁶ Nghut kôhang, ngón hkyô za cháng luí asak dui é chuimó myhí gi, asak dui nyí kôhang, shí gù nghut bê nghut ri.

⁷ Yhangmoq lé, ó yuq eq le mara a hùn kó sháng gaq, haú hkyô pé lé le mhoqshit byí nyí aq.

⁸ Rayuq yuq, yhâng é buinùm ji-myi wuî lé a baú é htoq agó, je luí yhumsing é ikun byù lé a baú é nghut le gi, haú lumjîng hkyô lé he-ngik pyám bê nghut luí, a lumjîng su htoq má je ashop é sù dut bê nghut ri.

⁹ Hkyuq xê zàn byíng bê é chuimó myhí za a nghut jáng, chuimó jihpán má wó kat râ a nghut; hau htoq agó, yhang gi, yuqgè rayuq za wó wú é sù;

¹⁰ zoshâng wuî lé hku baú é sù, bíng lé rago dat hku-lum é sù, sân-yúng bê bang é hkyí lé chi byí é sù, wuîhke

huí tô é bang lé garúm luí, ge é muzó jungkhangjungmó má yhumsing gùng yhang ap nóng nyi ri ga, yhang kut é ge é muzó má myìng hù é sù le, nghut râ lê.

11 Asak tiq é chuimó myhí pé lé, jihpán haú má hkâkat. Hkâsu mù gâ le, gungsho ô nau é hkyo èq Hkrisduq chyáng yhangmoq ap nóng tô é hkyô lé ung pyâm é hkùn, yhangmoq gi, myi ló naú kó râ nghut lê.

12 Haú mù, yhangmoq gi, sâng-hi lé yhangmoq tô tô é danggidiq lé lhoq hpyoq pyám kô é yanmai, tarâ darâ é hui zo kó râ nghut lê.

13 Hau htoq agó, yhangmoq gi, rayhùm htâng rayhùm châng wang wún kômù, lagôn mán byuq kó râ nghut lê. Lagôn é bang za dut kó râ a nghut, lumù gansang é bang eq yhangmoq taí a ge é pé lé taí kômù, yhumsing eq a sêng é mù má châng wang nyo wún é bang le, dut kó râ nghut lê.

14 Haú mù luí, gye pé mai lumù gansâng dang a wó taí pyám kó sháng gaq, asak tiq é chuimó myhí pé gi, myi ló mù, zoshâng hkù luí, yhangmoq é ikun lé gôn lajang râ matú, ngò, yhangmoq lé hpaqchyí byí kat lê.

15 Hkâsu mù gâ le, ra-am gi, lhing taú ló kôluí, Tsadán é htâng châng nyi lugù nghut bekô nghut ri.

16 Lumjìng é myiwe rayuq yuq gi, yhâng é ikun má

chuimó myhí wó é nghut le, haú yuq é matú noqkuq hpúng lé wòlai a hun e za, yhang mai garúm yû ra râ nghut lê; haú hkùn sheq, noqkuq hpúng gi, gè gè yhang râ tô é chuimó myhí pé lé wó garúm râ nghut lê.

17 Haú noqkuq hpúng lé rago za shuì ú é hpúng suwún wuì gi, akyû í tú hkam yù gíng lê; haú mungdang hko é hkyô eq mhoqshit é hkyô má shikut é suwún wuì gi, je riyhang hkam yù gíng lê.

18 Hkâsu mù gâ le, "Guq nâng nyi é no lé, nhuttsung hkâ-tsùng to byi."* ga le, "Mù zui sù gi, yhâng é zuihpau wó yû gíng lê."* ga le, Chyúmdang má taí tô ri.

19 Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkâlhom yù.

20 Nghut kôlhâng, lhoq pun lhoq kyíng é hkyô lé góbang wó yû kó sháng gaq, mara kut shut é bang lé, shiwa byu pé hí má tân mhoqshit aq.

21 Pying kat é dang shi pé lé, gamhkuí myit a bo e za châng nyi râ eq, myoqdong hkyin luí haí le a kut râ matú, Garai Gasang eq Hkrisduq Yesuq é hí má le, hkyin yù huí é mau-mang lagyô pé é hí má le, ngò, nang lé pying kat lê.

22 Ó yuq é ahtoq má le loq ke* byi râ lé hkâhân; góbang é mara hkaú má le hkâbo lòm. Yhumsing yhang yhumsing sân-yúng shoq kut nyí aq.

* 5:18 Tarâ Pun 25:4 * 5:18 Luk 10:7 * 5:22 Haú hkun lê bang gi, hpúng suwún kut râ matú hkyin to bê bang lé, loq ke kyúdung byí é nghut lê.

²³ Náng é wamdau ra luî, anum num no lò lò dut é yan-mai, nàng gi, wuì za shuq é hkyô lé nô pyám luî, tsibiyiq wing le ratsuí tsuí shuq byi aq.

²⁴ Byù ra-âm é mara pé gi, de de dut é nghut mù luî, tarâ jéyáng é jang má hí ló jé ri; ra-âm é mara kúm gi, hau é htâng má châng byông htoq lo ri.

²⁵ Haù eq rajung za, ge é muzó pé gi, de de nghut nyi luî, haù su de de a nghut é pé lé le, wó zaú to râ a nghut.

6

¹ Jùn dut é wòlai hkaù má nyi é lhunglhang bang gi, yhangmoq é yhumsing wuì lé gyai yhang hkungga gíng lhê nghû, myit yù râ dut lhê; haù hkún sheq, Garai Gasâng é myìng eq nga-nhùng é mhoqshit hkyô gi, lumù gansang é a hui râ nghut lhê.

² Lumjìng é yhumsing wuì é jùn gi, gumang wuì nghut é yanmai, yhangmoq lé a wú myuq é za, yhangmoq dojaù luì akyù myang hkâm zô é bang gi, lumjìng bang eq chyitdap gíng é bang nghut é yan-mai, yhangmoq lé je ge é đông dojaù râ lhê. Shí hkyô pé lé, nàng gi, yhangmoq lé mhoq byi nyi é eq lhoq pun lhoq kying byi nyi aq.

Ngùn Lé Chyitdap É Hkyô

³ Rayuq yuq gi, shut é lumjìng hkyô lé mhoqshit luì, nga-nhùng é Yhumsing Yesuq Hkrisduq é tengmán mhoqshit hkyô eq tarâ

hkunggâ é mhoqshit hkyô lé a myit huì é nghut jáng,

⁴ haù yuq gi, nghutbùn é sù eq haì lé le a sê gyô é sù nghut ri. Yhang gi, htuq htíng lhùm é hkyô pé lé ô nau é, a ge é myit bò luì, dang eq séng mù mabyoq lhoq htoq ri; haù mai, manon é hkyô, byoq lhum byoq cheq é hkyô, lumù gansang é hkyô, agè ashop é đông myit ngam pyâm é hkyô eq,

⁵ haù tengmán hkyô lé lhoq hpyuq pyám mù, tarâ hkungga hkyô gi, ngùn zè wó hkyô za nghut ri ga myit yu é, i-myit lhoq htên pyám bê bâng é gyoro má, byìn a huì é hkyô pé lé, lhoq htoq kat ri.

⁶ Nghut kôlhang, tarâ hkunggâ hkyô má nhik dik é hkyô bo é nghut le gi, amyat mó nghut nyi ri.

⁷ Hkâsu mù gâ le, nga-nhúng gi, mingkan htoq má haì jung le a yu wang lé, haù mai le haì wó yu htoq ló râ a nghut.

⁸ Haù mù luì, nga-nhúng gi, wutbu wutmè eq zoshuq wó é nghut jáng, hau èq nhik dik nyi sháng.

⁹ Wó naù sùt nau é byu pé gi, gunglaù hkyô eq tuihkyó má le, haù byoq yeq hkyô eq htên byoq hkyô má, byu pé lé myup shí nhang é, ngha é hkyô myo myo eq myit nò nhâng nau é hkyô má le, byit gyó wâng kó râ nghut lhê.

¹⁰ Hkâsu mù gâ le, ngùn lé chyitdap é hkyô gi, agè ashop hkyô ajung jùng é apùn awang nghut nyi ri. Byù ra-

am gi, ngùn lé ô naù luí, haù lumjínng hkyô mai sô nghoq ló mù, yhumsing gùng lé yhumsîng, haù yón kuq hkyo eq htaù rot pyám bekô nghut ri.

Timohti Lé Pying Kat É Dang

¹¹ Nghut kôlhang, Garai Gasâng é byù nàng gi, haù pé banshoq lé koi pyám luí, dingmán hkyô, tará hkungga hkyô, lumjínng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyí aq.

¹² Lumjínng hkyô eq sêng é ge é majan le zân nyí aq. Hap yù lumjínng bê ga, saksé myo myô pé é hí má, ge é đông nàng yín yu é hkùn, wut yu é hui luí wó é ahtum abyuq é asak lé, zuí zing nyí aq.

¹³ Haù lhunglhang lé asak byí é Garai Gasâng é hí má le, Pontu Pilat chyáng saksé hkâm nyí é hkùn, ge é đông yín yu é Hkrisduq Yesuq é hí má le, ngò, nang lé pying kat lhê:

¹⁴ Yhâng é ahkyíng yam-yoq jé jáng, Garai Gasang htoq shit nhâng râ nghut é sù, nga-nhûng é Yhumsîng Yesuq Hkrisduq htoq shit é buinyí jé shoq,

¹⁵ nàng gi, agot a-u é hkyô eq mara hùn râ hkyô a bo e za, hkunmó shí lé châng nyí aq. Garai Gasang gi, hkungsô wó sù, Yhang za up sù, hkohkam pé é Hkohlkâm, yhumsing pé é Yhumsîng,

¹⁶ Yhang za ahtum abyuq dui nyí sù, a ge chyâng htep e é maubó má dui nyí sù,

ó yuq eq le a myang wú é, a wó myang é sù nghut nyí ri. Aróng eq hpungwup a-tsam gi, Yhâng chyáng ahtum abyuq ru joq nyí sháng gaq ô! Amen.

¹⁷ Shí ipyat má wó sùt é bang gi, a gumrông râ eq a gîng é sutzè má yhang-moq é myit myoqbyù hkyô a tô e za, nga-nhûng nguingón yuqyo nyí râ matú jungkhàng jungmó lé agùn agó byí é sù, Garai Gasâng chyáng za, yhangmoq myit myoqbyu nyí râ matú, hkunmó hkyó aq.

¹⁸ Ge é hkyô kut luí, ge é muzó má wó sùt nyí mù, a chum e za, gam chûng nau é myit bò râ matú, yhangmoq lé hkunmó hkyó aq.

¹⁹ Haù đông mai, yhang-moq gi, jé lô râ ipyat é matú gîng é apùn awang đông, yhangmoq é matú sutzè wó tsîng to kó râ nghut lhê; haù hkùn sheq, yhangmoq gi, asak kyîng nghut é asak haù le wó zuí zing to kó râ nghut lhê.

²⁰ Timohti ê, nang lé ap to bê hkyô lé, zúng nyí aq. Tarâ a hkunggâ é po-ming ming bâng eq hpaqchyí nghut lhê ga myhîng shut é htuq hîng lhum lhum kut é hkyô lé, koi pyám aq.

²¹ Byù ra-am gi, haù lé hpaqchyí nghut lhê ga yín yù kôluí, haù lumjínng hkyô mai so nghoq htoq ló byuq bekô nghut ri.

Jeju gi, nungmoq chyáng ru joq nyí sháng gaq ô.

TIMOHTI **Chyáng Htang Dàm** **Hun Kat é Laiká** **(2 Timothy)**

1 Hkrisduq Yesuq chyáng mã é asak byi râ gâ é danggidiq eq rajung za, Garai Gasang ô nau é dông, Hkrisduq Yesuq é lagyo nghut sù, ngò, Poluq gi, ngò chyitdap é ngá zo Timohti lé, dang kyô kat lhê.

2 Haù Íwa Garai Gasang eq nga-nhùng é Yhumsing Hkrisduq Yesuq chyáng mã é jeju eq shogyo nhikmyin hkyô, nguingón hkyô gi, ru joq nyí sháng gaq ô!

Lumluq Râ Matú Myit Wum Byí É Hkyô

3 Ngò gi, ngá é kyûdung dang má, nyí, myín, abyit alan nang lé bún nyi uchyang, sân-yúng é i-myt mai, ngá é íchyí íwâ pé dojaú é su, ngò dojaú nyi é Garai Gasang lé, jeju hkyá-ôn nyi lhê.

4 Ngò gi, ngò má gabú hkyô byíng jup sháng gaq nghû, náng é ngaubyi lé myit bún nyi mù, nang lé gyai yang myàng nau nyi ri.

5 Ngò gi, nang é gyíng é lumjíng myit lé lhoq pùn yù mù, náng whoí Lu-i eq náng nu U-ni nhik chyáng mã hí bo é lumjíng myit, ahkuí, náng chyáng le bo ri nghû, hkyak myit lum nyi lhê.

6 Hau é yanmai, ngò loq ke byí é dông, nang má bo tô é Garai Gasang é chyunghuq

lé, gyúng nhang nyi râ matú, nang lé ngò lhoq pùn kat lhê.

7 Hkâsu mù gâ le, Garai Gasang gi, gyuq sê é myit nga-nhúng lé a kat byí e za, a-tsam bo é myit, chyitdap sê é myit, yhumsing gùng lé dat hking é myit sheq kat byí tô é ru nghut lhê.

8 Haù mù luí, nàng gi, nga-nhúng é Yhumsing eq séng luí saksé hkâm é hkyô má le, Yhâng é yanmai htóng byû dut to sù ngá é hkyô má le, hoq myit a bo é za, Garai Gasang é wum-o mai, haù gabú danglu é matú, ngò eq rahá wuîhke jamjau chôm hui goq.

9 Garai Gasang gi, nga-nhúng zui sai é muzó dông a nghut e za, Yhânggùng yang myit sôn tô é hkyô eq Yhâng é jeju yanmai za, nga-nhúng lé, hkyi yù luí chyoiyúng é asak duì hkyô má ji yù bê nghut ri. Ahkyíng nghu é lhang a joq shi mai yang, jeju haù gi, Hkrisduq Yesuq má nga-nhúng lé byi to gù nghut bê.

10 Nghut kôlhang, nga-nhúng é hkyi yù Sù, Hkrisduq Yesuq pô htoq é dông, ahkuí, haù lé lhoq htoq shit bê nghut ri. Yang gi, shî-nò hkyô lé lhoq htên pyám luí, haù gabú danglù dông mai, asak lé le, a dat htên byoq é hkyô lé le, lhoq htoq shit bê nghut ri.

11 Ngò gi, gabú danglu é matú hko kyo sù, lagyo eq mhoqshit sù dông, hkyin tô é hui sù nghut lhê.

12 Hau é yanmai, ngò gi, wuîhke jamjau shî lé hui nyi

é nghut lhê. Nghut kôlhang, ngò gi, ó yuq lé lumjǐng bê nghut é hkyô lé, sê é htoq agó, Yhang lé ngò ap tô é pé lé, haú buinyì jé shoq, Yhang wó zúng râ nghut lhê nghũ hkyak myit lum tô é yanmai, ngò a hoq.

¹³ Nang gi, ngá chyáng mai wó gyô yu é tengmán dang pé lé, Hkrisduq Yesuq má, lumjǐng myit eq chyitdap myit mai alik kut yu nyì aq.

¹⁴ Nang lé ap byì to bê, haú ge é mungdang lé, nga-nhũng chyáng bo tô é Chy-oiyúng Woi-nyì é wum-o mai zúng nyì aq.

¹⁵ Asia mau mâ é bang yuq hkangmó gi, ngo lé pyâm to kô é hkyô lé, nang sê lhê; haú bang má, Hpugelu eq Her-amoge nhik le bo akô nghut ri.

¹⁶ Haú Yhumsǐng gi, Onesihpurú é yhumbyù lé shogyo nhikmyin é hkyô tũn shit sháng gaq; hkâsu mù gâ le, yhang gi, ngo lé anum num myit lhoq ngón é htoq agó, ngò wut é shamtoq-tuì é yanmai, a hoq e za,

¹⁷ yhang, Romaq myuq má jé nyi é hkũn, ngo lé myang hui shoq, ho shikut é sũ nghut ri.

¹⁸ Haú Yhumsǐng gi, haú buinyì má, yhang lé haú Yhumsing é shogyo nhik-myin hkyô byi sháng gaq! Ehpesu myuq má, yhang ngo lé hkâ-myhó garúm bê nghut é gi, nang rago yhang sê lhê.

2

¹ Haú mù, ngá zo ê, nang

gi, Hkrisduq Yesuq mâ é jeju hkaũ má, wúm bo nyi aq.

² Nang gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap byi aq.

³ Hkrisduq Yesuq é ge é gyezo rayuq su, wuĩhke hkyô lé chôm jan nyi sháng.

⁴ Gyezo rayuq đông gye mù wũn waq nyi é sũ, ó yuq nghut kôle, gotũ muzó má a bo lom é za, yhang lé hkunmó hkyô nyi é gyezau lé, gabú nhâng nau é chyat nghut lhê.

⁵ Haú eq rajung za, shingjóng é sũ rayuq le, shingjóng lhum poĩ wang é hkũn, tô tô é tarâ đông a châng e nghut le gi, ung é aróng chyunghuq lé wó yũ râ a nghut.

⁶ Yo-mũ zuĩ shikut é sũ gi, kyôshi lé sâng-hi myang hkam yù râ sũ nghut lhê.

⁷ Haú Yhumsǐng gi, shí pé banshoq lé wó sê é nyan nang lé byi râ nghut é yanmai, ngò taĩ é hkyô pé lé myit wú aq;

⁸ Haú Dawiq é awut ashín nghut sũ, Yesuq Hkrisduq gi, shi é mai dum dui toq bê hkyô lé myit bun aq; haú gi, ngá é gabú danglũ nghut lhê.

⁹ Gabú danglũ hau é yanmai, mara bò sũ rayuq lé su, ngò gi, kyum hut é hui luĩ, hpuzô nyi é nghut lhê. Nghut kôlhang, Garai Gasâng é mungdang gi, kyum hut hui é a nghut.

¹⁰ Haú mù luĩ, ngò gi, Hkrisduq Yesuq chyáng mâ é hkyi yù hkyô eq ahtum abyuq é

hpungwup shingkang lé wó yû kó sháng gaq nghû, haû hkyin yù hui bâng é matú, jung hkgámó lé hkam jân nyi lhê.

¹¹ A-ô mâ é dang gi, lungíng é dang nghut lhê:

Nga-nhúng gi, Yhang eq rahá shî bê nghut jáng, Yhang eq rahá duì râ nghut lhê.

¹² Nga-nhúng gi, hkam jân é nghut jáng, Yhang eq rahá up râ nghut lhê.

Nga-nhúng gi, Yhang lé he-ngik pyâm é nghut jáng, Yhang le, nga-nhúng lé he-ngik pyâm râ nghut lhê.

¹³ Nga-nhúng gi, lhumzui myit a bò kôlhang, Yhang gi, lhumzui nyi râ nghut lhê. Hkâsu mù gâ le, Yhang gi, yhânggùng yhang wó he-ngik pyâm é a nghut.

Garai Gasâng Hí Má Myoq-dong Wó É Mû Zui Sû

¹⁴ Nàng gi, yhangmoq lé, shí hkyô pé xoq luí lhoq pùn nyi aq. Dang pé eq séng luí, a byoq lhùm nyi kó sháng gaq, Garai Gasâng hí má yhangmoq lé sidiq byi aq. Haû gi, akyû a bo é htoq agó, wó gyô é bang lé htên byoq nhang é hkyô za nghut lhê.

¹⁵ Nàng gi, haû tengmán é mungdang lé jo shoq chung jai é eq, hoq nó a râ é mû zui sù rayuq đông Garai Gasâng hí má myoqdong wó shoq, wó dut é myhó shikut aq.

¹⁶ Tarâ a hkunggâ é po-ming ming bang lé koi pyám aq. Hkâsu mù gâ le, haû su kut é bang gi, tarâ a hkunggâ é hkyô má je riyhang wang nân ló byuq é bang dut kó râ nghut lhê.

¹⁷ Yhangmoq é mhoqshit hkyô gi, mong ana su byo myín ló râ nghut lhê; haû bang má Humenu eq Hpilitu nhik le bò kôluí,

¹⁸ haû tengmán hkyô mai sô ngoq ló byuq akô. Yhangnhik gi, haû dum dui toq hkyô dut lai bê ga tái kômù, ra-âm é lumjíng hkyô lé lhoq htên pyám byi akô nghut ri.

¹⁹ Nghut kôlhang, "Haû Yhumsing gi, Yhang eq séng é bang lé sê lhê."[☆] ga luí le, "Haû Yhumsing é myìng lé yín yu é bang yuq hkgámó gi, agè ashop hkyô mai lhing tau ra kó râ nghut lhê." ga luí le, dizik haû htung tap tô é, Garai Gasâng é ging tìng é apùn awang gi, gíng nyi ri.

²⁰ Yhùm mó ralhùm má gi, hîng auhkoq zè, ngùn auhkoq zè baú za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ra-am gi, aróng hkyo é matú a nghut.

²¹ Haû mù luí, haû pé mai yhumsing gùng lé lhoq sanséng pyâm é sù gi, chy-oiyúng luí, haû Yhumsing chung jai gíng é sù, ge é muzó hkgámó kut râ hen tô é sù nghut é yanmai, aróng hkyo é matú chungzè dut râ nghut

lhê.

²² Zoram é agè ashop é ô naù hkyô lé koi pyám mù, haù sâ-n-yúng é myit mai, Yhumsing lé wut dúng é bang eq rahá, dingmán hkyô, lhumzui hkyô, chyitdap hkyô, nguingón hkyô pé lé, châng hkat nyí aq.

²³ Go é eq ngok é dông dang jet jet lhùm é hkyô gi, mabyoq lhoq htoq é hkyô nghut é lé, nàng sê lhê nghut é yanmai, haù hkyô lé koi pyám aq.

²⁴ Haù Yhumsing é dui-nhâng zoshâng gi, mabyoq a lhoq htoq é za, yuq hkgangmó lé dat myit tê byí é, wó mhoqshit é, a dat nhik-yô é su dut ra râ nghut lhê.

²⁵ Yhang gi, yhang lé htuq htíng é bang lé, nú-nhâm é dông mhoqshit byi ra râ nghut lhê; haù hkún, Garai Gasang gi, yhangmoq lé myit lêng hkyô byi mù, tengmán hkyô lé sê gyo nhâng luí,

²⁶ yhangmoq gi, bûn gyíng lò mù, nat Tsadán ô nau é hkyô lé kut byi râ matú, chyup yù huí é, nat Tsadán é tuihkyó mai wó hfang lut lò kó abe nghû, myit lum kat lhê.

3

Jihtùm Buinyì Pé Má Dut Lò Râ Hkyô

¹ Jihtùm buinyì pé má, wúhkhê é ahkyíng pé joq lò râ nghut é lé, nàng matsíng to aq.

² Hkâsu mù gâ le, haù u lé, byu pé gi, yhumsing gùng lé za chyitdap é bang, ngùn lé myoqnoq é bang, gumrong

é bang, nghutbûn é bang, góbang lé tai hpoi é bang, înu îwa nyo é lé a gyô é bang, jeju a dat bûn é bang, a chyoiyúng é bang,

³ chyitdap myit a bo é bang, mara hkyut byi a sê é bang, lumù gansang é bang, yhum-sing gùng lé hkâng a sê é bang, byuwuì pé, ge é hkyô lé a ngui é bang,

⁴ haq gumlaù é bang, a bun a so dut wún é bang, yhum-sing gùng lé za hkik bûn é bang, Garai Gasang lé chyit-dap é bang dut râ malaí ngón kún hkyô lé za chyitdap é bang, dut bùm kó râ nghut lhê.

⁵ Yhangmoq gi, tarâ hkunggâ é bang su dut kôhlang, haù pê é a-tsam lé hengik pyâm akô nghut ri; haù sù é bang lé, nàng koi pyâm nyí aq.

⁶ Yhangmoq gi, hpaqchyí da mù yhùm pé má wàng kôluí, mara wôlai lé wun é, agè ashop é ô naù hkyô ajung jung má sô nghoq lò byuq é,

⁷ hkâ-nhám le mhoq yu nyí kôhlang, haù tengmán hkyô lé a sê gyô é, myit nyhôm é myiwe wuì lé wó lêng nghoq yu é bang nghut akô.

⁸ Yanne eq Yambre nhik gi, Mosheq lé htuq htíng é su, haù bang le, haù tengmán hkyô lé htuq htíng akô nghut ri; yhangmoq gi, myit é hkyô htên byuq kôluí, haù lumjíng hkyô má lhum a zuí é bang nghut akô.

⁹ Nghut kôhlang, haù nhik é hkyô byông htoq lo é su, yuq

hkanmó é hí má, yhangmoq ngok é hkyô byông htoq lô râ nghut mù, haû mai lai luí yhangmoq wó kut jat kó râ a nghut.

Timohti Lé Pying Kat É Dang

10 Nàng kúm gi, ngá é mhoqshit hkyô, ngá é nyiyap hkyô, ngò myit myoqbyu tô é hkyô, ngá é lumjǎng hkyô, myit hǎng hkyô, chyitdap hkyô, hkam jan hkyô,

11 zing-ri huí é hkyô eq wuǎhke jamjau hkyô pé lé le, Antioku wà mó, Ikoni wà mó eq Lustra wà mó pé má ngò hui zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haû Yhumsǎng gi, haû pé ban-shoq mai ngo lé xe yù bê nghut ri.

12 Gè gè yhang, agè ashop é byu pé eq mhaû kut é bang gi, mhaû zô nyi bum é eq mhaû zô é huí nyi bùm kôluí, a ge é hkyô shut je riyhang myô jat lô kô é hkún,

13 Hkrisduq Yesuq má tarâ hkunggâ é asak đông nyiyap nau é bang yuq hkanmó gi, zing-rí é hui kó râ nghut lhê.

14 Nghut kôlhang, nàng gi, ô pé chyáng mai nàng mhoq yû bê hkyô lé le, Hkrisduq Yesuq lé lumjǎng jǎng hkyi yu é hui shoq,

15 nang lé hpaqchyí byéng-yá wó byí é chyoiyúng Chyúmdang pé lé, zoshǎng hkún mai nàng sê to bê hkyô lé le, nàng sê é yanmai, nàng mhoq yu to bê hkyô eq hkyak

lumjǎng to bê hkyô má, xoq kut nyí aq.

16 Chyúmdang hkanmó gi, Garai Gasǎng é soq hǎng tô é pé chyat nghut é yanmai, mhoqshit é hkyô, tân mhoq é hkyô, lhoq jo byí é hkyô eq dingmán hkyô lé tân shit byí é hkyô pé é matú, akyû bo ri;

17 haû mù luí, haû Garai Gasǎng é byù gi, ge é muzó jizó hkanmó lé kut râ matú, wó gumjup râ nghut lhê.

4

1 Garai Gasǎng é hí má le, dui nyí bang eq shí byuq bang lé tarâ dara râ sù Hkrisduq Yesuq é hí má le, Yhang htoq shit râ hkyô eq Yhǎng mingdǎn é yanmai, ngò, nang lé pying kat é gi,

2 haû mungdang lé hko kyo aq; ahkyíng yam-yoq ang kôlhang, a ang kôlhang, rì rì hen to aq; myit gyaí hǎng é eq rago za mhoqshit é đông, lhoq jo byi, tân mhoqshit é eq myit wum byi kut nyí aq.

3 Hkâsu mù gâ le, byu pé gi, tengmán mhoqshit hkyô lé a kǎm gyô é ahkyíng jé mù, yhangmoq ô nau yut yut é hkyô chǎng luí, yhangmoq é no yo bui nau é nohkyap gyô nau é hkyô taí nhǎng râ matú, sará pé rajùm rayò lé lhǎnghkyuq má lhoq tǎng to kó râ nghut lhê.

4 Yhangmoq gi, haû tengmán hkyô mai yhangmoq é nohkyap lé lhǎng pyám mù, myit htoq mhô-myi dang shut lhǎng lô kó râ nghut lhê.

5 Nghut kôlhang, nàng gi, dut tô é hkyô banshoq má rago sidiq nyi aq; wuîhke jam-jau hkyô lé hkam jân nyi aq; gabú danglù hko kyô é muzó kut nyi aq; nàng é hpungmû banshoq lé wùn waq nyi aq.

6 Hkâsu mù gâ le, ngò gi, shuq jung hkungga ralhum đông hut pyâm é huî nyi gù nghut mù luî, mingkan mai ngò htoq ló râ ahkyíng jé bê nghut ri.

7 Ngò gi, haû ge é majan le zan bê; din shingjóng lhûm é hkyô le bàn bê; haû lumjîng hkyô le chang bê nghut lhê.

8 Ahkuî, haû tengmán é tarâ Agyi nghut sù, Yhumsîng gi, haû buinyi má ngo lé ap byi râ nghut é, haû dingmán hkyô é janmaú lé, ngá matú tô to byi bê nghut lhê. Haû gi, ngá é matú za a nghut, Yhang htoq shit râ hkyô lé myit láng nyi é bang banshoq é matú le nghut lhê.

Timohti Lé Jì Kat É Hkyô

9 Nàng gi, ngá chyáng wó dut é í hân hân lé lô aq.

10 Hkâsu mù gâ le, Demaq gi, mingkan shí lé chyitdap é yanmai, ngo lé pyám to luî, Htesaloni wà mó shut; Krezen gi, Galatiq mau shut; Tituq gi, Dalamati mau shut, e ló byuq bekò nghut é yanmai nghut lhê.

11 Lukaq za ngò eq rahá nghut nyi lhê. Markuq lé, nàng eq rahá shuí lé lò aq; yhang gi, ngá é hpungmû má wó htuqáng râ sù nghut lhê.

12 Ngò gi, Tuhkiku lé Eh-pesu myuq shut nhang kat bê nghut lhê.

13 Nàng gi, lé lo é hkûn, Troa myuq má, Karpu chyáng ngò tô tô é buhíng haû lé le, ngá é chyúmding lé le, je luî eq haû shokuq chyúmding pé lé le, yù lé lô byi aq.

14 Haû ningdup hpó Alexander gi, ngo lé a ge é myo myo kut bê nghut ri; haû Yhumsîng gi, yhang kut é eq rajung za, yhang lé dam byi râ nghut lhê.

15 Yhang gi, ngamoq é danglù lé wum kat htuq htíng bê sù nghut é yanmai, nàng le, yhang lé sidiq ra râ nghut lhê.

16 Sâng-hî dàm, ngá gûng lé ngò taí hung é hkûn, yuq hkangmó gi, ngá é hkyam shut a bo lom e za, ngo lé pyâm tô akô. Nghut kôlhang, haû gi, yhangmoq ahtoq má mara a dut sháng gaq.

17 Nghut kôlhang, ngò đông mai danglù haû lé rago wó hko pyo kat luî, tûngbaù pé banshoq bang wó gyo kó sháng gaq ga, haû Yhumsîng gi, ngá hkyam shut yap to mù, ngo lé wum-o byi é nghut lhê. Hau htoq agó, ngò gi, hkanghkyi é nhut mai le hkyi yù hui bê nghut lhê.*

18 Haû Yhumsîng gi, ngo lé agè ashop é hkyô hkangmó mai hkyi yù luî, Yhang é mauhkûng mingdán má ngón za shuí jé râ nghut lhê. Hpungwup shingkang gi, Yhâng chyáng ahtum abyuq

* 4:17 Haû hkûn lé, Romaq byu pé, byù sat lé gi, hkanghkyi lé tsô pyâm lhê.

ru joq nyî sháng gaq ô. Amen.

Shi-kyám Dang

¹⁹ Priskila eq Akula nhik lé le, Onesihpuru yhumbyù wui lé le, bo shi-kyám byi laq.

²⁰ Erastu gi, Korinhtuq myuq má nyi gyó to bê; Trohpimu lé gi, nô lui, Melitu wà mó má ngò nyhi pyâm to bê nghut lhê.

²¹ Nàng gi, wó dut é í, gy-oqmyò a wàng shi lé, shî má jé lé lò aq. Ubulu gi, nàng lé shi-kyâm kat ri; haû eq rajung za, Pudén, Linu, Klodia eq gumang wui banshoq bang gi, nàng lé shi-kyâm kat akô nghut ri.

²² Haû Yhumsîng gi, náng é woi-nyí eq rahá nghut nyî sháng gaq. Jeju gi, nungmoq chyáng ru joq nyî sháng gaq ô.

TITUQ

Chyáng Hun Kat é Laiká (Titus)

¹ Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chòm myit myoqbyu é yan-mai, Garai Gasang hkyin yu to bâng é lumjúng hkyô jat rá eq, tengmán hkyô lé wó sé mù, tará hkungga sé nhâng rá matú, hkyin yù huí é sù nghut lhê.

² Haù ahtum abyuq é asak hkyô lé, mhaù a sê é Garai Gasang gi, ahkyíng nghu é lháng a joq shi mai danggidiq byi to mù, Yhang masat tô é ahkyíng yam-yoq má sheq mungdang hko kyô é đông lhoq htoq shit luí,

³ nga-nhúng é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

⁴ Nga-nhúng chòm lumjúng é hkyô đông mai, ngá zo sîng nghut é Tituq lé laiká kâ kat lhê. Íwa Garai Gasang eq nga-nhúng é hkyi yù Sù Hkrisduq Yesuq chyáng mâ é jeju eq nguínón hkyô gi, náng chyáng ru joq nyí sháng gaq ô.

Kreti Zinlóng Má, Tituq Wùn Waq Râ Muzó

⁵ Ngò, nang lé Kreti zinlóng má nyhi hkyô tô é gi, ngò, nang lé pyíng tô é eq rajung za, ngò a ban zui saí é loqzó

pé lé lhoq pán rá matú eq, wà hkangmó má hpúng suwún ayá dáng to byi rá matú nghut lhê.

⁶ Haù hpúng suwún kut rá sù gi, mara hûn rá hkyô a bo é sù; yhangmyi rayuq za wó é sù; yhang zô pé le, agè ashop é eq jìno a gyô é ga, mara hûn rá jowò a joq é lumjúng bang nghut é sù, nghut rá lhê.

⁷ Hkâsu mù gâ le, hpúng-up rayuq gi, Garai Gasâng é sùt zum sù rayuq đông nghut lhê mù, mara hûn rá hkyô a bo é sù nghut rá lhê; yhang gi, yhumsing myit a cháng; i-myit a lûm tot; ìhpê é jùn a dut; mabyoq jishûm a kut; a sansêng é ngùn hîng lé a myit ô nau é sù nghut rá lhê.

⁸ Yhang gi, byù bíng lé dat hkulúm sù; ge é hkyô lé chyt-dap sù; nûm é sù, dîngmán sù; chyoiyúng sù; yhumsing gùng lé wó hkang é sù;

⁹ mhoq yu to bê hkyô eq rajung za, lumjúng é mungdang lé ging ging zuí zîng nyí é sù nghut rá lhê. Haù hkûn sheq, yhang gi, góbang lé tengmán é mhoqshit hkyô đông myit wum wó byí é eq, haù eq shai lhum é bang lé, shut é hkyô wó tûn shit rá nghut lhê.

¹⁰ Hkâsu mù gâ le, gumlau kut é bang, dangsôm taí é bang eq mhaù zô é bang myo myo nyi ri. Ahpyo-kuq hpyit é hpúng bang je riyhang myo akô.

¹¹ Haù bâng é nhut shô lé gi, xaù pyám byi rá lhê. Hkâsu mù gâ le, yhangmoq gi, a tengmán é đông sutzê lé wó yù shoq ga luí, mhoqshit a

gíng é hkyô pé lé mhoqshit mù, rayhum bang bang lé lhoq hpyoq lhoq htên nyi akô nghut ri.

¹² Kreti byù mâ é myiqhtoi rayuq lháng gi, "Kreti byu pé gi, ayang mhaû é bang, tân jung yosô dusak pé, lagôn é zo myoqnoq bang nghut akô." ga taí wú ri.

¹³ Saksé shî gi, têng ri. Haû mù luî, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyâm é bang pying tô é dang pé lé le, a gyo kô é za,

¹⁴ haû lumjíng hkyô má ging títng nyi kó sháng gaq, yhangmoq lé htân htân tân mhoqshit byî nyi aq.

¹⁵ Sân-yúng bâng é matú gi, azíng zê lhungháng sân-yúng ri; a sân-yúng bang eq a lumjíng bâng é matú kúm gi, haí le a sân-yúng é chyat nghut nyi ri; hkâsu mù gâ le, yhangmoq é myit nhiklum eq myit sôn sê é hkyô pé gi, gè gè yhang, a sân-yúng dut byuq bekô nghut ri.

¹⁶ Yhangmoq gi, Garai Gasang lé sê lhê ga kôlhang, yhumsing zui saí é loq zó đông, Yhang lé he-ngik pyâm é bang nghut akô. Yhangmoq gi, achay achyut é bang, jìno a gyô é bang eq, ge é mú joq mijoq eq a htuk é bang nghut akô nghut ri.

2

Hká Đông Nyi Yap Râ Hkyô

¹ Nàng kúm gi, tengmán é mhoqshit hkyô eq wuí é đông mhoqshit nyi rá dut lhê.

² Hpô-mâng pé lé gi, i-mytit shirâm sé râ hkyô; hkungga gíng é byù dut râ hkyô; yhum-sing gùng lé wó hkâng râ hkyô eq, lumjíng myit ging râ, chyitdap myit ging râ, hkam jan hkyô gíng nyi rá hkyô pé lé, mhoqshit byî nyi aq.

³ Haû eq rajung za, hpô-myhí mâng pé lé gi, hkungga gíng é a-kyang bo nyi rá hkyô; lumù gansâng dang a taí rá hkyô; ìhpê é jùn a dut rá hkyô eq ge é hkyô lé za dat mhoqshit é bang wó dut rá matú mhoqshit byi aq.

⁴ Haú hkûn, Garai Gasâng é mungdang gi, lumu pyâm é a hui sháng gaq, yhangmoq gi, hpô-myhí zô pé lé, yhumsing yhanglâng eq, yhangzô pé lé chyitdap é,

⁵ yhumsing gùng lé wó hkgang é, siri bo é, ikun lé dat wùn waq é, ge é myit wó tân shit é, yhumsing é yhanglâng uphkgang é đông dat châng é bang dut rá matú, ge mhoqshit é hpô-myhí mâng pé dut rá nghut lhê.

⁶ Haû eq rajung za, zorâm wuí lé le, yhumsing gùng lé wó hkgang nyi kó sháng gaq, lhoq pun lhoq kyíng nyi aq.

⁷ Hkyô hkat hkgangmó má, yhangmoq lé nàng yhang ge é muzó alik tân shit nyi aq.

⁸ Nàng lé lhom htuq htíng é bang gi, nga-nhúng é hkyô má mara a wó hún kômù hoq hpû nyi kó sháng gaq, nàng mhoqshit é hkyô má, taí pyám rá hkyô a bò shoq, têng é, siri bo é, eq sansêng é dang taí nyi aq.

9-10 Nga-nhông é hkyi yù Sû Garai Gasang eq sêng é mhoqshit é hkyô pé hkat hkangmó yúng nyî sháng gaq, hkyô hkat hkangmó má, jun pé lé, yhangmoq é yhumsing wui pé é a-ô má nyi mù, yhumsing wui é i-myt ngón shoq dang a tu râ; a hkau râ; wó lum tô é bang dut râ hkyô pé lé, mhoqshit byi aq.

11 Hkâsu mù gâ le, hkungsô wó é myit myoqbyù hkyô ga é, nga-nhông é kô myhang é Garai Gasang eq hkyi yù Sû, Yesuq Hkrisduq gi, hpung-wup shingkang eq htoq shit râ hkyô lé lánq nyi é hkûn,

12 tarâ a hkunggâ é myit eq mingkan myit ô nau é hkyô koi pyám luî, shí ipyat má yhumsing gùng lé wó hkâng râ, dingmán râ eq, tarâ hkunggâ é hkyô wó cháng shoq,

13 nga-nhông lé mhoqshit byi râ matú, Garai Gasâng jeju chyunghuq gi, htoq shit bê nghut mù luî, byù lhunglhang bang lé hkyi yù hkyô hpóng byi bê nghut ri.

14 Haû Yesuq Hkrisduq gi, agè ashop é hkyô banshoq mai nga-nhông lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut râ matú wó lhoq sân-yúng yû shoq ga, nga-nhông é matú Yhânggùng lé ap byi pyám bê nghut ri.

15 Nang lé ó yuq èq le, a wú shôm pyám kó sháng gaq; nàng gi, ahko ahkáng ban-shoq eq, yhangmoq lé shí

hkyô pé mhoqshit nyî aq; myit wum byi é eq, tân mhoqshit é hkyô lé le kut nyi aq.

3

Ge É Muzo Zui Saí Râ Hkyô

1 Nàng gi, lumjing bang lé, zau wui eq ahko ahkáng wó bâng é a-ô má nyi mù, jìno gyô nyi râ eq, hkâ-nhâm le ge é muzó hkangmó zui saí râ lé hen nyi uchyang,

2 ó yuq lé le lù a mù râ; nguingón hkyô hô râ; myit tê byi é hkyô tân shit râ eq; byù banshoq lé nùm é i-myt tân shit nyi kó sháng gaq, lhoq pun lhoq kyíng nyi aq.

3 Hkâsu mù gâ le, nga-nhông le, hí hpyang gi, byù ngok pé, jìno a gyô é bang, mhaû zo huî é bang eq, gungsho ô nau é hkyô eq mingkan ngón hkyô ajung jûng èq jùn kut é hui bang, dut mù luî, agè ashop é eq manon lhùm é hkyô kut nyi mù, rayuq eq rayuq a jú lhùm é dông nyi laí lò bê nghut lhê.

4 Nghut kôlhang, nga-nhông é hkyi yù Sû Garai Gasâng jeju eq chyitdap myit htoq shit é hkûn,

5 nga-nhông yhang kut é dingmán é muzó èq a nghut é za, Yhâng é shogyo nhikmyîn é jeju yanmai sheq, Garai Gasang gi, nga-nhông lé hkyi yù bê nghut ri.

6 Yhang gi, nga-nhông é hkyi yù Sû Yesuq Hkrisduq é yanmai, nga-nhông é ah-toq má agùn agó hut hkyó byi é Chyoiyúng Woi-nyí èq nga-nhông lé chí san chí sêng

pyám byi mù, woi-nyí má dum hku é hui nhâng luí, myit sik htaí byí é hkyô dông nga-nhúng lé hkyi yù bê nghut ri.

⁷ Haû mù luí, Yhâng é jeju mai mara hkyut san byí é hui bê nghut é yanmai, ah-tum abyuq é asak lé myit my-oqbyu nyi é eq rajung za, nga-nhúng gi, silí wunlí wó hkam yu é bang dut lò râ nghut lhê.

⁸ Dang shí pé gi, lumjínng é dang nghut lhê mù luí, Garai Gasang lé lumjínng é bang gi, ge é muzó lé myit lòm luí rago zui saí nyi kó sháng gaq, haú hkyô pé lé nàng wum zuq tung mhoqshit byi râ lé, ngò ô nau nyi lhê. Shí pé gi, byù lhunglhâng bâng é matú ge é eq, akyû bo é hkyô nghut lhê.

⁹ Nghut kôlhâng, ana apâ ga luí taí htíng lhúm é hkyô lé le; byùxik labaú gôn é hkyô lé le; nyo byoq lhúm é hkyô lé le; jep é tarâ eq séng mù byoq lhúm é hkyô pé lé le koi pyâm nyi aq, hkâsu mù gâ le, haú pé gi, akyû a bo é hkyô eq chùng a ge é hkyô pé nghut ri.

¹⁰ Gam hkuí é myit bò sù lé gi, í dâm mhoqshit wú mù, a wó jáng, yhang lé baú tô pyám aq.

¹¹ Haû su kut sù gi, yhang kut é muzó má mara wó to bê nghut mù, yhumsing gùng lé yhumsing mara hun é sù nghut é lé, nàng sê to lo aq.

Je Htâng Má Pying É Dang

¹² Ngò gi, Nikopoli wà má gyoqmyò lhoq hai râ dông myit hpyit tô é yanmai, Artima lé, a nghut jáng Tuhkiku lé, náng chyáng nhang kat

byi râ, jé eq yhang, nàng gi, shikut luí, haû wà shut ngá chyáng lé lô aq.

¹³ Nàng gi, tarâ sê é sù Zena eq Apolo nhik lé, yhangnhik é hkyowui má râ é hkyô ban-shoq, shikut luí garúm kat aq.

¹⁴ Nga-nhúng é byu pé gi, nyí wuî râ é hkyô lé wó htuq é eq ashi zui é bang dut kó sháng gaq, ge é muzó lé myit lòm mù zui saí nyi râ hkyô lé mhoq yû râ lhê.

¹⁵ Ngò eq rahá nyi é bang yuq hkangmó gi, nang lé shi-kyâm kat akô. Lumjínng hkyô má ngamoq lé chyitdap é bang lé, bo shi-kyám byi aq.

Garaí é jeju gi, nungmoq eq rahá joq nyi sháng gaq ô!

HPILEMON Chyáng Hun Kat é Laiká (Philemon)

¹ Hpilemon ê, Hkrisduq Yesuq é yanmai htóng lúng nyí sũ, ngò Poluq eq nga-nhũng é gumang Timohti nhik gi, ngá-nhik chyitdap é mũ wùn luzúm nghut é sũ nang lé le,

² ngá-nhik é gu-nhá Ahpiaq lé le, ngá-nhik é sarhé luzúm Arhkipó lé le, náng é yhũm má huí lhum lhum kut é noqkuq hpúng lé le, dang kyô kat lâ.

³ Nga-nhũng é Íwa Garai Gasang eq Yhumsing Yesuq Hkrisduq chyáng mã é, jeju eq nguingón hkyô gi, nung-moq chyáng ru joq nyí sháng gaq ô!

Jeju Hkya-ôn É Hkyô Eq Kyúdung Dang

⁴⁻⁵ Ngò gi, Yhumsing Yesuq lé nàng lumjing é hkyô lé le, sân-yúng bang banshoq lé nàng chyitdap é hkyô lé le, wó gyô é yanmai, ngò kyúdung é hkũn, nang lé myit bũn nyí luí, hkâ-nhám le ngá é Garai Gasang lé jeju hkya-ôn nyí lâ.

⁶ Ngò gi, Hkrisduq é matú nga-nhũng chyáng bo tô é ge é mũ lhumjup lé sê gyô é hkyô lé, nàng wó yù sháng gaq nghũ, náng é lumjing hkyô lé, nàng saksé hkâm é má akyũ htoq râ matú, kyúdung byí nyí lâ.

⁷ Náng é chyitdap myit gi, ngo lé gyai gabú nhang é eq wum-o wó yũ nhang ri; hkâsu mù gâ le, gumang hpó ê, náng é yanmai, sân-yúng bâng é i-myit má nguingón yuqyo é hkyô wó yũ bekô nghut ri.

*Onesimu É Matú Tôngbán
Byí É Hkyô*

⁸ Haũ su mù, nàng kut gíng é muzó hkyô, ngò, nang lé pying kat lâ. Hkrisduq mã, ngò gi, a gyuq a kyum é za nang lé haũ wó kut nhang lâ nghut kôhang, chyitdap myit đông za nang lé pying kat lâ.

⁹ Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sũ le nghut luí,

¹⁰ ngò kyum hut huí nyi é u lé ngá zo dut lo é Onesimu é matú nang lé ngò dũng tôngbán kat lâ.

¹¹ Yhang gi, hí hpyang náng é matú akyũ a bo é nghut kôhang, ahkuí gi, náng é matú le, ngá é matú le, akyũ bò bê nghut ri.

¹² Ngò nhik htung é Onesimu lé náng chyáng dum taũ nhang kat lâ.

¹³ Haũ gabú danglu é yanmai, ngò htóng lúng nyi é mã náng é malaí ngo lé garúm râ matú, yhang lé ngò shuĩ nyi to naũ kôhang,

¹⁴ ngò gi, nàng myit a huí le haĩ le a kãm kut. Hau é yanmai, ngò, nang lé kut nhang é đông a nghut e za, nàng ô nau é đông kut é san za nghut sháng gaq.

15 Hkâsu mù gâ le, náng chyáng mai yhang rayoq rabun zo gâng nyi é gi, yhang dum taû lò mù hkâ-nhám le nàng eq rahá dum wó nyi nyi râ matú nghut lhê abe.

16 Yhang gi, htâng hpyang, jùn rayuq đông a nghut e za, jùn htoq má je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kúm gi, byù rayuq đông le, Yhumsîng Yesuq má gumang hpó rayuq đông le, je riyhang chyitdap râ sù dut bê nghut ri.

17 Haû mù luî, nàng, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq.

18 Yhang, nang lé rajung jung shut pyâm é nghut le le, chyîn dap tô é nghut le le, haû gi, ngá chyáng dap é chyîn nghû sôn yù aq.

19 Ngò, Poluq gi, chyîn haû xap râ nghû luî, ngá loq èq yhang kê kat kôlhang, nàng yhang lháng, ngo lé asak chyîn xap râ sù nghut é lé bûn nghan aq.

20 Nghut bê, gumang hpó ê, nang é yanmai, haû Yhumsîng má ngò gabú é hkyô wó yu nyi sháng gaq, Hkrisduq má ngá é i-myt lé lhoq ngui lhoq ngón byi é đông, shí, ngò pying kat é dang lé gyo byi laq.

21 Nàng gi, ngò taî kat é htoq má je lhom kut râ nghut é lé, hkyak za sé luî, ngò kê kat é nghut lhê.

22 Hau htoq agó, ngá é matú

nyì râ gok lajang lánq aq. Hkâsu mù gâ le, nungmoq kyûdung byi é yanmai, ngò gi, nungmoq chyáng dum wó jé râ lé myit myoqbyu nyi lhê.

23 Hkrisduq Yesuq é yanmai, ngá é htóng lúng luzúm nghut é sù Epahpra gi, nang lé shi-kyâm kat ri.

24 Ngá é htuq luq htuq bang nghut é Markuq, Aristakuq, Demaq, Lukaq pé le, nàng lé shi-kyâm kat akô.

25 Yhumsîng Yesuq Hkrisduq é jeju gi, nungmoq é woi-nyí eq rahá za ru joq nyí sháng gaq ô!

HEBRE Pê Chyang Hun Kat é Laiká (Hebrews)

*Garai Yhangzo Gi, Mau-
mang Lagyô Pê Htoq Je Gyaú É
Hkyô*

1 Laí ló bê ipyat pé má, Garai Gasang gi, nga-nhông é íchyí íwâ pé lé myiqhtoí pé đông alhông lhung eq adông đông mai dáng nyo wú bê nghut lhê.

2 Nghut kôlhang, ló htâng é buinyì shí pé má, Yhang gi, Yhâng Zo đông mai nga-nhông lé dang nyô bê nghut ri; Yhang gi, lhunglhang lé sîng sũ dut râ matú haũ Zo lé masat to mù, Zo đông mai, nyì mi-nyì, joq mijoq lé hpan to bê nghut ri.

3 Haũ Zo gi, Garai Gasâng é hpungwup shingkang duqbó é hkyô eq Yhâng é gunghkyâng isâm roq nghut nyi mù, lhunglhang lé Yhâng é a-tsam bying é dang eq zui zing tô ri. Yhang gi, yubak mara lé lhoq sân-yung é hkyô lé ban kut é htâng, mauhkung htoq má Hkikhkam dik Sũ Garai Gasâng é loqyo hkyam má zung to bê nghut ri.

4 Haũ mù luí, Yhang gi, maumang lagyô pê é mying htoq gyaú é mying lé wó sing yù bê nghut é eq rajung za, yhangmoq htoq je riyhang gyaú sũ dut bê nghut ri.

5 Hkâsu mù gâ le, Garai Gasang gi,

"Nàng gi, Ngá Zo nghut ri. Hkũ-nyí, Ngò gi, Náng Wa dut bê nghut lhê."*

ga le, dum,

"Ngò gi, Yhâng Wa dut râ nghut mù, Yhang gi, Ngá Zo dut râ nghut lhê."*

ga le, maumang lagyo hká yuq lé hkâ-nhám wá taí wú é nghut lhê lú?

6 Dum, Garai Gasang gi, Yhâng é zomún lé mingkan shut nhang hâng kat é hkũn,

"Ngá é maumang lagyô pé banshoq gi, Yhang lé noqkuq kó sháng gaq."*

ga taí ri.

7 Maumâng pé eq séng luí Garai Gasang taí é má,

"Yhang gi, Yhâng é maumang lagyô pé lé lài su dut nhâng mù, Yhâng é dui-nhâng zoshâng wui lé, myishâm pé su dut nhang é nghut ri."*

gâ ri.

8 Nghut kôlhang, haũ Zo eq séng luí, Yhang gi,

"Garai Gasang ê, Náng é hkohkâm-tanghkuq gi, pyat dedu ahtum abyuq gîng nyi mù,

Náng é dingmán hkyô gi, Náng é mingdán lé uphâng é hkyô dut râ nghut lhê.

9 Nàng gi, dingmán hkyô lé chyitdap bê nghut mù, agè ashop é hkyô lé a

* 1:5 Hkya-on 2:7 * 1:5 2 Sam 7:14
104:4

* 1:6 Tarâ Pun 32:43 * 1:7 Hkya-on

ngui byuq lô é nghut
lhê.

Haû mù luî, Garai
Gasang, náng é Garai
Gasang gi, Nang lé,
gabú nhang é xû but
byî é dông, Náng é
luzúm wui htoq je lhoq
gyaú to bê nghut ri."*

ga taî ri.

¹⁰ Hau htoq agó, Yhang gi,
"Yhumsîng ê, Nang gi, a-nham
sâng-hi má myidàm é
apûn awang lé hi tô é
nghut mù,
mauhkûng pé gi, Náng é
loqmú chyat nghut ri.

¹¹ Haú pé gi, htên byoq byuq
râ nghut lhê; nghut
kôlhang, nang gi, ru gîng
nyî râ nghut lhê; haú
pé banshoq gi, mebu
su xau byuq râ nghut
lhê.

¹² Nang gi, haú pé lé, bumó
lé su dîng yup râ nghut
lhê; Nang gi, haú pé lé,
mebu su htaî pyám râ
nghut lhê.

Nghut kôlhang, Nang gi, ra-
jung za ru gîng nyî râ
nghut mù, Náng é zan-
wut pé gi, hkâ-nhám le
htûm râ a nghut."*

ga le taî ri.

¹³ Garai Gasang gi,
"Ngò, náng é gye pé lé, náng
é hkyî nang tanghkuq
kut pyám byî é hkyîng
jé shoq,

Ngá é loqyo hkyam shut zung
nyî shi aq."*

ga maumang lagyo hká yuqlé
hkâ-nhám wá taî wú é lhú?

¹⁴ Maumâng pé banshoq gi,
hkyi yù hkyô lé hkam yù
râ nghut é bang lé dojaú
râ matú, nhang kat huî é
mû wùn woi-nyî pé chyat za
nghut akô, a nghut kó lhú?

2

Sadiq Byî É Hkyô

¹ Haû mù luî, nga-nhúng gi,
châng nghoq ló byuq é a hui
zo sháng gaq, haû nga-nhúng
wó gyô yu to bê hkyô lé je
riyhang rago châng nyî râ dut
lhê.

² Hkâsu mù gâ le, maumang
lagyô pê eq taî bê mungdang
gi, gîng nyî mù, shut shaî lu
laî é hkyô eq jîno a gyô é
hkyô hkangmó kut é sù gi,
yhumsîng eq gîng é mara dam
byî é hui zo kô é nghut le gi,

³ nga-nhúng gi, haû-í yhang
gyaú é hkyi yù hkyô lé haî
su a ngàm kut é nghut jáng,
nga-nhúng hkâsu wó hpang
lut râ lhú? Hkyi yù hkyô haû
gi, haû Yhumsîng eq hí taî
pyo htoq é nghut mù, Yhâng
chyáng mai wó gyô yu é bang
gi, haû hkyô têng é lé, ngamoq
chyáng saksé shit bekô nghut
ri.

⁴ Garai Gasang le, kumlhá
pé, mauhpo muzó pé, laklaî
kumlhá myo myo eq, Yhang ô
nau é eq rajung za Chyoiyúng
Woi-nyî chyunghuq pé lé gàm
byî é dông mai, haû hkyô lé
saksé shit bê nghut ri.

Hkyi Yù Hkyô Hpóng Byi Sû

⁵ Garai Gasang gi, mau-
mang lagyô pé lé, ngamoq

taí nyi é jé lô râ mingkan lé,
uphkâng nhâng râ a nghut.

⁶ Rayuq yuq mai, rawò má
saksé hkâm tô é gi,

"Byù gi, haí wá nghut mù,
Nàng, yhang lé bûn nyi
lhê lúhú?

Byu Yhangzo gi, haí wá
nghut mù, Nàng, yhang
lé wú gôn nyi lhê lúhú?

⁷ Nàng gi, yhang lé, maumang
lagyô pê htoq ratsuí
lhoq nyhum to bê
nghut ri.

Nàng gi, yhang lé, hpung-
wup shingkang eq
aróng bò nhâng mù,

⁸ jung hkanmó lé, yhang
é hkyiwa ô má tô to bê
nghut ri."*

gâ ri. Jung hkanmó lé yhang
é a-ô má tô to bê gâ é gi, Garai
Gasang, haí lhang a myhit to
loshoq yhang uphkâng é a-ô
má tô to bê nghut é lé gâ lhê.
Nghut kôlhang, yhang é a-ô
má tô tô é jung hkanmó lé,
ahkuí, nga-nhúng a myàng shí
é za nghut lhê.

⁹ Nghut kôlhang, nga-nhúng
gi, maumang lagyô pê htoq
ratsuí zo lhoq nyhûm huí é sù
Yesuq lé myang é nghut lhê.
Yhang gi, Garai Gasang jeju
mai, yuq hkanmó é matú
shí hkâm byí é huí zo sháng
gaq ga, shí-nò jamjau hkyô lé
hkâm zo bê nghut é yanmai,
ahkuí, Yhang lé hpungwup
shingkang eq aróng bò nhâng
bê nghut ri.

¹⁰ Zo wuí myo myo lé
hpungwup shingkang wó
hkâm yù nhâng sháng gaq

ga, jung hkanmó lé Yhang
é matú chyat eq Yhang đông
mai chyat joq nyi nhang
é Garai Gasang gi, wuíhke
jamjau hui nhang é đông,
yhangmoq é hkyi yù Sù lé
lhoq gumjup byi râ matú
htuk âng nyi ri.

¹¹ Haù byu pé lé chyoiyúng
nhang é Sù eq lhoq chyoiyúng
huí é bang gi, ikun ralhum za
mâ é bang chyat nghut lhê.
Haù mù, Yesuq gi, yhangmoq
lé, gumang wuì nghû râ lé a
hoq é nghut lhê.

¹² "Ngò gi, Nàng myíng lé, Ngá
gumang wuì chyáng taí
pyô râ nghut lhê;

Ngò gi, shiwa hpông é
myoq hí má, Nàng lé
hkya-on mahkôn hkôn
râ nghut lhê."*

ga, Yhang taí ri.

¹³ Yhang gi,

"Ngò gi, Yhang lé lumhkau
nyì râ nghut lhê."*

ga le dum taí ri. Hau htoq agó,
"Ngò gi, Garai Gasang ngo lé
byí é zoshâng wuì eq
shí má nyi nyi lhê."*

ga, Yhang dum taí ri.

¹⁴ Haù zoshâng wuì gi,
sui sho eq nghut é yanmai,
Yhang le, yhangmoq é xângzo
gùng bo hkam yù bê nghut
ri. Hau é yanmai, Yhang gi,
Yhang é shí-nò hkyô đông mai,
shí-nò hkyô é a-tsam lé zuí
zìng é sù nghut é nat Tsadán
lé wó lhoq htên pyám râ eq,

¹⁵ yhangmoq é shí-nò hkyô
lé gyuq é èq, yhangmoq é
asak gón lé jùn đông zuí zìng

to huí é bang lé, wó lhoq lhut râ nghut lhê.

¹⁶ Gè gè yhang, Yhang gi, maumang lagyô pé lé garúm é a nghut é za, Abraham é awut ashín pé lé garúm é sheq ru nghut lhê.

¹⁷ Haû nghut é yanmai, Yhang gi, Garai Gasang lé dojaú é má shogyo nhikmyîn é eq lhumzui é hkyangjong mó wó dut râ eq, byu pê é yubak marâ é matú shîhtai gunglik hkungga wó kut râ matú, hkyô hkangmó má Yhâng é gumang wui eq dù shoq kut é hui râ dut é nghut lhê.

¹⁸ Yhang gi, gunglaú huí é hkûn, Yhânggùng yhang jam-jau hui zo bê nghut é yanmai, gunglaú huí nyi é bang lé wó garúm yu é nghut lhê.

3

Yesuq Gi, Mosheq Htoq Gyaú É Hkyô

¹ Haû mù luí, mauhkûng mai wut yù huí é, chyoiyúng é gumang wui é, lagyo eq hkyangjong mó nghû nga-nhúng yín yu é Yesuq é hkyô lé rago myit wú keq.

² Mosheq, Garai Gasâng é yhûm gón má lhumzui é su, Yesuq le, Yhang lé masat yù sù Garai Gasâng chyáng lhumzui sù dut bê nghut ri.*

³ Yhûm kut sù gi, yhûm htoq je gyaú é aróng lé wó é su, Mosheq htoq, Yesuq gi, je gyaú é aróng lé wó gíng é lé myàng ri.

* 3:2 Bun zo shî eq bun zo 5, 6 lhum mâ é Garai Gasâng é yhûm gâ é gi, Garai Gasâng é byu pé lé gâ é nghut lhê.

⁴ Hkâsu mù gâ le, yhûm hkangmó gi, rayuq yuq èq saí é chyat nghut ri. Nghut kôhlang, Garai Gasang gi, jung hkangmó lé saí é sù nghut lhê.

⁵ Mosheq gi, Garai Gasâng é yhûm gón má dui-nhâng zoshâng rayuq đông lhumzui mù, Garai Gasang tai râ nghut é lé saksé hkám bê nghut ri.

⁶ Nghut kôhlang, Hkrisduq gi, lhumzui é zo rayuq đông Garai Gasâng é yhûm lé up ri. Nga-nhúng kúm gi, nga-nhúng lé wám é myit bò nhang é hkyô eq nga-nhúng gumrong nyi é myoqbyù hkyô lé myhik zing nyi é nghut jáng, Yhâng é yhûm nghut nyi bê.

A Lumjîng Bang Lé Sidiq Byí É Hkyô

⁷ Haû mù luí, haû Chyoiyúng Woi-nyí tai é eq rajung za,

"Hkû-nyí, nungmoq gi, Yhâng é danghtê lé wó gyo kô é nghut jáng,

⁸ yoso má Yhang lé chyâm kô é u lé,

gumlau toq é hkûn nungmoq é îchyí îwâ pé kut kô é su, nungmoq é i-myt lé hkâlhoq htan to kó.

⁹ Nungmoq é îchyí îwâ pé gi, myi xê zàn yhang Ngò kut é muzó lé myàng kôle, yoso haú má Ngo lé chyam lik bekò nghut ri.

10 Haû nghut é yanmai,
Ngò gi, ipyat haû lé
nhikjum yo mù,
'Yhangmoq é myit nhikl-
hum gi, hkâ-nhám le
hkyô nghoq byuq akô;
yhangmoq gi, ngá é hkyô
pé lé a sé kômù nghut
ri.' nghû taí é nghut
lhê.

11 Haû mù, 'Ngá é bánno jowò
má yhangmoq hkâ-
nhám le wó wâng kó
râ a nghut.' nghû,
Ngò, nhikjum yô é
eq dakâm dang taí bê
nghut lhê."☆

gâ ri.

12 Gumang wuì ê, nungmoq
mâ é ó yuq le, haû rû dui nyì
é Garai Gasâng chyáng mai,
lhing taû ló byuq sê é, yubak
mara byíng é, a lumjíng é i-
myit a bò sháng gaq, sidiq nyì
keq.

13 Nungmoq gi, ó yuq le,
yubak marâ é mhaú zô é hkyo
èq i-myit lhoq htan pyâm é a
hui kó sháng gaq, "hkû-nyí"
nghû ru wó taí nyì nyì gi,
nyí wuì, rayuq eq rayuq myit
wum byí lhúm nyì keq.

14 Nga-nhúng gi, sâng-hi
mai wó to bê myit lùm hkyô
lé, ló htáng shoq zuí gíng nyì
é nghut jáng, Hkrisduq eq
chôm zùm yap nyì é bang dut
bê nghut ri.

15 Haû gi,
'Hkû-nyí, nungmoq, Yhâng
é danghtê lé wó gyô
é nghut jáng, gumlau
toq é hkûn, nungmoq
é íchý íwâ pé kut kô é

su, nungmoq é i-myit
lé hkâlhoq htan to kó."☆
ga taí é eq rajung za nghut ri.

16 Wó gyô yù mù, gumlau
toq é bang gi, ô pé nghut akô
lhú? Haú bang banshoq gi,
Egutuq ming mai Mosheq èq
shuì htoq lo é bang nghut
bum lhê, a nghut kó lhú?

17 Myi xê zàn yhang Garai
Gasâng lé nhikjum yó nhang
é bang gi, ô pé nghut akô lhú?
Haú bang gi, mara kut shut
mù, yoso má shi leq byuq é
bang nghut bum lhê, a nghut
kó lhú?

18 Jino a gyô bùm kô é nghut
jáng, Yhâng é bánno jowò má
yhangmoq hkâ-nhám le wó
wâng kó râ a nghut ga, Garai
Gasâng èq dakam é bang gi, ô
pé nghut akô lhú?

19 Haû mù, yhangmoq a
lumjíng kô é yanmai, a wó
wâng kô é lé, nga-nhúng
myang é nghut lhê.

4

*Garai Gasâng É Byu Pé
É Matú Bánno Buinyì Đông
Nghut É Bánno Jowò*

1 Haû nghut mù luí, Garai
Gasâng é bánno jowò má wàng
râ danggidiq ru gíng nyì ashí
nghut é yanmai, nungmoq
mâ é ó yuq le, haú má a hkyit
hkap é a dut râ matú, nga-
nhúng sidiq nyì sháng.

2 Hkâsu mù gâ le, yhang-
moq lé gabú danglù haú
hko kyo bê su, ngamoq lé le
hko kyo bê nghut lhê; nghut
kôlháng, yhangmoq wó gyô

é mungdang gi, yhangmoq é matú akyû a bò, haì mù gâ le, haù wó gyô é bang gi, lumjìng myit mai a lhom hap yù kô é yanmai nghut ri.

³ Nga-nhúng lumjìng bê bang za, bánno jowò haù má wó wang é nghut lhê. Haù hkyô gi,

"Haù mù, 'Ngá é bánno jowò má yhangmoq hkâ-nhám le wó wâng ko râ a nghut.' nghû, Ngò, nhikjum yô é eq dakâm dang taí bê nghut lhê."^{*}

ga Garai Gasang taí bê eq rajung za dut é nghut ri. Nghut kôlhang, Yhâng é muzó gi, mau htoq xâng hkun mai ban kut to bê nghut lhê.

⁴ Hkâsu mù gâ le, "Garai Gasang gi, nyhit nyí nghû râ buinyì má Yhâng é muzó banshoq mai bánno bê nghut ri."^{*} gâ é dang pé má, haù nyhit nyí nghû râ buinyì eq séng é hkyô lé rawò má Yhang taí tô ri.

⁵ Bánno jowò joq é eq séng luí, Yhang dum taí tô é gi, "Ngá é bánno jowò má yhangmoq hkâ-nhám le wó wâng kó râ a nghut."^{*} gâ ri.

⁶ Bánno jowò haù má wàng râ bang ra-am nyi é dang-gidiq joq tô ashí nghut ri; hí hkûn, gabú danglù haù wó gyô wú bê bang kúm gi, yhangmoq jìno a gyo kô é yanmai, a wàng kô é nghut lhê.

⁷ Haù mù luí, "Hkû-nyí, nungmoq, Yhâng é danghtê lé wó gyo kô

é nghut jáng, nungmoq é i-myt lé hkâlhoq htân kó."^{*}

gâ é lé, ngò hí lé taí bê eq rajung za, Garai Gasang gi, gyai myáng é htâng má Dawiq dông mai taí é hkûn, "Hkû-nyí" gâ é buinyì ra-nyí dum masat to bê nghut ri.

⁸ Hkâsu mù gâ le, yhangmoq lé, Yoshuq eq bánno jowò byi bê ru nghut le gi, Garai Gasang gi, htâng má, gotú buinyì eq séng luí taí râ a nghut lo.

⁹ Haù mù luí, Garai Gasâng é byu pé é matú gi, Bánno buinyì dông nghut é bánno jowò ru joq tô ashí nghut lhê.

¹⁰ Hkâsu mù gâ le, Garai Gasang gi, Yhâng é muzó mai bannô é su, Garai Gasâng é bánno jowò má wàng é sù gi, yhumsing é muzó mai bánno râ nghut lhê.

¹¹ Haù nghut mù, yhangmoq é jìno a gyo hkyo é alik lé cháng mù leqbat é, ó yuq le a bò sháng gaq, nga-nhúng gi, bánno jowò haù má wó wàng shoq, a-tsam bo é í shikut sháng.

¹² Hkâsu mù gâ le, Garai Gasâng é mungdang gi, rû dui nyi é eq a-tsam bo é nghut lhê. Haù gi, shamsó íshut dap é sham htoq má je htoq é nghut mù, myit nhiklum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lhê; haù gi, nga-nhúng myit é hkyô pé eq myit sôn é hkyô pé lé wó jéyáng é nghut lhê.

^{*} 4:3 Hkya-on 95:11 ^{*} 4:4 Apûn 2:2 95:7-8

^{*} 4:5 Hkya-on 95:11 ^{*} 4:7 Hkya-on

¹³ Hpan tô é lhunglhang gi, Garai Gasang é hí mai wó haq pyâm é haî le a joq é nghut lhê. Jung hkanmó gi, nga-nhung, jihpán shit ra râ Su é myoq hí má a wó nghop tô é hkyô, de de dut é nghut lhê.

Je Gyaú É Hkyangjong Mó Yesuq

¹⁴ Haû mù luî, nga-nhung gi, Garai Gasang é Yhangzo Yesuq nghut sù, mauhkung pê shut hkyang doq ló bê nghut é gyaú é hkyangjong mó lé wó é nghut é yanmai, nga-nhung yín yu to bê lumjîng hkyô lé ging ging myhik zing nyî sháng.

¹⁵ Hkâsu mù gâ le, nga-nhung gi, nga-nhung wum nyhôm é hkyô pé lé a sê gyo byî é hkyangjong mó wó é a nghut é za, nga-nhung su hkyô hkanmó má gunglaú é huî wú kôlhang mara a bo é sù hkyangjong mó lé sheq wó é ru nghut lhê.

¹⁶ Haû mù luî, nga-nhung gi, shogyo nhikmyîn é hkyô wó yû râ eq, nga-nhung ra châ é u má nga-nhung le wó garúm râ jeju lé myang hô sháng gaq, hkyak lum é myit mai Garaî jeju tanghkuq shut chyâng htep ê sháng.

5

¹ Hkyangjong mó yuq hkanmó gi, byu pê chyáng mai hkyin htoq yû huî é nghut mù, mara pê é matú, chyunghuq pé eq hkungga pé nhông byi hkyô nghut é, Garai Gasang eq sêng é muzó

pé má, yhangmoq é gunglik dông, hkyin masat to huî é bang nghut akô.

² Yhânggùng yhang gi, wum nyhôm hkyo é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é dông wó shuî-û é nghut lhê.

³ Wum nyhôm é yanmai, yhang gi, byu pê é marâ é matú le, yhânggùng yhâng é marâ é matú le, hkungga nhông byi râ dut é nghut lhê.

⁴ Ó yuq le, yhumsing gùng yhumsing aróng haû lé wó yu é a nghut; Arun lé su, Garai Gasang eq wut yu é hui jáng sheq wó é nghut lhê.

⁵ Haû eq rajung za, Hkrisduq le, hkyangjong mó dut lo é hpungwup shingkang lé, Yhânggùng yhang kut yu é a nghut. Garai Gasang sheq, Yhang lé,

"Nàng gi, Ngá Zo nghut ri; Ngò, hkû-nyí Náng Wa dut bê nghut lhê."[☆]

ga taî é nghut lhê.

⁶ Hau htoq agó,

"Nàng gi, Melahkizedek wó é hkyangjong ayá hkyô dông mai ahtum abyuq hkyangjong rayuq nghut nyi ri."[☆]

ga, gó wô má le, Yhang taî to ashî nghut ri.

⁷ Yesuq gi, myidàm htoq má asak dui nyi é buinyi pé má, Yhang lé, shi é mai wó hkyi yû Su chyáng, ngaubyi ngau-nhap eq wut garû é èq, kyûdung é eq dung tôngbán bê nghut mù, Yhâng é hkungga

gíng é ap nóng hkyo é yanmai, gyo byí é hui bê nghut ri.

⁸ Yhang gi, Zo rayuq nghut to kôle, Yhang hui zô é wuîhke jamjau hkyô mai jîno gyo hkyô wó mhoq yû bê nghut ri.

⁹ Yhang gi, lhoq gumjup huí é hkûn, Yhang é jîno gyo bang banshoq é matú, ah-tum abyuq é hkyi yù hkyo é awang dut byuq bê nghut é eq,

¹⁰ Melahkizedek wó é hkyangjong ayá hkyô đông mai hkyangjong mó dut râ matú, Garai Gasâng eq hkyin masat é hui bê sù nghut ri.

Woi-nyí Má Wáng Ra Bê Hkyô

¹¹ Ngamoq gi, shí hkyô eq séng luí taí râ gyai joq lhê; nghut kôlhang, nungmoq gi, ra lui za a sê gyô é bang nghut kô é yanmai, taí sân kyo wuî ri.

¹² Gè gè ga jáng, ahkui lhê ahkyíng má, nungmoq gi, sará dut gíng bê bang nghut lhê; nghut kôlhang, Garai Gasâng é mungdang mâ é tengmán hkyo é awang lé, rayuq yuq eq nungmoq lé dum taû mhoq byi râ ru dut nyi akô nghut ri. Nungmoq gi, htan é zoshuq râ é bang a nghut, naú wing râ é bang ru nghut nyi ashí kó myhi-nhung!

¹³ Naú wing shuq râ é sù ó yuq le, zonú nghut nyi ashí mù, dingmán é hkyô lé mho-qshit é má a mân shi nghut ri.

¹⁴ Nghut kôlhang, htan é zoshuq gi, ge é hkyô eq agè

ashop é hkyô lé wó sê gam hkoq yû shoq, hkâ-nhám le yhumsing gùng yhumsîng lhoq nhân yu nyi é, kô ding bê bâng é matú ru nghut lhê.

6

¹ Haû mù luí, nga-nhúng gi, Hkrisduq eq séng é mhoqshit hkyô awang lé tô to mù, myit kô ding é hkyô shut xoq sô é sháng. Nga-nhúng gi, shî-nò hkyô shut shuî jé é muzó mai myit lhîng hkyo é, Garai Gasang lé lumjîng hkyo é,

² baptisma pé, loq ke byi hkyô, shi é mai dum dui toq hkyô eq ahtum abyuq jéyáng hkyô eq séng é mho-qshit hkyo é, apûn awang dum hî nó a ra lô é nghut lhê.

³ Garai Gasang gyô é nghut jáng, nga-nhúng gi, myit kô ding hkyô shut xoq so râ nghut lhê.

⁴ Myoq lhoq bóng é radàm hui bê bang, mauhkûng chyunghuq lé myang hap yù bê bang, haû Chyoiyúng Woi-nyí lé chôm hkam yù bê bang,

⁵ Garai Gasâng é mungdâng é gè hkyô eq jé lo nyi é ipyat é a-tsam pé lé myang chyam wú bê bang,

⁶ yhangmoq hpuq lhik ló byuq é nghut le gi, hká đông lé myit lhîng dum ge wó râ a nghut lo, haî mù gâ le, yhangmoq gi, Garai Gasâng é Yhangzo lé dum jén sat pyâm é dut mù, Yhang lé de de rhoi pyám kô é nghut lhê.

⁷ Yhâng ahtoq má wo gyûn é mau wuî lé shuq yû mù, yò mù saí bâng é matú akyû bo

é hôwa nuqhpýí lhoq htoq byí é maumýí gi, Garai Gasâng é shimân jeju myang hap yu é nghut ri.

⁸ Nghut kôlhang, zu gâm eq myoq gâm yuq htoq nhang é maumýí gi, akyû a bò mù, nhîng pyâm é hui zo râ lé chiq râ ri. Haû gi, lô htáng má nyhê hkyô pyâm é hui râ nghut lhê.

⁹ Nghut kôlhang, chyitdap é gumang wuì ê, ngamoq gi, haû su nghû taí é nghut kôlhang, nungmoq é hkyí yù hkyô eq sêng é je ge é jung pé, nungmoq wó bekô râ nghû hkyak myit lum tô lhê.

¹⁰ Garai Gasang gi, a tara é sù a nghut. Yhang gi, nungmoq é muzó lé le, Yhâng é byu pé lé nungmoq garúm bê eq xoq luí garúm nyí é dông, Yhang lé nungmoq chyitdap é myit shit kô é hkyô lé le, a tô-myhí râ nghut lhê.

¹¹ Ngamoq gi, nungmoq é i-myit myoqbyù hkyô wó byíng jup râ matú, nungmoq yuq hkangmó ipyat htum shoq xoq shikut nyí kó râ lé gyai ô nau ri.

¹² Ngamoq gi, nungmoq lagon bang dut byuq râ lé a ô nau é za, Garaí danggidiq byí to bê é lé, lumjîng myit eq myit hîng hkyô dông mai hkam yu é bang su châng kut kó râ lé ô nau é ru nghut lhê.

Garai Gasâng É Danggidiq Gîng Nyí É Hkyô

¹³ Garai Gasang gi, Abraham lé danggidiq tô é hkûn, Yhâng htoq gyaú é dakâm myîng lang râ rayuq lháng a

nyí é nghut mù, Yhânggùng lé Yhang lang luí dakam é gi,

¹⁴ "Ngò gi, nang lé teng yhang shimân byi mù, nang lé awut ashín myo myo byi râ nghut lhê."* gâ ri.

¹⁵ Haû mù, Abraham gi, myit hîng hîng láng yu é htâng má, byí tô é danggidiq lé wó yû bê nghut ri.

¹⁶ Byu pé gi, yhangmoq htoq gyaú su é myîng lé lang luí, dakâm kô é eq, yhangmoq dakam é dang lé saksé kut mù, dang-rháng é hkyô pé banshoq lé lhoq pân pyâm akô nghut ri.

¹⁷ Garai Gasang gi, Yhang myit hpyit tô é hkâ-nhám le a htaí lhik é hkyô lé, danggidiq byí tô é lé hkam yù râ bâng chyáng san za shit nau ri; haû mù luí, dakâm dang eq lhoq gîng to bê nghut ri.

¹⁸ Garai Gasang gi, mhaú a ge é yanmai, hkâ-nhám le a htaí lhik é hkyô í hkat nghut é danggidiq eq dakâm dang joq é nghut mù, Yhang haû su kut é gi, nga-nhûng hí má tô to byí é myit myoqbyù hkyô lé myhik zîng râ matú gaû é jowò shut hpang wàng bê bang nga-nhúng lé wum mó byí é dut râ matú nghut lhê.

¹⁹ Nga-nhúng gi, myit nhiklhûm é shamtoq goknghe dông myit myoqbyù hkyô haû lé wó é nghut mù, haû gi, gîngtîng é eq gaû é hkyô nghut ri. Myit myoqbyù hkyô haû gi, mauhkûng noqkuq yhûm mâ é pán-gyang ahkaû mâ é sân-yúng gok má

jé wang é nghut ri.

²⁰ Jowò haû gi, nga-nhông é akyu é matú, nga-nhông é hí má wàng byî é sù Yesuq wang jé é jowò nghut ri. Yhang gi, Melahkizedek wó é hkyangjong ayá hkyô dông mai, ahtum abyuq é hkyangjong mó dut bê nghut ri.

7

Hkyangjong Melahk-izedek É Hkyô

¹ Melahkizedek gi, Salem myuq é hkohkâm eq Myhang Htâng é Garai Gasâng é hkyangjong nghut ri. Yhang gi, hkohkâm pé lé sat ûng pyám luí dum taû lo é Abraham lé hui mù, shimân byi bê nghut ri.

² Haû mù, Abraham gi, wó lo é jung hkangmó mâ é, xê gambùm mâ é ragambùm, yhang lé byi bê nghut ri. Sâng-hi lhê é Melahkizedek é mying lichyúm gi, "dingmán hkyo é hkohkâm" gâ é nghut mù, htâng lhê é "Salem é hkohkâm" gâ é gi, "nguingón hkyo é hkohkâm" gâ é nghut lhê.

³ Yhâng é înu îwa é hkyô eq byùxik labaû le, hi é buinyî eq asak htûm é hkyô le a kâ to nghut ri. Yhang gi, Garai Gasâng é Yhangzo su, ahtum abyuq hkyangjong ru nghut nyi ri.

⁴ Yhang hkâ-í hkik lhê nghû é lé, myit wú keq. Haû íchyí îwa Abraham lháng gi, wó lo é mâ é xê gambùm mâ é

ragambùm, yhang lé byi ri-nhung!

⁵ Hkyangjong dut bang Lewiq é awut ashîn pé gi, yhangmoq é gumang wui, Abraham mai nyi gyó lo é bang nghut kôle, tarâ má bo é eq rajung za, haú bâng chyáng mai xê gambùm mâ é ragambùm lé hkyui yù râ dut é bang nghut akô.

⁶ Nghut kôlhang, Melahkizedek gi, Lewiq mai gyó lo é amyú a nghut kôle, danggidiq pé wó to sù nghut é Abraham chyáng mai xê gambùm mâ é ragambùm hap yù mù, shimân byi ri.

⁷ Shimân byi sù gi, shimân byî é lé hkam yù sù htoq je gyaú sù nghut é lé, ó yuq le úng-áng râ hkyô a joq é nghut lhê.

⁸ Hkyangjong pé eq séng luí ga jang, shi byuq sê é byu èq, xê gambùm mâ é ragambùm lé hkyui yu é nghut lhê; nghut kôlhang, Melahkizedek eq séng luí nghut jáng, asak dui nyi é ga taí pyô byî é hui su èq hkyui yu é nghut lhê.

⁹ Xê gambùm mâ é ragambùm hkyui yù sù, Lewiq lháng gi, Abraham dông mai xê gambùm mâ é ragambùm byi bê nghû wó taí ri.

¹⁰ Haî mù gâ le, Melahkizedek gi, Abraham lé hui é hkûn, Lewiq gi, yhâng é íchyí îké é gungdu hkaû má ru bo tô ashî nghut ri.

Melahkizedek Eq Dù É Yesuq

11 Haû Lewiq hkyangjong amyû pê é ipyat má, byu pé gi, jep é tarâ lé wó yu bùm kô é nghut mù, hkyangjong ayá haû mai gumjup hkyô wó yû kô é nghut le gi, haí mù luí, Arun wó é hkyangjong ayá hkyo dông a nghut é za, Melahkizedek wó é hkyangjong ayá hkyo dông lo é sù gotû hkyangjong rayuq ra shirâ lú?

12 Hkâsu mù gâ le, hkyangjong amyû htaí é hkûn gi, tarâ le htaí yang htaí râ dut é nghut lhê.

13 Haû su nghû taí é hkyô pé eq sêng é Sù gi, gotû byuhú mâ é sù nghut mù, byuhú haû mai gi, ó yuq le hkungga gyap má dojaú wú é a nghut.

14 Hkâsu mù gâ le, nga-nhûng é Yhumsîng gi, Yudaq byuhú mai gyó lo é awut ashín nghut é hkyô, san za nghut nyi ri. Mosheq kúm gi, byuhú haû eq sêng é hkyô má, hkyangjong pé eq séng luí haí lé a taí é nghut lhê.

15 Melahkizedek eq dù é gotû hkyangjong rayuq pô htoq bê nghû, ngamoq taí bê hkyô gi, je riyhang san za dut bê nghut ri.

16 Yhang gi, îwa rayuq é awut ashín pé nghut râ lhê gâ é tarâ dông hkyangjong rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lhê.

17 Hkâsu mù gâ le,

"Nàng gi, Melahkizedek wó é hkyangjong ayá

hkyô dông mai, ahtum abyuq hkyangjong rayuq nghut nyi ri."[☆]

ga Yhang eq séng luí taí pyo tô é nghut lhê.

18 Haû hí lhê é cháng râ tarâ gi, wum nyhôm é eq akyû a bo é yanmai, tô pyám bê nghut lhê.

19 Hkâsu mù gâ le, haû jep é tarâ gi, gumjup hkyô haí a wó kut byí é nghut lhê. Haû mù, je ge é myit myoqbyù hkyô lajang byí é nghut luí, nga-nhûng gi, myit myoqbyù hkyô haû mai Garai Gasâng chyáng wó chyâng htep é é nghut lhê.

20 Myit myoqbyù hkyô haû gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjong pé wó dut bekô nghut ri.

21 Nghut kôlhang, Yesuq kúm gi,

"Nàng gi, ahtum abyuq hkyangjong rayuq nghut lhê.'

ga haû Yhumsîng dakâm bê nghut mù, Yhang myit é hkyô htaí râ a nghut."[☆]

ga, Yhang eq séng luí Garai Gasang taí é hkûn, dakâm dang haû mai hkyangjong rayuq dut bê nghut ri.

22 Dakâm dang hau é yanmai, Yesuq gi, je ge é dangshikaq é pahkâm wò yù sù dut bê nghut ri.

23 Hkyangjong pé myo myo nyi râ dut é gi, yangmoq é muzó a wó xoq zui shoq

shi byuq hkyô èq hkûm zing pyám kô é yanmai nghut ri.

²⁴ Nghut kôlhang, Yesuq gi, ahtum abyuq dui nyi sù nghut é yanmai, Yhang gi, hkyangjong mù ayang ru zúi nyi rá nghut lhê.

²⁵ Haû mù luî, Yhang gi, Yhang đông mai Garaí Gasâng chyáng lé jé é bang lé, hkâ-nhám le wó hkyi yu é nghut lhê; haû mù gâ le, Yhang gi, yhangmoq é matú dưng tôngbán byi nyi rá matú, rû dui nyi é sù nghut lhê.

²⁶ Yesuq gi, chyoiyúng é sù, mara hûn rá hkyô a bo é sù, sân-yúng é sù, yubak dap bang eq rahá a nghut shoq gotû san kut huî é sù, mauhkûng pê ahtoq má lhoq toq lhoq gyaú yu huî é sù nghut ri. Haû sù é hkyangjong mó gi, nga-nhúng rá é lé lajang byi rá htuk ang ri.

²⁷ Nyí nyí bui bui, yhumsing é marâ é matú hí hkungga nhông byi mù, byu pê é mara matú le hkungga nhông byi é gotû hkyangjong mó pé su, Yhang gi, a kut rá é sù nghut lhê. Yhang gi, Yhânggùng lé Yhang nhông byi é hkûn, yhangmoq é yubak marâ é matú banshoq radàm za hkungga nhông byi pyám bê nghut ri.

²⁸ Hkâsu mù gâ le, haû jep é tarâ gi, wum nyhôm é byu pé lé hkyangjong mó pé dông masat é nghut ri. Nghut kôlhang, Garaí Gasang gi, haû jep é tarâ é htâng má lé jé é dakâm dâng eq, Yhâng é

Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

8

Dangshikaq Asik É Hkyangjong Mó Yesuq

¹ Ngamoq taî nyi é dangkâng gi, shí dông nghut lhê: Nga-nhúng gi, haû sù é hkyangjong mó lé wó é bang nghut lhê. Yhang gi, mauhkûng htoq má, Hkikhkam dik Sù Garaí é hkohkâm-tanghkuq é loqyô hkyam shut zùng to mù,

² byu èq saî é a nghut é za, haû Yhumsing èq saî é saksé zúm akying hkaû má é, sân-yúng dik gok má dojaú é sù nghut ri.

³ Hkyangjong mó hkangmó gi, chyunghuq pé eq hkungga pé lé nhông byi rá matú wò hun to huî é chyat nghut lhê. Haû mù luî, hkyangjong mó shí yuq le, rajung jung nhông byi ra rá nghut lhê.

⁴ Yhang gi, mingkan htoq má nyi tô é ru nghut le gi, hkyangjong dut rá a nghut; hkâsu mù gâ le, jep é tarâ dông ga jang, chyunghuq nhông jaú é byu pé nyi to gù bê nghut lhê.

⁵ Yhangmoq, sân-yúng dik gok má dojaú é hkyô gi, mauhkûng htoq má joq é azòng eq wupzo dông nghut ri. Haû nghut é yanmai, Mosheq gi, saksé zúm saî rá nghut é hkûn, "Nang lé, bùm má tûn shit é azòng eq rajung za jung hkangmó wó saî shoq

kut aq."* ga sidiq byi huî é nghut lhê.

⁶ Nghut kôlhang, Yesuq, gyoro sô xoq byî é dangshikaq gi, axaû lhûm htoq má je gyaú é eq rajung za Yhang hap yu tô é dojaú hkyô gi, yhangmoq é dojaú hkyo htoq má je gyaú é nghut lhê. Haû mù, dangshikaq haû gi, je ge é danggidiq pê htoq má awang hi tô é nghut lhê.

⁷ Hkâsu mù gâ le, sâng-hi lhê é dangshikaq má râ é hkyô haî a bo é ru nghut le gi, gotû ra râ a nghut lo.

⁸ Nghut kôlhang, Garai Gasang gi, byu pê chyáng mara bo é myàng mù, taî é gi,

"Haû Israelaq é yhumbyù wuì eq le, Yudaq é yhumbyù wuì eq le,

Ngò, dangshikaq asik to râ ahkyíng jé lo nyi ri ga haû Yhumsîng taî pyo ri.

⁹ Haû gi, Ngò, yhangmoq é îchyí îwâ pé lé loq èq zui mù, Egutuq ming mai shuî htoq lo é hkûn,

yhangmoq eq tô tô é dangshikaq su dut râ a nghut.

Haî mù gâ le, yhangmoq gi, Ngá é dangshikaq lé a xoq cháng kô é nghut mù,

Ngò gi, yhangmoq chyáng mai lhing ló byuq é nghut lhê ga haû Yhumsîng taî pyo ri.

¹⁰ Shî gi, ahkyíng haû lai é htâng má, Israelaq

é yhumbyù wuì eq Ngò to râ nghut é dangshikaq nghut lhê ga haû Yhumsîng taî pyo ri.

Ngò gi, Ngá é tarâ pé lé, yhangmoq é i-myit má kat byi mù, yhangmoq é myit nhiklhum má kâ to byi râ nghut lhê.

Ngò gi, yhangmoq é Garai Gasang nghut mù, yhangmoq gi, Ngá é byu pé dut kó râ nghut lhê.

¹¹ 'Haû Yhumsîng lé sé keq.' ga, yhâng é gumang hpó lé nghut nghut,

yhâng é chyangnâm mâ é sù lé nghut nghut, mhoqshit é byù nyi râ a nghut lo,

haî mù gâ lé, yhangmoq lhunglhâng bang gi, tiq htáng sù mai kô htáng sù jé shoq Ngo lé sé kó râ nghut lhê.

¹² Hkâsu mù gâ le, Ngò gi, yhangmoq é agè ashop hkyô lé mara hkyut pyâm byi mù, yhangmoq é mara pé lé dum a bun byi lo râ nghut lhê."*

gâ ri.

¹³ Dangshikaq haû lé, Yhang "asik" gâ é gi, sâng-hî lhum lé, axau kut pyâm é nghut ri; xau ló byuq é haî le, hkâ-myháng a myáng má byuq ló byuq râ nghut lhê.

9

*Myidàm Saksé Zúm Má No-
qkuq É Hkyô*

¹ Sâng-hi lhê é dangshikaq gi, noqkuq râ htúngtarâ pé eq noqkuq râ myidàm sân-yúng dik gok bo é nghut ri.

² Saî tô é saksé zúm é sâng-hi gok má gi, haû myibung tsúng jang, siboî eq haû nhông byî é muk joq mù, haû gok lé gi, Chyoiyúng Jowò ga myhîng ri.

³ Í dang nghû râ gok pán-gyang é ahkaû mâ é gok lé gi, Chyoiyúng Htâng é Jowò gâ é nghut lhê.

⁴ Gok haû má gi, nam-ngón jung nyhê é hîng hkungga gyap eq hîng shup dangshikaq sidek joq ri. Dangshikaq sidek haû má gi, mannaq muk bo é hîng yam, ahaq nyún tô é, Arun é dumbáng eq, dangshikaq luqlong pé bo tô ri.

⁵ Dangshikaq sidek é ahtoq má gi, shîhtaí gung-lik hkungga byi jang htoq má wup tô é, Hpungwup shingkanbò Sû é hkerubim* pé joq tô ri. Nghut kôlhang, ngamoq gi, ahkuî haû pé lé jihkúm nuqguq a wó taí san kyo é nghut lhê.

⁶ Haû dông jung hkanmó ban lajang tô é hkûn, hkyangjông pé gi, ayang sâng-hi gok má wàng mù, yhangmoq é dojaú muzó lé wùn waq bekô nghut ri.

⁷ Nghut kôlhang, ahkaû gok má gi, hkyangjong mó za,

yhânggùng é matú le, a sê é za byu pé kut shut é marâ é matú le, nhông byi râ sui chùng mù, razàn má radàm za wang é nghut lhê.

⁸ Haû Chyoiyúng Woi-nyî gi, haû pé dông mai, sâng-hi é saksé zúm ru joq nyî nyî, haû Chyoiyúng Htâng é Jowò wàng hkyô a hpông shít shi é lé, tân shít nyi ri.

⁹ Haû gi, ipyat shi é matú tân shít é azông nghut mù, nhông byî é chyunghuq pé eq shigu hkungga pé gi, dojaú sù é i-myit lé a wó lhoq sân-yúng byî é hkyô lé taí nau é nghut lhê.

¹⁰ Haû pé gi, zojung, shuqjung eq chí san chí séng hking ahú hú eq za sêng é nghut mù, htúngli asik, lé joq é ahkýing jé shoq za tô tô é gungsho eq sêng é tarâ pé nghut ri.

Hkrisduq É Sui

¹¹ Hkrisduq gi, shî má joq to gù nghut é gè hkyô pé é hkyangjong mó dông lé jé é hkûn, hpan tô é má a lom nghû nau é, byu eq saî é a nghut é, je kô é eq je gumjup é saksé zúm mai wang lai bê nghut lhê.

¹² Yhang gi, Chyoiyúng Htâng é Jowò má wang é hkûn, bainám eq nojúng zo pé é sui lé chùng mù wang é a nghut é za, Yhâng é suî eq yhang banshoq é matú radàm za ahtum abyuq é hkyi yù hkyô wó yù bê nghut ri.

* 9:5 Hkerubim gâ é gi, byù su su, dusak su su dut é, dùng dap é maumang lagyo rahú nghut lhê.

¹³ Htûngli đông agot a-û dut é bang lé lhoq sân-yúng râ matú, bainám eq nohtó zo pê é sui eq no-pyâ é myi-mhop lé, yhangmoq é ahtoq má hpyun gyun é hkûn, yhangmoq gi, ahtoq gungsho pyâm wó lhoq sansêng é hui kô é nghut lhê.

¹⁴ Haû nghut jáng, Garai Gasâng é hí má ra a bo é Yhânggùng lé, ahtum abyuq é Woi-nyí đông mai nhông byí é Hkrisduq é sui gi, rû dui nyi é Garai Gasang lé nga-nhúng wó dojaú sháng gaq ga, shi é hkyô shut shuí jé é nyi yap sâmlai mai nga-nhúng é myít sôn sê é hkyô lé, je riyhang wó lhoq sanséng yu ri-nhung mhai!

¹⁵ Haû nghut é yanmai, Hkrisduq gi, danggidiq byi tô é ahtum abyuq é muizê lé, ji yù huí é bang wó hap yù kó sháng gaq ga, dangshikaq asik é gyoro sô xoq byi sù nghut nyi ri. Haû su wó kut é gi, sân-gi lhê é dangshikaq ahkaû má mara kut shut é bang lé lhoq lhut yû râ matú, yubak chyîn xap zê ralhum đông, Yhang shí hkám byi yanmai nghut ri.

¹⁶ Madat dang eq séng luí ga jang, madat dang tái sù haû shí bê hkyô saksé shit râ lhê.

¹⁷ Haí mù gâ le, madat dang gi, rayuq yuq shí jáng za sheq lichyúm htoq é nghut lhê. Madat dang tái sù rû dui nyi nyi, haû gi, hkâ-nhám le lichyúm htoq râ a nghut.

¹⁸ Haû nghut é yanmai,

sân-gi lhê é dangshikaq lháng gi, sui a bo lôm jáng lichyúm a htoq é nghut lhê.

¹⁹ Mosheq gi, haû jep é tarâ má bo é hkunmó hkangmó lé, shiwa byù banshoq bang lé ban taí pyo é hkûn, zam zam ne é saumaú eq jâm kyâng lé yù mù, nojúng zô é sui eq bainám sui eq wui nyhò tô é lé, chyúmding má le, shiwa byù banshoq bang lé le, hpyun gyûn é nghut ri.

²⁰ Yhang gi, "Sui shí gi, nungmoq cháng râ matú, Garai Gasang, hkunmó hkyô to bê nghut é, dangshikaq tô tô é sui nghut lhê."* ga taí ri.

²¹ Yhang gi, saksé zúm eq dojaú é má chung é zè pé má le, haû eq rajung za sui haû hpyûn gyûn ri.

²² Gè gè gi, haû jep é tarâ má bo é đông ga jang, azíng zê aluq banshoq gi, suí èq lhoq sân-yúng é hui râ dut é nghut mù, sui htoq hkyô a joq jáng, mara hkyut byi hkyô le joq é a nghut.

²³ Haû mù, mauhkûng zè pé é azòng pé gi, hkungga haú pé èq lhoq sân-yúng é hui râ é nghut lhê. Nghut kôlhang, mauhkûng zè pé yhang gi, haú pé htoq je ge é hkungga pé èq lhoq sân-yúng é hui râ dut é nghut lhê.

²⁴ Hkâsu mù gâ le, akying lhûm é azòng za nghut é, byu èq saí é chyoiyúng dik é jowò má Hkrisduq wang é a nghut é za, Yhang gi, mauhkûng má yhang wang é nghut mù, ahkuí gi, nga-nhúng é matú

Garai Gasâng é hí má bo yap byi nyi é nghut lê.

²⁵ Yhang gi, haû hkyangjong mó mai yhumsing é sui a nghut é sui lé chûng mù, Chyoiyúng Htâng é Jowò má zàn wuì wàng luí kut é su, yhânggùng lé dum không byi byi kut râ matú mauhkung má wang é le a nghut.

²⁶ Haû dông ru nghut le gi, Hkrisduq gi, mau htoq xâng hkûn mai shî hkâm é adàm myo myo nghut berâ nghut lê. Nghut kôlhang, ahkuí, Yhang gi, yubak mara huí sêng pyám byi râ matú, yhânggùng lé hkungga không byi râ ga ipyat pé ló htâng ló nyi é má, banshoq é matú radàm za htoq shit bê nghut ri.

²⁷ Byù gi, radá za shî râ nghut mù, hau htâng má tarâ jéyáng é hui râ nghut é eq rajung za,

²⁸ Hkrisduq gi, byù myo myô é yubak mara lé yu pyám byi râ matú, radá za hkungga không é hui bê nghut ri. Haû mù, Yhang gi, yubak mara wun pyám byi râ a nghut lo é za, Yhang lé lánng nyi é bang lé hkyi yù hkyô yu lé byi râ matú, htâng má í dâm nghû râ dàm htoq shit râ nghut lê.

10

Hkrisduq É Gùng Lé, Banshoq É Matú Radàm Za Không Byi É Hkyô

¹ Haû jep é tarâ gi, jé lô râ nghut é gè hkyô pé é akying a nghut é za, wupzo za nghut

ri. Haû nghut é yanmai, jep é tarâ gi, zàn wuì ru không byi byi kut nyi é eq rajung zâ é shigu hkungga pé dông mai, noqkuq râ matú chyâng lé é bang lé hkâ-nhám lé wó lhoq gumjup é a nghut.

² Tarâ haû wó lhoq gumjup byi é ru nghut le gi, yhang-moq không byi é hkyô nô pyám kó râ a nghut lí? Hkâsu mù gà le, haû noqkuq é bang gi, banshoq é matú radàm za lhoq sanséng huí é nghut jáng, yhangmoq é yubak mará é matú, hkâ-nhám le mara a bò bun lo kó râ nghut lê.

³ Nghut kôlhang, shigu hkungga haû pé gi, zàn wuì yubak mara pé lé lhoq pun byi é zè nghut ri.

⁴ Haí mù gà le, nohtó pé eq bainám pé é sui gi, yubak mara lé huí sêng pyâm é hkyô wó dut é a nghut.

⁵ Haû mù luí, Hkrisduq, mingkan má lé jé é hkûn, Yhang taí é gi,

"Shigu hkungga eq hkungga lé Nàng a o é nghut mù, Nàng kúm gi, Ngá é matú gungdu hen to byi bê nghut ri.

⁶ Myi nyhé hkungga pé eq mara hkyut hkungga pé gi, Nang lé gabú nhang é a nghut.

⁷ Hau htâng, Ngò gi, 'Garai Gasang ê, Ngò eq séng luí chyúmding má kê tô é eq rajung za, Nàng ô nau é hkyô kut râ matú, Ngò, shî má nyi lê.' nghû taí é."*

gâ ri.

⁸ Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haú pé lé Nàng a gabú é nghut lhê." ga taí ri. Haú jep é tarâ đông haú pé lé kut râ dut kôlhang taí é nghut ri.

⁹ Hau htâng má, Yhang gi, "Nàng ô nau é hkyô kut râ matú, Ngò, shî má nyi lhê." ga taí ri. Haú gi, Yhang, htang lhum dangshikaq lé htaí masat to râ matú, sâng-hi lhum lé tô pyâm é nghut ri.

¹⁰ Myit ô nau hkyô hau é yan-mai, Yesuq Hkrisduq, Yhâng é gungdu lé hkungga đông ban-shoq é matú radâm za nhông byí é đông mai, nga-nhúng gi, lhoq chyoiyúng é hui bê nghut ri.

¹¹ Hkyangjong hkangmó gi, nyí nyí bui bui, yap mù, yhâng é hkyangjong muzó lé zui saí é nghut lhê. Yhang gi, yubak mara lé hkâ-nhám lháng a wó huí séng pyám byí é, rajung zâ é shigu hkungga lé, dum nhông byi byi kut é nghut lhê.

¹² Nghut kôlhang, hkyangjong mó nghut é Hkrisduq gi, yubak mara hkyut byi râ hkungga ralhum lé za, ahkyíng banshoq é matú ban nhông byí é hkùn jáng, Garai Gasâng é loqyo hkyam shut zung to bê nghut ri.

¹³ Haú hkùn mai, Yhang gi, Yhâng é gyè pé lé, Yhâng é hkyí nang jang kut byi râ lé lánng nyi é nghut ri.

¹⁴ Haí mù gâ le, Yhang gi, lhoq

chyoiyúng é huí nyi bang lé, hkungga ralhum eq za, pyat dedû é matú lhoq gumjup byi bê nghut ri.

¹⁵ Haú Chyoiyúng Woi-nyí le, haú hkyô eq séng luí nga-nhúng lé saksé hkâm kyô ri. Sâng-hi má, Yhang taí é gi,

¹⁶ "Haú Yhumsíng taí ri, shî gi, ahkyíng haú laí htâng má, Ngò, yhangmoq eq to râ dangshikaq nghut lhê.

Ngò gi, Ngá é tarâ pé lé, yhangmoq é myit nhiklhum hkaú má kat byi mù, yhangmoq é i-myt má kê to byi râ nghut lhê."*

gâ ri.

¹⁷ Hau htâng, Yhang taí jat é gi,

"Ngò gi, yhangmoq é yubak mara pé eq tarâ a chung é muzó pé lé, bûn lô râ a nghut."*

gâ ri.

¹⁸ Haú mù, mara haú pé lé hkyut pyám byi bê nghut jáng, yubak marâ é matú hai hkungga le a ra lo nghut ri.

Hkam Jan Râ Hkyô

¹⁹ Haú mù luí, gumang wui é, nga-nhúng gi, Yesuq é suí èq, haú Chyoiyúng Htâng é Jowò má wàng râ matú hkyak wó lum to bê nghut lhê.

²⁰ Haú gi, Yesuq é gungdu nghut é pán-gyang đông mai, nga-nhúng é matú hpóng byi bê nghut é asik eq rú dui nyi é hkyô nghut lhê.

²¹ Haú nghut é yanmai le, Garai Gasâng é yhùm lé up

é gyaú é hkyangjong lé nga-nhúng wó é yanmai le,

²² nga-nhúng gi, gíngtíng é lumjíng hkyô mai sansêng é i-myit eq, Garai Gasâng chyáng ê mù, mara bò bûn é myit sôn sê é hkyô mai, nga-nhúng lé lhoq sansêng râ matú nga-nhúng é i-myit lé hpyun gyûn é hui nhâng luí, nga-nhúng é gungdu gi, sân-yúng wui eq chi byí é hui yù sháng.

²³ Nga-nhúng gi, nga-nhúng yín yu é myit myoqbyù hkyô lé zuí gíngtíng nyí sháng; hkâsu mù gâ le, danggidiq byí to bê Sû gi, lhumzui Sû nghut lhê.

²⁴ Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaù toq byí lhum râ hkyô lé, dat myit nyí sháng.

²⁵ Chôm huí zup lhûm nyi é hkyô lé, ra-am lhaq tô pyâm nyí kô é su, nga-nhúng gi, a tô pyâm é za, haù Buinyi chyâng lò bê nghut é lé nungmoq sê é eq rajung za, rayuq eq rayuq je riyhang myit wum byí lhûm nyí sháng.

²⁶ Nga-nhúng gi, tengmán hkyô lé sê yu é htâng má, shingé ngé mara dum kut shut shut kut é nghut jáng, mara hkyut byi râ hkungga a joq lo.

²⁷ Tarâ jéyáng hkyô eq Garai Gasâng é gyè pé lé nyhê hkyô pyám râ nghut é nhikmo-yô é myi lé za, gyuq chiq myit mai láng nyí râ dut bê nghut lhê.

²⁸ Mosheq é tarâ lé he-ngik

é sù ó yuq le, saksé í sum yuq é dâng é yanmai, shogyo nhikmyin a huí é za sat pyâm é hui bê nghut lhê.

²⁹ Haù jáng, Garai Gasâng é Yhangzo lé hkyiwa ô má nâng pyeq bê sù, yhumsíng lé lhoq sân-yúng byi bê nghut é dangshikaq é sui lé a chyoiyúng é zè dông kut pyám bê sù eq, jeju byí é Woi-nyí lé rhoi é sù gi, hkâ-í yhang gyaú é mara dam byí é hui gíng râ nghut lhê nghû, nungmoq wó myit akô lú?

³⁰ Hkâsu mù gâ le, "Lató hpuq râ gi, Ngò ru nghut lhê; Ngò lató hpuq râ."* ga le, "Haù Yhumsíng gi, Yhâng é byu pé lé tarâ jéyáng râ nghut lhê."* ga le, taí é Sù lé, nga-nhúng sê lhê.

³¹ Haù rû dui nyí sù Garai Gasâng é loq hkaù má byit gyó wang é gi, gyuq chiq jung yhang nghut ri.

³² Nungmoq, haù maubó lé hap yu é* htâng, wuîhke jamjau huí é má gyai yhang shikut kôluí wó jân pyám bê nghut é, hí lhê buinyi pé lé myit bun keq.

³³ Ra-u u má, nungmoq gi, byu pé hí má de de rhoi shít é eq zing-rî é hui zo bekô nghut ri; ra-u u má, nungmoq gi, haù su hui zo bang eq rahá bo hui zo bekô nghut ri.

³⁴ Nungmoq yhang, je ge é eq ru gíng nyi é zè pé wó é lé sé kô é yanmai, nungmoq gi, htóng lúng bang lé shogyo nhikmyin bekô eq, nungmoq

* 10:30 Tarâ Pun 32:35 * 10:30 Tarâ Pun 32:36 * 10:32 Haù maubó lé hap yu é gâ é gi, gabú danglù lé sâng-hi wó hap yu é lé gâ lhê.

é sutzè pé lé sing yu pyám byí é bang lé, gabú myit eq jân pyám bekô nghut ri.

³⁵ Haû mù luí, nungmoq é hkyak myit lum tô é hkyô lé hkâdú pyám kó; agùn agó chyunghuq shigyaú é hui kó râ nghut lhê.

³⁶ Nungmoq gi, Garai Gasâng é ô naù hkyô lé kut é hkûn, Yhâng danggidiq byí tô é lé wó hap yù râ matú, nungmoq hkam jan râ dut é nghut lhê.

³⁷ Hkâsu mù gâ le, razup zo nghut jáng,

"Haû lé lô râ Sû gi, jé lé râ nghut mù, ahkyíng lhoq myáng râ a nghut.

³⁸ Nghut kôlhang, Ngá é dingmán sù gi, lumjíng myit mai asak dui râ nghut lhê.

Yhang nungzut zut é nghut le gi, Ngò, Yhang lé myit nguì râ a nghut."[☆]

ga tô ri.

³⁹ Nghut kôlhang, nga-nhúng gi, nungzut zut mù htên byoq huí é bang a nghut é za, lumjíng mù hkyi yù huí é bang ru nghut lhê.

11

Lumjíng Myit Mai

¹ Lumjíng myit nghu é gi, nga-nhúng myit myoqbyu tô é lé hkyak wó râ nghu é eq nga-nhúng a myàng shí é lé joq lhê nghu hkyak sê é hkyô nghut lhê.

² A-nham lhê bang gi, lumjíng myit haû mai Garaí eq owaq é hui kô é nghut lhê.

³ Lumjíng myit mai, nga-nhúng gi, nyí mi-nyí, joq mijoq lhunglhang lé Garaí Gasâng é hkunmó eq hpan tô é hkyô sê gyô é nghut lhê. Haû mù, myoq eq wó myang é pé gi, byu-myang é pé mai saí htoq tô é a nghut.

⁴ Lumjíng myit mai, Abelaq gi, Ka-in kut é htoq je ge é hkungga, Garaí Gasang lé nhông byí é nghut ri. Lumjíng myit mai, yhang gi, yhâng é hkungga eq séng luí Garaí Gasang hkya-ôn é hkûn, dingmán sù rayuq đông owaq é hui bê nghut ri. Haû mù, lumjíng myit mai, yhang gi, shi byuq bê nghut kôlhang, dang rú nyo nyi ashí nghut lhê.

⁵ Lumjíng myit mai, Enuq gi, shi é a hui zo shoq, asak shí mai mauhkúng shut shuí yu é hui bê. Yhang lé, Garaí Gasang shuí ló byuq bê nghut é yanmai, yhang lé a wó myâng lo nghut ri. Hkâsu mù gâ le, yhang gi, shuí yu é a hui shí é hí má, Garaí Gasang lé nguì nhâng sù rayuq đông owaq é hui sù nghut ri.

⁶ Lumjíng myit a bo é nghut le gi, Garaí Gasang lé a wó nguì nhang é nghut lhê. Haí mù gâ le, Yhâng chyáng shikut luí lé jé é sù gi, Yhang nyi é hkyô lé le, lhumzui myit mai Yhang lé hô bang lé, Yhâng eq shigyaú é lé le, lumjíng râ dut é nghut lhê.

⁷ Lumjíng myit mai, Noaq gi, a myang wú shí é hkyô pé eq séng luí sidiq byi huí

é hkûn, yhâng é yhumbyù wuì lé hkyî râ matú, gyuq hkunggâ é dông mai wuì-sanghpo saí bê nghut ri. Yhâng é lumjín myit mai, mingkan lé mara byí é nghut mù, lumjín myit mai lo é dingmán hkyo é jeju lé hkam yù sù dut bê nghut ri.

⁸ Lumjín myit mai, Abraham gi, yhâng é muizè dông, htâng má yhang hap yù râ nghut é, Garai Gasang byí é jowò shut e ló râ matú ji yu é huí é hkûn, jino gyo mù, yhang hká shut e ló é a sé kôhang, ê bê nghut ri.

⁹ Lumjín myit mai, yhang gi, gó ming má nyi é byù bíng rayuq su, danggidiq byí tô é mau má nyi bê nghut ri. Yhang gi, zúm pé má lúng é nghut mù, rajung zâ é danggidiq é muizè lé hkam yu é Isak eq Yakup le, zúm pé má lúng bekô nghut ri.

¹⁰ Hkâsu mù gâ le, Abraham gi, Garai Gasâng eq azòng hên mù saí tô é, gíng é apûn awang pé eq mu é myuq lé myit myoqbyu nyi é nghut ri.

¹¹ Lumjín myit mai, Abraham gi, yhâng é asak ipyat laí ló byuq é eq, Sarah le baùdung nghut to kôhang, haù danggidiq byi Sù, lhumzui sù nghut lhê ga myit sôn yu é yanmai, îwa rayuq wó dut é hui bê nghut ri.

¹² Haù mù luí, yhang gi, shí gùng dông nghut kôle, yhang rayuq mai lo é awut ashín pé gi, mauhkûng mâ é kyî pé eq wuimau yàm mâ é a ung ng-

hap é semuì myhó myô lò bê nghut ri.

¹³ Byù haù bang banshoq gi, yhangmoq shi é hkûn jé shoq lumjín myit mai asak dui nyi kô é nghut lhê. Yhangmoq gi, danggidiq byi tô é pé lé a hap yù kó nghut ri; nghut kôhang, haù pé lé myàng za myàng kômù, we mai te yu akô. Yhangmoq gi, myidàm htoq má gó ming byu pé eq byù bíng pé nghut é lé yín yù bekô nghut ri.

¹⁴ Haù su yín yu é byu pé gi, yhangmoq yhumsing é ming lé ho nyi é bang nghut é lé tân shit é nghut akô.

¹⁵ Yhangmoq htoq lo é ming lé, yhangmoq myit tui nyi kô é ru nghut le gi, dum tau ló râ ahkáng wó kó râ nghut lhê.

¹⁶ Ahkuí kúm, yhangmoq gi, je ge é ming nghut é, mauhkûng mingdán lé myit tuí nyi akô nghut ri. Haù mù luí, Garai Gasang gi, yhangmoq é Garai Gasang nghu é hui râ lé a hoq é nghut lhê. Hkâsu mù gâ le, Yhang gi, yhangmoq é matú myuq ralhú lājāng to byi bê yanmai nghut ri.

¹⁷ Lumjín myit mai, Abraham gi, Garai Gasâng eq yhang lé chyam é hkûn, Isak lé hkungga ralhú dông nhông byi bê nghut ri. Haù gi, danggidiq pé lé hap yu to bê sù gi, yhâng é yuqzo zote lé nhông byi râ dâ é nghut lhê.

¹⁸ Garai Gasang gi, "Isak dông mai lo é lé, náng é awut

ashín nghû són byi râ nghut lhê."^{*} ga yhang lé danggidiq byi to bê nghut kôle, yhang haû su kut é nghut ri.

¹⁹ Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jáng, Isak lé, shi byuq bê mai, yhang dum wó hap yu é nghut ri.

²⁰ Lumjín myit mai, Isak gi, Yakup eq Eso nhik é htàngnùng lhê é matú, shimân byi bê nghut ri.

²¹ Lumjín myit mai, Yakup gi, yhang shi ló râ u má, Yosep é yhangzô nhik lé shimân byi mù, yhang é dumbáng-u má ngè luí, noqkuq bê nghut ri.

²² Lumjín myit mai, Yosep gi, yhang asak htâm ló râ u lé, Israelaq byu pé Egotuq ming mai htoq lò râ eq séng luí taí mù, yhang é showui pé eq séng luí hkâsu kut râ hkyô lé pying to bê nghut ri.

²³ Lumjín myit mai, Mosheq é yhangnu eq yhangwâ nhik gi, yhang hku lé é htàng má, yhang lé lhamó sum hkyap haq to bekô nghut ri. Haí mù gâ le, yhangnhik gi, zoshâng haû yúng é myàng kômù, hkohkam é mungdang lé a gyuq kó nghut ri.*

²⁴ Lumjín myit mai, Mosheq gi, yhang kô lo é hkûn, Hpara-uq é byizô é yhangzo ga râ lé he-ngik pyâm ri.

²⁵ Yhang gi, yubak marâ é ngón hkyô má rayoq zo ngón kún râ malaí Garai Gasâng é

byu pé eq rahá hpuzô é hui râ lé sheq hkyin yù bê nghut ri.

²⁶ Yhang gi, haû Hkrisduq é matú rhoí huí é lé, Egotuq ming mâ é sutzè htoq má je riyhang hpaudap lhê ga myit sôn yu ri. Haí mù gâ le, yhang gi, yhang é shigyau chyunghuq lé myit myoqbyu nyi sù nghut ri.

²⁷ Lumjín myit mai, yhang gi, hkohkâm hpó nhikjum yô é lé a gyuq é za, Egotuq ming mai htoq ló byuq bê nghut ri. Yhang gi, myoq èq a wó myang é sù Garai lé wó myang é sù dông, hkam jân é nghut ri.

²⁸ Lumjín myit mai, yhang gi, haû zomún lé sat é mau-mang lagyô èq Israelaq byu pé é zomún lé a wó záng sháng gaq ga, Lhoqlhai Poí eq sui hpyûn é hkyô le kut hî bê nghut ri.

²⁹ Lumjín myit mai, haû shiwa byu pé gi, Nhões Nè lé kyuq huí é myigùng htoq mai su laí byit bekô nghut ri; nghut kôlhâng, Egotuq byu pé le, haû dông laí shikut wú kô é hkûn, yhangmoq gi, myup shi byuq bekô nghut ri.

³⁰ Lumjín myit mai, shiwa byu pé, Yerihko myuq xêwâm lé nyhit nyi sô lhing é htàng má, xêwâm haû leq gyop byuq bê nghut ri.

³¹ Lumjín myit mai, shiwa myhí Rahap gi, haû Israelaq jó wú bang lé nguingón é eq lhom hkulum yu é yanmai,

* **11:23** Haú-u lé, hkohkâm hpó gi, Israelaq pé é yuqzo zonú wuí lé sat pyâm râ hkunmó hkyô tô é nghut lhê.

jìno a gyo bang eq rahá sat pyâm é a huí é nghut lhê.

³² Haû htoq lai luí, ngò haí taí jat ra shirâ lhú? Gidon, Barak, Samson, Yephtha, Dawiq, Samuelaq pé eq myiqhtoí pé é hkyô lé taí râ ahkyíng ngò a wó.

³³ Haú bang gi, lumjíng myit mai mingdán pé lé wó zân ung yù bekô, tengmán hkyô lé chung jai bekô, danggidiq byí to bê lé wó hap yù bekô, hkanghkyi pé é nhut lé wó myhí pyám bekô,

³⁴ myidug myishâm lé wó sat pyám bekô, shamsó mai le wó hpang lut bekô nghut ri. Yhangmoq é wum nyhóm hkyô gi, wum taû bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyè pé lé wó ung pyám kô é nghut lhê.

³⁵ Myiwe wuì gi, yhangmoq eq sêng é shi byuq bê bang asak dum lhoq tuí huí é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut é hui râ lé he-ngik pyám kômù, zing-rî é gyai yhang hui zo bekô nghut ri.

³⁶ Ra-am gi, wuìzùi kut pyám byí é eq nhuq bat é hui bekô, góbang gi, shamtoq kyum hut huí é eq htóng lhùng é hui bekô nghut ri.

³⁷ Yhangmoq gi, luqgok eq dú sat é, í túm dut shoq yik hpyit é, sham èq sat pyâm é hui bekô nghut ri. Yhangmoq gi, sau-kuq eq bainám-kuq wut mù, htot lhing wún

luí, myung kyuq é, zing-rî é eq rhoi pyâm é hui bekô nghut ri.

³⁸ Yhangmoq lhumzui nyí kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkyûng pé eq myìdong pé má nyi lhing wún bekô nghut ri.

³⁹ Haú bang banshoq gi, yhangmoq é lumjíng myit é yanmai, owaq é hui bê nghut kôle, yhangmoq ó yuq le, danggidiq byí tô é lé a myang hkam yù kó nghut ri.

⁴⁰ Haí mù gâ le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajàng to byi bê nghut ri.

12

Garai Gasang, Zo Wuí Lé Mhoqshit É Hkyô

¹ Haú mù luí, nga-nhúng gi, haú myhò é saksé pé mhutdúm su nga-nhúng é lìnhghkyuq má joq to bê nghut é yanmai, nga-nhúng lé hkùm tang é hkyô pé jung hkangmó eq, lui za lhoq nhúng byí é yubak mara lé dú pyám mù, nga-nhúng òn râ matú tô tô é hkyô lé, hkam jan luí òn e ló sháng.

² Nga-nhúng gi, nga-nhúng é lumjíng hkyo é apùn awang lé hí sù eq lhoq gumjup byi sù nghut é Yesuq lé wú tsuq nyí sháng. Yhang gi, Yhâng é hí má joq tô é gabú hkyo é yanmai, hoq hpú é hkyô lé haí su a ngam é za, tapzîng má

shî hkâm é hkyô lé jân pyám luí, Garai Gasâng é hkohkâm-tanghkuq é loqyo hkyam shut zung to bê nghut ri.

³ Nungmoq gi, a ngu byuq râ eq myit wum a gyuí byuq kó sháng gaq, yubak dap bâng chyáng mai haû su htuq htíng é hkyô lé jân pyâm é Yesuq chyáng mai myit wum yù keq.

⁴ Nungmoq gi, yubak mara lé htuq htíng shikut é hkyô má, nungmoq é sui shun pyám shoq yhang a kut shí kó nghut ri.

⁵ Hau htoq agó, nungmoq gi, zo wuí lé dông Garai Gasang nungmoq lé wum byí é dang lé tô-myhí pyám bekô lhú? Wum byi dang haû gi,

"Ngá zo ê, haû Yhumsíng mhoqshit é hkyô lé agya alhá hkâkut pyám, Yhang, nang lé tân é hkûn, myit wum hkâgyui,

⁶ haí mù gâ le, haû Yhumsíng gi, Yhang chyitdap é bang lé mhoqshit mù, zo rayuq lé dông,

Yhang hap yu é bang yuq hkanmó lé dam byí é nghut lhê."[☆]

gâ é nghut ri.

⁷ Mhoqshit huí é hkyô má, wuíhkê é lé hkam jan keq. Garai Gasang gi, nungmoq lé, zo wuí lé dông kut é ru nghut lhê. Hkâsu mù gâ le, yhumsíng é yhângwâ èq a mhoq é zo gi, ó wá nyí lhê lhú?

⁸ Nungmoq gi, yuq hkanmó huí lai é mhoqshit hkyô lé, a hui kô é nghut jáng,

dezô pé dông nghut byuq mù, zo sîng wuí a nghut lo kó.

⁹ Nga-nhúng banshoq bang gi, nga-nhúng lé mhoqshit é xângzo íwâ pé wó é bang chyat nghut mù, yhangmoq lé hkunggâ é nghut lhê. Haû nghut jáng, je riyhang, nga-nhúng é woi-nyí eq sêng é Íwâ é a-ô má nyí mù, asak duí râ dut ri myhi-nhung!

¹⁰ Nga-nhúng é xângzo íwâ pé gi, yhangmoq je ge dik bûn é lé, nga-nhúng lé rayoq zo mhoqshit é nghut ri. Nghut kôlháng, Garai Gasang gi, Yhâng é chyoiyúng hkyô má nga-nhúng wó bo lòm shoq, nga-nhúng é gè hkyô é matú, nga-nhúng lé mhoqshit ri.

¹¹ Mhoqshit é hkyô hkanmó gi, mhoqshit u lé ngón hkyô a nghut é za, nò hkâm hkyô nghut nyí ri. Nghut kôle, mhoqshit hkyô haû lé hkam yù bê bâng é matú gi, htâng má, nguínón hkyô eq dingmán hkyo é ashi lhoq htoq byí ri.

¹² Haû mù luí, myûng byuq é nungmoq é loq pé eq wum nyhôm byuq é nungmoq é hkyihput pé lé wum-o lhoq kíng keq.

¹³ Hkyí hten bang a wó sô é a dut shoq, lhoq gè byí é wó hui kó sháng gaq, nungmoq so râ matú, hkyô lhoq nyhang nyí keq.

Garai Lé He-ngik Bang Dàm Byi Hui Râ Hkyô

¹⁴ Byù banshoq bang eq nguínón shoq nyí râ eq chy-

oiyúng rã matú wó dut é í shikut keq. Hkâsu mù gâ le, ó yuq le, chyoiyúng hkyô a bo é gi, haû Yhumsîng lé myàng rã a nghut.

15 Ó yuq le, Garai Gasâng jeju lé a tô pyâm rã matú, sidiq keq. Haû, yuq htoq lô mù, wuîhke hkyô lhoq htoq é eq byù myo myo lé agot a-û dut nhang é nuî hko su, ó yuq lé le hkâdut nhâng kó.

16 Ó yuq le, ashop é dông gungsho zùm yap é hkyô nghut nghut, zang radún é matú, yhang wó tô é yuqzo zomún muizè ahko ahkáng lé ung zô pyâm é, Garai a lom é Eso su nghut nghut, a kut rã matú sidiq keq.

17 Nungmoq sê é eq rajung za, Eso gi, htâng má, shimân jeju haû lé hkam yù nau é hkûn, he-ngik pyâm é hui bê. Yhang gi, shimân jeju haû lé ngaubyi ngau-nhap èq hô kôhang, yhang kut é hkyô lé a wó htaí byi lo nghut ri.

18 Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyî dut é eq laidun lo é má le,

19 tut htê mying é eq, dang taí htê mying é má le, a jé ê kó nghut ri. Dang htê haû lé wó gyô é bang gi, yhangmoq lé, dang a taí jat lo rã matú dung tôngbán akô nghut ri.

20 Haî mù gâ le, yhangmoq gi, "Bùm haû má dusak pé záng jáng lháng, luqgok èq

dú sat rã dut lhê."☆ ga Garai Gasang hkyô tô é hkunmó lé a wó hkâm kô é yanmai nghut ri.

21 Haû byu-myàng hkyô gi, lùm wú gyuq hpo dut é yanmai, Mosheq lháng gi, "Ngò, gyuq nán ri."☆ ga taí é nghut ri.

22 Nghut kôhang, nungmoq gi, Zi-un Bùm eq rû dui nyi é Garai Gasâng é myuq nghut é mauhkûng Yerusalem má, maumang lagyô pé ajùm ayò gabú ratung zup zîng é jang eq,

23 mauhkûng htoq má myìng kê to huî é, zomún pé é noqkuq hpúng joq jang má, jé lé bekô nghut ri. Haû mù, nungmoq gi, byù banshoq é tarâ agyî nghut sù Garai Gasâng chyáng le, lhoq gumjup huî é dingmân bâng é woi-nyí pé chyáng le,

24 dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyûn gyûn é sui má le, jé lé é nghut bekô.*

25 Nungmoq gi, dang nyô Sù lé a gyo a kut rã matú, sidiq keq. Myidàm htoq má sidiq byí é sù lé he-ngik pyâm é bang, a lut kô é nghut lhê. Haû mù, mauhkûng mai nga-nhúng lé sidiq byí é Su chyáng mai, nga-nhúng lhing ló byuq é ru nghut le gi, je riyhang nga-nhúng a wó lut rã a nghut kó lhí?

26 Haû Garaî dang taí é u má, Yhâng é htê gi, mingkan

☆ 12:20 Htoq Lô 19:12-13

☆ 12:21 Tarâ Pun 9:19

* 12:24 Abelaq lé gi,

yhangmang Ka-in èq sat é nghut luî, yhâng é sui gi, lató-hpuq rã matú nghut ri; nghut kôhang, Hkrisduq é sui kúm gi, hkyi yù hkyô lajang byí ri.

lé lhoq nhûn kat ri, ahkuí kúm gi, "Ngò, mingkan lé za a nghut, mauhkûng pé lé le radàm dum lhoq nhún râ nghut lhê."* ga Yhang dang-gidiq byî to bê nghut ri.

27 "Radàm dum" gâ é dang gi, haû a wó lhoq nhûn é pé wó myit to sháng gaq ga, hpan to huí é zè pé nghut é, wó lhoq nhûn é pé lé huí sêng pyám râ lé gâ é nghut lhê.

28 Haû mù luí, nga-nhúng gi, a wó lhoq nhûn é mingdán lé hap yu to bê nghut mù, jeju bun luí, hpautap é eq gyuq hkunggâ é myit mai Garai Gasang hap yù gíng é dông noqkuq sháng.

29 Hkâsu mù gâ le, nga-nhúng é "Garai Gasang gi, nyhê jôm é myi nghut ri".*

13

Ló Htáng Má Lhoq Pun Kyíng É Hkyô

1 Rayuq eq rayuq, gumang yhangchang dông chyitdap lhûm nyi keq.

2 Byù bíng pé lé hkulûm râ hkâtô-myhí kó, hkâsu mù gâ le, ra-am gi, haû su kut nyi kô é yanmai, a sê é za maumang lagyô pé lé hkulum záng bekô nghut ri.

3 Nungmoq gi, htóng lúng bang eq rahá htóng lúng luzúm wuí dông, htóng lúng bang lé le, nungmoq yhang jamjau hui zô nyi é dông, hpuzô é bang lé le, myit bun keq.

4 Myiháng hkyô gi, lunglhang bâng eq hpautap é hui râ dut é nghut mù, myiháng yhuphpú gi, sân-yúng râ dut lhê. Hkâsu mù gâ le, Garai Gasang gi, su-myi sulàng lú é bang eq ashop é dông gungsho zùm yap é bang banshoq lé jéyáng râ nghut lhê.

5 Nungmoq é asak duí hkyô má, ngùn lé chyitdap é myit tô pyám mù, nungmoq wó é lé nhik dik nyi keq, haû mù gâ le, Garai Gasang gi,

"Hkâ-nhám le, Ngò, nàng eq a gang râ; hkâ-nhám le, Ngò, nang lé a tô pyám râ."*
ga taí é nghut lhê.

6 Haû mù, nga-nhúng gi, hkyak lum é myit mai,

"Haû Yhumsîng gi, ngo lé garúm sù nghut lhê yanmai, ngò, gyuq râ a nghut. Ó yuq wá, ngo lé haû wó kut râ lú?"*
nghu taí é nghut lhê.

7 Nungmoq lé Garai Gasâng é mungdang taí kyô é, nungmoq é hkyô-u shê bang lé, myit bun keq. Yhangmoq asak htum shoq nyi laí lo é sâmlai lé myit wú mù, yhangmoq é lumjíng myit lé alik kut yù keq.

8 Yesuq Hkrisduq gi, a-nyí nap, hkû-nyí, htàngnùng pyat dedu rajung za nghut nyi ri.

9 Maú nhô zâ é mhoqshit hkyô ajung jung maí eq shuí nghoq huí é bang hkâdut kó. Zo bang lé hai akyû a byî é, htûngli zoshuq eq a nghut é

* 12:26 Hagi 2:6 * 12:29 Tarâ Pun 4:24
118:6-7

* 13:5 Tarâ Pun 31:6 * 13:6 Hkya-on

za, Garaî jejú èq nga-nhông é myit nhiklum lé wum-o lhoq kîng yu é gi, gè hkyô nghut lhê.

10 Nga-nhông gi, saksé zúm má dojaú é hkyangjong pé zo râ ahkáng a wó é hkungga gyap ralhum wó é nghut lhê.

11 Haû hkyangjong mó gi, dusak pé é sui lé, yubak mara hkungga dông Chyoiyúng Htâng é Jowò má yu wang ri; nghut kôlhang, gungsho pé lé gi, byù nyi jowò shinggan má nyhê hkyô pyâm ri.

12 Haû eq rajung za, Yesuq le, Yhâng é sui dông mai byu pé lé wó lhoq chyoiyúng râ matú, myuq hkum shinggan má jamjau hpuzo mù shí hkám bê nghut ri.

13 Haû mù luí, nga-nhông gi, byù nyi jowò shinggan má Yhâng chyáng ê mù, Yhang hui zô é rhoi hkyô lé ê bo hui zo sháng.

14 Hkâsu mù gâ le, nga-nhông gi, mingkan shí má ru gîng nyi é myuq wó bang a nghut é za, jé lé lô râ myuq lé ho nyi é bang ru nghut lhê.

15 Haû mù luí, nga-nhông gi, Garaî Gasâng é myìng lé yín yu é nhutwui é ashí nghut é, hkya-on hkungga lé, Yesuq dông mai, Garaî Gasâng chyáng xoq xoq nhông byi nyi sháng.

16 Ge é hkyô kut râ eq góbang lé shuí gam chûng râ hkyô lé, hkâtô-myhí kó; hkâsu mù gâ le, Garaî Gasang gi, haû sù é hkungga pé lé ô ngui nyi ri.

17 Nungmoq é hkyô-u shê bâng é jìno gyo mù, yhang-moq é ahko ahkáng ô má nyi keq. Yhangmoq gi, jihpán shit râ dut é bang dông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyû a bo é wòlai a dut é za, gabú hkyô ralhum wó dut sháng gaq, yhangmoq é jìno gyô nyi keq.

18 Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkangmó má ge é dông asak duì râ lé ô nau lhê nghû, hkyak wó myit ri.

19 Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq nghû wum taí tsuq kat lhê.

20 Sau hpúng pé é sau zúng Sû mó nghut é, nga-nhông é Yhumsîng Yesuq lé, haû ahtum abyuq é dangshikaq é sui dông, shí bê mai dum lhoq duì toq é sù, nguìngón hkyo é Garaî Gasang gi,

21 Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq dông mai Yhang lé gabú nhang é hkyô lé, nga-nhông chyáng kut nyi sháng gaq. Hpungwup shingkang gi, Yesuq Hkrisduq chyáng pyat dedu ahtum abyuq ru joq nyi sháng gaq. Amen.

22 Gumang wui ê, ngò lhoq pûn kyîng é dang lé nungmoq wó hkam jan kó sháng gaq nghû, wum taí tsuq kat lhê;

hkâsu mù gâ le, ngò gi, nungmoq lé, laiká ratot za kê kat é nghut lhê.

²³ Ngò gi, nga-nhông é gumang Timohti lhoq lhut kat é hui bê hkyô lé, nungmoq lé sé nhâng nau ri. Yhang shî má myap jé lé é nghut le gi, ngò, yhang eq rahá nungmoq lé, lé hui râ nghut lhê.

²⁴ Nungmoq lé shuí-u bang banshoq eq Garai Gasâng é byu pé banshoq lé bo shi-kyám byi keq. Itali ming mâ é gumang wùi gi, nungmoq lé shi-kyâm kat akô nghut ri.

²⁵ Jeju gi, nungmoq banshoq bâng chyáng ru joq nyí sháng gaq ô.

YAKUQ

Hun Kat é Laiká (James)

1 Garai Gasang eq Yhumsîng Yesuq Hkrisduq é jùn, ngò Yakuq gi, byo myín tô é Israelaq raxe í myû lé, nguingón dang shit kyô kat lê.

Lumjîng Myit Lé Chyam É Hkyô Eq Hpaqchyî Byéng-yá

2 Ngá gumang wuî ê, nungmoq é lumjîng myit lé chyam wú é hui jáng, shikut shirâng sê é myit jat nyi é lé, nungmoq sê nyi lê nghut mù,

3 wuîhke jamjau ajung jung lé htûng huî é hkûn, gaù jowò mó nghut nyi lê nghû luí myit yù keq.

4 Hau htoq agó, nungmoq banshoq gúm gumjup jup dut mù luí, haî le a langhpyut shoq, shikut shirang é myit gi, yhumsîng kut nyi é muzó lé wó lhoq gumjup nyi sháng gaq.

5 Nungmoq má rayuq yuq hpaqchyî byéng-yá langhpyut tô é nghut le gi, haû banshoq bang lé, mara a hun é za, agùn agó byî nyi é Garai Gasang chyáng dúng nyi sháng gaq, haû jáng, Garai gi, yhang lé byi râ nghut lê.

6 Nghut kôlhang, lum shut é myit a bo é za, lumjîng é myit èq dúng nyi sháng gaq, hkâsu mù gâ le, lum shut é sù gi, laidûn èq hik luí toq lo é nhông mâ é wuîlhêng eq wuî nyi ri.

7 Haû yuq gi, Yhumsîng Garaî chyáng mâ é haî le wó yû râ su a ngam nyi sháng gaq.

8 Yhang gi, myit-kó xan sù nghut luí, yhang é hkyô hkat hkangmó má, mù htâng a nyang é sù nghut nyi ri.

Myùng Sû Eq Wó Sû

9 Myung é gumang hpó gi, waq toq huî é má, wó sù gi, lhoq nyhûm huî é má, gabú gumrong nyi sháng gaq.

10 Hkâsu mù gâ le, wó sù gi, wàhu banbó su woî byuq ló rá nghut lê.

11 Bui gi, nyé é lai èq toq lô jáng, haû wàhu nyhuî byuq ló mù, abó le yoq gyó byuq é eq, hau é yúng sâm pé gi, htên byuq é su; wó sù le haû eq rajung za, yhang kut nyi é muzó má woî byuq ló rá nghut lê.

Gunglaú É Hkyô

12 Wuîhke jamjau huî le, wó shikut shirang nyi sù gi, hkungsô wó nyî ri; hkâsu mù gâ le, chyam wú é ban hui jáng, yhang gi, Garai Gasang lé chyitdap é bang lé, byî tô é danggidiq asak janmaú lé, wó yû râ nghut lê.

13 Gunglaú huî é sù ó yuq nghut kôlhang, gunglaú huî é hkûn lé, "Garai Gasang, ngo lé gunglaú nyi ri." nghû luí, a taí sháng gaq, hkâsu mù gâ le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú râ a nghut.

14 Nghut kôlhang, ó yuq nghut le le, yhumsîng é

gungsho ô nau é dông, shuí lêng nghoq lô é nghut le gi, agúng aláu hui bê.

¹⁵ Gungsho ô nau é hkyô kúm gi, zogúng dut jáng, mara lé hku htoq lo ri. Mara kô dîng jáng, shi é má jé râ nghut lhê.

¹⁶ Ngò chyitdap é gumang wui ê, i-myyit hkyô nghoq hkâ-nghoq nyi kó.

¹⁷ Gè réng é eq byíng jup é chyunghuq lhunglhang gi, ahtoq shut mâ é nghut mù luí, maubó gung pê* é Yhângwa Garaí chyáng mai gyó lo é nghut ri. Yhang gi, ahpuq alik atau ahû dut é buishûm su dut râ a nghut.

¹⁸ Yhang hpan tô é amyû pé má, nga-nhúng gi, sâng-hi myhîng é ashî pé dut lô sháng gaq ga, Yhang gi, Yhang ô nau é hkyô cháng luí, haú tengmán é mungdang mai, nga-nhúng lé hkú to bê nghut ri.

Gyo Yu É Eq Cháng Kut É Hkyô

¹⁹ Ngò chyitdap é gumang wui ê, shí hkyô lé nungmoq sê nyi akô. Byù ó yuq nghut kôlhang, gyô yù râ lé han nyi sháng; dang tái râ lé a hân sháng gaq; nhik-yo râ lé le hkâhân kó.

²⁰ Hkâsu mù gâ le, byù nhik-yô é hkyô gi, Garaí Gasang ô nau é dîngmán é dông asak dui hkyô wó lhoq htoq râ a nghut.

²¹ Haú mù luí, achayut é banshoq eq ladu laí agè ashop é pé lé lhoq san lhoq sêng pyám luí,

nungmoq é i-myyit lé wó hkyi yù râ matú, i-myyit unghkaú má Garaí Gasang hô tô é mungdang lé, nú-nhâm é myit eq hkam yu nyi keq.

²² Nungmoq gi, yhumsing gùng lé a mhaú pyám sháng gaq, haú mungdang lé wó gyô yu é bang za a nghut, haú dông châng kut é bang le nghut nyi sháng gaq.

²³ Mungdang haú lé wó gyô yù mù, a châng kut é sù ó yuq le, yhumsing é gungdu lé myoqjâm má wú sù eq wuí ri.

²⁴ Yhang gi, yhâng é gungdu lé wú yù mù, myoqdong lhik é eq, yhumsing gungdu hkâsu dut é lé tô-myhî pyám ri.

²⁵ Nga-nhúng lé wó lhoq lhut yu é gumjup é tarâ má, rago za wú tsuq nyi sù kúm gi, wó gyô yù mù tô-myhî pyám é sù a nghut, muzó eq tûn shit é sù nghut é yanmai, haú yuq gi, yhang cháng kut é muzó má shimân jeju wó râ nghut lhê.

²⁶ Byù rayuq yuq, "Ngò gi, noqkuq htûng lé lhoq dik sù nghut lhê." ga luí, myit to kôlhang, yhumsing nhut shô lé a wó hkâng mù, yhumsing myit lé mhaú pyám é nghut le gi, haú yuq é noqkuq htûng gi, akôm za nghut nyi ri.

²⁷ Íwa Garaí Gasâng é hí má sansêng é eq, râ é hkyô a bo é noqkuq htûng gi, wuîhke jam-jau huí é chuimó chuizô pé lé, châng wú garúm é hkyô eq, mingkan htoq mâ é achayut é hkyô lé koi pyám é hkyô nghut ri.

* 1:17 Maubó gung pé gâ é gi, bui, kyí, lhamó lé gâ lhê.

2

Myoqdong A Wó Hkyin Lhum

¹ Ngá é gumang wui ê, hpungwup shing kang bo é nga-nhông é Yhumsing Yesuq Hkrisduq lé lumjing hkyô má, byu é myoqdong lé hkâhkyin lhum kó.

² Dangké, hing loqchyop chyop lui, réng é mebu wut é sù rayuq eq ajeq amyha é mebu wut é asho awui é sù rayuq gi, nungmoq é tarajong má wang lò kô é nghut le,

³ haù réng é mebu wut é sù lé, nungmoq lhom wú mù je hkunggâ é èq, "Shî aróng wó é jowò má zùng aq." dum, haù asho awui é sù lé nghut jáng gi, "Mhó má yap to aq." haù su a nghut jáng, "Ngá é hkyi htâng má zùng aq." ga taí kô é nghut le gi,

⁴ nungmoq rayuq eq rayuq gamhkuí lhum lui, a ge é i-myt èq doqdân é bang dut lò bekô a nghut kó lú?

⁵ Ngò chyitdap é gumang wui ê, gyô yù keq, lumjing hkyô má wó sùt nyi lui, gidiq tô tô é mingdán é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq má é asho awui é bang lé hkyin yù bê a nghut kó lú?

⁶ Nungmoq kúm gi, asho awui é sù lé a hpau a yùm kut pyám bekô nhung; wó bang sùt bang kúm gi, nungmoq lé zik zo mù lui, yhumsing é loq eq yhang, tarâ tingnyâng shut

she hkyut ló bekô, a nghut kó lú?

⁷ Nungmoq eq sêng é kô dik é mying lé lhang, yhangmoq yhang rhoi dang taí bum akô, a nghut kó lú?

⁸ Haù mù lui, Chyúmdang má, "Náng gung lé nàng chyitdap é su, náng é chyangnâm má é bang lé le chyitdap aq."* ga lui, taí tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyi bê.

⁹ Nghut kôhlang, byu é myoqdong lé nungmoq hkyin nyi kô é nghut le gi, nungmoq mara kut nyi gù nghut bê yanmai, haù tarâ lé shut é bang lé su tarâ jéyáng é hui nyi bekô râ nghut lê.

¹⁰ Byù ó yuq nghut le le tarâ banshoq lé cháng kôhlang, haù má é ralhumm lhum lé shut pyám jáng gi, tarâ banshoq lé shut pyám sù dut byuq râ nghut lê.

¹¹ Hkâsu mù gâ le, "Su-myi sulàng hkâlú."* ga lui, hking tô é sù gi, "Byù lé hkâsat."* ga lui le, taí tô ashî. Nang su-myi sulàng a lú kôhlang, byù sat é sù nghut le gi, tarâ lé shut é sù nghut bê.

¹² Haù su mù lui, nungmoq lé lhoq lhut kat é tarâ đông jéyáng doqdân é hui râ bang su, ru taí nyi keq; ru châng kut nyi keq.

¹³ Hkâsu mù gâ le, shogyo myit a bò sù gi, a shogyô é đông jéyáng doqdân é hui râ nghut lê. Shogyo nhikmyin é hkyô kúm gi, jéyáng doqdân

* 2:8 Nhung 19:18

* 2:11 Htoq Ló 20:14

* 2:11 Htoq Ló 20:13

é hkyô lé wó ông lut râ nghut lhê.

Lumjǐng Myit Eq Zui Saî É Hkyô

14 Ngá gumang wui ê, byù rayuq yuq, "Ngò gi, lumjǐng myit bo lhê." ga tai nyi kólhang, muzó a bo lom é nghut le gi, haî akyû bò râ lhú? Lumjǐng myit haû gi, yhang lé wó hkyi yù râ lhú?

15 Gumang, gu-nhá rayuq yuq a chîn dut nyi é eq, nyí wui é zoshuq langhpyut tô é nghut le,

16 nungmoq chyáng mâ é rayuq yuq gi, yhangmoq é gungsho má râ é hkyô haî le a byí é za, yhangmoq lé, "Nungmoq wut é gùng lúm sháng gaq, zô é ûng gyi sháng gaq, ngui ngui ngón ngón ló keq." ga tai é nghut le gi, hai akyû bò kó râ lhú?

17 Haû eq rajung za, lumjǐng myit má muzó a bo é nghut le gi, shi é eq rajung za nghut nyi ri.

18 Dum rahkyô gi, "Nàng gi, lumjǐng myit bo ri, ngò gi, muzo bo lhê. Muzó a bo é náng é lumjǐng myit ngo lé tân shit wú aq, haû hkûn, ngá muzó èq ngá lumjǐng myit lé, nang lé ngò tân shit râ nghut lhê." ga luí, rayuq yuq tai râ nghut lhê.

19 Garai Gasang rayuq za nghut é lé nàng lumjǐng ri-nhung! Nghut bê, haû gi, jô é hkyô nghut nyi ri, nat gâng pé le haû su yhang lumjǐng mù gyuq nán nyi akô nghut ri.

20 Kyoq a bo é byù bam ê, lumjǐng myit má muzó a bo le akôm za nghut é hkyô lé, nàng sé nau lhê a nghut lhú?

21 Nga-nhûng é Íwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saî é muzó mai dingmán é sù gâ é lé wó yû bê a nghut lhú?

22 Haû mù luí, yhang é lumjǐng myit gi, yhang é muzó eq rahá za e ló é yanmai, lumjǐng myit gi, jup byíng lo é lé, nàng wó myâng bê nghut ri.

23 Haû su mù, "Abraham gi, Garai Gasang lé lumjǐng é nghut mù luí, yhang lé dingmán sù ga són byi bê."* ga luí, kê tô é Chyúmdang gi, dik to bê. Dum, yhang lé Garai Gasang é buinùm hpó ga luí le myhíng byi bê.

24 Haû mù luí, byù gi, lumjǐng é myit èq baú za a nghut, zui saî é muzó èq mara hkyut san byi huí é lé, nungmoq bûn sê nyi akô.

25 Haû eq rajung za, Rahap gâ é shiwa myhí gi, jowú su nhik lé lhom te yù mù luí, hkyô gó hkat dông nhang kat pyâm é hkûn le, yhang zui saî é muzó mai dingmán é sù gâ é wó yû bê a nghut lhú?

26 Haû su mù, gungdu má woi-nyí a bo le gi, shi é eq rajung za, haû lumjǐng myit má muzó jizó a bo le gi, shí gû nghut bê nghut ri.

3

Mhé Wuí É Shô

* 2:23 Apûn 15:6

¹ Ngá é gumang wuì ê, byù myo myo sará hkâkut naù kó. Hkâsu mù gâ le, ngamoq sê é eq rajung za, sará pé gi, je riyhang htan é đông jéyáng doqdân é hui zo râ nghut lhê.

² Nga-nhúng banshoq bang gi, hkyô myo myo má myit lingbat é bang chyat nghut ri. Byù rayuq yuq dâng èq a lingbat é nghut le gi, yhang gi, jup byíng sù eq yhumsing é gùng lé wó hkang é sù nghut ri.

³ Nga-nhúng myang lé nhutkyáng kyáng byi jáng, myang hau é gungdu gón lé, nga-nhúng ô nau é đông wó cháng nhang lhê.

⁴ Haù mai gotú, wuì-sanghpo pé lé wú wú keq, haù-í kô é sanghpo lé htan é laidûn èq mut é hui kôlhang, sanghpo hkâng sù gi, gyai tiq é sanghpo shap èq za, yhâng ô nau é đông, haù pé lé wó hkang yu ri.

⁵ Haù eq rajung za, shô gi, tiq é gungsho za nghut kôlhang, gyai gumrông nghutbûn nyi ri; wú keq, tiq dik é myizik zo gi, yoso mhanpúng mó lé wó nyé gyó nhang ri-nhung.

⁶ Shô haù gi, myi eq wuì nyi ri. Nga-nhúng é gungsho má, shô haù gi, agè ashop é mingkan dut lò mù, nga-nhúng é gungsho asak lé achayut dut nhâng lui, gungsho asak lé nyhê tuq kat ri. Haù gi, ngaraí myi èq nyhê tuq kat é nghut bê.

⁷ Dusak ajung jung, nghoq ahú hú, myi má yê é jung eq

wuì hkaù má nyi jung banshoq gi, wó mhê yu é jung chyat nghut mù, byu pé gi, haù pé lé mhê yu nyi akó.

⁸ Nghut kôlhang, shô lé kúm gi, byù ó le a wó mhê yù kó nghut ri. Haù gi, apyí abat, agè ashop, uphkâng a wó é eq, shi é jung duq èq byíng tô é jung nghut nyi ri.

⁹ Nga-nhúng gi, shô hau èq nga-nhúng é Yhumsing eq Íwa Garai lé hkya-on nyi lhê; hau èq za, Garai Gasâng é gunglhô đông hpan tô é waxâng zo wuì lé le nhúng pyâm nyi ri.

¹⁰ Nhut ralhum za mai, hkya-ôn é dang eq nhúng é dang htoq lo ri. Ngá é gumang wuì ê, haù su kut é gi, a gè.

¹¹ Wuìbúm radong za mai, chuì nghâm é wuì eq hkô é wuì wó htoq râ lú?

¹² Ngá gumang wuì ê, maihpáng gâm mai tsanlun shi, tsibiyiq nuí mai maihpáng shi, wó zui râ lú? Haù eq rajung za, xô ngam é wuì gi, chuì nghâm é wuì lé wó lhoq htoq byi râ a nghut.

Ahtoq Mai Lo É Hpaqchyí

¹³ Nungmoq má, hpaqchyí byéng-yá bo é sù eq sê é dat é sù, ó nghut lhê lú? Haù yuq gi, yhang hpaqchyí bo é hkyô lé, hpaqchyí mai wó yu é, myit lhoq nyhum é hkyo èq, yhumsing zui saí é ge é muzó đông tân shit nyi sháng gaq.

¹⁴ Nghut kôlhang, nungmoq é myit má ladu lai é manon é i-myit eq, lú lhum bat zik é

i-myt bo é nghut le gi, hkâ-nghutbun kó, haû tengmán hkyô lé le hkâ-mhaû pyám kó.

¹⁵ Haû sù é hpaqchyî byéng-yá kúm gi, mauhkûng htoq mai gyó lo é hpaqchyî byéng-yá a nghut, haû gi, myigùng htoq mâ é, gungsho ô nau é eq, nat é hpaqchyî byéng-yá chyat nghut nyi ri.

¹⁶ Hkâsu mù gâ le, manon é eq lú lhum bat zik é dut nyi le gi, ruk ruk rak rak é hkyô eq agè ashop é mù ajung jung jup hkùm nyi ri.

¹⁷ Mauhkûng htoq mâ é hpaqchyî byéng-yá kúm gi, sâng-hi awang má sansêng nyi ri; hau htâng má gi, nguingón hkyô lé ô nau é, myit nûm é, jino gyô é, shogyo nhikmyin sê é eq ge é ashi zuî nyi mù luî, gamhkui a bò, ahpuq alik a dut é eq, kut mhaû a sê é hpaqchyî byéng-yá nghut nyi ri.

¹⁸ Hau htoq agó, nguingón é hkyô dat sô xoq é bang gi, nguingón é shijí lé sân kat é bang nghut mù, ge é ashi wó yû kó râ nghut lhê.

4

Yhumsing Gùng Lé, Garai Gasâng Chyang Ap To Râ Hkyô

¹ Nungmoq má gyè dut lhùm é eq mabyoq jishùm gi, hkâmai htoq lo é lú? Nungmoq ahkaû má gungsho ô nau é hkyô pé ngón hkyô hô mù, majan zân lhùm é yanmai, dut htoq lo é a nghut kó lú?

² Nungmoq yut yut myit ô nau nyi kôlhang, haî le a wó yû kó. Nungmoq sat nyi é eq manon nyi kôlhang, a wó yû kó. Nungmoq byoq lhùm nyi é eq majan htoq lhùm nyi kôlhang, haî le a wó yû kó; hkâsu mù gâ le, nungmoq, Garai Gasang lé a dung kô é yanmai nghut ri.

³ Nungmoq dung kôlhang, a myang yù kó nghut ri; hkâsu mù gâ le, nungmoq é ngón kún hkyô má jai chûng langsâ pyám râ matú, shut é dòng dúng nyi kô é yanmai nghut ri.

⁴ Su-myi sulàng lú é bang su gidiq a gîng é bang ê, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lú? Haû mù luî, mingkan ô nau é hkyô eq buinùm dù nau sù ó nghut kôlhang, Garai Gasâng é gyè nghut nyi ri.

⁵ Dum ralhum, nga-nhúng má Garai Gasang kat lhùng tô é woi-nyí gi, manon é myit lúng nyi ri ga luî, Chyúmdang má taî é gi, akôm nghut ri nghû, nungmoq myit ngam nyi akô lú?

⁶ Nghut kôlhang, Yhang gi, je kô é jeju ru byí nyi lhê. Haû eq rajung za, Chyúmdang má, "Garai Gasang gi, nghutbùn é bang lé hkùm zing pyám kôlhang, myit lhoq nyhum é bang lé jeju byí ri."*

ga taî tô ri.

⁷ Haû mù, Garai uphkan

é a-ô má ru nyi nyi keq; Nat Tsadán lé hkûm tang pyám keq; haú hkûn, yhang nungmoq chyáng mai h pang byuq râ nghut lhê.

⁸ Garai Gasâng chyáng huî ê keq, haú hkûn, Yhang, nungmoq chyáng huî lé lô râ nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhiklhum lé lhoq choyi lhoq yúng to keq. Yudaq htûng đông loq lé chí san chí sêng pyám keq gâ é lichyúm gi, i-myit, gungdu lé lhoq san lhoq sêng pyám é lé gâ lhê.

⁹ Nungmoq gi, myit yón é, iyon yôn é eq ngaubyi ngau-nhap é kut nyi keq. Nungmoq é wuihâ é hkyô lé gi, iyon đông, nungmoq é gabú é hkyô lé gi, yón kuq é đông htaí pyám keq.

¹⁰ Haú Yhumsing Garai é hí má i-myit lhoq nyhum nyi keq, haú hkûn, Yhang gi, nungmoq lé lhoq toq râ nghut lhê.

¹¹ Gumang wui ê, nungmoq yhangchang a ge é đông hkâtaí hpoí lhum kó. Yhumsing é yhanggu yhangmang lé a ge é đông taí hpoí nyi é sù, haú a nghut jáng, jéyáng é sù gi, haú tarâ lé a ge é đông taí hpoí nyi mù luí, jéyáng é sù nghut nyi ri. Haú tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri.

¹² Garai Gasang za tarâ byi tô é eq tarâ dara sù, wó hkyi yu é sù eq, wó lhoq htên é sù

nghut nyi lhê. Hau é yanmai, nàng é yhumkyo hpó lé jéyáng é sù nàng gi, ó yuq wa nghut lhê lú?

Gyang Dang A Tai Ra Hkyô

¹³ "Ngamoq, hkû-nyí napmá ra-nyí nyí, và rawà và shut ê mù, haú má razàn kô é nyí luí, hpugá wuiloq gá mù amyat wó myang yù rà." ga taí nyi é bang ê, gyô wú keq.

¹⁴ Napmá haí dut lô râ lé lhang, nungmoq gi, a sé ko. Nungmoq é asak gi, haí nghut nyi lhê lú? Haú gi, razup rahtâng za htoq shit luí dum byuq byuq ló mù é, nghansoq eq rajung za nghut nyi ri.

¹⁵ Haú mù luí, nungmoq haú su ga taí nyi râ malaí gi, "Yhumsing Garai đông é nghut le gi, ngamoq le ru wó dui nyi mù, shí le, mhô le, wó kut râ nghut lhê." nghu luí, wó taí râ nghut lhê.

¹⁶ Ahkuí kúm gi, nungmoq é gyáng é dang đông gumrong nyi akô; haú su gumrong é hkyô banshoq gi, agè ashop é jung chyat nghut nyi ri.

¹⁷ Haú mù luí, ge é mù sê kut to luí, a kut é sù gi, mara kut sù dut bê nghut ri.

5

Sùt Wó Bang Lé Sidiq Byi É Dang

¹ Sùt wó é bang ê, gyo keq, nungmoq chyáng jé lé lô râ é wuihke jamjau hkyo é yanmai, ngau garú nyi keq.

² Nungmoq é sutzè gi, htên bup byuq bê nghut ri; nungmoq é wutbu wutmè le

manot èq zô pyám bê nghut ri.

³ Nungmoq é hîng eq ngùn má lháng, jogyik zuí byuq mù luí, haû jogyik gi, nungmoq é mara hkyam shut saksé dut byí é eq, nungmoq é gungsho lé myi su zô pyám râ nghut lhê. Nungmoq gi, jîhtûm buinyì shí pé má, sutzè lé za hkong to bekô nhung!

⁴ Wú keq, nungmoq é yohtung dùng yò yam nhâng mù luí, ahpau a byí é za, nungmoq mhaú zô tô é ahpau pé garû nyi é htê pé eq, mù zuí bang garû é htê pé lé gi, haû a-tsam dik shoq bo é Garai wó gyo byi bê nghut ri.

⁵ Nungmoq gi, myigùng htoq má hkik hkik hkâm hkâm wó nyi é eq, i-myit ô nau é dông ngón hkyô chyat châng nyi bum akô. Nungmoq gi, sat râ buinyì matú yhumsing é gùng lé tsô myum to bekô nghut ri.

⁶ Haû dingmán é sù* lé, nungmoq mara hûn mù, sat pyám bekô. Yhang kúm gi, nungmoq lé a lhom hkâm zìng nghut ri.

Myit Hîng Hîng Hkam Jan Ra Râ Hkyô

⁷ Haû mù luí, gumang wuì ê, haû Yhumsing dum jé lé é buinyì jé shoq myit hîng é èq láng nyí keq ô! Hkyâm saí sù lé wú wú keq, yhang gi, myìhpún mai ahpau dán é ashi lé wó yû shoq ga mau mún eq wò htâng htâng é mau

wo gyùn é jé shoq myit hîng hîng láng nyi ri.

⁸ Haû eq rajung za, nungmoq le, Yhumsing Yesuq dum jé lé râ gi, chyâng lo nyi bê nghut é yanmai, myit hîng é èq, i-myit lé lhoq ging lhoq tîng to keq.

⁹ Gumang wuì ê, nungmoq jéyáng a hui sháng gaq, nungmoq yhangchang hkâ-nyung nyâng lhûm nyi ko. Wú keq, Tarâ agyì gi, hkúmdong má jé nyi to bê nghut ri.

¹⁰ Gumang wuì ê, haû Yhumsing Garaí é myìng eq hko kyô é myiqhtoí pé wuìhke jamjau huí é hkûn, jân pyám é myit lé, nungmoq gi, ge é alik agàn kut yû keq.

¹¹ Wú keq, shikut shirang é bang lé, nga-nhúng gi, hkungsô wó é bang nghu é nghut lhê. Yobaq hkâm jân é yanmai, Yhumsing Garai gi, yhang lé htâng má myo myo dum shimân byí é hkyô lé, nungmoq wó gyô wú bê nghut lhê. Haí mù gâ le, haû Yhumsing Garai gi, gyai shogyo nhikmyîn é sù nghut nyi ri.

¹² Ngá é gumang wuì ê, banshoq má ahkyak dik é gi, haí le le hkâdakâm kó. Mauhkûng lé a nghut jáng, myigùng lé lang luí le hkâdakâm kó. Dakam é dang gotû lé le hkâtaí nyi kó. Nungmoq doqdân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghu za, taí keq.

* 5:6 Dingmán é sù gâ é danghkun lé, Chyúmlaiká ra-am má gi, dingmán é bang gâ ri.

*Lumjǐng Myit Eq Kyûdung
Râ Hkyô*

13 Nungmoq má rayuq yuq wuǐhke jamjau huǐ é nghut le gi, kyûdung nyǐ sháng gaq; rayuq yuq myit ngón nyǐ é nghut le gi, hkyá-on mahkôn hkon nyǐ sháng gaq.

14 Nungmoq má rayuq yuq nõhpyo huǐ é nghut le gi, nõqkuq hpúng mã é nhik bõ suwún wuǐ lé ji yù mù, haú bang gi, Yhumsǐng Yesuq é myǐng mai yhang lé xû but byǐ luǐ, kyûdung byǐ kó sháng gaq.

15 Haú su mù, lumjǐng myit eq kyûdung é dang gi, haú nõ sù lé lhoq gê luǐ, Yhumsǐng Garai gi, haú yuq lé lhoq toq yû râ nghut lhê. Yhang gi, yubak mara kut shut é nghut kôlhang, hkyut pyám byǐ é hui râ nghut lhê.

16 Haú mù luǐ, nungmoq lhoq ge é hui kó sháng gaq, nungmoq é yubak mara lé rayuq eq rayuq yǐn lhum mù, kyûdung byǐ lhúm nyǐ keq. Dingmán su é kyûdung dang gi, wó dut nhâng râ a-tsam wum-o myo myo bo nyǐ ri.

17 Eliyaq gi, nga-nhúng su i-myit unghkaú bo é xângzo byù za nghut lhê. Nghut kôlhang, yhang gi, mau a wò sháng gaq ga, wum kat o kat kyûdung jáng, súm zan eq lhamó hkyuq hkyap tup myigùng htoq má mau a wò shoq dut byuq é nghut lhê.

18 Kyû dum dúng kat jáng, mauhkúng gi, maú wo hkyô kat byǐ mù, myigùng gi, yhâng é kyô shi mui shi lé lhoq htoq byǐ wú bê nghut lhê.

19 Ngá é gumang wuǐ ê, nungmoq chyáng mã é rayuq yuq, haú tengmán hkyô mai nghoq ló byuq é hkûn, rayuq yuq gi, yhang lé tengmán hkyô shut dum wó shuǐ taú lo é nghut le kúm gi,

20 haú shuǐ taú yù sù gi, yubak mara kut é sù lé, shut shai é hkyô mai tengmán hkyô shut shuǐ taú yù mù, myit woi-nyǐ lé shi é mai hkyi yù bê nghut é yanmai, yubak mara myo myo lé shuǐ nghop pyám byǐ é sù dut berâ lé, bûn nyǐ keq ô!

PETRUQ

Hî Dàm Hun Kat é Laiká (1 Peter)

¹ Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jìno gyo râ matú le, Yhâng é súi èq hpyûn gyûn é hui* râ matú le, haû Woi-nyí é lhoq sân-yúng nyi é muzó dông mai, Íwa Garai Gasâng é hî te sê tô é hpaqchyî má cháng luí, hkyin yù huí é bang nghut é,

² Garai Gasâng èq hkyin htoq yù luí, mingkân é byùbìng dut bâng chyáng dang kyô kat lhê. Jeju eq nguingón hkyô gi, nungmoq chyáng agùn agó joq nyi sháng gaq.

*Dui Nyi É Myit Myoqbyù
Hkyô*

³ Hkya-on kungtôn hkyô gi, nga-nhúng é Yhumsíng Yesuq Hkrisduq é Yhângwa nghut sù Garai Gasang chyáng nghut nyi sháng gaq! Yhang gi, Yesuq Hkrisduq, shi é mai dum dui toq é hkyô dông, Yhâng é gyai shogyo nhik-myín é yanmai, nga-nhúng lé, asik hku é dum hui nhâng mù, rû dui nyi é myit myoqbyù hkyô lé wó nhang é htoq agó,

⁴ nungmoq é matú mauhkúng htoq má tô to byi

bê nghut é, hkâ-nhám le, a hten a byoq é, agot a-û a dut é, a hpoí byuq é muí lé le wó nhang é nghut lhê.

⁵ Nungmoq gi, lumjìng kô é yanmai, ló htâng é ahkyíng má lhoq htoq shit râ rì rì nghut é hkyi yù hkyô jé shoq, Garaí é hpungwup a-tsâm èq upzúng é hui bang nghut akò.

⁶ Haû mù, nungmoq gi, ahkuí razup zo, wuìhke hkyô junghkang jungmó má yón hpuzô é hui kó râ nghut kôlháng, gyai yhang gabú nyi keq.

⁷ Wuìhke hkyô haú pé mai, nungmoq é lumjìng myit gi, jet é hkyô lé wó chyam htoq mù, myi mai jên yù kôlháng htên byoq sê é hìng htoq je gyaú luí, Yesuq Hkrisduq htoq shit é hkún, hkya-on kungtôn hkyô, hpungwup shingkang eq aróng sitang lé, nungmoq wó kó râ nghut lhê.

⁸ Nungmoq gi, Yesuq lé a myang wú kôlháng, Yhang lé chyitdap bum akò; Ahkuí, nungmoq, Yhang lé a myàng kôlháng, Yhang lé lumjìng kô é nghut mù, a ung htoq taí é eq hpungwup bo é gabú hkyô gi, nungmoq chyáng byíng jup nyi ri.

⁹ Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjìng myit é akyù lé wó yu nyi kô é nghut ri.

¹⁰ Hkyi yù hkyô haû eq séng luí, nungmoq chyáng jé bê nghut é jeju hkyô lé taí é my-

* **1:1** Yhâng é súi èq hpyûn gyûn é hui gâ é gi, Yhâng é súi èq mara chí sân pyám byi é lé gâ lhê.

iqhtoî pé gi, gyai yhang sidiq myit èq jí jí chyun chyun ho gon wú bekô nghut ri.

¹¹ Yhangmoq gi, Hkrisduq wuîhke jamjau hui luî, hpungwup shing kang wó rà nghut é hkyô lé, yhangmoq má lúng nyi é, Hkrisduq é Woi-nyí mai te taî é hkûn, hkâ-nhám nghut rà eq hkasû é u má nghut rà hkyô lé ho gôn wú bekô nghut ri.

¹² Mauhkûng mai nhang kat é Chyoiyúng Woi-nyí èq, nungmoq lé gabú danglù hko kyo bê bang mai, ahkuí nungmoq lé taî kyo bê nghut é hkyô pé lé, yhangmoq taî kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyô pé lhang gi, haú hkyô pé lé gyai wú nau bum akô nghut ri.

Chyoiyúng Nyí Râ Hkyô

¹³ Haú mù luî, zui saí rà matú nungmoq é i-myit lé hen to keq; yhumsing gùng yhumsing hkang nyi keq; Yesuq Hkrisduq htoq shit é hkûn, nungmoq lé byi rà nghut é jeju lé, hkyak za myit myoqbyu nyi keq.

¹⁴ Jîno gyô é zoshâng wui su, myoq a bóng shí é pyat má nungmoq nyi tô é hkûn, nungmoq é agè ashop ô nau hkyô lé a châng kut é za,

¹⁵ haú nungmoq lé ji yu é Sû gi, chyoiyúng é su, nungmoq zui saí é hkyô banshoq má chyoiyúng nyí keq.

¹⁶ Hkâsu mù gà le, "Ngò gi, chyoiyúng Sû nghut é yanmai, nungmoq le chyoiyúng nyí keq."* ga kâ tô ri.

¹⁷ Byù yuq hkangmó é muzó lé, myoqdong a hkyin é za tarâ jéyáng é sù Íwa lé, nungmoq wut dung kô é yanmai, byùbing dōng shí má nyi é u lé, Garai lé gyuq hkunggâ é myit mai asak duì keq.

¹⁸ Hkâsu mù gà le, nungmoq gi, nungmoq é íchýi íwâ pê chyáng mai bo gyó lo é hpau a dap é asak duì hkyô mai, htên byoq sê é ngùn, hing èq hkyi yù huí é a nghut é za,

¹⁹ gumjup é eq mara a bo é sauzo nghut sù, Hkrisduq é hpaù dik é suí èq sheq hkyi yù huí é ru nghut é lé, nungmoq sê lhê.

²⁰ Yhang gi, mau htoq xâng hkun mai hkyin yu é hui bê nghut kôlhang, jihtûm ahkýing shí pé má sheq, nungmoq é matú htoq shit nhang é hui bê nghut ri.

²¹ Yhang lé, shí é mai lhoq duì toq yù mù, hpungwup shing kang bò nhang é Garai Gasang lé, nungmoq gi, Hkrisduq dōng mai lumjǐng kô é nghut luî, nungmoq é lumjǐng myit eq myit myoqbyù hkyô gi, Garai Gasang chyáng nghut nyí bekô nghut ri.

²² Ahkuí kúm, nungmoq gi, haú tengmán hkyô lé châng é dōng mai, yhumsing gùng yhumsing lhoq sân-yúng yù bekô nghut mù, nungmoq é

* 1:16 Nhong 11:44-45; 19:2; 20:7

gumang wuì lé, lhumzuí é dông chyitdap bekô nghut luí, myit nhiklhum mai, rayuq eq rayuq gyai yhang chyitdap lhum keq.

²³ Hkâsu mù gâ le, nungmoq gi, htên byoq sê é amyui mai dum hkû huí é a nghut é za, Garai Gasâng é, rû dui nyi é eq ru gîng nyi é mungdang dông, htên byoq a sê é amyui mai dum hku é hui bang ru nghut lhê.

²⁴ Hkâsu mù gâ le, "Byù lhunglhang bang gi, wàhu mhan eq pung ri, yhangmoq banshoq bâng é hpungwup shingkang gi, yò mâ é banbó pé eq pung ri;

wàhu mhan gi, nyhuí kyuq byuq luí, banbó pé gi, yoq gyó byuq lhê;

²⁵ nghut kôlhang, haù Yhum-sing é mungdang gi, ahtum abyuq gîng nyi lhê."^{*}

gâ tô ri. Haù gi, nungmoq lé hko kyo bê mungdang nghut lhê.

2

¹ Haù mù luí, i-myit dû é hkyô banshoq eq mhaù zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkangmó pé lé tô pyám keq.

² Asik hku é zonú pé nau lé ô naù gadaù é su, woi-nyí eq sêng é jet é nau^{*} lé ô naù gadaù nyí keq, haù jáng, nungmoq gi, hau é yanmai,

nungmoq é hkyi yù hkyô má wó kô myhâng kó râ nghut lhê.

³ Hkâsu mù gâ le, haù Yhumsîng gi, gè sù nghut é lé, nungmoq chyam wú bekô nghut ri.

Rû Dui Nyi É Luqgok Eq Hkyin Yù Huí É Byù Myù

⁴ Byù pé mai hkyin htoq pyám kôlhang, Garai Gasâng é matú hpaudap luí, Yhâng èq hkyin yù huí é, rû dui nyi é Luqgok nghut sù, haù Yhum-sing chyáng nungmoq jé lé é hkûn,

⁵ nungmoq le, rû dui nyi é luqgok pé su, woi-nyí eq sêng é yhûm[†] saí nyi é hui luí, Yesuq Hkrisduq dông mai, Garai èq hap yù gíng é, woi-nyí eq sêng é hkungga nhông byi râ matú, chyoiyúng é hkyangjong amyù dut bekô nghut ri.

⁶ Hkâsu mù gâ le, Chyúmdang má,

"Wú keq, hkyin yù huí é eq hpaudap é htungchyûn luqgok racham lé, Zi-un bùm má ngò lheq tô é nghut lhê;

Yhang lé lumhkau é sù gi, hkâ-nhám le hoq hpû é hui râ a nghut."^{*}

ga taí tô ri.

⁷ Haù mù, lumjîng bang nungmoq é matú gi, luqgok haù hpaudap é nghut lhê. Nghut kôlhang, a lumjîng bâng é matú gi,

^{*} 1:25 Esai 40:6-8 ^{*} 2:2 Woi-nyí eq sêng é jet é nau gâ é gi, Garai Gasâng é mungdang lé taí é nghut lhê. [†] 2:5 Woi-nyí eq sêng é yhûm gâ é gi, noqkuq hpúng lé taí nau é nghut lhê. ^{*} 2:6 Esai 28:16

"Haû yhûm saí bang hkyin htoq pyâm é luqgok gi, htungchyûn mâ é ahkyak dik é luqgok[‡] dut bê nghut ri."^{*}

ga le,

⁸ "Byu pé lé, htûng leng râ luqgok eq myit leqbat nhâng râ luq mó cham dut bê nghut ri."^{*}

ga le, taí tô ri. Yhangmoq gi, mungdang lé a cháng kô é yanmai, myit leqbat kô é nghut lhê. Haû dut râ lé, yhangmoq é matú masat to gû nghut bê nghut ri.

⁹ Nghut kôlhang, nungmoq gi, mauchut hkaû mai Yhâng é mauhpo maubó shut nungmoq lé wut htoq yû Su é mauhpo muzó lé wó taí pyô kó sháng gaq ga, hkyin yû huí é byuhú, hkohkâm hkyangjong amyû, choyiyúng é byù myù, Garai Gasang eq sêng é byu pé nghut akô nghut ri.

¹⁰ Nungmoq gi, hí lé byù ra-myû a nghut wú kôlhang, ahkuí gi, Garai Gasâng é byù myû nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yû bekô nghut ri.

¹¹ Chyitdap é luzúm wuê ê, nungmoq é asak woi-nyí lé majan zân nyi é, yubak mara byíng jup é ô nau gadaú hkyô lé koi pyám keq nghú, gó mîng byu pé eq byúbíng pé dông mingkan htoq má nyi é bang

nungmoq lé, ngò, wum taí tsuq kat lhê.

¹² Haû a lumjîng shî é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garai Gasâng èq lé kùm é buinyì má Garai lé shigyaú kó sháng gaq, a lumjîng shî é byu pé é ahkaû má haû su ge é asak duì hkyô dông nyi yap keq.

*Uphkâng Bang Eq
Yhumsîng Wui É A-ô Má Nyi
Râ Hkyô*

¹³ Haû Yhumsîng é yanmai, byu pé mâ é ahko ahkáng wó bang banshoq é a-ô má nyi keq; kô dik é ahkáng ayá wó é hkosêng é a-ô má nghut kôle,

¹⁴ shut é hkyô kut bang lé dam byi râ matú eq jô é hkyô kut bang lé shigyaú râ matú, hkosêng èq nhang tô é mauzaú pé é a-ô má nghut kôle, nyi nyi keq.

¹⁵ Hkâsu mù gâ le, ge é hkyô kut é dông, byù nâ pé é a sé a dat é dang lé nungmoq lhoq zîm pyâm é gi, Garai Gasang ô nau é hkyô nghut lhê.

¹⁶ Lut bê bang dông nyi keq, nghut kôlhang, agè ashop é hkyô lé nghop pyám râ matú nungmoq é luthkyô lé hkâchûng kó; Garai Gasâng é duì-nhâng zoshâng wuì dông nyi keq.

¹⁷ Yuq hkanmó lé rago za hkunggâ é hkyô shit keq; lumjîng é gumang wuì lé chyitdap keq; Garai Gasang

[‡] 2:7 Ahkyak é luqgok gâ é gi, Hkrisduq lé taí é nghut lhê. ^{*} 2:7 Hkya-on 118:22

^{*} 2:8 Esai 8:14

lé gyuq hkunggâ nyì keq;
hkoséng lé hkungga keq.

18 Dui-nhâng zoshâng wuì ê, hkungga myit banshoq èq, nungmoq é yhumsîng wuì é a-ô má nyì keq; ge é eq nú-nhâm bâng é a-ô má za a nghut, byuwuì pê é a-ô má le nyì keq.

19 Hkâsu mù gâ le, byù rayuq gi, Garai Gasang lé bún nyì sú nghut é yanmai, mara dông a nghut kôlhang, wuìhke jamjau huì é hkyô lé hpuzô é lé, jân pyâm é nghut le gi, hkya-on gíng é sù nghut lhê.

20 Nghut kôlhang, nungmoq gi, mara kut shut é yanmai, nhuq bat é hkâm zo luì, haù lé jân nyì é nghut le gi, hai aróng wó kó râ lúhú? Nghut kôlhang, nungmoq gi, ge é hkyô kut luì, wuìhke huì zô é lé jân pyâm é nghut jáng, haù gi, Garai Gasâng hí má hkya-on gíng é hkyô nghut lhê.

21 Nungmoq gi, haù hkyo é matú ji yù huì é nghut lhê; haù mù gâ le, Hkrisduq gi, nungmoq é matú wuìhke hkyô huì é má, nungmoq lé alik dông tô to byi bê nghut mù, nungmoq gi, Yhâng é hkyî-kâm pé lé cháng râ dut lhê.

22 "Yhang gi, hai mara le a kut shut, Yhâng é nhut mai mhaù é lé a myàng."*

23 Yhang gi, rhoi é huì é hkûn, yhangmoq lé a dum taù rhoi; wuìhke hkyô huì é hkûn, kyuq é dang a taí. Haù kut râ malaí, tengmán é dông jéyáng é Su chyáng, Yhânggùng lé ap pyâm ri.

24 Nga-nhúng gi, yubak mara eq wó shi gang mù, dingmán hkyo é matú asak wó duì kó sháng gaq ga, Yhang gi, sik zîng má, Yhânggùng èq yhang, nga-nhúng é yubak mara lé Yhânggùng má wun pyâm byi bê nghut ri; Yhâng é dâm pê é yanmai, nungmoq gi, lhoq gê byì é hui bekô nghut ri.

25 Hkâsu mù gâ le, nungmoq gi, hkyô ngoq byuq é sau pé su dut wú kôlhang, ahkuì, nungmoq gi, haù sau zúng Sù eq nungmoq é asak woi-nyí lé upzúng Su chyáng lhing taù lò bekô nghut ri.

3

Ikun Myhî Pé Eq Ikun Hpô Pé

1 Ikun myhî pé ê, haù eq ra-jung za, yhumsîng é ikun hpó uphkan é a-ô má nyì keq; haù hkûn, yhangmoq mâ é rayuq yuq, haù mungdang lé a lumjîng kôlhang,

2 yhumsîng é asak duì hkyô mâ é sansêng é hkyô eq hkunggâ é hkyô lé myàng kôjáng, dang dông a nghut é za, yhâng é yhumsîng myhî é nyì yap é sâmlai dông mai yhang lé wó lhoq lhiq yù râ nghut lhê.

3 Nungmoq yúng é hkyô gi, ahtoq pyâm za nghut é, xâmban nik é dông, hîng zè mhôn chung é eq réng é mebu wut é dông mai lo é a ge nghut.

⁴ Hau é malaî, haû gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoî é yúng hkyô nghut é nungmoq é i-myt unghkaû mâ é su é yúng hkyô sheq dut râ lhê.

⁵ Hkâsu mù gà le, gó hkûn, Garai Gasâng chyáng myit myoqbyù bang nghut é, chyoiyúng é myiwe wuì gi, yhangmoq gùng lé haû dông mhôn yù yù kut kô é nghut lhê.

⁶ Sarah gi, Abraham é jìno gyo luî, yhang lé yhâng é yhumsîng ga wut é su, yhangmoq gi, ó le ô é yhumsing é ikun hpó uphkan é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

⁷ Ikun hpô pé ê, haû eq rajung za, yhumsing é ikun myhí eq rahá nyi yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlí wó é bang dông, yhangmoq lé hkungga keq. Haû hkûn, nungmoq é kyûdung dang lé a he-ngik pyám byi râ nghut lhê.

Ge É Kut Luî, Jamjau Hkam É Hkyô

⁸ Dang htâng sat é má, nungmoq banshoq bang gi, rayuq eq rayuq myit huì lhùm nyi keq; myit wú nô mù, gumang nhiktâng wuì su chyitdap lhùm nyi keq;

shogyo nhikmyin myit bò luî, i-myt nyhum nyi keq.

⁹ Agè ashop é lé, agè ashop é dông lató a hpuq é eq rhoi é lé rhoi é dông lató a hpuq é za, shimân byi keq; haî mù gà le, nungmoq gi, haû pê é matú, shimân jeju muì wó hkam yù kó sháng gaq ga, ji yu é hui kô é ru nghut lhê.

¹⁰ Hkâsu mù gà le,

"Asak duì râ lé chyitdap é eq ge é buinyi pé lé myàng nau é sù ó yuqle, yhâng é shô lé, agè ashop é mai, yhâng é nhutwuì lé, mhaú dang taî é mai, lhoq kâng pyám ra râ nghut lhê.

¹¹ Yhang gi, agè ashop hkyô mai lhing tau mù, ge é kut ra râ nghut lhê; yhang gi, nguingón simsaq hkyô lé hô mù, châng hkat nyi ra râ nghut lhê.

¹² Hkâsu mù gà le, haû Yhumsing é myoqjí gi, dingmán bang lé wú nyi é nghut luî, yhangmoq é kyûdung dang lé, Yhâng é nohkyap èq gyo byi ri;

nghut kôlhâng, haû Yhumsing é myoqdong gi, agè ashop hkyô kut bang lé gyè dông myang pyâm ri."[☆]

gâ tô ri.

¹³ Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang râ l hú?

14 Nghut kôlhang, dingmán hkyo é matú, nungmoq wúhke jamjau huí le lhang, nungmoq gi, hkungsô wó nyi ri. "Yhangmoq gyuq é hkyô lé hkâgyuq kó; hkâgyuq dân kó."*

15 Nungmoq kúm gi, myit nhiklhum má, Hkrisduq lé, Yhumsing dông jowò byi keq. Nang wó é myit myoqbyù hkyô lé myí é sù yuq hkangmó lé, haí mù wó é hkyô tû taí kyo râ matú, ayang hen to aq. Nghut kôlhang, nú-nhâm é eq hkunggâ é dông haù lé kut nyi aq;

16 nungmoq é unghkaù myit san za dut nyi keq, haù hkûn, Hkrisduq dông mai nungmoq wó é ge é a-kyang lé rhoi dang taí é bang gi, yhangmoq lumù gansang é yanmai hoq hpù é hui kó râ nghut lhê.

17 Garai Gasang ô nau é nghut le gi, agè ashop kut luí jamjau hkâm râ htoq má, ge é kut luí jamjau hkam le gi, je ge é nghut lhê.

18 Hkâsu mù gâ le, nungmoq lé Garai Gasang chyáng shuí jé shoq, Hkrisduq gi, byu pé é yubak marâ é yanmai, radàm za shí hkâm pyâm bê nghut ri; haù gi, dingmán Sù, a dingmán bâng é matú shí hkâm byí é nghut lhê. Yhang gi, gungdu shí bê nghut kôlhang, haù Woi-nyí má lhoq dui é hui bê nghut ri.

19 Yhang gi, Woi-nyí dông, htóng lúng tô é woi-nyí pé lé è hko kyô ri.

20 Woi-nyí haù pé gi, a-nham lé, Noaq é ipyat má wui-sanghpo lé Noaq tsuq nyi é hkûn Garai Gasang myit hîng hîng láng nyi é u lé, jîno a gyô é bang nghut akô. Wui-sanghpo má wàng mù, wui mai hkyi yù huí é byù shau luí, shit yuq za nghut akô.

21 Wuì haù gi, ahkuí nungmoq lé le hkyi yu é nghut é baptisma é azông nghut ri; haù gi, gungdu mâ é agot a-ù lé huí sêng pyâm byí é a nghut é za, sansêng é unghkaù myit mai Garai Gasang é hí má gididq tô é ru nghut lhê. Yesuq Hkrisduq é dum dui toq hkyô dông, nungmoq gi, baptisma hkâm yù luí, hkyi yu é hui kô é nghut lhê.

22 Yesuq Hkrisduq gi, mauhkung má doq ló luí, Garai Gasang é loqyò hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkan é a-ô má nghut nyi bum akô.

4

Garai Gasang É Matú Asak Dui Râ Hkyô

1 Haù mù luí, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myit sâmlai hau èq yhumsing gùng má gyehking dông wut to keq, haí mù gâ le, yhâng é gungdu má hpuzo bê sù gi, mara eq gang bê nghut ri.

2 Haù nghut é yanmai, yhang gi, yhang nyi tùm tô

é mingkan asak dui hkyô má, agè ashop é xângzo byù ô nau é dông a nghut é za, Garai Gasang ô nau é dông asak dui é ru nghut lhê.

³ Hkâsu mù gâ le, nungmoq gi, lai lò bê ahkyíng má, a lumjíng shí é byu pé hkyin kut nau é hkyô nghut é, shut é dông nyi zô lhúm nau é i-myt, agè ashop é yut yut ô nau é hkyô, î shuq wut é hkyô, zo yê shuq yê mù achaq achyut kut é hkyô, ye lhai râ wut jung zoshuq lé yut yut ô nau é hkyô, achaq achyut é hparà noq hkyô pé má, ahkyíng luq shoq nyi lai lò bê bang nghut akô.

⁴ Nungmoq gi, ladu lai shoq achaq achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maú byuq luí, nungmoq lé lumù gansang pyâm akô nghut ri.

⁵ Nghut kôlhang, yhangmoq gi, dui nyi é bang eq shí bê bang lé tarâ jéyáng râ rì rì nghut to Sû lé jihpán shit kyo ra kó râ nghut lhê.

⁶ Hau é yanmai, ahkuí shi byuq bê bang lé lhang gabú danglù hko kyô é hui bekô nghut lhê; haú gi, gungdu eq séng luí ga jang, yhangmoq gi, byù dông mai tarâ jéyáng é hui râ eq, woi-nyí eq séng luí ga jang, Garai Gasang dông mai asak wó duí râ matú nghut lhê.

⁷ Lhunglhang htum râ ahkyíng gi, chyáng bê nghut ri. Haú mù luí, nungmoq kyú wó dung kó sháng gaq,

bûn gying luí, yhumsing gùng yhumsing hkgang nyi keq.

⁸ Banshoq htoq má ahkyak é gi, rayuq eq rayuq gyai yhang chyitdap lhúm é hkyô nghut lhê, haí mù gâ le, chyitdap myit gi, yubak mara myo myo lé wó nghop pyâm é nghut lhê.

⁹ Rayuq eq rayuq, taí nyung nyâng é hkyô a bo é za, rago hkulum lhum keq.

¹⁰ Yuq hkgamó gi, yhumsing wó hkgam yù bê chyunghuq eq rajung za, góbang lé dojaú râ lhê; Garai Gasang jeju chyunghuq ajung jung lé, lhumzui é èq rago chung jai râ lhê.

¹¹ Rayuq yuq taí é nghut jáng, Garai Gasang é mungdang haú eq yhang rajung za taí ra râ nghut lhê. Garai Gasang gi, lhunglhang má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byí é wumô èq dojaú ra râ nghut lhê. Haú hpungwup shingkang eq a-tsam gi, Yesuq Hkrisduq chyáng pyat dedu ahtum abyuq joq nyi sháng gaq ô. Amen.

Hkristan Dut É Yanmai Jamjau Hui É Hkyô

¹² Chyitdap é luzúm wui ê, wuihke hkyô dông chyam é lé nungmoq hkâm zô nyi é hkûn, nungmoq chyáng maú nhô zâ é hkyô dut htoq bê dông, hkâgyuq dàn kó.

¹³ Hkrisduq é jamjau hkyô pé lé bo hui zô é yanmai kúm gi, nungmoq gabú keq,

haú hkûn sheq, Yhang é hpungwup shing kang eq rahá Yhang htoq shit é hkûn, nungmoq gi, gabú dik é hui kó râ nghut lhê.

14 Hkrisduq é mying yan-mai, nungmoq gi, rhoi é hui zô é nghut jáng, hkungsô wó nyi ri; hkâsu mù gâ le, hpung-wup shing kang bo é Woi-nyí ngu é, Garai Gasâng é Woi-nyí gi, nungmoq chyáng nyi nyi ri.

15 Nungmoq mâ é rayuq yuq jamjau huí é nghut le gi, byù sat sù, hkau sù, gotú agè ashop kut sù, góbâng é mù má cháng gunjang sù dông jam-jau huí é a dut sháng gaq.

16 Nghut kôlhâng, Hkristan rayuq dông nungmoq jamjau huí é nghut le gi, hkâhoq nyí kó, Garai Gasang lé kúm gi, mying hau é yanmai hkya-ôn nyi keq.

17 Hkâsu mù gâ le, tarâ jéyáng râ ahkyíng gi, jé bê nghut luí, Garai Gasâng é ikun byu pé mai hí râ nghut lhê; haú gi, nga-nhúng mai hí é nghut jáng, Garai Gasâng é gabú danglù lé a châng é bang gi, hkâsu wá dut lò râ nghut lhê lhú?

18 "Haú dingmán sù, hkyi yù hui râ wuí é nghut le gi, tarâ a hkunggâ é eq yubak dap é sù gi, hkâsu wá dut râ nghut lhê lhú?"[☆]

gâ tô ri.

19 Haú nghut mù luí, Garai Gasang ô nau é dông jamjau

huí é bang gi, yhumsing gùng lé, lhumsuz é Hpân Su chyáng ap byi mù, ge é lé xoq kut nyi ra râ nghut lhê.

5

Suwún Wuí Êq Zorâm Wui

1 Nungmoq mâ é hpúng suwún wuí lé, ngò, nungmoq é byinzùm suwún, Hkrisduq é jamjau hkyô pê é saksé nghut sù eq lhoq htoq shit râ nghut é Yhâng é hpung-wup shing kang lé bo hkâm râ nghut sù dông mai sang kat kôlé:

2 Nungmoq lé ap to bê nghut é Garai Gasâng é sau hpúng* lé zúng rém bang dut mù, shuí u bang dông dojaú nyí keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsing kâm é myit mai kut é nghut râ lhê; ngunzè lé a myoqnoq é za, shirông myit mai dojaú râ lhê.

3 Nungmoq é loq má ap byi to bê bang lé a up zô é za, yhangmoq é hí má alik dut nyi keq.

4 Haú jáng, Sau zúng Agyi mó† htoq shit é hkûn, nungmoq gi, hpungwup shing kang bo é, hkâ-nhám le a shum a byuq é janmaú lé myang hap yù kó râ nghut lhê.

5 Zorâm wui ê, nungmoq le, nungmoq htoq ipyat ko bâng é a-ô má nyi keq. Nungmoq lhunglhâng bang gi, myit

☆ 4:18 Sânghkyang 11:31 * 5:2 Sau hpúng gâ é gi, lumjáng bang lé gâ lhê. † 5:4 Sau zúng Agyi mó gâ é gi, Hkrisduq lé gâ é nghut lhê.

hoq nyhum é hkyô lé mebu
su wut to mù, rayuq eq rayuq
dojaú nyî keq, hkâsu mù gâ le,
"Garai Gasang gi, nghutbûn
é bang lé hkûm zing
pyám kôlhang, myit
hoq nyhum é bang lé
jeju byî ri."☆

ga tô ri.

⁶ Haû mù luî, ahkyíng jé jáng
Garai Gasang nungmoq lé
waq toq sháng gaq, nungmoq
gi, Yhâng é hpungwup a-
tsam mó bo é loq hkaû má,
yhumsing myit lé yhumsîng
hoq nyhum nyî keq.

⁷ Nungmoq é myit chiq hkyô
banshoq lé, Yhâng htoq má
dú kê pyâm to keq, haî mù gâ
le, Yhang gi, nungmoq é matú
chiq byî nyî sù nghut lhê.

⁸ Yhumsing gùng lé
yhumsîng hkâng mù, machya
nyî keq. Nungmoq é gyè
nghut é nat Tsadán hpó gi,
rayuq yuq lé wó zô myui
pyám shoq ga, myíng wún é
hkanghkyi su hkat gadaú jón
wún ri.

⁹ Yhang lé htuq htíng
pyám mù, lumjíng myit má
gingtíng nyî keq, haî mù gâ le,
míngkan gón mâ é nungmoq
é gumang wuî le, rajung zâ é
jamjau hkyô pé hui zô nyî kô
é lé, nungmoq sê lhê.

¹⁰ Haû mù, jeju banshoq
é Garai Gasang gi, Hkris-
duq má ahtum abyuq joq
nyî é Yhâng é hpungwup
shingkâng matú nungmoq lé
ji yù bê nghut luî, nungmoq
razup zo jamjau huî é htâng
má, Yhang yhang nungmoq

lé gumjup nhâng mù, wum
bô nhâng luî, ging ging tíng
tíng dut nhâng râ nghut lhê.

¹¹ Haû hpungwup a-tsam
banshoq gi, Yhâng chyáng
pyat dedu ahtum abyuq rú
joq nyî sháng gaq. Amen.

Ló Htâng É Shi-kyâm Dang

¹² Lhumzuî é gumang nghû
ngò sôn yu é Sila èq garúm luî,
ngò gi, nungmoq lé myit wum
byi dang eq, myit wum byi
dang haú pé gi, Garai Gasâng
é tengmán é jeju nghut é
lé saksé hkâm é dang pé lé,
tot za kê kat é nghut lhê.
Tengmán é jeju haú má yap
gíng nyî keq.

¹³ Babelon má nyi é, nung-
moq eq rahá hkyin yù huî
é Hpúng gi, nungmoq lé shi-
kyâm kat ri; ngá zo dông
nghut sù Markuq le, nung-
moq lé shi-kyâm kat ri.

¹⁴ Rayuq eq rayuq, chyit-
dap bopuq puq é èq shi-kyâm
lhum keq.

Nguingón hkyô gi, Hkris-
duq má nghut nyi é nungmoq
banshoq bâng chyáng ru joq
nyî sháng gaq ô.

PETRUQ Htang Dàm Hun Kat é Laiká (2 Peter)

¹ Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhông é Garai Gasang eq hkyi yù Sù nghut é Yesuq Hkrisduq é dingmán hkyô dông, ngamoq su, hpaû dik é lumjínq hkyô lé hap yù bê bâng chyáng dang kyô kat lhê.

² Garai Gasang eq nga-nhông é Yhumsínq Yesuq lé, nungmoq sê jat nyi é hkyô má, jeju eq nguínqón hkyô gi, nungmoq chyáng agùn agó ru joq nyí sháng gaq.

*Ji Yu É Eq Hkyin Yu É Hkyô
Lé Lhoq Gíng Lhoq Tíng Râ
Hkyô*

³ Yhâng é hpungwup shingkang eq ge é hkyô dông nga-nhông lé ji yù Sù lé nga-nhông sê é dông mai, Garai Gasâng é hpungwup a-tsam gi, asak duì hkyô eq tarâ hkungga hkyo é matú nga-nhông râ é jung hkanqmó lé byi bê nghut ri.

⁴ Haú pé dông mai, Yhang gi, Yhâng é kô dik, hpaû dik é danggidiq pé nga-nhông lé byi bê nghut ri; haú hkùn, nungmoq gi, haú danggidiq pé dông mai, Garaí é myit sâmlai lé wó bo hkan yù râ eq agè ashop hkyô lé yut yut ô nau é yanmai htoq lo é, mingkan má joq é htên byoq

hkyô mai wó lut kô râ nghut lhê.

⁵ Hau é yanmai yhang, nungmoq gyai yhang shikut luí, nungmoq é lumjínq hkyô má ge é hkyô lé jat yù keq; ge é hkyô má sumsé hpaqchyí lé,

⁶ sumsé hpaqchyí má yhumsing gùng yhumsínq hkanq é hkyô lé, yhumsing gùng yhumsínq hkanq é hkyô má jân shirang é hkyô lé, jân shirang é hkyô má tarâ hkunggâ é hkyô lé,

⁷ tarâ hkunggâ é hkyô má gumang chyitkâng myit lé, gumang chyitkâng myit má chyitdap myit lé, jat yù keq.

⁸ Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhông é Yhumsínq Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng râ a nghut.

⁹ Nghut kôlhang, rayuq yuq gi, hau pé lé a wó é nghut jáng, chyáng é lé za myang é eq myoqjit é sù nghut luí, lái lò bê yhâng é yubak mara pé mai lhoq sanséng byí é hui bê hkyô lé, tô-myhí pyám bê sù nghut ri.

¹⁰ Haú mù luí, ngá é gumang wuì ê, nungmoq lé ji yu é hkyô eq hkyin yu é hkyô lé, je riyhang lhoq gíngtúng nyi keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó râ a nghut;

¹¹ hau htoq agó, nga-nhông

é Yhumsîng eq hkyi yù Sû nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kó râ nghut lê.

Chyúmdang Mâ É Myiqhtoi Dang

¹² Haù mù luí, nungmoq gi, hau pé lé sé kô é htoq agó, nungmoq wó tô é tengmán hkyô má gíngtîng nyi kô é nghut kôlhang, ngò, nungmoq lé hkâ-nhám le hau pé lé ru lhoq pûn nyi râ nghut lê.

¹³ Shí gungdu má ngò rû dui nyi nyi gi, nungmoq lé lhoq pûn kying byi le ge ri nghû, ngò wó myit ri;

¹⁴ haí mù gâ le, nga-nhûng é Yhumsîng Yesuq Hkrisduq gi, ngo lé san za sé nhâng bê eq rajung za, hkâ-myháng a myáng má, ngò gi, gungdu shí lé tô pyâm to râ nghut é lé sê lê.

¹⁵ Ngò htoq ló byuq é htâng má, nungmoq, hkâ-nhám le haú pé lé ru wó bûn nyi râ lé myàng nau mù, ngò, wó dut é í shikut nyi râ nghut lê.

¹⁶ Nga-nhûng é Yhumsîng Yesuq Hkrisduq é a-tsam eq lé lo é hkyô eq séng luí, nungmoq lé ngamoq taí kyô wú é hkûn, ngamoq gi, kut htoq yu é labyoq mhô-myi lé a châng é za, Yhâng é kô làm hkikhkâm hkyô lé myoq eq myang é saksé pé nghut lê.

¹⁷ Hkâsu mù gâ le, haù Kô Làm Hkikhkâm Hkyo é Hpungwup Shingkang mai, "Shí yuq gi, Ngò chyitdap é

Ngá zo nghut lê; Yhang má Ngò nhik dik nyi lê."[☆] ga taí é htê, Yhâng chyáng jé é hkûn, haù Íwa Garai Gasâng chyáng mâ é aróng eq hpungwup shingkang lé Yhang wó hap yù bê nghut ri.

¹⁸ Ngamoq yhang, chyoiyúng bùm má Yhang eq rahá nyi tô é hkûn, htê haù mauhkûng mai htoq lo é lé wó gyô é nghut lê.

¹⁹ Haù mù luí, myiqhtoi pé dang lé je lhoq gíng bê hkyô, ngamoq wó é nghut lê; haù mù, maubó lô luí, nungmoq é myit má bó-myhû htoq lo é hkûn jé shoq, mauchut tuq dut é jowò má duq nyi é myibung lé su, myiqhtoi dang haú lé, nungmoq gyo mù rago châng kut râ dut lê.

²⁰ Banshoq htoq má, Chyúmdang mâ é myiqhtoi dang gi, haù myiqhtoi pé mai ó le ó lichyúm lhoq htoq yu é dông a nghut é lé, nungmoq sê to râ dut lê.

²¹ Hkâsu mù gâ le, myiqhtoi dang gi, byù ô nau é dông hkâ-nhám lé a htoq wú é za, haù Chyoiyúng Woi-nyí eq shuí u huí é bang mai, Garai Gasâng chyáng mâ é dang taí é ru nghut lê.

2

Sará Apyoq Pé É Hkyô

¹ Nghut kôlhang, myiqhtoi pyoq pé gi, Israelaq byù haù bâng é ahkaù má nyi wú bê nghut lê, haù eq rajung za, nungmoq é ahkaù má le sará apyoq pé nyi râ za nghut lê.

☆ 1:17 Mht 17:5; Mrk 9:7; Luk 9:35

Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é htoq agó, yhangmoq lé wui yu é, Yhumsing lé lhang he-ngik pyám kó râ nghut lhê. Haû mù, yhangmoq gi, yhumsing gùng yhumsing byòdàn tung htên byoq hkyô jé nhâng bekô râ nghut lhê.

² Byù myo myo gi, haú bâng é ahoq ahí hkyô má cháng kó râ eq, tengmán hkyô lé tai hpoí pyám nhâng kó râ nghut lhê.

³ Sará apyoq haú bang gi, yhangmoq myoqnoq é hkyô má, yhangmoq kut htoq tô é mhô-myi dông nungmoq lé mhaú zo kó râ nghut lhê. Yhangmoq lé mara dam byi hkyô gi, gohkûn mai yhangmoq ahtoq má lhang to gù bê nghut é htoq agó, yhangmoq é htên byoq hkyô gi, yhup myhî tô nyi é a nghut.

⁴ Hkâsu mù gâ le, Garai Gasang gi, mara kut shut é maumâng pé lé lhang a ha bûn é za, ngaraí ming má hkyô pyám luí, tarâ jéyáng é hui râ hkûn jé shoq, yhangmoq lé tuq tuq chut é dong hkaû má kat tô é nghut lhê.

⁵ Yhang gi, tarâ a hkunggâ é byu pé lé dowui tîng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotû nyhit yuq lé hung yu é nghut ri;

⁶ Yhang gi, Sodom eq Gomoraq myuq lé, myi-mhop dut shoq nyhê hkyô pyám é dông mara dam byi luí, tarâ

a hkungga bâng chyáng dut lò râ hkyô é azông kut tô é nghut ri;

⁷ nghut kôlhang, tarâ a chûng bâng é achâq achyut asak duí hkyô é yanmai myit wui myit hke huí é, haû dingmán sù Lot lé hkyi htoq yu é nghut ri;

⁸ (hkâsu mù gâ le, dingmán sù haû gi, nyí hkangmó yhangmoq ahkaû má nyi nyi é nghut luí, tarâ a chûng é muzó hkyô lé, yhang wó myâng wó gyô é yanmai, yhâng é dingmán myit má gunjâng é hui sù nghut ri.)

⁹ Haû su nghut é nghut jâng, Yhumsing gi, tarâ hkunggâ é byu pé lé, wuihke hkyô mai hkâsu kut hkyi htoq yú râ eq, a dingmán é bang lé, tarâ jéyáng é buinyi jé shoq, dam byí é hkyô lé xoq kut nyi é u má hkâsu kut zuí zing to râ lé sê lhê.

¹⁰ Haû yubak gungshô é htên byoq sê é yut yut ô naù hkyô châng é eq ahko ahkáng lé wú tiq bâng chyáng, haû hkyô hkyak dut râ nghut lhê.

Byù haú bang gi, ngegáng-htu é eq nghutbûn é bang nghut kôluí, mauhkûng bang lé lumù gansâng râ lé a gyuq kó nghut ri;

¹¹ nghut kôlhang, maumang lagyô pé lhang gi, wum je bo é eq a-tsam je bo é nghut kôle, haû Yhumsing é hí má, haû mauhkûng bang lé mara hun é dông lumù gansâng hkyô a wám kut kó nghut ri.

¹² Nghut kôlhang, haû sará apyoq pé gi, yhumsing a sê

gyô é hkyô pé lé rhoi dang tai akô. Yhangmoq gi, haû chyup yu é hui lui, lhoq htên pyâm é hui râ matú za hku lé lo é, nhik a bo é tân jung dusak đông nghut akô; dusak haû pé su, yhangmoq le, htên byoq byuq kó râ nghut lhê.

13 Yhangmoq gi, nò shoq kut bekô nghut é yanmai, nò shoq kut é hui zo kó râ nghut lhê. Yhangmoq é ngón kún nau é myit gi, nyí mó káng lé lhang gungsho yut yut ô nau hkyô lhoq dik râ matú nghut ri. Yhangmoq gi, nungmoq eq rahá zoshuq poi kut kô é hkún, mhaû é lé yhangmoq é ngón hkyô kut kômù, agè agau é eq achau achyut é bang nghut akô.

14 Yhangmoq é myoqjí pé má gi, su-myi sulàng lú hkyô byíng zan to kômù, mara kut é hkyô lé hkâ-nhám le a hkying kó nghut ri; yhangmoq gi, a gingtíng é bang lé mhoq hpyoq yu akô; yhangmoq gi, myoqnoq é hkyô má kúng é bang nghut kômù, nhíng pyâm é hui bang nghut akô.

15 Yhangmoq gi, haû dítng é hkyô lé tô pyâm to kômù, Beora é yhangzo nghut é, agè ashop hkyo é ahpaule lé chyitdap sù Balam é hkyô má châng yông wún bekô nghut ri.

16 Nghut kôlhang, Balam gi, yhang kut shut é hkyo é yanmai, logúng eq tân mhoqshit é hui ri; dang a dat nyo é logúng haû gi, byu é htê đông dang tai lò mù, myiqhtoi hpó a gyíng é hkyô lé hkúm tang pyâm ri.

17 Byù hau bang gi, wui a bo é wuihtung eq, laidún eq mut tâng ló é nghansoq eq pûng kômù, yhangmoq é matú gi, tuq tuq chut é mauchut hkaû lé lajang to bê nghut ri.

18 Hkâsu mù gâ le, yhangmoq gi, asôm gyáng dang lé tai mù, yubak gungshô é yut yut ô nau é hkyô đông mai, haû shut shai é hkyô má asak dui nyi é mai asik za hfang htoq lo é bang lé, mhoq hpyoq yu akô nghut ri.

19 Yhangmoq gi, haû bang lé luthkyô byi râ gidid byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô nau hkyo é jùn dut nyi akô; haû mù gâ le, byù rayuq gi, yhumsíng lé hai eq up sing le, hai é jùn nghut lhê.

20 Byu pé gi, nga-nhúng é Yhumsíng eq hkyi yù Sù nghut é Yesuq Hkrisduq lé sê é đông mai, mingkân é agè ashop hkyô mai wó hfang lut htoq bê nghut kôle, yhangmoq lé hau eq tuí yup tô é dum hui lui, ung pyâm é hui kô é nghut jáng, yhangmoq é matú, hí lhê htoq má je wui byuq kó râ nghut lhê.

21 Haû dingmán é hkyô lé yhangmoq sé lui, yhangmoq lé ap byi to bê nghut é chyoiyúng hkunmó lé tô pyâm to mù lhing taû ló byuq kô é htoq má, haû hkyô lé a sê é gi, yhangmoq é matú je gè kó râ nghut lhê.

22 "Hkui gi, yhang hpat tô é lé dum taû zô lhê." gâ é eq, "Waq gi, chí pyâm byi é

htâng, yhâng é galhu htum má dum taũ lhũ lhê."☆ gâ é sanghkyang gi, yhangmoq chyáng dik bê nghut ri.

3

Haũ Yhumsing Jé Lé Râ Buinyi

1 Chyitdap é luzúm wuĩ ê, shĩ gi, nungmoq lé ngò í dá nghũ rã dãm ká byĩ kat é laiká nghut lhê. Laiká shĩ í lhum má, nungmoq é sansêng é i-myit lé lhoq toq rã matú taĩ pũn kat é laiká nghut lhê.

2 Haũ gi, chyoiyúng myiqh-toĩ pé mai laĩ lò bê hkũn taĩ tô é dang pé eq, nga-nhũng é Yhumsing eq hkyi yũ Sũ mai, nungmoq é lagyô pé đông byĩ to bê nghut é hkunmó lé, ngò, nungmoq lé bun nhâng nàu luĩ nghut lhê.

3 Sâng-hi má, ló htâng é buinyi pé má yhumsing é agè ashop ô nàu hkyô má cháng luĩ taĩ hpoi bang htoq lô rã nghut é lé, nungmoq sê gyô to ra rã nghut lhê.

4 Haũ bang gi, "'Dum jé lé rã' ga Yhang gidiq byĩ é gi, hkãmá lhu? Nga-nhũng é ichyĩ iwã pé gi, shi byuq ló bekô nghut mù, junghkang jungmó gi, mau htoq xâng hkun mai dut é su roq dut nyi ri." ga taĩ kó rã nghut lhê.

5 Nghut kôlhang, yhangmoq gi, a-nham lé, Garai Gasâng é hkunmó mai, mauhkũng pé joq é eq, myigùng gi, wuĩ mai dut htoq nhâng mù, wuĩ đông hpan tô é hkyô lé, a sé gũn kut pyãm akô nghut ri.

6 Wuĩ hau eq sheq, haũ hkun lhê é mingkan lé dowuĩ tĩng mù, lhoq htên pyãm é nghut lhê.

7 Ahkui lhê é mauhkũng pé eq myigùng lé gi, tarã a hkungga bang htên byoq hui rã nghut é, tarã jéyáng é buinyi jé shoq, myi má nyhé rã matú, hkunmó hau eq Yhang hkong to bê nghut ri.

8 Nghut kôlhang, chyitdap é luzúm wuĩ ê, haũ Yhumsing é hí má, ra-nyĩ gi, zanwut rahkyĩng đông, zanwut rahkyĩng gi, ra-nyĩ đông nghut é hkyô shĩ lé, hkãtô-myhĩ kó.

9 Haũ Yhumsing gi, Yhâng é danggidiq lé hãn a lhoq dik ga byũ ra-am myit ngam pyãm é su, nyhãm é Sũ a nghut. Yhang gi, ó yuq le htên byoq byuq rã lé a ô nàu é yanmai, yuq hkangmó myit lĩng rã lé za ô nàu mù, nungmoq lé myit hĩng byĩ nyi é nghut lhê.

10 Nghut kôlhang, haũ Yhumsing é buinyi gi, hkau sũ su a bũn nùng má jé rã nghut lhê. Haũ buinyi má, mauhkũng pé gi, mying hum htê eq byuq byuq rã nghut lhê; duqbó-gũng pé gi, myĩ eq lhoq htên pyãm é hui luĩ, myigùng eq haũ mã é joq mijoq gi, nyé gyó byuq rã nghut lhê.

11-12 Joq mijoq gi, haũ hkyô đông lhoq htên pyãm é hui rã nghut é yanmai, nungmoq gi, hkasũ é byu pé dut ra rã lhu? Nungmoq gi, haũ Garai

Gasâng é buinyì lé ho nyi é eq buinyì haù hân za jé râ lé ô nau nyi é hkûn, chyoyúng é eq tarâ hkunggâ é asak duì hkyô dông nyi ra râ nghut lhê. Buinyì haù gi, mauhkûng pé lé, myì eq lhoq htên pyám luí, duqbó-gûng pé le, lûm nyé luí, nyé yui pyâm é buinyì dut râ nghut lhê.

¹³ Nghut kôlhang, nga-nhúng gi, Garaì é danggidiq nghut é, dingmán hkyô é yhûm, mauhkûng asik eq myigûng asik lé, myoqbyu nyi é bang nghut lhê.

¹⁴ Haù nghut mù luí, chyitdap é luzúm wuì ê, nungmoq gi, haù hkyô lé myoqbyu é bang nghut kô é yanmai, Yhang é hí má achayut a dut é eq mara hân râ hkyô a bo é za, Yhang eq nguingón nyi râ hkyô lé gyai yhang shikut nyi keq.

¹⁵ Nga-nhúng é chyitdap gumang Poluq gi, yhang lé, Garaì Gasang byì tô é hpaqchyì byéng-yá èq, nungmoq chyáng kâ byi bê eq rajung za, nga-nhúng é Yhumsing é myit hîng hkyô gi, hkyi yù hkyô nghut é lé matsîng to keq.

¹⁶ Poluq gi, yhang kâ é laiká pé banshoq má, haù hkyô pé eq séng luí rajung za kâ shit tô ri. Yhang é laiká hkaù pé má, ra-am gi, sê gyo wuì é hkyô pé bo é yanmai, a mhoq wú é bang eq a gingtîng é bang gi, gotù Chyúmdang pé lé lichyúm htaì lhik pyám kô é su, yhangmoq lichyúm htaì lhik pyám kômù, yhumsîng htên byoq

hkyô kut yu nyi akô nghut ri.

¹⁷ Haù mù luí, chyitdap é luzúm wuì ê, nungmoq gi, shí hkyô lé sê to gù nghut é yanmai, tarâ a chûng bâng é shut shaì hkyo èq nungmoq lé a wó shuí nghoq yù râ eq, nungmoq é gaù é jowò mai a wó byit gyó byuq sháng gaq, yhumsing gûng yhumsîng upzúng nyi keq.

¹⁸ Nga-nhúng é Yhumsîng eq hkyi yù Sû nghut é Yesuq Hkrisduq é jeju eq hpaqchyì hkyô má, nungmoq kô myhang lò kó sháng gaq. Hpungwup shing kang gi, Yesuq Hkrisduq chyáng, ahkuì le, ahtum abyuq le, ru joq nyi sháng gaq ô! Amen.

YOHAN Hî Dàm Hun Kat é Laiká (1 John)

Asak Mungdang

¹ Ngò gi, haû sâng-hi mai joq nyi mù, ngamoq wó gyô wú bê é, ngamoq é myoq eq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé taí kyô kat lhê.

² Asak haû gi, htoq shit bê nghut mù, ngamoq gi, haû lé myang wú luí, saksé hkám bê; haû Íwa eq rahá nyi wú é, ngamoq chyáng htoq shit bê nghut é ahtum abyuq é asak haû lé nungmoq lé taí kyô lhê.

³ Ngamoq eq zùm yap é hkyô lé, nungmoq le wó sháng gaq nghú, ngamoq gi, myang wú bê eq wó gyô wú bê hkyô lé, nungmoq lé taí kyô lhê. Ngamoq gi, haû Íwa eq le, Yhâng zo Yesuq Hkrisduq eq le, zùm yap nyi é bang nghut lhê.

⁴ Ngamoq é gabú hkyô byíng jup sháng gaq nghú, ngamoq gi, nungmoq lé shí hkyô ká byí kat lhê.

Maubó Hkaû Má Sô Nyi Râ Hkyô

⁵ Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq

wó gyô yù luí, nungmoq lé taí kyô é danglù nghut lhê.

⁶ Nga-nhúng gi, Yhang eq zùm yap nyi lhê nghú taí kôlhang, mauchut hkaû má ru sô nyi bum é nghut jáng, nga-nhúng gi, mhaû é bang dut mù, haû tengmán hkyô đông asak a dui é bang nghut ri.

⁷ Nghut kôlhang, Yhang gi, maubó má nghut nyi é eq rajung za, nga-nhúng le haû maubó má sô nyi é nghut le gi, nga-nhúng rayuq eq rayuq zùm yap nyi bê nghut luí, Yhang zo Yesuq é sui gi, nga-nhúng é mara banshoq lé lhoq sân-yúng pyám byi râ nghut lhê.

⁸ Mara a bò nghú nga-nhúng taí é nghut le gi, yhumsing gùng yhumsing mhaû pyám luí, haû tengmán hkyô gi, nga-nhúng chyáng a bò nghut ri.

⁹ Nghut kôlhang, nga-nhúng gi, yhumsing é mara lé yín yu é nghut jáng, Yhang gi, wó lum é sù eq tengmán é sù nghut é yanmai, nga-nhúng é mara lé hkyut pyám byi luí, a ding a mán é hkyô banshoq mai le, nga-nhúng lé lhoq sân-yúng byi râ nghut lhê.

¹⁰ Nga-nhúng gi, mara a kut shut nghú taí é nghut jáng, nga-nhúng mai Yhang lé mhaû sù nghú chyo pyám é nghut luí, Yhâng é mungdang gi, nga-nhúng má a bò nghut ri.

2

Hkrisduq Gi, Nga-nhúng Lé Garúm Sù

1 Ngò chyitdap é zo wuî ê, ngò gi, nungmoq mara a kut shut kó sháng gaq nghû, nungmoq lé shí hkyô ká byî kat lâ. Nghut kôlhang, rayuq yuq mara kut shut é nghut le gi, nga-nhông é matú haû Íwâ chyáng bo taí xoq byî é, Yesuq Hkrisduq gâ é Dingmán Sû lé, nga-nhung wó lâ.

2 Yhang gi, nga-nhông é yubak marâ é matú, shíhtai gunglik hkungga nghut nyi ri. Nga-nhông é yubak marâ é matú baú za a nghut, mingkan gón mâ é byu pê é yubak marâ é matú le nghut nyi ri.

3 Nga-nhung gi, Yhang hkyô tô é hkunmó pé lé châng kut é nghut jáng, Yhang lé nga-nhung rago sé bê nghut é hkyô lé, wó sé bê nghut ri.

4 Byù rayuq yuq mai, "Ngò gi, Yhang lé rago sê lâ." ga taí kôlhang, Yhang hkyô tô é hkunmó lé a châng kut é nghut jáng, haú yuq gi, byù mhaú nghut luí, tengmán hkyô gi, yhang má a bò nghut ri.

5 Ó yuq nghut kôlhang, Garai Gasâng é mungdang lé châng kut nyi é nghut jáng, Yhang lé chyitdap é myit gi, haú yuq má gè gè byíng jup bê nghut ri.

6 Yhang má asak dui nyi lâ ga taí é sù ó yuq nghut kôlhang, Yesuq kut bê eq rajung za, châng kut râ lâ. Haú hkun sheq, nga-nhung gi, Yhang má nghut nyi bê hkyô lé, wó sê lâ.

Hkunmó Asik

7 Chyitdap é luzúm wuî ê, ngò gi, nungmoq lé hkunmó asik ká byî kat é a nghut é za, haû sâng-hi mai nungmoq wó to bê hkunmó axau sheq ru nghut lâ. Hkunmó axau shí gi, nungmoq wó gyô wú bê mungdang nghut nyi ri.

8 Nghut kôlhang, ngò gi, nungmoq lé hkunmó asik ká byî kat lâ; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haû mauchut gi, lai lô byuq luí, haû tengmán é maubó gi, duq nyi gù bê nghut ri.

9 Ngò gi, maubó hkaû má nghut nyi lâ ga luí, yhumsing é gumang lé a jú é sù ó yuq nghut kôlhang, haû mauchut hkaû má ru nghut nyi ashí.

10 Yhumsing é gumang lé chyitdap é sù ó yuq nghut kôlhang, haû maubó má asak dui nyi é nghut mù luí, yhang má myit leqbat nhâng rá hkyô haí le a bò nghut ri.

11 Nghut kôlhang, yhumsing é gumang lé a jú é sù kúm gi, haû mauchut hkaû má nghut nyi luí, haú má sô lhing jón wún ri; haû mauchut gi, yhang lé myoq lhoq chit to byî é yanmai, yhang gi, hká shut e lô nyi é hkyô lé a sé nghut ri.

12 Chyitdap é zo wuî ê, Yhâng myíng é yanmai, nungmoq é mara pé hkyut pyám byi hui bekô nghut luí, nungmoq lé ngò ká kat é nghut lâ.

13 Íwâ pé ê, nungmoq gi, haû sâng-hi mai nyi é Sû lé

sé bekô nghut é yanmai, nungmoq lé ngò kê kat é nghut lhê.

Zorâm wuì ê, nungmoq gi, haù agè ashop sù lé ùng pyám bekô nghut é yanmai, nungmoq lé ngò kê kat é nghut lhê.

Chyitdap é zo wuì ê, nungmoq gi, haù Íwa lé sé bekô nghut é yanmai, nungmoq lé ngò kê kat é nghut lhê.

14 Íwâ pé ê, nungmoq gi, haù sâng-hi mai nyi é sù lé sé bekô nghut é yanmai, nungmoq lé ngò kê kat é nghut lhê.

Zorâm wuì ê, nungmoq gi, wum-o bo é eq, haù Garai Gasâng é mungdang nungmoq chyáng dui nyi é nghut mù, haù agè ashop sù lé ùng pyám bekô nghut é yanmai, nungmoq lé ngò kê kat é nghut lhê.

Mingkan Lé A Chyitdap Râ Hkyô

15 Mingkan eq mingkan htoq mã é haì le lé, hkáchyitdap kó. Byù rayuq yuq, mingkan lé chyitdap é nghut le gi, haù Íwa lé chyitdap é myit, yhâng chyáng a bò nghut ri.

16 Hkâsu mù gâ le, mingkan htoq má joq é lhunglhang gi, gungsho ô nau é hkyô, myoqjí yut yut ô nau é hkyô, yhum-sing wó é eq kut é hkyô lé gumrong é pé chyat nghut ri.

Haù gi, Íwâ chyáng mai htoq lo é a nghut, haù mingkan mai htoq lo é ru nghut lhê.

17 Mingkan eq mingkan ô nau hkyô pé gi, laì ló byuq râ nghut lhê; nghut kôlhang, haù Garai Gasang ô nau é hkyô lé kut é sù gi, ahtum abyuq dui nyi râ nghut lhê.

Hkrisduq É Gye Pé

18 Chyitdap é zo wuì ê, shí gi, ló htâng é ahkyíng nghut bê; haù anti-hkrisduq* gi, lé lo nyi ri gâ é lé, nungmoq wó gyô wú bê eq rajung za, ahkuì lhang, anti-hkrisduq myo myo gi, jé lé bekô nghut ri. Hau é yanmai, nga-nhúng gi, ló htâng é ahkyíng nghut bê hkyô lé wó sé bê nghut ri.

19 Yhangmoq gi, nga-nhúng é hpúng mai htoq ló byuq bê bang nghut kôle, gè gè ga jang, nga-nhúng eq a sêng é bang nghut akô. Hkâsu mù gâ le, nga-nhúng eq sêng é nghut jáng, yhangmoq gi, nga-nhúng eq nyi to râ nghut lhê, nghut kôlhang, yhangmoq htoq ló byuq bekô nghut é yanmai, yhangmoq rayuq lhang nga-nhúng eq a sêng é hkyô lé tûn shit bê nghut ri.

20 Nghut kôlhang, nungmoq gi, haù Chyoiyúng Sù mai xù but byì é hui† bekô nghut mù luì, nungmoq banshoq bang haù tengmán hkyô lé sê akô nghut ri.

21 Haù tengmán hkyô lé nungmoq a sé kôluì, nungmoq lé ngò kê kat é a nghut;

* **2:18** Anti-hkrisduq ngù é lichyúm gi, Hkrisduq lé gyè kut é sù lé gâ lhê † **2:20** Xù but byì é hui gâ é lichyúm gi, Hkrisduq chyáng mai, Chyoiyúng Woi-nyì lé myang hap yu é lé gâ lhê.

haú hkyô lé nungmoq sé gù nghut luí le, haú mhaú é hkyô gi, tengmán hkyô mai lo é a nghut é lé nungmoq sé gù nghut luí le, nungmoq lé ngò kê kat é nghut lhê.

22 Mhaú é sù gi, ó yuq nghut lhê lhú? Haú Yesuq gi, Hkrisduq a nghut ga he pyâm é sù nghut ri. Haú Íwa eq Yhangzo lé he-ngik é sù gi, anti-hkrisduq yhang nghut nyi ri.

23 Haú Yhangzo lé he-ngik sù ó yuq nghut kôle, haú Íwa lé sé sù a nghut. Haú Yhangzo lé hap yu é sù kúm gi, haú Íwa lé le sé bê sù nghut lhê.

24 Haú sâng-hi mai nungmoq wó gyô wú bê é hkyô pé lé, nungmoq i-myt má ru bo nyi keq. Haú nghut jáng, nungmoq gi, haú Yhangzo eq Íwa chyáng nyi nyi râ nghut lhê.

25 Haú gi, nga-nhúng lé Yhang byi tô é ahtum abyuq é asak wó yû râ gâ é danggidiq nghut ri.

26 Ngò gi, nungmoq lé hkyô shuí ngoq shikut nyi bâng é hkyô eq séng luí, nungmoq lé shí gù kê kat é nghut lhê.

27 Nungmoq chyáng kúm gi, Yhâng chyáng mai xú but jeju lé nungmoq wó yù bekô nghut mù luí, mhoqshit râ góyuq a ra lo nghut ri. Nghut kôlhang, haú Yhâng é xú but jeju gi, hkyô hkangmó má nungmoq lé mhoqshit byi mù, haú gi, tengmán nyi é nghut luí, mhaú é hkyô haí le a bo é za, nungmoq lé mhoqshit byi nyi é eq rajung

za, Yhâng chyáng nungmoq nyi nyi keq.

28 Chyitdap é zo wui ê, nga-nhúng gi, Yhang jé lé mù htoq shit é hkûn, Yhâng é hí má a gyuq a kyum é, hoq a hpu é, wó dut râ matú Yhâng chyáng ru nyi nyi keq.

29 Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasang mai hkû kat é sù nghut é hkyô lé, nungmoq sé akô nghut ri.

3

Garai Gasâng É Yhangzô Pé

1 Nga-nhúng gi, haú Garai Gasâng é yhangzô pé ga wut râ hui bê nghut é yanmai, haú Íwa é chyitdap myit gi, nga-nhúng ahtoq má hkâ-í yhang ko nyi ri myhi-nhung! Nga-nhúng gi, yhangzô pé yhang nghut bu-nhung! Mingkan gi, Yhang lé a sê é yanmai, nga-nhúng lé le a sé nghut ri.

2 Chyitdap é luzúm wui ê, ahkuí, nga-nhúng gi, Garai Gasâng é yhangzô pé nghut nyi to kôlhang, nga-nhúng hkâsu dut râ hkyô lé, a tûn shit shi nghut ri. Nghut kôlhang, Hkrisduq htoq shit é hkûn, nga-nhúng gi, Yhang su dut râ nghut é hkyô lé, nga-nhúng sê lhê; hkâsu mù gâ le, Yhang hkâsu nghut é hkyô lé roq yhang, nga-nhúng myàng râ nghut lhê.

3 Myit myoqbyu hkyô shí lé, Yhâng chyáng má wó tô é bang ó yuq nghut kôle,

Yhang sân-yúng é eq rajung za, yhumsing gúng lé lhoq san lhoq yúng nyi ri.

⁴ Mara kut é sũ ó yuq nghut kôle, tarâ lu lai é sũ nghut ri; gè gè ga jang, mara gi, tarâ lu lai é hkyô nghut nyi ri.

⁵ Nghut kôlhang, Yhang gi, nga-nhung é yubak mara lé hkyut pyâm byi râ matú, pô htoq bê hkyô lé nungmoq sé akô; Yhang chyáng mara a bò nghut ri.

⁶ Yhang má dui nyi é sũ ó yuq nghut kôle, mara a xoq kut nyi nghut ri; mara xoq kut nyi sũ ó yuq nghut kôle, Yhang lé a myàng, a sé shi nghut ri.

⁷ Chyitdap é zo wui ê, nungmoq lé ó yuq èq le hkyô a shui ngoq kó sháng gaq; Yhang gi, dingmán é eq rajung za, dingmán é hkyô lé kut é sũ ó yuq nghut kôle, dingmán nyi ri.

⁸ Mara kut nyi é sũ gi, nat Tsadán chyáng mâ é nghut nyi ri; hkâsu mù gà le, Tsadán haũ gi, sân-hi mai yhang mara kut nyi bê nghut ri. Haũ Garai Gasâng é Yhangzo gi, Tsadán é muzó lé lhoq hpyoq lhoq hten râ matú pô htoq le é nghut lê.

⁹ Garai Gasâng chyáng mai hku kat é sũ ó yuq nghut kôle, Yhang é amyui bo to é nghut é yanmai, mara a xoq kut lo nghut ri; haũ yuq gi, Garai Gasang chyáng mai hku kat é hui bê nghut é yanmai, mara wó xoq kut lo râ a nghut.

¹⁰ Ó yuq nghut kôle,

dingmán é hkyô a kut é eq, yhang gumang lé a chyitdap é sũ gi, Garai Gasâng yhangzo a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhung wó sê yu ri.

*Rayuq Eq Rayuq Chyitdap
Lhum Râ Hkyô*

¹¹ Nga-nhung rayuq eq rayuq chyitdap lhum râ lê gà é hkyô haũ gi, sân-hi mai nungmoq wó gyô yù bê danglù nghut ri.

¹² Haũ agè ashop sũ eq le sêng é, yhanggu lé sat pyâm é Ka-in su a ge kut. Yhang gi, haũ mù lui yhanggu lé sat pyâm lê lhu ga le, yhang é muzó pé gi, agè ashop hkyô, yhanggu é muzó pé gi, dingmán é hkyô nghut é yanmai nghut ri. ✱

¹³ Ngá é gumang wui ê, nungmoq lé mingkân èq a ngui a jú kut kôlhang, hkâmaũ kó.

¹⁴ Nga-nhung gi, nga-nhung é gumang wui lé chyitdap é yanmai, shi byuq é mai wó lut lui asak dui é hkyô lé, wó sê é nghut lê. Chyitdap myit a bò sũ gi, shi é hkyô má lúng to ashî nghut ri.

¹⁵ Yhang é gumang lé a ngui a jú é sũ gi, byù sat sũ dut râ nghut lê; byù sat sũ ó yuq chyáng nghut kôle, ah-tum abyuq é asak a bo é hkyô lé, nungmoq sê nyi akô.

¹⁶ Yesuq Hkrisduq gi, nga-nhung é matú Yhang é asak

byí pyám bê lé wú jáng, chyitdap myit hkasû é nghut é hkyô lé, nga-nhung wó sê ri. Nga-nhung le, gumang wui é matú, nga-nhung é asak lé byí pyám gíng ri.

17 Ó yuq nghut kôlhang, mingkan sutzê wó to lui, yhang gumang hpó asho awui dut nyi é lé myàng kôlhang, a shogyô yu é nghut jáng, haú Garai Gasâng é chyitdap myit gi, yhang chyáng hkâsu wó bô râ lúh?

18 Chyitdap é zo wui ê, nga-nhung gi, dang nhut shô mai za a nghut, muzó eq tengmán é đông le chyitdap nyi sháng.

19 Haú hkún, nga-nhung gi, tengmán hkyô eq séng bê bang nghut é lé wó sê é eq, nga-nhung é i-myt mai nga-nhung lé mara hun lò hkanmó, Garai Gasâng é hí má nga-nhung i-myt wó ngón nyi bê nghut ri.

20 Hkâsu mù gâ le, Garai Gasang gi, nga-nhung myit é htoq má je kô é sù nghut mù, jung hkanmó lé sê nyi ri.

21 Chyitdap é luzúm wui ê, nga-nhung é i-myt mai nga-nhung lé mara a hun é nghut le gi, Garai Gasâng hí má nga-nhung gyuq kyûm râ hkyô a joq lo nghut ri.

22 Nga-nhung gi, Yhang hkyô tô é hkunmó pé lé châng kut é eq Yhang lé gabú nhang é hkyô haí lé le kut é yanmai, nga-nhung dúng é hkyô lhunglhang lé, Yhang chyáng mai wó yû râ nghut lê.

23 Yhang hkunmó hkyô tô é

eq rajung za, Yhang zo Yesuq Hkrisduq é mying má lumjing é eq, rayuq eq rayuq chyitdap lhûm é hkyô gi, Yhang hkyô tô é hkunmó yhang nghut bê.

24 Yhang hkyô tô é hkunmó pé lé, châng kut é bang gi, Yhang má dui nyi bê nghut mù, Yhang le haú bang chyáng dui nyi bê nghut ri. Yhang nga-nhung chyáng dui nyi bê hkyô lé, nga-nhung lé Yhang byí tô é Woi-nyí đông nga-nhung wó sê yu é nghut lê.

4

Woi-nyí Pé Lé Gôn Wú Râ Hkyô

1 Chyitdap é luzúm wui ê, woi-nyí hkanmó lé hkâlumjing ko, woi-nyí haú pé gi, Garai Gasâng chyáng mâ é nghut é, a nghut e lé gôn wú keq; hkâsu mù gâ le, myiqhtoi pyoq pé myo myo gi, mingkan htoq má jón wún bekô nghut ri.

2 Garai Gasâng é Woi-nyí lé nungmoq wó sê yû râ hkyô gi, shí đông nghut lê: haú Yesuq Hkrisduq gi, gungsho đông jé lé bê ga, yín yu é woi-nyí hkanmó gi, Garai Gasâng chyáng mâ é nghut lê.

3 Nghut kôlhang, Yesuq Hkrisduq lé a yín yu é woi-nyí hkanmó gi, Garai Gasâng chyáng mâ é a nghut. Woi-nyí haú gi, lé lo nyi ri ga nungmoq wó gyô wú bê; ahkuí lhang mingkan htoq má nyi to gù nghut é anti-hkrisduq é woi-nyí nghut ri.

⁴ Chyitdap é zo wuî ê, nungmoq gi, Garai Gasâng chyáng mâ é nghut mù luî, yhangmoq lé ung pyám bekô nghut ri. Hkâsu mù gâ le, nungmoq má lúng to Sû gi, mingkan má nyi to su htoq je kô ri.

⁵ Yhangmoq gi, mingkan eq sêng é bang nghut lâhê mù luî, mingkan hkyam dông tai bum akô; mingkan zo wuî le yhangmoq é dang lé gyo byî akô nghut ri.

⁶ Nga-nhúng gi, Garai Gasang eq sêng é bang nghut lâhê; Garai Gasang lé sê é sù ó yuq nghut kôle, nga-nhúng é dang lé gyô ri; nghut kôlhang, Garai Gasang eq a sêng é sù gi, ngamoq é dang lé a gyo nghut ri. Shí hkyô lé wú jáng, tengmán hkyo é Woi-nyí eq hkyô shuí nghoq é woi-nyí lé, nga-nhúng sê gam hkoq yû bê nghut ri.

Garai Gasang Gi, Chyitdap Myit

⁷ Chyitdap é luzúm wuî ê, nga-nhúng gi, rayuq eq rayuq chyitdap lhùm nyi sháng; hkâsu mù gâ le, chyitdap myit gi, Garai Gasâng chyáng mâ é nghut ri. Chyitdap myit bò sù ó yuq nghut kôle, Garai Gasâng chyáng mai hku kat é hui bê sù nghut luî, Garai Gasang lé sé sù nghut ri.

⁸ Chyitdap myit a bo é sù ó yuq nghut kôle, Garai Gasang lé a sé sù nghut ri; hkâsu mù gâ le, Garai Gasang gi, chyitdap myit nghut lâhê.

⁹ Garai Gasang gi, Yhang Zô é yanmai nga-nhúng asak wó duì sháng gaq ga, Yhang

Zo zote lé mingkan htoq má nhang kat byi bê nghut ri. Haû gi, Garai Gasang mai nga-nhúng lé, Yhâng é chyitdap myit tân shit é hkyô nghut ri.

¹⁰ Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap luî, nga-nhúng é yubak marâ é matú, shíhtai gunglik hkungga dut sháng gaq ga, Yhang Zo lé nhang kat byi é nghut ri; haû gi, chyitdap myit yhang nghut bê.

¹¹ Chyitdap é luzúm wuî ê, Garai Gasang gi, nga-nhúng lé haû-í yhang chyitdap é nghut jáng, nga-nhúng le rayuq eq rayuq chyitdap lhùm râ dut lâhê.

¹² Garai Gasang lé ó yuq èq le, hkâ-nhám lhang myang wú é a nghut; nghut kôlhang, nga-nhúng rayuq eq rayuq chyitdap lhùm nyi é nghut jáng, Garai Gasang gi, nga-nhúng má nyi nyi bê nghut luî, Yhâng é chyitdap myit gi, nga-nhúng má gumjup râ nghut lâhê.

¹³ Garai Gasang gi, nga-nhúng lé, Yhâng é Woi-nyí byi to bê nghut é yanmai, Yhâng chyáng nga-nhúng dui nyi bê hkyô lé le, Yhang nga-nhúng má nyi nyi bê hkyô lé le, nga-nhúng sé bê nghut ri.

¹⁴ Haû Íwa gi, Yhang Zo lé mingkân é hkyi yù Sû dut sháng gaq ga nhang kat é hkyô lé, ngamoq myàng luî, saksé hkâm lâhê.

¹⁵ Ó yuq nghut kôlhang,

Yesuq gi, Garai Gasâng é Yhangzo nghut ri ga yín yu é nghut le gi, yhang má Garai Gasang nyi nyi bê nghut lui, yhang le Garai Gasâng chyáng dui nyi bê nghut ri.

¹⁶ Nga-nhúng gi, Garai Gasâng eq nga-nhúng lé chyitdap é hkyô lé, sé lui lumjínng nyi lhê; Garai Gasang gi, chyitdap myit nghut lhê; chyitdap myit má nyi nyi é sù ó yuq nghut kôle, Garai Gasâng chyáng dui nyi bê nghut lui, Garai Gasang le haú yuq má nyi nyi bê nghut ri.

¹⁷ Haú dông mai, chyitdap myit gi, nga-nhúng chyáng gumjup bê nghut lui, nga-nhúng gi, tarâ jéyáng é buinyi má a gyuq a kyum é myit wó yû râ nghut lhê; hkâsu mù gâ le, nga-nhúng gi, mingkan shî má Yhang su dut nyi bê nghut ri.

¹⁸ Chyitdap myit má gyuq é hkyô a bò nghut ri; gyuq é hkyô gi, mara dam byi é hkyô eq sêng é nghut mù lui, gumjup é chyitdap myit gi, gyuq é hkyô lé hkat htoq pyâm ri. Haú gyuq é myit bò sù gi, chyitdap myit má gumjup sù a nghut.

¹⁹ Yhang hí nga-nhúng lé chyitdap bê nghut é yanmai, nga-nhúng le chyitdap nyi lhê.

²⁰ Byù rayuq yuq gi, "Ngò, Garai Gasang lé chyitdap lhê." ga taí kôlhang, yhâng é gumang lé a jú é nghut jáng, haú yuq gi, byù mhaú rayuq nghut ri; hkâsu mù gâ le, yhumsing byu-myang é

gumang lé lháng a chyitdap é sù gi, a byu-myang é Garai Gasang lé wó chyitdap râ a nghut.

²¹ Garai Gasang lé chyitdap é sù ó yuq le, yhumsing gumang lé le chyitdap râ lhê gâ é dang haú gi, nga-nhúng é matú, Yhang mai hkyô tô é hkunmó nghut lhê.

5

Garai Gasâng É Yhangzo Lé Lumjínng Hkyô

¹ Yesuq gi, haú Hkrisduq nghut ri ga lumjínng é sù ó yuq nghut kôle, Garai Gasâng chyáng mai hku kat bê sù nghut ri; iwa lé chyitdap é sù ó yuq nghut kôle, yhang zo lé le chyitdap é nghut bê.

² Garai Gasang lé chyitdap nyi mù, Yhang hkyô tô é hkunmó pé lé châng kut nyi é nghut le gi, Garai Gasâng é yhangzô pé lé le, chyitdap nyi é hkyô lé, nga-nhúng wó sê yu é yanmai,

³ Garai Gasang hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wòlai mó a nghut.

⁴ Hkâsu mù gâ le, Garai Gasâng chyáng mai hku kat bê sù ó yuq nghut kôle, mingkan lé ung pyâm bê nghut ri. Nga-nhúng é lumjínng myit gi, mingkan lé nga-nhúng ung pyâm é ongdang hkyô nghut ri.

⁵ Yesuq gi, Garai Gasâng é Yhangzo nghut é lé lumjínng é sù mai lai lui, mingkan lé wó

ung pyâm é sủ gi, ó yuq wá nghut lê lủ?

⁶ Haủ yuq gi, wủ eq sui* mai lé é sủ, Yesuq Hkrisduq yhang nghut nyi ri. Yhang gi, wủ mai za lé é a nghut, wủ mai le, sui mai le, lé é sủ nghut lê. Woi-nyí gi, tengmán hkyô nghut é yanmai, shí hkyô lé saksé hkám byí ri.

⁷ Hkâsu mù gâ le, Woi-nyí le, wủ le, sui le, haủ sủm lủm é saksé hkâm akô nghut ri;

⁸ haủ sủm lủm gi, rajung za nghut akô.

⁹ Nga-nhúng gi, byu é saksé lé lhom yu lê; nghut kôlhang, Garai Gasâng é saksé gi, haủ htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé saksé byí é yanmai nghut ri.

¹⁰ Garai Gasâng é Yhangzo lé lumjíng é sủ gi, saksé haủ lé yhang é i-myt má wó bê nghut ri; Garai Gasang lé a lumjíng é sủ kúm gi, Yhang lé byủ mhaủ rayuq ga chyopyâm bê nghut ri; hkâsu mù gâ le, Garai Gasang mai Yhang Zo eq sêng é hkyô saksé hkâm é lé, yhang a lumjíng é yanmai nghut ri.

¹¹ Nga-nhúng lé, Garai Gasang byí é ahtum abyuq é asak gi, saksé haủ nghut nyi ri. Asak haủ gi, Yhang Zô chyáng bo ri.

¹² Garai Gasâng é Yhangzo lé wó sủ gi, asak haủ lé wó bê; Yhang Zo lé a wó sủ gi, asak

haủ lé le a wó nghut ri.

Ahtum Abyuq Asak

¹³ Garai Gasang é Yhangzô é myìng lé lumjíng é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghủ, shí hkyô pé lé ngò ká byí kat é nghut lê.

¹⁴ Nga-nhúng haủ dủng le le, Garai Gasang ô nau é dủng nghut jáng gi, Yhang gyo byi rả nghut lê; haủ gi, Yhang é hí má nga-nhúng a gyuq a kyum wó wâng rả matủ nghut ri.

¹⁵ Haủ mù, nga-nhúng haủ dủng kôlhang, Yhang gyo byí é lé nga-nhúng sê é nghut le gi, Yhang chyáng nga-nhúng dủng é hkyô lé, nga-nhúng wó yu é lé, nga-nhúng sê lê.

¹⁶ Ó yuq nghut kôle, yhum-sing é gumang hpó mai shí a gíng é mara kut shut é lé, myang é nghut le gi, haủ yuq é matủ kyủdung byi rả lê. Haủ hkủn, Garai Gasang gi, haủ yuq lé asak byi rả nghut lê. Haủ gi, shí a gíng é mara wó bâng é matủ taí é nghut lê. Shí gíng é mara le joq lê; nghut kôlhang, hau é matủ dung rả lê nghủ, ngò taí nyi é a nghut.

¹⁷ A dingmán é hkyô lunglhang gi, mara nghut lê; nghut kôlhang, shí a gíng é mara le joq lê.

¹⁸ Garai Gasâng chyáng mai hku kat bê sủ ó yuq nghut kôle, mara a xoq kut lô é hkyô lé nga-nhúng sê lê; hkâsu

* 5:6 Wủ eq sui nghủ é gi, Yesuq baptisma hkam yu é hkyô eq shí hkâm é hkyô lé taí nau é nghut ri.

mù gâ le, haû Garai Gasâng é Yhangzo gi, haû yuq lé wú zúng nyi é nghut mù luî, haû agè ashop sù gi, haû yuq lé wó zàng htung rà a nghut.

¹⁹ Nga-nhúng gi, Garai Gasâng é yhangzô pé nghut é lé le, mingkan gón lé haû agè ashop su èq up tô é hkyô lé le, sê lhê.

²⁰ Hau htoq agó, Garai Gasâng é Yhangzo jé lé luî, haû tengmán Sù lé sé sháng gaq ga, nga-nhúng lé sê gyô é nyan byi bê hkyô lé le, nga-nhúng sê lhê. Nga-nhúng gi, Yhang Zo Yesuq Hkrisduq má nghut nyi bê eq rajung za, haû tengmán Sù má le nyi nyi bê nghut lhê. Yhang gi, haû tengmán é Garai Gasang eq ahtum abyuq é asak nghut nyi lhê.

²¹ Chyitdap é zo wuî ê, hparà lhó pé lé koi pyâm nyi keq.

YOHAN Htang Dàm Hun Kat é Laiká (2 John)

¹ Ngò suwún hpó gi, tengmán hkyô má ngò chyitdap é, hkyin yù huí é nàng hpô-myhí eq nung zô pé lé, dang kyô kat lhê; ngò baú za a nghut, haú nga-nhúng chyáng lúng to luí,

² nga-nhúng eq ahtum abyuq ru joq nyí rã nghut é tengmán hkyô é yanmai, haú tengmán hkyô lé sê é lhunglhang bang le, nungmoq lé chyitdap nyi lhê.

³ Haú Íwa Garai Gasang eq Íwã é Yhangzo Yesuq Hkrisduq chyáng mã é jeju, shogyo nhikmyin hkyô eq nguingón hkyô gi, haú tengmán hkyô eq chyitdap hkyô má, nga-nhúng eq rahá joq nyí sháng gaq.

⁴ Haú Íwa mai nga-nhúng lé hkunmó hkyô tô é eq rajung za, nung zô pé ra-am gi, haú tengmán hkyô mã châng nyi é hkyô lé, ngò wó sê é yanmai, gyai yhang gabú nyi lhê.

⁵ Chyitdap é hpô-myhí è, nga-nhúng rayuq eq rayuq chyitdap lhum sháng nghû, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhuma nghut.

⁶ Yhang hkyô tô é hkunmó eq rajung za, nga-nhúng

cháng kut é nghut jáng gi, chyitdap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chyitdap myit bo nyi rã matú nghut lhê.

⁷ Hkâsu mù gâ le, Yesuq Hkrisduq gi, gungsho dông jé lé é hkyô lé a yín yu é, mhaú zô é byù myo myo gi, mingkan htoq má jón wún bekò nghut ri; haú sù é byù gi, haú mhaú zo sù eq anti-hkrisduq dut rã nghut lhê.

⁸ Nungmoq zui saí bê muzó é akyû lé a lhoq hpyuq é za, gumjup é shigyau chyunghuq lé, nungmoq wó hkam yù kó sháng gaq, yhumsing gùng sidiq nyi keq.

⁹ Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haú mhoqshit é dang lé ru châng nyi é sù kúm gi, haú Íwa lé le, Yhangzo lé le, wó bê sù nghut ri.

¹⁰ Mhoqshit é dang haú lé a wun é byù rayuq yuq, nungmoq chyáng jé lé é nghut le gi, haú yuq lé nungmoq é yhúmkaû má hkâwâng nhâng kó; yhang lé hkâlhom xoq yù kó.

¹¹ Hkâsu mù gâ le, haú yuq lé lhom xoq yu é sù gi, yhâng é agè ashop é muzó má lòm bê sù nghut ri.

¹² Ngò gi, nungmoq lé ká byí kat rã hkyô myo myo joq kôlhang, laiká hkyap eq kajung-chi lé a kâm chùng naù. Nga-nhúng é gabú hkyô

wó gumjup sháng gaq, ngò,
nungmoq chyáng tsuq za lé jé
mù, nungmoq eq myoqdong
hkyâm kut nyo lhum râ lé
myit myoqbyu nyi lhê.

¹³ Hkyin yù huí é náng nhâ
é yhangzô pé gi, nang lé shi-
kyâm kat akô nghut ri.

YOHAN Súm Dam Dàm Hun Kat é Laiká (3 John)

¹ Ngò suwún hpó gi, haû tengmán hkyô má ngò chyt-dap é, ngá é chyitdap luzúm Ge-u lé dang kyô kat lê.

² Chytidap é luzúm hpó ê, ngò gi, haû náng é asak woi-nyí nyi-ngón yuqyo nyi é eq rajung za, nàng nguingón wángzán râ eq hkyô hkat hkangmó má, nyi-ngón yuqyo nyi sháng gaq nghû, kyûdung byí kat lê.

³ Hkâsu mù gâ le, ngò gi, gumang wui ra-am, ngá chyáng lé jé mù, haû tengmán hkyô má nàng lhumzui é hkyô lé le, haû tengmán hkyô má nàng hkâsu kut xoq châng nyi é hkyô lé le, lé taí kyo kô é hkûn, gyai yhang gabú é yanmai nghut lê.

⁴ Haû tengmán hkyô má, ngá zô pé châng nyi é hkyô lé, ngò wó gyô é hkûn gabú é í, gotû gabú hkyô a wó lo nghut ri.

⁵ Chytidap é luzúm hpó ê, haû gumang wui gi, mau we bíng pé nghut to kôlhang, nàng yhangmoq lé lhom garúm yu é hkyô má, nàng gi, lhumzui nyi ri.

⁶ Yhangmoq gi, haû noqkuq hpúng má é bang lé, náng é chyitdap myit eq séng lúi taí kyo bekô nghut ri. Nàng gi, Garai Gasâng hí má gingdán é dông, yhangmoq é hkyowui matú garúm lúi, dé

kat é nghut jáng, ge é muzó jizó kut é nghut bê.

⁷ Hkâsu mù gâ le, yhangmoq gi, Hkrisduq é myìng hau é matú htoq ló kôlúi, a lumjìng bâng chyáng mai haí lhang a hap yù kó nghut ri.

⁸ Haû mù lúi, nga-nhúng gi, haû tengmán hkyô é matú rahá za wó chôm zui saí sháng gaq, haû sù é byu pé lé lhom hkûlum yù râ lê.

⁹ Ngò gi, haû noqkuq hpúng lé laiká ká byí kat bê nghut lê; nghut kôlhang, haû ushuq kut nau é sù Diotrehpi gi, ngamoq lé a lhom hap yù nghut ri.

¹⁰ Haû mù lúi, ngò lé jé jáng gi, ngamoq lé a jo a âng é dang taí é eq lumù gansang é, yhang kut é muzó lé, taí hpyí kyo râ nghut lê; yhang gi, haû hkyô lé myit a dik shí é nghut mù lúi, yhang yhang le gumang wui lé a lhom hkûlum yù, lhom hkûlum yù naù bang lé le, yhang mai hkûm zing pyám lúi, yhangmoq lé haû noqkuq hpúng mai hkat htoq pyám ri.

¹¹ Chytidap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng má é nghut bê; agè ashop é hkyô kut é sù gi, Garai Gasang lé a myàng shí é sù nghut ri.

¹² Demetri ge é hkyô lé, yuq hkangmó mai le, haû tengmán hkyô eq le, saksé hkám byí akô nghut ri; ngamoq le, yhang ge é hkyô lé saksé hkám byí lê; haû ng-

amoq hkâm é saksé gi, têng é hkyô nghut é lé, nàng sê lhê.

¹³ Ngò gi, nang lé kê kat ra hkyô myo myo joq kôlhang, kâjung eq kâjung-chi đông a kê kat nàu lo.

¹⁴ Ngò gi, a myáng má, nàng eq myang huî lhum râ lé myit myoqbyu tô lhê. Haú hkûn sheq, ngá-nhik myoqdong hkyûm myang nyo lhum râ nghut lhê.

¹⁵ Nàng nguingón yuqyo nyì sháng gaq; shî mâ é luzúm wuî gi, nang lé shi-kyâm kat akô nghut ri. Nàng le, haú mâ é luzúm wuî lé, myìng du htau lûi bo shi-kyám byi laq.

YUDE Hun Kat é Laiká (Jude)

¹ Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù Íwa Garai Gasâng èq ji yù mù, chyitdap é hui luí, Yesuq Hkrisduq èq upzúng é hui bâng chyáng dang kyô kat lhê.

² Shogyo nhikmyin hkyô, nguingón hkyô eq chyitdap hkyô gi, nungmoq chyáng agùn agó joq nyì sháng gaq ô!

Garai A Wó Bâng É Yubak Mara

³ Chyitdap é luzúm wuî ê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kâ kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjíng hkyo é matú nungmoq htuq htíng râ dut é lé, myit wum byi râ hkyô ká râ dut é lé, ngò byu-myang ri.

⁴ Hkâsu mù gâ le, haù mara dam byí é hui zo râ hkyô lé, a-nham pyat mai kâ matsíng tô é hui bê bang ra-am gi, nungmoq chyáng hkaù wang lò bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo eq htaí lhih pyám kô é htoq agó, Yhang za nga-nhúng é Yhumsíng nghut sù eq Ahko ahkáng lhunglhang

wó sù, Yesuq Hkrisduq lé he-ngik pyám akô nghut ri.

⁵ Nungmoq kúm gi, shí pé banshoq lé sê to gù nghut kôlhang, ngò mai nungmoq lé taí pún nau é hkyô gi, a-ô mâ é pé nghut lhê: Haù gi, Yhumsíng Garai mai, Yhâng é byu pé lé, Egutuq ming mai hkyi htoq yú kôlhang, a lumjíng é bang lé gi, htâng má dum lhoq htên pyám é nghut lhê.

⁶ Hau htoq agó, haù yhumsíng é ayá lé tô pyám luí, yhumsíng é nyì jowò lé pyám tô é maumâng pé lé, Yhang gi, haù tarâ jéyáng é hui râ Buinyì mó jé shoq, ahtum abyuq é toqjâng tuí èq tui luí, mauchut hkaù má lhúng tô é nghut lhê.

⁷ Haù eq rajung za, Sodom eq Gomoraq myuq eq hau é awui ayám mâ é wà pé mâ é bang gi, ashop é dông gungsho zùm yap é hkyô shut é eq myiwe yhangchang yuqgè yhangchang nyì zô lhúm é hkyô kut kô é nghut mù, yhangmoq gi, ahtum abyuq é myi má dam byí é hpuzo bâng é alik dut bekô nghut ri.

⁸ Haù eq rajung za yhang, yhupmoq moq é byù shí bang gi, yhumsíng é gungsho lé agot a-ù kut kômù, ahkáng ayá wó sù lé he-ngik pyám kôluí, mauhkúng bang lé lumù gansang akô nghut ri.

⁹ Nghut kôlhang, haù mau-mang lagyo agyi Mihkaelaq lhang gi, Mosheq é gùng eq séng luí, haù nat zau eq dang rhâng lhúm é hkùn, yhang lé rhoi é dông mara hùn dang

a wám taí é za, "Nang lé, haú Yhumsîng nhik-yo sháng gaq!" ga za taí ri.

¹⁰ Nghut kôlhang, byù haú bang gi, yhangmoq a sê gyô é hkyô pé lé rhoí dang taí pyâm akô nghut ri; yhangmoq gi, haú myit woi-nyí a bo é dusak pé su, yhumsing myit mai sê gyô é hkyô pé má lhang, yhumsing gùng lé lhoq htên yu akô nghut ri.

¹¹ Yhangmoq gi, dingnyé wó râ! Hkâsu mù gâ le, yhangmoq gi, Ka-in* kut é agè ashop é hkyô dông cháng kô é yanmai le, akyû wó râ matú, Balam† shut é dông bo shut kô é yanmai le, Kora‡ é gumlau toq hkyô kut kômù, yhang su htên byoq byuq é hui kô é yanmai le nghut ri.

¹² Yhangmoq gi, nungmoq é chyitdap zoshuq poí má nungmoq lé agot a-û wó dut nhang é bang nghut mù, gyuq hoq a bo é za, nungmoq eq rahá chôm zoshuq kô é hkûn, yhumsing gùng lé za yhumsîng lhoq gyí yu é sau zúng bang nghut akô; yhangmoq gi, lai èq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpûn pyám luí, í dâm shí é, xung nám lhê é sikgâm pé su nghut akô.

¹³ Yhangmoq gi, yhumsing é hoq jung lé, tsû-myup su htoq nhang é, haú wuimau mâ é kô é wuìlhêng pé eq, tuq

tuq chut é mauchut hkaú má tarâ jéyáng hui râ matú, ah-tum abyuq tô to huí é, yông wún é kyí pé su nghut akô.

¹⁴ Byù haú bang eq séng luí, Adam mai byùxik nyhit xik má nyi é Eruk, myiqhtoi htoi tô é gi, "Wú keq, haú Yhumsîng gi, Yhâng é chyoiyúng bang mun mun sen sen eq rahá gyó lé lo nyi bê nghut ri.

¹⁵ Yhang gyó lé lo é gi, yuq hkanmó lé tarâ jéyáng rá matú eq, haú tarâ a hkunggâ é lhunghâng bang, tarâ a hkunggâ é dông kut é muzó pé banshoq lé le, tarâ a hkunggâ é yubak byu pé, Yhang lé taí shut é dang htân pé banshoq lé le, mara byi rá matú nghut lhê." gâ ri.

¹⁶ Byù haú bang gi, put dang taí é bang eq mara hûn dang taí é bang nghut akô; yhangmoq gi, yhumsîng ô nau é agè ashop hkyô cháng kô é htoq agó, yhumsing gùng yhumsîng nghutbûn é dang taí é eq yhumsing maiwáng zat é dông, góbang lé owaq é bang nghut akô.

Hkam Jân Râ Hkyô

¹⁷ Nghut kôlhang, ngò chyitdap é luzúm wuí ê, nungmoq gi, haú nga-nhûng é Yhumsîng Yesuq Hkrisduq é lagyô pé mai te taí tô é dang lé, bûn nyi keq.

¹⁸ Hkâsu mù gâ le, yhangmoq gi, "Haú ló htâng

* **1:11** Ka-in gi, yhanggu lé sat sù nghut lhê. Apûn 4:1-8 † **1:11** Balam gi, myiqhtoi nghut lhê, nghut kôlhang, ngunzè lé myoqnoq mù, Garai lé shut sù nghut lhê. Gyung So 22:1-35 ‡ **1:11** Kora gi, Garai byù nghut é hkyô-u shê sù Mosheq lé gumlau toq é hkyangjong nghut lhê. Gyung So 16:1-33

é ahkyíng pé má, tarâ a hkunggâ é yhumsíng ô nau é hkyô đông châng é, rhoijapdap dang taí é byu pé nyi to râ nghut lhê." ga, nungmoq lé taí wú kô é nghut lhê.

¹⁹ Byù haú bang gi, nungmoq lé gam hkoq é bang, mingkan hkyô lé baú za châng é bang, haú Woi-nyí a bo é bang nghut akô.

²⁰ Nghut kôlhang, ngò chyitdap é luzúm wuí ê, nungmoq gi, haú Chyoiyúng Woi-nyí má kyúdông é đông, nungmoq é chyoiyúng é lumjíng hkyô má, yhumsíng gùng yhumsíng lhoq kô yu nyi keq.

²¹ Ahtum abyuq é asak lé wó yû râ matú, haú nga-nhông é Yhumsíng Yesuq Hkrisduq é shogyo nhikmyin hkyô lé lánq uchyang, nungmoq gi, Garai Gasâng é chyitdap myit má, yhumsíng gùng yhumsíng nyi nyi keq.

²² Lumjíng hkyô má úng-âng é bang lé, shogyo nhikmyín nyi keq;

²³ góbang lé gi, myi mai she htoq yû mù, hkyi yù keq; dum, góbang lé gi, sidiq myit èq shogyo nhikmyin hkyô tûn shit mù, haú gungshô é achag achyut dap é yhangmoq é mebu lé chaq nyi keq.

Hkya-on Kungtôn Dang

²⁴⁻²⁵ Nungmoq lé, a lingbat shoq wó upzúng lúi, nungmoq lé, mara hún râ hkyô a bo é za, gabú dik é đông mai Yhang é hpungwup shing kang bo é myoq hí má wó shuí shit é, nga-nhông é

hkyi yù Sû, rayuq za nghut é Garai Gasâng chyáng, hpungwup shing kang, hkikhkam hkyô, hpungwup a-tsam eq ahkáng ayá gi, nga-nhông é Yhumsíng Yesuq Hkrisduq đông mai, lai lò bê ipyat pé má le, ahkuí pyat má le, pyat dedu ahtum abyuq má le, rujoq nyi sháng gaq ô! Amen.

YOHAN É SHING-RÁN Laiká (Revelation)

Dang-hi Hpóng

1 Yesuq Hkrisduq é shing-rán shí gi, adê myáng má dut lò râ hkyô pé lé, Yhâng é dui-nhâng zoshâng wui lé tân shit nhâng râ matú, Garai Gasâng eq Yesuq Hkrisduq Yhang lé byí tô é nghut lhê. Yhang gi, Yhâng é maumang lagyo lé nhang kat luí, Yhâng é dui-nhâng zoshâng Yohan lé, shing-rán haú sé nhang ri.

2 Yohan gi, Garai Gasâng é mungdang eq Yesuq Hkrisduq é saksé lé, yhang myang é gû banshoq eq rajung za saksé hkâm kyô é nghut ri.

3 Haú ahkyíng gi, chyâng lò bê nghut é yanmai, myiqhtoi dang shí pé lé, nghap kyô é sù eq, gyô yù luí, haú má kâ tô é gû lé châng kut é bang gi, hkungsô wó nyi akò.

Noqkuq Hpúng Nyhit Lhum Lé Dang Kyô Kat É Hkyô

4 Ngò Yohan gi, Asia mau mâ é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rú nyi nyi é Su chyáng mai le, Yhâng é hkohkâm-tanghkuq hí mâ é nyhit woi-nyí chyáng mai le,

5 lhumzuí é saksé nghut sù, shi byuq é mai sâng-hi dui toq é zomún dut sù, myidàm htoq mâ é hkohkam pé lé up sù, Yesuq Hkrisduq chyáng mai le, jeju eq nguingón hkyô gi, nungmoq chyáng joq nyí sháng gaq.

Nga-nhúng lé chyitdap luí, Yhâng é suí eq, nga-nhúng lé, nga-nhúng é mara pé mai lhoq lhut byí é eq,

6 Yhâng é Garai Gasang eq Íwa lé dojaú râ matú, nga-nhúng lé, mingdán byu pé eq hkyangiông pé* dut nhang é Su chyáng, duqwup shingkang eq hpungwup a-tsam gi, pyat dedu ahtum abyuq ru joq nyí sháng gaq ô! Amen.

7 Wú keq, Yhang gi, mhut mai lé lo nyi é nghut luí, myoqjí hkanmó gi, Yhang lé myàng kó râ nghut lhê;

haú Yhang lé htaú rot bang† lháng, myàng kó râ nghut lhê;

haú myidàm htoq mâ é byù lunglhang bang gi, Yhâng é yanmai, yón ngau é hui zo kó râ nghut lhê.

Haú đông nghut sháng gaq! Amen.

8 "Ngò gi, Alhpa eq Omega‡ nghut lhê. Ahkui pyat le, a-nham pyat le, htang pyat má le rú nyi nyi é, wum-o a-tsam dik shoq bò Sù nghut lhê." ga,

* 1:6 Htoq Ló 19:6 † 1:7 Htaurot bang gâ é gi, Yesuq tapzìng má jén to huí é hkún, Yhâng é namcham má lham eq htaú é bang lé gâ lhê. ‡ 1:8 Alhpa eq Omega gi, Grik laiká myhí mâ é sâng-hí cham eq ló htàng cham nghut lhê; haú taí nau é gi, rú dui nyi sù gâ é nghut lhê.

haû Yhumsîng Garai Gasang taî ri.

Byu Yhangzo Su Dut Su É Hkyô

⁹ Yesuq é, wuîhke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksê é yanmai, Patmo zinlóng má nyi nyi é nghut lhê.

¹⁰ Haû Yhumsing é Buinyi§ má, ngò gi, Woi-nyí eq shuí moq byuq ló é nghut mù, "Nàng myang é eq rajung za, chyúmding ralhú má ká luí, Ehpesu, Samurna, Pergamu, Htuatira, Sardi, Hpiladehpi eq Ladoki wà pé má joq é,

¹¹ noqkuq hpúng nyhit lhúm chyáng hun kat aq." ga, tut htê su gâ é htê mó, ngá é nunghtáng má mying é lé, ngò wó gyô ri.

¹² Haû ngo lé nyo nyi é htê yhumsîng lé wú râ matú, ngò, gùng lhing kat é nghut lhê. Ngò gi, gùng lhing kat é hkún, hîng myi-kok tsungjang nyhit lhum lé le,

¹³ myi-kok tsungjang haú pé é agùng má, byu yhangzo su dut é Sû rayuq nyi tô é lé le, myang kat ri; haú yuq gi, hkyigoq htoq jé é buhîng wut to luí, wànggàng má hîng wànggò le wut tô ri.

¹⁴ Yhâng é ulhum eq xâm gi, sau hpyû maú eq gyo su hpyu zan tô ri; Yhâng é myoqji gi, myishâm su duq nyi ri.

¹⁵ Yhâng é hkyî gi, myi bungghkyûng má jên yu é jet é gyi su dut ri; Yhâng é htê gi, wuì myo myo mying hûm é htê su gâ ri.

¹⁶ Yhâng é loqyo loq má gi, kyî nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyí gûng buì su tso nyi ri.

¹⁷ Yhang lé myang é hkún, ngò gi, shí gùng su, Yhâng é hkyî wang má lêng leq tô é nghut lhê. Haú hkún, Yhang gi, Yhâng é loqyo loq ngá ahtoq má ke byi mù, taî é gi, "Hkâgyuq, Ngò gi, Sâng-hi eq Jihâm nghut lhê.

¹⁸ Ngò gi, dui nyi Sû le nghut lhê; Ngò gi, shí bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shí hkyô eq momîng é zoqshi pé lé chûng Su nghut lhê.

¹⁹ Haû mù, nàng myang é lé le, ahkuì dut é hkyô eq htàngnùng le dut lò râ hkyô lé le, kâ to aq.

²⁰ Nàng myang é, Ngá é loqyo loq mâ é kyî nyhit cham eq hîng myi-kok tsungjang nyhit lhúm é zaú tô é hkyo é lichyúm gi, isu nghut lhê. Kyî nyhit cham gi, noqkuq hpúng nyhit lhúm é maumang lagyo nyhit yuq nghut ri; myi-kok tsungjang nyhit lhum gi, noqkuq hpúng nyhit lhum nghut ri.

2

§ 1:10 Yhumsing é Buinyi gâ é gi, yuban nyí lé gâ lhê.

*Ehpesu Myuq Mã É No-
qkuq Hpúng Lé Kâ Kat É Laiká*

¹ Ehpesu myuq mã é noqkuq hpúng é maumang lagyo lé isu nghû kâ kat aq:

Haû yhâng é loqyo loq má kyí nyhit cham chûng luí, hîng myi-kok tsungjang nyhit lhûm é gyoro má sô nyí Su é dang gi,

² 'Ngò gi, náng é a-kyang, nàng shikut é hkyô, nàng hkam jân é hkyô pé lé, sê lhê. Agè ashop é byu pé lé, nàng a jân pyâm é hkyô lé le, haû lagyo a nghut kôlhang, lagyo pé nghut lhê gâ é bang lé, nàng chyam wú mù, yhangmoq lagyo apyoq pé nghut é lé wó sê yù kô é hkyô lé le, Ngò sê lhê.

³ Nàng gi, shikut shirâng bê nghut é htoq agó, Ngá my-ing é yanmai, wuîhke hkyô lé hkam jan bê nghut kôle, nú byuq é hkyô a bò nghut ri.

⁴ Nghut kôlhang, nàng gi, náng é sâng-hi lhê é chyít-dap myit lé tô pyâm é yanmai, ngò, nang lé mara hûn râ hkyô joq ri.

⁵ Nàng hká mai byit gyó é lé, myit bun aq! Myit lîng luí, sâng-hi nàng kut é muzó pé lé, kut aq. Nàng myit a lîng é nghut jáng, ngò, náng chyáng lé jé mù, náng é myi-kok tsungjang lé, hau é jowò mai huí pyâm byi râ nghut lhê.

⁶ Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, náng chyáng ge é hkyô

ralhum bo ashî nghut ri.

⁷ Gyo râ nohkyap dap sù gi, haû Woi-nyí mai no-
qkuq hpúng pé lé taí é hkyô lé, gyô yù sháng gaq. Wó ung é sù lé gi, haû Garai Gasâng é hparadisu má joq é asak sigâm mã é ashi zo râ ahkáng, Ngò byi râ nghut lhê.' gâ ri.

*Samurna Myuq Mã É No-
qkuq Hpúng Lé Kâ Kat É Laiká*

⁸ Samurna myuq mã é noqkuq hpúng é maumang lagyo lé isu nghû kâ kat aq:

Haû Sâng-hi eq Jihtûm nghut é eq, shi byuq luí, asak dum dui Su é dang gi,

⁹ 'Nàng hui zô é wuîhke jamjau hkyô eq nàng myung é hkyô lé, Ngò sê lhê; nghut kôlhang, nàng gi, wó sù nghut ri! Tsadán é tarajong bang nghut to luí, Yudaq byu pé a nghut kôlhang, Yudaq byù nghut lhê gâ é bang taí hpoí é hkyô lé le, Ngò sê lhê.

¹⁰ Nàng hui zo râ nghut é wuîhke hkyô lé, hkâgyuq. Ngò, nungmoq lé taí kyo kôlé, haû nat Tsadán gi, nungmoq lé chyam wú é dông, nungmoq chyáng mã é ra-am lé, htóng má hkyô pyám râ nghut lhê; hau htâng, nungmoq gi, raxê nyí tup zing-rî é hui zo kó râ nghut lhê. Shí shoq lhumzui nyí aq, haú hkûn, Ngò, nang lé, asak janmaú byi râ nghut lhê.

¹¹ Gyo râ nohkyap dap sù gi, haû Woi-nyí mai no-
qkuq hpúng pé lé taí é hkyô

* 2:11 Í dâm nghû râ shi é hkyô gâ é gi, ngaraí ming wang é lé gâ lhê.

lé, gyô yù sháng gaq. Í dâm
nghû râ shi é hkyô* gi, wó
ung é sù lé, wó záng htung
râ a nghut.' gâ ri.

*Pergamu Myuq Mâ É No-
qkuq Hpúng Lé Kâ Kat É Laiká*

¹² Pergamu myuq mâ é
noqkuq hpông é maumang
lagyo lé isu nghû kâ kat aq:

Haû shamsó í shut dap é
shâm wó Su é dang gi,

¹³ 'Nàng nyi é jowò lé,
Ngò sê lhê; haû gi, Tsadán é
hkohkâm-tanghkuq joq é jang
nghut ri. Nghut kôlhang, nàng
gi, Ngá myîng má lumhkau
nyi é nghut luî, Tsadán nyi
é jang nghut é nungmoq é
myuq má, Ngá é lhumzui
é saksé hpó Antipa sat huî
é hkûn lhang, nàng Ngo lé
lumjîng é hkyô lé, a he-ngik
pyám nghut ri.

¹⁴ Nghut kôlhang, Ngò,
nang lé mara hûn râ hkyô
ratsuí joq ashî; hkâsu mù
gâ le, hparà lhô pé lé tîng
byî é zoshuq zô é eq, ashop
é đông gungsho zùm yap
é mara kut shut râ matú,
Israelaq byu pé lé mhoq
hpyoq râ hpaqchyî, Balak
lé mhoq byî é Balam é
mhoqshit hkyô lé myhik
zing é byu pé, náng chyáng
nyi ri.

¹⁵ Haû eq rajung za, haû
Nikola é chángzô pé mhoqshit
é hkyô lé myhik zing é byu pé
le, náng chyáng nyi ri.

¹⁶ Haû mù luî, myit lêng
aq! Haû a nghut jáng, Ngò gi,
náng chyáng hân jé lé mù, haû
Ngá nhut mai htoq é sham

eq yhangmoq lé zan râ nghut
lhê.

¹⁷ Gyo râ nohkyap dap
sù gi, haû Woi-nyí mai no-
qkuq hpông pé lé taí é hkyô
lé, gyô yù sháng gaq. Wó
ung é sù lé gi, haq tô é
mannaq muk lé le, myîng
asik kâ tô é luqgok hpyû
racham lé le, Ngò byî râ
nghut lhê, lhom hap yu é sù
za sheq, myîng haû lé sé râ
nghut lhê.' gâ ri.

*Htuatira Myuq Mâ É No-
qkuq Hpúng Lé Kâ Kat É Laiká*

¹⁸ Htuatira myuq mâ é
noqkuq hpông é maumang
lagyo lé isu nghû kâ kat aq:

Haû myishâm su duq nyi
é myoqjî eq jet é gyi su dut é
hkyî dap é Sù, Garai Gasâng
é Yhangzô é dang gi,

¹⁹ 'Nàng é a-kyang, chyit-
dap myit, lumjîng myit, dojaú
é hkyô, hkam jân é hkyô pé
lé le, nàng gi, hí lhê htoq má
ahkuî je myô zui saí é hkyô lé
le, Ngò sê lhê.

²⁰ Nghut kôlhang, yhum-
sing gùng yhumsîng my-
iqhtoî myhí nghut lhê gâ é
myiwe Yezebulaq lé, nàng
nyi nhang tô é yanmai,
Ngò, nang lé mara hûn râ
hkyô joq ri. Yhang gi, Ngá é
dui-nhâng zoshâng wui lé,
ashop é đông gungsho zùm
yap râ eq hparà lhô pé lé
tîng byî é zoshuq zo râ hkyô
lé mhoqshit luî, yhangmoq
lé hkyô shuí nghoq ri.

²¹ Ngò gi, yhang lé, ashop
é đông gungsho zùm yap
é hkyô mai myit lêng râ

ahkyíng byi kôlhang, yhang gi, a myit lhíng naù nghut ri.

²² Haù mù, Ngò gi, yhang lé, jamjau hui râ yhupchong má dú lheq pyám râ nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lhíng kô é za a nghut jáng, wuìhke jamjau mó hui zo nhâng râ nghut lhê.

²³ Ngò gi, yhang zô pé lé sat pyám râ nghut lhê; haù hkún, Ngò gi, myit nhikhum eq myit é hkyô lé sé Sù nghut é lé le, nungmoq kut é muzó eq rajung za, nungmoq yuq hkangmó lé, Ngò tau byi râ nghut é lé le, haù noqkuq hpûng pé banshoq wó sé kó râ nghut lhê.

²⁴ Mhoqshit hkyô haù lé a châng é eq Tsadán é nik é hkyô lhaq gâ é lé a mhoq yu é, Htuatira myuq má myit gyó tô é bang nungmoq lé, Ngò tái kôlé, nungmoq lé gotû wòlai Ngò jat byi râ a nghut.

²⁵ Ngò jé lé é jé shoq, nungmoq wó tô é lé za myhik zing nyi keq.

²⁶⁻²⁷ Wó ung é eq Ngò ô nau é hkyô lé jìhtùm jé shoq châng é sù lé gi,

"Yhang gi, yhangmoq lé, shamtoq dumbáng èq up† râ nghut lhê;

Yhang gi, tso-au hkoq pé lé su, yhangmoq lé bat hkyop pyám râ nghut lhê."[☆]

gâ tô é eq rajung za, Ngò, Ngá Wâ chyáng mai

ahko ahkáng wó yu é su, mingdán pé lé up râ ahko ahkáng, Ngò byi râ nghut lhê.

²⁸ Ngò gi, yhang lé, haù bó-myhù byi râ nghut lhê.

²⁹ Gyo râ nohkyap dap sù gi, haù Woi-nyí mai noqkuq hpûng pé lé tái é hkyô lé, gyô yù sháng gaq.' gâ ri.

3

Sardi Myuq Mâ É Noqkuq Hpûng Lé Kâ Kat É Laiká

¹ Sardi myuq mâ é noqkuq hpûng é maumang lagyo lé isu nghù kâ kat aq:

Haù Garai Gasâng é woi-nyí nyhit woi-nyí eq kyí nyhit cham lé chùng Su é dang gi, 'Ngò gi, náng é a-kyang lé sê lhê; nàng gi, asak dui nyi sù ga kôlhang, shi byuq sù nghut ri.

² Gyíng lò aq! Myit gyó tô é, shi byuq râ za nghut é pé lé, wum-o lhoq kîng yù aq; hkâsu mù gâ le, Ngá é Garai Gasâng é hí má, náng é a-kyang a gumjup é hkyô lé, Ngò myang ri.

³ Haù mù, nàng hkâsu kut wó hap yu é eq wó gyô yu é hkyô lé, myit bun aq; haù dông cháng luí, myit lhíng aq. Nàng a bûn gyíng é nghut le gi, Ngò hkau sù su lé râ nghut luí, nàng gi, Ngò hká u lé râ lé, sé râ a nghut.

⁴ Nghut kôlhang, Sardi myuq má, yhumsing é mebu lé agot a-û a kut é byù ra-am nyi akô. Haù

† 2:26-27 Shamtoq dumbáng èq up gâ é gi, ahko ahkáng banshoq wó luí, up é lé gâ lhê. ☆ 2:26-27 Hkyá-on 2:9

bang gi, hpyu é mebu wut luí, Ngò eq rahá sô wún kó râ nghut lhê; hkâsu mù gâ le, yhangmoq gi, gingdán é bang nghut akô.

⁵ Wó ung é sù gi, haú bang su, hpyu é mebu myang wut râ nghut lhê. Ngò gi, haú yuq é myìng lé, hkâ-nhám le, asak jihpán laiká buk mai yu pyám râ a nghut; hau htoq agó, Ngá Wâ é hí má le, Yhâng é maumang lagyô pê é hí má le, haú yuq é myìng lé, Ngò yín yú râ nghut lhê.

⁶ Gyo râ nohkyap dap sù gi, haú Woi-nyí mai noqkuq hpûng pé lé tai é hkyô lé, gyô yù sháng gaq.' gâ ri.

Hpiladehpi Myuq Mâ É Noqkuq Hpúng Lé Kâ Kat É Laiká
⁷ Hpiladehpi myuq mâ é noqkuq hpûng é maumang lagyo lé isu nghû kâ kat aq:

Haú chyoiyúng é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpóng loshoq myhî é Su é dang gi,

⁸ Nang kut é muzó pé lé, Ngò sê lhê. Wú aq, ó yuq le a wó myhî é hkum ralhum, Ngò náng hí má hpông to byí lhê. Nang gi, wum-o ratsuí za bò kôlhang, Ngá é dang gyo luí, Ngá é myìng lé a he-ngik pyâm é hkyô lé, Ngò sê lhê.

⁹ Haú tarajong má noqkuq kôlhang, Tsadán lé dojaú bang nghut é, Yudaq byù a nghut kôlhang, nghut lhê gâ é byù mhaú pé lé, Ngò, náng

é hkyô wang má, lé paí gop nhâng luí, Ngò, nàng lé chyit-dap é hkyô, yhangmoq lé sê nhâng râ nghut lhê.

¹⁰ Nang gi, myit hîng hîng hkam jan râ é Ngá é hkunmó lé châng nyi bê nghut é yan-mai, myidàm htoq má nyi é bang lé chyam lik wú râ matú, mingkan gón má jé râ nghut é wuîhke jamjau ahkyíng mai, Ngò, nang lé lhoq lhut yú râ nghut lhê.

¹¹ Ngò gi, a myáng má jé lé lô râ nghut lhê. Náng é janmaú lé, ó yuq eq le a wó yu pyám byi sháng gaq, nàng wó tô é pé lé myhik zing nyi aq.

¹² Wó ung é sù lé gi, Ngá é Garai Gasâng é noqkuq yhùm mâ é hkungzing mó dut nhâng râ nghut lhê. Haú yuq gi, hkâ-nhám le haú mai dum htoq ló râ a nghut. Ngò gi, Ngá é Garai Gasâng é myìng lé le, Ngá é Garai Gasâng chyáng mai htoq luí, mauhkûng mai gyó lé lo é, Yerusalem wà mó Asik ga é, Ngá é Garai Gasâng é myuq myìng lé le, Ngá é myìng sik lé le, yhâng chyáng kâ tap byi râ nghut lhê.

¹³ Gyo râ nohkyap dap sù gi, haú Woi-nyí mai noqkuq hpûng pé lé tai é hkyô lé, gyô yù sháng gaq.' gâ ri.

Ladoki Myuq Mâ É Noqkuq Hpúng Lé Kâ Kat É Laiká

¹⁴ Ladoki wà mó mâ é noqkuq hpûng é maumang lagyo lé isu nghû kâ kat aq:

Haú lhumzuí é eq tengmán é saksé nghut é,

Garai Gasang hpan tô é lé
up é, Amen gá Su é dang gi,

15 'Ngò gi, nàng kut é
muzó lé sê lhê; nàng gi, gú le
a nghut, nye le a nghut dut ri.
Nàng gi, gú jáng jáng gú, nye
jáng jáng nye dut râ lé, Ngò ô
nau ri.

16 Nghut kôlhang, nàng gi,
gú le a nghut, nye lé a nghut,
lumnye nghut é yanmai, Ngò
gi, nang lé, Ngá é nhut mai
byé htoq pyám râ za nghut bê.

17 "Ngò gi, wó sù nghut
lhê; ngò gi, sutzè gyai wó bê
nghut luí, haí lhang a ra lo."
ga nàng taí ri. Nghut kôlhang,
nàng gi, wuîhke jamjau hui sù,
asho awui dut sù, myùng sù,
myoqjit sù eq achîn dut sù
nghut é lé, nàng a sé myhi-
nhung.

18 Haú mù luí, nàng gi,
wó sù sùt sù wó dut sháng
gaq, myi má jên yu é hîng
lé le, nàng achîn dut é hoq
hpu hkyô lé, wó nghop pyám
sháng gaq, wut râ matú,
mebu hpyú lé le, nàng myoq
wó myâng sháng gaq, náng é
myoqjí má kat râ matú, myoq
chí lé le, nàng, Ngá chyáng
mai wui yù râ matú, Ngò,
nang lé hpaqchyí byí lhê.

19 Ngò chyitdap é bang
lé gi, tan luí, mhoqshit lhê.
Haú mù, nàng gi, hân bûn
gying luí, myit lîng aq.

20 Wú aq! Ngò gi, hkum
yâm má yap to luí, hkum lé
kok nyi lhê. Rayuq yuq, Ngá é
htê lé wó gyo luí, hkum hpóng
byí é nghut jáng, Ngò gi, wàng
mù, haú yuq eq rahá zo shuq
râ nghut lhê; haú yuq le, Ngò

eq rahá zo shuq râ nghut lhê.

21 Ngò gi, ûng luí, Ngá Wa
eq rahá Yhâng é hkohkâm-
tanghkuq má zung é eq
rajung za, wó ung é sù
lé gi, Ngò eq rahá Ngá é
hkohkâm-tanghkuq má zùng
râ ahkáng, Ngò byi râ nghut
lhê.

22 Gyo râ nohkyap dap é
sù gi, haú Woi-nyí mai no-
qkuq hpûng pé lé taí é hkyô lé,
gyô yù sháng gaq.' gâ é nghut
ri." gâ ri.

4

*Mauhkûng Htoq Má
Hkohkâm-tanghkuq Joq É Hkyô*

1 Hau htâng má, ngò wú kat
le, mauhkûng má hkum ral-
hum bóng tô é lé myang ri.
Ngò sângh-lî dàm wó gyô é tut
htê su gâ é danghtê ngo lé
taí é gi, "Shî má doq lò aq,
htângnùng má dut lò râ hkyô
pé lé, Ngò, nang lé tûn shit
bá." gâ ri.

2 Haú hkûn jáng yhang, ngò
gi, Woi-nyí má moq byuq
ló luí, mauhkûng htoq má
hkohkâm-tanghkuq ralhum
joq é lé myàng ri; tanghkuq
haú má, byù rayuq zung tô ri.

3 Haú má zung to Su é isâm
gi, huhpé eq ne yúng lungsêng
su dut ri. Huí nyuì lungsêng
su dut é woqgan síng-yang
gi, haú hkohkâm-tanghkuq má
hkông lîng tô ri.

4 Hkohkâm-tanghkuq hau
é lînghkyuq má, hkohkâm-
tanghkuq gotú í xe myí lhum
le joq to luí, hpyu é mebu wut
mù, ulhum má hîng janmaú

tsûng tô é suwún í xe myi yuq gi, haú má zung tô bum akô.

⁵ Haú hkohkâm-tanghkuq mai, lhap hpyat é, mying hûm é eq maugum gûm é pé dut htoq lo ri. Haú hkohkâm-tanghkuq hí má, myi-kok nyhit lhum le duq tô ri; haú pé gi, Garai Gasâng é woi-nyí nyhit woi-nyí nghut ri.

⁶ Hau htoq agó, san zâ é myoqjâm su dut mâ é wuì-nhông le, haú hkohkâm-tanghkuq hí má dîng tô ri.

Haú hkohkâm-tanghkuq agùng má le, lînghkyuq má le, hî-u nunghtáng lînghkyuq myoqjí dap é dui é dusak myî du nyi tô ri.

⁷ Dui é dusak sâng-hî du gi, hkanghkyi su dut ri; í du nghû râ du gi, nohtó su dut ri; sûm du nghû râ dû é myoqdong gi, byu myoqdong su dut ri; myî du nghû râ du gi, dâng wún é zunbung su dut ri.

⁸ Dui é dusak myî du haú gi, du hkangmó dùng hkyuq lhum lhum dap é htoq agó, lînghkyuq má myoqjí kôm dap luí, dùng hkaú má lhang dap ri. Yhangmoq, nyí myín hkâ-nhám a no loshoq taí nyi kô é gi,

"A-nham pyat le, ahkuí pyat le, htang pyat má le, rû nyi nyi é, haú wum-o a-tsam dik shoq bò Sû Yhumsîng Garai Gasang gi,

chyoiyúng, chyoiyúng, chyoiyúng nyi ri."

gâ akô.

⁹ Haú dui é dusak myî du gi, hkohkâm-tanghkuq má zung

é, pyat dedu ahtum abyuq dui nyi Su chyáng, hpungwup shing kang, aróng eq jeju bun hkyô byí é hkangmó,

¹⁰ haú suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luí, Yhang lé noqkuq akô. Yhangmoq gi, yhangmoq é hkohkâm-janmaú lé, haú hkohkâm-tanghkuq hí má hkyut to mù, taí kô é gi,

¹¹ "Ngamoq é Yhumsîng eq Garai Gasang é, nyi mi-nyí, joq mijoq lé, Nang hpan to bê nghut luí,

haú pé gi, Nang ô nau é dông hpan tô é hui bê nghut mù, nyi to joq tô bùm bê nghut é yanmai,

Nang gi, hpungwup shing kang, aróng eq hpungwup a-tsam lé, hap yù gíng Sû nghut ri."

gâ akô.

5

Chyúmding Eq Sauzo

¹ Hau htâng, ngò gi, hkohkâm-tanghkuq má zung to Su é loqyo loq má, í shut é laiká kâ to é, dizik nyhit lhum tap tô é chyúmding le myang ri.

² Hau htoq agó, a-tsam mó bo é maumang lagyo rayuq gi, "Haú dizik pé lé hî pyám râ eq chyúmding lé hpóng râ gi, ó yuq wá gíngdán lhê lhu?" ga luí, htê mó eq wut taí nyi é lé le, ngò myang ri.

³ Nghut kôlhang, mauhkûng htoq má le, myigùng htoq má le, myigùng ô má le, haú

chyúmding lé wó hpóng rā
eq ahkaû má wó wú rā byu
rayuq lháng a nyi nghut ri.

⁴ Haû chyúmding lé hpóng
mù, ahkaû má wú rā gingdán
é byù rayuq hkâlháng a nyi é
yanmai, ngò gyai yhang ngau
pyâm é nghut lê.

⁵ Haû hkûn, haû suwún wui
mâ é rayuq, ngo lé taî é gi,
"Hkâ-ngaû! Wú aq, haû Yu-
daq byuhú mâ é Hkanghkyi
nghu é, haû Dawiq é Amyit
nghut Sû gi, ûng bê nghut luî,
haû chyúmding eq haû mâ é
dizik nyhit lhum lé wó hpông
lê." gâ ri.

⁶ Hau htâng, haû dui é
dusak myî du eq suwún wui
é agùng mâ é, hkohkâm-
tanghkuq agùng má, sat hui
bê su dut é Sauzo radu yap
tô é lé, ngò myang ri. Sauzo
haû gi, hkyuî nyhit lhum eq
myoqjí nyhit lhum dap ri.
Myoqjí haû nyhit lhum gi,
myidàm htoq gón má nhang
htoq kat é, Garai Gasâng é
woi-nyí nyhit woi-nyí nghut
ri.

⁷ Haû Sauzo gi, lé mù,
hkohkâm-tanghkuq má zung
to Su é loqyò mâ é chyúmding
lé yu ri.

⁸ Haû chyúmding lé yu é
hkûn jáng, haû dui é dusak
myî du eq suwún í xe myi
yuq gi, Sauzô é hí má ngóm
gop akô. Yhangmoq yuq
hakangmó gi, tíng eq sân-yúng
bâng é kyûdung dang gâ é
namgón jung byíng mui tô é
hîng góm pé le chung bum akô
nghut ri.

⁹ Yhangmoq gi,

"Nàng gi, haû chyúmding lé
yù rā eq hau é dizik pé
lé hpóng rā gingdán Sû
nghut ri.

Haî mù gâ le, Nàng gi, sat
hui bê nghut luî,
byuhú hkangmó mai
le, myíng hkangmó
mai le,
byù myû hkangmó mai
le, mingdán hkangmó
mai le, Garai Gasâng é
matú,

Náng é suî èq byù pé lé
wui hpyit yû bê nghut
ri.

¹⁰ Nga-nhùng é Garai Gasang
lé dojaú rā matú,
Nàng gi, yhangmoq
lé, mingdán byu pé
eq hkyangjông pé dut
nhâng bê nghut luî,
yhangmoq gi, myidàm
htoq má up kó rā nghut
lê."

ga luî, mahkôn sik ralhum
hkon akô nghut ri.

¹¹ Haû hkûn, ngò wú kat
le, haû hkohkâm-tanghkuq
lînghkyuq má le, dui é dusak
pé eq suwún wui é lînghkyuq
má le, nyi tô bum é maumang
lagyo ajùm ayò mun mun sen
sên é htê lé wó gyô ri.

¹² Yhangmoq gi,

"Haû sat hui bê Sauzo gi,
hpungwup a-tsam,
sutzè, hpaqchyî byéng-
yá, wum-o, aróng
sitang,

hpungwup shingkang eq
hkya-on kungtôn hkyô
lé, hap yù gíng ri."

ga luî, htê mó èq ton bum akô
nghut ri.

13 Hau htoq agó, mauhkûng
 htoq má nyi é, myigùng htoq
 má nyi é, myigùng ô má nyi
 é, wuiming má nyi é, hpan to
 huí é lhungháng gi,
 "Hkya-on kungtôn hkyô,
 aróng sitang, hpung-
 wup shingkang eq
 hpungwup a-tsam gi,
 haû hkohkâm-tanghkuq má
 zung tô é Sû eq Sauzô
 chyáng,
 pyat dedu ahtum abyuq
 ru joq nyi sháng gaq ô!"
 ga luí, ton nyi bùm kô é lé, ngò
 wó gyô ri.

14 Haû dui é dusak myi du
 gi, "Amen" ga taí jang, haû
 suwún wuí gi, ngóm gop luí
 noqkuq akô nghut ri.

6

Dizik Nyhit Lhûm É Hkyô

1 Haû Sauzo gi, dizik nyhit
 lhum má é sâng-hí lhum lé
 hpông kat é hkûn, ngò myang
 é nghut lhê. Hau htâng, haû
 dui é dusak myi du má é radu
 gi, maugum su gâ é htê mó èq,
 "Lé aq." gâ é lé, ngò wó gyô ri.

2 Ngò wú kat é hkûn, ngá
 é myoq hí má myang hpyû
 radu nyi tô é lé myang ri! Haû
 má jî to sù gi, lai rahpu chung
 tô é htoq agó, yhang lé, jan-
 maú ralhum tsung to byí luí,
 ûng budang wó râ matú ûng
 sù rayuq dông htoq ló ri.

3 Haû Sauzo gi, í lhum nghû
 râ dizik lé hpông kat é hkûn,
 haû í du nghû râ dui é dusak
 gi, "Lé aq." ga taí é lé, ngò wó
 gyô ri.

4 Hau htâng, myang nè radu
 htoq lo ri; haû má jî tô é sù

gi, myidàm htoq mâ é ngu-
 ingón simsaq hkyô lé wup yù
 râ eq, byù yhangchang rayuq
 eq rayuq sat lhum nhâng râ
 a-tsam byí é hui sù nghut luí,
 yhang lé shâm mó rahkyam le
 byí to bê nghut ri.

5 Haû Sauzo gi, sùm lhum
 nghû râ dizik lé hpông kat é
 hkûn, haû sùm du nghû râ dui
 é dusak gi, "Lé aq." ga taí é lé,
 ngò wó gyô ri. Ngò wú kat le,
 myang noq radu ngá myoq hí
 má nyi tô é lé myang ri! Haû
 má jî tô é sù gi, yhâng é loq má
 jàng rahpu chung to ri.

6 Haû hkûn, "Ra-nyí é zuih-
 pau gi, sungsô rabyé, ra-nyí é
 zuihpau gi, muk-yo guq sum
 byé nghut lhê; haû tsanlun
 xù eq tsibiyiq wing lé kúm gi,
 hkâlhoq hten kó." gâ é htê,
 haû dui é dusak myi du hkaû
 mai htoq ló é su gâ é lé, ngò
 wó gyô ri.

7 Haû Sauzo gi, myi lhum
 nghû râ dizik lé hpông kat é
 hkûn, haû myi du nghû râ dui
 é dusak gi, "Lé aq." ga taí é lé,
 ngò wó gyô ri.

8 Ngò wú kat é hkûn, ngá é
 myoq hí má, myang muí radu
 nyi tô é lé myang ri! Haû má
 jî to su é mying gi, Shí hkyô gâ
 ri; Moming le, yhâng é htâng
 má châng tô ri; yhangnhik
 gi, sham èq, mutmó gyó é èq,
 wúm gyó é èq, tân é yosô-ze
 èq, myidàm htoq myi tú má
 é ratú má nyi é bang lé sat
 pyám râ ahkáng wó yu to bekô
 nghut ri.

9 Sauzo gi, ngo lhum nghû
 râ dizik lé hpông kat é hkûn,
 Garai Gasâng é mungdâng é

yanmai le, yhumsîng hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri.

¹⁰ Yhangmoq gi, "Chy-oiyúng é eq tengmán é, ahko ahkáng lhunglhang wó é Yhumsîng ê, myidàm htoq má nyi é byu pé lé, ngamoq é sui manglat dam a byi é eq tarâ a jéyáng é za, hkâ-myháng jé shoq nyi nyi râ lhú?" ga, htê mó eq garu bum akô.

¹¹ Haú hkûn, yhangmoq yuq hkangmó gi, bu hpyû hîng radung dung hut é hui luí, yhangmoq su sat hui râ bang, yhangmoq é byinzùm dui-nhâng zoshâng wui nghut é gumang wui sat huí ngap é hkûn jé shoq, razup zim za nyi shi keq ga taí é lé wó gyô akô nghut ri.

¹² Hkyuq lhum nghû râ dizik lé, Yhang hpông kat é hkûn, ngò myang ri; haú u lé, layàng mó le nún lo ri; haú bui gi, saumaú noq eq woq é pán su noq byuq ri; haú lhamó lhum gón gi, sui su ne byuq ri;

¹³ maihpáng gâm lé, lài mó eq lo mut nhûn kat é hkûn, a myhíng shi é maihpáng-shi yoq gyó é su, mauhkûng mâ é kyí pé gi, myidàm htoq má byit gyó lo bum ri.

¹⁴ Haú mauhkûng gi, laiká lé dîng lhûm é su htot pyâm é hui luí, bùm hkang bùm mó eq zinlóng lhumjup pé gi, yhâng é jowò mai huí pyâm é huí ri.

¹⁵ Haú hkûn, haú myidàm

htoq mâ é hkohkam pé, uphkâng bang, gyezaû pé, sut wó bang, wum-o a-tsam bò bang, jun pé eq luthkyô wó é lhunglhang bang gi, bùm dong pé eq bùm pé mâ é luqgok gyoro pé má haq tô bùm uchyang,

¹⁶ haú bùm pé eq luqgok pé lé, "Ngamoq é gùng htoq má gyó ke kó laq! Haú hkohkâm-tanghkuq má zung to Su é myoq hí mai le, haú Sauzô é nhikmo-yô é hkyô mai le, ngamoq lé haq pyám kó laq.

¹⁷ Hkâsu mù gâ le, haú Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi râ lhú?" ga garû taí bum akô nghut ri.

7

144,000 Yuq Masat Lhô Tap Hui Kô É Hkyô

¹ Hau htâng má, maumang lagyo myi yuq gi, maumyí myi chyûn má yap to mù, myigùng htoq má le, wui ming htoq má le, sîkgâm pé má le, lài a hik sháng gaq ga, myi shut mâ é lài lé zûi zing to kô é lé, ngò myang ri.

² Haú hkûn, haú dui nyi é Garai Gasâng é masat lô chung é maumang lagyo gotû rayuq gi, buihotoq hkyam mai htoq lé lo é lé, ngò dum myang ri. Yhang gi, haú myigùng eq wui ming lé lhoq hten râ ahkáng wó tô é mau-mang lagyo myi yuq haú lé,

³ "Nga-nhûng é Garai Gasâng dui-nhâng zoshâng wui é ngelang má, ngamoq

mai masat lhô a tap byi byi gi, haû myigùng, wui ming eq sikgâm pé lé hkâlhoq hten shi kó." ga htê mó èq wut taî kat ri.

⁴ Haû hkûn, masat lhô tap huî é bang byù hkâ-myhó yuq nghut é lé, ngò wó gyô ri. Israelaq byuhú banshoq mâ é 144,000 yuq nghut ri.

⁵ Masat lhô tap huî yu é, Yudaq up mâ é bang gi, 12,000 yuq,

Rubin up mâ é bang gi, 12,000 yuq,

Gat up mâ é bang gi, 12,000 yuq,

⁶ Ashe up mâ é bang gi, 12,000 yuq,

Nahtali up mâ é bang gi, 12,000 yuq,

Manase up mâ é bang gi, 12,000 yuq,

⁷ Simeon up mâ é bang gi, 12,000 yuq,

Lewiq up mâ é bang gi, 12,000 yuq,

Yishahka up mâ é bang gi, 12,000 yuq,

⁸ Zebulun up mâ é bang gi, 12,000 yuq,

Yosep up mâ é bang gi, 12,000 yuq,

Ben-yamyin up mâ é bang gi, 12,000 yuq,

nghut bum akô.

Bu Hpyû Hing Wut Bâng É Hkyô

⁹ Hau htâng, ngò wú kat é hkûn, mingdán hkangmó mai le, byuhú hkangmó mai le, byù myû hkangmó mai le, myíng chângjup mai le, lé é bang, ó yuq lháng a ung ng-hap é byù moq mó gi, haû hkohkâm-tanghkuq é hí má le,

Sauzô é hí má le, yap nyi bùm kô é lé myang ri; yhang-moq gi, bu hpyû hing wut luî, yhangmoq é loq má byùm-haq chung tô bùm kômù,

¹⁰ "Hkyi yù hkyô gi, haû hkohkâm-tanghkuq má zung tô é nga-nhông é Garai Gasang eq Sauzo chyáng mâ é nghut ri ô!"

ga luî, htê mó èq garû bum akô nghut ri.

¹¹ Haû maumang lagyo lunglhang bang gi, haû hkohkâm-tanghkuq é lhinghkyuq má le, suwún wui eq dui é dusak myi du é lhinghkyuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé noqkuq uchyang,

¹² "Amen! Hkya-on kungton hkyô eq hpungwup shing kang,

hpaqchyî byéng-yá eq jeju bun hkyô,

aróng, hpungwup a-tsam eq wum-o gi,

nga-nhông é Garai Gasang chyáng pyat dedu ahtum abyuq ru joq nyi sháng gaq ô!

Amen!"
ga taî bum akô.

¹³ Haû hkûn, suwún wui mâ é rayuq gi, "Shi bu hpyû hing wut é bang gi, ô pé lú? Yhangmoq gi, hkâmai lé é bang nghut akô lú?" ga ngo lé myi ri.

¹⁴ Ngò gi, "Suwún hpó è, nàng sê lhê." nghû tú taí jáng, yhang gi, "Shi bang gi, haû wuihke jamjau mó mai wó lut

htoq lô luí, yhangmoq é bu hîng lé, haú Sauzô é sui má chí hpyû yù bê bang nghut akô.

¹⁵ Haú mù, yhangmoq gi, Garai Gasâng é hkohkâm-tanghkuq hí má nyí mù, Yhâng é noqkuq yhûm má, nyí, myín Yhang lé dojaú nyí kô é nghut lhê; haú hkohkâm-tanghkuq má zùng Sû gi, Yhâng é jonghpang lé, yhangmoq é ahtoq má nghop byi râ* nghut lhê.

¹⁶ Yhangmoq gi, hkâ-nhám le, zòmút wuîshit hui râ a nghut lo; bui lhap é le, hkyíng hkyíng nyé é le, yhangmoq lé wó záng râ a nghut.

¹⁷ Hkâsu mù gâ le, haú hkohkâm-tanghkuq agùng mâ é Sauzo gi, yhangmoq é saurém sù dut râ nghut luí, Yhang gi, yhangmoq lé, asak wuîbúm jé shoq shuí ê râ nghut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi râ nghut lhê." ga tai ri.

8

Nyhit Lhum Nghû Râ Dizik Eq Namngón Jung Nyhê É Hîng Góm

¹ Haú Sauzo gi, nyhit lhum nghû râ dizik lé hpông kat é hkûn, mauhkûng htoq má hkyíng hkum rawuí kô zîm byuq ri.

² Haú hkûn, Garai Gasâng é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byí tô ri.

³ Namngón jung nyhê é hîng góm chung é maumang lagyo gotû rayuq gi, haú hkungga gyap yàm má lé yap tô ri. Haú hkohkâm-tanghkuq hí mâ é hîng hkungga gyap má, sân-yúng bang banshoq é kyûdung dang eq rahá nhông byi râ matú, namngón jung gyai myo shoq, yhang lé byí tô ri.

⁴ Haú namngón jûng é myihkau gi, sân-yúng bâng é kyûdung dangtê eq rahá, maumang lagyo haú yuq é loq mai Garai Gasâng chyáng hkyang rot ló bê nghut ri.

⁵ Hau htâng, maumang lagyo haú yuq gi, góm lé yù mù, hkungga gyap mâ é myi lhoq pyíng yù luí, myidàm htoq má dú hkyô kat é hkûn, maugum mó gûm é, mying hûm é, lhap hpyat é eq layàng nún é pé dut htoq lo ri.

Tut Mut É Hkyô

⁶ Hau htâng, tut nyhit lhum wó é maumang lagyo nyhit yuq gi, tut mut râ hen akô nghut ri.

⁷ Sâng-hî yuq nghû râ maumang lagyo gi, yhâng é tut lé mut kat ri; haú hkûn, sui nyó é likwò eq myi htoq lô mù, haú lé myidàm htoq má lhoq hkyô kat jáng, maumyî sum tú mâ é ratú eq sikgâm sum tú mâ é ratú nyé gyó byuq é htoq agó, wàhu mhanzo banshoq le nyé gyó byuq bê nghut ri.

⁸ Í yuq nghû râ maumang lagyo gi, yhâng é tut lé mut

* 7:15 Yhâng é jonghpang lé, yhangmoq é ahtoq má nghop byi râ, gâ é gi, yhangmoq eq rahá nyí mù, yhangmoq lé upzúng nyí râ gâ é nghut lhê.

kat ri; haú hkûn, myi dap tô é bùm mó su é lé, wuìshuq lung-aû má dú hkyô kat ri. Wuìshuq lung-aû sum tú mâ é ratú gi, sui dut byuq bê nghut ri;

⁹ wuìshuq lung-aû mâ é dui jung sum tú mâ é ratú gi, shi byuq luí, wuì-sanghpo pé sum tú mâ é ratú gi, htên byuq bê nghut ri.

¹⁰ Sum yuq nghû râ mau-mang lagyo gi, yhâng é tut lé mut kat ri; haú hkûn, myihu dùm su duq é kyî mó racham gi, mauhkûng mai byit gyó lô mù, wuìlàng sum tú mâ é ratú eq wuìbúm pê htoq má lo gyó zàng ri.

¹¹ Kyî hau é myìng gi, Kyî Kyî Hko gâ é nghut ri. Wuìlàng sum tú mâ é ratú hkô byuq luí, wuì haú hkô byuq é yanmai byù myo myo shi byuq bekô nghut ri.

¹² Myi yuq nghû râ mau-mang lagyo gi, yhâng é tut lé mut kat ri; haú hkûn, buì sum tú ratú, lhamó sum tú ratú, kyî sum tú ratú gi, hten luí, haú pê é sum tú ratú gi, mauchut byuq bê nghut ri. Hau htoq agó, nyí sum tú mâ é ratú le, myín sum tú mâ é ratú le, maubó a joq dut byuq ri.

¹³ Ngò wú nyi le, zunbung radu gi, maulat má dâng wún mù, "Gotû maumang lagyo sum yuq eq mut râ nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri." ga luí, htê mó eq garû taí ri.

9

¹ Ngo yuq nghû râ mau-mang lagyo gi, yhâng é tut mut kat é hkûn, mauhkûng mai myidàm htoq má byit gyó tô é kyî racham lé, ngò myang ri. Haú nik dik htûm é Lasang-dông é zoqshi gi, kyî haú lé byî tô ri.

² Kyî haú gi, nik dik htûm é Lasang-dong lé hpông kat é hkûn, myi bungkyûng mó mai htoq lo é myihkau dùm sù é myihkau gi, dong haú mai htoq lo ri. Nik dik htûm é Lasang-dong haú mâ é myihkau dum é yanmai, buì eq maulat gi, mauchut byuq bê nghut ri.

³ Myihkau dùm haú mai dinggâm pé htoq lô mù, myidàm htoq má gyó lé akô; myidàm htoq mâ é gogok é a-tsam sù é a-tsam le, yhangmoq lé byî to bê nghut ri.

⁴ Myidàm htoq mâ é wàhu pé lé le, mhan-haq hpoqnoq pé lé le, sikgâm pé lé le a lhoq htên é za, yhumsing é nge-lang má Garai Gasâng é masat lhô a dap é byu pé lé baú zing-ri râ matú, yhangmoq lé taí tô ri.

⁵ Nghut kôlhang, haú bang lé sat pyám râ ahkáng kúm gi, yhangmoq a wó e za, lhamó ngo hkyap tup haú bang lé zing-ri râ ahkáng za ru wó akô nghut ri. Haú bang hui zô é shî-nò jamjau gi, gogok eq pat hkûn no hpû é su yhang nghut ri.

⁶ Haú buinyì pé má, byu pé gi, shî hkyô hô kôlhang, myàng kó râ a nghut; shî nau

dik kôlhang, haû shî hkyô gi, yhangmoq chyáng mai hpang byuq râ nghut lê.

⁷ Dinggám haû pé gi, majan zan râ matú buí tô é myang pé su dut akô. Yhangmoq é ulhum má gi, hîng janmaú sù é tsûng tô é htoq agó, yhangmoq é myoqdong gi, byu myoqdong su dut bum akô nghut ri.

⁸ Yhangmoq é xâm gi, myiwe wui é xâm su dut luí, yhangmoq é zuí gi, hkanghkyi zuí su dut ri.

⁹ Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut din yán wang ló é myang jûm eq myanglhêng pé mying hûm é htê su gâ ri.

¹⁰ Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri râ a-tsam bo ri.

¹¹ Yhangmoq é hkohkâm gi, nik dik htúm é Lasang-dong mâ é maumang nghut ri; haû é mying gi, Hebre myíng dong Abadon ga, Grik myíng dông Apolion* gâ ri.

¹² Sâng-hî lhum dingnyé gi, laí ló byuq bê nghut ri; nghut kôlhang, dingnyé í lhum jé lô shirâ nghut lê.

¹³ Haû hkyuq yuq nghû râ maumang lagyo gi, yhâng é tut mut kat ri. Haû hkûn, Garai Gasâng é hí má joq é hîng hkungga gyap é hkyuî myí lhum mai htê htoq lo é gi,

¹⁴ "Uhprat wui mó lâng má tuí lhung tô é maumang myi yuq lé, nhang pyám aq." ga tut chung tô é hkyuq yuq nghû râ maumang lagyo lé taí é lé, ngò wó gyô ri.

¹⁵ Haû hkûn, xângzo byù sum tú mâ é ratú lé sat pyám râ matú, ahkyíng, buinyi, lhôhkyap, zanwut lé, rì rì hen to bê nghut é haû maumang myi yuq lé nhang kat bê nghut ri.

¹⁶ Myang ji jî é gyè jum gi, byù du sen í hkyíng bo é hkyô lé, ngò wó gyô ri.

¹⁷ Ngò, shing-rán myang é má, myang jûm eq haû pé má ji bâng é wànggò-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyi pé é ulhum su dut luí, yhangmoq é nhut mai, myi, myihkau eq hang pé htoq lo ri.

¹⁸ Haû yhangmoq é nhut mai htoq lo é myi, myihkau eq hang gâ é wúm ihkyup sùm jûng é yanmai, xângzo byù sum tú ratú gi, sat hui bekô nghut ri.

¹⁹ Myang haû jum é sho-myi gi, lhangmuí su dut luí, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.

²⁰ Wúm ihkyup haû sùm jung mai wó lut luí, myit gyô tô é xângzo byu pé gi, yhangmoq é loq pé eq zui saí é muzó mai, myit a lhîng shi kô é htoq agó, nat gâng pé lé le, a wó

* 9:11 Apolion gâ é lichyúm gi, lhoq hten lhoq hpyoq sù gâ é nghut ri.

myâng, a wó gyo, a wó sô é, hîng, ngùn, gyi, luqgok, sik pé é alhô lé le, noqkuq é hkyô lé a tô pyám shi kó nghut ri.

²¹ Hau htoq agó, yhangmoq gi, byù sat é mû mai le, myoqheq hpaqchyí mû mai le, ashop é dông gungsho zùm yap é hkyô mai le, hkaû é mai le, myit a lîng shi kó nghut ri.

10

Maumang Eq Laiká Ding É Hkyô

¹ Hau htâng, ngò gi, wum-o bo é maumang lagyo gotû rayuq, mauhkûng mai gyó lé lo é lé myang é nghut lhê. Yhang lé gi, mhut eq htup yup to luí, yhâng é u htoq má woq-gan síng-yang gyân tô ri; yhâng é myoqdong gi, buì su dut luí, yhâng é hkyí gi, myi zîng su dut ri.

² Yhâng é loq má gi, hpông tô é laiká ding zo ralhum chung tô ri; yhâng é loqyo hkyí gi, wuìshuq lung-aû má nang, yhâng é loqpaí hkyí gi, myigùng htoq má nâng to luí,

³ hkanghkyi mying é htê su ga, htê mó eq garû kat ri. Yhang garu kat jáng, maugum htê nyhit lhum tú gûm kat ri.

⁴ Haû maugum htê nyhit lhum tú gûm kat é hkûn, ngò ká râ da jáng, "Haû maugum htê nyhit lhum tú gûm é hkyô lé zaú pyám aq; haú pé lé hkâkâ to." ga, mauhkûng mai danghtê htoq lo é lé ngò wó gyô kat ri.

⁵ Haú hkûn, wuìshuq lung-aû eq myigùng htoq má nâng

yap tô é lé, ngò myang é mau-mang lagyo haû gi, yhâng é loqyo loq lé mauhkûng shut tu toq kat ri.

⁶ Haû mù, yhang gi, mauhkûng eq haú má nyi é lhunglhang lé le, myidàm htoq eq haú má nyi é lhunglhang lé le, wuìshuq lung-aû eq haú má nyi é lhunglhang lé le, hpan tô é, pyat dedu ahtum abyuq dui nyi Su é myìng lé lang luí, dakam é gi, "Ahkyíng ratsuí le, lhoq myáng nyi lo râ a nghut!"

⁷ Nghut kôlhang, Garai Gasang mai Yhâng é dui-nhâng zoshâng wuì nghut é myiqhtôí pé lé taí to bê é danglù eq rajung za, Yhâng é zaú tô é hkyô gi, nyhit yuq nghû râ maumang lagyo èq yhâng é tut lé mut myhîng é buinyi pé má, shit râ nghut lhê." gâ ri.

⁸ Hau htoq agó, ngò wó gyô wú bê mauhkûng mâ é htê, ngo lé dum taí é gi, "Haû wuìshuq lung-aû eq myidàm htoq má nâng yap tô é maumang lagyo loq má hpông tô é laiká ding lé, ê yù aq." gâ ri.

⁹ Haû mù, ngò gi, ê luí, laiká ding zo haû, ngo lé byi râ matú maumang lagyo haû lé ê dung le, yhang gi, "Shí lé yù mù, zo kat aq. Náng é wam má hko râ nghut lhê; nghut kôle, náng é nhut má gi, byo-î su yhang chui râ nghut lhê." gâ ri.

¹⁰ Haû mù, ngò gi, laiká ding zo haû lé, maumang lagyo é loq mai yù mù, zô é

nghut lhê; haú hkûn, ngá é nhut má gi, byo-î su yang chuî nghâm ri; nghut kôle, bàn zô kat é hkûn, ngá é wam hkaú má hkô bê nghut ri.

¹¹ Haú hkûn, "Nàng gi, byù myû myo myo eq séng luî le, mingdán myo myo eq séng luî le, myíng ahú hú eq séng luî le, hkohkam pé myo myo eq séng luî le, myiqhtoi dum htoi ra râ nghut lhê." ga, ngo lé tai kyô ri.

11

Saksé Í Yuq É Hkyô

¹ Ké râ jung dumbáng su dut é jàm-yang rahkat ngo lé byi luî, ngo lé tai é gi, "Ê mù, haú Garai Gasâng é noqkuq yhûm lé le, hkungga gyap lé le, kê wú luî, haú má noqkuq é bang lé nghap wú aq.

² Nghut kôlhang, shinggan mâ é wâng lé gi, a kê é za lhai pyâm to aq; hkâsu mù gâ le, haú gi, tûngbaù pé lé byi to bê nghut lhê. Yang-moq gi, haú chyoiyúng myuq lé, lhamó myixe í hkyap tup chôm nang kó râ nghut lhê.

³ Hau htoq agó, ngò gi, ngá é saksé í yuq lé a-tsam byi râ nghut luî, yangnhik gi, ji mebu wut* mù, buinyì 1260 nyí tup myiqhtoi htoi kó râ nghut lhê." gâ ri.

⁴ Yangnhik gi, haú myidàm Yhumsing é hí má yuq tô é tsanlun gâm í gâm eq myibung tsungjang í lhum nghut ri.

⁵ Byù rayuq yuq, yangnhik lé zing-ri nau é nghut jáng, yangnhik é nhut mai myi htoq lô mù, yangnhik é gyè pé lé nyhê hkyô pyám râ nghut lhê. Yangnhik lé kâm zing-ri é sù gi, haú su kut sat pyám é hui zo râ nghut lhê.

⁶ Yangnhik gi, yangnhik myiqhtoi htoi nyi é buinyì pé má mau a wò râ matú, mauhkûng lé myhî pyám râ a-tsam wó akô; hau htoq agó, wui pé lé sui dut nhâng râ eq, nau é hkûn, wúm ajung jûng èq myidàm htoq lé ihkyup hkyó byi râ a-tsam le, wó akô nghut ri.

⁷ Yangnhik gi, saksé ban hkâm é hkûn, haú nik dik htûm é Lasang-dong mai htoq lo é tân jung dusak gi, yangnhik lé htim mù, ûng luî, sat pyám râ nghut lhê.

⁸ Yangnhik é mâng lé gi, danglêng dong Sodom eq Egutuq gâ é, yangnhik é Yhumsing lé le, tapzing má jén sat pyám é myuq mó é hkyô gùng má, leq to râ nghut lhê.

⁹ Haú hkûn, byù myû hkangmó mâ é bang, byuhú hkangmó mâ é bang, myíng hkangmó mâ é bang, mingdán hkangmó mâ é bang gi, yangnhik é mâng lé myhup pyám râ matú a gyo kô é za, sum nyí èq rahkyuí tup chôm wú nyí kó râ nghut lhê.

¹⁰ Myidàm htoq má nyi é bang gi, yangnhik shi byuq é yanmai gabú nguingón luî, rayuq eq rayuq chyunghuq

* 11:3 Ji mebu wut gâ é gi, iyon yôn é lé gâ lhê.

byí lhum é đông ngón poi kut
kó rā nghut lē. Hkâsu mù
gâ le, myiqhtoi háu nhik gi,
myidàm htoq má nyi nyi é
bang lé, wuîhke jamjau byí lai
bê su nhik nghut akô.

¹¹ Nghut kôlhang, sum nyí
èq rahkyuí tup lai é htàng
má, Garai Gasâng chyáng mâ
é asak soq gi, yhangnhik
chyáng wàng mù, yhangnhik
gi, toq yap tô kô é nghut luí,
yhangnhik lé myang é bang
gi, gyai yhang gyuq nán bûm
bekô nghut ri.

¹² Háu hkûn, "Shí má doq
lò keq." ga, mauhkûng maí
yhangnhik lé wut é htê mó
lé wó gyo kômù, yhangnhik é
gye pé wú tô é u lé, mhut ji mù
mauhkûng shut doq ló bekô
nghut ri.

¹³ Háu u lé yhang, layàng
mó nún lô luí, myuq hkaú
raxê tú mâ é ratú gi, htên gyop
byuq bê nghut ri. Hau htoq
agó, byù nyhit hkyîng yuq shí
byuq bê nghut luí, myit gyó
tô é bang gi, gyai yhang gyuq
nán bûm kômù, mauhkûng
mâ é Garai Gasang lé hkya-on
shigyaú bum akô nghut ri.

¹⁴ Í lhum nghû rā dingnyé
gi, lai byuq bê nghut ri; sùm
lhum nghû rā dingnyé gi, jé
rā za nghut bê.

*Nyhit Lhum Nghû Rā Tut
Mut É Hkyô*

¹⁵ Nyhit yuq nghû rā
maumang lagyo gi, yhang
é tut mut kat ri; háu hkûn,
mauhkûng htoq má htê mó
pé htoq lo é gi,

"Mingkan htoq mâ é mingdán
gi, nga-nhûng é

Yhumsîng eq Yhâng é
Hkrisduq é mingdán
dut bê nghut luí,

Yhang gi, pyat dedu ah-
tum abyuq up nyi rā
nghut lē."

gâ ri.

¹⁶ Háu hkûn, yhumsing é
hkohkâm-tanghkuq má zùng
mù, Garai Gasâng é hí má
nyi tô é suwún í xe myi yuq
gi, yhangmoq é myoqdong
ngóm gop mù, Garai Gasang
lé noqkuq uchyang taí kô é gi,

¹⁷ "Ahkuí pyat, a-nham pyat
rû dui nyi é, wum-
o a-tsam dik shoq bò
Sû Yhumsîng Garai
Gasang é!

Nàng gi, hpungwup a-tsam
mó chûng mù, up nyi
bê nghut é yanmai,
ngamoq, Nang lé jeju
hkya-on lē.

¹⁸ Byù myû pé gi, nhikjum
yo bûm kôluí, Náng é
nhikmo-yo hkyô gi, jé
bê nghut ri.

Shí bê bang lé, tarâ jéyáng rā
eq, Náng é dui-nhâng
zoshâng myiqhtoi pé lé
le,

Náng é sân-yúng bang lé le,
Náng é myìng lé gyuq
hkunggâ é tiq ko lé le,

shigyaú chyunghuq byi rā eq,
myidàm htoq lé lhoq
hten bang lé lhoq hten
rā, ahkyîng gi, jé bê
nghut ri."

gâ akô.

¹⁹ Háu hkûn, mauhkûng
htoq má, Garai Gasâng é
noqkuq yhûm hpông to luí,
Yhâng é noqkuq yhûmhkaú

má, Yhâng é dangshikaq eq sêng é saksé sidek lé byu-myang ri. Haú hkûn jáng, lhap hpyat é, myìng hûm é, maugum gûm é, layàng nún é, likwò mó gyó é pé dut htoq lo ri.

12

Myiwe Myhí Eq Manjung É Hkyô

¹ Hau htoq agó, mauhkûng má limik kumlhá mó htoq shit é gi: myiwe myhí rayuq gi, bui lé wut chûng mù, lhamó má hkyî ke luî, kyî raxe í cham dap é janmaú lé, yhâng é ulhum má tsûng tô ri.

² Yhang gi, zogûng dut tô é nghut luî, zo hkû râ matú, zohkû-nò no nyi é yanmai, gyai yhang ngau garú nyi ri.

³ Hau htâng, mauhkûng má gotû kumlhá dum htoq shit é gi: gyai kô é manjung nè mó* radu gi, ulhum nyhit lhum eq hkyuî raxê lhum dap luî, yhâng é ulhum hkangmó má janmaú tsûng tô ri.

⁴ Yhâng é sho-myi gi, mauhkûng mâ é kyî sum tú mâ é ratú lé shûm tsîng yù mù, myidàm htoq má he hpyit hkyô kat ri. Manjung haú gi, zoshâng hku htoq kat eq wó myui hâng kat shoq ga, haú myiwe myhí é hí má láng yap tô ri.

⁵ Myiwe myhí haú gi, mingdán banshoq lé sham-toq dumbáng eq up râ nghut é yuqzo rayuq lé hkû bê nghut ri; yhâng é zoshâng lé gi, Garai Gasâng é hí má le, Yhâng é

hkohkâm-tanghkuq hí má le bún toq yû bê nghut ri.

⁶ Myiwe myhí haú gi, yhâng é matú Garai Gasang lajâng to byí é yoso hkaú má hpang wang é bê nghut ri; haú jowò má, yhang gi, 1260 nyí tup lhom baú é hui râ nghut lhê.

⁷ Mauhkûng htoq má majan htoq bê nghut ri. Mihkae-laq eq yhâng é maumang lagyô pé gi, manjung lé majan é zan kôluî, haú manjung eq yhâng é maumâng pé le, tau zân akò.

⁸ Nghut kôlhang, yhangmoq gi, a ûng kômù, mauhkûng mâ é yhangmoq nyí jowò lhoq hpyuq pyâm bekò nghut ri.

⁹ Haú mingkan gón lé hkyô shuí nghoq é, natzau eq Tsadán ga é, a-nham lhê é lhangmui nghut é manjung mó haú gi, yhâng é maumang pé eq rahá myidàm htoq má dú hkyô pyâm é hui bê nghut ri.

¹⁰ Haú hkûn, mauhkûng htoq má htê mó dông taí é lé, ngò wó gyô é gi,

"Ahkuí gi, nga-nhûng é Garai Gasâng é hkyi yù hkyô, hpungwup a-tsam eq mingdán le,

Yhâng é Hkrisduq é ahko ahkáng le, jé bê nghut ri.

Hkâsu mù gâ le, nga-nhûng é Garai Gasâng é hí má, nga-nhûng é gumang wui lé,

nyí, myín mara hun nyi é sù gi, dú hkyô pyâm é hui bê nghut ri.

* 12:3 Manjung nè mó gâ é gi, Tsadán lé taí nau é nghut lhê.

11 Yhangmoq gi, haû Sauzô é suí é yanmai le, yhangmoq saksé hkâm é mungdâng é yanmai le,

yhang lé ung pyám bekô nghut luí, shi byuq é jé shoq yhumsing asak lé a ha kó nghut ri.

12 Haû mù luí, mauhkûng eq haú má nyi é bang ê, gabú nyí keq!

Nghut kôlhâng, myidàm htoq eq wuìshuq lung-aû gi, dingnyé wó ri;

hkâsu mù gâ le, haû natzau gi, yhâng é ahkyíng yâm-yoq tot za ru joq alô nghut é lé sê é yanmai, nhikmo-yô é èq, nungnhik chyáng gyó lé lô bê nghut ri."

gâ ri.

13 Haû manjung gi, myidàm htoq má dú hkyô kat huí é lé myàng luí, haû yuqzo hku é myiwe myhí lé zing-rî ri.

14 Myiwe myhí haû gi, lhangmuí chyáng mai wó lut luí, yhang é matú lajâng tô é yoso má wó dang jé mù, ahkyíng ralhum, ahkyíng í lhum, ahkyíng rawuí hkup† lhom baú nyi é huí sháng gaq ga, zùn mó é dùng í lhum byí é huí ri.

15 Haú hkûn, haû lhangmuí gi, myiwe myhí haû lé wó lhoq myhû pyám shoq ga, myiwe myhí é nunghtáng má, yhâng é nhut mai wuì mó lâng í é wuì lhoq htoq kat ri.

16 Nghut kôlhâng, manjung nhut mai lhoq htoq kat é wuì mó lâng haû lé, myigùng gi, yhâng é nhut há mù myuí pyám byí é dông, myiwe myhí haû lé garúm yu ri.

17 Haû mù, manjung haû gi, myiwe myhí hau é yanmai, gyai yhang nhikmo-yo luí, Garai Gasâng é jep é tarâ lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan zan râ matú htoq e ri.

18 Manjung haû gi, wuìshuq lung-aû yàm má yap tô ri.

13

Tân Jung Dusak Radu Wuìshuq Lung-aû Mai Htoq Lô É Hkyô

1 Haú hkûn, haû wuìshuq lung-aû mai tân jung dusak radu htoq lo é lé, ngò myàng ri. Dusak haû má, hkyuí raxê lhum eq ulhum nyhit lhum dap to luí, yhâng é hkyuí pé má gi, janmaú raxê lhum tsûng to mù, ulhum hkangmó má gi, Garaí aróng lhoq hpoi é myiung dap tô bum ri.

2 Ngò myang é tân jung dusak haû gi, bauze-lo su dut ri; nghut kôlhâng, hkyí gi, wàm hkyí su dut luí, nhut gi, hkanghkyí nhut su dut ri. Haû manjung gi, yhâng é a-tsam eq yhâng é hkohkâm-tanghkuq lé le, ahko ahkáng mó lé le, tân jung dusak haû lé ap byí ri.

† 12:14 *Ahkyíng ralhum, ahkyíng í lhum, ahkyíng rawuí hkup* gâ é gi, "razàn, í zân, lhamó hkyuq hkyap" lé gâ é nghut lhê; haû gi, 1260 nyí nghut ri.

³ Tân jung dusak hau é ulhum ralhum gi, shî râ î é dàm dap huí é su dut kôlhang, damhkô haû gi, yâ ge pyám bê nghut luí, mingkan gôn gi, mauhong byuq kômù, yhâng htâng châng bùm bekô nghut ri.

⁴ Manjung gi, tân jung dusak lé ahko ahkáng ap byí é yanmai, byu pé gi, manjung haû lé noqkuq é htoq agó, tân jung dusak haû lé le, noqkuq kômù, "Ó yuq wá, tân jung dusak shí du su dut ri lú? Ó yuq wá, yhang lé wó zan ùng râ lú?" ga bum akô.

⁵ Gyáng dang tái râ eq Garaí aróng lhoq hpoi dang tái râ nhut gi, tân jung dusak haû lé byi to bê nghut é htoq agó, lhamó myí xe í hkyap tup, yhâng é ahko ahkáng lé chùng râ ahkáng wó bê nghut ri.

⁶ Yhang gi, yhâng nhut hpóng mù, Garaí Gasâng aróng lé lhoq hpoi dang tái é htoq agó, Garaí Gasâng é myìng eq nyi jowò lé le, mauhkúng htoq má nyi é bang lé le, lumù gansang é sù nghut ri.

⁷ Haû sân-yúng bang lé majan zân ung yù râ a-tsam, yhang lé byi bê nghut ri. Hau htoq agó, byuhú hkangmó lé le, byù myû hkangmó lé le, myíng hkangmó lé le, mingdán hkangmó lé le, up râ ahkáng, yhang lé byi bê nghut ri.

⁸ Haû sat hui bê Sauzo eq

sêng é asak jihpán laiká buk má, mau htoq xâng hkun mai, myìng a kê lhom é, myidàm htoq má nyi é lhunglhang bang gi, haû tân jung dusak lé noqkuq kó râ nghut lê.

⁹ Gyo râ nohkyap dap sù gi, gyô yù sháng gaq.

¹⁰ Shúm zung é hui râ sù gi, shúm zung é hui râ za nghut lê.

Sham èq sat é hui râ sù gi, sham èq sat é hui râ za nghut lê.*

Haû mù, sân-yúng bang gi, hkam jân é hkyô eq lhumzui hkyô bò kó râ nghut lê.

Tân Jung Dusak Radu Myigùng Mai Htoq Lo É Hkyô

¹¹ Hau htâng, ngò gi, tân jung dusak gotù radu† myigùng mai htoq lo é lé myang ri. Yhang gi, sauzô é hkyuí su dut é hkyuí í lhum yuq ri; nghut kôlhang, yhang gi, manjung su ga dang nyo ri.

¹² Yhang gi, tân jung dusak hí lê dù é ahko ahkáng lhunglhang lé, haû du é hí má chùng mù, shî râ î é damhkô ge byuq é tân jung dusak haû lé, haû mingkan eq mingkan htoq má nyi é bang lé noqkuq nhang ri.

¹³ Hau htoq agó, yhang gi, byu pé é myoq hí má, mauhkúng mai myigùng shut myi lé lhang wó lhoq hkyô é, limik kumlhá mó kut shit ri.

* **13:10** Chyúmding ra-am má gi, Byù rayuq yuq lé, shúm kut é sù gi, shúm zung é hui râ nghut lê. Sham èq byù sat é sù gi, sham èq sat é hui râ nghut lê, ga bo tô ri.

† **13:11** Tân jung dusak gotù radu gâ é shí gi, myiqhtoi pyoq lé gá nau é nghut lê.

¹⁴ Yhang gi, tân jung dusak hí lhê dû é hí má, kumlhá haú pé kut râ ahkáng wó é yanmai, myidàm htoq má nyi é bang lé mhoq hpyoq yû luî, haú shâm damhkô dap kôhlang, dui nyi é tân jung dusak haú lé, hkunggâ é dông, yhangmoq lé, yhâng é alhô saí nhang ri.

¹⁵ Yhang gi, haú tân jung dusak hí lhê dû é alhô lé, soq wó mut kat byî é a-tsam lé wó yû sù nghut ri; haú mù, alhô haú gi, dang wó taí luî, yhang lé a noqkuq é bang lé, sat hui nhang ri.

¹⁶ Hau htoq agó, yhang gi, byù mó byù zo, wó sù myùng sù, luthkyô wó bang eq jùn pé, yuq hkangmó lé, yhumsing é loqyo loq má nghut nghut, ngelang má nghut nghut, masat lhô zik tap yû nhang ri.

¹⁷ Haú hkûn, haú tân jung dusak é myìng, a nghut jáng, yhâng myìng é masat námbat dap sù mai lai luî, ùng é, wui é hkyô, ó yuq le wó kut râ a nghut.

¹⁸ Hpaqchyî byéng-yá gi, shí má bo râ ri. Hpaqchyî bò sù gi, haú tân jung dusak é námbat lé sôn wú sháng gaq; hkâsu mù gâ le, haú gi, byù rayuq é námbat nghut lhê. Yhâng é námbat gi, 666 nghut ri.

14

Sauzo Eq 144,000 Yuq É Hkyô

¹ Hau htâng, ngò wú kat le, haú Sauzo gi, Zi-un bùm má

yap tô é lé myang ri; Yhâng myìng eq Yhâng Wâ é myìng lé, yhumsing é ngelang má kâ tap tô é byù 144,000 yuq le, Yhang eq rahá yap tô bùm ri.

² Haú hkûn, ngò gi, wui pé mying hùm é htê eq maugum mó gùm é htê su gâ é htê, mauhkûng mai htoq lo é lé wó gyô ri. Ngò wó gyô é htê haú gi, tít bat bang, yhangmoq é tít lé bat myhîng é htê su gâ ri.

³ Yhangmoq gi, haú hkohkâm-tanghkuq é hí má le, dui é dusak myî du eq suwún wui pê hí má le, mahkôn sik lé hkon akô nghut ri. Haú myidàm htoq mai hkyi yù hui é byù 144,000 yuq mai lai luî, ó yuq le, mahkôn haú lé a wó mhoq sê yù kó nghut ri.

⁴ Haú bang gi, myiwe wui eq gungsho a zum é bang nghut luî, yhangmoq gi, zorâm jet pé nghut bum akô. Yhangmoq gi, haú Sauzo hká shut é le hká shut châng é bang nghut akô. Yhangmoq gi, byu pê chyáng mai wui yu é hui luî, sâng-hi myhîng é ashi lé su, haú Garai Gasang eq Sauzo lé ap byî é hui akô nghut ri.

⁵ Yhangmoq é nhut má, mhaú é hkyô haí le a taí kó; yhangmoq chyáng mara hùn râ hkyô le a bò kó nghut ri.

Maumang Sum Yuq É Hkyô

⁶ Hau htâng, maumang lagyo gotû rayuq gi, maulat má dâng wún é lé ngò myang ri; yhang gi, haú mingkan htoq má nyi é, mingdán

hkanmó mâ é bang, byuhú hkanmó mâ é bang, myíng hkanmó mâ é bang, byù myù hkanmó mâ é bang lé, hko kyo rà ahtum abyuq é gabú danglù wó ri.

⁷ Yhang gi, "Garai Gasang, tarâ jéyáng rà ahkyíng jé bê nghut é yanmai, Yhang lé gyuq hkungga luí, Yhâng é hpungwup a-tsam lé shigyau keq. Haù mauhkûng eq myigùng, wuìshuq lung-aù eq wuìbúm pé hpan tô é Sù lé, noqkuq keq." ga luí, htê mó eq taí ri.

⁸ Í yuq nghù rà maumang lagyo gi, htâng má châng lé mù, "Haù mingdán pé* lhunglhang lé, yhang kut shut é ashop é dông gungsho zùm yap é hkyô, nhik lhoq yô é tsibiyiq wing shuq nhang é, Babelon myuq mó gi, lêng gyop bê! Lêng gyop bê!" ga taí ri.

⁹ Sum yuq nghù rà mau-mang lagyo gi, yhangnhik é htâng má châng lé mù, "Haù tân jung dusak eq yhâng é alhô lé, noqkuq luí, yhumsing é ngelang má nghut nghut, loq má nghut nghut, yhâng é masat lhô lé tap yu é sù, ó yuq nghut kôle,

¹⁰ Garai Gasâng é nhikmo-yo nghu é góm má hut kat tô é, nhik-yô é tsibiyiq wing jet lé shuq rà nghut lhê. Hau htoq agó, haù chyoyúng maumang lagyo pé hí má le, Sauzô é hí má le, yhang gi, duq nyi é myi eq hang eq zing-rí é hui zo rà nghut lhê.

¹¹ Yhangmoq zing-ri huí é myihkau gi, pyat dedu ahtum abyuq htoq nyi rà nghut lhê. Haù tân jung dusak eq yhâng é alhô lé, noqkuq é bang eq yhâng mying é masat lhô tap yù sù é matú gi, nyí, myín, no rà ahkyíng wó rà a nghut." ga luí, htê mó eq taí ri.

¹² Garai Gasâng é jep é tarâ cháng luí, Yesuq lé lhumzui nyi é bang nghut é, sân-yúng bang gi, hkam shirang é hkyô bò rà lhê.

¹³ Hau htâng, "Ahkuí mai gi, haù Yhumsing má shí é sù, hkungsô wó nyi ri nghù kê to aq." gâ é htê, mauhkûng mai htoq lo é lé, ngò wó gyô ri.

Haù hkûn, haù Woi-nyí gi, "Nghut rô, yhangmoq kut é muzó é akyú gi, yhangmoq htâng cháng rà nghut é yan-mai, yhangmoq gi, yhumsing zui ngú é muzó mai myang hkying bekô rà nghut lhê." ga taí ri.

Myidàm Htoq Mâ É Kyôshi Shù É Hkyô

¹⁴ Ngò dum wú kat le, mhut hpyù rahtui ngá hí má joq tô é lé myang ri; mhut hpyù htoq haù má Byu Yhangzo su dut é byù rayuq zung tô ri; Yhâng é ulhum má gi, hîng janmaù tsûng to luí, Yhâng é loq má gi, htoq é zaiyik ralhum chung tô ri.

¹⁵ Haù hkûn, gotù mau-mang lagyo gi, noqkuq yhûm mai htoq lô mù, "Haù myidàm htoq mâ é kyôshi gi, myhîng zan to bê nghut luí, kyôshu yoq jé bê nghut é yanmai,

* 14:8 *Mingdán pé gâ é gi, a lumjîng bang lé gâ é nghut lhê.*

náng é zaiyik chûng mù, yik shû yù aq." ga, haû mhut htoq má zung tô é Sû lé, htê mó èq taî garû kat ri.

¹⁶ Haû mù, mhut htoq má zung tô é Sû gi, Yhâng é zaiyik lé, myigùng htoq má dú hkyô kat luí, myidàm htoq mâ é kyôshi lé, ban shû yù bê nghut ri.

¹⁷ Maumang lagyo gotû rayuq gi, mauhkûng htoq mâ é noqkuq yhûm mai htoq lo ri; haú yuq le, htoq é zaiyik ralhum chung tô ri.

¹⁸ Haû, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, "Myidàm htoq mâ é tsibiyiq shi gi, myhíng bê nghut é yan-mai, náng é htoq é zaiyik yù mù, tsibiyiq shipaû haú pé lé, yâm tsíng yù aq." ga, htê mó èq taî garû kat ri.

¹⁹ Maumang lagyo haû gi, yhâng é zaiyik lé, myidàm htoq má dú hkyô kat mù, haú mâ é tsibiyiq shi pé lé yâm tsíng yù luí, Garai Gasang nhikmo-yô é tsibiyiq wing pyik jang mó má hut kat bê nghut ri.

²⁰ Myuq shinggan mâ é tsi-biyiq wing pyik jang haú má, tsibiyiq shi haú pé lé nâng nyhoq luí, tsibiyiq wing pyik jang haú mai suí yui htoq lo é gi, myang lunghtúng myháng jé shoq jé lô mù, 180 déng[†] kô we shoq yui lô bê nghut ri.

15

Ló Htâng É Wúm Nyhit

Lhum Chung É Maumang Lagyo Nyhit Yuq É Hkyô

¹ Ngò gi, mauhkûng má gotû limik kumlhá joq é lé, dum byu-myang ri; haû gi, wúm nyhit lhum chung é maumang lagyo nyhit yuq nghut ri; wúm haú pé gi, lô htâng é wúm pé nghut ri; hkâsu mù gâ le, Garai Gasang nhikmo-yô é hkyô gi, haú gú mai bàn râ nghut lhê.

² Hau htoq agó, myi eq nyhò tô é myoqjâm wui-nhông su dut é lé le, ngò myang ri; haû tân jung dusak eq yhâng é alhò lé le, yhâng mying é námbat lé le, wó ung pyám bê bang gi, wui-nhông yàm haú má yap tô bum akó; yhang-moq gi, Garai Gasang byí é tíng pé lé chung to kôluí,

³ Garai Gasâng é dui-nhâng zoshâng Mosheq é mahkôn eq haû Sauzô é mahkôn lé hkôn kô é gi,

"Wum-o a-tsam dik shoq bò Sû Yhumsíng Garai Gasang ê, Nâng kut é muzó gi, hkik é eq mauhpo yhang nghut ri.

Pyat pyat zaí zaí é Hkohlâm ê, Nâng é hkyô gi, dingmán é eq tengmán é nghut ri.

⁴ Yhumsíng ê, Nâng lé a gyuq a hkungga râ eq Nâng myíng lé a lhoq gyaú râ gi, ó yuq wá nyi râ lhú?

Hkâsu mù gâ le, Nâng za chy-oiyúng é Sû nghut ri.

[†] 14:20 180 déng gi, Grik pê é stadia 1600 kô bo ri.

Nàng kut é dingmán hkyô gi,
tân shit bê nghut é yan-
mai,

byù myû lunglhang gi, Náng
hí má lé noqkuq kó rá
nghut lhê."

gâ akô nghut ri.

⁵ Hau htâng, ngò wú kat le,
mauhkûng má, saksé zúm joq
é noqkuq yhûm bóng tô é lé,
myang ri.

⁶ Haû wúm nyhit jung
chung é maumang lagyo
nyhit yuq gi, noqkuq yhûm
haû mai htoq lo ri; yhangmoq
gi, sân-yúng duqbó é nú nhám
mebu wut luí, yhangmoq é
wànggàng má hîng hpyihit
baíyup tô akô nghut ri.

⁷ Haû hkûn, haû dui é
dusak myî du mâ é radu gi,
pyat dedu ahtum abyuq dui
nyi é Garai Gasâng é nhikmo-
yo hkyô byíng tô é hîng góm
nyhit lhum, haû maumang
lagyo nyhit yuq lé byî ri.

⁸ Garai Gasâng é hpungwup
shingkang eq hpungwup a-
tsâm é yanmai, haû noqkuq
yhûm gi, myihkau byíng zan
to bê nghut luí, haû mau-
mang lagyo nyhit yuq é wúm
nyhit jung za a bàn bàn gi,
noqkuq yhûm haû má ó yuq
le a wó wâng kó nghut ri.

16

*Garai Gasâng É Nhikmo-yo
Hkyô Bo É Góm Nyhit Lhum*

¹ Hau htâng, maumang
lagyo nyhit yuq lé, "Htoq
ê mù, haû Garai Gasâng é
nhikmo-yo hkyô bo é góm
nyhit lhum lé, myigùng htoq
má hut hkyô kat keq." ga,

noqkuq yhûm mai htê mó èq
taí é lé, ngò wó gyô ri.

² Haû hkûn, sânghí yuq
nghû rá maumang lagyo gi,
htoq ê mù, yhâng é góm lé,
myigùng htoq má hut hkyô
kat jáng, haû tân jung dusak
é masat lhô dap é eq yhâng é
alhô lé noqkuq é bâng chyáng,
achaq achyut é eq hkê-nho
dik é, yapjeq ana dap tô bùm
bê nghut ri.

³ Í yuq nghû rá maumang
lagyo gi, yhâng é góm lé,
wuishuq lung-aû má hut hkyô
kat ri; haû gi, shí bê byù
rayuq é sui su dut byuq é htoq
agó, haû má lúng é dui jung
lunglhang gi, shi byuq bê
nghut ri.

⁴ Sum yuq nghû rá mau-
mang lagyo gi, yhâng é góm lé,
wuilàng pé eq wuìbúm pé má
hut hkyô kat jáng, haû pé gi,
sui dut byuq bê nghut ri.

⁵ Haû hkûn, haû wuì lé
upzúng é maumang lagyo taí
é lé, ngò wó gyô é gi,

"A-nham pyat le, ahkui pyat
le, rû nyi nyi é Chy-
oiyúng Sû ê,

Nàng haû su kut jéyáng bê
nghut é yanmai, Nàng
gi, tengmán Sû nghut
ri;

⁶ hkâsu mù gâ le, yhangmoq
gi, Náng é sân-yúng
bang eq myiqhtoí pê é
sui lé, lhoq htoq pyám
bekô nghut luí,

Nàng gi, yhangmoq lé sui
shuq nhang é nghut ri;
haû gi, yhangmoq hui
zo gíng é hkyô nghut
ri."

gâ ri.

⁷ Haú hkún, haú hkungga gyap mai,

"Nghut rô! Wum-o a-tsam dik shoq bò Sû Yhumsing Garai Gasang ê, Nang jéyáng é hkyô pé gi, tengmán é eq dingmán é nghut ri."

ga le, tai kat é htê lé, ngò dum wó gyô ri.

⁸ Myi yuq nghû râ mau-mang lagyo gi, yhâng é góm lé, bui é ahtoq má hut hkyô kat é hkún, bui gi, byu pé lé myi êq nyhê kyuq râ ahkáng wó bê nghut ri.

⁹ Haú mù, yhangmoq gi, nyé dik é êq nyhê kyuq é hui zo luí, wúm shí pé lé up nyi é Garai Gasang é mying lé nhing akô; haú-í yhang hpuzo kôhlang, yhangmoq gi, myit le a lhing kó, Garai Gasang lé le a shigyaú kó nghut ri.

¹⁰ Ngo yuq nghû râ mau-mang lagyo gi, yhâng é góm lé, tân jung dusak é hkohkâm-tanghkuq htoq má hut hkyô kat jáng, yhâng é mingdán gi, mauchut tuq dut byuq bê nghut ri. Mingbyû wui gi, yhumsing é shô lé lháng, ngat tân bùm shoq shî-nò jamjau hui zo kôluí,

¹¹ yhangmoq no hpû é eq jeq é ana dap é yan-mai, mauhkung mâ é Garai Gasang lé nhing akô; haú-í yhang hpuzo kôhlang, yhangmoq gi, yhangmoq kut é hkyô mai myit a lhing shi kó nghut ri.

¹² Hkyuq yuq nghû râ mau-mang lagyo gi, yhâng é góm lé, Uhprat wui mó lâng má hut hkyô kat jáng, wuilàng haú gi, kân byuq luí, haú buihotoq hkyam mâ é hkohkam pé, lé lô râ hkyô dong bê nghut ri.

¹³ Haú hkún, po su dut é, agè ashop é byò sum woi-nyí lé, ngò myang ri; haú pé gi, manjung, tân jung dusak, myiqhtoi pyoq pé é nhut mai htoq lô kô é bang nghut akô.

¹⁴ Woi-nyí haú pé gi, nat gâng pé é woi-nyí nghut luí, limik kumlhá pé kut shit kômù, haú wum-o a-tsam dik shoq bò Sû Garai Gasang é buinyí mó má majan zan râ matú, mingkan gón mâ é hkohkam pé lé lhoq tsing yù râ ga, htoq e ló akô nghut ri.

¹⁵ "Wú keq, Ngò gi, hkau sù su jé lé é nghut lhê! Su hí má gungchîn a so râ eq hoq hpu hkyô a lhoq htoq shit sháng gaq ga, yhumsing é wutbu wutmè lé, zúng nyí luí, gying gying kut nyi é sù gi, hkungsô wó nyi ri."*

¹⁶ Haú mù, nat haú bang gi, hkohkam pé lé, Hebre mying dông Armagedon gâ é jowò má, rahá ji tsing tô akô nghut ri.

¹⁷ Nyhit yuq nghû râ mau-mang lagyo gi, yhâng é góm lé, maulat má hut hkyô kat ri; haú hkún, haú noqkuq yhûm mâ é hkohkâm-tanghkuq mai, "Bàn bê!" gâ é htê mó htoq lo ri.

¹⁸ Hau htoq agó, lhap hpyat é, mying hûm é, maugum gûm

* 16:15 Dang shí hkun gi, Yesuq tai é dang nghut lhê.

é eq layàng mó nún é pé dut htoq lo ri. Myidàm htoq má, xângzo byù lé nyi é hkùn mai, layàng haù su nún é eq haù-í htan é gi, a joq wú shí é nghut lhê.

¹⁹ Haù mù, haù myuq mó gi, sùm hkyam byak goq byuq luí, mingdán pé má é myuq pé le, gyop byuq bê nghut ri. Garai Gasang gi, Babelon myuq mó lé le myit bun luí, Yhâng é nhikmo-yô é tsibiyiq wing byíng shoq bo é góm lé shuq nhâng bê nghut ri.

²⁰ Zinlóng hkanmó gi, hpang byuq bê nghut luí, bùm pé le byuq byuq bê nghut ri.

²¹ Haù hkùn, myi xê joí kô lai é likwò mó gi, mauhkung mai byu pé htoq má wo gyó gyùn ri; likwò wúm gi, gyai yhang wuìhke jamjaù é wúm nghut é yanmai, byu pé gi, Garai Gasang lé nhîng bum akô nghut ri.

17

Shiwa Myhí Mó É Hkyô

¹ Haù góm nyhit lhum chung tô é maumang lagyo nyhit yuq má é rayuq gi, lé lô mù, "Lé aq, haù wui myo myô pé htoq má zung tô é shiwa myhí mó lé dam byi râ hkyô, ngò, nang lé tân shit bá.

² Myidàm htoq má é hkohkam pé gi, yhang eq rahá ashop é dông gungsho zùm yap é hkyô kut shut kôluí, myidàm htoq má nyi é bang gi, yhang kut shut é myiwe yuqgè nyi zô lhum hkyo é tsibiyiq wing lé shuq wut bùm

bekô nghut ri." ga luí, ngo lé tai ri.

³ Haù mù, maumang lagyo haù gi, Woi-nyí má, ngo lé yoso shut shuí wang e ló ri. Haù ulhum nyhit lhum eq hkyuì raxê lhum dap luí, tai hpoi é myíng kôm dap tô é, zam zam ne é tân jung dusak htoq má zung tô é myiwe myhí rayuq lé, ngò myang ri.

⁴ Myiwe myhí haù gi, me me dut é eq zam zam ne é mebu wut luí, hîng, lungsêng, palhé pé èq mhôn chung ri; yhâng é loq má gi, yhâng é myiwe yuqgè nyi zô lhum hkyo é agot a-ù hkyô eq achaq achyut é zè pé byíng tô é hîng góm ralhumm chung tô ri.

⁵ NIK DIK É HKYÔ, MYIDÀM HTOQ MÁ É ACHAQ ACHYUT HKYÔ PÉ EQ SHIWA MYHÍ PÊ É YHÂNGNU, BABELON MYUQ MÓ.

gâ é myíng gi, yhâng é ngelang má kê tap tô ri.

⁶ Myiwe myhí haù gi, sân-yúng bâng é sui eq Yesuq é saksé hkâm bâng é sui shuq wut tô é lé, ngò myang ri.

Haù mù, ngò gi, gyai yhang maú byuq é nghut lhê.

⁷ Haù hkùn, maumang lagyo haù ngo lé tai é gi, "Nàng, haì mù maú lhê lhu? Myiwe myhí haù eq, yhang jí tô é, ulhum nyhit lhum eq hkyuì raxê lhum dap é tân jung dusak é zaú tô é hkyô lé, ngò, nàng lé tai kyo râ nghut lhê.

⁸ Nàng myàng é tân jung dusak haù gi, hí hkùn nyi

wú bê, ahkuí a nyi lo, nghut kôlhang, nik dik htûm é Lasang-dong mai htoq lô mù, htên byoq é hui râ nghut lhê. Mau htoq xâng hkun mai, asak jihpán laiká buk má mying a kâ tô é, myidàm htoq má nyi é bang gi, tân jung dusak haû lé myàng kô é hkûn, maú byuq bùm kó râ nghut lhê. Hkâsu mù gâ le, haû gi, nyi wú bê, ahkuí a nyi lo, nghut kôlhang, dum lé râ nghut é yanmai nghut ri.

⁹ Hpaqchyí byéng-yá bo é nyan gi, shí má râ ri. Haû ulhum nyhit lhum gi, myiwe myhí zung é bùm nyhit lhum nghut ri; hau htoq agó, hkohkâm nyhit yuq le nghut ri.

¹⁰ Ngo yuq gi, byit gyó byuq bê; rayuq gi, ahkuí nyi to ashí; myit tô é rayuq gi, a jé lé shi nghut ri; haû yuq jé lé é hkûn, yhang gi, ahkyíng razup zo za wó nyi râ nghut lhê.

¹¹ Hí hkûn nyi wú bê, ahkuí a nyi lo dut é tân jung dusak haû gi, shit yuq nghû râ hkohkâm nghut ri. Yhang gi, haû nyhit yuq eq sêng é yanmai, yhâng é htên byoq hkyô shut e ló râ nghut lhê.

¹² Haû nàng myàng é hkyuî raxê lhum gi, mingdán a myang yù shí é hkohkâm raxê yuq nghut ri; nghut kôlhang, yhangmoq gi, haû tân jung dusak eq rahá za, hkyíng hkum rahkum kô hkohkâm ayá lé wó yù kó râ nghut lhê.

¹³ Yhangmoq gi, myit myoqbyù hkyô ralhum za nghut kômù, yhangmoq é a-tsam eq

ahko ahkáng lé, haû tân jung dusak lé byi kó râ nghut lhê.

¹⁴ Yhangmoq gi, haû Sauzo lé majan chôm zan kó râ nghut lhê; nghut kôlhang, Sauzo haû gi, yhumsing pé é Yhumsing eq hkohkam pé é Hkohkâm nghut é yanmai, yhangmoq lé ung pyám râ nghut lhê. Haû Sauzo eq rahá nghut é bang gi, ji yù huí é bang, hkyin yù huí é bang eq lhumzuí é bang nghut akô." gâ ri.

¹⁵ Hau htâng, maumang lagyo haû ngo lé dum taí é gi, "Nàng myang é, shiwa myhí zung tô é wuì pé gi, byù myû pé, byù ajùm ayò pé, mingdán pé eq myíng lhumjup nghut ri.

¹⁶ Haû nàng myang é tân jung dusak eq hkyuî raxê lhum gi, shiwa myhí haû lé a jú kut kó râ nghut luí, yhâng é sutzè banshoq shang yu pyám byi mù, mebu lhang a dap loshoq achîndum kut to kó râ nghut lhê; hau htoq agó, yhâng é sho lé zo luí, myí èq nyhê hkyô pyám kó râ nghut lhê.

¹⁷ Hkâsu mù gâ le, Garai Gasang gi, haû bang mai, i-myit rahkat zâ èq, yhumsing é a-tsam, haû tân jung dusak lé byi râ myit, yhangmoq lé kat byi Sû nghut ri. Haû mù, yhangmoq gi, Garai Gasâng é mungdang lhoq dik é hkûn jé shoq, haû su kut kó râ nghut lhê.

¹⁸ Nàng myang é myiwe myhí haû gi, myidàm htoq má é hkohkam pé lé up zô é myuq mó nghut ri." gâ ri.

18

Babelon Lêng Gyop É Hkyô

1 Hau htâng, maumang lagyo gotû rayuq mauhkûng mai gyô lo é lé, ngò myang ri. Yhang gi, ahko ahkáng mó wó é nghut luî, haû myidàm htoq lé, yhâng é hpungwup èq duqbó to byî ri.

2 Yhang, htê mó o mó èq garû taî kat é gi,

"Babelon myuq mó gi, lêng gyop bê, lêng gyop bê!

Myuq haû gi, nat gâng pê é yhûm eq agè ashop é nat hkangmó é hkyûng dut byuq é htoq agó,

a sansêng é eq achag achyut é nghoq pé nyi é sùt dut byuq bê nghut ri.

3 Hkâsu mù gâ le, haû byû myû lunglhang gi, yhang kut shut é ashop é dông gungsho zùm yap é hkyo é nhik lhoq yô é tsibiyiq wing shuq wut bùm bekô nghut ri.

Haû myidàm htoq mâ é hkohkam pé gi, yhang eq myi shut làng shut hkyô kut bekô nghut é htoq agó,

myidàm htoq mâ é hpugá wuiloq gá bang gi, yhâng é ladu lai shoq ngón kûn é hkyo é yanmai, sutzè wó bôm bekô nghut ri."

gâ ri.

4 Hau htâng, mauhkûng mai htoq lo é htê gotû lé ngò dum wó gyô é gi,

"Ngá é byu pé ê, myuq hau é mara pé má nungmoq a bo lôm râ matú le,

yhâng é wúm pé lé nungmoq a hui zo kó râ matú le, haû mai hân hpang htoq lò keq;

5 hkâsu mù gâ le, yhâng é mara gi, mauhkûng htung shoq bum zang to bê nghut luî,

Garai Gasang gi, Yhâng é a dingmán é hkyô lé myit bun bê nghut ri.

6 Yhang kut byî é eq rajung za, yhang lé tau kut byi keq; Yhang kut bê muzó eq rajung za, yhang lé í tú taû kut keq.

Yhang nyhó byî é góm má, í tú taû nyhó byi keq.

7 Yhang gi, yhumsing gùng lé yhumsîng lhoq gyaú yû luî, ladu lai shoq ngón kûn nhang é í,

wuîhke jamjau hkyô eq iyon hkyô myo myo, yhang lé taû byi keq.

Hkâsu mù gâ le, yhang gi, yhâng é myit má,

'Ngò gi, hkohkâm myhí nghut lhê; ngò gi, chuimó a nghut;

hkâ-nhám le iyon hui râ a nghut.' ga gumrong nyi ri.

8 Haû mù luî, yhâng é wúm nghu é shî hkyô, iyon hkyô eq mutmó gyô hkyô gi,

ra-nyî bui má za, yhâng chyáng jé râ nghut lhê.

Hau htoq agó, yhang gi, myî èq nyhê hkyô pyâm é lé hui râ nghut lhê;

hkâsu mù gâ le, yhang lé
jéyáng é, haû Yhumsîng
Garai Gasang gi, wum-
o a-tsam bò Sû nghut
ri.

⁹ Haû yhang eq rahá myiwe
yuqgè nyi zô lhum hkyô kut
shut é eq yhâng é ladu lai
shoq ngón kún hkyô má bo
lom é, haû myidàm htoq mâ é
hkohkam pé gi, yhang lé nyhê
hkyô é myihkau lé myàng
kôjáng, ngaubyi ngau-nhap
eq iyon yôn é huî bùm kó râ
nghut lhê.

¹⁰ Yhangmoq gi, yhang no
jamjaû nyi é lé wú gyuq kôluî,
we we má yap to kômù,
'Hkik é myuq mó, a-tsam bo
é Babelon gi, dingnyé
wó ri-nhung!

Dingnyé wó ri-nhung!
Hkyíng hkum ralhum
má za, dam byi é hkyô
gi, náng chyáng jé bu-
nhung!

ga luî, taî garu kó râ nghut
lhê.

¹¹ Myidàm htoq mâ é hpugá
byu pé gi, yhang é yanmai,
ngaubyi ngau-nhap é eq iyon
yôn é huî kó râ nghut lhê;
hkâsu mù gâ le, yhangmoq é
gài zè lé, ó yuq le a wuî byi lo
kô é yanmai nghut ri.

¹² Gài zè haû pé gi, hîng,
ngùn, lungsêng eq palhé, nú-
nhâm é pán, me me dut é pán,
laí hkyíng eq zam zam ne é
pán; namngón jung sik ajung
jung, maguí zúí lé saí é, gùloq
hpaû jung siklé saí é, gyilé saí
é, shamtoq lé saí é, luq hpyû
lé saí é jung ajà jà nghut ri.

¹³ Hau htoq agó, changh-
pyik gâm, xunmân, namngón

jung, mura, loban, tsibiyiq
wing, tsanlun xû, mún eq
sungsô, nojûng eq sau, myang
eq myanglhêng pé; byû é
gungdu eq asak pé nghut ri.

¹⁴ Yhangmoq gi, 'Nàng myit
ô nau nyi é hkyô pé gi, náng
chyáng mai gâng ló byuq bê
nghut ri. Nàng wó é sùt é hkyô
eq hkikhkam é hkyô pé ban-
shoq gi, byuq byuq bê nghut
luî, hkâ-nhám le dum wó taû
yù râ a nghut.' ga taí kó râ
nghut lhê.

¹⁵ Gài zè haû pé lé ung luî,
yhâng chyáng mai sutzè wó
yu é byû pé gi, yhang hpuzô
é jamjau hkyô lé wú gyuq kô
é yanmai, we we má yap to
kômù, ngaubyi ngau-nhap eq
iyon yon uchyang,

¹⁶ 'Nú-nhâm é pán, me me dut
é pán eq zam zam ne
é mebu wut luî, hîng,
lungsêng eq palhé pé lé
mhôn tô é myuq mó gi,
dingnyé wó ri-nhung!
Dingnyé wó ri-nhung!

¹⁷ Hkyíng hkum rahkum má
za, haû-í yhang wó
é sutzè pé htên byoq
byuq bu-nhung!
ga taí kó râ nghut lhê.

Wuî-sanghpo agyì yuq
hkanmó eq wuî-sanghpo mai
jón wún é bang banshoq,
wuî-sanghpo hkâng bang eq
wuîshuq lung-aû mai wam
baú hkyô wó yu é bang
banshoq gi, we we má yap
to kômù,

¹⁸ myuq haû nyé gyó nyi
é myihkau lé myàng kôjáng,
'Myuq mó shî eq pûng é myuq

gi, hkâmá joq shirâ lúhú?' ga
taí garu kó râ nghut lhê.

¹⁹ Yhangmoq gi, yhumsing
é ulhum má hpuilhup kyaq
gyun mù, ngaubyi ngau-nhap
eq iyon yon uchyang,

'Myuq mó gi, dingnyé wó ri-
nhung! Dingnyé wó ri-
nhung!

Wuìshuq lung-aû má wuì-
sanghpo pé wó é bang
gi, yhâng é sutzè pé é
yanmai, sutzè wó bum
akô.

Nghut kôlhâng, hkyíng hkum
rahkum má za, htên
byoq hkyô gi, yhâng
chyáng jé bu-nhung!

²⁰ Mauhkûng ê, yhang é
yanmai hkye gabú aq!
Sân-yúng bang, lagyô
pé eq myiqhtoî pé ê,
hkye gabú keq!

Hkâsu mù gâ le, yhang, nung-
moq lé kut é eq ra-
jung za, Garai Gasang
gi, yhang lé jéyáng bê
nghut ri.'

ga taí kó râ nghut lhê." gâ ri.

²¹ Hau htâng, wum-o a-
tsam mó bo é maumang
lagyo rayuq gi, luqluí long mó
sû é luqgok racham waq toq
yú mù, wuìshuq lung-aú má
dú hkyô kat luí, taí é gi,

"Hâu Babelon myuq mó gi,
hâu su kut wum kat
dú hkyô pyâm é hui râ
nghut luí,

hkâ-nhám le dum myàng
râ a nghut lo.

²² Hâu tíng bat é bang, dat gó
dat ye é bang, sampyí

mut é bang eq tut mut
é bâng é htê lé,

náng chyáng hkâ-nhám le
dum wó gyo lo râ a
nghut.

Loq hpaqchyî ajung jung
kûng é byù lé, náng
chyáng hkâ-nhám le
dum myàng lo râ a
nghut.

Luqluí luí é htê lé, náng
chyáng hkâ-nhám le
dum wó gyo lo râ a
nghut.

²³ Hâu myibung duq é my-
ishâm lé, náng chyáng
hkâ-nhám le dum wó
duq lo râ a nghut.

Myisik lusik é htê lé, náng
chyáng hkâ-nhám le
dum wó gyo lo râ a
nghut.

Náng é hpugá byû pé gi,
mingkân é byù mó pé
nghut ri.

Náng é myoqheq hpaqchyî èq
mingdán banshoq má
é bang lé, hkyô shuí
nghoq bê nghut ri.

²⁴ Hâu myiqhtoî pé é sui,
sân-yúng bâng é sui eq
myidâm htoq má sat
hui bang banshoq é sui
pé gi,

yhâng chyáng chyat byu-
myàng bê nghut ri."
gâ ri.

19

Haleluya!

¹ Hau htâng, mauhkûng
htoq má, byù ajùm ayò garú é

* **19:1** *Haleluya* gâ é gi, Hebre myíng dông, "Yhumsing Garai Gasang lé hkya-on kungton lhê" gâ é dang nghut ri.

htê mó su gâ é lé, ngò wó gyô é gi,

"Haleluya!*

Hkyi yù hkyô eq hpungwup shingkaŋ, a-tsam gi, nga-nhông é Garai Gasang eq sêng é nghut lhê.

2 Hkâsu mù gâ le, Yhang tarâ jéyáng é hkyô gi, tengmán é eq dingmán é yanmai nghut ri.

Yhang gi, myidàm htoq mâ é bang lé, haû yhâng é ashop é dông gungsho zùm yap é hkyo eq mara kut shut nhang é shiwa myhí mó lé, mara byi lui,

Yhâng é dui-nhâng zoshâng wuì é sui yuichyîn dam byi bunhung ô!"

gâ ri.

3 Dum radàm, yhangmoq taí garu kô é gi,

"Haleluya!

Myuq hau é myihkau gi, pyat dedu ahtum abyuq ru ìng doq nyì sháng gaq ô!"

gâ bum akô nghut ri.

4 Haû suwún í xe myi yuq eq dui é dusak myî du gi, haû hkohkâm-tanghkuq má zung tô é Garai Gasang lé paí gop lui, noqkuq uchyang,

"Amen, Haleluya!"

ga, taí garû bum akô.

5 Haú hkûn,

"Garai Gasâng é dui-nhâng zoshâng wuì nghut é, yhang lé gyuq hkunggâ é tiq ko banshoq bang ê!

Nga-nhông é Garai Gasang lé, hkya-on kungtôn keq ô."

gâ é htê, haû hkohkâm-tanghkuq mai htoq lo ri.

6 Hau htâng, byù ajùm ayo é htê su ga, wuì myo myo mying hùm é htê su ga, maugum mó é htê su ga, taí garû é htê lé ngò wó gyô é gi,

"Haleluya!

Hkâsu mù gâ le, wum-o a-tsam dik shoq bò Sû nga-nhông é Yhumsîng Garai Gasang gi, up nyi ri.

7 Nga-nhông gi, ngón gabú lui, Yhâng é hpungwup shingkaŋ lé lhoq gyaú sháng ô!

Hkâsu mù gâ le, haû Sauzo myihâng poí gi, jé bê nghut lui, Yhâng é myisik gi, rì rì mhôn to bê nghut ri.

8 Sân-yúng duq wik nú-nhâm é mebu le, wut râ matú, Yhang lé byi to bê nghut ri."

gâ ri. (Nú-nhâm é mebu haû gi, sân-yúng bang kut é dingmán é muzó nghut ri.)

9 Hau htâng, maumang lagyo gi, ngo lé, "'Haû Sauzô é myihâng zoshuq poí má ji yu é hui bang gi, hkungsô wó nyi ri.' nghû ká aq." ga taí lui, "Dang shí pé gi, Garai Gasâng é tengmán mungdang yhang nghut lhê." ga xoq taí ri.

10 Haú hkûn, ngò gi, yhang lé noqkuq râ nghû, yhâng é hkyî wang má paí gop kat é nghut lhê. Nghut kôlhang, yhang gi, "Haû su hkâkut! Ngò gi, nàng eq haû Yesuq é

saksé lé hkâm é náng gumang wuì eq rahá, byinzùm dui-nhâng zoshâng ru nghut lhê. Garai Gasang lé noqkuq aq! Hkâsu mù gâ le, Yesuq é hkyô lé saksé hkâm é gi, myiqhtoi htoì é Woi-nyí é myit đông nghut ri." ga, ngo lé tai hkâm ri.

Myang Hpyû Jî To Su É Hkyô

11 Hau htâng, ngò gi, mauhkûng bóng tô é lé le, ngá é myoq hí má myang hpyû radu nyi tô é lé le, myang ri. Myang hpyû haú má jî tô é gi, Lhumzui eq Tengmán gâ é Sû nghut ri. Yhang gi, tengmán é đông tarâ jéyáng luí, majan zan Sû nghut ri.

12 Yhâng é myoqjí gi, myishâm su dut mù, Yhâng é ulhum má gi, janmaú myo myo tsùng tô ri. Yhang mai lai luí, ó yuq le a bo sê é myìng, Yhâng chyáng kê tap tô ri.

13 Yhang gi, sui má jum yù bê nghut é buhíng radung wut to luí, Yhâng é myìng gi, Garai Gasâng é mungdang gâ ri.

14 Haú mauhkûng gyè pé gi, hpyu é eq sanséng nú-nhâm é mebu wut mù, myang hpyû jî kôluí, Yhâng htâng má châng bum akô nghut ri.

15 Byù myû haú pé lé zan râ matú, htoq é shâm gi, Yhâng é nhut mai htoq lo ri. Yhang gi, yhangmoq lé, shamtoq dumbáng eq up râ nghut lhê. Yhang gi, wum-o a-tsam dik shoq bò Sû Garai Gasâng é nhikmo-yô é tsibiyiq shi pyik

jang má, yhangmoq lé pyik râ nghut lhê.

16 Hkohkam pé é Hkohkâm eq yhumsing pé é Yhumsíng gâ é myìng gi, Yhâng é buhíng eq Yhâng é tangbaú má kê tap tô ri.

17 Dum, maumang lagyo rayuq gi, buì má yap tô é lé ngò myang ri; yhang gi, maulat má é nghoqzô pé ban-shoq lé, "Lé keq, Garai Gasâng é zoshuq poi mó matú, lé zup zing keq;

18 haú hkûn, nungmoq gi, hkohkam pé é, gyezaù pé é, wum-o a-tsam mó bò bâng é, myang jûm eq jî bâng é gungsho, luthkyô wó bang eq jùn pé é, byù mó byù zo pé lhunglhâng é gungsho pé lé, myàng zo kó râ nghut lhê." ga, htê mó eq wut garú tai ri.

19 Hau htâng, haú tân jung dusak eq myidàm htoq má é hkohkâm eq yhangmoq é gyezô pé gi, haú myang htoq má jî to Sû eq Yhâng é gyezô pé lé, majan zan râ matú chôm zing bùm kê é lé, ngò myang ri.

20 Nghut kôlhang, haú tân jung dusak gi, chyup yu é hui bekô nghut ri; hau htoq agó, haú tân jung dusak é masat lhô lé hkâm yù luí, yhâng é alhô lé noqkuq é bang lé, mhaú zo râ matú, tân jung dusak hau é gunglik đông limik kumlhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má dui gù dú hkyô kat é hui bekô nghut ri.

²¹ Haû myit gyó tô é bang gi, myang gûng má jî to Su é nhut mai htoq lo é sham eq sat pyâm é hui bekô nghut lui, ngoq pé lhunglhang gi, haû bang é gungsho lé, gyi gyi dau dau myang zô bùm bekô nghut ri.

20

Rahkyîng Zàn

¹ Dum, maumang lagyo rayuq gi, nik dik htûm é Lasang-dông é zoqshi eq joqtoq tui mó lé, yhang é loq má chûng mù, mauhkûng mai gyó lé lo é lé, ngò myang ri.

² Yhang gi, natzau eq Tsadán nghut é, a-nham lê é lhangmui gâ é manjung lé, zanwut rahkyîng lhûng to râ matú, chyup tuî yù bê nghut ri.

³ Haû mù, maumang lagyo haû gi, rahkyîng zàn a byîng shî é gyoro má, manjung haû, byù myû pé lé a wó mhaû zo sháng gaq ga, nik dik htûm é Lasang-dong má yhang lé dú hkyô hâng kat lui, zoq myhî to mù, hau é ahtoq má dizik htûng tô ri. Haû rahkyîng zàn lai eq, yhang lé, ra yoq zo hpông htoq kat ra râ nghut lê.

⁴ Ngò gi, haû tarâ jéyáng râ ahko ahkáng wó é bang zung tô bum é hkohkâm-tanghkuq pé lé, dum myang ri. Hau htoq agó, haû Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bang é sobyô pé lé, ngò myang ri. Haû bang gi, haû tân jung

dusak eq yhang é alhô lé a noqkuq é htoq agó, yhumsing é ngelang eq loq má hau é masat lhô lé a htûng tap yû bang é sobyo pé nghut ri. Yhangmoq gi, dum dui toq mù, zanwut rahkyîng tup Hkrisduq eq rahá up nyi bekô nghut ri.

⁵ Haû gi, sâng-hî dàm dum dui toq é hkyô nghut ri. (Shi byuq bê myit gyó tô bang gi, rahkyîng zàn haû a byîng byîng wó dum dui toq kó râ a nghut.)

⁶ Sâng-hî dàm dum dui toq é hkyô má lom é bang gi, hkungsô wó bang eq chyoyúng bang nghut ri. Í dâm nghû râ shi é hkyô gi, haû bang lé up râ ahkáng wó é a nghut; haû bang gi, Garai Gasang eq Hkrisduq é hkyangjông pé dut râ nghut é htoq agó, Hkrisduq eq rahá zanwut rahkyîng tup up kó râ nghut lê.

Tsadán Htên Byoq Huí É Hkyô

⁷ Rahkyîng zàn haû lai jáng, Tsadán gi, htóng mai nhang htoq kat é hui lui,

⁸ majan zan râ matú, myidàm htoq myi chyûn má nyi é, Goga eq Magoga gâ é byù myû pé lé mhaû shuî tsîng yù râ ga, htoq ê râ nghut lê. Byù haû bang gi, wuîshuq lung-aû yàm mâ é semuî myhó myo kó râ nghut lê.

⁹ Yhangmoq gi, maumyî htunghtáng hkap shoq chôm yán doq lò kômù, haû Garai Gasâng é byu pé nyi é dap

nghut é, Garai Gasang chy-
itdap é myuq lhinghkyuq má,
lé lóm tô bùm bekô. Nghut
kôhlang, mauhkông mai myi
gyó lô luí, yhangmoq lé nyhê
hkyô pyám bê nghut ri.

¹⁰ Haú tân jung dusak eq
myiqhtoi pyoq pé lé dú hkyô
kat jang nghut é, hang myi
duq nyi é nhông má, yhang-
moq lé mhoq hpyoq yu é
natzau haú le dú hkyô pyâm
é hui bê nghut ri. Yhang-
moq gi, nyí, myín, pyat dedu
ahtum abyuq wuîhke jamjau
hui zô nyi kó râ nghut lhê.

Ló Htâng É Tarâ Doqdan Hkyô

¹¹ Hau htâng, hkohkâm-
tanghkuq hpyû mó ralhum eq
haú má zung tô é Sû lé, ngò
myang ri. Haú mauhkông
eq myigùng gi, Yhâng é hí
mai hpang lô bê nghut mù,
yhangnhik é matú jowò a joq
lo nghut ri.

¹² Hau htoq agó, shi byuq
bê nghut é, tiq é kô é bang
gi, hkohkâm-tanghkuq hí má
yap tô bum é eq laiká buk
pé hpông é lé, ngò myang ri.
Asak jihpán laiká buk gâ é
gotû laiká buk le, hpông tô
ri. Haú shi byuq bê bang gi,
yhumsîng kut é eq rajung za,
laiká buk pé má kê tô é dông,
tarâ doqdan é huí bùm bekô
nghut ri.

¹³ Haú hkûn, wuîshuq lung-
aú gi, yhang má lúng tô é, shi
byuq bê bang lé ap byi luí,
haú shi é hkyô eq Moming le,
yhangnhik chyáng lúng tô é,
shi byuq bê bang lé ap byi akò
nghut ri; yuq hkangmó gi,

yhumsîng kut é eq rajung za
tarâ doqdan é hui bekô nghut
ri.

¹⁴ Hau htâng, shi é hkyô eq
Moming gi, myi nhông má dú
hkyô kat é hui bekô nghut ri.
Myi nhông haú gi, î dâm nghû
râ shi é hkyô nghut lhê.

¹⁵ Asak jihpán laiká buk
má, mying a bo é sù ó yuq
nghut kôle, myi nhông haú
má dú hkyô kat é hui bekô
nghut ri.

21

Yerusalem Asik

¹ Hau htâng, mauhkông
asik eq myigùng asik lé, ngò
myang ri; hkâsu mù gâ le, hí
lhê é mauhkông eq myigùng
gi, lai lô byuq bê nghut luí,
wuîshuq lung-aú le, dum joq
râ a nghut lo.

² Haú hkûn, Chyoiyúng
Myuq gâ é Yerusalem asik
gi, lusik é matú mhôn yúng
tô é myisik su, hen lajâng yù
luí, Garai Gasâng chyáng má
é nghut mù, mauhkông mai
gyó lé lo é lé, ngò myang ri.

³ Hau htoq agó, hkohkâm-
tanghkuq mai htoq lo é dan-
ghtê mó lé, ngò wó gyô é
gi, "Ahkuí, Garai Gasâng é
nyi jowò gi, xângzo byu pé
eq rahá nghut luí, Yhang gi,
yhangmoq eq rahá nyi nyi
râ nghut lhê. Yhangmoq gi,
Yhâng é byu pé dut râ nghut
luí, Garai Gasang yhang,
yhangmoq eq rahá nyi mù,
yhangmoq é Garai Gasang
dut râ nghut lhê.

⁴ Garai Gasang gi, yhang-
moq é myoq má é ngaubyi

lhunglhang lé, sut pyám byi râ nghut lhê. Htângnùng má gi, shî-nò hkyô, iyon hkyô, ngaubyi ngau-nhap hkyô eq no hpu hkyô nghû é joq râ a nghut lo; hkâsu mù gâ le, hí lhê é hkyô pé gi, lai lô byuq bê nghut ri." gâ ri.

5 Haû hkohkâm-tanghkuq má zung to Sû gi, "Wú aq, jung hkanmó lé, Ngò asik kut nyí bê nghut lhê." ga tai lui, "Shî lé kê to aq, hkâsu mù gâ le, dang shí pé gi, lumgíng é dang eq tengmán é dang nghut lhê." ga tai ri.

6 Hau htoq agó, Yhang gi, "Haú pé gi, ban kut bê. Ngò gi, Alhpa eq Omega nghut lhê; Sâng-hi Awang eq Ló Htáng Sû le nghut lhê. Wuì shit sù lé gi, ahpau a dũng é za, asak wuibúm mâ é uchyam lé, Ngò byi huq râ nghut lhê.

7 Wó ung é sù ó yuq nghut kôle, Garaí é silí wunlí haú pé banshoq lé sîng râ nghut mù, Ngò gi, yhang é Garaí Gasang dut lui, yhang gi, Ngá zo dut râ nghut lhê.

8 Nghut kôlhang, gyuq myit bò bang, a lumjîng bang, achâq achyut dut bang, byù sat bang, ashop é dõng gungsho zùm yap é hkyô shut é bang, myoqheq hpaqchyí kut é bang, hparà noq é bang eq mhaú bang lhunglhang é jowò gi, haû hang myi duq nyi é nhõng nghut râ nghut lhê. Haû gi, í dâm nghû râ shi é hkyô nghut ri." ga ngo lé tai ri.

9 Ló htâng é wúm nyhit jung byíng tô é góm nyhit lhum

chung tô é maumang lagyo nyhit yuq mâ é rayuq gi, lé mù, "Lé aq, haû Sauzô é yhangmyi gâ é myisik lé, ngò tân shit râ nghut lhê." ga ngo lé tai ri.

10 Hau htâng, yhang gi, ngo lé Woi-nyí mai bùm myhâng mó ralhum má shuí jé lui, Garaí Gasâng chyáng mâ é nghut mù, mauhkung mai gyó lé lo é, haû Chyoiyung Myuq gâ é Yerusalem lé tân shit ri.

11 Myuq haû gi, Garaí Gasâng é hpungwup shingkang hû é htoq agó, haû maubó gi, hpaû dik é huhpé lungsêng su dut lui, myoqjâm su sân-yung ri.

12 Myuq xêwâm gi, kô myhang é htoq agó, hkum raxe í lhum hpông tô ri; hkum haú pé má, maumang lagyo raxe í yuq zung tô ri. Hau htoq agó, Israellaq byù myû raxe í hu é mying lé, hkum haú pé má kê tap to bum ri.

13 Hkum haú pé gi, buihtoq hkyam shut sùm lhum, buiwàng hkyam shut sùm lhum, maupyí shut sùm lhum, mautsung shut sùm lhum kut hpông tô ri.

14 Myuq xêwâm haû gi, awang raxe í lhùm eq hi tô é nghut lui, awang haú pé má, Sauzô é lagyo raxe í yuq é mying dap tô bum ri.

15 Haû ngo lé nyo é mau-mang lagyo gi, myuq lé le, hau é hkum pé lé le, xêwâm pé lé le, kê râ matú, kê é jung hîng jâm-yang ralhum chung tô ri.

16 Myuq haû gi, myi chyûn dut mâ é nghut luí, hîng hpyang làm hpyang rawuí wuí za dut mâ é nghut ri. Maumang haû gi, myuq lé jâm-yang hau èq kê wú é hkûn, hîng hpyang, làm hpyang, myhâng hpyang banshoq 1400 déng* kô bo ri;

17 yhang gi, haû byù kê é jung eq wuí é maumang lagyô é kê jung lé chûng mù, myuq xêwâm lé kê wú é hkûn, rasho myí xê myi dúng bo ri.

18 Myuq xêwâm haû gi, huhpé lungseng èq saí é nghut ri; myuq gi, hîng gyíng èq saí é nghut mù, myoqjâm su yhang sân-yúng ri.

19 Myuq xêwâm haû é awang pé gi, hpau jung lungsêng ajung jûng èq mhôn tô é nghut ri. Sâng-hí lhum gi, huhpé lungseng èq, í lhum nghû râ gi, nila (mauhkûng nyuì su dut jung) lungseng èq, sùm lhum nghû râ gi, mahuya (noq é isâm myo jung) lungseng èq, myí lhum nghû râ gi, myaq (huí nyuì nyuì é jung) lungseng èq,

20 ngo lhum nghû râ gi, nyhaú myoqjí su dut jung lungseng èq, hkyuq lhum nghû râ gi, pate-mya (nè é jung) lungseng èq, nyhit lhum nghû râ gi, huí muí muí é su dut jung lungseng èq, shit lhum nghû râ gi, myek-yoi (wuimau nyuì su dut jung) lungseng èq, gaú lhum nghû râ gi, utohpaya (bó huí huí é jung) lungseng èq, raxê lhum nghû râ gi, mahuya nyuì

lungsêng èq, raxe ralhum nghû râ gi, wakintu (mhan-haq nyuì eq mauhkûng nyuì nyhò tô é su dut é jung) lungsêng èq, raxe í lhum nghû râ gi, (me me dut é jung) htihtu-nila lungseng èq mhôn tô ri.

21 Haû myuq hkum raxe í lhum gi, palhé raxe í cham nghut ri; hkum ralhum gi, palhé rachâm èq saí é nghut ri. Haû myuq é hkyô mó gi, hîng jet èq saí é nghut luí, myoqjâm su duq san é hkyô nghut ri.

22 Ngò gi, myuq haú má noqkuq yhûm joq é lé a myàng, hkâsu mù gâ le, haû wum-o a-tsam dik shoq bò Sû Yhumsîng Garai Gasang eq Sauzo gi, myuq hau é noqkuq yhûm nghut nyi é yanmai nghut ri.

23 Haû Garai Gasâng é hpungwup shingkang gi, myuq haú má duqbó byí é htoq agó, Sauzo gi, myuq hau é myibung nghut é yanmai, myuq haú má gi, buì eq lhamó tsô byi a ra nghut ri.

24 Haû byù myû pé gi, myuq haû duqbó é hkaú má hkyô wó so kó râ nghut lhê; haû myidàm htoq mâ é hkohkam pê gi, yhangmoq é hkikhkâm hkyô lé, myuq haú má yù lé kó râ nghut lhê.

25 Myuq haú má gi, myín nghû é a joq é yanmai, myuq hkum myhí é le joq râ a nghut lo.

26 Haû byù myû pé é hpungwup shingkang eq aróng lé,

* 21:16 1400 déng gi, Grik pê é stadia 12000 kô nghut ri.

myuq haú má yu lé kó râ nghut lhê.

²⁷ Myuq haú má, a sansêng é hkyô haí le wó wàng râ a nghut é htoq agó, hoq hpu hkyô eq mhaú zô é hkyô kut é sù ó yuq le wó wàng râ a nghut; haú Sauzô é asak jihpán laiká buk má mying bo é bang za wó wàng râ nghut lhê.

22

Asak Wuì Mó Lâng

¹ Hau htâng, Garai Gasang eq Sauzô é hkohkâm-tanghkuq mai yui htoq lô luí, myuq hkaú mâ é hkyô mó gûng đông yui ló é, myoqjâm su sân-yúng é asak wuì mó lâng lé, mau-mang lagyo haú, ngo lé tân shit ri.

² Wuilàng í hpoq é má, ashi raxe í myû zuí é asak shigâm yuq tô é nghut luí, lhohkyap hkangmó ashi zuí ri. Hau htoq agó, shigâm haú pé mâ é ahaq pé gi, byù myû pé lé yâ gè râ matú nghut ri.

³ Nhing é haí le a joq lo râ nghut lhê. Garai Gasang eq Sauzô é hkohkâm-tanghkuq gi, myuq hkaú haú má joq nyì râ nghut mù, Yhâng é dui-nhâng zoshâng wuì gi, Yhang lé no-kuq dojaú kó râ nghut lhê.

⁴ Yhangmoq gi, Yhâng é myoqdong lé myàng kó râ nghut é htoq agó, yhangmoq é nge-lang má, Yhâng é mying kê tap é hui kó râ nghut lhê.

⁵ Myín nghû é le joq râ a nghut lo. Myibung duqbó byì é le, buì tsô byì é le,

yhangmoq ra kó râ a nghut lo, hkâsu mù gâ le, haú Yhumsing Garai Gasang gi, yhangmoq lé duqbó byì nyì râ nghut lhê. Hau htoq agó, yhangmoq gi, pyat dedu ahtum abyuq up nyì kó râ nghut lhê.

⁶ Maumang haú gi, ngo lé, "Dang shí pé gi, lunging é dang eq tengmán é dang nghut lhê. Myiqhtoí pé é woi-nyí lé up é Yhumsing Garai Gasang gi, adê myáng má dut lò râ hkyô pé lé, Yhâng é dui-nhâng zoshâng wuì lé tân shit râ matú, Yhâng é maumang lagyo lé nhang kat é nghut ri." ga taí ri.

Yesuq Jé Lé Lô Râ Hkyô

⁷ "Wú keq, Ngò gi, a myáng má jé lé lô râ nghut lhê! Laiká shí má bo é myiqhtoí dang pé lé châng kut é sù gi, hkungsô wó nyi ri."* gâ é lé, ngò wó gyô ri.

⁸ Haú hkyô pé lé wó myâng wó gyô é sù gi, ngò Yohan nghut lhê. Ngò gi, haú hkyô pé lé wó myâng wó gyô é hkûn, ngo lé, shí hkyô pé tân shit é maumang lagyo é hkyí wang má noqkuq râ matú paí gop é nghut lhê.

⁹ Nghut kôhang, yhang gi, ngo lé, "Haú su hkâkut! Ngò gi, nàng eq le, náng é gumang myiqhtoí pé eq le, laiká shí mâ é mungdang pé lé châng kut é lhunglhang bang eq le rahá, byinzùm dui-nhâng zoshâng ru nghut lhê. Garai

* 22:7 Dang shí hkun gi, Yesuq taí é nghut lhê.

Gasang lé noqkuq aq!" ga tai ri.

¹⁰ Hau htang, yhang gi, "Laiká shí má bo é myiqhtoi dang pé lé, hkâzaú to lo, hkâsu mù gâ le, haû ahkyíng gi, chyâng lò bê nghut ri.

¹¹ A dingmán é sù gi, a dingmán é đông xoq kut nyí sháng gaq; a sansêng é sù gi, a sansêng é đông xoq dut nyí sháng gaq; dingmán é sù gi, dingmán é đông xoq kut nyí sháng gaq; chyoyúng é sù gi, xoq chyoyúng nyí sháng gaq." ga ngo lé tai kyô ri.

¹² "Wú keq, ngò gi, a myáng má jé lé lô râ nghut lhê! Ngò gi, yuq hkangmó lé, yhumsíng kut é eq rajung za byi râ shigyaú chyunghuq ching tô lhê.

¹³ Ngò gi, Alhpa eq Omega nghut lhê, Sâng-hi eq Jihôm nghut lhê, Sâng-hi Awang eq Ló Htáng Sù le nghut lhê.

¹⁴ Asak shigâm má jé râ eq myuq hkaû shut hkúmdong mai wó wang jé râ ahkáng wó yú shoq, yhumsíng é buhíng lé chí sán é bang gi, hkungsô wó nyi ri.

¹⁵ Shinggan má gi, hkui đông nyi é bang, myoqheq hpaqchyí kut é bang, ashop é đông gungsho zùm yap é hkyô shut é bang, byù sat é bang, hparà noq é bang eq mhaû é hkyô lé ô nàu luí châng kut é bang lhunglhang nyi bum akô nghut ri.

¹⁶ Ngò, Yesuq gi, haû noqkuq hpung pé lé, shí hkyô

pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, haû duqbó é Bó-myhû le nghut lhê.[†] gâ é lé, ngò wó gyô ri.

¹⁷ Haû Woi-nyí eq myisik gi, "Lé aq!" gâ akô. Haû wó gyô é sù gi, "Lé aq!" ga sháng gaq. Wuí shit sù ó yuq nghut kôle, lé sháng gaq; shuq nau é sù ó yuq nghut kôle, ahpau byi a ra é asak wui lé, shuq sháng gaq.

¹⁸ Laiká shí má bo é myiqhtoi dang pé lé wó gyô é bang yuq hkangmó lé, ngò sidiq byí é gi: dang haú pé má, rajung jung kat jat é sù ó yuq chyáng nghut kôle, Garai Gasang gi, laiká shí má kê tô é wúm pé lé jé nhâng râ nghut lhê.

¹⁹ Myiqhtoi laiká shí má bo é dang pé lé, yu pyâm é sù ó yuq lé nghut kôle, Garai Gasang gi, laiká shí má kê tô é asak shigâm eq chyoyúng myuq mâ é yhang eq sêng é gû lé, yu pyám byi râ nghut lhê.

²⁰ Shí hkyô pé lé saksé hkâm byí é Sù gi, "Nghut bê, Ngò gi, a myáng má jé lé lô râ nghut lhê." ga tai ri.

Amen. Yhumsíng Yesuq é, lé lô aq ô!

²¹ Haû Yhumsíng Yesuq é jeju gi, Garai Gasang é byu pé chyáng joq nyí sháng gaq ô! Amen.

[†] 22:16 Dang shí hkun gi, Yesuq tai é nghut lhê.